



Tuhun cha sañahá ra Jesucristo chi yo

Jamiltepec Mixtec New Testament

Contents

San Mateo 1

San Marcos 49

San Lucas 79

San Juan 131

Hechos 167

Romanos 212

1 Corintios 232

2 Corintios 250

Gálatas 263

Efesios 270

Filipenses 277

Colosenses 282

1 Tesalonicenses 287

2 Tesalonicenses 291

1 Timoteo 294

2 Timoteo 300

Tito 304

Filemón 307

Hebreos 308

Santiago 323

1 Pedro 328

2 Pedro 334

1 Juan 337

2 Juan 342

3 Juan 343

Judas 344

Apocalipsis 346

Tuhun cha sañahá ra Jesucristo chi yo

New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

© 1983, Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0457-7

PDF generated on 21 Sep 2016 from source files dated 21 Sep 2016

7411d349-0f34-5963-987e-74457a7bad38

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit www.DBS.org (USA), www.BibleLeague.ca (Canada), and www.OpenDoors.org (Europe). May God bless your work in sharing and teaching these Scriptures, until, as it is written, the earth is *“filled with the knowledge of the glory of the LORD, as the waters cover the sea.”* (Habakkuk 2:14)

Tuhun Nyoo Cha Tyaa San Mateo

Ñáyivi vachi ra Jesucristo tata

(Lc. 3.23-38)

¹Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

²Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra. ³Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram. ⁴Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón. ⁵Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaf. ⁶Ta sehe ra Isaf cuví chi rey David. Ta sehe rey David chihin ñaha cha cuví ñasihi ra Urías cuví chi ra Salomón.

⁷Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza. ⁸Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías. ⁹Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías. ¹⁰Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías. ¹¹Sehe ra Josías cuví chi ra Jeconías ta yañi ra. Cacacu ra quívi catiñ ra ñuu Babilonia chi ñu Israel, cuhan coyo ñu cua sacuvi ñu tyiño nuu ñu.

¹²Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel. ¹³Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor. ¹⁴Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud. ¹⁵Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob. ¹⁶Ta ra Jacob cuví sutu ra José yíi cu María. Ican ña cuví sihi ra Jesús ra cuví Cristo, o cuñí chi catyí, ra cha saquichi Nyoo vatyi cuví ra rey cuenda yo.

¹⁷Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quívi tññ ñu Babilonia chi ñu Israel. Ta nyacua nya quívi cuan chicoo uchi cumi ca tahan tata ñu nyacua nya quívi cacu ra Cristo.

Nu cacu ra Jesucristo

(Lc. 2.1-7)

¹⁸Tyehe caa cacu ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí li Nyoo. ¹⁹Ta ra José ra cua cuví yíi ña, cuví ra noo ra vaha. Ta ña cuñí ra cuhva ra tícahan nuu chi ña, yucuan chaha tyaa ra cuhva cha sandoo xehe ra chi ña. ²⁰Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuví ña ñasihun, vatyi sehe ña cha cua cacu, cuenda Tatyí li Nyoo cuví. ²¹Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyi cusacacu ra chi ñáyivi chihin cuatyí ñu.

²²Tandihi ihya cuví tacuhva nachino cava tuhun cha cahán Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahán ra.

²³Ta catyí ra tyehe caa:

Ñaha tyivaa cha ta coo ca rayíi chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴Cuhva cha nducachi iñi ra José, sacuvi ra tari cuhva catyí ángel cuan chi ra. Ta quehen ra chi cu María vatyi cuví ña ñasihi ra. ²⁵Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

2

Nu cuhan coyo ra chiñi tuñi cua nyehe ra nu cacu ra Jesús

¹Cacu ra Jesús noo ñuu cha nañí Belén. Ta ñuu cuan nyaá chi nu cuví Judea. Ta rey Judea cuan nañí ra Herodes. Tyicuan ta chaq coyo suhva ra nya ñuu Jerusalén. Quichi coyo ra ityi nu caña ñanyii. Ta ra cachiñi tuñi xaan cacuví ra. ²Ta candaca tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyi ityi nu caña ñanyii nyehe ndi tiño cha chahá cuenda tyi cacu ra ityi

ihya. Ta vachi ndi vachi sacahnu ndi chi ra —cacatyí ra.

³ Ta quívi cha chito rey Herodes tuhun cuan cutyoño cuñi ra. Ta tyicuan caa tucu tandihi ñáyivi ñuu Jerusalén cuan. ⁴ Tyicuan ta cana ra Herodes chi tandihi ra cacuví nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo. ⁵ Ta canacahan ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyi tyehe caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyi Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta cana xehe ra Herodes chi ra chiñi tuñi cuan, ta ndaca tuhun ra chi ra ñáa cuhva ta ñáa quívi caña tiño cuan.

⁸ Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quíchi catyi ndo chii, tacuhva vatyi cuhun tucu yuhu cusacahni chi cue —catyí ra Herodes chi ra.

⁹ Cha yaha cachíni ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehé ra ityi nu caña ñanyii cuan, cuahan ti ityi nuu ra. Ta chicuiñi ti maa maa siqui nu catuví cha lee cuan. ¹⁰ Ta cuhva cha canyehé ra chiñi tuñi cuan tyi chicuiñi tiño cuan, sii xaan cacuiñi ra. ¹¹ Ta caquihvi ra chichi vehe nu catuví cha lee cuan. Ta cananyehé ra chi cue chihin cu María sihi cue. Ta chicuiñi chiti ra vatyi sacahnu ra chi cue. Tyicuan ta canuñá ra yuhu caja cha canyisó ra. Ta catava ra regalo cha cuví xuhun cuan, ta cutu vixi chahán, ta ndutya vixi chahán cha nañi mirra. Ta cachahá ra chi cue. ¹² Yaha cuan ta catahan ra ñumahna ta cutuñi iñi ra vatyi ña tahán chi canayaha ra ityi nu nyaá ra Herodes, yucuan chaha siin ca ityi cuanuhu coyo ra.

Nu chingo xehe ra José ta cu María chihin cha lee nya Egipto

¹³ Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tuví nuu ra José chichi ñumahna. Ta catyí ra chi ra:

—Ndícuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyi ra Herodes cunanducu ra chi cha lee ihya vatyi cahñi ra chi cue.

¹⁴ Tyicuan ta ndícuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto. ¹⁵ Ta yucuan chinyaa ñu nyacua nya cha chihí ra Herodes. Tyehe caa cuví tacuhva na chino cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto cané chi Sehi”, catyí ra.

Nu tachí ra Herodes na cahñi ra chi ra cuatyaa

¹⁶ Cha tuví iñi ra Herodes vatyi ra cachíni tuñi cuan sandaví ñaha ra chi ra, nduxaan vavaha ra. Ta tachí ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuví ra vatyi nandichí xiñi ra vatyi tyicuan tahan cuiya ra Jesús tari cuhva catyí ra chiñi tuñi cuan chi ra. ¹⁷ Tyicuan caa chingo cava tuhun cahán Nyoo cha tyaa ra Jeremías profeta Nyoo ta cha naha, ta catyí ra tyehe caa:

¹⁸ Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachihí sehe ñu, catyí chi nuu tutu Nyoo.

¹⁹ Soco cha yaha cha chihí ra Herodes, tyicuan ta tuví tucu noo ángel cha tachí Sutu Mañi yo nuu ra José nu quixí ra ñuu Egipto. Ta catyí ra chi ra:

²⁰ —Ndícuita ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyi cha chihí ra nducu cahñi chi cue.

²¹ Tyicuan ta ndícuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel. ²² Soco quívi chito ra José vatyi ra Arquelao cuví ra rey tyiño nuu sutu ra, ra Herodes, nya Judea, nayuhvi ra ta ña cuñi ra cuhun ra

yucuan. Ta vatyi sacotō Nyoo chi ra chichi ñumahna, yucuan chaha cuanuhu ñu nya Galilea. ²³ Cha chaq ñu yucuan, cuahan ñu nya ñuu Nazaret, cua coo ñu. Ta yucuan chiyō ñu. Tyehē caa cuvī tacuhva chino cava tuhun cha cahán Nyoo, cha catyaa ra profeta ta cha naha. Vatyi catyī ra tyi ra Jesús ra ñuu Nazaret cucunañi ra.

3

Ra Juan ra sacondutya chi ñáyivi cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

¹ Quivī cuan ra Juan ra sacondutya chi ñáyivi cuahan ra noo chiqui ndii ityi Judea. Ta quichahā cahan ra tuhun Nyoo chihin ñu. ² Ta catyī ra:

—Ndu uvi iñi ndo cuatyī ndo vatyi cha yatyin nyaá Nyoo ra cua cunyaca ñaha añima yo.

³ Ican tuhun ra Juan ihya cuvī cha tyaa ra Isaías ra cuvī profeta Nyoo ta cha naha. Tyehē caa tyaa ra:

Chiniñ yo cha caná chaa noo ra noo nu chiqui ndii ta catyī ra:

“Tari sanduvahá ndo noo ityi, tyicuan caa sanduvaha ndo añima ndo, vatyi cua quichi Sutu Mañi yo.

Nuñā ndo noo ityi ndoo chi ra naquihvi ra añima ndo.”

⁴ Ta ra Juan ñihnó ra sahma chino chihin ixi camellu. Ta sincho ra, ñii cuvī. Ta maa maa ri pinchi chachí ra ta tyañuñu cuhu chihí ra. ⁵ Ñáyivi ñuu Jerusalén ta tandihí ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichī tyasoho ñu tuhun cahán ra. ⁶ Ta cha yahā nahma ñu cuatyī ñu, ra Juan sacondutya ra chi ñu yuvi cahnu Jordán cuan.

⁷ Soco ra Juan nyehe ra vatyi cuaha xaan ra fariseo, ra quichahā xaan ley vehe ñuhu, ta cuaha xaan ra saduceo, caquichī coyo ra vatyi condutya ra. Ta catyī ra chi ra:

—¡Nyoho, tari noo tata coo xaan cuvī ndo! ¿Yóo cha sacotō chi ndo vatyi chihin cha condutya ri ndo ta ma tachi tuñi ca Nyoo chi ndo? Ña ndicha. ⁸ Cqo ndo noo cha quetuví vaha tyi ndicha cha ndu uvi iñi ndo cuatyī ndo. ⁹ Ta ma cuyaa ndo catyī ndo vatyi tata ra Abraham vachi ndo. Vatyi nyacua nya chihin yuu ihya ta cuvī savaha Nyoo ñáyivi tata ra Abraham. ¹⁰ Tari yutun

cha ña chahá chiti, tyicuan caa cuvī ndo. Vatyi ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyivi chi tun. Ta cahmi ñu chi tun. Tyicuan caa tucu nyoho, cuhun ndo nu cayú ñuhu.

¹¹ Cha ndicha vatyi yuhu sacondutye chi ñáyivi chihin ndutya, tari noo seña vatyi cha ndu uvi iñi ñu cuatyī ñu. Soco cha yaha sacondutya yuhu chihin ndutya, vachi inga ra cusacondutya chi ñáyivi chihin Tatyí li Nyoo ta chihin ñuhu ihñi. Iyó ca tunyee iñi chi maa ra ta ñima ca yuhu. Ta ni cha cuise ndichan ra ta ña nañe, vatyi cahnu xaan ca ra cuvī ra. ¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuvī maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

Nu condutya ra Jesús

(Mr. 1.9-11; Lc. 3.21-22)

¹³ Tyicuan ta quita ra Jesús Galilea ta chaa ra yuvi cahnu Jordán nu ñohó ra Juan, vatyi cuñí ra cha sacondutya ra Juan chi ra. ¹⁴ Cha xihna ri ña cuñi ra Juan sacondutya ra chi ra, ta quichahā catyí ra chi ra Jesús tyehē caa:

—Yoho cuñún cha sacondutye chuun, soco ña tahán chi cha sacondutya yuhu chuun. Maun tahán chi sacondutyon chii —catyí ra.

¹⁵ Soco ra Jesús catyí ra chi ra:

—Cha vityin, na cuvi chi cuhva catyí yuhu chuun. Vatyi cuñí chi cha sacuvi yo tandihí cha cuñí Nyoo —catyí ra chi ra Juan. Tyicuan ta ndog ra Juan vaha.

¹⁶ Cha yahā ri condutya ra Jesús ta quita ra chichi ndutya. Ta nuña ri andiví, ta ra Jesús nyehe ra yoso caa vachi noó Tatyí li Nyoo, tari noo paloma, ta chaq chi siqui ra.

¹⁷ Tyicuan ta tyacu noo ndusu ityi andiví, ta catyí chi tyehē caa:

—Ican ra ihya cuvī Sehi, ra cuñí xain chi. Ta sii xaan cuñí chihin ra —catyí ndusu cuan.

4

Nu nducú nyehe cuhna chi ra Jesús

(Mr. 1.12-13; Lc. 4.1-13)

¹Tyicuan ta Tatyí li Nyoo chinyacá chi ra Jesús noo chiqui ndii, tacuhva nducu nyehe cuihna chi ra.

²Ña chachj ra uvi xico quivi ta uvi xico ñuu. Ta yaha cuan ta chaá soco chi ra.

³Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyivi ta conyito ñu. Conyito tucu aña ñu chihin tuhun cahán Nyoo” —catyí ra Jesús chi cuihna cuan.

⁵Tyicuan ta chinyacá cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan. ⁶Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸Tyicuan ta chinyacá tucu cuihna cuan chi ra noo yucu sucun. Ta sañaha cuan tandihi cha cahnu cuví nu nyacá ñaha rey ta ra cuví tyiño chi ñáyivi iyó siqui ñuhu ñáyivi. ⁹Ta catyí cuihna cuan chi ra tyehe caa:

—Yuhu cuhve tandihi maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta iin ri chi maa ra quichaha yo.”

¹¹Tyicuan ta cuahan cuihna cuan, ta ndog ra Jesús, ta chaá coyo ángel ta tyinyee ra chi ra.

Nu quichahá saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹²Quivi cha chito ra Jesús vatyí ra Juan ñohó ra vehe caa, cuahan ra nya Galilea.

¹³Soco ña ndog ra ñuu Nazaret, nu chahnu ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí. ¹⁴Tyehe caa cuví tacuhva chino cava tuhun cha tyaa ra Isaías nu tutu Nyoo ta cha naha. Catyí chi tyehe caa:

¹⁵Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶Chinyicu aña ñu nu ñaa iñi vatyí chinyacá ñaha ra ña vaha chi ñu chihin tuhun chihi, soco sandundichín ñuhu Sutu Mañi yo aña ñu nu nyicú ñu, catyí ra Isaías.

¹⁷Nyacua nya quivi cuan, ta quichaha cahan ra Jesús tuhun Nyoo chihin ñáyivi, ta catyí ra chi ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha aña ñu ndo —catyí ra Jesús chi ñáyivi.

Nu caná ra Jesús chi cumi tahan ra catiín tiyaca

(Mr. 1.16-20; Lc. 5.1-11)

¹⁸Ra Jesús chicá noo ra yuhu miñi cha nañi Tyañuhu Galilea cuan. Ta nanyehé ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catiín tiyaca cacuví ra. Ta cacañi ra yuhva ra nu ndutya. ¹⁹Tyicuan ta quichahá catyí ra Jesús chi ninduvi ra tyehe caa:

—Cunyicon ndo chii. Ta yuhu cusacuvi vatyí tari ñihí ndo tiyaca, tyicuan caa cuiñi ndo anima ñáyivi (ta cutava ndo chi ñu nu quiñi caa na quihvi ñu cuenda Nyoo) —catyí ra Jesús chi ra.

²⁰Caa cuhva ri cuan casando ra yuhva ra ta cuahan coyo ra chihin ra Jesús.

²¹Chiin ri ca chicá ra Jesús ityi nuu ca ta nanyehé ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta caná ra Jesús chi ra. ²²Ta caa cuhva ri cuan

casandoꝝ ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyivi
(Lc. 6.17-19)

²³ Cuahan ra Jesús chicá noo ra tandihi ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo añaima yo. Ta sanduvahá ra chi ñu cuhví chihin tandihi ri nuu cuehe cha iyó chi ñu. ²⁴ Cachitó tandihi ñáyivi ñuu cha nyicú Siria tuhun ra Jesús. Ta quichi nyaca ñu tandihi ñu cuhví chi ra: tandihi ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihí tañi chi ñu. Ta yihí ñu ña cuví nacanda ñu. Ta ra Jesús sanduvahá ra chi tandihi ñu. ²⁵ Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihi.

5

Nu cahán ra Jesús nuu ñáyivi nu chiqui
(Lc. 6.20-23)

¹ Cuhva cha nyehe ra Jesús tyi cuaha xaan ñáyivi, ndaá ra noo nuu yucu. Ta chichunyaá ra yucuan. Tyicuan ta ñu nyicón chi ra chichunyicu ñu nicachico nu nyaá ra. ² Tyicuan ta quichahá sañaha ra Jesús chi ñu tyihe caa:

³ —Tandihi ri ñu cha chitó vatyí chihuhú Nyoo chi ñu, sií xaan cucuvi chi ñu, vatyí tahán chi vatyí cunyaca ñaha Nyoo añaima ñu.

⁴ "Ta tandihi ri ñu nducuihya iñi vityin cha catyí cuatyí ñu, sií xaan cucuvi chi ñu. Vatyí cusanaa Nyoo cha cuihya iñi ñu.

⁵ "Tandihi ri ñu cha ña cahnu sahá chi, sií xaan cucuvi chi ñu, vatyí cuquehen cuenda ñu ñuhu ñáyivi cha catyí Nyoo tyi cuhva ra chi ñu.

⁶ "Ta tandihi ri ñu cuñí xaan sacuvi cuhva catyí Nyoo, sií xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

⁷ "Ta tandihi ri ñu cha iyó tucahnu iñi chi, sií xaan cucuvi chi ñu, vatyí Nyoo, cucco ticahnu iñi chi ra chihin ñu.

⁸ "Ta tandihi maa ñu ndundiñ añaima saha Nyoo, sií xaan cucuvi chi ñu, vatyí ñu cuan, cunyehe ñu chi Nyoo.

⁹ "Ta ñu nducú cuhva cha coo taxi ri ñáyivi chihin Nyoo sií xaan cucuvi chi ñu, vatyí Nyoo, cucatyí ra tyi sehe ra cuví chi ñu.

¹⁰ "Ta tandihi ñu cha tasi cuñí nyehe ñáyivi chi ñu cha catyí cha sacuví ñu tari cuhva catyí Nyoo, sií xaan cuvi chi ñu, vatyí nyacá ñaha Nyoo añaima ñu.

¹¹ "Na cusí cuñi ndo tatu cahán ña vaha ñáyivi siquí ndo. Ta sanyehé ñu tindoho chi ndo. Ta tavá ñu cuaha cuendu siquí ndo cha catyí yuhu. ¹² Na cusí cuñi ndo vatyí tatu tyihe caa sacuví ñu chihin ndo, sií xaan cucuvi chi ndo, vatyí cahnu xaan ta tyaquí xaan cha cutahan chi chi ndo, nachaa ndo andivi. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihi yo cha chinó iñi yo chi Nyoo cuví yo tari ñi cha ndihi cha uhva

(Mr. 9.50; Lc. 14.34-35)

¹³ "Nyoho cha chinó iñi ndo chii, tari ñi vaha cuví ndo. Soco tatu ñi, ta ndihi cha uhva, ma sacu uhva ca chi cha cachi yo. Ña vaha ca ñi cuan. Tyicuan ta sacuita yo. Ta cuañi ñáyivi siquí chi.

Tatu vaha quichahá yo tuhun cahán Nyoo, cuví yo tari ñuhu cha sandundichín nu cuahan ñáyivi nu ñaa iñi

¹⁴ "Nyoho cuví ndo tari ñuhu cha sandundichín nu cuahan ñáyivi. Noo ñuu cha nyaá xiñi noo yucu, ma cuvi quihí xehe. Tyicuan caa tahán chi cuvi ndo. ¹⁵ Ta yori yo cha tyaa yo noo ñuhu tima, ta tixehe yo chichi noo caja. Soco tyiso yo noo nu sucun vatyí sandichín chi chichi vehe tatu cua quihvi ñáyivi, soco ndichin. ¹⁶ Ta tyicuan caa tahán chi sandundichin tucu nyoho chihin ñuhu Nyoo cha iyó añaima ndo nu cuahan ñáyivi. Tyicuan ta nanyehe ñu cha vaha cha nyacuví ndo, ta sacahnu ñu chi Sutu yo Nyoo ra nyaá andivi.

Sañahá ra Jesús vatyí ñiñi xaan sacuvi yo ta sañaha yo tandihi tuhun cha tachi Nyoo chi yo

¹⁷ "Ma cuñi ndo vatyí yuhu vachi sanai ley cha tachi Nyoo chi ra Moisés vatyí tyaa ra. Ta ni ri ña vachi sanai tuhun cha tyaa ra cacuví profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandihi cha catyí tuhun cuan, ta sañahí ñaa cha cuñí

chi catyí. ¹⁸ Cha ndicha catyí chi ndo vatyí cha ní ri ca cha iyó ca andívi chihin ñuhu ñáyiví ma naa ní chiin cha tyaá ra Moisés ta ra cacuví profeta Nyoo ta cha naha, nyacua nya yaha cuvi tandihí tari cuhva nyaá cha catyaá ra. ¹⁹ Yucuan chaha, tatu ña quichahá ñáyiví tuhun cha tachí Nyoo chi ñu, vasi noo tuhun luhlu ri cuví, ta tatu chasí ñu nu quichaha inga ñáyiví, luhlu xaan cucuví ñu nu nyacá ñaha Nyoo. Soco ñu cha quichahá tandihí, ta sañahá tucu ñu chi inga ñáyiví. Ican ñu cuan cahnu xaan cucuví ñu nu nyacá ñaha Nyoo. ²⁰ Vatyí cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuvi quihví ndo nu nyacá ñaha Nyoo.

Nu sañahá ra Jesús chi yo vatyí ma cuxaan yo chi ñáyiví

²¹ 'Nyoho cha cuaha chaha chíñi ndo tuhun cha catyí Nyoo chí ñu chíyo ta cha naha. Catyí ra: "Ma cahñi ndo chí ñáyiví, vatyí tatu cahñi ndo ñáyiví, tahán chí cutuñi chí ndo." ²² Soco yuhu, catyí chí ndo, vatyí vasi cha cuxaan ri ndo chí noo ñáyiví, o vasi cha cahán uhvi ri ndo chí ñáyiví, o vasi cha cahán nyaá ri ndo chí ñáyiví, tahán chí cutuñi chí ndo. Ta siin ri saha cuenda ndo chí ndo coto cuhun ndo anyaya chihin cuatyí cuan.

²³ 'Ta yucuan chaha quivi cuahun vehe ñuhu, ta nyisón cha cucuhvon chí Nyoo, ta tatu cha nanyaun cha cua cuhvon ta nichon iñun vatyí ña vaha iyó noo yañun chuhun. ²⁴ Sandoo cha cua cuhvon chí Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chí Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya
(Lc. 12.57-59)

²⁵ 'Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chí ra ityi cuahun, coto cuhva cuenda ra chuun chí ra cuví tyiño. Ta ra cuví tyiño cua cuhva cuenda ra chuun chí policía. Ta policía cuan cutyihí ra chuun vehe caa. ²⁶ Soco catyí chuun vatyí ma cuvi quiton vehe caa cuan nyacua nya tyiyahvun tandihí cha tahán chí tyiyahvun.

Sañahá ra Jesús vatyí ni cha ndichi xiñi yo cha coo nonga ñusihi, o nonga rayii chí yo, ta ña vaha

²⁷ 'Nyoho chíñi ndo tuhun vatyí catyí Nyoo ta cha naha vatyí nyoho cha iyó ñasihi ndo, ma coo inga ñusihi chí ndo. ²⁸ Soco yuhu catyí chí ndo, vatyí nya nyoho cha nyehé ndo chí noo ñusihi ta quihví iñi ndo chí ñu, catyí chí ndo vatyí chihin yucuan ri ta cha chicoo cuatyí ndo.

²⁹⁻³⁰ 'Vatyí tatu chíti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chíti nuun, ta ñima ca chihin cha ninduvi chíti nuun ta cuhun nu cayu ñuhu chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhu chichi anyaya.

Nu sañahá ra Jesús siqui ra sandoo ñasihi
(Mt. 19.9; Mr. 10.11-12; Lc. 16.18)

³¹ 'Ta suri catyí tucu Nyoo chí ñáyiví chíyo ta cha naha vatyí yóo ra sandoo ñasihi, cuñí chí cuhva ra noo tutu cuenda cha sandoo ra chí ña. ³² Soco catyí yuhu chí ndo, ñahri ityi iyó chí noo ra cha sandoo ra chí ñasihi ra tatu ña natuvi ña chihin inga rayii. Vatyí tatu sandoo ra chí ña, ta ñima cha catyí cuatyí cuan, chicoo cuatyí ra nuu Nyoo. Ta siin ri sacco ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chí ña cuan.

Ma catyí yo "chito vaha maa Nyoo" tacuhva chino iñi ñáyiví vatyí ndicha cha cahán yo

³³ 'Ta chíñi tucu ndo, vatyí catyí tucu Nyoo chí ñu chíyo ta cha naha tyehe caa: "Tatu tyanaha ndo Nyoo tyi cusacuví ndo noo cha cusacuví ndo, tahan chí cha sacuví ndo." ³⁴ Soco yuhu catyí chí ndo vatyí ma tyanaha ndo Nyoo tacuhva chino iñi ñáyiví vatyí ndicha cha cahán ndo. Ta ma tyanaha ndo ni tuhun andívi, vatyí yucuan nu nyaá maa Nyoo cuví. ³⁵ 'Ta ní ri tuhun ñuhu ñáyiví ihya ma tyanaha ndo, vatyí yucuan cuví nu chañí Nyoo. Ta ní ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu ca. ³⁶ 'Ta ní ri

tuhun xiñi ndo, ta ma tyanaha ndo, vatyi ma cuvi sanducuichin ndo ni noo ixi xiñi ndo. Ta ni ma cuvi sandutoon tucu ndo.³⁷ "Ican" catyi ndo, tatu ican. Soco tatu ñima, "ñima", catyi ndo. Ta ma tyanaha ndo Nyoo vatyi ra ña vaha tyiyuhú chi ndo cuví cuan.

Nu sañahá ra Jesús vatyi tatu sacuví ñáyivi cha ña vaha chihin yo, na sacuvi yo cha vaha chihin ñu

(Lc. 6.29-30)

³⁸ "Ta chiñi tucu ndo cha catyi tuhun cha tyaa ra Moisés ta cha naha: "Vatyi tatu noo ñáyivi cañi ñu nuu ndo, ta tahvi noo noho ndo, o tivi noo chiti nuu ndo, o nya chi ndo sañicuehe ñu, tahán chi vatyi sañicuehe tucu ñáyivi chi maa ñu, tari cuhva cha sañicuehe ñu chi ndo."³⁹ Soco yuhu catyi chi ndo, vatyi ma nasacuvi ndo cha ña vaha cha nyacuví ñu tasi iñi chi ndo. Vatyi tatu yóo cha cañi iñ chiyo xitín ndo, ma nduxaan ndo chi ñu. Soco cuhva tucu ndo inga chiyo xitín ndo na cañi ñu.⁴⁰ O tatu chican ñu cuatyí chaha ndo, ta cuñí ñu tinyaa ñu noo camisa ndo, ma cuxaan ndo chi ñu. Soco cuhva ndihí ndo chaqueta ndo chi ñu.⁴¹ O tatu yóo cha catyi chi ndo na cuiso ndo cha chii ñu noo kilómetro, cuiso ndo uvi kilómetro.⁴² Tatu yóo ñu chican tumañi iñi chi ndo, cuhva ndo chi ñu. Ma catyi ndo cha ma saha ndo tumañi iñi cuan.

Na cuñi yo chi ñu xaan iñi chi yo

(Lc. 6.27-28, 32-36)

⁴³ "Ta chiñi tucu ndo tuhun cha catyi ñu chiyo ta cha naha vatyi cuñi ndo chi ra tahan ndo. Ta chi ra xaan iñi chi ndo quíhi tisihi iñi ndo chi ra.⁴⁴ Soco yuhu catyi chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñi nyehe chi ndo. Ta cacan tahvi ndo chaha ñu quiñi nyacuvi chihin ndo ta sanyehé tindoho chi ndo.⁴⁵ Ta tyicuan caa sacuvi ndo tacuhva coto ñáyivi vatyi cuví ndo sehe Sutu yo ra nyaá andivi. Vatyi maa ra sacaá ña ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandihí.⁴⁶ Tatu nyoho ta cuñí ndo chi ñáyivi cha vaha iyó chihin ndo ta ña cuñi nyehe ndo chi ñáyivi xaan iñi chi ndo, ñahri cha vaha cuñihí ndo. Vatyi suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca

iyó ra cuan cuñí maa ndo.⁴⁷ O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyi suri tyicuan caa sacuvi tucu ñáyivi ña ñohó nuu Nyoo.⁴⁸ Tari Sutu yo cha nyaá andivi maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuvi yo tumañi iñi

¹ Saha ndo cuenda ta ma cuyaa ndo ñáá tumañi iñi sacuvi ndo chi ñáyivi. Vatyi tatu cuyaa ndo nuu ñáyivi, ñahri cuñihí ndo nuu Sutu yo ra nyaá andivi.² Cuhva cha sahá ndo tumañi iñi, ma sacoto ndo chi inga ñáyivi vatyi sahá ndo tumañi iñi. Ma sacuvi ndo tari sacuví ra sahá tyi vaha ta chicí noo ra nuyahvi ta chichi vehe ñuhu. Sahá ra tumañi iñi tacuhva na catyi ñáyivi vatyi vaha xaan ñáyivi cuví ra. Soco yucuan ri ñihí ra cuan ta ñahri ca cuñihí ra nuu Nyoo.³ Soco nya quívi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo.⁴ Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutu yo Nyoo

(Lc. 11.2-4)

⁵ Ta cuhva cha chican tahvi ndo chi Nyoo, ma cacan tahvi ndo tari cuhva sacuví ñu savahá chii. Vatyi ñu cuan tahan iñi ñu cacan tahvi ñu chi Nyoo nu tuvi ñáyivi, tacuhva catyi ñáyivi vatyi vaha xaan ñáyivi cuví ñu, vaha xaan chinó iñi ñu chi Nyoo. Soco catyi chi ndo cha ndicha vatyi ñahri ca cuñihí ñu nuu Nyoo. Vatyi ñima cha ndicha sacuví ñu.⁶ Soco nyoho ñáá quívi cacan tahvi ndo chi Nyoo, ma cacan tahvi ndo tacuhva nyehe ri ñáyivi chi ndo. Soco quíhvi ndo chichi vehe ndo ta nacasi ndo yuvehe ta cacan tahvi ndo chihin tandihí añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyi nuu maa ra chican tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

⁷ Cuhva cha cahan ndo chihin Nyoo ñima susuri tuhun cha ñima ri tuhun cahan ndo. Vatyi tyicuan caa sacuví ñu cha ñahri tuhun Nyoo caá añima. Cuñí maa ñu vatyi tyicuan

caa ta cuiñi Nyoo cha cahán ñu. Vatyí cuaha xaan chaha cahán ñu susuri maa tuhun cuan. ⁸ Ma sacuví ndo tyicuan caa. Vatyí Nyoo cha chitó ra ñáá cha chiñuhú chi ndo, cha ni ri ca cha cumañi ca cacán ndo chi ra. ⁹ Yucuan chaha nyoho, tatu cua cacán tahvi ndo chi Nyoo, tyehe caa catyí ndo: Sutu Mañi yuhu, yoho cha nyaún andivi. Sacahnú xaan ndi chuun.

¹⁰ Na quichi quivi cha nyaca ñahun ihya siquí ñuhu ñayiví, tari nyacá ñahun andivi.

Na sacuví ñayiví ihya siquí ñuhu ñayiví tandihí cuhva cuñí maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quivi.

¹² Saha tucahnu iñi chi ndi ñáá ndihí cha ña vaha nyacuví ndi, tari maa ndi sahá ndi ticahnu iñi chi ñu sataśi iñi chi ndi.

¹³ Ma cuhvón cha nducu nyehe ra ña vaha chi ndi, tacuhva ma sacuví ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandihí. Ta maun cuaha xaan ca tunyee iñi iyó chuun. Ta tahán chi vatyí sacahnú tandihí ñayiví chuun tyicuan ri maa. Ta na cuvi chi tyicuan caa.

Tyicuan caa cuhva tahán chi cacán tahvi ndo chi Nyoo.

¹⁴ Vatyí tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutu yo ra nyaá andivi, cusaha ra ticahnu iñi chi maa ndo. ¹⁵ Vatyí tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutu yo, ma saha ra ticahnu iñi cuatyí maa ndo —catyí ra Jesús.

Ñáá quivi ña chachí yo ta nanducú yo chi Nyoo, ma sacoto yo chí inga ñayiví

¹⁶ Ta catyí tucu ra Jesús chí ñu chicá noo chihin ra:

—Quivi cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyí cuñí ñu cha coto ñayiví vatyí ña chachí ñu ta nanducú ñu chí Nyoo. Soco catyí chí ndo vatyí yucuan ri ñihí ñu. Ñahri ca cuñihí ñu nuu Nyoo. ¹⁷ Soco tatu nya quivi ña chachí ndo ta nanducú ndo chí Nyoo, nacatya ndo nuu ndo. Ta nacuaa ndo cuca xiñi ndo, ¹⁸ tacuhva vatyí ma tuvi

iñi ñayiví vatyí ña chachí ndo ta nanducú ndo chí Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chí ndo chihin nuu ñayiví.

Nu sañahá ra Jesús vatyí ma sacaya yo cha iyó siquí ñuhu ñayiví

(Lc. 12.33-34)

¹⁹ Ma sacaya ndo cha tyayii ihya ñayiví. Vatyí coto tiví cha tyayii cuan. O cuví tucu quihví ra suhu, ta suhu ra tandihí cha tyayii ndo. ²⁰ Vaha taxin ca sacaya ndo cha vaha chí ndo nu nyaá Nyoo gloria. Vatyí nuu Nyoo ña ndihí cha vaha cuan. Vatyí ni ri ra suhu, ni quiti, yori cha sativí iyó yucuan. ²¹ Ta catyí chí ndo vatyí nu nyaá cha tyayii ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chiti nuu yo chí yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo

(Lc. 11.34-36)

²² Chiti nuu ndo noo cha sandundichín itiyi cuahan ndo cuví. Ta tyicuan caa tucu añima ndo, tatu iyó cha ndichin Nyoo, vaha ñayiví cuví ndo. ²³ Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá añima ndo, tari noo ra cuaa cuví ndo. Ña cuví nyehe ndo itiyi vaha cha cuahan nu nyaá Nyoo.

Sañahá ra Jesús vatyí ma cuvi quichaha yo chí Nyoo tatu cuñi xaan ca yo cha tyayii

(Lc. 16.13)

²⁴ Noo musu ma cuvi coo uvi chitoho ra. Vatyí musu cuan cuñí ca ra chí noo ra ta ñima ca chí inga ra. Ta quichahá ra chí noo ra, ta chí inga ra ma quichaha ra. Ta tyicuan caa tucu nyoho, ma cuvi cuñi ndo chí Nyoo, ta suri cuhva cuan cuñi ndo cha tyayii.

Sañahá ra Jesús vatyí ma caca xaan iñi yo ñáá ndihí cha chiñuhú chí yo

(Lc. 12.22-31)

²⁵ Yucuan chaha catyí chí ndo vatyí ma caca xaan iñi ndo yoso caa ñihí ndo cha cachi ndo ta cha coho ndo. Ni ma caca iñi ndo ñáá cha cuilho ndo. Vatyí yahvi ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuilho ndo. Vatyí maa ra chahá ra ñayiví coo ndo.

Ta ña yíi cuhva ra inga cha chiñuhú chi ndo ñandihí. ²⁶ Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahví ca nyaá nyoho nuu Nyoo ta ñima ca saa cuan? ²⁷ Ni ri maa chicá xaan xiñi ndo ma cuvi sandusucun ndo ni chiin ca chi ndo.

²⁸ Ta tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiqui. Vatyí ña tavi tun. Ta ni ña conó tun isa. ²⁹ Soco catyí chi ndo vatyí ni rey Salomón cha tyayíi xaan cuví ra, soco ña cuví cuihno ra cha tyaquí, tari cha sacuihnó Nyoo chi tu ita cuan. ³⁰ Ta tu ita cuan tyaquí xaan ñihno tun suhva ri quívi ta yaha cuan ta cuna ityí tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra. ³¹ Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá cha cuihno ndi?” ³² Vatyí ñáyívi cha ñahri tuhun Nyoo caá añaíma, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andívi. Ta chitó ra ñáá ndihí cha chiñuhu chi ndo. ³³ Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra añaíma ndo. Ta sacuvi ndo tari cuhva cuñí maa ra. Ta tyicuan caa ñihni ndo tandihí cuii maa cha chiñuhú chi ndo. ³⁴ Tandihí quívi ta iyó tindoho chi ndo. Ma caca xiñi ndo tuhun tindoho cha vachí. Vatyí Nyoo nyaá ra chihin ndo.

7

Ma cahan yo cha caá inga ñáyívi
(Lc. 6:37-38, 41-42)

¹ Ma cahan ndo cha caá inga ñáyívi. Tyicuan caa ta ma tiin Nyoo cuenda cha caá ndo. ² Vatyí tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo. ³ ¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun? ⁴ Tatu chiti nuu maun yihí noo vitu cahnu, ¿yoso caa cuví catyun chi ra yañun: “Nyaca, na tave mihin lee cha yihí chiti nuun?” ⁵ Yoho cha savahún chuun, tava xihna vitu cahnu cha

yihí chiti nuu maun, tyicuan ta cuví nyehé vahun mihin lee cha cutavon chiti nuu ra yañun.

⁶ Ma sañihi ndo cahan ndo tuhun Nyoo chihin ñu ña cuñí coto, vatyí coto cañi ñu chi ndo. Tari ina cha tiin vavaha chi ndo, tyicuan caa cuví ñu. Ta tari quini cha chaca chaha ti cha yahví nyaá, tyicuan caa cahán ña vaha ñu siquí tuhun Nyoo.

Ma cundihñi yo cacan yo chi Nyoo, tyicuan ta cuhva ra chi yo

(Lc. 11:9-13; 6:31)

⁷ Cacan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachan ndo yuvehe, ta nuña. ⁸ Vatyí tandihí ndo cha chicán ndo, ñihni ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹ Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyín pan chi ndo. ¹⁰ Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chi ndo. ¹¹ Nyoho cha quini iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu yo, ra nyaá andívi. Cuaha ca cha vaha cuhva ra chi ndo tatu cacan ndo chi ra.

¹² Tari cuñí maa ndo cha cunyacuvi ñáyívi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachi Nyoo, cha tyaa ra Moisés ta ra cacuvi profeta Nyoo ta cha naha.

Tihin yuvehe ta cuiñi ityí cha cuahan nu nyaá Nyoo

(Lc. 13:24)

¹³ Nducu ndo cuhva quihvi ndo yuvehe tihin. Vatyí quehen yuvehe, ta quehen ityí cha cuahan nya nu cunaa ñáyívi anyaya. Ta cuaha xaan ñu cuahan ityí cuan. ¹⁴ Soco tihin yuvehe ta cuiñi ityí cha cuahan ñáyívi cha ma naa ca maa nu cucoo ñáyívi vaha. Soco suhva ri ñáyívi nañihí ityí cuan.

Chihin cha sacuví ri ñáyívi, ta nicohón nuu yo chi ñu tatu ñu vaha o ñu ña vaha cuví ñu

(Lc. 6:43-44)

¹⁵ Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachí coyo ra tari

noo mbee nu nyicú ndo. Sahá ra tyi ra vaha cacuví ra. Soco tari noo ñaña xaan cacuví ra. ¹⁶ Nyoho cuví ñicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuví ra. Vatyí noo tuñiyaca ma cuhva tun mango, ta ní ri noo iñu nduhva ma cuvi cuhva chi tichaha ndiví. ¹⁷ Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha. ¹⁸ Ta yutun vaha, ma cuvi cuhva tun chiti ña vaha. Ta ní ri yutun ña vaha ma cuvi cuhva tun chiti vaha. ¹⁹ Ta tandihí yutun cha ña chahá chiti vaha, cahnya yo chi tun. Ta cahmi yo chi tun. ²⁰ Ta tyicuan caa, chihin cha nyacuví ñáyiví cuví ñicohon nuu ndo chi ñu tatu ñu vaha cuví ñu, o ñu ña vaha cuví ñu.

Nu catyí ra Jesús vatyí ña tandihí ñáyiví quihví ñu nu nyacá ñaha Nyoo
(Lc. 13.25-27)

²¹ Ma tandihí ñu cha catyí chii: “Sutu Mañi yuhu, Sutu Mañi yuhu”, cuquihví ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihví nu nyacá ñaha ra. ²² Quiví cha cucutuñi chi ñáyiví, cuaha xaan ñu cucatyí ñu chii tyehe caa: “Sutu Mañi yuhu. Yuhu cahin tuhun maun chihin ñáyiví. Ta chihin sivun tave tatyí ña vaha cha yihí añima ñáyiví. Ta cuaha xaan milagru savahí chihin sivun”, cucatyí ñu chii.

²³ Tyicuan ta yuhu cucatyí chi ñu: “Ña ñohó nui chi nyoho. Canyaha ndo nu nyaí. Vatyí nyoho sacuví ndo maa maa ri cha ña vaha.”

Nu sañahá ra Jesús yoso caa cucuvi chi ñu quichahá ta ñu ña quichahá tuhun cahán ra
(Lc. 6.47-49; Mr. 1.22)

²⁴ Ihya catyí chi ndo, yóo cha chiñí tuhun cahín ta sacuví tari cuhva catyí; cuví ra tari noo ra chiñí tuñi cha savaha ra vehe ra siquí cava. ²⁵ Ta quichahá coon savi. Ta cama xaan yuvi ndutya yaha. Ta ñihi xaan caa tatyí. Soco ña cuví sanduva chi vehe cuan. Vatyí ñihi nanyaá siquí cava cuan. ²⁶ Soco yóo cha chiñí tuhun cahín, ta ña sacuví ra tari cuhva catyí; cuví ra tari noo ra tondo, cha savaha ra vehe ra nu ñiti. ²⁷ Ta chaa savi. Ta cama xaan yuvi ndutya yaha. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

²⁸ Cuhva cha ndihí cahan ra Jesús chihin ñáyiví, iyo xaan cuñí ñu tuhun cha sañahá ra. ²⁹ Vatyí sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chi noo ra cuhví cha tyahyú coño

(Mr. 1.40-45; Lc. 5.12-16)

¹ Cuhva cha noo ra Jesús yucu cuan, cuaha ñáyiví nyicón chi ra. ² Ta chaa noo ra cha tyahyú coño, ta chicuñí chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chii —catyí ra chi ra.

³ Tyicuan ta sanacaa ra Jesús ndaha ra ta tiñ ra chi ra, ta catyí ra:

—Cuñí sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvaha nu tyahyú cuan. ⁴ Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuahan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

Nu sanduvahá ra Jesús chi musu noo ra capitán

(Lc. 7.1-10)

⁵ Cuhva cha chaa ra Jesús Capernaum, noo capitán, ra ñuu Roma, chaa ra nu nyaá ra Jesús ta chacu ndahvi ra nuu ra, ⁶ ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahnán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyí run, ta musi nduvaha ra. ⁹ Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuví ra.

¹⁰ Ta cha chiñí ra Jesús cha cahan ra, iyo xaan cuñí ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya. ¹¹ Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi. ¹² Ta ñu Israel cha tahán chi cuhun andivi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

¹³ Tyicuan ta quichaha catyí ra chi capitán cuan tyeha caa:

—Cughan, ta na cuvi chi tari cuhva catyūn vatyí chinó xaan iñun chii —catyí ra.

Ta suri cuhva cuan nduvahā musu ra.

Nu sanduvahā ra Jesús chi maha tyiso ra Pedro

(Mr. 1.29-31; Lc. 4.38-39)

¹⁴ Ta cha yaha cuan, chaā ra Jesús vehe ra Pedro. Ta nanyehē ra chi maha tyiso ra Pedro, catuví ña nu chito chihin cahñi. ¹⁵ Ta tiñ ra ndaha ña, ta quitā cahñi cuan chi ña. Ta ndicuitā ña, ta quichahā tyiñuhu ña chi ra.

Nu sanduvahā ra Jesús cuaha ñu cuhví
(Mr. 1.32-34; Lc. 4.40-41)

¹⁶ Ta cuhva cha cuaa cuan, quichí nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tava ñehe ra chi tatyí ña vaha cuan, ta sanduvahā ra chi tandihí ñu cuhví. ¹⁷ Tyicuan caa cuví tacuhva vatyí na chino cava tari cuhva catyí ra profeta Isaías, quivi catyí ra tyeha caa: “Maa ra quehen ra cuehe cha yihí chi yo, ta tinyaā ra cha uhvi chi yo.”

¿Yoso chiquihí chi yo tatu cuñí yo cunyicon yo chi ra Jesús?

(Lc. 9.57-62)

¹⁸ Tyicuan ta nyehē ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi. ¹⁹ Tyicuan ta chaā noo ra sacuahā ley vehe ñuhu ta catyí ra chi ra:

—Maestro, cuñí cunyiquen chuun tandihí ri ityi nu cuhun —catyí ra.

²⁰ Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayii cha quichi

nya gloria, ñahri vehi ta ni ri nu cava xiñi ta ñahri —catyí ra.

²¹ Inga tucu ra chicá noo chihin ra catyí ra chi ra:

—Tata, cūhva na cuhun xihne cutyihi chi suti chichi ñuhú, tyicuan ta quichi ta cunyiquen chuun —catyí ra.

²² Ta catyí ra Jesús chi ra:

—Ñaha yoho vatyí cunyicon chii. Saña chi ñu ña ñohó nuu chi Nyoo, na tyihi maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

²³ Tyicuan ta quihví ra chichi canoa, ta ra cachicá noo chihin ra, cuahan coyo ra chihin ra. ²⁴ Ta chaā noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra. ²⁵ Ta ra cachicá noo chihin ra sandoyo ra chi ra, ta cacatyí ra:

—¡Sutu Mañi yuhu, sacacu chi yo, vatyí cuñí cunaa yo!

²⁶ Ta catyí ra Jesús chi ra:

—¿Ñáá tuhun cha yuhví xaan ndo? ¡Ny-oho chiin xaan chinó iñi ndo chii!

Tyicuan ta nacandā ra ta sacutaxín ra tatyí nu miñi cuan, ta tandihí cutaxín. ²⁷ Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahā uvi ra ñuu Gadara ra cayihí
tatyí ña vaha chi

(Mr. 5.1-20; Lc. 8.26-39)

²⁸ Tyicuan ta chaā coyo ra inga chiyo miñi cha nyaá ñuhú cha nañi Gadara. Ta chaā coyo uvi tahan ra yihí tatyí ña vaha chii. Ta nu ñaña caquitā coyo ra cuan. Xaan vavaha ra, ta yori maa cuví yaha ityi cuan. ²⁹ Ta canachaa ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaa quivi? —cacatyí ra cuan.

³⁰ Ta yatyin ri cuan nyicú cuaha quini cachachí ti. ³¹ Ta catyí tatyí ña vaha cuan chi ra Jesús:

—Tatu cuatava ñehun chi ndi, cūhva cha quihví ndi chichi quini cuan —cacatyí tatyí ña vaha cuan.

³² —Vaha. Quihví ndo —catyí ra Jesús.

Ta caquita coyo tatyí ña vaha cuan, ta quihvi coyo chichi tandihí quini canyicú cuan. Ta tandihí quini cuan cachingó ti ta canacocho ti noo xahva yuhu miñi cuan, ta chihí ti chihin ndutya cuan.

³³Tyicuan ta ra casahá cumi chi ti cuan, cacinó vavaha ra cuahan coyo ra chichi ñuu, ta canacatyí ra tandihí cha cuví chi ra cayihí tatyí ña vaha cuan chi. ³⁴Ta tandihí ñáyivi ñuu, chahan ñu chinyehé ñu chi ra Jesús, ta chachu ndahví ñu nuu ra na quita ra yucuan.

9

Nu sanduvahá ra Jesús chi noo ra cuhví cha ña cuví nacanda

(Mr. 2.1-12; Lc. 5.17-26)

¹Tyicuan ta quihvi ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra. ²Nu nyaá ra yucuan chinyacá ñáyivi chi noo ra cuhví cha ña cuví nacanda catuví ra nu chito. Ta cha nyehe ra Jesús vatyi chinó xaan iñi ñu chi ra, quichaha catyí ra chi ra cuhví cuan:

—Sañi iñun, suti vatyi cha chicoo ticahnu iñi cuatyun —catyí ra chi ra.

³Tyicuan ta quichahá chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahan ra”, cachicá xiñi ra.

⁴Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo? ⁵Vatyí ñya cha yí ca catyí yo: atu yí ca catyí yo “Cuatyun cha yaha ndachi”, o yí ca catyí yo: “Ndícuíta ta cācon”? ⁶Vaha. Cuasañahi chi ndo vatyi yuhu Rayíi cha quichi nya gloria, iyó ityi chíi síqui ñuhu ñáyivi ihya vatyi sahi ticahnu iñi cuatyí —catyí ra Jesús.

Tyicuan ta catyí ra chi ra cuhví cuan:

—Ndícuíta, naquehen chiton ta cuanuhu nya vehun —catyí ra.

⁷Tyicuan ta ndícuíta ra cuhví cuan ta cuanuhu ra nya vehe ra. ⁸Cuhva cha nyehe ñáyivi tuhun ihya, canayuhví ñu. Ta casacahnú ñu chi Nyoo vatyi chahá ra tunyee iñi cuan chi ñáyivi.

Nu caná ra Jesús chi ra Mateo

(Mr. 2.13-17; Lc. 5.27-32)

⁹Quita ra Jesús yucuan, ta nanyehé ra chi noo ra cha nañi Mateo, nyaá ra quehen ra

xuhun cha tyiyahví ñu Israel chi gobiernu ñuu Roma. Ta catyí ra chi ra:

—Cōho chihin.

Tyicuan ta ndícuíta ra Mateo ta tyinyi-con ra chi ra.

¹⁰Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cacticunycú tucu ra yucuan nu mesa iñ ri chihin ra Jesús ta ra cachicá noo chihin ra. ¹¹Soco cha canyehé ra fariseo cha tyicuan caa, candacá tuhun ra chi ra cachicá noo chihin ra Jesús, ta catatyí ra:

—¿Ñáá tuhun cha vatyi ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —catatyí ra.

¹²Chihí ra Jesús cha cahan ra, ta catyí ra chi ra:

—Ña chihuhú doctor chi ñu iyó vaha, ñu ña cuhví, soco chi ñu cuhví chihuhú ra. ¹³Cuahan ndo ta cūtuhva ndo cha cuñí chi catyí nu tutu Nyoo, nu catyí ra tyehe caa: “Yuhu cuñí vatyi cundahvi cuñi ndo chi ñáyivi, ta ñima ca cha cahñi ndo quiti ta cuhva cuenda ndo chíi.” Na vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyi cha ni ri ca cha nyaá ca ra chihin ra cachicá noo chihin ra ña tahn chi cha saha ra ayunar

(Mr. 2.18-20; Lc. 5.33-35)

¹⁴Tyicuan ta ra canyicón chi ra Juan, ra sacondutya chi ñáyivi, catuhva ra chi ra Jesús ta candacá tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuví ra? —cacatyí ra nyicón chi ra Juan.

¹⁵Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyi cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyi ña chachí tahanan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

¹⁶Yori naquicú noo vestido chahnu chihin noo sahma chaa vatyí coto cundiýi nu naquicú ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca. ¹⁷Ta ni ña tyihí yo vinu chaa chichi ñi chahnu vatyí tatu sacuvi yo tyicuan caa, tahnya ñi cuan, ta tari cunaa vinu, ta cunaa ñi cuan. Yucuan chaha cuñí chi tyihí yo vinu chaa chichi ñi chaa, ta tyicuan ta nduvi ta cusaha cuenda chi chi tahan chi.

Sehe ra Jairo, ta ñaha cha tiin sahma ra Jesús

(Mr. 5.21-43; Lc. 8.40-56)

¹⁸Cha ni ri ca cha catyí ra Jesús tuhun ihya, chaq noo ra cuví nuu chi ñu Judea ta chicuini chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siquí ña, cunandoto ña —catyí ra chi ra Jesús.

¹⁹Ndicuita ra Jesús ta cuahan ra iin ri chihin ra ta ra cachicá noo chihin ra ñandihi.

²⁰Tyicuan ta noo ñaha, cuhví ña chihin cha chati ñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tiin ña yuhu sahma ra, ²¹vatyi tyehe caa chicá xiñi ña: “Ma chihin cha tiin ri sahma ra ta nduvahi”, chicá xiñi ña.

²²Soco ra Jesús nanyocava ra nanyehe ra chi ña, ta catyí ra chi ña:

—Nduní iñun sihi, cha nduvahun vatyí chinó iñun —catyí ra.

Ta caa cuhva ri cuan ta nduvahá ña.

²³Yahá cuan ta chaq ra Jesús vehe ra cuví nuu cuan, ta nyehe ra vatyí ra música canyatú tuhva ra cha cunh coyo ra nu quihví cue chichi ñuhú. Ta ñáyivi cha nyicú cuan chacú chaa ñu. ²⁴Ta catyí ra chi ñu:

—Quita ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyivi nyehe ñu chi ra. ²⁵Soco ra Jesús tava ra chi ñu ityi chata vehe, tyicuan ta quihví ra ta tiin ra ndaha ñaha tyivaa cuan, ta maa ña ndicuita ña.

²⁶Ta tandihi ityi cuan chitya tuhun cha cuví yucuan.

Nu sanduvahq ra Jesús chi uvi ra cuaa

²⁷Cuhva cha quitá ra Jesús yucuan, uvi tahan ra cuaa canyicón chi ra suri caná chaa ra ta cacatyí ra:

—¡Cundahvi cuñi chi ndi, yoho ra vachi tata ra David! —cacatyí ra.

²⁸Ta cuhva cha quihví ra Jesús chichi vehe, ra cuaa cuan, catuhva ra chi ra, ta maa ra Jesús quichaha ndaca tuhun ra chi ra:

—¿Atu chinó iñi nyoho vatyí cuví sanduvahi chi ndo? —catyí ra.

Ta canacahan ra ta catyí ra:

—Ay, chinó iñi ndi chuun, Sutú Mañi yuhu —cacatyí ra.

²⁹Tyicuan ta tiin ra Jesús chiti nuu ra ta catyí ra chi ra:

—Na cuví maa yoso cuhva chinó iñi ndo —catyí ra.

³⁰Ta canduvahq chiti nuu ra. Ta catyí vaha ra Jesús chi ra tyehe caa:

—Nducu ndo cuhva cha yori coto.

³¹Soco quitá coyo cuiri ra ta quichaha canacatyí ra cha sacuví ra Jesús chihin ra chi ñáyivi tandihi ityi yucuan.

Nu sanduvahq ra Jesús chi noo ra ñihí

³²Cha ni ri ca cha caquitá coyo ra cucuaa cuan, suhva ñáyivi quichí nyaca ñu chi noo ra ñihí cha yihí noo tatyí ña vaha chi nu nyaá ra Jesús. ³³Ta caa cuhva ri cha tava ñehe ra Jesús tatyí ña vaha cuan, quichahq cuvi cahan ra cuan. Ta iyo xaan cuñí ñáyivi, ta catyí ñu:

—Ni noo chaha ta cuvi ca cha tyehe caa Israel Ihya —catyí ñu.

³⁴Soco ra cacuvi fariseo, cacatyí ra:

—Ra ihya tava ñehe ra tatyí ña vaha chihin tunyee iñi chi cuihna ra cuví nuu —catyí ra.

Nu catyí ra Jesús vatyí ña cuaha maa ñu sahá tyiño cuenda Nyoo iyó

³⁵Ra Jesús chahan ra tandihi ñuu sañahá ra chi ñáyivi chichi vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo aña ñáyivi. Ta sanduvahá ra tandihi nuu cuehe cha yihí ñu. ³⁶Ta cha nanyehé ra chi ñáyivi, cundahvi cuñi ra nyehé ra chi ñu, vatyí nyehé ñu tindoho ta cuihya cuñí ñu, tari mbee quiti cha yori sahá cumi chi. ³⁷Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra. ³⁸Yucuan chaha, cacan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

10

Nu cachi ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

¹Tyicuan ta cana ra Jesús chi ndi uchi uvi ra chicá noo chihin ra ta chaha ra ityi chi ra vatyí tava ñehe ra chi tatyí ña vaha cha yihí añaima ñáyivi, ta sanduvaha ra ndihi nuu cuehe ta cha uhvi ñandihi.

²Ican ihya cuví sivi ndi uchi uvi ra chicá tyiño ra: xihna ca, ra Simón, cha nañi tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra; ³ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañi tucu Tadeo, ⁴ta ra Simón cha yihí cuenda ityi ra cacuñi cuhun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cucahan ra tuhun Nyoo

(Mr. 6.7-13; Lc. 9.1-6)

⁵Ta tyehe caa tachí ra Jesús chi uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuví, ta ni ma quihvi ndo ñuu cha nyicú Samaria. ⁶Cuahan ndo, soco nu nyicú mbee cha cuanaa cha cuví ñu ñuu Israel. ⁷Cuahan ndo cuacahan ndo tuhun vatyí cha chaa cha cunyaca ñaha Nyoo añaima ñáyivi. ⁸Sanduvaha ndo chi ñu cuhví ñu tyahyú coño, ta ñu yihí inga cuehe chii. Sanandoto ndo ndiyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

⁹Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha. ¹⁰Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cuhun chihin ndo. Ta ma cuiso ndo inga ityi ndichan, ni yutun ma tuvi ndo, vatyí ra sahá tyiño, iyó ityi chi ra cha coo yahvi ra.

¹¹Cuhva cha chaa ndo noo ñuu, nducu ndo noo ñáyivi cachi iyó, ta ndo ndo vehe ñu nyacua nya quita ndo ñuu cuan. ¹²Cuhva cha cua quihvi ndo noo vehe, cuhva ndo nocumi chi ñáyivi iyó vehe cuan. Ta catyi ndo chi ñu: Na coo cha taxi Nyoo añaima ndo, catyi ndo chi ñu. ¹³Ta tatu ñu ñuu cuan

ta nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyí chiñuhú cuan chi ñu, ma ndoo cuan chihin ñu. ¹⁴Ta tatu ña cuñí ñu quehen cuenda ñu chi ndo, ta ni ña cuñí ñu cuiñi ñu tuhun cahan ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo. ¹⁵Cha ndicha catyí chi ndo vatyí quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

Nu sañahá chi ñáa ndihi tindoho cunyehe ñu chicá tyiño Nyoo

¹⁶¡Nyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma. ¹⁷Saha ndo cuenda chi ndo vatyí ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo. ¹⁸Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví. ¹⁹Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyí tatu chaa cuhva cha cahan ndo, Nyoo cucuhva ra tuhun cha cucahan ndo. ²⁰Vatyí ñima maa ndo cucahan, soco maa Tatyí li Sutu yo Nyoo cusacahan chi ndo.

²¹Rayii cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuyi ñu, na cuví ñu. ²²Tandihi ñáyivi, cucutasi cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añaima ndo. ²³Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chi ndo ni cha ta ndihi ca cahan ndo tuhun Nyoo tandihi ñuu nu nyicu ñáyivi Israel ta yuhu Rayii cha quichi nya gloria cuquichi inga chaha.

²⁴Ni noo ra cutuhvá, ña cahnu ca ra cuví ra ican saha ra sacuaaha chi ra. Ta ni noo musu, ña cahnu ca cuví ra ican saha chitoho ra. ²⁵Ra cutuhva, cuñi chi ndoo ra vaha cha chaa ra cuvi ra tari ra sacuaaha chi ra, ta musu tari chitoho ra. Tatu yuhu ra cuví chitoho vehe, catyí ñu chii vatyí Beelzebú, cuihna ra cuví nuu, cuví, suri tyicuan caa cucatyí tucu ñu chi ñáyivi cuende.

Yóo chi tahán chi cuyuhvi yo
(Lc. 12.2-7)

²⁶Yucuan chaha ma yuhvi ndo chi ñáyivi, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñún tyi ma coto tandihí ñáyivi. ²⁷Tandihí cha catyí chi ndo nu ñaa iñi, catyí nyoho nu ndichin. Ta tandihí cha catyí chi ndo nu xehe, çana chaa ndo nya xiñi vehe, na coto tandihí ñáyivi. ²⁸Ma yuhvi ndo chi ñu chahñi coño ñuhu yo, vatyí ma cuvi cahñi ñu añima yo. Soco yuhvi ndo chi ra cuví sanaa coño ñuhu yo ta añima yo chichi anyaya ñandihí.

²⁹¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo. ³⁰Vatyí nyacua nya íxi xiñi nyoho ta chitó Nyoo yoso tahan nyaá. ³¹Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo
nuu ñáyivi

(Lc. 12.8-9)

³²Tandihí ñu cha cahán vaha tuhin nuu ñáyivi, yuhu tucu cucahan vahi cuenda ñu nuu Suti ra nyaá andívi. ³³Soco ñu cahán nuu cahan tuhin, yuhu tucu ma cahan tuhun ñu nuu Suti ra nyaá andívi.

Cha cuenda ra Jesús cusñi ñáyivi
(Lc. 12.51-53; 14.26-27)

³⁴Ma cuñi ndo vatyí yuhu vachi cuhve cha taxi ri coo ndo siquí ñuhu ñáyivi ihya. Ña vachi cuhve cha taxi ri, soco cha cañi tahan ñáyivi. ³⁵Vatyí sasíñ chi ndo. Vatyí noo ra cuhun ra siquí sutu ra. Ta noo ña cuhun ña siquí sihi ña. Ta ñu cuví chono cucañi tahan ñu chihin tyiso ñu. ³⁶Ta tyicuan caa suri ñáyivi chí ndo cucuvi ñu ñu xaan iñi chí ndo.

³⁷Ñu cha cuñí ca chi sutu o chi sihi ican saha chi yuhu, ña tahán chi cuví ñu ñu cuende. Ta ñu cuñí ca chi sehe, ican saha chi yuhu, ña tahán chi cuví ñu ñu cuende. ³⁸Ta ñu cha ña cuñí nyehe tindoho ta cunyicon ñu chii, ña tahán chi cuvi ñu ñu cuende. ³⁹Vatyí ñu ña cuñí nyehe tindoho cha cuenda yuhu, cunyehe ñu tindoho anyaya, soco ñu nyehe tindoho ta chahá ñáyivi cha catyí yuhu, cucacu añima ñu.

Yahvi cha tahán chi chi yo
(Mr. 9.41)

⁴⁰Ñu quehén cuenda chi ndo, chi yuhu quehén cuenda ñu, ta ñu quehén cuenda chi yuhu, quehén cuenda ñu chí ra cha tachí chii. ⁴¹Ñu quehén cuenda noo ra profeta Nyoo cha cuenda vatyí cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chí noo ra vaha cha cuenda tyi ra vaha cuví ra, suri tahán yahvi cha cuñihi ra vaha cuan cuñihi ñu. ⁴²Ta savahri ñu cha cuhva vasi noo vasu ndutya vichin coho ñu nyihi ihya cha cuenda cha nyicón ñu chii, cuñihi ñu cha cucuhva Nyoo chí ñu —catyí ra Jesús.

11

Ra cha tachí ra Juan nu nyaá ra Jesús
(Lc. 7.18-35)

¹Ndihí chahá ra Jesús tuhun chí uchi uvi ra chicá noo chihin ra, tyicuan ta quita ra yucuan, vatyí cucahan ra tuhun Nyoo chihin ñáyivi cha iyó ñuu cha nyicú ityi cuan.

²Ta ra Juan nu ñohó ra vehe caa, ñihí ra tuhun cha sacuví ra Cristo. Tyicuan ta tachí ra chí uvi ra nyicón chí ra, cundaca tuhun ra noo tuhun chí ra Jesús. Ta cachaa coyo ra nu nyaá ra ³ta cacatyí ra chí ra:

—¿Atu yoho cuvún ra Cristo cha tahán chí quichi sacacu chí ndi, o cuñí chí cha cuatu ndi chí inga ra? —cacatyí ra chí ra.

⁴Nacahan ra Jesús ta catyí ra:

—Cuahan ndo ta catyí ndo chí ra Juan cha nyehé ndo, ta cha chiiñí ndo. ⁵Nacatyí ndo chí ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra añima ñu.

⁶Sií xaan cuñí ñu ña chicá uvi iñi nyicón chii.

⁷Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Náa cha chahan nyoho chinyehe ndo chiqui ndii cuan? ¿Atu chinyehe ndo noo ndoo cha naquísí tatyí? ¿Náa cha nyehe ndo? ⁸¿Atu nyehe ndo noo ra vaha ñihno? Ñima. Nyoho chitó ndo vatyí ra ñihno vaha, nyaá ra vehe rey. ⁹Tu tyicuan caa, ¿náa cha chahan ndo chí nyehe ndo? ¿Atu noo ra cuví profeta? Ican. Soco noo ra cha cahnú ca cuví ican saha noo profeta cuenda Nyoo.

¹⁰ Vatyí ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhín ityi nuu nu cuhun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quívi quichun.

¹¹ 'Cha ndicha catyí chi ndo, vatyí chichi cha tandihí ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo aña, vasi cuví ra noo ra luhlu ca, soco cahnu ca ra ta ñima ca ra Juan.

¹² Nyacua nya quívi cha chaá ra Juan ta nya vityin, cuaha ñu ndachan sahá chii nducú satívi ñu tuhun Nyoo, ña cuñí ñu cha cunyacá ñaha Nyoo aña ñáyivi. ¹³ Ra Moisés cahan ra tuhun yoso caa nyacá ñaha Nyoo aña ñáyivi, ta tyicuan caa tucu tandihí ra profeta nyacua nya quívi quichí ra Juan.

¹⁴ Ta tatu cuñí nyoho chino iñi ndo tuhun cahín, catyí chi ndo vatyí profeta Elías cha tahán chi quichí, ra Juan cuví ra. ¹⁵ Yóó ñu cha cutuñi iñi, na tyasoho ñu tuhun cahín.

¹⁶ ¿Yóó chihin sandu inuu ri chi ñáyivi cha iyó tyembu ihya? Tari ra cuatyaa cuví ñu, vatyí chicunyaa ndotyín nuyahvi nyasiquí ndotyín, ta canachaa ndotyín chi ra tahan ndotyín, ta catyí ndotyín tyehe caa: ¹⁷ "Tívi ndi flauta, soco ña chita chaha ndo. Chita ndi yaa cuihya soco ña chacy ndo." Tyicuan caa tucu nyoho, ni noo cuhva ña tahán iñi ndo. ¹⁸ Vatyí quichí ra Juan, cha ña chachí ra ta ña chihí ra, ta nyoho catyí ndo vatyí noo tatyí ña vaha yihí chí ra. ¹⁹ Yahá cuan ta quichí tucu yuhu Rayíi cha quichi nya gloria. Ta yuhu chachí ta chihí tandihí, ta catyí ndo tyi ra cuahyi ra tuhvá chihí cuví. Ta ña tahán iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahín ta tuhun cahan ra Juan, ta maa ñu cusaña cha ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyivi tuhun Nyoo (Lc. 10.13-15)

²⁰ Tyicuan ta quichahá cahan ra Jesús chi ñu ñuu nu sacuví ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

²¹ —¡Ndahvi nyoho, ñu ñuu Corazin! ¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehé ñu. Soco tyehe ta nyehé ñu nyatu cahnu quívi cuan tari cha nyehé nyoho vityin, tañi tyehe ri ndihvi noo ñu sahna tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ²² Soco catyí chi ndo vatyí quívi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón. ²³ Ta nyoho ñu ñuu Capernaum, cuñí maa ndo tyi cundaa ndo nya andívi, soco cunoo ndo nya nu nyicú ñu ndívi. Vatyí tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin. ²⁴ Soco catyí chi ndo vatyí quívi cutuñi chi nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

Cuhva ndo chi ndo chii, ta cuhve cha nyitatu ndo, catyí ra Jesucristo (Lc. 10.21-22)

²⁵ Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andívi ta ñuhu ñáyivi. Sacahní chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí. ²⁶ Ndicha Sutu Mañi yuhu, vatyí tyicuan caa cuñí maun.

²⁷ Tyicuan ta catyí tucu ra:

—Suti nacuhva cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chí ra. Ta ñáyivi cha cuñí mai cha cohon nuu chí ra, ican ñu cuan cua cohon nuu chí ra. ²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quíchi ndo nu nyaí, ta yuhu cuhve cha nyitatu ndo. ²⁹ Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu aña ndo. ³⁰ Ña yíi cha cuhva ndo chí ndo cha cunyaca ñahi. Ta carga cha chahí chi ndo, ñahma.

12

Nu tohón ra cachicá noo chihin ra Jesús yoco trigu quívi nyitátú ñáyivi

(Mr. 2.23-28; Lc. 6.1-5)

¹ Noo quívi nyitátú ñáyivi, yahá ra Jesús mahñu nu iyó cha tachí ñu. Ta chaá soco chi ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan. ² Cuhva cha cananyehe ra fariseo cha tyicuan caa, cacatyí ra chi ra Jesús:

—Nyéhe, ra cachicá noo chuhun sacuví ra noo cha ña tahán chi sacuví yo quívi nyitátú yo —catyí ra chi ra.

³ Soco maa ra Jesús catyí ra chi ra:

—¿Atu ta sacuha ca nyoho cha sacuví ra David chihin ra tahan ra quívi cha chisoco ra? ⁴ Quíhví ra chichi vehe Nyoo. Ta quehen ra pan ii cha cha yahá catuví nuu Nyoo. Ta chachí ra ta ña tahán chi cachi ra, ni maa ra ni ra ndihi chihin ra, vatyi maa ri maa tata sutu tahán chi cachi pan cuan. ⁵ ¿O ta sacuha ca ndo nu ley cha chahá Nyoo chi ra Moisés nu catyí chi vatyi ra cacuví sutu, ña canyitatú ra quívi nyitátú yo, soco sahá tyiño ra chichi vehe ñuhu? Yucuan nyehé yo vatyi ñima cuatyí cuví cuan. ⁶ Ta catyí chi ndo, vatyi ihya nyaá yuhu cha cuví noo ra cahnu ca ican saha vehe ñuhu. ⁷ Nyoho, ta cutuñi ca iñi ndo nu catyí chi tyehe caa nu tuhun Nyoo: “Cha cuñí yuhu, cha cundahví cuñi ndo nyehe ndo chí tahan ndo, ta ñima ca cha cahñi ndo quiti ta cuhva cuenda ndo chii.” Tyehe ta cutuñí iñi ndo tuhun ihya, ma tyaa ndo cuatyí síqui ñáyivi cha ñahri sacuví. ⁸ Yuhu cuví Rayíi cha quichí nya gloria. Ta iyó ityi chii vatyi catyí chi noo noo ndo ñáá cha sacuví ndo quívi nyitátú yo —catyí ra Jesús.

Nu nduvahá ra cha ityi ndaha
(Mr. 3.1-6; Lc. 6.6-11)

⁹ Tyicuan ta quita ra Jesús yucuan, ta cuahan ra vehe ñuhu. ¹⁰ Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí síqui ra Jesús. Yucuan chaha candacá tuhun ra chi ra ta catyí ra:

—¿Atu cuví sanduvaha yo chi noo ñu cuhví quívi nyitátú yo? —cacatyí ra chi ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quívi nyitatu yo, atu ma cuhun ndo ta tava ndo chi ti? ¹² Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyi tahán chi sacuví yo cha vaha quívi nyitátú yo —catyí ra.

¹³ Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacaa ra, nduvahá ri ndaha ra tari inga chiyo cuan. ¹⁴ Tyicuan ta caquitá coyo ra fariseo cuandatumun tahan ra yoso caa cacahñi ra chi ra Jesús.

Noo profeta, ra chahá cuenda tuhun cahán Nyoo, cahán ra tuhun ra Jesús cha ni cumañi ca cacu ra

¹⁵ Cha chito ra Jesús tuhun tyi canducú ra chi ra, quita ra yucuan ta cuaha ñáyivi chinyicon chi ra. Ta maa ra sanduvahá ra chi tandihí ñu cuhví. ¹⁶ Ta catyí ra chi ñu tyi ma cahan ñu tuhun vatyi ican ra sanduvahá chi ñu. ¹⁷ Tyicuan caa cuví tacuhva nachino cava tuhun cha tyaa ra Isaías ra cuví profeta Nyoo ta cha naha. Tyehe caa tyaa ra:

¹⁸ Ican ra ihya cuví ra sacuví tyiño nui, ra cha nacachí vahi.

Cuñí xain chi ra, ta sií cuñí chihin ra. Cusacuti chi ra chihin Tatyí li cha iyó chii. Ta cusacoto ra chi ñáyivi cha ñima ñu Israel cuví yoso caa sacuvahi chi ñu nui.

¹⁹ Ta ma xaan cahan ra ta ni ma cana chaa ra, ta ni yori cuiñi ndusu ra ityi cahnu.

²⁰ Ta ni noo ndoo yacua, ta ma cahnu ndihi ra.

Ta ni ma ndahva ndihi ra mecha cha caña ñuhma.

Nyacua nya cha sanicoo vaha ra chi ñáyivi chihin ra ta cunyaca ñaha vaha ra aña ñu.

²¹ Ta tandihí ñáyivi, ta chi ra cuquihi iñi ñu.

Nu catyí ñáyivi vatyi ra Jesús, tunyee iñi ra ña vaha iyó chi ra

(Mr. 3.20-30; Lc. 11.14-23; 12.10)

²² Tyicuan ta nu nyaá ra Jesús chinyacá ñu chi noo ra yihí tatyí ña vaha chi, cuaa ra ta ñihi ra. Ta ra Jesús sanduvahá ra chi ra. Ta cuví nacahan ra, ta cuví nanyehe ra. ²³ Iyo xaan cuñí tandihí ñáyivi, ta catyí ñu:

—¿Vasí ra vachi tata rey David cuví chi ra ihya? —catyí ñu.

²⁴ Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

²⁵ Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha canyacá ñaha ra. O tatu noo ñuu o tandihi ñáyivi noo vehe cacusiin ñu chihin tahan ñu, cutivi nu nyicú ñu. ²⁶ Ta tyicuan caa tucu, tatu cuihna ta tava ra suri ra tahan maa ra, cuñí chi catyí vatyí ña ñi ri cacuví ra, ta cundihi fuerza cha iyó chi ra. ²⁷ Ta nyoho catyí ndo vatyí yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóó cha chaha fuerza vatyí tavá ra tatyí ña vaha? Maa ra na sacoto ra chi ndo cha ndicha, vatyí nyoho tondo ri chicá xiñi ndo. ²⁸ Yucuan chaha catyí chi ndo, vatyí yuhu tave tatyí ña vaha chihin fuerza Tatyí li Nyoo. Ta cuñí chi catyí vatyí ndicha cuii Nyoo ra nyacá ñaha ñima ñáyivi cha chaq ra nu canyicú ndo.

²⁹ Chichi vehe noo ra ñiñi xaan, tari cuihna, ma cuví quihvi noo ra ta quehen ra tandihi cha chii ra, soco tatu cuñi xihna ra chi ra tyicuan caa ta cuví tinyaa ra tandihi cha chii ra.

³⁰ Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyee ndo chii cha cahán ndo tuhun nuu ñáyivi, cuñí chi catyí vatyí ña chahá ndo cha coto ñáyivi tuhun cahín.

³¹ Yucuan chaha catyí chi ndo vatyí Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihi, soco cha cahan ña vaha ñu siqui Tatyí li Nyoo, yucuan ndicha, ma coo ticahnu iñi cha cuenda ñu. ³² Ta yóó ri ñu cha cahán ña vaha siqui yuhu Rayii cha quichi nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyí li Nyoo, ma coo maa ticahnu iñi chi ñu cha cuenda cuatyí cuan, niri ihya ñáyivi, ta niri inga ñáyivi ñandihi.

Chihin cha sacuvi ri ñáyivi ta nicohon nuu ri yo chi ñu tatu ñu vaha o ñu ña vaha cuví ñu

(Lc. 6.43-45)

³³ Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu

yutun vaha cuví tun chihin chiti cha chahá tun. ³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa ñima cuví ndo? Vatyí cha quitá chichi ñima yo ican cuan cahán yo. ³⁵ Noo ra vaha cahán ra tuhun vaha vatyí ñohó cha vaha ñima ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó ñima ra. ³⁶ Ta yuhu catyí chi ndo vatyí quivi cutuñi chi tandihi ñáyivi, cucuhva ñu cuenda tandihi tuhun cha ña sahá ñu cuenda ta cahán ñu. ³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñí ñu nyehe ñu seña milagru (Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñí ndi vatyí sacuvun noo seña milagru vatyí nyehe ndi.

³⁹ Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñí ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu. ⁴⁰ Vatyí tari ñohó ra Jonás chichi tiyaca cahnu cuan uñi quivi ta uñi ñuu, tyicuan caa cucohon yuhu Rayii cha quichi nya gloria chichi ñuhú uñi quivi ta uñi ñuu. ⁴¹ Ta quivi cucutuñi chi tandihi ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quivi cahán ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás. ⁴² Vatyí tyicuan caa tucu ñaha cha cuví reina ityi Sur, cundicuita ña quivi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichi ña, quichi tyasoho ña tuhun cha chiñi tuñi ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha ñima ñáyivi tatu naa iñi ñu chi Nyoo (Lc. 11.24-26)

⁴³“Tatu noo tatyí ña vaha quita chi añima noo rayii, chicá noo chi noo nu ityi, nanducú chi noo nu nyitatu chi, soco ña ñañihi chi nu nyitatu chi. Tyicuan ta ndichi xiñi chi: ⁴⁴“Cunuhu tiqui nya vehi nu quite.” Yucuan ta nachaa chi añima ra nu quita chi. Ta nanyehé chi vatyí ndii xaan, ta yori nyaá. ⁴⁵Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quihvi tandihi tatyí ña vaha cuan añima ra cuan. Yucuan chaha, quíñi ca cunicoo ra ta ñima ca cuhva chiyo maa ra. Ta tyicuan caa cucuvi chi ñáyivi quíñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuví cuhva catyí Nyoo

(Mr. 3.31-35; Lc. 8.19-21)

⁴⁶Ni cahán ca ra Jesús chihin ñáyivi, ta chaq sihi ra ta yañi ra, ta ndoq ñu chata vehe, ta cuñí ñu cahan ñu chihin ra.

⁴⁷Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

⁴⁸Tyicuan ta nacahan ra Jesús ta catyí ra chi ñu:

—¿Yóo cha cuví sihi ta yañi? —catyí ra.

⁴⁹Tyicuan ta sañahá ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi. ⁵⁰Vatyí tandihi ñáyivi cha sacuvi cuhva cuñí Suti ra nyaá andivi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin ñáyivi

(Mr. 4.1-9; Lc. 8.4-8)

¹Quivi cuan quita ra Jesús vehe ra ta chicunyaq ra yuhu miñi. ²Ta chaha cha cuaha ñáyivi nataca nu nyaá ra, quihvi ra chichi noo canoa ta chicunyaq ra. Ta tandihi ñáyivi ndoq ñu nyicú ñu nu ñiti cuan. ³Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quita noo ra, tachí ra chiti trigu. ⁴Ta nu cuahan ra quiti ra chiti cuan, canacoyo suhva chiti cuan yuhu ityi. Ta quichi coyo saa ta cachachi ti. ⁵Ta suhva ca canacoyo ticu yuu, nu ña cuaha ñuhú yihí. Ta yucuan cañ chiti cuan cha numi ri vatyí

ña cuaha ñuhú yihí chaha. ⁶Soco cuhva cha cañ ñanyii ñin na ityi ri tun, vatyí ña cono yihí yoho tun. ⁷Suhva ca chiti canacoyo ticu ñu. Ta chahnu ñu cuan. Ta chasi chi nuu tun. Yucuan chaha ña chiyo chiti tun. ⁸Soco suhva ca canacoyo nu ñuhú vaha. Ta quivi cachahnu tun, vaha xaan cachahá tun chiti, vatyí yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chahá tun. ⁹¡Tatu cutuñi ñiñi ndo, tyasoho ndo!

Nu sacoto ra Jesús ñáa tuhun cha chihin cuhva ri cahan ra ta ña cahán cachi ra
(Mr. 4.10-12; Lc. 8.9-10)

¹⁰Tyicuan ta tuhva ra cachicá noo chihin ra Jesús, ta candaca tuhun ra chi ra, ta catyí ra:

—¿Ñáa tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

¹¹Ta nacahan ra Jesús ta catyí ra:

—Chi nyoho sacoto Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu. ¹²Vatyí ñáyivi cutuñí ñiñi tuhun cahín ta sacuví ñu, cuaha ca cucutuñi ñiñi ñu. Ta ñáyivi cha chiin ri cutuñí ñiñi, ta ña cuñí ñu sacuvi ñu, cutinyaa ndihi cha cutuñí ñiñi ñu. ¹³Yucuan chaha vatyí chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi ñiñi ñu, tari cha ña chiniñi ñu cuví cuan. ¹⁴Ta tyicuan caa ta chinó cava tuhun cha cahan ra Isaías ra profeta Nyoo ta cha naha, ta catyí ra:

Cha ndicha vatyí nyoho cuiñi ndo tuhin, soco ma cutuñi ñiñi ndo.

Ta cunyehe ndo cha sacuví, ta ma cutuñi ñiñi ndo.

¹⁵Vatyí cha ndundava añima ñáyivi ihya, ta ña cachi vaha chiniñi ñu.

Ta tahn nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi ñiñi ñu chihin añima ñu.

Ta ni ma nanducu ñu chii, tacuhva sandu-vahi chi ñu.

¹⁶Soco sii xaan cuví chi nyoho, vatyí nyehe ndo chihin chiti nuu ndo, ta chiniñi ndo chihin soho ndo. ¹⁷Cha ndicha catyí chi ndo, vatyí cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehe nyoho cha sacuví, soco ña nyehe ñu.

Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

Nu catyí ra Jesús ñáa cha cuñi chi catyí cuhva cha cahán ra
(Mr. 4.13-20; Lc. 8.11-15)

¹⁸ Tyasoho ndo ñáa cha cuñi chi catyí noo cuhva cha catyí chi ndo tuhun ra cha tachí chiti trigu cuan: ¹⁹ Ñáyivi cha chiñi tuhun yoso caa cuñi Nyoo cunyaca ñaha ra aña ñu, ta ña cutuñi ñi ñu, tari nu canacoyo chiti yuhu ityi, tyicuan caa cuví ñu. Vatyí quichi cuhna ta tava ra tuhun Nyoo cha caa aña ñu. ²⁰ Ta tari nu canacoyo chiti ticu yuu cuan, tyicuan caa cuví tucu ñáyivi cha chiñi tuhun Nyoo, ta sii xaan cuví chi ñu naquehen cuenda ñu noo ri cuhva. ²¹ Vatyí nu caña chiti ticu yuu cuan, chiin ri ñuhú yihí chaha. Yucuan chaha caña soco ña cuví tyihí yoho chi. Ta tyicuan caa ñu cuan. Suhva ri quivi chinó ñi ñu. Soco quivi cha quichaha nyehe ñu tindoho, ta satasi ñi ñáyivi chi ñu cha cuenda tuhun Nyoo ta sandihi ri ñu tuhun cha chinó ñi ñu. ²² Ta tari nu canacoyo chiti chichi ñu cuan, tyicuan caa cuví tucu inga ñu cha chiñi tuhun Nyoo. Chiñi ñu, soco ña cuñi ñu sacuvi ñu tari cuhva chiñi ñu. Vatyí nyaá xaan ca xiñi ñu tuhun tindoho ñáyivi ican saha tuhun Nyoo. Ta nyiyo ca ñi ñu cha tyayii. Ta tandihi tuhun cuan sayanga chi chi ñu, ta ña chahá nanducu vaha ñu chi Nyoo. ²³ Soco tari nu canacava chiti nu ñuhu vaha, tyicuan caa cuví ñu chiñi tuhun Nyoo, ta cutuñi ñi ñu, ta sacuvi ñu tandihi tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

²⁴ Ta chahá tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo aña ñáyivi cuví chi tari noo ra cha tachí chiti trigu nu noo ñuhú. ²⁵ Soco cuhva cha caquixí tandihi ra casahá tyiño cuan, quihvi noo ra xaan ñi chi ra, ta tachí ra chiti cuhu ña vaha, ta cuahan ra. ²⁶ Ta quivi caña chiti trigu cuan, ta caña yoco chi, ta yucuan na tuvi tucu cuhu ña vaha cuan. ²⁷ Tyicuan ta ra cacuví musu, cachahan ra chicatyí ra chi chitoho ra: “Tata, tatu maa maa ri maa

chiti trigu tachun, ¿nya quita cuhu ña vaha cuan?” cacatyí ra. ²⁸ Ta nacahan ra cuan ta catyí ra: “Iyó noo ra xaan ñi chi yo tachí.” Tyicuan ta musu cuan, catyí ra chi chitoho ra: “¿Atu cuñun cha cuhun ndi ta tohon ndi cuhu ña vaha cuan?” ²⁹ Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndihi trigu cuan. ³⁰ Saña ndo, na cuahnu maa chi in ri chihin trigo cuan, tyicuan ta quivi cunicoñehi tyiño sahí, cutachi chi ra casaha tyiño cutohon xihna ca ra cuhu ña vaha cuan ta cuhni ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo aña yo
(Mr. 4.30-32; Lc. 13.18-19)

³¹ Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo aña ñáyivi cuví chi tari noo chiti yutun cha nañi mostaza cha tachí noo ra nu ñuhú ra. ³² Vatyí ican chiti cuan cuví cha luhlu ca ican saha tandihi ca chiti. Soco quivi chahnu tun cuví tun noo yutun cahnu vavaha. Ta quichi coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo aña ñáyivi
(Lc. 13.20-21)

³³ Ta catyí tucu ra Jesús inga cuhva ihya:

—Cha nyacá ñaha Nyoo aña ñáyivi cuví chi tari yuchan iya cha nasacá noo ñaha chihin uñi cuhva yutyi pan. Vatyí tari ndaa tandihi pan cuan chihin yuchan iya cuan, tyicuan caa cuahan nducua ha ca ñu nyacá ñaha Nyoo aña —catyí ra.

Yoso caa chotyíño ra Jesús noo cuhva cha cahán ra
(Mr. 4.33-34)

³⁴ Tandihi tuhun ihya cahan ra Jesús chihin ñáyivi chihin cuhva ri. Ta tandihi tuhun cha catyí ra chi ñu soco maa maa ri chihin noo cuhva ri. ³⁵ Tyehe caa sacuvi ra tacuhva chino cava tuhun cha cahán ra profeta ta cha naha ta tyaa ra tyehe caa: Chihin cuhva ri cucahin chihin ñáyivi. Cucatyí chi ñu tuhun cha ñohó xehe nyata savahá Nyoo ñuhu ñáyivi.

Nu catyí ra Jesús ñáá cha cuñí chi catyí tuhun cuhu ña vaha cha cañá mahñu chiti trigu cuan

³⁶Tyicuan ta sacunuhu ra Jesús chi ñáyivi, ta ndihví ra chichi vehe. Ta catuhva ra cachicá noo chihin ra chi ra, ta catyí ra chi ra:

—Nacatyí chi ndi ñáá cha cuñí chi catyí tuhun cha cañá cuhu ña vaha cuan nu ñuhu cuan.

³⁷Tyicuan ta quichaha catyí ra Jesús chi ra:

—Ra cha tachí chiti trigu cuan ican cuví yuhu Rayii cha quichí nya gloria. ³⁸Ta ñuhú cuan, ican cuví aña ñáyivi iyó siqui ñuhu ñayivi. Ta chiti trigu cuan ican cuñí chi catyí ñáyivi cha nyicón chi Nyoo, ta chiti cuhu ña vaha cuan cuñí chi catyí ñáyivi cha nyacuví cuhva cuñí ra ña vaha.

³⁹Ra cha tachí cuhu ña vaha cuan, ican cuví cuhna ra xaan iñi chi Nyoo. Ta quívi cunacoñehe ra tyiño saha ra, ican cuví quívi cucunaa ñuhu ñayivi. Ta ra cha cunacoñehe chiti cuan, ican cuví ra cacuví ángel. ⁴⁰Tari nasatacá ra cuhu ña vaha cuan vatyí cayu chi, tyicuan caa cucuvi quívi naa ñayivi. ⁴¹Yuhu Rayii cha quichi nya gloria cutachi chi ángel cunasatacá ra chi ñu sacoo cuatyí inga ñu, ta ñu cha sacuví cha ña vaha. ⁴²Ta cutyihí ra chi ñu chichi horno nu cayú ñuhu. Ta cucuacu ñu ta cusacahñi ñu noho ñu. ⁴³Ta ñu cha sacuví cuhva cuñí Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñí iñi ndo, tyasoho ndo tuhun cahín.

Noo xuhun cuan cha ñohó xehe

⁴⁴Cha nyacá ñaha Nyoo aña ñáyivi cuví chi tari noo xuhun cuan ñohó xehe chichi ñuhú. Ta noo ra nañihí xuhun cuan cuan, soco natyihí xehe tucu ra inga chaha ta sii xaan cuñí ra cuanuhu ra ta xico ra tandihí cha iyó chi ra, ta satá ra ñuhu nu ñohó xehe xuhun cuan cuan.

Noo cuhva cha cahan ra Jesús cuenda tar perla cha yahvi xaan nyaá

⁴⁵Ta cha nyacá ñaha Nyoo aña ñáyivi, cuví tucu chi tari noo ra satá ta naxicó perla finu. ⁴⁶Ta cuhva cha ñihí ra noo cha yahví vavaha nyaá, ta xico ra ndii maa cha cumi ra, ta satá ra perla vaha cuan.

*Nu sañahá ra Jesús noo cuhva cuenda tar-
raya*

⁴⁷Ta suri cuví tucu cha nyacá ñaha Nyoo aña ñáyivi tari tarraya cha cañí ra nu tyañuhu, ta ñihí ra ndihí nuu tiyaca chihin.

⁴⁸Ta cuhva cha chitu tarraya cuan chihin tiyaca, catavá ra ityi nu ñiti, ta yucuan canacachi ra chi ti, canaquehen vaha ra chi quiti vaha chichi noo tica, ta sacuita ra chi quiti ña vaha cuan. ⁴⁹Ta tyicuan caa cucuvi quívi naa ñayivi, cuquichi coyo ángel, quichi tava sñn ra chi ñu vaha ta ñu ña vaha. ⁵⁰Ta cutyihí ra chi ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

*Nu sañahá chi vatyí vaha tuhun chahnu ta
tuhun chaa Nyoo*

⁵¹Tyicuan ta ra Jesús ndaca tuhun ra chi ra cachicá noo chihin ra, ta catyí ra:

—¿Atu cutuñí iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñí iñi ndi.

⁵²Tyicuan ta catyí ra Jesús chi ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo aña ñáyivi, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

*Nu ñohó ra Jesús Nazaret ñuu nu chahnu ra
(Mr. 6.1-6; Lc. 4.16-30)*

⁵³Ndihí cahan ra Jesús cuhva ihya ta cuahan ra. ⁵⁴Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñí ñáyivi ta catyí ñu:

—¿Nya maa maa cutuhva ra ihya cha chihí tuñi xaan ra? ¿Ta yoso caa cuví sacuví ra milagru? ⁵⁵Vatyí sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas. ⁵⁶Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhva ra tandihí tuhun ihya? —catyí ñu.

⁵⁷Ta yucuan chaha ña cuñí ñu quichaha ñu chi ra. Soco ra Jesús catyí ra chi ñu:

—Tandihí ñáyivi tandihí ri ityi sahá ñu ñáyivi chi ra profeta. Soco ña quichahá ñu chi ra tatu ra ñuu ñu, o ra vehe ñu cuví chi ra —catyí ra.

⁵⁸Ta ña cuaha milagru sacuví ra yucuan cha cuenda vatyí ña chinó iñi ñu chi ra.

14

Nu catyí chi yoso caa chihí ra Juan ra sacondutyá

(Mr. 6.14-29; Lc. 9.7-9)

¹ Quiví cuan ra Herodes, ra cuví gobiernu nicalhnu nu cuví Galilea, ñihí ra tuhun ra Jesús. ² Ta catyí ra chi ra nyicú chihin ra:

—Ican ra cuan cuví ra Juan ra sacondutyá chi ñáyivi, ra cha chihí ta vityin nandotó ra. Yucuan chaha iyó tunyee iñi chi ra cha sacuví ra milagru.

³⁻⁴ Tyicuan caa catyí ra vatyi suri maa ra tyihí tyiño ta catiñ ra chi ra Juan. Ta chahñí ra chi ra chihin cadena, ta tyihi ra chi ra vehe caa. Tyicuan caa sacuví ra tyi xaan cuñí ra tyi catyí ra Juan tyi ña vaha cha nyaá ra chihin cu Herodías cha cuví ña ñasihi yañi ra ra Felipe.

⁵ Ta yucuan chaha, ra Herodes, cuñí ra cahñi ra chi ra Juan, soco yuhví ra chi ñáyivi, vatyi tandihí ñu chinó iñi ñu tyi ra Juan cuenda Nyoo cahán ra. ⁶ Soco noo quiví cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahan xaan iñi ra Herodes. ⁷ Ta tyaa ra cuhva vatyi cuhva ra ñáá ri cha cacán ñaha tyivaa cuan, ta ma nacahnu ra tuhun cahan ra. ⁸ Tyicuan ta tyiyuhví sihi ña chi ña, na catyí ña chi ra Herodes tyehé caa:

—Cuhva xiñi ra Juan ra sacondutyá ñáyivi chii nu noo coho —catyí ña.

⁹ Cha chihí rey Herodes tuhun cahan ña, nducuihya cuñi ra. Soco cha cuenda cha tyaa ra cuhva vatyi cuhva ra ñáá ri cha cacán ña nuu ñu canyicú vico cuan ta ma cuví nacahnu ra, yucuan chaha tachí ra nacuhva ra xiñi ra Juan chi ña. ¹⁰ Ta tachí ra tyiño na cutahnya sucun ra Juan nu ñohó ra vehe caa. ¹¹ Tyicuan ta caquichí nyaca ra xiñi ra, yihí noo nu coho. Ta cachahá ra chi ñaha tyivaa cuan. Ta maa ña nacuhva cuenda ña chi sihi ña.

¹² Tyicuan ta chaá coyo ra canyicon chi ra Juan ta canaquehen ra coño ñuhu ra, ta catyihí ra chichi ñuhu. Ta yahá cuan ta chahan coyo ra chisacoto ra chi ra Jesús.

Nu chahá ra Jesús cha cachi ohon mil rayii
(Mr. 6.30-44; Lc. 9.10-17; Jn. 6.1-14)

¹³ Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivi, ta quitá coyo ñu ñuu ñu, ta cuahan coyo ñu

chata ra ityi nu ñuhú. ¹⁴ Cha quitá ra Jesús chichi canoa cuan, nanyehé ra cuaha xaan ñáyivi. Ta cundahví xaan cuñí ra nyehé ra chi ñu. Ta sanduvahá ra chi ñu cuhví cha chaá chihin ñu. ¹⁵ Ta vatyi cha cua cuaa, ra cachicá noo chihin ra Jesús chaá coyo ra, ta catyí ra chi ra:

—Cha iñi xaan, ta yori ñáyivi iyó yatyin ri ihya. Yucuan cuenda natachi chi ñáyivi ihya na cunuhu coyo ñu nya ñuu cusata ñu cha cachi ñu —catyí ra chi ra Jesús.

¹⁶ Ta ra Jesús catyí ra:

—Ña tahan chi cuhun ñu. Cuhva maa ndo cha cachi ñu.

¹⁷ Ta nacahan ra ta cacatyí ra:

—Noo tuhun ohon tahan siin pan ta uvi tahan siin tiyaca cumí ndi.

¹⁸ Ta catyí ra Jesús:

—Nyaca ndo chii.

¹⁹ Tyicuan ta tachí ra tyiño na cunyicu ñáyivi nu cuhu cuan. Yahá cuan ta quehen ra ohon tahan pan cuan, ta ni nduvi tiyaca cuan. Ta nanyehé ndaa ra andiví, ta nacuhvá ra tyahvi nyoo chi Nyoo ta tahví ra pan cuan. Ta chahá ra chi ra cachicá noo chihin ra, na casacha ra chi ñáyivi cuan. ²⁰ Ta tandihí ñu cachachí ñu ta ndaha iñi ñu. Yahá cuan ta canasatacá ra yiquin cha ndoo. Ta quitá uchi uvi tahan tica. ²¹ Ta cha tandihí ñu cachachí cuan, quitá ta cha ohon mil cha maa ri maa rayii. Ta ña quihví cuenda ñusihi ni ra cuatya.

Nu chicá ra Jesús nu ndutya

(Mr. 6.45-52; Jn. 6.16-21)

²² Ta cha yaha tuhun cuan ta catyí ra Jesús chi ra cachicá noo chihin ra, na quihví coyo ra chichi canoa, vatyi cayaha sava ra miñi cuan ta cuhun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chi ñáyivi na cuhun coyo ñu.

²³ Cha yahá cha natachí ra chi ñu cuan, ta ndaa ra yucu cuan cua cacán tahvi noo tuhun ri maa ra chi Nyoo. Ta yucuan ñohó ra ta cuaa ndihi. ²⁴ Ta cha ni ri ca cha chican tahvi ra cha cuahan vavaha canoa cuan nya mahñu miñi. Ta ndutya miñi cuan cañí chi chi canoa cuan cha cuenda vatyi ñihi xaan caá tatyi nu cuahan coyo ra. ²⁵ Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya. ²⁶ Ta cuhva cha cananyehé ra chi ra, chicá ra nu ndutya cuan, canayuhví xaan ra. Ta cacana chaá vavaha ra, ta catyí ra:

—¡Noo cha sayuhvi cuví!

²⁷ Soco nacahan ra Jesús chihin ra, ta catyí ra:

—¡Sanhi ndo iñi ndo, yuhu cuví, ma yuhvi ndo! —catyí ra.

²⁸ Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyí na quichi yuhu nu ndutya chiña nyacua nya nu vachun.

²⁹ Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichaha chica ra nu ndutya vatyí cuhun ra nu vachi ra Jesús. ³⁰ Soco cuhva cha tuví iñi ra tyi ñihi xaan fuerza tatyí cuan, nayuhvi ra ta quichaha nducu nyee ra, ta quichaha cana chaa ra ta catyí ra:

—¡Sacacu chii, Sutu Mañi yuhu!

³¹ Ta caa cuhva ri cuan, ta tiñ ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáa tuhun cha nacaca uvi iñun? —catyí ra Jesús chi ra.

³² Ta cuhva cha ndaꝓ coyo ra nu canoa cuan, cutaxin ri tatyí cuan. ³³ Tyicuan ta ra cañohó chichi canoa cuan cachiñiñi chiti ra nuu ra Jesús, ta cacatyí ra chi ra:

—Ndicha ndicha cuii vatyí Sehe Nyoo cuví chuun —cacatyí ra.

Nu sanduvahꝓ ra Jesús chi ñu cuhví ñuu cha nyicú nicacahnu Genesaret

(Mr. 6:53-56)

³⁴ Cha cayahꝓ sava ra miñi cuan, cachahꝓ coyo ra nu cuví Genesaret. ³⁵ Ta cuhva cha canicohon nuu ñáyivi iyó yucuan chi ra Jesús, sacoto ñu chi tandihí ñáyivi ityi cuan. Ta quichi nyaca ñu tandihí ñu cuhví nu nyaá ra. ³⁶ Ta chacú ndahvi ñu nuu ra, na cuhva ra tiñ ñu vasi chiin sahma ra. Ta tandihí ñu tiñ sahma ra, nduvahꝓ ñu.

15

Nu sañahá chi ñáa cha sativí chi ñáyivi
(Mr. 7:1-23)

¹ Tyicuan ta suhva ra cacuví fariseo ta ra casacuaha ley vehe ñuhu quitꝓ coyo ra Jerusalén. Ta chaꝓ coyo ra nu nyaá ra Jesús ta candacꝓ tuhun ra chi ra, ta catyí ra:

² —¿Ñáa tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³ Soco ndacꝓ tuhun ra Jesús chi ra, ta catyí ra:

—¿Ñáa tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo? ⁴ Vatyí Nyoo catyí ra: “Saha ndo ñáyivi chi sutu ndo ta chi sihi ndo. Ta tandihí ñu cha cahán ña vaha chi sutu o chi sihi, na cúvi ñu”, catyí Nyoo. ⁵ Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyehe caa: “Ma cuvi tyinyei chuun vatyí tandihí cha iyó chii cha yahꝓ chahꝓ cuende chi Nyoo.” ⁶ Ta tatu cha catyí ndo tyicuan caa, ña cuñí ca chi cha tyinyee ca ndo chi sutu ndo o chi sihi ndo, catyí ndo. Ta tyicuan caa sacuahiyó xiin ndo tuhun cha catyí Nyoo tyi sacuvi ndo, vatyí cuñí ndo sacuvi maa ndo cuhva costumbre maa ndo. ⁷ ¡Nyoho cha sahá ndo tyi vaha ndo! Ndicha vaha tuhun cha tyaa ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸ Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin tandihí añima ñu, tyi siñ nu nyaá xiñi ñu.

⁹ Ta ñahri maa tuhun cha sacahnú ñu chii.

Vatyí cha sañahá ñu maa maa ri cuhva sañahá ñáyivi ri cuví,

tyehe caa tyaa ra Isaías tuhun ndo, catyí ra Jesús.

¹⁰ Tyicuan ta canꝓ ra chi ñáyivi ta catyí ra chi ñu:

—Tyasoho ndo, ta cutuñi iñi ndo tuhun cahín. ¹¹ Vatyí cha quihví yuhu ñáyivi, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhvꝓ ra cachicá noo chihin ra Jesús ta candacꝓ tuhun ra chi ra, ta catyí ra:

—¿Atu chitón vatyí ra fariseo quiñi xaan cuñí ra cha cachiñi ra tuhun cahún?

¹³ Soco maa ra Jesús nacahan ra:

—Tandihí yutun cha ña tachí Suti, ra nyaá andivi, cucoyo tun nya yoho tun. ¹⁴ Saña ndo chi ra vatyí ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cuncanaco yo ra chichi noo yavi.

¹⁵ Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñí chi catyí cuhva cha cahún cuan.

¹⁶Tyicuan ta ra Jesús catyí ra chi ra:

—¿Atu ni nyoho ta ña cutuñi iníi ndo?

¹⁷¿Atu ña cutuñi iníi ndo vatyí cha quihvi ityi yuhu yo, chichi yo cuahan? Yahá cuan ta quita tucu. ¹⁸Soco tuhun cha quitá yuhu yo, chichi añima yo quitá, ta ican cuan cuví cha sativí chi ñáyivi nuu Nyoo. ¹⁹Vatyí nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chi ñáyivi, cha quichi cuví iníi ñu coo ñu chihin inga ñu cha ñima ñasihi ñu cuví. Ta tandihí ca cha quiñi caa cha sacuví ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cháhán ndasi ñu. ²⁰Ican cuan cuví cha sativí chi ñáyivi. Soco cha ma sacuví ñu costumbre cha nacatá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu naching iníi noo ñaha inga ñuu chi ra Jesús

(Mr. 7.24-30)

²¹Quita ra Jesús ñuu cuan ta cuahan ra ityi ñu Tiro ta ñuu Sidón. ²²Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyi ña vaha chi ña, ta nyehé xaan ña tindoho —catyí ña.

²³Soco ra Jesús ña nacahñ ra nu cháhán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachi ña chata yo.

²⁴Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵Soco ñaha cuan tuhva ña ta chicuiñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

²⁶Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

²⁷Soco maa ña ña quichahá ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquín cha canacoyo nu mesa chitoho ti —catyí ña.

²⁸Tyicuan ta catyí ra Jesús chi ña:

—Sihi jñana cha chinó xaan inun chii! Cua sacuví tari cuhva cuñún.

Ta caa cuhva ri cuan ta nduvahá sehe ña.

Nu sanduvahá ra Jesús cuaha ñu cuhvi

²⁹Quita ra Jesús yucuan ta yahá ra yuhu miñi Galilea, ta ndaa ra noo yucu ta chicunyaá ra yucuan. ³⁰Ta cuaha ñáyivi chaa coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu chi ñu nuu ra, ta maa ra sanduvahá ra chi ñu. ³¹Ta iyo cuñí ñáyivi nyehé ñu yoso caa nacahñ ñu ñihi ta yoso caa nduvahá ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayii (Mr. 8.1-10)

³²Tyicuan ta caná ra Jesús chi ra cachicá noo chihin ra, ta catyí ra chi ra:

—Ndahvi xaan cuñí nyehi chi ñáyivi ihya, vatyí cha uñi quiví nyicú ñu ihya chihin, ta ñahri maa cha cachi ñu nyisó ñu. Ta ña cuñí natachi chi ñu nya vehe ñu vatyí ta cachi ca ñu, coto coñaa ñu ityi cunuhu ñu —catyí ra Jesús.

³³Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵Tyicuan ta tachí ra na cunyicu ñáyivi cuan nu ñuhú. ³⁶Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chahá ra chi ra cachicá noo chihin ra, ta maa ra cachicá noo chihin ra canasacha ra chi ñáyivi. ³⁷Tandihí ñu chachi ñu, ta chitú chichi ñu. Ta yahá cuan casacutu ra ucha tica chihin yiquín cha ndoo cuan.

³⁸Cumi mil rayii cachachi, ta ña quihvi cuenda ñusihi ni ri ra cuatyaa. ³⁹Yahá cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

16

Ra fariseo ta ra saduceo cacticán ra chi ra Jesús na sacuvi ra noo milagru
(Mr. 8.11-13; Lc. 12.54-56)

¹Tyicuan ta ra fariseo ta ra saduceo चाहण coyo ra nu nyaá ra Jesús. Vatyí cacuñí ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo. ²Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha xaan cucuvi quivi tyaan, vatyí tyaqui xaan cuaha andivi.” ³Ta cha ñaha ri catyí ndo: “Vityin ña tyaqui maa cucuvi quivi vatyí cuaha ta iñi ñaa xaan andivi”, catyí ndo. Nyoho vaha xaan chitó ndo ¿yoso caa nacotó ndo tuhun vico andivi soco ña cuví nacoto ndo yoso caa cuahan tuhun cha sañahá Nyoo chi ndo vityin? ⁴Ñáyivi iyó vityin, quiñi iyó ñu ta ña chinó iñi ñu chi Nyoo. Cuñí ñu nyehe ñu noo cha iyo. Soco ma cuhve nyehe ñu vatyí cha yaha sañahá Nyoo cha iyó cha sacuvi ra chihin ra Jonás —catyí ra Jesús chi ra, ta sandoq ra chi ra, ta cuahan ra.

Tuhun cahán ra fariseo cuví chi tari yuchan iya
(Mr. 8.14-21)

⁵Cuhva cha cayahá ra cacticá noo chihin ra Jesús inga chiyo miñi cuan, canaq iñi ra cacuiso ra pan. ⁶Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷Tyicuan ta quichahá candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸Ta tuví iñi ra Jesús tuhun candatuhún ra, ta catyí ra chi ra:

—Nyoho, chiin xaan chinó iñi ndo chii. ¿Ñáá tuhun cha catyí ndo vatyí ñahri pan nyisó ndo? ⁹¿Atu ta cutuñi ca iñi ndo? ¿Atu ña nicohón iñi ndo quivi sacachi chi ndi ohon mil rayii chihin ohon tahan ri pan? Ta ¿yoso tahan tica sacutú ndo chihin yiquin cuan? ¹⁰¿Atu ña nicohón iñi ndo quivi sacachi chi cumi mil ca ra chihin ucha tahan pan? Ta ¿yoso tahan tica sacutú ndo chihin yiquin cuan? ¹¹¿Yoso caa cha ña

tuví iñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹²Tyicuan ta cacutuñí iñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo
(Mr. 8.27-30; Lc. 9.18-21)

¹³Cuhva cha chaq ra Jesús ityi ñuu Cesaarea Filipino, ndacaq tuhun ra chi ra cacticá noo chihin ra ta catyí ra:

—¿Ñáá catyí ñáyivi? ¿Yóó ra cuví Rayii cha quichi nya gloria? —catyí ra.

¹⁴Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyivi cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵Tyicuan ta catyí ra chi ra:

—Ta cha cuenda chi nyoho, ¿Yóó ra cuví yuhu?

¹⁶Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷Ta nacahan ra Jesús ta catyí ra:

—Sii xaan cuví chi yoho, Simón sehe ra Jonás, vatyí ni noo rayii ña sañahá ra chuun tuhun ihya, soco maa Suti ra nyaá andivi sañahá chuun. ¹⁸Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuví chasaha tuhun chihi chi chi. ¹⁹Yuhu cuhve ndaha ticu andivi nu nyacá ñaha Nyoo chuun. Ta cha cuhñun ihya siqui ñuhu ñáyivi, cha nuhñi saha maa Nyoo nya andivi. Ta tandihi cha ndachun ihya siqui ñuhu ñáyivi, cha ndachi maa Nyoo nya andivi.

²⁰Tyicuan ta catyí ra Jesús chi ra cacticá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

Nu sacotó ra Jesús tyi cucuvi ra

(Mr. 8.31—9.1; Lc. 9.22-27)

²¹Nya ndaha quivi cuan quichahá catyí ra Jesús chi ra cacticá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi, ta ra cacuví nuu chi

tata sutu, ta ra sacuahā ley vehe ñuhu, cucasanyehē xaan ra tindoho chi ra. Ta catyí tucu ra vatyí cucahñi ra chi ra soco nu cu uñi quivi ta cunandoto ra. ²² Tyicuan ta quehen ra Pedro chi ra ta quita siin ra chihin ra ta quichahā catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutu Mañi yuhu.

²³ Soco nanyocavā ra Jesús, ta quichahā catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñáyivi chicá xiñun —catyí ra.

²⁴ Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyicon ndo chii, cuñí chi sñaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiso ndo. ²⁵ Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñáyivi ndo cha cuende, cucacu añima ndo. ²⁶ Vatyí ñáá ri tuhun cha saha gñaa ndo tandihí cha tyayii cha iyó siquí ñuhu ñáyivi tatu cunaa añima ndo. Vatyí ñahri chihin cutiyahvi ndo ta cacu añima ndo. ²⁷ Vatyí yuhu Rayii cha quichi nya gloria, cuquichi tiquí soco chihin cha cahnu cuví Suti, ta cuquichi coyo ángel chihin. Tyicuan ta cutiyahvi chi noo noo ndo yoso cuhva sacuví ndo. ²⁸ Cha ndicha catyí chi ndo, vatyí yihí nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayii cha quichi nya gloria, cunyehe ndo yoso caa vachi cunyaca ñahi chi ndo —catyí ra Jesús.

17

Nu sañahá Nyoo yoso caa ra Jesús noo cha ndicha nu nyacá ñaha ra

(Mr. 9.2-13; Lc. 9.28-36)

¹ Iñu quivi cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra. ² Ta yucuan nasama cuhva caa ra Jesús nuu ra ndihí chihin ra. Ta xiño vavaha nanduví nuu ra tari ñanyii.

Ta sahma ra cuichin xaan nanduví tari maa ñuhú cuichin. ³ Tyicuan ta cananyehē ra chi ra Moisés ta ra Elías, candatuhún ra chihin ra. ⁴ Ta quichahā catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

⁵ Cha ni ri ca cha cahán ra Pedro, quichi ri noo vico cha xiño vavaha siquí ra. Ta sahvi cuan chi ra. Ta chichi vico cuan quita noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

⁶ Cha cachiñi ra cachicá noo chihin ra Jesús tuhun cuan, cachicavā ra nya ñuhu, ta cayuhvi xaan ra. ⁷ Tyicuan ta tuhva ra Jesús nu cayucú ra, ta tñi ra chi ra, ta catyí ra:

—Ndícuita ndo. Ma yuhvi ndo.

⁸ Ta cuhva cha cananyehē ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahan ndo tuhun soco nya yaha cúvi ta nandoto yuhu Rayii cha quichi nya gloria —catyí ra.

¹⁰ Tyicuan ta candacā tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahán chi quichi?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihí. ¹² Soco yuhu catyí chi ndo vatyí cha yahā quichi ra Elías, soco ña nicohon nuu ñáyivi chi ra, ta casacuví ñu chihin ra tandihí cuhva cuñi maa ñu. Ta tyicuan caa tucu yuhu Rayii cha quichi nya gloria, cusanyehē ñu tindoho chii —catyí ra.

¹³ Tyicuan ta cacutuñi iñi ra vatyí tuhun ra Juan ra sacondutya cahán ra Jesús.

Nu sanduvahā ra Jesús chi noo ra tyivaa cha yihí noo tatyí ña vaha chi

(Mr. 9.14-29; Lc. 9.37-43)

¹⁴ Cuhva cha cachaa coyo ra nu nyicú ñáyivi, tuhva noo ra ta chicuiñi chiti ra nuu ra Jesús, ta catyí ra chi ra:

¹⁵—Tata, cundahvi cuñi nyehun chi sehi, vatyí yihí noo cuehe chihi tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduvá ra nu ñuhu ta cayú ra, ta nduvá ra nu ndutya ñandihi. ¹⁶Ta quichí nyaque chi ra chi ra cachicá noo chuhun, soco ña cuví sanduvahá ra chi ra —catyí ra.

¹⁷Ta nacahan ra Jesús ta catyí ra:

—¡Nyoho, ñu ña chinó iñi cuví ndo! ¡Ta nicaa ni quiñi iyó ndo! ¿Yoso tahan ca quivi cunyai chihin ndo ta cunyei tisihi ndo nyacua nya cutuhva ndo ta chino iñi ndo chii? Nyaca ndo chi ra tyivaa chiña tyehe —catyí ra.

¹⁸Tyicuan ta tava ñehe ra Jesús chi tatyí ña vaha cuan, ta quitá cuan chi ra tyivaa cuan. Ta caa cuhva ri cuan ta nduvahá ra.

¹⁹Cha yahá cuan ta ndacá tuhun siin ra chicá noo chihin ra Jesús chi ra ta catyí ra:

—¿Ñáá tuhun cha ña cuví tava nyuhu chi tatyí ña vaha cuan?

²⁰Ta ra Jesús nacahan ra ta catyí ra:

—Cha cuenda cha chiin xaan chinó iñi ndo chii. Cha ndicha catyí chi ndo vatyí tyehe ta chinó iñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuví sacuvi ndo tatu ndicha cha chinó iñi ndo chii. ²¹Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra

(Mr. 9.30-32; Lc. 9.43-45)

²²Cha ni ri ca cha iin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayii cha quichí nya gloria, cuhva cuenda ñu chii chichi ndaha ra xaan iñi chii. Ta cucahñi ra chii. ²³Soco nu cu uñi quivi ta cunandote —catyí ra.

Ta canducuihya xaan iñi ra cachicá noo chihin ra cha cachiñi ra tuhun cuan.

Nu catiyahví ra cuenda vehe ñuhu cahnu

²⁴Cuhva cha chaá ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candacá tuhun ra chi ra:

—¿Atu ña tyiyahví ra sacuaaha chi nyoho xuhun cha tahán chi cuenda vehe ñuhu cahnu? —catyí ra chi ra Pedro.

²⁵Ta nacahan ra Pedro ta catyí ra:

—Tyiyahví ra.

Cuhva cha quihví ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyí tucu yoho vityin Simón? Ra cuví tyiño siqui ñuhu ñáyivi ihya, ¿yóo chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahví ñu. ²⁷Soco tacuhva vatyí ma cuhva yo tisihi chi ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañi-hun noo xuhun. Ta ñihi tyiyahvun cha cuende ta cha cuenda maun. Quehun ta cutiyahvun —catyí ra Jesús chi ra Pedro.

18

Nu sañahá ra Jesús yóo ra cha cahnu ca cucuvi nu nyacá ñaha Nyoo

(Mr. 9.33-37; Lc. 9.46-48)

¹Quivi cuan catuhvá ra cachicá noo chihin ra Jesús chi ra, ta candacá tuhun ra chi ra:

—¿Nya ndi cahnu ca cuví nu nyacá ñaha Nyoo?

²Tyicuan ta ra Jesús caná ra chi noo ra cuehe luhlu, ta chinanyaá ra chí cue mahñu ra. ³Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuví ndo tari ra cuatyaa, ma cuví quihvi ndo nu nyacá ñaha Nyoo. Vatyí ra cuatyaa chahá ndotyin cunyaca ñaha sutu ndotyin chi ndotyin, ta tyicuan caa cuhva ndo chi ndo cunyaca ñaha Nyoo chi ndo.

⁴Ta tyicuan caa ra cahnu ca cuví nuu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya. ⁵Ta ñáyivi cha natiin cuenda chihin sivi chi noo ra ña cahnu sahá chi, tari ra cuehe luhlu ihya, chi yuhu natiin cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 5.29-30; Mr. 9.42-48; Lc. 17.1-2)

⁶ Tatu yóó ñu sanacavá nu cuatyí chi noo ra nachinó iñi chii ta cuví ra tari mi-noo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu. ⁷ ¡Nana cha ña vaha cha cuenda ñáyivi iyó siqui ñuhu ñáyivi, vatyi iyó tuhun cha sacoo ñu cuatyí tahan ñu! Ta tyicuan ri coo tuhun cuan, soco jndahvi ñu ndahvi cha sanacava nu cuatyí chi inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca cǎhnya ta sǎcuiton cañi. Vatyi vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhu cha ma ndahva ca maa. ⁹ Ta tatu noo chiti nuun sanacavá chuun nu cuatyí, vaha taxin ca tava ta sǎcuiton cañi. Vatyi vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo
(Lc. 15.3-7)

¹⁰ Ma tava xiin ndo chi ni noo ra cha cuví tari noo ra luhlu, vatyi catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andívi.

¹¹ Vatyi yuhu Rayii cha quichi nya gloria, vachi sacaqui chi ñáyivi cha cuanaa chihin cuatyí ñu.

¹² ¿Yoso caa catyi nyoho? Tatu noo ra cumi ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra. ¹³ Ta tatu nañihi ra chi ti, cha ndicha vatyi cusii ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan. ¹⁴ Ta tyicuan caa tucu, Sutu ndo ra nyaá andívi ña cuñí ra cha cunaa ni noo ñu cuví tari noo ra luhlu.

Yoso caa tahan chi saha yo ticahnu iñi chi tahan yo

(Lc. 17.3)

¹⁵ Tatu ra yañun ta sacuví ra cha ña vaha cuhun, cǎhan chihin noo tuhun ri maa ra ta catyun chi ra tyi ña vaha cuhva sacuví ra. Ta tatu quichaha ra tuhun cahún, cha saha ganaun chi ra cuví cuan. ¹⁶ Soco tatu ña quichahá ra chuun, tyicuan ta cǎnon chi uvi

o uñi ra, tacuhva tandihí cha cahun cucuvi ra testigu. ¹⁷ Tatu ña quichahá ra ni chi ra cha cǎhan coyo chuhun cuan, tyicuan ta cǎhan chihin ra chihin nuu ñáyivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

¹⁸ Cha ndicha catyí chi ndo, vatyi tandihí cha cuhñi ndo ihya siqui ñuhu ñáyivi, ta cha nuhñi saha maa Nyoo nya andívi. Ta tandihí cha ndachi ndo ihya siqui ñuhu ñáyivi, cha ndachi maa Nyoo nya andívi.

¹⁹ Ta suri catyí tiqui chi ndo, vatyi tatu uvi nyoho ihya siqui ñuhu ñáyivi, ndu iin ri ndo ta cacan tahvi ndo cuenda ñáá noo cha cuñí ndo cacan ndo, Suti, ra nyaá andívi cuhva ra chi ndo. ²⁰ Vatyi nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹ Tyicuan ta cǎhan ra Pedro chindaca tuhun ra chi ra Jesús ta catyí ra:

—Sutu Mañi yuhu, tatu ra tahan ta sacuvi ra ñáá noo cha ña vaha chihin, ¿yoso tahan chaha tahan chi sahi ticahnu iñi chi ra? ¿Atu ucha tahan chaha?

²² Ta nacahn ra Jesús ta catyí ra:

—Catyí chuun vatyi ñima ucha tahan ri chaha, soco tandihí ri chaha.

Nu cahan ra Jesús noo cuhva cuenda noo ra cha ña cuñí saha ticahnu iñi

²³ Yucuan chaha cha nyacá ñaha Nyoo aña ñáyivi cuví chi tari noo rey cha nacana chi tandihí musu vatyi cuanyehe ra yoso yosó yica ñu chi ra. ²⁴ Ta cuhva cha quichahá natava ra cuenda, ta quichi nyaca ñu chi noo musu cha cuaha millón pesu yosó yica chi ra. ²⁵ Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra iin cuenda ri chihin ñasihi ra, ta chihin sehe ra ta tandihí cha iyó chi ra tacuhva vatyi chihin xuhun cuan cunatyiyahvi ra cha yosó yica ra chii.”

²⁶ Tyicuan ta musu cuan chiciuñi chiti ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandihí chuun”, catyí ra. ²⁷ Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihí cha yoso yica ra, ta saña ra chi ra. ²⁸ Soco cuhva cha quitá musu cuan, nañihi ra chi noo ra tahan ra cha cuví musu tari maa ra. Ta ra

cuan yosó yica ra chiin ri chi ra. Ta tñin ra chi ra cuan, ta quichahā quitu ra sucun ra, ta catyí ra chi ra: “Tyiyahví cha yosó yicon chii.” ²⁹Tyicuan ta chicuñi chiti ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandihí chuun”, catyí ra. ³⁰Soco maa ra ña cuñi ra, ta chahan ra ta tyihí ra chi ra vehe caa nyacua nya cha tyiyahvi ra cha yosó yica ra chi ra. ³¹Cha canyehé inga ca musu cha sacuvi ra, uhvi xaan cacuvi chi ra, ta chahan coyo ra chinacatyí ra chi chitoho ra cha sacuvi ra cuan. ³²Tyicuan ta chitoho ra cuan tachí ra tyiño na quichi ra ta catyí ra chi ra: “Musu ña vaha cuvún. Yuhu sahí ticahnu iñi tandihí cha yosó yicon chii, vatyí chacu ndahvun nui. ³³Tyicuan caa tucu cuñí chí cundahvi cuñi nyehi chuun”, catyí ra chi ra. ³⁴Ta cuxaān xaan chitoho ra, ta tachí ra tyiño na tachi tuñi ñu chi ra, nyacua nya cha tyiyahvi ra tandihí cha yosó yica ra.

³⁵Ta nu ndihí cahan ra Jesús, ta catyí ra tyehé caa:

—Tyicuan caa tucu cusacuvi Suti, ra nyaá andivi, chihin ndo tatu ma saha ndo ticahnu iñi chihin cha tandihí añima ndo chi tahan ndo.

19

Nu sañahá ra Jesús tyi ña vaha sandoo ñáyivi chi ñasihi ñu o yii ñu

(Mr. 10.1-12; Lc. 16.18)

¹Cha yaha cha catyí ra Jesús tuhun ihya, ta quita ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii. ²Cuaha ñáyivi chinyicon chi ra, ta yucuan sanduvahā ra chi ñu cuhvi.

³Tyicuan ta suhva ra fariseo catuhva ra chi ra Jesús, vatyí cacuñí ra nducu ra cuhva tyaa ra cuatyí siqui ra. Ta candacā tuhun ra chi ra ta catyí ra:

—¿Atu vaha cha sandoo rayii chi ñasihi ra cha cuenda ñáá ri tisihi luhlu chahā ña chi ra?

⁴Ta nacahan ra ta catyí ra:

—¿Atu ta sacuaa ca nyoho nu tutu Nyoo nu catyí chi vatyí ra cha savahā chi ndo nya quivi xihna ri, savahā ra rayii ta ñaha sihi? ⁵Ta catyí tucu chi tyehé caa: “Tahán chi sandoo rayii chi sutu ra ta chi sihi ra,

ta ndu iin ri ra chihin ñasihi ra. Ta chichi cha ninduvi ñu, cucuvi ñu tari cha noo ri ñáyivi.” ⁶Yucuan chaha, ñima ca uvi tahan cuví ñu, soco cha nanduvi ñu noo ri ñáyivi. Yucuan chaha, cha sandu iin ri Nyoo ña tahán chi cha sasiin ñáyivi —catyí ra.

⁷Tyicuan ta candacā tuhun ra chi ra Jesús ta cacatyí ra:

—¿Ñáá tuhun cha tyaa ra Moisés vatyí cuví cahnya noo rayii tutu chihin ñasihi ra ta sandoo ra chi ña?

⁸Ta ra Jesús catyí ra chi ra:

—Cha cuenda cha ndavá añima ndo, yucuan chaha, chahā ra Moisés cha sandoo ra ñasihi ra. Soco quivi xihna ri ñima tyicuan caa cuví. ⁹Yuhu catyí chi ndo tyehé caa: Ra cha sandoo ñasihi, ta ñima cha cuenda cha natuvi ña chihin inga ra, ta tandahā ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yii chi, suri chicoo tucu cuatyí ra cuan —catyí ra.

¹⁰Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayii chihin ñasihi ra, vaha taxin ca ma tandaha yo.

¹¹Ta ra Jesús catyí ra chi ra:

—Soco ña tandihí ñáyivi cuví cutuñi iñi ñu tuhun ihya. Soco ñu cha chahā Nyoo cha cutuñi iñi, ican ñu cua cutuñi iñi. ¹²Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí iin caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñii ñu. Ta yihí ñu ña tandahā ñu cha cuenda cha cuñí ñu sacuvi ñu tyiño nuu Nyoo, na nducuaha añima cha nyacá ñaha Nyoo. Tandihí ñu cuví sacuvi tyehé caa, na sacuvi ñu —catyí ra Jesús.

Nu nasocó ra Jesús chi ra cuatyaa

(Mr. 10.13-16; Lc. 18.15-17)

¹³Tyicuan ta quichí nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyin, ta cacan tahvi ra chaha ndotyin. Soco ra cachicá noo chihin ra quichahā cacahan ra chi ñu quichí nyaca chi ndotyin. ¹⁴Soco ra Jesús catyí ra:

—Saña ndo chi ra cuatyaa, na quichi maa ndotyin nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndo-tyin. Yahā cuan ta cuahan ra.

Nu cahán noo ra tyivaa tyayii chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chindaca tuhun ra chi ra Jesús ta catyí ra:

—Maestro vaha xaun. ¿Ñáá cha vaha tahán chi sacuvi ta ñihi ñayivi cha ma naa ca maa coi?

¹⁷ Ta ra Jesús catyí ra chi ra:

—¿Ñáá tuhun cha cатыun tyi vaha yuhu? Noo ri ra vaha iyó ta ican ra cuan cuví Nyoo. [Ta cha cатыun tyi vahi, nacotón tyi Nyoo cuví.] Soco tatu cuñún quihvun ñayivi cha ma naa ca maa, sacuvun tandihi tuhun cha tachi Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñayivi. Ma coo inga ñusihi chuun. Ma suhun cha chii ñayivi. Ma cahun cuendu siqui ñu. ¹⁹ Saha ñayivi chi sutun ta chi sihun. Ta cuñun chi ñayivi, tari cha cuñún chi maun.

²⁰ Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáá ca cha cumañí chii?

²¹ Ta ra Jesús catyí ra chi ra:

—Tatu cuñún cuvun noo ra cuiti nuu Nyoo, cuahan ta xicon cha iyó chuun, ta cuhvun chi ñu ndahvi, ta cunyicon chii. Tyicuan ta coo cha tyayii chuun nya gloria —catyí ra.

²² Soco cuhva cha chiñi ra tyivaa cuan cha cahān ra Jesús tyehe caa, cuihya xaan cuanuhu ra vatyí tyayii xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yii xaan cuhva ra tyayii cha cunyaca ñaha Nyoo añaia ra. ²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyayii ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachiñi ra cachicá noo chihin ra tuhun ihya, iyo xaan cacuñi ra, ta quichahā candaca tuhun ra chi ra tahan ra, ta cacatyí ra:

—Tu tyicuan caa, ¿yóo cha cuví cacu vii?

²⁶ Tyicuan ta nanyehē ra Jesús nu nyicú ra ta catyí ra:

—Ñayivi ma cuví sacuvi ñu tyehe caa, soco Nyoo cuví sacuvi ra tandihi.

²⁷ Tyicuan ta quichahā catyí ra Pedro chi ra:

—Sutu Mañi yuhu, nyuhu tandihi maa cha iyó chi ndi sandoq ndi ta nyicón ndi chuun. ¿Ñáá cha cuñihi ndi? —catyí ra chi ra.

²⁸ Ta nacahan ra Jesús ta catyí ra:

—Cha ndicha catyí chi ndo, vatyí quivi cha cunduchaa tandihi, yucuan quivi yuhu Rayii cha quichi nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaqui. Ta cunyaca ñaha ndo chi ndi uchi uvi tahan ityi ñayivi Israel. ²⁹ Ta tandihi ndo cha sandoq ndo vehe ndo, o yañi ndo, o cuhva ndo, o sutu ndo, o sihi ndo, o ñasihi ndo o sehe ndo, o ñuhú ndo cha catyí yuhu, cunañihi ndo noo cientu ca chaha siqui cuan, ta cunañihi tucu ndo ñayivi cha ma naa ca maa coo ndo. ³⁰ Cuaha xaan ñu cuahan ityi nuu vityin, ican ñu cuan, cuhun nya nu ndihi. Ta cuaha xaan ñu cuahan nu ndihi vityin, ican ñu cuhun ñu ityi nuu.

20

Nu sañahá ra Jesús noo cuhva cuenda ra casahá tyiño

¹ 'Cha nyacá ñaha Nyoo añaia ñayivi, cuví chi tari noo chitoho chacu yoho tichaha ndivi. Ta chitoho chacu cuan ñaha cuiri quitā ra cuanducu ra cuaha ri musu cusaha tyiño nu tyiño saha ra. ² Ta sandaa ra tyiño chihin musu cuan vatyí cutiyahvi ra yahvi cha tahán chi chi ra cha noo quivi, ta tachi ra chi ra cusaha tyiño ra nu iyó tyiño sahá ra. ³ Yahā cuan ta quitā tucu ra cuhva cha caa ñin cha ñaha ri. Ta nanyehē ra chi suhva ca ra canyicú ri maa nuyahvi cuan. ⁴ Ta catyí ra chi ra: “Cuahan tucu nyoho cua saha tyiño ndo nu iyó tyiño sahí, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan. ⁵ Tyicuan ta chitoho chacu cuan quitā tucu ra inga chaha cuhva cha ora. Yucuan ta quitā tucu ra cuhva cha caa uñi cha cha ñi. ⁶ Ta yahā cuan ta quitā tucu ra cuhva cha caa ohon cha cha ñi ta nanyehē ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?” ⁷ Ta canacahan ra cuan ta catyí ra: “Yori maa

cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahí. Ta tyiyahvi mai chi ndo yoso cuhva cha tahán chi chi ndo”, catyí ra. ⁸ Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihví nu ndíhi, ta nu ndíhi ta tyiyahvun chi ra cha caquihví cha xihna ri”, catyí ra. ⁹ Tyicuan ta chaq coyo ra cha caquihví cuhva cha caa ohon cha cha iñi cuan. Ta tahan tahan ra quehen ra yahví naníi noo quívi. ¹⁰ Yahá cuan, ta cuhva cha tahán chi chi ra cha caquihví coyo cha xihna ri cuan, cacuíi maa ra vatyi cuaha ca cutiyahvi ra chi ra. Soco suri iin ri yahvi noo quívi caquehen ra. ¹¹ Ta cuhva cha caquehen ra, quichaha cacahan ra chi chitoho tyiño cuan. ¹² Ta catyí ra: “Ra cha cachaa coyo nu ndíhi ihya, noo tuhun hora casaha tyiño ra. Ta iin ri cuhva tyiyahvun chi ra chihin nyuhu cha saha tyiño ndi nu cahñi ndiyaca”, cacatyí ra. ¹³ Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuhun. ¿Atu ñima yahvi cha noo quívi catyí vatyi tyiyahvi chuun? ¹⁴ Quehen yavun, ta cuanu. ¿Atu ñahri ityi iyó chii cha tyiyahvi chi ra cha quihví nu ndíhi iin ri cuhva cha tyiyahvi chi yoho? ¹⁵ ¿Atu ñahri ityi iyó chii cha sacuvi cha cuñí mai chihin xuhin? ¿Atu quiñi cuñún tyi vaha ñáyivi cuví chihin inga ra cuan?” catyí ra. ¹⁶ Ta tyicuan caa ñu quihví nu ndíhi, cuhun ñu ityi nuu. Ta ñu cuahan ityi nuu, nya nu ndíhi cuhun ñu. Vatyi cuaha xaan ñu nacaná Nyoo chi. Soco chiin xaan ri ñu nacachí ra.

Inga chaha sacotó ra Jesús yoso caa cucahñi ñáyivi chi ra

(Mr. 10.32-34; Lc. 18.31-34)

¹⁷ Cuhva cha cuñí cuhun ra Jesús nya Jerusalén, cana siin ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vatyi cuahan yo Jerusalén vityin. Ta yucuan cucuhva cuenda ñu chi yuhu Rayii cha quichi nya gloria chi ra cacuví nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cuví. ¹⁹ Ta cucuhva cuenda ra chii chi ra ñuu Roma, ta cucuacu nyaa

ra chii, ta cucañi ra chii, ta cucahñi ra chii nu cruzi. Soco nu cu uñi quívi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vatyi cacán ña noo tumañi iñi chi ra. ²¹ Ta quichaha ndaca tuhun ra Jesús chi ña:

—¿Ñáa cha cuñún?

Ta catyí ña:

—Quívi cha cunyaun nu nyacá ñahun nya andívi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cunyehe yuhu? ¿Atu cuví cuhun ndo tuhun chihi tari cuhva cuhun yuhu? —catyí ra.

Ta canacahan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyi cunyehe ndo tindoho, ta cuhun ndo tuhun chihi tari cuhun yuhu tuhun chihi. Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachíñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan. ²⁵ Soco cana ra Jesús chi ra ta catyí ra chi ra:

—Cha chitó maa ndo, vatyi ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra. ²⁶ Soco ñima tyicuan caa tahán chi sacuvi nyoho. Vatyi ra cha cuñí cucahnu ca nu Nyoo, cuñí chi cuví ra musu tandíhi ca ndo. ²⁷ Ta nya nyoho cha cuñí ndo cuví ndo nuu, cuñí chi cuví ndo musu tandíhi ca ñu. ²⁸ Tari yuhu Rayii cha quichi nya gloria, ña vachi vatyi sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyi chihin cuan ta cuví sacaqui cuaha ñáyivi.

Nu sanduvahá ra Jesús chi uvi ra cuaa
(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichahá canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáa cha cuñi ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñi ndi nyehe ndi.

³⁴ Tyicuan ta cundahvi cuñi ra Jesús nyehe ra chi ra, ta tññ ra chiti nuu ra. Ta caa cuhva ri cuan cananyehé ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Cuhva cha cua chaq coyo ra ñuu Jerusalén, ta cachaa ra ñuu Betfagé, yatyin ri nu cuví yucu yutun Olivo. Tyicuan ta tachi ra Jesús tyiño chi uvi ra chicá noo chihin ra. ² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuññi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii. ³ Ta tatu yóo cha catyí ñáa cha catyí chi ndo, catyi ndo chi ñu: “Vatyí chiñuhú ti chi maa ra nyacá ñaha, soco numi ri quichi nanyaca ndi chi ti”, catyi ndo chi ñu —catyí ra.

⁴ Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

⁵ Catyi ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quiti cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuví ra tari cuhva catyí ra Jesús chi ra. ⁷ Caquichí nyaca ra chi ti

chihin sihi ti. Ta catyiso ra sahma ra siqui ti, ta ndaa ra Jesús chi ti. ⁸ Ta cuaha xaan ñáyivi candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi. ⁹ Ta ñáyivi cha cuahan ityi nuu ta ityi chata, quichahá cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andiví! —catyí ñu.

¹⁰ Cuhva cha chaq ra Jesús ñuu Jerusalén cuan, tandihi maa ñáyivi ñuu naquiquí, ta cuaha xaan ñu candacá tuhun ñu chi tahan ñu, ta catyí ñu:

—¿Yóo ra cuví ra ihya?

¹¹ Ta ñáyivi catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

¹² Yahá cuan ta quihvi ra Jesús chichi vehe ñuhu cahnu Nyoo. Ta tavá ñehe ra chi tandihi ra casatá ta ra caxicó yucuan. Ta sanduva ra mesa ra canasamá xuhun chi ñáyivi yucuan. Ta sanduva ra tyayu ra caxicó paloma. ¹³ Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyivi chii cuví, ta tyicuan caa cucunañi chi. Soco nyoho cha nasahá ndo vehe nu nyicú ra suhu” —catyí ra.

¹⁴ Chichi vehe ñuhu cuan catuhva suhva ra cuaa ta ra coxo chi ra Jesús. Ta maa ra sanduvahá ra chi ra. ¹⁵ Soco canyehé ra cacuví nuu chi tata sutu ta ra casacuahá ley vehe ñuhu cuan vatyí savahá ra Jesús milagru, ta canachaa ra cuatyaa chichi vehe ñuhu, ta catyí ndotyín:

—¡Cahnu xaan cuví ra vachi tata rey David! —catyí ndotyín.

Tyicuan ta cacuxaagn tata sutu ta inga ra cuan cha canyehé ra ta cha cachiñi ra. ¹⁶ Ta cacatyí ra chi ra Jesús tyehe caa:

—¿Atu chiñun cha cahán ndotyín?

Ta nacahan ra Jesús ta catyí ra:

—Chini. Soco ¿atu ta sacuaa ca ndo nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyín.

Ta ra cuatyaa lee cha chaxín sacahnú ndo-tyin chuun, catyí chi, —catyí ra Jesús.

¹⁷ Tyicuan ta sandoꝝ ra chi ra, ta quita ra ñuu cuan ta cuahan ra ñuu Betania. Ta yucuan ndoꝝ ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

¹⁸ Tuvi inga quívi. Ta cha ñaha ri, cua ndichi ra Jesús nya Jerusalén, ta chaꝝ soco chi ra. ¹⁹ Ta nanyehé ra noo tu higo yatyin ri yuhu ityi cuan. Ta tuhva ra nu nanyaa tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun. ²⁰ Ta cha nyehe ra cachicá noo chihin ra cha sacuvi ra, iyo cacuñi ra, ta ndaca tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

²¹ Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuvi chi tu higo ihya cuví sacuvi ndo, soco cuví catyí ndo chi yucu ihya tyehe caa: “Çanyaha chuun ihya ta cuahan nya chichi tyañuhu.” Ta tyicuan caa cucuvi. ²² Ta tandihi cha cacan ndo nu chican tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóo ra chahá tyiño chi ra Jesús

(Mr. 11.27-33; Lc. 20.1-8)

²³ Yahá cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuvi nuu chi tata sutu chi ra, ta ra cacuvi mandoñi ñu ñuu Israel, ta candaca tuhun ra chi ra:

—¿Yóo cha tyaa tyiño vatyí sacuvun tyehe caa, ta yóo cha chahá tyiño cuan chuun?

²⁴⁻²⁵ Ta nacahan ra Jesús ta catyí ra:

—Yuhu tucu cua ndaca tuhin noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, cucatyí tucu yuhu chi ndo yóo cha tyaa tyiño ihya chii —catyí ra Jesús chi ra.

Tyicuan ta quichahá cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?” ²⁶ Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihi ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

²⁷ Tyicuan ta quichahá cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóo cha tyaa tyiño ihya chii.

Nu cahan ra Jesús noo cuhva cuenda uvi tahan sehe noo ra

²⁸ Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahi.” ²⁹ Ta nacahan sehe ra ta catyí ra: “¡Ma cuhin!” Soco yahá cuan ta nasama cuhva chicá xiñi ra ta chahan ra chisaha tyiño ra. ³⁰ Yahá cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra. ³¹ Chichi cha ninduvi tahan ra, ¿nya ra sacuvi ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho. ³² Vatyí ra Juan ra sacondutya quichi ra, quichi sañaha ra chi ndo yoso caa tahan chi coo ndo, soco nyoho ña chingo iñi ndo chi ra, soco ra catavá xuhun ta ñu cata iñi cachingo iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

Nu catyí ra Jesús vatyí ra cacahñi chi ra cuví ra tari ra sahá tyiño ña vaha

(Mr. 12.1-12; Lc. 20.9-19)

³³ Tyasoho ndo inga cuhva ihya: Chiyo noo chitoho noo ñuhú, ta tachí ra yoho tichaha ndivi, ta tyihí ra noo chachu. Ta savahá ra noo nu cuhñi ra tichaha ndivi cuan ta tava ra ndutya chi. Ta savahá tucu

ra noo vehe sucun tacuhva vatyí cuví saha ra cuenda tandihi.

³⁷Yaha cuan ta chaha noo ra ñuhú cuan chi suhva ra casahá tyiño, ta cuahan ra inga ñuu. ³⁸Ta cha cha quívi cha iyó tichaha ndivi cuan, tachí ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahán chi chi ra. ³⁹Soco ra casahá tyiño cuan, catiín ra chi musu cuan, ta cacañi ra chi noo ra. Ta chi inga ra cachahñi ra, ta catuchí ra yuu chi inga ra. ⁴⁰Tyicuan ta cha inga chaha, cuaha ca musu tachí chitoho chacu cuan ta ñima ca cha xihna ri. Soco tari casacuví ra chi ra cha xihna ri, sacuví tucu ra chi ra ihya.

³⁷Nu ndihi tachí ra chi maa maa sehe ra, vatyí cuñí maa ra vatyí cusaha ra ñáyivi chi sehe ra. ³⁸Soco cuhva cha cananyehé ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihi ihya. Na cahñi yo chi ra tacuhva ndoo maa yo chihin”, catatyí ra. ³⁹Tyicuan ta catiín ra chi ra, ta catavá ra chi ra ityi chata chacu, ta cachahñi ra chi ra —catyí ra Jesús.

⁴⁰Tyicuan ta ndaca tuhun ra Jesús chi ñu: —Quívi quichi chitoho ñuhú cuan, ¿ñáá cha cusacuví ra chihin ra casahá tyiño quiñi iyó cuan?

⁴¹Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quívi coo tichaha ndivi, cunacuhva cuenda ra chi chitoho chacu cuan cha tahán chi chi ra.

⁴²Tyicuan ta quichaha catyí ra Jesús chi ñu:

—¿Atu ta sacua ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha ñiñi ca.

Ican ihya cuví cha sacuví Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³Yucuan chaha catyí chi ndo vatyí ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra ñanima. Vatyí maa ñu cunacuhva cuenda ñu cha vaha cha tahán chi chi ra. ⁴⁴Ta cha cuenda yuu cuan, yóo ñu cha nduva síqui chí, yiquín maa cucuví ñu. Ta tatu yuu cuan ta canacava síqui yóo ñu, cutaxin nyihi maa ñu —catyí ra Jesús.

⁴⁵Cuhva cha catuví iñi ra cacuví nuu chi tata sutu cuan ta ra fariseo vatyí cuenda ra cahan ra Jesús cuhva ihya, ⁴⁶cacuñí ra catiín ra chi ra, soco cayuhví ra chi ñáyivi vatyí ñáyivi, chitó ñu vatyí ra Jesús cuenda Nyoo cahán ra.

22

Nu chahá ra Jesús noo cuhva cuenda vico tandaha

(Lc. 14.15-24)

¹Quichaha cahan tucu ra Jesús chihin ñu inga chaha chihin cuhva, ta catyí ra:

²—Cha nyacá ñaha Nyoo ñanima ñáyivi cuví chi tari noo rey cha savaha noo vico cha cuenda cha cua tandaha sehe ra. ³Ta tachí ra chi musu ra na cuhan ra cucana ra chi ñu cha nacatyí tuhun ra, soco ñu cuan, ña cacuñí ñu quichi coyo ñu. ⁴Tachí ra inga chaha chi inga musu, ta catyí ra chí ra tyehe caa: “Catyí ndo chi ñu cha nacatyí tuhun, vatyí cha yaha chahñi sindiquí sane, ta inga quiti cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra. ⁵Soco ñu nacatyí tuhun ra, ña caquichaha ñu chí ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu. ⁶Ta inga ñu tiñi ñu chi musu rey cuan ta cañi vavaha ñu chí ra nyacua chahñi ñu chí ra.

⁷Tyicuan ta rey cuan cuxaḡḡ vavaha ra, ta tachí ra chí sindaro ra, cucahñi ra chí ra cachahñi cuan, ta cahmi ra ñuu ra. ⁸Tyicuan ta quichaha catyí ra chí musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chí cha quichi coyo ñu.

⁹Cuahan ndo tandihí calle ta nacatyí tuhun ndo chí tandihí ri ñu cha nañihí ndo na quichi coyo ñu vico tandaha”, catyí rey cuan. ¹⁰Musu cuan cuahan coyo ra tandihí calle, ta casandu iñi ri ra chí tandihí ñu canañihí ra: ñu quiñi iyó, ta ñu vaha. Ta tyicuan caa chitu chíchi vehe ra chihin ñáyivi.

¹¹Tyicuan ta quihví rey cuan cua nyehe ra chí ñáyivi cha canacatyí tuhun musu cuan. Ta nanyehé ra chí noo ra ñohó yucuan, soco ñahri sahma vico tandaha ñihno ra. ¹²Ta catyí rey chí ra: “Amigo, ¿yoso caa cha quihvun ihya ta ñahri sahma vico tandaha ñihnon?” Soco ra cuan ña na cahan maa ra. ¹³Tyicuan ta catyí rey cuan chí ra catyihí mesa cuan: “Cuhñi ndo chaha

ra ta ndaha ra, ta tuchi ndo chi ra nu ñaa iñi ityi chata vehe, ta yucuan cucuacu ra, ta cusacahñi ra noho ra”, catyí ra. ¹⁴ Vatyí cuaha xaan ñu nacana Nyoo chii, soco chiiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

¹⁵ Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra síqui ra. ¹⁶ Ta tachí ra chi suhva ra cuenda ra, iin ri chihin suhva ra cuenda ra Herodes. Ta cacatyí ra chi ra Jesús tyehé caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tñín cuendon cuhva caá ri ñu. ¹⁷ Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahvi yo?

¹⁸ Soco tuví iñi ra Jesús vatyí ña vaha cuhva cachicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáa tuhun cha nducu nyehe ndo chii? ¹⁹ Sañaha ndo xuhun cha tuhva ndo tyiyahvi ndo chi gobiernu —catyí ra.

Ta caquichí nyaca ra noo xuhun cha nañí denariu chi ra. ²⁰ Ta cuhva cha nanyehé ra Jesús, ta quichahá ndaca tuhun ra chi ra:

—¿Yóo chi nuu ta yóo chi sivi nyaá ihya?

²¹ Ta nacahan ra ta cacatyí ra:

—Chi ra nyacá ñaha.

Tyicuan ta catyí ra Jesús chi ra:

—Cuhva ndo chi ra nyaca ñaha cha tahán chi chi ra, ta cuhva tucu ndo chi Nyoo cha tahán chi chi Nyoo —catyí ra.

²² Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

Nu canducu tuhun ra saduceo síqui tuhun cha nandotó ndiyi

(Mr. 12.18-27; Lc. 20.27-40)

²³ Suri quívi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quívi cu naa ñáyivi, Yucuan chaha candaca tuhun ra chi ra Jesús, ta catyí ra:

²⁴ —Maestro, ra Moisés catyí ra vatyí tatu noo ra tandahá ta chihí ra ta ña chiyo sehe ra, tahán chi cha tandaha yañi ra chihin ñaha chihí yí cuan. Tyicuan ta coo sehe

ra chihin ña cha cuenda yañi ra cha chihí. ²⁵ Vaha. Vityin tyehé caa cuví chi noo ra chiyo ucha tahan ra chihin yañi ra. Ra cha xihna ri tandahá ra. Yahá cuan ta chihí ra. Soco vatyí ña chiyo sehe ra, ndoo ñasihi ra chi yañi cu uvi ra. ²⁶ Ta suri tyicuan caa cuví chi yañi ra ra cu uvi. Ta yahá cuan, ta ra cu uñi quehen ra chi ña, ta suri chihí tucu ra. Ta tyicuan caa cuví chi ndi ucha ra. ²⁷ Ta cha yahá cuan nu ndihi tuhun chihí ndihi maa ña cuan. ²⁸ Ta cha tyicuan caa, quívi cunandoto ñu, chichi cha ucha ra chihin yañi ra, ¿nya ra cucuvi ñasihi chi ñaha cuan? ¿Vatyí tandihi ra tandaha ra chihin ña? —cacatyí ra.

²⁹ Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo. ³⁰ Vatyí quívi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andívi cucuvi ñu. ³¹ Soco tuhun cha nandotó ñu ndiyi, ¿atu ta sacuhá ca ndo tuhun cha catyí maa Nyoo chi ndo? Catyí ra tyehé caa: ³² “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chihí ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra —catyí ra.

³³ Iyo cuñí ñáyivi cha chiñi ñu tuhun sañahá ra Jesús.

Ley cha niñi ca cha chahá Nyoo

(Mr. 12.28-34)

³⁴ Cha cachitó ra fariseo vatyí ra Jesús chasi ra yuhu ra saduceo, candu iin ri ra.

³⁵ Ta noo ra cha cuví ra sacuhá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catyí ra:

³⁶ —Maestro, ¿nya mandamiento cha nyaa nu ley cuví cha niñi ca?

³⁷ Ta catyí ra Jesús chi ra:

—“Cuñun chi Sutu Mañi yo Nyoo chihin cha nii iñun ta chihin cha tandihi añimon, ta chihin cha tandihi cha chiñi tuñi xiñun.”

³⁸ Ican ihya mandamiento cha niñi ca, ta cha xihna ri ñandihí. ³⁹ Ta cha cu uvi cha yatyin ri tyicuan caa, ta catyí chi: “Cuñun chi ñáyivi tahun tari cuñún chi maun.”

⁴⁰ Ican uvi tahan mandamiento ihya cuví cha nyisó chi ley cha chahá Nyoo chi ra

Moisés ta tandihí tuhun cha casañahá ra profeta Nyoo ta cha naha.

Ra Cristo quichi ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

⁴¹ Cha ni ri ca cha canyicú iin ri ca ra fariseo, ⁴² ra Jesús ndacá tuhun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chi tata vachi ra cuñí maa ndo?

Ta canacahan ra ta catyí ra:

—Tata ra David cuví chi ra.

⁴³ Tyicuan ta ra Jesús catyí ra chi ra:

—¿Ta yoso caa cha vatyí ra David cuan, maa Tatyí li Nyoo chotyíño chi ra? ta catyí ra vatyí ra cuví Cristo, ra nyacá ñaha chi ra cuví ra, vatyí catyí ra tyehe caa:

⁴⁴ Cahān Suti Nyoo chihin Suti ra Cristo, ta catyí ra chi ra:

“Cunyaa chiyo vahi nyacua nya quívi cuhve chi ra xaan iñi chuun vatyí cuaca chahun siquí ra” tyaá ra David.

⁴⁵ ¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyí ra Cristo Sutu ra cuví chi ra? —catyí ra Jesús.

⁴⁶ Ta yori maa cuví nacahan ni noo tuhun. Ta nya ndaha quívi cuan, yori ca maa caña iñi candaca tuhun ñáá ca cha candaca tuhun chi ra.

23

Nu cahān ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

¹ Tyicuan ta ra Jesús catyí ra chi ñáyivi, ta chi ra cacticá noo chihin ra tyehe caa:

² —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés. ³ Ta cha tyicuan caa, quíchaha ndo cha cahān ra ta sacuvi ndo tandihí cha cacatyí ra chi ndo. Soco ma quehen ndo cuhva iyó ra, vatyí maa ra, siin cha sañaha ra, ta siin cha sacuví ra. ⁴ Vatyí yori ndoyo carga cha tyaá ra siquí ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan. ⁵ Tandihí cha casacuví ra, cha cuñi ra na nyehe ñáyivi. Vatyí tahān iñi ra catyaa ra tuhun Nyoo tyaan ra ta soco ra chihin letra nahnu. Ta tahān iñi ra cacuihno ra sahma chihin adorno nañi. ⁶ Ta nu vaha

ca, cuñí ra cunyicu ra vico, ta cachi ra. Ta nu vaha ca cuñí ra cunyicu ra chichi vehe ñuhu. ⁷ Ta nu chicá noo ra cacuñí ra vatyí cuhva ñáyivi nocumi chi ra chihin cha sahá xaan ñu ñáyivi chi ra. Ta cuñí tucu ra cha catyí ñu chi ra vatyí chito xaan ra. ⁸ Soco nyoho, ma cuhva ndo ityi cha catyí ñáyivi vatyí chitó xaan ndo. Vatyí tandihí nyoho, yañi ndo cuví. Ta noo ri ra chitó iyó, ta ican ra cuví Cristo. ⁹ Ta ma catyí ndo Sutu ndo chi ninoo ra ñuhu ñáyivi ihya, vatyí iyó noo Sutu ndo, ta nyaá ra andivi. ¹⁰ Ta ma catyí ndo vatyí ra cuví nuu cuví ndo, vatyí noo ri maa ra Cristo cuví nuu. ¹¹ Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo. ¹² Vatyí ra cahnu sahá chii, cunocuee ra. Ta ra ña cahnu sahá chii cucucahnu ra.

¹³ ¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyí chasí ndo yuvehe nu nyacá ñaha Nyoo, tacuhva ma cuvi quihvi ñáyivi. Ta ni ri maa ndo ña quihví ndo ta ni ña chahá ndo cha quihvi ñáyivi, ñu cuñí quihvi.

¹⁴ ¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyí tinyaá ndo vehe ñu chihí yí, tyi ña cuví tyiyahvi ñu ñáá xuhun tavá ndo siquí ñu. Ta yahā cuan, ta naha chicán tahvi ndo nu tuvi vatyí sahá ndo tyi vaha ndo. Ta cuenda cha sacuví ndo tyehe caa, cahnu ca tindocho cunyehe ndo.

¹⁵ Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyí nducú xaan ndo cuhva na cunyicon ñáyivi chi ndo. Ta tatu cha nandihvi ñu cuenda ndo, quiñi caa nicoo ñu saha ndo, ta ñiima ca maa ndo. Ta cha tyicuan caa nyacuví ndo, ñilhi ca sacuhún ndo chi ñu anyaya cha nuu maa ndo.

¹⁶ ¡Ndahvi nyoho ra ndahvi! Vatyí cuñí ndo saquehen ityi ndo chi ñáyivi, ¡soco cuaa ndo! Vatyí catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sivi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñí chi cha sacuvi ñu, catyí ndo. ¹⁷ ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun

cuaan cuan, o vehe ñuhu cha sacu ii chi xuhun cuaan cuan? ¹⁸ Ta suri catyí tucu ndo: “Tatu yíhí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñi chi sacuvi ñu, catyí ndo.” ¹⁹ ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan? ²⁰ Vatyí ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihí cha yosó nuu ñandihí. ²¹ Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyí iyó ra yucuan. ²² Ta tyicuan caa tucu ñu tyanahá cuenda andiví, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

²³ ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyí chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyiví, cha cundahví cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva ndo diesmo cuan ñandihí. ²⁴ Nyoho cuñi ndo casaquehen ityi ndo chi ñáyiví, soco cuaa ndo. Vatyí sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnu cuví cuan.

²⁵ ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyí ityi chata ri vasu ta ityi chata ri coho sanduvíí ndo, soco ityi chichí ña sanduvíí ndo. Vatyí chichí añima ndo tyitu ñohó cha quiñi caa. Chicá xiñi ndo cha ñihi ndo nu cusuhu ndo, ta ña cuví chasaha ndo cha quiñi caa cha quichi cuvi xaan iñi ndo. ²⁶ ¡Ra fariseo cuaa cuví ndo! Sanduvíí xihna ndo ityi chichí vasu ta coho, tyicuan ta cuvii tucu ityi chata.

²⁷ ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyí cha nacahyu,

vatyi ityi chata chi tyaqui xaan, soco ityi chichí tyitu ñohó yiquí ndiyi, ta tandihí nuu cha quiñi caa. ²⁸ Tyicuan caa cuví nyoho. Vatyí ityi chata tari maa tyi vaha xaan ndo nuu ñáyiví, soco ityi chichí, tyitú ñohó cha cuendu ndo, ta cha quiñi caa.

²⁹ ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyiví vaha ñu chiyo ta cha naha. ³⁰ Ta yucuan ta catyí ndo! “Tyehe ta chiyo ndi quivi chiyo ñáyiví chahnu ndi, ma tyinyee ndi chi ra chahñi chi ra profeta Nyoo”, catyí ndo. ³¹ ¡Ma chihin yucuan ri! Suri maa ndo nacotó ndo vatyí vachi ndo tata ñu cachahñi chi profeta Nyoo. ³² ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

³³ ¡Nyoho ñu quiñi iyó, ñu vachi tata cool! ¿Yoso caa cucacu nyoho tacuhva ma cahun ndo anyaya? Ma cuví. ³⁴ Yucuan chaha cutachi chi ra profeta Nyoo nu nyicú ndo, cutachi tiqui chi ra chihí tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichí vehe ñuhu. Ta cacanyicon ndo chi ra tahan tahan ñuu. ³⁵ Yucuan chaha, siqui ndo cucunyaa cuatyí cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichí vehe ñuhu yatyin nu nyaá arta cha yosó cha chahá cuenda yo chi Nyoo. ³⁶ Cha ndicha catyí chi ndo, vatyí tandihí cuatyí ihya cucoso siqui ñáyiví cha iyó vityin —catyí ra Jesús chi ra.

*Nu nducuihya iñi ra Jesús nyehe ra chi ñuu
Jerusalén ta chacu ra
(Lc. 13.34-35)*

³⁷ ¡Jerusalén, Jerusalén! ¡Ndahvi nyoho ñu iyó ñuu chihí! Vatyí chahñi ndo chi ra profeta Nyoo. Ta tuchi ndo yuu chi tandihí ra cha saquichí Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichí ndichin ti, soco ña cuñi ndo. ³⁸ Nyehe ndo vityin, vatyí cha sandoo ndahvi chi ndo. ³⁹ Vatyí catyí chi ndo, vatyí ma nyehe ca ndo chii nyacua nya chaa chi quivi cucatyí ndo tyehe caa:

“Cahnu xaan ra cuví ra vachi chihin tunyee iñi sivi Sutu yo Nyoo”, cucatyí ndo —catyí ra Jesús.

24

Nu catyí ra Jesús vatyi cutani vehe ñuhu cahnu

(Mr. 13.1-2; Lc. 21.5-6)

¹Quita ra Jesús chichi vehe ñuhu cahnu cuan, ta cha cuñí cuhun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra. ²Soco nacahan ra Jesús ta catyí ra:

—¿Atu nyehé ndo tandihi ihya? Cha ndicha catyí chi ndo, vatyi ihya ni noo yuu ta ma ndoo coso nyitahan. Tandihi ta cutani —catyí ra.

Nu catyí ra Jesús ñáa ndihi seña cucuvi cha ni cumañi ca naa ñayivi

(Mr. 13.3-23; Lc. 21.7-24; 17.22-24)

³Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyí xehe ra chi ra tyehe caa:

—Cuñí ndi cha catyun chi ndi, ama cucuvi tuhun cuan. ¿Ñáa seña cucuvi cha cuquichun inga chaha ta cha cunaa ñayivi?

⁴Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo. ⁵Vatyi cuaha xaan ra cuquichi, ta cotyiño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra. ⁶Nyoho cuñihi ndo tuhun tyi iyó cuatyí ta cañí tahan ñáyivi ityi cuan ityi ihya. Soco ma nayuhvi ndo, vatyi tyicuan caa tahanan maa chi cuvi. Soco ta chaa ca quivi cunaa ñayivi. ⁷Vatyi ñáyivi noo ñuu cahnu, cucañi tahan ñu chihin ñáyivi inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi. ⁸Tandihí ihya ta nu cua quichaha ñáyivi nyehe ñu tindoho cuví.

⁹Tyicuan ta cucuhva cuenda ñu chi nyoho vatyi sanyehe ra tindoho chi ndo. Ta cacahñi ra chi ndo. Ta tandihí ñu iyó siqui ñuhu ñayivi cutasi cuñi nyehe ñu chi ndo cha cuenda yuhu. ¹⁰Quivi cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chi tahan ñu. ¹¹Cuaha xaan ra cuendu cunatuvi, ta cucatyí ra vatyi

cuenda Nyoo cacahan ra. Ta cuaha xaan ñáyivi cucasandavi ñaha ra. ¹²Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chi tahan ñu. ¹³Soco ñu cha ña ndu uvi iñi chino iñi chii nyacua nya nu ndihí, cucacu añima ñu. ¹⁴Ta cucutya nicahnu ñayivi tuhun vaha cha nyacá ñaha Nyoo añima ndo, tacuhva coto tandihí ñáyivi iyó siqui ñuhu ñayivi, tyicuan ta cunaa ñayivi.

¹⁵Tandihí nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaá ra tuhun noo cha sacuquiñi caa, noo cha sativí. Ta quivi nyehe ndo vatyi chaa ihya Nu li, ¹⁶tyicuan ta ñu ñohó Judea, cuñi chi cono ñu ityi yucu. ¹⁷Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan. ¹⁸Ta ñu ñohó nu chiqui, ni ma cunuhu ca ñu cunaquehen ñu ni sahna ñu. ¹⁹¡Ndahvi ñusihí cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan! ²⁰Çacan ndo chi Nyoo tacuhva cha ma tahan chi caca cono ndo quivi vichin, ni quivi nyitatu yo. ²¹Vatyi cuaha xaan tindoho cucoo quivi cuan, noo tindoho cha ta coo ca maa nyata ching ñuhu ñayivi, ta ni ma coo ca cha yaha tuhun cuan. ²²Soco tatu Nyoo, ta ma sanducuiti ra quivi cuan, yori maa cacu. Soco cusanducuiti ra cha cuenda cha cuñi ra chi ñu nacachí maa ra.

²³Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo. ²⁴Vatyi cuquichi coyo ra casandavi ñaha ta cucatyí ra vatyi ra Cristo cacuví ra. Ta cucatyí ra vatyi ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachí maa Nyoo ta cusandavi ñaha ra tatu cuví chi ra. ²⁵Saha ndo cuenda vatyi cha yahá catyi chi nyoho cha ni cumañi ca cuvi. ²⁶Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndii cuan”, catyí ñu chi ndo, ma cuhun ndo. O tatu catyí ñu chi ndo: “Nyehe ndo, ma ra nyaá chichi cartu ihya”, ma chino iñi ndo. ²⁷Vatyi tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi quichi yuhu Rayii cha quichi

nya gloria. ²⁸ Nu caá coño chihí, yucuan cuchaa coyo chii.

*Yoso caa cuquichi ra Cristo inga chaha
(Mr. 13.24-37; Lc. 21.25-33; 17.26-30, 34-36)*

²⁹ Ta cha yahá ri cha nyehé ñu tindoho, ta cunduñaa ñanyii, ta yoo ma sacundichin ca chí. Ta tiño cunanacoyo ti andívi, ta nyacua nya cha iyó andívi cunacanda. ³⁰ Tyicuan ta cuquetuvi noo seña ityi andívi nu vachi yuhu Rayii cha quichí nya gloria. Cuquichi nu vico ityi andívi chihin tunyee iñi cahnu ta chihin cha cahnu cuví Nyoo. Ta tandihí ñáyivi iyó síqui ñuhu ñáyivi, cucuacu chaa xaan ñu cha nanyehe ñu chii. ³¹ Ta cutachi ángel cuende tacuhva vatyi chihin cha ñihí tíví ra cutu ra ta cusandu iñ ri ra chí ñu nacachí maa Nyoo chí, cuquita ñu nicacahnu nu ñuhu ñáyivi, nyacua nya nu ndihí ñuhu ñáyivi ta nyacua nya nu ndihí andívi.

³² Cutuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyi cha vachi vico savi. ³³ Ta suri tyicuan caa, tatu cha nyehé ndo tandihí maa cha cucuvi ihya, coto ndo vatyi cha cuyatín quichi. Cha nyañai yuvehe cuví chí cuan. ³⁴ Cha ndicha catyí chí ndo vatyi tandihí tuhun ihya, cucuvi cha ni ri ca cha iyó ñáyivi. ³⁵ Andívi ta ñuhu ñáyivi cundihí chí, soco tuhun cahan yuhu, ma ndihí chí. Ta cuchino cava tandihí tuhun cahn chihin ndo ihya.

³⁶ Soco quívi ta cuhva cha cucuvi cuan, yori chitó, ni ángel andívi ta ña chitó ra. Ni yuhu Rayii cha quichí nya gloria ta ña chité. Noo tuhun ri maa Nyoo Suti chitó ra.

³⁷ Tari cuví quívi chiyó ra Noé, tyicuan caa cucuvi quívi quichi tucu yuhu Rayii cha quichi nya gloria. ³⁸ Quívi ta ni cumañi ca coon savi xaan, ñáyivi cuan, chachí ñu, ta chihí ñu, tandahá ñu, ta chahá ñu chí sehe ñu tandaha nyacua nya quívi quíhvi ra Noé chichi barcu cuan. ³⁹ Ta sana iñi ñu ta chaa savi ta tyañi tandihí ñu. Ta tyicuan caa cucuvi tucu quívi quichi tucu yuhu Rayii cha quichí nya gloria. ⁴⁰ Quívi cuan, tu uvi ra ñohó ra nu chiqui. Noo ra cunaquehin, ta noo ra ndoo ra. ⁴¹ Tu uvi ñusihi nyicó ñu molinu. Noo ña cunaquehin, ta noo ña ndoo ña. ⁴² Cuatu tuhva vaha ndo vatyi ña chitó ndo ñáá cuhva cuquichi ra nyacá ñaha chí ndo. ⁴³ Soco coto ndo tuhun ihya

vatyi tatu noo chitoho vehe ta chitó ra ñáá cuhva cuquihvi ra suhu chichi vehe ra, cuatu tuhva vaha ra ta ma cuhva ra cha quihvi ra suhu cuan. ⁴⁴ Yucuan chaha nyoho, cuatu tuhva ndo. Vatyi sana ri iñi ndo, ta cuquichi yuhu Rayii cha quichi nya gloria.

*Ñu cha nyatú tuhva na ndichi ra Cristo,
ican ñu cuví musu vaha ra
(Lc. 12.41-48)*

⁴⁵ Noo musu cha tyasohó tuhun cahan chitoho, ta tyicuan ri sacuví ra tyiño tyaa ra chí ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva. ⁴⁶ Ta sii xaan cuví chí musu cuan tatu cuhva cha sahá tyiño ra ta nachaa chitoho ra. Vatyi quichahá ra tandihí cha tahn chí sacuví ra. ⁴⁷ Ta cha ndicha catyí chí ndo, vatyi chitoho ra cunatyaa ra tandihí cha cumí ra ndaha ra, vatyi vaha quichahá ra chihin tyiño sahá ra. ⁴⁸ Soco tatu noo musu quíni iyó ta chícá xiñi ra vatyi naha cuahan chitoho ra, ⁴⁹ ta quichaha nyacuvi ra cha ña vaha chihin inga musu cuan, ta quichaha chachi ra ta chíhi ra ndixi chihin ra chíni, ⁵⁰ tyicuan ta sana iñi ra ta ndichi chitoho ra quívi cha ña nyatú ra chí ra. ⁵¹ Tyicuan ta chitoho ra ñihí xaan cutachi tuñi ra chí ra chihin ñáyivi quíni iyó cha savaha chíi soco ña ndicha. Tyicuan ta cucuacu ra ta cusacahni ra noho ra.

25

*Nu chahá ra Jesús noo cuhva cuenda uchi
tahan ñu tyivaa*

¹ Cha nyacá ñaha Nyoo aña ñáyivi cuví chí tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chí ra cha cua tandaha. ² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu. ³ Nu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyi natyihí ñu chíhi lámpara ñu tatu ndihí. ⁴ Soco ñu cachi ñohó iñi cuan, canyisó siin ñu yutyi acetye chihin lámpara ñu. ⁵ Ta vatyi cucuee ca chaa ra cha cua tandaha cuan, catín ñumahna chí tandihí ñu, ta caquixí ñu. ⁶ Tyicuan ta ñáá cuhva ñuu, ta chíni ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen

cuenda ndo chi ra!” catyí ndusu cuan.

⁷Tandihí ñu tyivaa cuan canducuita coyo ñu ta quichaha casanduvaha ñu lámpara ñu. ⁸Tyicuan ta quichaha catyí ohon ñu tondo ñohó ñi cuan chi inga ohon ñu cuan: “Cuhva ndo suhva acetye ndo chi ndi, vatyí cuñí ndahva lámpara ndi”, catyí ñu. ⁹Soco ñu tyivaa cha cachi ñohó ñi cuan nacahan ñu tyehe caa: “Ma cuhva ndi vatyí coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo.”

¹⁰Soco cha ni ri ca cha cuahan coyo ndi ohon ñu cha tondo ñohó ñi cuan, cua sata ñu acetye, ta chaa ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe.

¹¹Yahá cuan ta cachaa coyo tucu ñu chisata acetye cuan, ta catyí ñu: “¡Tata! ¡Tata! ¡Ñuñá yuvehe naquihví ndi!” ¹²Soco maa ra nacahan ra, ta catyí ra: “Cha ndicha vatyí ña ñohó nui chi nyoho.”

¹³Tyicuan ta quichaha catyí ra Jesús:

—Cuatu tuhva ri nyoho, vatyí ña chító ndo nya quívi ta ñáá cuhva cuquichi yuhu Rayíi cha quichi Nya gloria.

*Noo cuhva cuenda xuhun
(Lc. 19.11-27)*

¹⁴‘Cha nyacá ñaha Nyoo añaime ñáyivi cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chaha cuenda ra xuhun chi ra.

¹⁵‘Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra. ¹⁶Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan. ¹⁷Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan. ¹⁸Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹‘Cuaha quívi yahá ta nachaa chitoho musu cuan. Ta quichaha natava ra cuenda chihin noo noo ra. ²⁰Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: “Tata, ohon mil chahun

chii, ma inga ohon mil ihya cha saha ganai.”

²¹Ta chitoho ra catyí ra chi ra: “Vaha. Noo musu vaha xaan cuvún. Ta sacuvún tandihí cha catyí. Ta vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quíhvi nu vaha ihya, ta cusí cuñun chihin.” ²²Yahá cuan ta cha tucu musu cha quehen cuenda uvi mil xuhun cuan, ta catyí ra: “Tata, uvi mil chahun chii, ma uvi ca mil ihya cha saha ganai siquí.” ²³Ta catyí chitoho ra chi ra: “Vaha. Noo musu vaha xaan cuvún, ta sacuvún cha catyí. Vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quíhvi nu vaha ihya, ta cusí cuñun chihin”, catyí ra. ²⁴Soco cuhva cha cha musu cha quehen cuenda noo mil ri xuhun cuan, catyí ra chi chitoho ra: “Tata, yuhu chité vatyí cuvún noo ra xaan ta cuñun naquehún xuhun noo nu ña sahá tyiño, ta cuñun naquehún cosecha noo nu ña tachún. ²⁵Yucuan chaha nayuhví ta chahín ta tyihí xehi xuhun chichi ñuhú. Soco ma xuhun ihya cha chahun chii”, catyí ra. ²⁶Tyicuan ta nacahan chitoho ra, ta catyí ra chi ra: “Musu quíni iyó ta musu suchan cuví yoho. Tatu chitón vatyí cuñí naquehún nu ña saha tyiño, ta quehín cosecha noo nu ña tachí, ²⁷ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siquí cha saha ganaa chi”, catyí ra. ²⁸Tyicuan ta quichaha catyí ra chi ñu nyicú cuan: “Tinya ndo noo mil xuhun cha nyisó ra, ta cuhva ndo chi ra cha nyisó uchi mil. ²⁹Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihí chi ñu. ³⁰Ta musu cha ña chihuhú ihya, tuchi ndo chi ra nu ñaa ñi ityí chata, ta yucuan cuacu chaa ra, ta cusacahíi ra noho ra chihin cha nyehe ra tindoho.”

Nu catyí ra Jesús vatyí cucutuñi chi tandihí ñáyivi

³¹‘Quívi cuquichi yuhu Rayíi cha quichi nya gloria, cuquichi chihin cuaha ángel cuende, ta cucunyai tyayu tyaquí ta cunyacá ñahi. ³²Ñáyivi tandihí ri ñuu cundu ñin ri ñu nui. Ta cusasiin chi noo noo ñu, tari ra sahá cumi mbee tavá siin ra chi mbee ta tava siin ra ndixihyu. ³³Ta cucuatyai chi mbee cuan chiyó vahi, ta chi ndixihyu

cuan, chiyo satyin. ³⁴ Tyicuan ta yuhu cha cuví Rey cucatyí chi ñu nyicú chiyo vahí: “Ñaha nyoho vatyi nyoho ñáyiví cha nasocó Suti cuví ndo. Quēhen cuenda ndo nu cuacunyaa ndo nu nyacá ñaha Nyoo, vatyi cha cuenda maa ndo chinq ihya nyata quiví savahā Nyoo ñuhu ñáyiví. ³⁵ Vatyi quiví chisoque, ta nyoho चाहā ndo cha cachi. Quiví cu ityi ndutya ta चाहā ndo cohi. Ta quiví chicā noi tari ra inga ñuu ta nyoho चाहā ndo vehe coi. ³⁶ Quiví cumañi sahme, ta nyoho चाहā ndo sahme. Quiví cuhví ta nyoho चाहā ndo chinyehē ndo chii. Ta quiví ñohí vehe caa, ta quichí nyehe ndo nu ñohí.” ³⁷ Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocon, ta चाहā ndi cha cachun? ¿Ama nyehe ndi ityun ndutya ta चाहā ndi cohun? ³⁸ ¿Ama nyehe ndi chuun chicá noun tari ra inga ñuu ta चाहā ndi vehe coun? ¿Ama cumañi sahmon, ta चाहā ndi chuun? ³⁹ ¿Ama nyehe ndi cuhvín, o ñohún vehe caa, ta चाहā ndi chinyehē ndi chuun?” cucatyí ñu. ⁴⁰ Ta yuhu cha cuví Rey cucatyí chi ñu: “Cha ndicha catyí chi ndo, vatyi tandihí tumañi iñi sacuví ndo chihin ra ndahvi, ra yañi ihya, chi yuhu sacuví ndo tumañi iñi cuan.” Tyicuan caa cucatyí yuhu chi ñu. ⁴¹ Tyicuan ta yuhu cha cuví Rey cucatyí tiqui chi ñu nyicú chiyo satyin tyehe caa: “Canyaha ndo nui, nyoho ñu tahán chi cuhvín anyaya. Cuahan ndo nu ñuhu cha ma ndahva ca maa. Vatyi yucuan cuví nu chinq cha cuenda cuhna ta cha cuenda tatyí ña vaha cuenda ra. ⁴² Vatyi chisoque, ta nyoho ña चाहā ndo cha cachi. Cu ityi ndutya, ta ña चाहā ndo ndutya cohi. ⁴³ Chicā noi tari chicá noo ra inga ñuu, ta ña चाहā ndo nu coi. Cumañi sahme ta ña चाहā ndo sahma cuhne. Cuhví ta ñohí vehe caa, soco ña चाहā ndo chinyehē ndo chii nu ñohí”, cucatyí chi ñu. ⁴⁴ Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvún, o ñohún vehe caa, ta ña tynyeē ndi chuun?” cucatyí ñu. ⁴⁵ Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyi tandihí maa cha ña sacuví ndo chi ñáyiví ndahvi ihya, suri ña sacuví tucu ndo chi yuhu cuví

cuan”, cucatyí yuhu chi ñu. ⁴⁶ Tyicuan ta ñu cuan cuhun coyo ñu nu cayú ñuhu cha ma ndahva ca maa. Ta ñáyiví vaha cuan cuhun ñu cucoo ñu noo ñáyiví cha ma naa ca maa.

26

Nu canducū ra cuhva yoso caa catiñ ra chi ra Jesús

(Mr. 14.1-2; Lc. 22.1-2; Jn. 11.45-53)

¹ Cuhva cha ndihí catyí ra Jesús tuhun ihya, ta quichahā catyí ra chi ra cachicá noo chihin ra tyehe caa:

² —Nyoho chitó ndo vatyi uvi ca quiví ta sanducahnu yo vico pascua. Ta yuhu Rayii cha quichí nya gloria cucuhva cuenda ñu chii vatyi tyaa ñu chii nu cruzi —catyí ra.

³ Quiví cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu ñin ri ra nuquehe vehe tyiño ra Caifás, ra cuví nuu chi tata sutu. ⁴ Yucuan casandaā ra tyiño yoso caa ta sandavi ñaha ra chi ra Jesús ta catiñ ra chi ra ta cacahñi ra chi ra. ⁵ Soco cacatyí ra:

—Ma cahñi yo chi ra cha ni ri ca cha chichi vico, tacuhva cha ma naquiqui xaan ñáyiví —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

⁶ Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chi, sivi saca ra cuví cuan. ⁷ Ta tuhva noo ñaha nu nyaá ra Jesús, nyisó ña noo yutyi tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta chosó ña ndutya cuan xiñi ra. ⁸ Cuhva cha cananyehē ra chicá noo chihin ra cacuxaan ra ta quichahā catyí ra:

—¿Ñáá tuhun cha sativí ña ndutya vixi chahan cuan? ⁹ Vaha ca tyehe ta xico ña, ta ñihi ña cuaha xuhun chihin ta tynyeē ña chi ñu ndahvi chihin xuhun cuan —catyí ra.

¹⁰ Tyicuan ta chiñi ra Jesús, ta catyí ra chi ra:

—¿Ñáá tuhun cha sayangá ndo chi ñaha ihya? Vatyi cha sacuví ña chihin, noo cha vaha cuví. ¹¹ Vatyi ñu ndahvi tyicuan ri cun-
yaa ñu chihin ndo, soco yuhu, ñima tyicuan ri cua cunyai chihin ndo. ¹² Chosó ña ndutya vixi chahan siquí coño ñuhi, vatyi sandu-
vahā ña cuenda cha cohin chichi ñuhu.
¹³ Cha ndicha catyí chi ndo, vatyi tandihí ri

nu cahan ñu tuhun Nyoo nicahnu ñayivi, cunacatyí tucu ñu cha sacuvi ñaha ihya, tacuhva nicohon iñi ñayivi chi ña —catyí ra Jesús.

Nu naxicō tuhun ra Judas Iscariote chi ra Jesús

(Mr. 14.10-11; Lc. 22.3-6)

¹⁴Tyicuan ta noo ra chicá noo chihin ra Jesús, ra cha ñañí Judas Iscariote, chahan ra chichan ra chihin ra cacuví nuu chi tata sutu. ¹⁵Ta catyí ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin. ¹⁶Ta nya cuhva cuan ta quichahā nducu ra Judas ñáá noo cuhva cuvi nacuhva cuenda ra chi ra Jesús chi ra cacuví nuu chi tata sutu cuan.

Nu cuxiñí ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Quivi xihna ri cha quichahā vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichahā candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸Ta catyí ra Jesús chi ra:

—Cuahan ndo chichi ñuu ta cha ndo vehe noo ra cuan. Ta catyí ndo chi ra: “Ra Sacuahā catyí ra vatyí cha cuyatyn cua cúvi ra, ta vehun cusanducahnu ndi vico pascua”, catyí ndo chi ra —catyí ra Jesús.

¹⁹Tyicuan ta casacuví ra tari cuhva catyí ra Jesús chi ra. Yahā cuan ta casanduvahā ra cha cacuxiñi ra cha vico pascua cuan.

²⁰Cuhva cha cuaa, chicunyaā ra Jesús nu mesa chihin ndi uchi uvi ra chicá noo chihin ra. ²¹Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

²²Ta canducuihyā xaan iñi ra, ta quichahā candaca tuhun iin iin ra chi ra ta cacatyí ra:

—Sutu Mañi yuhu, ¿atu yuhu cuví?

²³Ta nacahan ra Jesús ta catyí ra:

—Ra cha chachí iin ri coho chihin, ican ra cuan cua na cuhva cuenda chii. ²⁴Yuhu Rayii cha quichi nya gloria, cuahin ityi cha catyí nu tutu tuhun Nyoo. Soco ndahvi ra

ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

²⁵Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yahā tahvi sava ra, ta chahā ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷Yahā cuan ta quehen tucu ra copa, ta nacuhva ra tyahvi nyoo chi Nyoo, ta sayahā ra chi tandihi ra ta catyí ra:

—Coho tandihi ndo ihya. ²⁸Vatyí ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyí cucatí niñi cha catyí cha vaha chi cuaha ñu, vatyí chihin niñi coo ticahnu iñi cuatyí ñu. ²⁹Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

Nu catyí ra Jesús vatyí cucatyí ra Pedro vatyí ña ñohó nuu ra chi ra

(Mr. 14.26-31; Lc. 22.31-34; Jn. 13.36-38)

³⁰Cha yahā cha cachitā ra yaa chi Nyoo, ta cuahan coyo ra yucu yutun Olivo cuan.

³¹Tyicuan ta quichahā catyí ra Jesús chi ra:

—Tandihi nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chi tyehe caa: “Cukahñi chi ra sahá cumi mbee, ta mbee cuquiti cuatyí ti”, catyí chi. ³²Soco cha yahā nandote, xihna que cuhin Galilea, ican saha nyoho.

³³Tyicuan ta nacahan ra Pedro ta catyí ra:

—Vasi tandihi ra ndu uvi iñi ra cha nyicón ra chuun, soco yuhu ma ndu uvi iñi.

³⁴Tyicuan ta quichahā catyí ra Jesús chi ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

³⁵Ta ra Pedro catyí ra:

—Vasi cúvi chuhun, soco ma catyí cha ña ñohó nui chuun —catyí ra.

Ta suri tyicuan caa catyí tandihi ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaq̄ ra Jesús chihin ra cacticá noo chihin ra noo nu nañí Getsemaní, ta catyí ra chi ra:

—Cunyicu ndo ihya, cha niri ca cha cuahin yucuan, cua cacán tahví.

³⁷ Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichahā nducuihya cuñi ra, ta tyoño xaan cuñi ra. ³⁸ Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndogo ndo ihya ri ta conyito ndo chihin —catyí ra.

³⁹ Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuví tari cuhva cha cuñi mai, soco tari cuhva cuñi maun na cuví —catyí ra.

⁴⁰ Tyicuan ta nachaq̄ ra nu nyicú ra cachi-cā noo chihin ra, ta nyehē ra vatyi caquixí ra. Ta catyí ra chi ra Pedro tyehē caa:

—¿Atu ni minoo hora ña cuví conyito ndo chihin? ⁴¹ Conyito ndo, ta cacán tahvi ndo tacuhva cha ma cuví chasaha cuihna chi ndo. Cha ndicha vatyi añima ndo, cuñi xaan chi nanducu chi Nyoo, soco coño ñuhu ndo vita cuñi chi —catyí ra Jesús chi ra.

⁴² Nu cu uvi chaha chahan ra, ta chican tahvi ra tyehē caa:

—Sutu Mañi yuhu, tatu ma cuví cha ma nyehi tindoho ihya, tu tyicuan caa, na cuví maa cuhva cuñún —catyí ra.

⁴³ Tyicuan ta nachaq̄ ra inga chaha ta caquixí tucu ra cacticá noo chihin ra, vatyi nicunyasi maa chiti nuu ra chihin cha cacuñi ra cusu ra. ⁴⁴ Tyicuan ta sandoq̄ ra chi ra, ta cuahan ra cha cu uñi chaha cua cacán tahvi ra. Ta catyí ra suri maa tuhun cha yahā cahan ra cha chican tahvi ra chi Nyoo.

⁴⁵ Tyicuan ta nachaq̄ ra nu canyicu ra cacticá noo chihin ra, ta catyí ra chi ra:

—Vityin ndicha, cusu ndo ta nyitatu ndo. Vatyi cha chaq̄ cuhva cha cua nacuhva cuenda ra chii chi ra quiñi iyó, ta Rayñi cha quichi nya gloria cuví. ⁴⁶ Ndiquita ndo, ta cōho ndo. Vatyi cha vachi ra cha cunacuhva cuenda chii —catyí ra Jesús.

Nu catiñ ra xaan iñi chi ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahán ca ra Jesús tuhun ihya, ta chaq̄ ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachi chi ra. ⁴⁸ Ra Judas, ra cha chahā cuenda chi ra Jesús, cha yahā chahā ra noo seña chi ra cuan, tacuhva coto ra yóó chi tiñ ra. Ta catyí ra:

—Ra cha cutyayuhi chi, ican ra cuan cuví. Tiñ ndo chi ra.

⁴⁹ Tyicuan ta tuhva ra chi ra Jesús ta catyí ra:

—Nocumi chuun, Maestro.

Ta tyayuhu ra chi ra.

⁵⁰ Tyicuan ta nacahan ra Jesús ta catyí ra chi ra:

—Amigo, sacuvi ñáá tyiño vachun.

Tyicuan ta catuhva ra ta catiñ ra chi ra Jesús.

⁵¹ Tyicuan ta noo ra ndihi chihin ra Jesús, tava ra mityi ra ta chahnya ra soho noo musu ra cuví nuu chi tata sutu cuan. ⁵² Ta catyí ra Jesús chi ra:

—Natyihi mityun chichi vena. Vatyi tandihi ñu cacañi tahan chihin mityi, suri chihin mityi cúvi ñu. ⁵³ ¿Atu ña chitón vatyi tatu yuhu ta cuñi, cuví caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii?

⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyi catyí chi tyi tahn maa chi cuví chi yuhu tyehē caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi tiñ ndo chii chihin cha xaan ta chihin yutun? Tari cha noo ra suhu cuví yuhu sahā ndo. Ndiquivi chinyaj sañahi nu nyicú ndo chichi vehe ñuhu cahnu, soco ña tiñ ndo chii cha cuhin vehe caa. ⁵⁶ Vatyi tandihi cha cuví chii vityin, ta chicunyaq̄ nu tutu Nyoo, cha catyaq̄ ra profeta Nyoo ta cha naha.

Tyicuan ta ndii ra cacticá noo chihin ra, cachino ra. Noo tuhun ca maa ra Jesús casandoq̄ ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha catiñ chi ra Jesús cuan, chinyacá ra chi ra nuu ra Caifás, ra cuví nuu chi tata sutu. Suri yucuan canyicú iñ ri ra sacuahá ley vehe ñuhu ta ra cacuví mandoñi. ⁵⁸ Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quihví ra ta ndoo ra nyaá ra chihin policia cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandihí ra cuví tyiño, canducu ra noo cuatyí catyaa ra siquí ra Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra. ⁶⁰ Soco ña cañihí maa ra cuatyí ra, vasi cuaha ñáyivi chahan ñu chichatyí ñu cuendu siquí ra. Soco nu ndihí tuhun, chaá coyo uvi ca testigu cuendu. ⁶¹ Ta cacatyí ra:

—Ra ihya, catyí ra vatyí cuví satani ra vehe ñuhu cahnu Nyoo, ta chichi cha uñi quívi cunacananyaa ra inga chaha, na —cacatyí ra.

⁶² Tyicuan ta ra cuví nuu chi tata sutu cuan, ndicuita ra, ta catyí ra chi ra Jesús:

—¿Atu ña nacahun nu cahan ra ihya? ¿Ñáa cha cuvi cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichahá catyí ra cuví nuu chi tata sutu cuan chi ra:

—Chihin sivi Nyoo nyitó, catyí chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chi ra:

—Ican cuví, tari cuhva catyí maun. Ta suri catyí chi ndo, vatyí cunyehe ndo chi yuhu Rayi cha quichi nya gloria, cunyai chiyo vaha Nyoo ra iyó tandihí tunyee iñi chii, ta cunyehe ndo nu quichi tiqui nu vico ityi andivi —catyí ra.

⁶⁵ Tyicuan ta ra cuví nuu chi tata sutu cuan chahnya ra sahna ra tari noo seña tyi cuñí maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahan ra. ¡Nyehe ndo vityin! Ña niñi cha tava yo cha ndaa. Nyoho cha chiniñ ndo tuhun ña vaha cahan ra. ⁶⁶ ¿Ñáa catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chi cha cúvi ra.

⁶⁷ Tyicuan ta catyicusii ra nuu ra ta cacañi ra chi ra. Inga ra cacatu ra nuu ra chihin chiqui ra. ⁶⁸ Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyí ña ñohó nuu ra chi ra Jesús
(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

⁷⁰ Ta ra Pedro catyí ra vatyí ña ñohó nuu ra chi ra nuu tandihí ñu nyicú cuan, ta catyí ra:

—Ña chité ñáa tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chi ra, ta catyí ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehe ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacahñi Nyoo chii tatu ña ndicha cha cahn —catyí ra.

Ta suri cuhva cuan nacuacu chaa noo loho. ⁷⁵ Tyicuan ta nichon iñi ra Pedro tuhun cha catyí ra Jesús chi ra: “Cha ni cumani ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quita ra Pedro yucuan, ta chacu vavaha ra cha cuihya iñi ra cha sacuví ra tyicuan caa.

27

Nu cachahá cuenda ra chi ra Jesús chi ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi

ra chi ra Jesús. ²Ta nuññi ra. Ta chahan coyo ra chichuha cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³Cha nyehe ra Judas, ra cha naxico tuhun chi ra Jesús, vatyí cuacúvi ra, ta ndu uvi ññi ra cha sacuví ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan. ⁴Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chichuñi ra yoho sucun ra ta suri maa ra chitacaq ra chi ra. Ta chihí ra.

⁶Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuví tyihí yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchí ra chi ñu inga ñuu tu chihí ñu.

⁸Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi. ⁹Ta tyicuan caa chingo cava cha tyaa ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra. ¹⁰Ta chihin cuan, casata ra Ñuhú Ra Savahá Quisi, tari cuhva catyí Sutu Mañi yo chii”, catyí chi.

Nu nyehe ra Pilato vatyí ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹²Ta cuhva cha catyaa ra cacuví nuu chi tata sutu cuan ta mandoñi cuatyí siquí ra, ra Jesús ña nacahan maa ra. ¹³Tyicuan ta quichahaq catyí ra Pilato chi ra:

—¿Atu ña chiñún tandihí cha cacahán ra sicun?

¹⁴Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáá cunyacuví ra.

Nu cutuñi chi ra Jesús ta cacatyí ñu vatyí cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵Soco cha vico pascua cuan, iyó noo tuhun chi ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi. ¹⁶Ta quivi cuan ñohó noo ra cha nañi Barrabás vehe caa. Ta chitó tandihí ñáyivi tuhun ra. ¹⁷Ta cuhva cha canyicú ñin ri ñu, ra Pilato ndacaq tuhun ra chi ñu, ta catyí ra:

—¿Yóo chi cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸Vatyí chitó ra vatyí cha cuenda cha tasi cuñi nyehe ñu chi ra Jesús, yucuan cuenda chaha cuenda ñu chi ra.

¹⁹Cha ni ri ca cha nyaá ra Pilato nu tyayu ra, nu cuví ra tyiño, tachi ñasihi ra noo tyiño chi ra ta catyí ña: “Ma tyihun chuun chihin ra vaha chiña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chi ñáyivi na cacun ñu cha saña ra Pilato chi ra Barrabás, ta na cúvi ra Jesús. ²¹Ta gobiernu cuan cahan ra chihin ñu inga chaha, ta catyí ra:

—Chichi cha ninduvi ra, ¿nya ra cuñi ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²²Ta ra Pilato ndacaq tuhun ra chi ñu, ta catyí ra:

—¿Ta ñáá cha cusacuví chihin ra Jesús cha nañi Cristo ihya?

Tandihí ñu nacahan ñu ta catyí ñu:

—¡Na cúvi ra nu cruzi!

²³Tyicuan ta quichahaq catyí ra Pilato chi ñu:

—Soco ¿ñáá cha ña vaha sacuví ra?

Soco maa ñu nacanaq chaa tucu ñu inga chaha ta catyí ñu:

—¡Cahñi chi ra nu cruzi!

²⁴Cuhva cha nyehe ra Pilato vatyí ñahri maa cha cuví sacuví ra, vatyí quiñi xaan cacuví ñu, chican ra ndutya, ta nacatyaq ra

ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo síqui maa ndo.

²⁵ Ta tandihí ñáyivi canacahan ñu, ta catyí ñu:

—Na ndoo chi síqui maa ndi ta síqui sehe ndi.

²⁶ Tyicuan ta ra Pilato saña ra chi ra Barrabás, ta tachi ra na ndoho ra Jesús, ta nacuhva cuenda ra chi ra na cúvi ra nu cruzi.

²⁷ Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu ñi ri ra chi tandihí sindaro cuan nicachico. ²⁸ Tyicuan ta catava ra sahma ra ta casacuihno ra noo sahma cuaha chi ra. ²⁹ Ta catyihí ra noo corona cha chingo chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachiuiñi chiti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicu sii ra chi ra ñandihí. Ta quehen ra yutun cuan ta cañi ra xiñi ra. ³¹ Cha yaha cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquita coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

³³ Ta cacha coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyi.

³⁴ Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho. ³⁵ Ta cha yaha cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chingo cava tuhun cha tyaa noo profeta Nyoo ta cha naha nu catyí chi tiehe caa: “Casacha ra sahme chihin cha chahan ra sihva”, catyí chi. ³⁶ Tyicuan ta cachiunyicu ra yucuan vatyí saha cuenda ra chi ra. ³⁷ Ta ityi xiñi ra catyaa ra noo letra cha catyí ñáa tuhun cua cahñi ra chi ra. Ta catyí chi tiehe

caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra. ³⁹ Ta ñu yahá coyo cuan, cacahan ñu chi ra, ta quisi xiñi ñu, ⁴⁰ ta catyí ñu chi ra:

—¡Yoho cha catyun tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, ngo nu cruzi chiña! —catyí ñu chi ra.

⁴¹ Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatyí ra chi tahan ra tiehe caa:

⁴² —Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra. ⁴³ Itá iñi ra chi Nyoo, vityin na sacacu Nyoo chi ra, tatu ndicha cuñi ra chi ra. Vatyí catyí ra chi yo vatyí Sehe Nyoo cuví chi ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tyicuan ta tandihí síqui ñuhu ñayivi nduñaa iñi, nyacua nya ora ta nyacua nya ca uñi cha cha iñi. ⁴⁶ Ta suri cuhva cuan, cana chaa ra Jesús chihin cha chaa ndusu ra. Ta catyí ra tiehe caa:

—Elí, Elí, ¿lama sabactani? —ta cuñi chi catyí: Nyoo Suti, Nyoo Suti, ¿ñáa tuhun cha sandoó ñihnon noo tuhun mai?

⁴⁷ Suhva ra canyicú cuan, cachiñi ra cha chahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyi ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra. ⁴⁹ Soco inga ra cacatyí ra:

—Saña chi ra. Na nyehé yo tatu quichi sacacu ra Elías chi ra.

⁵⁰ Inga tucu chaha cana chaa ñihí ra Jesús, tyicuan ta chihí ra. ⁵¹ Ta caa cuhva ri cuan ndatá sava sahma cha tacaá chichi vehe ñuhu cahnu cuan, nyacua nya síqui ta nyacua nya yuvi ndatá. Ta taan. Ta ndatá yuu. ⁵² Ta nuña yuhu ñaña. Ta nyacua

canandoto cuaha ñu chinó iñi chi Nyoo, ñu cachihi. ⁵³ Ta cha yaha nandoto ra Jesús caquita coyo ñu nu ñaña ta quihvi coyo ñu chichi ñuu Jerusalén, ta cuaha ñáyivi nyehe chi ñu. ⁵⁴ Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha tañ. Ta cha canyehe ra inga ca cha cuvī, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵ Cuaha ñusihi cha chinyicōn chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan. ⁵⁶ Ta ican suhva ñu ihya cuví cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

Nu cua cuhi ra chi ra Jesús

(Mr. 15.42-47; Lc. 23.50-56; Jn. 19.38-42)

⁵⁷ Cuhva cha cua cuaa, quichi noo ra tyayii cha nañi José. Ra ñuu Arimatea. Ta suri chinó iñi ra chi ra Jesús. ⁵⁸ Ta chahan ra chinyehé ra nu nyaá ra Pilato, ta chican ra coño ñuhu ra Jesús. Tyicuan ta tyihī ra Pilato tyiño na cuhva ra coño ñuhu ra chi ra. ⁵⁹ Tyicuan ta quehen ra José coño ñuhu ra, tyihī ra chichi noo sinduhu ndii. ⁶⁰ Ta tyihī ra chi ra chichi noo ñaña nicaa chaa cha cuví noo yavi yuu cha tyihī ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra. ⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivi, quivi nyitatu ñu cuví, ta ra cacuví nuu chi tata sutu, ta ra fariseo chahan coyo ra chinyehé ra nu nyaá ra Pilato. ⁶³ Ta catyí ra chi ra:

—Tata, nichón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quivi cunandoto ra. ⁶⁴ Yucuan chaha tyihī tyiño na casaha cumi vaha ra ñaña cuan, nya yaha cha uñi quivi, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyivi vatyí cha nandoto ra. Ta cha tyicuan caa nu ndihi tuhun ihya, yaha ca cuhva cucuví —catyí ra.

⁶⁵ Ta ra Pilato catyí ra chi ra:

—Ma suhva sindaro chiña. Cuñan ndo, ta saha cumi vaha ndo ñaña cuan, yoso

cuhva cha vaha cuví saha cumi ndo —catyí ra.

⁶⁶ Tyicuan ta cuahan coyo ra, ta casaha cumi vaha ra ñaña cuan, ta catyaa ra noo sellu chata yuu cha chasi cuan. Ta casandoo ra chi sindaro sahá cumi yucuan.

28

Nu nandoto ra Jesús

(Mr. 16.1-8; Lc. 24.1-12; Jn. 20.1-10)

¹ Cha yaha quivi cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña. ² Ta quichi minoo cha tañ vatyí quichi ángel Sutu Mañi yo noo ra nya ityi andivi, ta chaa ra nu ñaña cuan. Ta sacanyaha ra yuu cha nyasi yuhu cuan, ta chicunyaa ra siqui. ³ Ta xiño vavaha ra, tari cha quihvi tacha. Ta sahma ra cuichin vavaha. ⁴ Cuhva cha cananyehé sindaro cuan chi ra, canayuhvi vavaha ra nyacua nihi ra, ta nyacua coña ra chihin cha yuhvi ra. ⁵ Tyicuan ta quichaha catyí ángel cuan chi ñusihi cuan:

—Ma yuhvi ndo. Yuhu chité vatyí chi ra Jesús cha chihī nu cruzi nanducú ndo. ⁶ Yori ca ra ñohó ihya, vatyí cha nandoto ra, tari catyí ra. Ñaha ndo ta nyehe ndo nu catuvi ra. ⁷ Ta cuñun ndo numi ri, ta catyí ndo chi ra cachica noo chihin ra vatyí cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyí chi ndo —catyí ángel cuan chi ñu.

⁸ Tyicuan ta numi ri quita coyo ñu nu ñaña cuan. Suhva ri yuhvi ñu, ta suhva ri sii vavaha cuñi ñu. Ta ching vavaha ñu cua catyí ñu chi ra cachica noo chihin ra Jesús. ⁹ Ta cuhva cuan tuvi ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuiñi chiti ñu nuu ra ta casacahnu ñu chi ra, ta suri numi ñu chaha ra. ¹⁰ Ta catyí ra chi ñu:

—Ma yuhvi ndo. Cuñan ndo cua sacoto ndo chi yañi vatyí na cuñun coyo ra Galilea, ta nyicuan cuñihi tahan ndi —catyí ra chi ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chi ra cacuví nuu chi sutu. ¹² Tyicuan ta ra cacuví nuu cuan chahan coyo ra chichan ra chihin ra mandonii

ñuu vatyi catyihi tahan ra tuhun yoso caa casacuvi ra. Tyicuan ta cuaha xuhun cachahā ra chi sindaro cuan. ¹³Ta cacatyí ra chi ra:

—Nyoho, catyi ndo vatyi cha cha cuaa cha ni ri ca cha quixí ndo, chahan coyo ra cachica noo chihin ra Jesús ta chिकासुहु ra coño ñuhu ra. ¹⁴Ta tatu chito gobiernu tuhun ihya, cua nyehe maa ndi yoso caa catyi ndi chi ra, ta nyoho ma caca iñi ndo. Ñahri cucuvi chi ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuvi ra cha cacatyí ra chi ra. Ta nya vityin ta tyicuan caa catyí ñáyivi ñuu Israel.

Nu tyaa ra Jesús tyiño chi ra cachicá tyiño ra

(Mr. 16.14-18; Lc. 24.36-49; Jn. 20.19-23)

¹⁶ Ta tyicuan caa, ndi uchi iin ra cachica noo chihin ra, cuahan coyo ra nya Galilea nya yucu nu catyí maa ra Jesús chi ra vatyi cuhun coyo ra. ¹⁷ Ta cuhva cha cananyehē ra chi ra Jesús, casacahnū ra chi ra soco suhva ra chica uvi iñi ra. ¹⁸ Tyicuan ta tuhva ra Jesús chi ra ta catyí ra chi ra:

—Nyoo chaha ra cha cunyaca ñaha yuhu tandihí andiví ta siquí ñuhu ñáyivi.

¹⁹ Yucuan chaha, cuahan ndo tandihí nu nyicú ñáyivi, tandihí ri ñuu, ta catyi ndo chi ñu na nanyicon ñu chii. Ta sacondutya ndo chi ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo. ²⁰ Ta sañaha ndo chi ñu na naquichaha ñu tandihí cha catyi yuhu tyi sacuvi ñu. Ta coto ndo vatyi yuhu cunyai chihin ndo tandihí quiví nyacua nya naa ñáyivi —catyí ra Jesucristo chi ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyivi ta cahán ra tuhun Nyoo chihin ñu

(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichahā tuhun vaha ra Jesuscristo Sehe Nyoo. ² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo:

Cumañi ca cahun siqui ñuhu ñáyivi ta cutachi chi noo ra cusacoto chi ñáyivi vatyí nyaá cahun nu nyicú ñu, catyí Nyoo chi ra Cristo.

³ Chinií yo ndusu noo ra cha canachaá nu chiqui ndii, ta catyí ra: “Tari sanduvahá ndo noo ityi, tyicuan caa sanduvaha ndo aña ndo vatyí cua quichi Sutu Mañi yo. Ñuñā ndo noo ityi ndoo chi ra na quihvi ra aña ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichí ra Juan sacondutyā ra chi ñáyivi nu chiqui ndii cuan. Ta catyí ra chi ñu na ndu uvi iñi ñu cuatyí ñu, ta na condutyā ñu tari noo seña tyi nasamā ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu.

⁵ Ta tandihí ñáyivi ityi Judea quichí coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yahā nahma ñu cuatyí ñu, sacondutyā ra Juan chi ñu yuvi cahnu Jordán.

⁶ Ta sahma cha ñihno ra Juan cuan chihin ixi camellu chinqo chi. Ta ñii cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí. ⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñii xityin ndichan ra. ⁸ Yuhu sacondutyé chi ndo chihin ndutya. Soco maa ra cusacondutyā ra chi ndo chihin Tatyí li Nyoo —catyí ra Juan.

Nu condutyā ra Jesús

(Mt. 3.13-17; Lc. 3.21-22)

⁹ Quivi cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyā ra

Juan chi ra. ¹⁰ Ta cha yahā condutyā ra Jesús, ta cuhva cha cua quita ra chichi ndutya, ta nanyehē ra andiví cuahan nuña. Ta nanyehē ra Tatyí li Nyoo tari noo paloma, vachi noó siqui ra. ¹¹ Ta tyacú noo ndusu ityi andiví ta catyí ndusu cuan tyehe caa:

—Yoho cuvún Sehi ta cuñí xain chuun. Ta sii xaan cuñí chuhun —catyí ndusu cuan.

Nu nducú nyehe ra ña vaha chi ra Jesús

(Mt. 4.1-11; Lc. 4.1-13)

¹² Yahā cuan ta sacuhun Tatyí li Nyoo chi ra Jesús noo nu chiqui ndii. ¹³ Ta yucuan chinyaa ra uvi xico quivi nu chiqui ndii cuan, nu yori ñáyivi iyó, maa ri quiti iyó. Ta nducú nyehe cuhna chi ra. Ta yahā cuan ta chaā coyo ángel ta catyiñuhu ra chi ra.

Nu quichahā saha tyiño ra Jesús ityi Galilea

(Mt. 4.12-17; Lc. 4.14-15)

¹⁴ Cha yahā catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyivi. ¹⁵ Ta catyí ra:

—Cha chaā cuhva cha cua cunyaca ñaha Nyoo aña ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu aña ndo —catyí ra Jesús.

Nu canā ra Jesús chi cumi tahan ra catiñ tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehē ra chi ra Simón ta chi yañi ra, ra Andrés, cacañi ra yuhva ra nu ndutya, vatyí ra catiñ tiyaca cacuví ra. ¹⁷ Ta catyí ra Jesús chi ra:

—Cunyicon ndo chii, ta yuhu cusacuví vatyí tari ñihí ndo tiyaca, tyicuan caa cuñihí ndo aña ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chí ra Andrés cuan.

¹⁸ Caa cuhva ri cuan casandoō ra yuhva ra, ta cuahan coyo ra chihin ra.

¹⁹ Yahā cuan ta chiñi ri ca chica ra Jesús, ta nanyehē ra chí ra Jacobo, sehe ra Zebedeo, ta chí yañi ra, ra Juan. Cañohó ra chichi noo canoa canaquicú ra yuhva ra. ²⁰ Canā ra Jesús chi ra. Ta ninduvi tahan ra casandoō ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahā noo ra yihí tatyí ña vaha añima

(Lc. 4.31-37)

²¹ Ta chaq coyo ra ñuu Capernaum. Ta cuví chi noo quívi nyitátú ñáyivi, ta quihví ra Jesús chichi vehe ñuhu, ta quichahā sañaha ra tuhun Nyoo chi ñáyivi. ²² Ta iyo cuñí ñu tuhun cahán ra, vatyí sañahá ra tari noo ra iyó vaha ityi chíi cha cahán. Ña cahán ra cuhva cahán ra casacuahá cuenda ley vehe ñuhu. ²³ Chichi vehe ñuhu cuan ñohó noo ra yihí tatyí ña vaha añima. Ta canā chaa ra ta catyí ra:

²⁴ —¿Náa tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyí sanaun chi ndi? Yuhu ñohó nui chuun, ta chité vatyí Sehe li Nyoo cuví chuun —catyí ra yihí tatyí ña vaha cuan chi ra Jesús.

²⁵ Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña! —catyí ra.

²⁶ Ta tatyí ña vaha cuan, chihí tañi ra cuhví cuan saha chi, ta iyo canachaa tatyí cuan quitā chi ra. ²⁷ Tandihí ñáyivi yuhvi xaan ñu cuví, ta candaca tuhun ñu chi tahan ñu, ta catyí ñu:

—¿Náa cha cuví ihya? ¿Ñana vaha tuhun chaa sañahá ra ihya? ¡Vatyí iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

²⁸ Ta numi ri cachito ñáyivi tandihí ñuu cha iyó Galilea cuan tuhun ra Jesús.

Nu sanduvahā ra Jesús chi maha tyiso ra Simón Pedro

(Mt. 8.14-15; Lc. 4.38-39)

²⁹ Cuhva cha quitā coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra. ³⁰ Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

³¹ Tyicuan ta tuhva ra Jesús, ta tñin ra ndaha ña. Ta nacoñehē ra chi ña. Ta caa cuhva ri cuan, tinyaa cahñi chi ña. Ta quichaha tyiñuhu ña chi ra.

Nu sanduvahā ra Jesús chi cuaha ñu cuhví (Mt. 8.16-17; Lc. 4.40-41)

³² Cuhva cha quee ñanyii ta cha cua cuaa, quichí nyaca ñu tandihí ñu cuhví ta ñu yihí tatyí ña vaha nu nyaá ra Jesús. ³³ Ta tandihí

ñáyivi ñuu cuan candu iñ ri ñu yuvehe cuan. ³⁴ Ta cuaha ñu cuhví cha siin siin cuehe sanduvahā ra. Ta tava ñehe ra chi cuaha tatyí ña vaha, soco ña chahā ra cha cahan tatyí cuan, vatyí chitó cuan yóó ra cuví ra.

Nu cahán ra Jesús tuhun Nyoo ityi Galilea (Lc. 4.42-44)

³⁵ Ta cha inga quívi cuhva cha ni ñaa ca, ndicuita ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo. ³⁶ Ta ra Simón ta ra tahan ra cuahan coyo ra cua nanducu ra chi ra. ³⁷ Ta cuhva cha canañihí ra chi ra cacatyí ra chi ra:

—Tandihí ñáyivi nanducú ñu chuun —cacatyí ra chi ra Jesús.

³⁸ Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

³⁹ Yucuan chaha chica noo ra Jesús tandihí ri ñuu cha iyó Galilea, cahán ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí añima ñáyivi.

Nu sanduvahā ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuñi chiti ra nuu ra, ta catyí ra chi ra:

—Tatu cuñún, cuví sanduvahun chíi —catyí ra.

⁴¹ Ta cundahvi cuñí ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe cuan chi ra, ta nduvahā ra.

⁴³ Tyicuan ta catyí ra Jesús vatyí cha cuví cuhun ra, soco catyí xaan ra chi ra na sacuvi ra tyehe caa:

⁴⁴ —Nyehē. Yori chihin cahun tuhun. Soco cuahan nu nyaá tata sutu. Ta sañahun chuun chi ra, ta cuhvon cha tahán chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyivi tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan chahan ra, ta quichaha nacatyí ra chi tandihí ñáyivi. Yucuan chaha ña cuví ca quihví ndichin ra Jesús chichi ni noo ñuu. Ta ityi chata ri ñuu chícá noo ra nu yori ñáyivi iyó, soco tandihí ri ityi quita coyo ñu, quichí nyehe ñu chi ra.

2

Nu sanduvahá ra Jesús chi noo ra cuhví cha ña cuví nacanda

(Mt. 9.1-8; Lc. 5.17-26)

¹ Suhva quívi yahá ta quihví ra Jesús inga chaha chichi ñuu Capernaum. Ta cachito ñáyivi tyi nyaá ra vehe. ² Ta numi ri candu iin ri cuaha ñáyivi. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu. ³ Tyicuan ta cumi tahan ra canyísó chi noo ra cuhví cha ña cuví nacanda, caquichí nyaca ra chi ra nu nyaá ra Jesús. ⁴ Soco ña cuví caquihví ra nya nu nyaá ra Jesús cha cuenda vatyi tuvi xaan ñáyivi. Tyicuan ta candaá ra ityi xiñi vehe. Ta sacuachiyo ra suhva tyiyo. Ta sanoq ra chi ra cuhví cuan chihin chito. ⁵ Nyehe ra Jesús vatyi cachinó xaan iñi ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa: ⁷ “¿Ñáá tuhun cha cañá iñi ra ihya cahan ra tyehe caa? Chicoq cuatyí ra nuu Nyoo chihin tuhun cahan ra vatyi yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra. ⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chícá xiñi nyoho tyicuan caa? ⁹ ¿Ñáá cha yíi ca, cha catyí yo chi ra cuhví ihya vatyi cuatyí ra cha yahá ndachi, o cha catyí yo chi ra vatyi nducuita ra ta naquehen ra chito ra ta caca ra? ¹⁰ Vaha, vityin chihin cha sanduvahi chi ra ihya, cusañahi chi ndo vatyi yuhu ra cuví Rayíi cha quichí nya gloria, iyó ityi chii cha sandachi cuatyí ñáyivi —catyí ra Jesús chi ra.

Tyicuan ta quichaha catyí ra chi ra cuhví cuan:

¹¹ —Catyí chi yoho, ndicuita, naquehen chiton, ta cuanuhu nya vehun —catyí ra Jesús chi ra.

¹² Ta ra cuhví cuan ndicuita ra. Naquehen ra chito ra, ta cuanuhu ra. Ta tandihí ñu nyehe ñu, ta iyo cuñí ñu, ta sacahnú ñu chi Nyoo, ta catyí ñu:

—Ni noo chaha ta nyehe ca yo cha tyehe caa —catyí ñu.

Nu caná ra Jesús chi ra Leví
(Mt. 9.9-13; Lc. 5.27-32)

¹³ Yahá cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu. ¹⁴ Tyicuan ta cuahan ra ta nu yahá ra nanyehé ra chi ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuita ra Leví, ta cuahan ra chihin ra.

¹⁵ Yahá cuan ta tahan chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyi cuaha xaan ñu nyicón chi ra. ¹⁶ Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehé ra vatyi chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuahá chi nyoho chachí ra ta chihí ra chihin ra catavá xuhun ta ñu iyó cuatyí?

¹⁷ Chiñi ra Jesús cha cacahan ra ta catyí ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyí ra Jesús chi ra.

Nu sañahá ra Jesús vatyi nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno
(Mt. 9.14-15; Lc. 5.33-35)

¹⁸ Noo chaha, ra canyicón chi ra Juan ta ra canyicón chi ra fariseo, ña chachí ra ta nanducú ra chi Nyoo. Ta suhva ñáyivi quichí coyo ñu nu nyaá ra Jesús, ta ndaca tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

¹⁹ Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra. ²⁰Soco vachi chí quiví cha cutinyaa ra chí ra tandaha cuan nu nyicú ra tahan ra. Yucuan ndicha quiví coo cuhva cha ma cachi ra ta nanducu ra chí Nyoo —catyí ra Jesús chí ñu.

Nu sañahá ra Jesús vatyi ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Lc. 5.36-39)

²¹Catyí ra Jesús:

—Yori naquicu noo sahma chahnu chihin noo sahma chaa, vatyi cha chaa cuan nandiyi ta cahnya chí sahma chahnu, ta nu tahnya cuan cunducahnu ca. ²²Ta ni ri ña tuhvá yo tyihi yo vinu chaa chichi ñii chahnu, vatyi vinu chaa chahnyá chí ñii, ta chati vinu, ta tiví ñii. Yucuan chaha cuñí chí cha tyihi yo vinu chaa chichi ñii chaa —catyí ra Jesús.

Nu catohon ra cachicá noo chihin ra Jesús yoco trigu quiví nyitatu ñáyivi

(Mt. 12.1-8; Lc. 6.1-5)

²³Noo quiví cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra. ²⁴Tyicuan ta quichaha catatyí ra fariseo chí ra Jesús:

—¡Nyehe xihna! ¿Ñáá tuhun cha sacuvi ra cachicá noo chuhun tyiño cha ña tahán chí sacuvi yo quiví nyitatu yo? —catatyí ra.

²⁵Soco maa ra Jesús catyí ra chí ra:

—¿Atu ni noo chaha ta sacua ca nyoho cha sacuvi ra David chihin ra tahan ra noo quiví cha chachisocó vavaha ra? ²⁶Quiví cha cuví ra Abiatar tyiño cha cuví ra nuu chí tata sutu, quihví ra David chichi vehe Nyoo. Ta chachí ra pan ii, cha tahán chí cachi maa ri maa ra cuví sutu. Ta chaha tucu ra cachi ra ndihí chihin ra —catyí ra Jesús.

²⁷Ta catyí tucu ra Jesús chí ra:

—Chicoo quiví nyitatu yo, cuenda cha vaha chí ñáyivi, soco ñáyivi ña chicoo ñu cha cuenda cha vaha chí quiví nyitatu yo. ²⁸Yucuan chaha yuhu Rayii cha quichí nya gloria, iyó ityi chíi cha catyí chí noo noo ndo ñáá cha sacuvi ndo quiví nyitatu yo —catyí ra Jesús.

3

Nu nduvahá noo ra na ityi inchiyo ndaha
(Mt. 12.9-14; Lc. 6.6-11)

¹Quihví ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha. ²Ta cañañí ra fariseo chí ra Jesús nyehé ra tatu sanduvaha ra chí ra quiví nyitatu ñu, vatyi tacuhva coo cuatyí tyaa ra siquí ra. ³Tyicuan ta ra Jesús catyí ra chí ra na ityi ndaha cuan:

—Ndícuita ta cuñanyaa mahñu ihya.

⁴Yahá cuan ta ndacá tuhun ra chí inga ñu cha tayucú cuan, ta catyí ra:

—¿Ñáá cha tahán chí sacuvi yo quiví nyitatu yo? ¿Atu sacuví yo cha vaha o cha ña vaha? ¿Atu tahán chí sanduvaha yo ñáyivi o cha cahñi yo? —catyí ra Jesús.

Tyicuan ta taxi taxi maa candoq ñu cuan.

⁵Tyicuan ta xaan nanyehe ra Jesús chí ñu, ta cuihya cuñí ra vatyi ña cuñí ñu cutuñi iñi ñu. Ta catyí ra chí ra cuan:

—Sanacaa ndahun.

Ta sanacaa ra, ta nduvahá ndaha ra.

⁶Tyicuan ta quitá coyo ra fariseo, ta quichahá catyihí tahan ra tuhun chihin ra cuenda ra Herodes, yoso caa cacahñi ra chí ra Jesús.

Nu nyicú cuaha ñáyivi yuhu miñi

⁷Soco ra Jesús cuahan ra chihin ra cachicá noo chihin ra yuhu miñi, ta cuaha ñáyivi ityi Galilea canyicón chí ra. ⁸Ta cha chito ñáyivi tuhun nahnu cha sacuvi ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnú Jordán, ta ñuu Tiro ta ñuu Sidón ñandihí, vatyi cuñí ñu nyehe ñu chí ra.

⁹Yucuan chaha catyí ra Jesús chí ra cachicá noo chihin ra na casanduvaha ra noo canoa, tacuhva vatyi tatu ndutihin xaan chihin ñáyivi, cuví quihví ra chichi canoa cuan.

¹⁰Vatyi cuaha xaan ñu cha yahá sanduvahá ra, ta yucuan chaha tandihí ñu cuhví cuahan ñu nu nyaá ra vatyi cuñí ñu tiin ñu chí ra tacuhva nduvaha ñu. ¹¹Ta ñu yihí tatyí ña vaha aña, chicuñi chiti ri ñu nuu ra, ta canachaa tatyí ña vaha cuan, ta catyí chí tyehe caa:

—¡Yoho cuvún Sehe Nyoo!

¹²Soco ra Jesús chasí ra yuhu tatyí cuan vatyi ma catyí ca chí yóo ra cuví ra.

Nu nacachĩ ra Jesús chi uchi uvi apóstol vatyi cacaca ra tyiño ra

(Mt. 10.1-4; Lc. 6.12-16)

¹³ Yahā cuan ta ndaā ra Jesús noo yucu ta canā ra chi ra cuñĩ maa ra nacachi ra. Ta quichĩ coyo ra nu nyaā ra. ¹⁴ Ta tyiso ra chi uchi uvi tahan ra vatyi cundihi ra chihin ra, ta vatyi tyatyiño ra chi ra na cucahan ra tuhun Nyoo. ¹⁵ Ta chahā ra ityi chi ra vatyi sanduvaha ra chi ñu cuhvĩ, ta tava ñehe ra chi tatyi ña vaha. ¹⁶ Ta ican ra ihya cacuvĩ ndi uchi uvi tahan ra: ra Simón cha sacunañi ra Jesús Pedro chi; ¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñĩ chi catyi: ra ñihi cahán tari cahán savi, ¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihĩ cuenda ityi ra cuñĩ cuhun cuatyí siqui gobiernu ñuu Roma cha nyacā ñaha chi ñu, ¹⁹ ta ra Judas Iscariote, ra cha naxico tuhun chi ra Jesús.

Nu tyaā ñáyivi cuatyí siqui ra Jesús, ta catyi ñu vatyi tunyee ñihi cuihna iyó chi ra

(Mt. 12.22-32; Lc. 11.14-23; 12.10)

Yahā cuan ta quihvi ra Jesús noo vehe chihin ra cacticā noo chihin ra. ²⁰ Ta inga chaha natacā cuaha ñáyivi, ta nyacua ni ña cuvĩ ca cachĩ ra. ²¹ Cha cachito ñáyivi chi ra Jesús vatyi nyaā ra yucuan, quichĩ coyo ñu vatyi cunuhun ra chihin ñu, vatyi catyi ñáyivi chi ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichĩ coyo suri tyicuan caa cacatyí ra:

—Ra ihya, ra Beelzebú ra cuvĩ nuu chi cuihna yihĩ chi ra. Ta chihin tunyee ñihi cuihna tava ñehe ra tatyi ña vaha —cacatyí ra.

²³ Tyicuan ta canā ra Jesús chi ra, ta catyi ra chi ra:

—¿Yoso caa, atu tavá ñehe cuihna suri chi ra tahan maa ra? Ma sacuvi cuihna tyicuan caa. ²⁴ Tatu noo gobiernu cacusiin ra, ta cacañi tahan ra chihin tahan ra, gobiernu cuan ña naha cuacunyaca ñaha ra. ²⁵ O tatu ñáyivi noo vehe, ña iin ri cuvĩ ñu chihin tahan ñu ta cañi tahan ñu, cutivi nu nyicú ñu. ²⁶ Ta tatu cuihna cacusiin ra ta canducuita ra siqui tahan ra, ¿yoso caa cucuvi chi ra? Cundihi tuhun ra.

²⁷ Yori cuvĩ quihvi chichi vehe noo ra ñihi tari cuihna ta tinyaa ra cha chii ra, tatu ma

cuhñi xihna ra chi ra. Yucuan ndicha ta cuvĩ tinyaa yo cha chii ra.

²⁸ Cha ndicha catyi chi ndo vatyi cuvĩ coo ticahnu ñihi tandihi nuu cuatyí ñáyivi, ta tandihi cha quihvi caa cha cahán ñu. ²⁹ Soco ñu cahán ña vaha siqui Tatyi li Nyoo, ma cuvi maa coo ticahnu ñihi cuenda cuan, soco tyicuan ri maa coo cuatyí ñu —catyi ra Jesús.

³⁰ Tyicuan caa catyi ra Jesús chi ra casacuahá cuenda ley vehe ñuhu, vatyi maa ra cacatyí ra vatyi ñohó noo tatyi ña vaha chi ra.

Yóo ñu cuvĩ sihi ra Jesús ta yañi ra

(Mt. 12.46-50; Lc. 8.19-21)

³¹ Tyicuan ta chaā coyo sihi ra Jesús ta yañi ra, soco ndoo ñu ityi chata vehe, ta tachĩ ñu cucana chi ra. ³² Ta ra nyicú nicachico nu nyaā ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyi ra chi ra.

³³ Soco maa ra catyi ra:

—¿Yóo ñu cuvĩ sihi ta yañi? —catyi ra.

³⁴ Tyicuan ta nanyehē ra chi ñu nyicú nicachico, ta catyi ra:

—Ican ñu ihya cuvĩ sihi ta yañi. ³⁵ Vatyi savahri ñu sacuvĩ cuhva cuñĩ Nyoo, ican ñu cuan cuvĩ yañi, ta cuhve, ta sihi —catyi ra Jesús.

4

Tari noo ra chicá noo tachĩ, tyicuan caa cuvĩ ra cahán tuhun Nyoo

(Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu iin ri cuaha ñáyivi nu nyaā ra. Yucuan chaha quihvi ra chichi noo canoa cha tacaā nu ndutya yuhu miñi cuan. Ta chicunyaā ra, ta tandihi ñáyivi ndoo ñu nu ñiti. ² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyi ra chi ñu:

³ —Tyasoho ndo tuhun ihya. Minoo ra quitā ra vehe ra, cuahan ra nu iyó tyiño sahá ra. Ta quichaha quiti ra chiti trigu nu ñuhú ra. ⁴ Ta ityi cuahan ra quiti ra, suhva chiti cuan canacoyo yuhu ityi, ta quichĩ coyo saa ta cachachĩ ti. ⁵ Suhva ca chiti canacoyo ticu yuu nu ña cuaha ñuhú yihĩ. Ta chiti cuan numi ri caña, vatyi ña cono xaan yihĩ ñuhú cuan. ⁶ Soco cuhva cha caña

ñanyii, na ityi chi vatyi ña cono yihí yoho chi. ⁷ Ta suhva ca chiti canacoyo chichi tu iñu. Ta chahnu tu iñu cuan, ta chasi tun nuu trigo cuan. Yucuan chaha ña chiyo chiti tun. ⁸ Soco suhva chiti cha canacoyo nu ñuhú vaha. Ta caña ta chahnu. Ta vaha chaha tun chiti. Suhva tun chaha tun oco uchi chiti cha noo noo tun. Inga tun chaha tun uñi xico chiti. Ta inga tun chaha ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáa cuenda sañahá ra chihin cuhva ri chi ñáyivi

(Mt. 13.10-17; Lc. 8.9-10)

¹⁰ Yaha cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candaca tuhun ñu chi ra ñáa cha cutuñi chi catyí tuhun cuan. ¹¹ Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra añima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu. ¹² Vatyí tatu nyehé ñu soco cuví chi tari cha ña nyehé ñu, ta tatu chiniñ ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.

Nu chaha ra Jesús cuenda yoso caa cuahan tuhun ra tachí chiti cuan

(Mt. 13.18-23; Lc. 8.11-15)

¹³ Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihí inga tuhun sañahí chi ndo? ¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiniñ ñu tuhun Nyoo, soco cha yaha chiniñ ñu, quichi cuihna ta tinyaa ra tuhun Nyoo cha tachí ra añima ñu. ¹⁶ Inga ñáyivi cuví ñu tari nu canacoyo chiti ticu yuu: chiniñ ñu tuhun Nyoo ta sií cutuñi ñu natiin cuenda ñu noo ri cuhva. ¹⁷ Vatyí nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihí yoho vaha chi. Ta tyicuan caa ñu cuan, suhva ri quívi chino iñi ñu. Soco quívi vachi tindoho siquí ñu, o satasi iñi ñáyivi chi ñu cha cuenda tuhun Nyoo, sandihí ri

ñu tuhun cha chinó iñi ñu. ¹⁸ Ta inga ñu cuví ñu tari nu canacoyo chiti chichi tu iñu: chiniñ ñu tuhun Nyoo, ¹⁹ soco cutyoño ca iñi ñu cha cuenda tindoho cha iyó siquí ñuhu ñáyivi ihya. Cha tyayí sandaví ñaha chi ñu, ta cutuñi ñu tandihí ri nuu cha iyó. Tandihí ihya quíhví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan. ²⁰ Soco yihí ñu cha chiniñ ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chaha tun oco uchi tahan chiti tahan tahan tun. Ta inga ñu cuví ñu tari yutun cha chaha uñi xico. Ta inga ñu tari yutun cha chaha ciento.

Ma tyihí xehe yo ñuhu cha sandundichin Nyoo añima yo coto tinyaa ra

(Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyi cananyaa yo chichi noo cajón o xiu chito? Ñima. Tima cuan cutuñi chi tyiso yo noo nu sucun vatyi na sacundichin chi chichi vehe. ²² Ta tyicuan caa tucu, ñahri cha ñohó xehe, ta cutuñu, tyi ma natuvi. Ta ñahri noo tuhun xehe, ta cutuñu, tyi ma coto yo. ²³ Nyoho cha cutuñi iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuvi Nyoo chihin ndo. Ta cuaha ca cuhva ra chi ndo tatu tyasohó ndo cha cahán ra. ²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihí ra cha chiin cha cha yaha chaha ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo añima ñáyivi cuví chi tari noo ra tachí noo chiti chichi ñuhú. ²⁷ Ta cuahan ra cua cusu ra. Yaha cuan ta ndicuita ra. Ta cuaha quívi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun. ²⁸ Cha cuenda vatyi maa ñuhú cuan sacuvahá chi tun tyicuan ri caa. Xihna ca quita xityin tun, ta yaha cuan yoco tun, yaha cuan ta quita chiti nu yoco cuan. ²⁹ Ta tatu cha chityi

chiti cuan, cutohon ra vatyi cha chaa quivi cha coyo —catyí ra Jesús.

Nu sañahá ra Jesús vatyi tari chahnu noo chiti mostaza, tyicuan caa nducuaha nu nyacá ñaha Nyoo

(Mt. 13.31-32; Lc. 13.18-19)

³⁰Ta catyí tucu ra Jesús:

—¿Náá chihin sanandiqui tahin cha nyacá ñaha Nyoo añima yo? ¿Náá chihin sandu inuu ri yo? ³¹Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihi chiti iyó siqui ñuhu ñayivi. ³²Soco tatu tachí yo, cañá ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chícó nu tatyi cuví nyitatu ti nu vatí tun.

Yoso caa sañahá ra Jesús chihin cuhva ri chi ñáyivi

(Mt. 13.34-35)

³³Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi ñni ñu. ³⁴Nahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyi ta miñi

(Mt. 8.23-27; Lc. 8.22-25)

³⁵Suri maa quivi cuan, cuhva cha cuaa, catyi ra chi ra cachicá noo chihin ra:

—Coho ndo inga chiyo miñi cuan.

³⁶Tyicuan ta casandoq ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra. ³⁷Ta quichaha caa noo tatyi ñihi xaan, ta quichaha quihvi ndutya chichi canoa cuan, ta quichaha chitu. ³⁸Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoq ra chi ra, ta cacatyí ra:

—¡Maestro! ¿atu ñahri cuendon cha cuñí nyee yo?

³⁹Tyicuan ta ndicuita ra Jesús ta cahan ra chi tatyi cuan na cutaxin. Ta catyí ra chi ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyi cuan cutaxin, ta taxi taxi cuví.

⁴⁰Tyicuan ta catyí ra Jesús chi ra cachicá noo chihin ra:

—¿Náá tuhun cha yuhví xaan ndo? ¿Atu ta chino ca ñni ndo? —catyí ra chi ra.

⁴¹Soco maa ra cayuhví xaan ra cha cuví cuan. Ta cacatyí ra chi ra tahan ra:

—¿Yóó ra cuví ra ihya, vatyi nyacua nya tatyi ta miñi quichahá chi ra? —cacatyí ra.

5

Nu nduvahq ra yihí tatyi ña vaha chii ñuu Gadara

(Mt. 8.28-34; Lc. 8.26-39)

¹Chaa coyo ra yuhu miñi, inga chiyo nu nyaá ñuu Gadara. ²Ta quita ri ra Jesús chichi canoa, ta quita noo ra nu ñaña cuan ta chaa ra nu nanyaá ra Jesús. Ta yihí noo tatyi ña vaha añima ra. ³Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena. ⁴Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra. ⁵Ñicahñu ta cha cuaa chicá noo ra canachaa ra nya nu yucu ta nya nu ñaña. Ta sañicuehé ra suri chi maa ra chihin yuu. ⁶Soco cañi ca nanyehé ra chi ra Jesús, ta chino vavaha ra chaa ra. Ta chicuñi chiti ra nuu ra. ⁷Ta canq chaa ra ta catyí ra:

—¿Náá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sivi Nyoo, ma sanyehun tindoho chii.

⁸Catyí tatyi cuan tyehe caa vatyi ra Jesús cha catyí ra chi ra:

—¡Saña chi ra chiña, yoho tatyi ña vaha! —catyí ra.

⁹Ta ra Jesús ndacaq tuhun ra chi ra, ta catyí ra:

—¿Náá nañún?

Ta nacahan tatyi ña vaha cuan:

—Legión nañí, vatyi cuaha xaan ndi —catyí chi chi ra Jesús.

¹⁰Ta chacuq ndahvi tatyi ña vaha cuan nuu ra Jesús tacuhva cha ma tachi ra chi chi nu cañi. ¹¹Ta yatin ri yucu cuan nyicú cuaha xaan quini cachachí ti. ¹²Yucuan chaha catyí tatyi ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyi cuan.

¹³Tyicuan ta chahaq ra Jesús, ta tatyi cuan quita coyo chi ra cuan, ta quihvi chi quini cuan. Ta cha uvi mil quini nyicú cuan, cachinq ti, ta canacoyoq ti chichi noo xahva yuhu miñi cuan, ta cachihí ti chichi ndutya cuan.

¹⁴ Tyicuan ta ra sahá cumi quini cuan, chinq xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichi coyo ñáyivi, quichi nyehe ñu ñáá cha cuví. ¹⁵ Cuhva cha cha coyo ñu nu nyaá ra Jesús, nanyehe ñu chi ra cha yihí tatyí ña vaha cuan chi. Ta vityin nyaá ra ñihnó ra sahma, ta cachi vaha iyó xiñi ra. Ta yuhví xaan ñu cuví. ¹⁶ Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu. ¹⁷ Tyicuan ta quichahá chachu ndahví ñu nuu ra Jesús, na quita ra ñuu ñu.

¹⁸ Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacu ndahví ra nuu ra Jesús na cuhva ra cuhun ra chihin ra. ¹⁹ Soco ra Jesús ña chahá ra cuhun ra, ta catyí ra chi ra:

—Cuñuhu nya vehun, nu nyaá ñáyivi chuun, ta nacatyun chi ñu tandihí cha sacuví Sutu yo Nyoo chuhun, ta yoso caa cundahví cuñi ra nyehe ra chuun. ²⁰ Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuví ra Jesús chihin ra. Ta tandihí ñu, iyo cuñí ñu.

Nu nduvahá sehe ra Jairo ta ñaha sihi cha tiñ sahma ra Jesús

(Mt. 9:18-26; Lc. 8:40-56)

²¹ Ta cuhva cha nachaa ra Jesús chihin canoa nya inga chiyo miñi cuan, cha coyo cuaha ñáyivi nu nyaá ra. Ta ndoo ra yuhu miñi cuan. ²² Tyicuan ta cha noo ra cuví nuu vehe ñuhu. Nañí ra Jairo. Ta cuhva cha nanyehe ra chi ra Jesús, chicuiñi chiti ra nuu ra. ²³ Ta chacu ndahví ra nuu ra ta catyí ra:

—Cha cuñí cuví sehi. Coho chihin ta tyison ndahun siquí ña na nduvaha ña ta ma cuví ña.

²⁴ Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu. ²⁵ Ta mahñu ñáyivi cuan ñohó noo ñaha cha cuhví. Cha quita uchi uvi cuiya ndoho ña cuehe cha chatí niñi ña. ²⁶ Ta cuaha tindoho nyehe ña cha cuaha xaan doctor nyehe chi ña. Ta cha sanaa ña tandihí maa cha iyó chi ña, soco ñahri maa tyinyee chi chi ña. Soco ñihi ndihí ca nanduvi. ²⁷ Cuhva cha chitó ña tuhun milagru cha sacuví ra Jesús, tuhva ña ityi chata ra ta tiñ ña sahma ra. ²⁸ Vatyí chicá xiñi ña: “Ma chihin cha tiñ ri sahma

ra, ta nduvahi”, chicá xiñi ña. ²⁹ Ta caa cuhva ri cha tiñ ña sahma ra ta cha chatí niñi ña cutaxín. Ta tuví iñi coño ñuhu ña tyi cha nduvahá ña chihin cuehe cuan.

³⁰ Tyicuan ta tuví iñi ra Jesús vatyí nduvahá noo ñáyivi chihin suhva tunyee iñi cha quita chi ra. Tyicuan ta nanyehe ra ityi chata ra ta quichaha ndaca tuhun ra:

—¿Yóó cha tiñ sahme? —catyí ra.

³¹ Tyicuan ta ra cachicá noo chihin ra quichahá catyí ra chi ra:

—Cha nyehun vatyí ñáyivi tyandahá chuun tyi tiñ xaan. ¿Yoso caa cha ndaca tuhun: “Yóó cha tiñ chii”? —catyí ra chi ra.

³² Soco ra Jesús nyehe ra ityi cuan ityi ihya, vatyí cuñí ra nyehe ra yóó cha tiñ chi ra. ³³ Tyicuan ta ñaha cuan niñi ña chihin cha yuhví ña vatyí chitó ña ñáá cha cuví chi ña. Ta chahan ña chicuiñi chiti ña nuu ra. Ta nacatyí ña tandihí cha ndicha chi ra. ³⁴ Ta catyí ra Jesús chi ña:

—Cha nduvahun, Sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahan ca ra Jesús ta cha coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:

—Sehun, cha chihí ña. Náá ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichahá ra cha cahan ñu, ta catyí ra chi ra cuví nuu vehe ñuhu cuan:

—Ma yuhvun. Chino iñun —catyí ra chi ra.

³⁷ Ta ña chahá ra yóó ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo. ³⁸ Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu.

³⁹ Quihví ra ta catyí ra chi ñu:

—¿Náá tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

⁴⁰ Soco chacú cuehe ri ñu nyehe ñu chi ra. Tyicuan ta ra Jesús tava ra chi tandihí ñu, ta quehen ra chi sutu cue ta sihi cue ta chi ra cha cha coyo chihin ra, ta quihví coyo ra nu catuví cue. ⁴¹ Ta tiñ ra ndaha cue, ta catyí ra chi cue:

—Talita cumi —ta cuñí chi catyí cuan: Catyí chuun, yoho cuehe luhlu, ¡ndicuita!

⁴²Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñí ñu. ⁴³Soco ra Jesús ñihi chahá ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

6

*Nu ñohó ra Jesús ñuu Nazaret
(Mt. 13.53-58; Lc. 4.16-30)*

¹Tyicuan caa cuví ta quita ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra. ²Ta chaá quivi nyitatu ñáyivi, ta quichahá sañaha ra chichi vehe ñuhu. Ta cuaha ñáyivi chihí tuhun cahan ra, ta iyo cuñí ñu, ta catyí ñu:

—¿Nya cutuhvá ra ihya tandihí tuhun ihya? ¿Yóó cha chahá cha chihí tuñi ihya chi ra? ¿Yoso caa cha cuví sacuví ra milagru nahnu xaan ihya? ³¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra Simón, ta cuhva ra iyó tucu ñu chihin yo ihya —catyí ñu.

Ta quiñi cuñí ñu nyehe ñu chi ra. ⁴Soco catyí ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyí ra Jesús.

⁵Ta ña cuví sacuví ra ni noo milagru yucuan, soco tyiso ra ndaha ra siquí suhva ri ñu cuhví, ta sanduvahá ra chi ñu. ⁶Ta iyo cuñí ra vatyí ñu ñuu ra ña chinó iñi ñu chi ra. Ta chahan ra tandihí ñuu nyihi cha nyicú yatyin ri cuan, ta sañahá ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo

(Mt. 10.5-15; Lc. 9.1-6)

⁷Yahá cuan ta caná ra chi ndi uchi uvi ra cha noo chihin ra, ta quichahá tachi ra chi uvi uvi ra. Ta chahá ra ityi chi ra vatyí tava ñehe ra chi tatyí ña vaha yihí añima ñáyivi. ⁸Ta catyí ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tuvi ra cuiso ra. ⁹Ndichan ri quihí chaha ra. Ta noo ri sahma cuihno ra, ñima uvi tahan. ¹⁰Ta catyí ra chi ra:

—Cuhva cha chaa ndo noo ñuu ta quihvi ndo noo vehe, ndoo ndo yucuan ri nyacua nya cha quita ndo ñuu cuan. ¹¹Ta tatu ñáyivi iyó noo ñuu, ña cuñí ñu tiin cuenda ñu chi ndo, ta ña cuñí ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuví ñu. Cha ndicha catyí chi ndo, vatyí quivi cucutuñi chi ñáyivi iyó siquí ñuhu ñayivi, ñu cha ma cuñi tiin cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyí ra Jesús chi ra.

¹²Tyicuan ta quita coyo ra ta chichan ra tuhun Nyoo chihin ñáyivi na ndu uvi iñi ñu cuatyí ñu, ta na nanducu ñu chi Nyoo. ¹³Ta catava ñehe ra cuaha tatyí ña vaha añima ñáyivi. Ta cahyu ra acetye chi cuaha ñu cuhví ta casanduvahá ra chi ñu.

Nu catyí chi yoso caa chihí ra Juan ra sacondutyá chi ñáyivi

(Mt. 14.1-12; Lc. 9.7-9)

¹⁴Chito rey Herodes tuhun ra Jesús vatyí tandihí ñáyivi cahan ñu tuhun cha sacuví ra, ta chicá xiñi ra tyehé caa:

—Ra Juan ra sacondutyá chi ñáyivi cuví ra cuan. Nandoto ra cha yahá chihí ra, yucuan chaha iyó tunyee iñi chi ra —chicá iñi ra.

¹⁵Inga ñu catyí ñu:

—Ra Elías profeta Nyoo ta cha naha cuví ra ihya —catyí ñu.

Ta inga ñu catyí ñu:

—Inga profeta Nyoo cuví ra, tari ra profeta Nyoo ra chiyo ta cha naha.

¹⁶Cuhva cha chihí ra Herodes tuhun ihya, catyí ra:

—Ican ra cuan cuví ra Juan cha tyihí tyiño tahnya sucun, ta vityin nandoto ra —catyí ra Herodes.

¹⁷Tyicuan caa catyí ra Herodes vatyí cha catyí cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihi ra Felipe, yañi ra Herodes, cuví chi ña. Soco ra Herodes quehen ra chi ña vatyí cuví ña ñasihi ra. ¹⁸Ta ra Juan catyí ra chi ra Herodes vatyí ña vaha cha cunyaa ra chihin ñasihi yañi ra.

¹⁹Yucuan chaha cu Herodías tasi xaan cuñí ña nyehe ña chi ra Juan, ta cuñí ña cahñi ña chi ra, soco ña cuví. ²⁰Vatyí ra Herodes chitó ra vatyí ra Juan cuví ra noo ra vaha, ra ii, ta yuhví ra chi ra. Yucuan chaha

sahá cuenda vaha ra chi ra, ña chahā ra cha sacuvi ña cha cuñí maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñí ra chiñí ra cha cahán ra. ²¹ Soco cu Herodías ñihí ña noo cuhva nu ndihi ra Herodes cuiya, vatyí sacco ra noo vico cha cuenda ra cacuví tyiño, ta comandante cuenda sindaro, ta ra nahnu ca ityi Galilea cuan. ²²⁻²³ Ta quihví sehe cu Herodías vico cuan, ta quichaha chita chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyí cuhva ra ñáá cha cacán ña chi ra. Ta catyí ra chi ña:

—Cacán ñáá cha cuñún chii, ta cuhve chuun —catyí ra chi ña.

Ta catyí ra vatyí cuhva ra ñáá ri cha cacán ña, vasi sava ñuhú ñuu nu nyacá ñaha ra. ²⁴ Quita ña ta catyí ña chi sihi ña:

—¿Ñáá cha caquen chi ra? —catyí ña.

Ta catyí sihi ña:

—Cacán xiñi ra Juan ra sacondutyá —catyí ña chi sehe ña.

²⁵ Ta numi ri ndihví ñaha tyivaa cuan nu nyaa rey Herodes, ta catyí ña chi ra:

—Cuñí vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyí ña chi ra.

²⁶ Tyicuan ta nducuihyā xaan iñi rey cuan. Soco cha tyaa ra cuhva vatyí cuhva ra chi ña, ta siñ ri cachiñi ra canyicú chihin ra, ta ña cuñí ra nacahnu ra cha catyí ra chi ña. ²⁷ Numi ri tachí rey cuan tyiño chi noo sindaro na quichi nyaca ra xiñi ra Juan. ²⁸ Chahan sindaro cuan chichi vehe caa cuan, ta chahnyā ra xiñi ra Juan. Ta quichi nyaca ra, yihí nu noo coho. Tyicuan ta chahā ra chi ñaha tyivaa cuan, ta maa ña nacuhvā ña chi sihi ña.

²⁹ Cha chito ra canyicón chi ra Juan, chahan coyo ra chinaquehen ra coño ñuhu ra, ta chachityihí ra chichi ñuhú.

Nu chahā ra Jesús cha cachi ohon mil rayii (Mt. 14.13-21; Lc. 9.10-17; Jn. 6.1-14)

³⁰ Yaha cuan ta ndu iñ ri ra cha tyaty-iño ra Jesús chi chihin ra, ta canacatyí ra tandihí cha casacuví ra, ta cha casañahā ra nu chahan ra chichan ra tuhun Nyoo. ³¹ Ta catyí ra Jesús chi ra:

—Ñaha ndo, na nyitatu yo chiin noo nu taxi ri iyó —catyí ra chi ra.

Tyicuan caa catyí ra vatyí cuaha ñáyivi cuahan ta vachi ñu, ta nyacua ña cacuyatyí

ra cha cacachi ra. ³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyivi nyicú, minoo nu taxi ri. ³³ Soco cuaha ñu nyehe nu quitá ra. Ta canicohon nuu ñu chi ra. Ta cuahan coyo vavaha ñu chihin chaha ñu, quitā ñu tandihí ñuu ta xihna ca maa ñu chahā coyo. ³⁴ Cuhva cha chahā ra Jesús, quitā ra chichi canoa ta nanyehe ra tyi cuaha xaan ñu nyicú yucuan. Ta cundahví cuñí ra nyehe ra chi ñu, vatyí nyicú ñu tari mbee cha yori ra sahá cumi chi ti. Ta quichahā sañaha ra cuaha tuhun chi ñu. ³⁵ Cha cua iñi xaan, ta ra cachicá noo chihin ra catuhvā ra ta catyí ra chi ra:

—Cha iñi xaan, ta yucu taxin cuví ihya.

³⁶ Catyí chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —catyí ra chi ra.

³⁷ Soco nacahan ra Jesús, ta catyí ra:

—Cuhva maa ndo cha cachi ñu.

Canacahan ra ta catyí ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandihí ñu ihya.

³⁸ Ta catyí ra Jesús chi ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachito ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyí ra na cunyicú noo noo ticuñi ñu nu cuhu cuii cuan. ⁴⁰ Ta chicunyicu ñu cuenda ciento ta cuenda uvi xico uchi ñu. ⁴¹ Tyicuan ta quehen ra Jesús ndi ohon tahan pan cuan ta ninduvi tiyaca cuan. Ta nanyehe ndaa ra andivi, ta nacuhvā ra tyahví nyoo chi Nyoo, ta tahví ra pan cuan, ta chahā ra chi ra cachicá noo chihin ra na casacha ra. Tyicuan ta casachā ra chi ñáyivi cuan. Yaha cuan ta casachā tucu ra ninduvi tiyaca cuan chi ñu. ⁴² Tandihí ñu cachachí ta ndaha iñi ñu. ⁴³ Ta nyacua ndoo ca ta casacutū ra uchi uvi tica chihin yiquin pan ta tiyaca. ⁴⁴ Ta ohon mil rayii cachachí pan cuan.

Nu chicá ra Jesús nu miñi (Mt. 14.22-27; Jn. 6.16-21)

⁴⁵ Tyicuan ta catyí ra Jesús chi ra cachicá noo chihin ra na quihví coyo ra chichi canoa vatyí cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyivi,

tyicuan ta cuhun ra catyí ra. ⁴⁶ Ta cha yaha cuahan coyo ra, ra Jesús cuahan ra nu yucu, cua cacan tahvi ra. ⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoq noo tuhun ri maa ra. ⁴⁸ Ta nyehe ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhva ra Jesús chicá ra nu ndutya cuan. Ta saha ri ra cha cua yaha ra nu canoa cuan. ⁴⁹ Soco cananyehé ra chí ra, chicá ra nu ndutya. Ta cacuñi maa ra vatyí noo cha sayuhvi cuví, ta cacana chaa ra. ⁵⁰ Vatyí tandihi ra canyehé ra chí ra ta cayuhvi ra. Soco maa ra cahan ra chihin ra ta catyí ra:

—¡Sanyee ndo ñiñi ndo! ¡Yuhu cuví! ¡Ma yuhvi ndo! —catyí ra.

⁵¹ Quihvi ra chichi canoa nu canyicú ra, ta cutaxin tatyí cuan. Ta iyo xaan cacuñi ra ⁵² cha cuenda vatyí ta cutuñi ca ñiñi ra milagru cha sacuví ra chihin pan, vatyí ni ndava ca ñiñi ra.

Nu sanduvahá ra Jesús chí ñu cuhví ñuu Genesaret

(Mt. 14.34-36)

⁵³ Cayaha sava ra miñi cuan ta cachaa coyo ra ñuu Genesaret, ta cachahñi ra canoa cuan yuhu ndutya ri cuan. ⁵⁴ Ta cha quita coyo ri ra chichi canoa cuan, nichon nuu ri ñáyivi chí ra Jesús. ⁵⁵ Ta cachino vavaha ñu nicahnu ityi cuan sacotó ñu vatyí chaa ra. Ta quichi coyo ñu tandihi ri ñuu, quichi nyaca ñu chí ñu cuhví chihin chito nya nu nyaá ra Jesús. ⁵⁶ Ta tandihi ri ityi nu quihvi ra chichi ñuu luhlu o chichi ñuu nahnu, o chichi cuhu, chacun ñu chí ñu cuhví yuhu ityi. Ta chacu ndahvi ñu nuu ra na cuhva ra cha tiin ñu vasi chiin yuhu sahma ra. Ta tandihi ri ñu tiin chí ra, nduvahá ñu.

7

Nu sañahá ra Jesús ñáa cha sativí chí ñáyivi

(Mt. 15.1-20)

¹ Yaha cuan ta ra fariseo ta suhva ra sacuahá cuenda ley vehe ñuhu quichi coyo ra nya ñuu Jerusalén, ta catuhva ra chí ra Jesús. ² Ta canyehé ra vatyí yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chí cha costumbre. Yucuan chaha cacahan nya ra chí ra. ³ Vatyí ra fariseo ta tandihi

ñu Israel cuan nyicón ca ñu costumbre sutu chahnu ñu, vatyí ma cachi ra tatu ma ndoo ndaha ra cuaha chaha tari cuhva costumbre iyó chí ñu. ⁴ Ta tatu nachaa coyo ñu cha chahan ñu nuyahvi, ma cachi ñu tatu ma sacuví ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chí nacatya ñu vasu, jarra, ta tandihi ndaha tyiño caa cha iyó chí ñu ta cama ñu ñandihí. ⁵ Tyicuan ta ra fariseo ta ra sacuahá cuenda ley cuan candaca tuhun ra chí ra Jesús, ta catyí ra:

—¿Ñáa tuhun ña sacuví ra nyicón chuun cuhva costumbre sutu chahnu yo? Vatyí ña nacatya ra ndaha ra tari cuhva tahán chí tatu cuacachi ra xita —catyí ra chí ra.

⁶ Ta nacahan ra Jesús, ta catyí ra:

—Ndicha cha cahan ra Isaías tuhun ndo vatyí sahá ndo tyi vaha ndo ta ña ndicha ndo. Catyí ra tyehe caa:

Ñáyivi ihyá, chihin yuhu ri ñu catyí ñu tyi cuñí ñu chii.

Soco ñima chihin cha tandihi ñiñi ñu, tyi siin nu nyaá xiñi ñu.

⁷ Nahri maa tuhun cha sacahnú ñu chii, vatyí cha sañahá ñu chí tahan ñu, maa maa ri maa cuhva sañahá ñáyivi ri cuví, tyaa ra Isaías tuhun ndo.

⁸ Vatyí nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo.

⁹ Nyoho sanducaxiin ndo tuhun cha catyí Nyoo tyi sacuví ndo, tacuhva vatyí cuví sacuví ndo costumbre cha iyó ndo. ¹⁰ Soco ra Moisés catyí ra nu ley cha tyaa ra: “Saha ndo ñáyivi chí sutu ndo ta chí sihi ndo.”

Ta catyí tucu ra: “Tandihí ñu cha cahan ña vaha chí sutu o chí sihi ñu, tahán chí cúvi ñu.” catyí ra Moisés nu ley Nyoo. ¹¹ Soco

nyoho catyí ndo tyi noo ñáyivi cuví catyí ñu chí sutu ñu o chí sihi ñu tyi ma cuví tyinyee ñu chí ñu vatyí tandihi cha iyó chí ñu Corbán cuví. (Cuñí chí catyí: “Cha चाहि chí Nyoo cuví.”) ¹² Ta tatu catyí ñu tyicuan caa, ña cuñí ca chí cha tyinyee ñu chí sutu ñu o chí sihi ñu catyí ndo. ¹³ Ta tyicuan caa sacuaháyo ndo tuhun cha catyí Nyoo tyi sacuví ndo, vatyí cuñí ndo sacuví ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

¹⁴Tyicuan ta cana tucu ra Jesús chi ñáyivi ta catyí ra chi ñu:

¹⁵—Tyasoho vaha tandihi ndo tuhun cahín, ta natyihí tuñi iñi ndo. Cha quihví yuhu ñáyivi ta chachí ñu, ña cuví satívi chi chi ñu. Soco cha quitá aña ñu, ican cuan satívi chi ñu. ¹⁶Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

¹⁷Tyicuan ta sandoq ra Jesús chi ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáa cha cuñí chi catyí tuhun cuan. ¹⁸Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyí cha quihví chichi yuhu yo ña satívi chi chi yo? ¹⁹Vatyí ñima aña yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandihi nyayu ta vaha cachi yo. ²⁰Ta catyí tucu ra:

—Cha quitá aña ñáyivi, ican cuan satívi chi ñu. ²¹Vatyí aña ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihi ta ñima ñasihi ra cuví, ta ñima yá ñu cuví. Yihí ñu casuhú ñu. Yihí ñu cachahñí ñu. ²²Yihí ra iyó ñasihi ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quini caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñi ñu cuendu. Yihí ñu cahnu sahá ñu chi ñu. Yihí ñu ña chaa cha chiñi tuñi xiñi ñu. ²³Tandihí tuhun ña vaha ihya, quitá chi ityi chichi aña ñáyivi, ta satívi chi chi ñu —catyí ra chi ra.

Noo ñaha inga ñuu cha chino iñi chi ra Jesús (Mt. 15.21-28)

²⁴Yahá cuan ta quita ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra.

²⁵Ta sihi noo ñaha tyivaa cha yihí noo tatyí ña vaha aña, numi ri chito ña tuhun ra Jesús. Ta chaa ña ta chicuñi chiti ña nuu ra.

²⁶Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña

vaha cha yihí aña sehe ña. ²⁷Soco catyí ra Jesús chi ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

²⁸Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yahá quita chi aña sehe —catyí ra chi ña.

³⁰Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yahá quita chi cue.

Nu sanduvahá ra Jesús chi noo ra soho ta ñihi

³¹Ta quita tucu ra Jesús ñuu Tiro, ta yahá ra ñuu Sidón, ta cuahan ra ityi ñuu cha canañí Decápolis, ta nachaa ra miñi Galilea.

³²Nu nyaá ra Jesús yucuan, quichi nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra. ³³Tava siin ra Jesús chi ra in chiyo xiin, nu yori ñáyivi, ta tyihí ra nundaha ra chichi soho ra, ta tyaa si ra nu yaa ra. ³⁴Yucuan ta nanyehé ndaa ra andivi. Ta naxita ra tatyí ra, ta catyí ra:

—¡Efata! —ta cuñí chi catyí: ¡Nuñal! —catyí ra.

³⁵Ta chihin cuan nuña soho ra soho cuan, ta nduvahá yaa ra, ta nacahan vaha ra. ³⁶Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu. ³⁷Ta iyo cuñí ñu ta catyí ñu:

—Tandihí ta vaha sacuví ra. Nyacua cuvi nacuiñi ñáyivi soho sahá ra ta cuví tucu nacahan ñáyivi ñihi ñandihí.

8

Nu chahá ra Jesús cha cachi cumi mil ñáyivi

(Mt. 15.32-39)

¹Quivi cuan nataka tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

²—Cundahvi cuñí nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu iyó. ³Tatu natachi

chi ñu nya vehe ñu cucachi ñu, coto coñaa ñu ityi, vatyí yihí ñu cañi quichi coyo ñu —catyí ra Jesús chi ra.

⁴Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵Ta ndacá tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yahá cuan ta tahvi sava ra pan cuan, ta chahá ra chi ra cachicá noo chihin ra, na casacha ra chi ñáyivi cuan. ⁷Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chahá ra chi ra na casacha ra. ⁸Tandihi ñu cachachi ñu, ta cachitu chichi ñu. Ta casacutu ra ucha tahan tica chihin yiquin cha ndoo ca. ⁹Ta cha cumi mil tahan ñu cachachi. Yahá cuan ta catyí ra Jesús chi ñu na cunuhu coyo ñu. ¹⁰Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹Tyicuan ta cachaa coyo ra fariseo, ta quichaha cuvi yuhu ra chihin ra Jesus. Ta cacatyí ra chi ra na sacuvi ra noo milagru tatu ndicha cha Nyoo tachi chi ra. Tyicuan caa catyí ra vatyí cuñi ra nducu nyehe ra chi ra. ¹²Ta ra Jesús uhvi uhvi naxita ra tatyí ra, ta catyí ra:

—¿Ñáá tuhun cha chicán ñáyivi iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

¹³Tyicuan ta sandoq ra chi ra, ta nandihvi ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

¹⁵Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahan ra tuhun cuan —catyí ra chi ra tahan ra.

¹⁷Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan aña ndo? ¹⁸Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiniñ ndo? ¿Atu ña nicohon iñi ndo ¹⁹quivi cha saché ohon tahan pan cuan chi ndi ohon mil rayi? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰Ta catyí tucu ra Jesús chi ra:

—Ta quivi saché ucha tahan pan chi cumi mil ñu, ¿yoso tahan tica tyitu nacoñehé ndo?

Ta cacatyí ra:

—Ucha tahan.

²¹Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvahá ra Jesús chi noo ra cuaa ñuu Betsaida

²²Yahá cuan ta chaá ra Jesús chihin ra cachicá noo chihin ra nya ñuu Betsaida. Ta quichi nyaca ñu chi noo ra cuaa. Ta cachacu ndahvi ñu nuu ra na tiñ ra chi ra. ²³Tyicuan ta tiñ ra ndaha ra cuaa cuan, ta cuahan ra chihin ra ityi chata ñuu. Ta tyaa si ra chiti nuu ra, ta tyiso ra ndaha ra siqui ra, ta ndacá tuhun ra chi ra tatu cuví nyehe ra chiin. ²⁴Ra cuaa cuan nanyehé ra ta catyí ra:

—Nyeheñ in cahnú ri maa chi ñáyivi. Cuhva caa yutun caa ñu cahvi iñi, soco chicá ñu —catyí ra.

²⁵Tyicuan ta tiñ tucu ra Jesús chiti nuu ra inga chaha, ta maa ra nanyehé vaha ra ta nduvahá ra. Nanyehé cachi vaha ra tandihi.

²⁶Tyicuan ta natachi ra Jesús chi ra ta catyí ra chi ra:

—Ma quihvun chichi ñuu ta ni yori chihin cahnú tuhun.

Nu catyi ra Pedro vatyí ra Jesús cuví Cristo
(Mt. 16.13-20; Lc. 9.18-21)

²⁷ Yaha cuan ta chahan ra Jesús chihin ra cacticá noo chihin ra ñuu cha ca iyó Cesarea Filipino. Ta ityi cuahan ra, ta ndaca tuhun ra chi ra cacticá noo chihin ra, ta catyi ra:

—¿Ñáá catyi ñáyivi? ¿Yóó ra cuví yuhu?
—catyi ra chi ra.

²⁸ Ta canacahan ra ta catyi ra:

—Yihí ñu catyi ñu tyi ra Juan ra sacondutyá chi ñáyivi cuvún. Inga ñu catyi ñu tyi ra Elías cuvún. Ta inga ñu catyi ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndaca tuhun ra chi ra, ta catyi ra:

—¿Ta nyoho, yóó ra cuví yuhu, cuñí tucu nyoho?

Ra Pedro catyi ra chi ra:

—Yoho cuví Cristo.

³⁰ Soco catyi ra Jesús chi tandihi ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra
(Mt. 16.21-28; Lc. 9.22-27)

³¹ Tyicuan ta quichaha sañaha ra vatyí Rayii cha quichi nya gloria cunyehe ra cuaha xaan tindoho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra natiin cuenda ra chi ra. Catyi ra Jesús chi ra vatyí cuahñi ñu chi ra soco chichi cha cu uñi quívi cunandoto ra. ³² Catyi cachi ra chi ra tuhun ihya. Tyicuan ta tava siin ra Pedro chi ra ta quichaha catyi ra tyi ña vaha cha cahan ra cha tyicuan caa. ³³ Soco ra Jesús nanyocava ra, ta nanyehé ra chi inga ra cacticá noo chihin ra. Ta quichaha cahan ra chi ra Pedro ta catyi ra:

—¡Cuachiyo chuun nui, cuihna! Vatyí yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyi ra Jesús chi ra Pedro.

³⁴ Tyicuan ta cana ra Jesús chi ñáyivi ta chi ra cacticá noo chihin ra ta catyi ra chi ñu:

—Tatu nya ndo cuñí ndo cunyicon ndo chii, cuñí chi cahnya ndo iñi ndo tuhun maa ndo. Ta ma ndu uvi iñi ndo cha yihí ndo cuende vasi nyehé ndo tindoho cha cuende. Vatyí yucuan cuví cruzi cha tahán chi cuiso ndo. ³⁵ Vatyí nya ndo ña cuñí ndo cuví ndo cha cuende, suri cha cuví maa ndo

cuvi, ta cuhun ndihi ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucacu añima ndo. ³⁶ Tatu sacunaa ndo añima ndo anyaya, ¿ñáá ri tuhun cha saha ganaa ndo tandihi cha tyayii cha iyó siquí ñuhu ñáyivi? ³⁷ Vatyí tatu sacunaa ndo añima ndo, ñahri maa cha iyó cha cuví cuhva ndo ta sacacu ndo añima ndo. ³⁸ Tatu nya noo ndo cucahan nuu ndo nyehe ndo chii, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayii cha quichi nya gloria cucahan tucu nuu mai nyehi chi ndo quívi quichi tiquí chihin ángel cuenda Nyoo. Vatyí cuquichi chihin cha tyaquí maa Suti.

9

¹ 'Cha ndicha catyi chi ndo, vatyí yihí ndo cha nyicú ndo ihya, ma cuví ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee iñi ra —catyi ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra
(Mt. 17.1-13; Lc. 9.28-36)

² Iñu quívi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasamā cuhva caa nuu ra Jesús.

³ Nduxiño xaan sahma ra ta cuichin xaan nanduví. Yori maa siquí ñuhu ñáyivi ihya cuví nacatya ta nducuichin tyicuan caa.

⁴ Ta cananyehé ra tyi nanyaá ra Elías ta ra Moisés, candatuhún ra chihin ra Jesús.

⁵ Tyicuan ta ra Pedro catyi ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyi ra Pedro, ⁶ vatyí ña chitó ra ñáá tuhun cahán ra. Vatyí maa ra ta inga ra cayuhví ra.

⁷ Tyicuan ta noo xica noo vico siquí ra ta sahvi chi ra. Ta chichi vico cuan tyacu noo ndusu cha catyi:

—Ican ihya cuví Sehi, ta cuñí xain chi ra. Tyasoho ndo tuhun cahan ra —catyi ndusu cuan.

⁸ Ta cuhva cha cananyehé ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyi ra Jesús chi ra tyi ma cacahan ra tuhun

cha canyehe ra yucuan, soco nya yaha cha nandoto Rayii cha quichi nya gloria, tyicuan ta cuvi cahan ra tuhun. ¹⁰ Yucuan chaha ña cacahan maa ra tuhun, vasi catatyí ra chi tahan ra ñana vaha tuhun cuví cha cunandoto ra. ¹¹ Tyicuan ta quichaha candaca tuhun ra chi ra Jesús:

—¿Náá tuhun cha catyí ra casacuahá cuenda ley vehe ñuhu vatyí cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyí xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayii cha quichi nya gloria? Catyí chi tyi cunyehe ra tindoho, ta ma cuñi nyehe ñáyivi chi ra. ¹³ Soco yuhu catyí chi ndo tyi cha yaha quichi ra Elías. Ta sacuvi maa ñáyivi cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvaha ra Jesús chi noo ra tyivaa cha yihí noo tatyí ña vaha chi

(Mt. 17.14-21; Lc. 9.37-43)

¹⁴ Yaha cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuvi yuhu ra chihin ra. ¹⁵ Tyicuan ta cha nanyehe ñu chi ra Jesús, tandihi ñu iyo cuñi ñu, ta cachino ñu chichuha ñu nocumi chi ra. ¹⁶ Tyicuan ta ndaca tuhun ra Jesús chi ra cacuvi yuhu cuan ta catyí ra:

—¿Náá cuenda cuví yuhu xaan ndo? —catyí ra chi ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihi chi cue. ¹⁸ Vatyí tandihi ri nu tiin tatyí cuan chi cue, sanduva chi cue nu ñuhú, ta yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuvi chi ra —catyí ra cuan chi ra Jesús.

¹⁹ Nacahan ra Jesús ta catyí ra:

—¡Nyoho ñu ña chinó iñi cuví ndo! ¿Yoso tahan ca quivi cunay chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

²⁰ Quichi nyaca ra chi ra luhlu cuan. Ta cuhva cha nanyehe tatyí cuan chi ra Jesús, quehen tatyí cuan chi cue. Ta nduva cue nu ñuhú, sacañuhú cue chi cue, ta quita tiñi yuhu cue. ²¹ Tyicuan ta ndaca tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra. ²² Ta cuaha chaha tyihí tatyí ña vaha ihya chi cue nu cayú ñuhu, o nu ndutya. Cuñi chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

²³ Ta catyí ra Jesús chi ra:

—Tatu chinó iñun, tandihi ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaa ra ta catyí ra:

—¡Chinó iñi! ¡Tyinyee chii na chino ca iñi! —catyí ra chi ra Jesús.

²⁵ Cuhva cha nyehe ra Jesús tyi cuaha ñáyivi candu iñi ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

²⁶ Ta tatyí cuan quini xaan canachaa ta na quisi chi chi cue inga chaha ta quita. Ta sandoq tatyí cuan chi cue tari noo ndiyi. Ta cuaha ñu catyí vatyí cha chihí cue. ²⁷ Soco tiñi ra Jesús ndaha cue, ta nacoñehe ra chi cue, ta nicuinanyaa cue.

²⁸ Tyicuan ta quihvi ra Jesús noo vehe, ta ra cachicá noo chihin ra candaca tuhun ra chi ra ta catyí ra:

—¿Náá tuhun ña cuví tava ndi chi tatyí ña vaha cuan?

²⁹ Ta catyí ra Jesús:

—Cha cuenda vatyí tahan tatyí ña vaha ihya, quita, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyí cucuvi ra

(Mt. 17.22-23; Lc. 9.43-45)

³⁰ Quivi cha quita coyo ra yucuan, yahá coyo ra ityi Galilea. Ta ña cuñi ra Jesús cha coto ñáyivi. ³¹ Vatyí sañahá ra chi ra cachicá noo chihin ra. Ta catyí ra chi ra vatyí Rayii

cha quichi nya gloria cunacuhva cuenda ñu chi ra ndaha ñáyivi. Ta cucahní ñu chi ra, soco cha cu uñi quívi cunandoto ra. ³² Soco ña cacatuñi ñi ra tuhun cahán ra chihin ra. Ta cayuhví ra candaca tuhun ra chi ra.

¿Yóo ra cahnu ca?

(Mt. 18.1-5; Lc. 9.46-48)

³³ Tyicuan ta cachaa coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chi ra ta catyí ra:

—¿Ñáa tuhun cuví xaan yuhu nyoho ityí vachi yo? —catyí ra ndaca tuhun ra.

³⁴ Taxi taxi cacuví ra, vatyi ityí vachi coyo ra, ta cacuví yuhu ra nya ra cuví ra ra cahnu ca. ³⁵ Tyicuan ta chicunyaq ra Jesús ta cana ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñí ndo cuvi ndo nuu, cuñí chi cha cuví ndo ra nu ndihi cha nuu tandihi ra, ta sacuvi ndo tyiño nuu tandihi ra? —catyí ra Jesús chi ra.

³⁶ Tyicuan ta quehen ra chi noo ra cuehe luhlu ta chinanyaq ra chi cue mahñu ra. Ta tyihí sucun ndaha ra chi cue, ta catyí ra:

³⁷ —Ñáyivi cha natiín cuenda chi noo ra cuehe luhlu chihin sivi, chi yuhu natiín cuenda ñu. Ta ñu natiín cuenda chii, ñima chi yuhu ri natiín cuenda ñu, soco chi ra cha tachí chii ñandihí.

Tatu ña cuahan ñáyivi siquí yo, tumañi ñi chi yo cuahan ñu

(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehé ndi chi noo ra cuan ta chihin sivun tavá ñehe ra chi vatyi ña vaha. Soco vatyi ñima chihin yo chicá noo ra, catyí ndi chi ra tyi ma sacuví ca ra —catyí ra Juan chi ra Jesús.

³⁹ Soco catyí ra Jesús chi ra:

—Ma casi ndo. Vatyi ni noo ra cha casacuvi milagru chihin sivi ta yaha cuan ta caña ñi ra cahan ña vaha ra siquí. ⁴⁰ Vatyi ñu cha ña cuahan siquí yo, tumañi ñi chi yo cuahan ñu. ⁴¹ Tatu cuhva noo ñu, vasi noo vasu ndutya coho ndo chihin sivi, cha cuenda vatyi ñu cuenda yuhu ra Cristo cuví ndo, cha ndicha vatyi cuñihi ñu cha cuacuhva Nyoo chi ñu.

Yica xaan cha sanacava yo chi noo yañi yo nu cuatyí

(Mt. 18.6-9; Lc. 17.1-2)

⁴² Tatu yóo ñu sanacava nu cuatyí chi noo ñu chinó ñi chii, vaha taxin ca cuñhi ñáyivi noo yuu sucun ñu ta tuchi ñu chi ñu cuan nu tyañuhu. ⁴³ Tatu ndahun sanacavá chuun nu cuatyí, vaha taxin ca cahnya. Vatyi vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhu cha ma ndahva ca maa. ⁴⁴ Ta yucuan ña chihí tindacu chachí chi ñu, ta ñuhu ña ndahva maa ni noo chaha. ⁴⁵ Ta tatu chahun ta sanacavá chuun nu cuatyí, vaha taxin ca cahnya. Vatyi vaha ca cuhun nu coun chihin Nyoo chihin cha luu chahun ta ñima ca chihin cha ninduvi chahun ta tuchi Nyoo chuun anyaya. Vatyi yucuan ma ndahva ca maa ñuhu. ⁴⁶ Ta ña chihí tindacu chachí chi ñu, ta ñuhu ni noo chaha ña ndahva. ⁴⁷ Ta tatu noo chiti nuu sanacavá chuun nu cuatyí, vaha taxin ca tava. Vatyi vaha ca cha quihvun nu nyacá ñaha Nyoo chihin noo chiti nuu ta ñima ca chihin ninduvi chiti nuun ta tuchi Nyoo chuun anyaya. ⁴⁸ Vatyi yucuan ña chihí tindacu chachí chi ñu, ta ni noo chaha ña ndahva ñuhu.

⁴⁹ Soco tandihí ñu nyicon chii, tari cha cayú ñu chihin ñuhu tatu nyehe ñu tindoho cha cuende, vatyi chihin cuan cua sanduvaha Nyoo chi ñu, tari nduvaha nyayu chihin ñi. ⁵⁰ Ñi vaha xaan. Soco tatu ndihí cha uhva, ¿yoso caa cuví cotyiño yo inga chaha? Tyicuan caa tucu nyoho, ma sandihí ndo cha coo tuhun Nyoo aña ndo cha cuví tari ñi vaha. Tyicuan caa ta coo taxi ri ndo chihin tahan ndo.

10

Nu sañahá ra Jesús tyi ña vaha sandoo rayi chi ñasihí ra

(Mt. 19.1-12; Lc. 16.18)

¹ Quita ra Jesús Capernaum ta cuahan ra ityí Judea nya inga chiyo yutya Jordán. Yucuan candu ñi ri ñáyivi inga chaha nu nyaá ra, ta quichahá sañaha tucu ra chi ñu tari tuhvá maa ra. ² Tyicuan ta suhva ra fariseo catuhva ra nu nyaá ra Jesús, vatyi nducu ra cuhva tyaa ra cuatyí siquí ra. Ta candaca tuhun ra chi ra tatu vaha cha sandoo noo rayi chi ñasihí ra. ³ Tyicuan ta nacahan ra Jesús ta catyí ra:

—¿Ñáa cha catyí ra Moisés tyi sacuví ndo?

⁴Ta canacahan ra ta cacatyí ra:

—Ra Moisés chahā ra cha cuví cahnya noo ra tutu cha tandaha ra tyicuan ta cuvi sandoo ra chi ñasihi ra —catyí ra chi ra.

⁵Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava añima ndo.

⁶Soco quivi xihna ri, quivi savahā Nyoo tandihi maa, savahā ra rayii ta ñaha sihi.

⁷“Yucuan cuenda sandoó rayii chi sutu ra ta chi sihi ra vatyí ndu iin ri ra chihin ñasihi ra. ⁸Ta chichi cha ninduvi tahan ñu cucuvi ñu tari cha noo ri ñáyivi.” Yucuan chaha ñima ca uvi tahan cuví ñu, soco cha nanduvi ñu noo ri ñáyivi. ⁹Yucuan chaha, ña tahan chi cha sasiin ñáyivi cha sandu iin ri Nyoo —catyí ra Jesús chi ra.

¹⁰Yahā cuan ta nachahā coyo ra nya vehe, ta quichahā ndaca tuhun ra cachicá noo chihin ra inga chaha siquí tuhun cuan. ¹¹Ta catyí ra Jesús chi ra:

—Ra cha sandoó ñasihi ta tandaha ra chihin inga ñu, chicoó cuatyí ra vatyí ña vaha sacuví ra chihin ñasihi ra, ñaha cha xihna ri cuan. ¹²Ta tyicuan caa tucu ñusihi. Tatu sandoó ñu chi yí ñu ta tandaha ñu chihin inga ra suri chicoq tucu cuatyí ñu —catyí ra Jesús.

*Nu nasocq ra Jesús chi ra cuatyaa
(Mt. 19.13-15; Lc. 18.15-17)*

¹³Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siquí ndotyin. Soco ra cachicá noo chihin ra ña chahā ca ra cha quichi nyaca ñu chi ndotyin. ¹⁴Soco cuhva cha nanyehe ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo añima, cuví ñu chinó iñi chi Nyoo tari chinó iñi ra cuatyaa ihya. ¹⁵Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyin, ma cuví quihvi ndo nu nyacá ñaha Nyoo —catyí ra Jesús chi ra.

¹⁶Ta quehen ra chi noo noo ndotyin ta tyihí sucun ndaha ra. Ta tyiso ra ndaha ra siquí ndotyin, ta chican tahvi ra chaha ndotyin.

*Nu ndatuhún minoo ra tyivaa tyayii chi-
hin ra Jesús
(Mt. 19.16-30; Lc. 18.18-30)*

¹⁷Yahā cuan ta cuahan ra Jesús. Ta chingo vavaha noo ra cuan chata ra ta chicuñi chiti ra nuu ra, ta ndacā tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

¹⁸Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.)

¹⁹Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siquí ni noo ñu. Ma sandavi ñahun. Sahun ñáyivi chi sutun ta chi sihun” —catyí ra Jesús chi ra.

²⁰Ta nacahan ra cuan ta catyí ra:

—Maestro, tandihi ihya cha sacuví nyata luhli —catyí ra.

²¹Tyicuan ta cusii cuñi ra Jesús nanyehe ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xicon tandihi cha iyó chuun ta cūhvon chi ñu ndahvi. Tyicuan ta coo cha tyayin nya andivi. Yaha cuan ta quichun cunyicon chii vasi nyehún tindoho —catyí ra Jesús chi ra.

²²Soco cha chiñi ra tuhun cahan ra Jesús tyehhe caa, nducuihya iñi ra, ta cuihya xaan cuanuhu ra vatyí tyayii xaan ra.

²³Tyicuan ta nanyehe ra Jesús nicachico chata ra, ta catyí ra chi ra cachicá noo chihin ra:

—¡Ñana cha yí ta cuvi nacuhva cuenda ñu tyayii chi ñu na cunyaca ñaha Nyoo chi ñu! —catyí ra chi ra.

²⁴Iyo cacuñi ra cachicá noo chihin ra tuhun cahan ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyayii, jyii xaan quihvi ñu nu nyacá ñaha Nyoo!

²⁵Tañi tyehhe yaha noo camellu xiu noo yiqui ticu, ta ñima ca cha cuhva noo ñu tyayii cunyacá ñaha Nyoo chi ñu —catyí ra Jesús.

²⁶Cha cachiñi ra tuhun ihya, iyo xaan cacuñi ra, ta candacā tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu añima? —catyí ra.

²⁷Nanyehe ra Jesús chi ra ta catyí ra chi ra:

—Ñáyiví ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha yíi sacuvi ra.

²⁸Tyicuan ta catyí ra Pedro chi ra:

—Sutu Mañi yuhu, nyuhu sandoq ndi tandihí cha iyó chi ndi, ta vityin nyicón ndi chuun.

²⁹Nacahan ra Jesús ta catyí ra:

—Cha ndicha catyí chi ndo vatyí tandihí ñu sandoq vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñáyiví tyi cuñí Nyoo sacacu ra chi ñu, ³⁰cuañihí ñu ciento chaha siquí cha sandoq ñu ihya ñuhu ñayiví. Cuañihí ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehe ñáyiví tindoho chi ñu. Soco inga ñáyiví cha vachi, cuñihí ñu ñayiví cha ma naa ca maa. ³¹Soco cuaha xaan ñu cha cuvi nuu vityin, ñu nu ndihí cucuvi ñu. Ta cuaha xaan ñu cuvi ñu nu ndihí vityin, ican ñu cucuvi nuu —catyí ra Jesús.

Nu cahan ra Jesús inga chaha tyi cucúvi ra (Mt. 20.17-19; Lc. 18.31-34)

³²Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñí ñu ta chihin cha yuhví ñu cuahan coyo ñu chata ra. Tyicuan ta cana siñn ra chí ndi uchi uvi ra cachicá noo chihin ra. Ta quichahā catyí ra cha cucuvi chi ra. ³³Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Rayii cha quichi nya gloria chi ra cuví nuu chí tata sutu, ta chí ra sacuahá cuenda ley vehe ñuhu. Ta cucatyí ra tyi cucúvi ta cucuhva cuenda ra chii chí ra inga ñuu. ³⁴Ta cucuacu nyaa ra chii, cucañi ra chii, cutyicu sií ra chii. Ta cucahñi ra chii. Soco cha cu uñi quívi cunandote cha yaha cúvi —catyí ra Jesús.

Nu cachican ra Jacobo ta ra Juan noo tu-mañi iñi chi ra Jesús

(Mt. 20.20-28)

³⁵Tyicuan ta ra Jacobo ta ra Juan, ra cacuví sehe ra Zebedeo, catuhvā ra nu nyaá ra Jesús, ta catyí ra chí ra:

—Maestro, cuñí ndi cha sahun noo tu-mañi iñi chí ndi —catyí ra.

³⁶Ta ndaca tuhun ra Jesús chí ra:

—¿Náa cha cuñí ndo cha sacuvi cha cuenda ndo?

³⁷Ta canacahan ra ta catyí ra:

—Cuhva cha cunyaa ndi chuhun nu ny-acá ñahun, noo ndi chiyo vahun, ta inga ndi chiyo satyun —catyí ra chí ra Jesús.

³⁸Tyicuan ta catyí ra Jesús chí ra:

—Nyoho ña chitó ndo cha chicán ndo. ¿Atu cuví nyehe nyoho tindoho cha cuanyehe yuhu? ¿Atu cuví cuhun ndo tuhun chihí tari cuhun yuhu? —catyí ra chí ra.

³⁹Ta canacahan ra:

—Cuví chí ndi.

Ta ra Jesús catyí ra:

—Cha ndicha vatyí cunyehe ndo tindoho ta cuhun ndo tuhun chihí tari cuhun yuhu. ⁴⁰Soco tuhun cha cunyaa ndo chiyo vahi ta chiyo satyin, ñima yuhu tahán chí cuhve chí ndo, soco maa Nyoo cucatyí yóo cha cuñihí nyatu cuan —catyí ra Jesús chí ra.

⁴¹Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan. ⁴²Soco canā ra Jesús chí ra ta catyí ra chí ra:

—Chitó nyoho vatyí ra canyacá ñaha chí ñáyiví siquí ñuhu ñayiví, ñihí xaan yosó ra siquí ñu. ⁴³Soco ñima tyicuan caa tahán chí sacuvi nyoho. Vatyí ra cuñí cucahnu ca, cuñí chí cuvi ra musu tandihí ca ndo. ⁴⁴Ta nya nyoho cha cuñí ndo cuví ndo nuu, cuñí chí cuvi ndo musu tandihí ca ñu. ⁴⁵Vatyí ni ri yuhu Rayii cha quichí nya gloria ta ña vachi vatyí sacuvi ñáyiví tyiño nui. Soco vachi vatyí sacuvi tyiño nuu ndo. Ta vachi vatyí cuhve ñáyiví tari noo cha cutyiyahvi ta cusacaqui cuaha ñáyiví —catyí ra Jesús.

Nu sanduvahā ra Jesús chí ra Bartimeo ra cha cuaa

(Mt. 20.29-34; Lc. 18.35-43)

⁴⁶Tyicuan ta cachaa coyo ra ñuu Jericó. Ta cua yaha ri ra ñuu cuan. Ta cuhva cha quitā ra Jesús ñuu cuan cuaha xaan ñáyiví cuahan chata ra, iin ri chihin ra cachicá noo chihin ra. Ta yucuan nyaá noo ra cuaa cha nañ Bartimeo. Sehe ra Timeo cuví chí ra. Nyaá ra cuan yatyan ri yuhu ityi cuan, chicán ra caridaa. ⁴⁷Ta cha chiñi ra cuaa cuan tyi cua yaha ra Jesús ra ñuu Nazaret, quichahā cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaa ra.

⁴⁸Cuaha ñu chasi yuhu ra na cutaxin ra, soco maa ra ñihí ca cana chaa ra ta catyí ra: —¡Yoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicutiñi ra Jesús ta catyí ra:
—Cana ndo chi ra.

Ta cacana ra chi ra cuaa cuan ta catyí ra
chi ra:

—Sgñii iñun. Nducuita, vatyí caná ra
chuun —cacatyí ra chi ra.

⁵⁰ Tyicuan ta tuchi ñihno ra sahma ndichi
ra. Ta ndava ra noo ta tuhva ra nuu nyaá ra
Jesús. ⁵¹ Tyicuan ta quichaha ndaca tuhun
ra Jesús chi ra:

—¿Ñáa cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñí cha sanduvahun chiti
nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyí chinó
iñun chii.

Ta caa cuhva ri cuan cuví nanyehé ra
cuaa cuan. Ta cuahan ra chata ra Jesús ityi
cuahan ra.

11

Nu quihvi ra Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

¹ Cachaa coyo ra yatyin ri ñuu Jerusalén,
nu nyaá ñuu Betfagé ta ñuu Betania. Ta
yucu yutun Olivo nyaá ityi nuu chihin ca.
Tyicuan ta catyí ra Jesús chi uvi ra chicá noo
chihin ra:

² —Cuahan ndo chichi ñuu cha nyaá ityi
nuu chiña. Ta nu cua chaa ndo cunañihi
ndo noo burru chaa nuñí ti, quiti ta quihí
ca tyayu cuví ti. Ndachi ndo chi ti, ta quichi
nyaca ndo chi ti. ³ Ta tatu yóo cha ndaca
tuhun ñáa tuhun sacuví ndo tyicuan caa,
catyi ndo chi ñu vatyí chihuhú ti chi ra
nyacá ñaha, ta numi ri cunanyaca ndo chi
ti, catyi ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihí
ra burru cuan nuñí ti ityi cahnu yatyin ri
noo yuvehe, ta candachi ra chi ti. ⁵ Ta suhva
ra canyicú cuan catyí ra chi ra:

—¿Ñáa cha nyacuví ndo? ¿Ñáa tuhun
cha ndachí ndo burru chiña? —catyí ra chi
ra.

⁶ Tyicuan ta canacahan ra tari cuhva cha
catyi ra Jesús chi ra. Ta cachaha ra cuhun
coyo ra. ⁷ Tyicuan ta caquehen ra burru
cuan ta chinyaca ra chi ra Jesús. Ta catyiso
ra sahma ra siqui ti, ta ndaa ra Jesús chi
ti. ⁸ Ta cuaha ñu ndica ñu sahma ñu ityi
cuahan ra, ta inga ñu chahnu ñu soco numa
ta cachacun ñu.

⁹ Tyicuan ta ñu cha cuahan ityi nuu ra
ta ñu cha cuahan ityi chata, quichaha cana
chaa ñu ta catyí ñu:

—¿Cahnu xaan cuví Nyoo! ¡Na sacahnu
yo chi ra vachi cuenda Sutu yo Nyoo!
¹⁰ ¡Sacahnu yo chi ra vachi nyacá ñaha tari
chinyaca ñaha sutu chahnu yo ra David!
¡Cahnu xaan ca cuví ra nyaá andivi! —catyí
ñu.

¹¹ Tyicuan ta quihvi ra Jesús chichi ñuu
Jerusalén, ta cuahan ra vehe ñuhu cahnu.
Ta cha yahá nanyehé ra ityi cuan ityi ihya,
ndaca chata ra ñuu Betania chihin ndi uchi
uvi ra chicá noo chihin ra vatyí cha iñi.

*Nu soco ra Jesús chi yutun higo cha ñahri
chiti iñi nuu tun*

(Mt. 21.18-19)

¹² Cha inga quivi quita coyo ra ñuu Be-
tania cuan, ta cha ni ri ca cha cuahan ra
chicá ityi ra chaa noo soco chi ra Jesús. ¹³ Ta
nyasava ri nanyehé ra noo tu higo cha nyaá
numa. Ta chahan ra chinyehé ra tatu iñi
chiti nuu tun, soco maa maa ri numa ri
iñi, vatyí ta chaa ca quivi quita chiti tun.

¹⁴ Tyicuan ta cahan ra Jesús chihin tun, ta
catyi ra chi tun tyehe caa:

—Ma coo ca chiti cachi ñáyivi nuun
—catyí ra chi tun.

Ta ra cachicá noo chihin ra cachiñi ra cha
cahán ra.

*Nu tava ñehe ra Jesús chi ra caxicó chichi
vehe ñuhu cahnu*

(Mt. 21.12-17; Lc. 19.45-48; Jn. 2.13-22)

¹⁵ Yahá cuan ta nachaa coyo ra Jerusalén.
Ta quihvi tucu ra Jesús chichi vehe ñuhu
cahnu. Ta quichaha tava ñehe ra chi ra
caxicó ta ra casatá yucuan. Sanduva ra
mesa ñu canasamá xuhun chi ñáyivi. Ta
suri tyicuan caa sacuví ra chihin tyayu ra
caxicó paloma. ¹⁶ Ta ña chaha ca ra ca cuiso
ñu ñáa cha cuiso ñu ityi chichi vehe ñuhu
cuan. ¹⁷ Ta quichaha sañaha ra chi ñu, ta
catyi ra:

—Nu tutu Nyoo catyi chi: “Vehi, vehe
nu chican tahvi tandihí ñáyivi iyó siqui
ñuhu ñáyivi cuví”, catyí Nyoo. ¡Soco nyoho
nasahá ndo vehe nu nyicú ra suhu! —catyí
ra Jesús.

¹⁸ Ta ra cacuví nuu chi tata sutu ta ra
casacuahá cuenda ley vehe ñuhu cachiñi
ra cha cahán ra, ta quichaha canducu ra cuhva
cha cacahni ra chi ra vatyí cayuhví ra chi
ra tyi cha tandihí ñáyivi iyo cuñi ñu cha

sañahá ra. ¹⁹ Soco cuhva cha cua cuaa ra Jesús quitá ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús
(Mt. 21.20-22)

²⁰ Cha ñaha ri cha inga quivi cuan, naya-ha coyo ra nu nanyaá tu higo cuan. Ta cananyehe ra vaty na ityi nyacua nya yoho tun. ²¹ Tyicuan ta nichon iní ra Pedro vaty soco ra Jesús chi tun ta catyí ra chi ra Jesús:

—Maestro, nyehe tu higo cha soco, cha na ityi tun —catyí ra.

²² Nacahan ra Jesús, ta catyí ra:

—Chino iní ndo chi Nyoo. ²³ Vaty cha ndicha catyí chi ndo vaty nya nyoho catyí ndo chi yucu ihya, “Na canyaha ta cahun nu tyañuhu”, ta tatu ña chicá uvi iní ndo, ta chinó iní ndo, tuhun cahan ndo cua cuvi. ²⁴ Yucuan chaha catyí chi ndo vaty tandihí cha chicán tahvi ndo, ta tatu chinó iní ndo tyi cha naquehen ndo, tyicuan caa cucuvi. ²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iní chi ñu, tacuhva vaty Sutu ndo, ra nyaá andiví, saha tucu maa ra ticahnu iní cuatyí ndo. ²⁶ Soco tatu ña sahá ndo ticahnu iní chi ñu, ni ri Sutu ndo, ra nyaá andiví, ma saha ra ticahnu iní cuatyí maa ndo.

Yóo cha chahá ityi chi ra Jesús vaty sacuvi ra cha sacuví ra

(Mt. 21.23-27; Lc. 20.1-8)

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnú cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra. ²⁸ Ta candaca tuhun ra chi ra.

—¿Yóo cha tyaa tyiño chuun vaty sacuvun tyehe caa? ¿Yóo cha chahá ityi chuun vaty sacuvun? —catyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vaty sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chingo iní ndo chi ra?” ³² ¿Ta yoso caa catyí yo tyi ñáyivi tachí chi ra? Ma cuvi

—cacatyí ra, vaty cayuhví ra chi ñáyivi, vaty tandihí ñu cachinó iní ñu vaty cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaa tyiño chii tyi sacuvi cha sacuví —catyí ra Jesús chi ra.

12

Nu chahá ra Jesús noo cuhva yoso caa cucahñi ñu chi ra

(Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyó noo ra cha tachí ra yoho tichaha ndivi. Ta chasi ra chaha. Ta savahá ra noo nu cuhñi ra tichaha ndivi. Ta savahá ra noo vehe sucun tacuhva vaty cuví saha ra cuenda tandihí.

² Yaha cuan ta chahá noo ra ñuhú cuan chi suhva ra casahá tyiño. Ta cuahan ra inga ñuu. ³ Ta cha chaá quivi iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vaty cacán ra suhva chiti cha tahán chi chi ra. ⁴ Soco catiñ ra chi ra. Ta cacañi ra chi ra. Ta canatachi ra chi ra chihin nu ndaha nu ndii ra. ⁵ Tyicuan ta chitoho ñuhú cuan tachí ra chi inga musu, soco chi ra ihya catuchi ra yuu chi ra, catahvi ra xiñi ra, ta cacahan uhvi ra chi ra. ⁶ Ta inga tucu musu tachí chitoho ñuhú cuan. Ta chi ra cuan cachahñi ra. Yaha cuan ta tachí ra cuaha ca ra. Soco cacañi ra chi suhva ra. Ta chi suhva ca ra cachahñi ra. ⁷ Ta ndoo noo ri ca ra cha cuví tachí chitoho ñuhú cuan. Ican cuví sehe ra cha cuñi xaan ra. Ta nu ndihi tachí ra chi sehe ra vaty cuñi maa ra chicá xiñi ra: “Cucasaha ra ñáyivi chi sehi”, cuñi ra chicá xiñi ra. ⁸ Soco nu chaá sehe ra, ra casahá tyiño cuan catyí ra chi tahan ra: “Ican ra ihya cundoo chihin tandihí ihya. Na cahní yo chi ra, ta ndoo maa yo chihin”, catyí ra. ⁹ Ta tyicuan caa catiñ ra chi ra ta cachahñi ra chi ra. Tyicuan ta chachituchi ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

¹⁰ Tyicuan ta ndaca tuhun ra Jesús chi ra ta catyí ra:

—¿Ñáá cha cusacuvi ra cuví chitoho ñuhú cuan? Cuquichi ra ta cucahñi ra chi ra

casahá tyiño cuan. Ta cuhva ra ñuhú cuan chi inga ra. ¹⁰ ¿Atu ta sacuahá ca nyoho nu tutu Nyoo nu catyí chi tyehe caa?

Yuu cha ña cacuñi ra casavaha vehe cotyiño ra,

ican cuan cuví yuu cha niñi ca.

¹¹ Ican ihya cuví cha sacuvi Sutu yo Nyoo.

Ta tyaqui xaan tuhun cha cuenda chi yo, catyí chi nu tutu Nyoo —catyí ra Jesús chi ra cacuví nuu chi tata sutu cuan.

¹² Tyicuan ta canducu ra cuhva cha tyihi ra chi ra Jesús vehe caa vatyí cachitó ra vatyí cañan ra cuhva ihya soco cha cuenda maa ra. Soco vatyí cayuhví ra chi ñáyivi, casando ra chi ra, ta cuahan coyo ra.

Nu ndacá tuhun ra chi ra Jesús cha cuenda xuhun cha tavá gobiernu ñuu Roma

(Mt. 22.15-22; Lc. 20.20-26)

¹³ Tyicuan ta catachi ra suhva ra cuenda ra Herodes ta suhva ra fariseo nu nyaá ra Jesús vatyí casacahan ra chi ra ta coo cuatyí catyaa ra síqui ra. ¹⁴ Chaq coyo ra ihya ta quichaha catyí ra chi ra Jesús:

—Maestro, chitó ndi vatyí cañun cha ndicha, ta ña quichahún cha cañan ñáyivi, ta ña natíin cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, jatú vaha cha tyiyahvi yo cha chicán gobiernu ñuu Roma chí yo, o ña vaha? ¿Atu tahán chi cha tyiyahvi yo, o ña tahán chi? —catyí ra chi ra Jesús.

¹⁵ Soco ra Jesús chitó ra vatyí ñima cha vaha chicá xiñi ra, ta catyí ra chi ra:

—¿Ñáa tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyí ra.

¹⁶ Caquichí nyaca ra chi ra. Ta cuhva cha nanyehé ra ta ndacá tuhun ra chi ra, ta catyí ra:

—¿Yóo chi nuu ihya, ta yóo chi sívi nyaá ihya? —catyí ra chi ra.

Ta canacahan ra ta cacatyí ra:

—Chi gobiernu.

¹⁷ Tyicuan ta catyí ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyí ra Jesús chi ra.

Ta iyo cacuñi ra tuhun cha nacahan ra.

Nu canducu tuhun ra saduceo síqui tuhun cha nandotó ndiyi

(Mt. 22.23-33; Lc. 20.27-40)

¹⁸ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyí ra vatyí ña nandotó ndiyi. Yu-cuan chaha cacahan ra tyehe caa ta catyí ra chi ra Jesús:

¹⁹ —Maestro, tyaq ra Moisés tuhun yoso caa tahán chi sacuvi yo tatu noo rayi ta chihí ra ta ndoq ñasihi ra soco ña chicoq sehe ra chihin ña. Catyí ra vatyí tahán chi tandaha yañi ra chihin ñaha cha chihí yí cuan, tacuhva vatyí coo sehe ña cha cuenda ndi yañi ra. ²⁰ Noo chaha chiyo ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoq. ²¹ Ta ra cu uvi tandaha ra chihin ñaha cha ndoq cuan. Ta suri chihí ra. Ta suri yori sehe ra chicoq. Ta tyicuan caa tucu cuví chihin ra cu uñi cuan. ²² Ta tyicuan caa ndi ucha tahan ra tandaha chihin ña. Ta ni noo ra ña cachiyo sehe ra chihin ña. Ta nu ndihi tuhun, chihí ndihi maa ña. ²³ Ta vityin, quivi cunandoto ñáyivi, ¿nya ra cucuvi yí ña? Vatyí ndi ucha tahan ra cuan chiyo chihin ña —cacatyí ra chi ra Jesús.

²⁴ Tyicuan ta nacahan ra Jesús ta catyí ra chi ra:

—Nyoho cañan tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo. ²⁵ Vatyí quivi cunandoto ndiyi, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andivi tyicuan caa cucuvi ñu. ²⁶ Ta tuhun cha nandotó ndiyi cuan, jatú ta sacuahá ca ndo nu libru ra Moisés yoso caa cañan Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés. ²⁷ Ta cha catyí Nyoo tyicuan caa cuñi chi catyí vatyí vasi cha naha cachihi ra, soco canyitó aña ra vatyí Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuvi ra. Yucuan chaha catyí vatyí nyoho cañan tondo ri ndo —catyí ra Jesús chi ra.

Ley cha niñi ca cha chahá Nyoo

(Mt. 22.34-40)

²⁸ Chaq tucu noo ra sacuahá cuenda ley vehe ñuhu cuan, ta chihí ra cacuví yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndacá tuhun ra chi ra ta catyí ra:

—Chichi cha tandihi ley, ¿nya cha niñi ca sacuvi yo? —catyí ra.

²⁹ Ta nacahān ra Jesús ta catyí ra:

—Cha xihna ca sacuví yo cha nuu tandihi, ican cuví ihya: “Cuiñi ndo ñu Israel. Sutu yo Nyoo, noo ri maa ra iyó.

³⁰ Cuiñun chi Sutu yo Nyoo chihin cha nii iñun ta chihin cha tandihi añimon, ta chihin cha tandihi cha chiñi tuñi xiñun, ta chihin cha tandihi tunyee iñun.” Ican ihya cuví cha xihna ca cha tahán chi sacuvi yo.

³¹ Ta cha cu uvi catyí chi: “Cuiñun chi tahun tari cuñún chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

³² Tyicuan ta ra sacuahá cuenda ley cuan catyí ra chi ra:

—Vaha xaan nacahūn, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra. ³³ Ta cha cuiñi yo chi Nyoo chihin cha nii iñi yo ta chihin cha tandihi cha chiñi tuñi xiñi yo, ta chihin cha tandihi añima yo, ta chihin cha tandihi fuerza yo, ta cuiñi yo chi tahan yo tari cha cuiñi yo chi maa yo, vale ca cuan ta ñima ca tandihi quiti cha chahá yo chi Nyoo cha chahñi yo ta chahmí yo —catyí ra sacuahá cuenda ley cuan chi ra Jesús.

³⁴ Nyehe ra Jesús vatyí vaha nacahān ra chihin cha cachi xiñi ra. Ta catyí ra chi ra:

—Chiin ri ca cuiñi chi ta ñihún cuhva yoso caa nacuhvon añimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

¿Yóó chi tata vachi ra Cristo?

(Mt. 22.41-46; Lc. 20.41-44)

³⁵ Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David? ³⁶ Vatyí suri maa ra David chotyíño Tatyi li chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunyaa chiyo vahi nyacua nya cuhve chi ra xaan iñi chuun vatyí cuaca chahun siquí ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyi

ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sii xaan cacuiñi ñu chiñi ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahán iñi ra cacuihno ra sahna nañi ta chicí noo ra nuyahvi tacuhva saha ndo ñáyivi chi ra, ta cuhva ndo nocumi chi ra.

³⁹ Maa ra cananducú ra nu vaha ca cunyi cu ra chichi vehe ñuhu. Ta nu vaha ca cacuiñi ra cachi ra nyayu nu iyó vico. ⁴⁰ Ta ican ra catinyaá vehe ñu chihí yii, vatyí ña cuví tyiyahvi ñu ñáá xuhun tava ra siquí ñu. Ta cuiñi ra sacuvaha ra chi ra nuu ñáyivi. Yucuan chaha naha chicán tahvi ra nu tuvi. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yii

(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chahá ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayii chahá ñu cuaha xaan xuhun. ⁴² Tyicuan ta chaá tucu noo ñaha ndahvi chihí yii, ta tyihí ña uvi tahan xuhun cuatyí cha caha xaan nyaá. ⁴³ Tyicuan ta caná ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyí ñaha ndahvi chihí yii ihya, cuaha ca chahá ña ta ñima ca inga ñu catyihí xuhun chiña. ⁴⁴ Vatyí tandihi ñu cachahá ñu cha ndoo ri ca chi ñu. Soco maa ña chihin cha ndahvi ña chahá ña tandihi cha cumí ña —catyí ra Jesús.

13

Nu catyí ra Jesús vatyí cutani vehe ñuhu cahnu

(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicí noo chihin ra catyí ra chi ra:

—¡Maestro, nyehe ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahān ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyi ma ndoo ni noo yuu coso siqui tahan, vatyi tandihí cutani —catyí ra Jesús.

Seña cha cucuvi cha ni cumañi ca naa ñayivi

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cuñí ndi cha catyun chi ndi ama cucuvi tandihí tuhun cha cahyn tuhun. ¿Ñáá seña cucuvi tatu cha cua cuvi? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo. ⁶ Vatyi cuaha xaan ra cuquichi coyo ra, ta cucotyíño ra sivi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñayivi.

⁷ Soco tatu chiñí ndo tuhun tyi iyó cucatyí ta cañí tahan ñayivi, ma nayuhvi ndo. Vatyi tyicuan caa tahán chi cucuvi, soco ta chaa ca quivi cunaa ñayivi. ⁸ Vatyi noo ñuu cucañi tahan chi chihin inga ñuu, ta ñayivi cuenda noo gobiernu cucañi tahan ñu chihin ñayivi cuenda inga gobiernu. Ta cucoo cha taan nahnu cuaha ri ityi. Ta cucoo tama. Ta cunaquiqui ñayivi. Ta tyehe caa cua quichaha cha nyehe ñayivi tindoho. ⁹ Soco saha ndo cuenda chi ndo. Vatyi cucuhva cuenda ñu chi ndo chi ra cacuví tyiño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhun nuu ra.

¹⁰ Vatyi cha ni cumañi ca naa ñayivi, cuñí chi cutuya tuhun Nyoo yoso caa sacacú ra aña ñayivi tandihí ñuu. ¹¹ Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhun cuahan ndo, ni ma ndichi xiñi ndo. Cahan ndo cha catyi Nyoo chi ndo cha cahan ndo cuhva cuan. Vatyi ñima nyoho cuahan, soco maa Tatyí Ii Nyoo. ¹² Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñayivi cunacuhva cuenda ñu chi sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chi ñu na cahñi ra chi ñu. ¹³ Tandihí ñayivi cutasi cuñi nyehe

ñu chi ndo cha cuenda yuhu. Soco tatu cunyehe iñi ndo nyacua nya nu ndihí, cucacu ndo.

¹⁴ Ra Daniel, ra profeta Nyoo ta cha naha, tyaa ra yoso caa cuahan tuhun noo cha cusacaquini nu ii xaan. Ta cusativi chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñí chi cha cono tandihí ñu iyó Judea nya ityi yucu. ¹⁵ Ta ñu ñohó xiñi vehe quivi cuan, noo ñu, soco ma quihvi ñu chichi vehe ñu tava ñu ñáá cha tava ñu. ¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu. ¹⁷ Ndahvi ñusihi cha cañohó sehe quivi cuan! ¡Ndahvi tucu cuvi ñusihi cha chaxín sehe quivi cuan! ¹⁸ Cacan ndo chi Nyoo tacuhva cha ma tahan chi caca cono ndo quivi vichin. ¹⁹ Vatyi quivi tindoho cucuvi. Ta ni noo chaha ta cuvi ca tyicuan caa nyata quivi chino ñuhu ñayivi nyacua nya vityin. Ta ni ma coo ca tindoho tahán ihya nu cuahan ca chi. ²⁰ Tyehe ta ma sanducuti Sutu Mañi yo tyembu cuan, yori maa cucacu. Soco cusanducuti ra cha cuenda cha cuñí ra chi ñu cuenda ra, ñu cha nacachí maa ra.

²¹ Tatu yóo cha catyí chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo. ²² Vatyi cuquichi ra casandavi ñaha, cucatyí ra tyi ra Cristo cuví ra. Ta yihí ra cucatyí ra vatyi profeta Nyoo cacuví ra. Ta cucasavaha ra seña, milagru, vatyi canducú ra cuhva sandavi ñaha ra nyacua nya chi ñu cha nacachí maa Nyoo tatu cuví chi ra. ²³ Soco saha vaha ndo cuenda vatyi yuhu cha sacoté chi ndo cha ni cumañi ca cuvi tyicuan caa —catyí ra Jesús.

Nu sacoté ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyí tucu ra Jesús tyehe caa:

—Soco quivi cha yaha tindoho, cunduñaa ñanyii. Ma cundichin ca yoo. ²⁵ Tiño cunacoyo andivi. Ta nyacua nya tandihí cha iyó andivi ta cunacanda. ²⁶ Tyicuan ta cunyehe ndo chi yuhu Rayi cha quichi nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra. ²⁷ Tyicuan ta cutachi chi ángel ta cusandu iñi ri chi ñu nacachí nicahnu siqui

ñuhu ñayiví, nyacua nya nu ndíhi ñuhu ñayiví ta nyacua nya nu ndíhi andiví.

²⁸ 'Cutuñi iní ndo cuhva tu higo ihya: Tatu nduyutya soco tun ta caña numa tun cha chitó ndo vatyi cha cuñi chaa quívi coo chiti, cha vachi vico savi. ²⁹ Ta suri tyicuan caa tatu cha nyehe ndo tuhun ihya, coto ndo tyi cha nyaña yatyin quívi quichi tiqui. Cha nyañai yuvehe cuví cuan. ³⁰ Cha ndicha catyí chi ndo vatyi tandíhi ihya cucuvi cha ni ri ca cha iyó ñáyiví. ³¹ Tyicuan ta cunaa andiví ta ñuhu ñayiví cha iyó cha vityin. Soco tuhun cahín tyicuan ri cucuvi tari cuhva catyí.

³² 'Soco yori chitó ñáa quívi ta ñáa cuhva cucuvi tandíhi ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ 'Yucuan chaha conyito vaha ndo, ta saha ndo cuenda ta caçan tahvi ndo, vatyi ña chitó ndo ñáa quívi cuchaa cuhva. ³⁴ Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chi musu ra. Ta chaha ra tyiño chi noo noo ra. Ta tachi ra chi ra sahá cumi yuvehe cuan na saha ra cuenda. ³⁵ Yucuan chaha nyoho conyito ndo vatyi ña chitó ndo ñáa cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri. ³⁶ Conyito ndo coto sana iní ndo ta quichi ra, ta nañihi ra chi ndo quixí ndo. ³⁷ Cha catyí chi nyoho, catyí tiqui chi tandíhi ñáyiví ñandíhi. Na conyito ñu.

14

Nu canducu ra cuhva catiín ra chi ra Jesús
(Mt. 26.1-5; Lc. 22.1-2; Jn. 11.45-53)

¹ Uvi ca quívi cumañi ta cua tahan chi vico cha nañi pascua ta vico cha tuhva ñu chachi ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catiín xehe ra chi ra Jesús ta cacahñi ra chi ra. ² Soco cacatyí ra chi ra tahan ra:

—Ma tiín yo chi ra cha chichi vico vityin coto naquiqui ñáyiví —cacatyí ra.

Nu choso noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

³ Nohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa,

chaa noo ñaha sihi ndaha ña noo yutyi cha chingo chihin noo yuu cha nañi alabastro. Tyitu yihí chihin ndutya vixi chahán cha nañi nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús. ⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáa tuhun sativí ña ndutya vixi chahán cuan? ⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta cahan ra chi ña.

⁶ Soco ra Jesús catyí ra:

—¡Saña ndo chi ña! ¿Ñáa tuhun cha sayangá ndo chi ña? Cha choso ña chii tyehe caa, cha vaha cuví. ⁷ Vatyi ñu ndahvi tyicuan ri cua cunyya ñu chihin ndo, ta cuví sacuvi maa ndo cha vaha chihin ñu ñáa ri quívi cuñi ndo. Soco yuhu ñima tyicuan ri cua cunyai chihin ndo. ⁸ Ñaha sihi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucuvi ta quihvi chichi ñuhu. ⁹ Cha ndicha catyí chi ndo, vatyi tandíhi ri nicahnu ñuhu ñayiví nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon iní ñáyiví tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iní chi ra
(Mt. 26.14-16; Lc. 22.3-6)

¹⁰ Yahá cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, chahan ra chindatuhun ra chihin ra cacuví nuu chi tata sutu, vatyi casandaa ra noo tyiño ta nacuhva cuenda ra chi ra Jesús chichi ndaha ra. ¹¹ Cuhva cha cachiñi ra ihya, cusii xaan cacuñi ra, ta catyí ra vatyi cuhva ra xuhun chi ra. Tyicuan ta quichaha nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra
(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Cuví chi quívi quichaha vico cha chachi ñu pan cha ñahri yuchan iya yihí. Yucuan quívi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candaca tuhun ra chi ra, ta cacatyí ra:

—¿Nya maa maa cuñún cha sanduvaha ndi cha cuxiñun cha vico ihya?

¹³ Tyicuan ta tachí ra chi uvi tahan ra ta catyí ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quiyi ndutya. Cuahan ndo chata ra. ¹⁴ Ta nu quihvi ra, catyí ndo chi ra cuví chitoho vehe yucuan tyehe caa: “Ra Sacuaha cuñí ra coto ra nya nyaá cuarto nu cusanducahnu ra vico chihin ra cachicá noo chihin ra”, catyí ndo chi ra. ¹⁵ Ta maa ra cusañaha ra noo cuarto cahnu nu piso sucun chi ndo. Cha yaha nduvii, ta yucuan cusanduvaha ndo cha cuxiñi yo —catyí ra Jesús chi ra.

¹⁶ Cuahan coyo ra. Ta chaá coyo ra chichi ñuu. Canañihi ra tari cuhva catyí ra Jesús chi ra, ta casanduvaha ra cha cuxiñi ra cha vico pascua cuan. ¹⁷ Ta cha cuaa cuan chaá ra Jesús chihin ndi uchi uvi ra chicá noo chihin ra. ¹⁸ Ta cuhva cha canyicú ra nu mesa cachachí ra, ra Jesús catyí ra:

—Cha ndicha catyí chi ndo vatyi noo nyoho cha chachí ndo chihin cunaxico tuhun ndo chii.

¹⁹ Tyicuan ta canducuihya iñi ra ta quichaha candaca tuhun tahan tahan ri ra chi ra, ta cacatyí ra:

—¿Atu yuhu?

²⁰ Ta nacahan ra Jesús ta catyí ra:

—Noo ra chichi cha uchi uvi ndo. Ra cha satyí pan iñi ri nu coho chihin, ican ra cuan cuví. ²¹ Vatyi yuhu Rayí cha quichi nya gloria cucuvi chii tari cuhva catyí nu tutu tuhun Nyoo. Soco ñdahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacú ra —catyí ra Jesús.

²² Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chaha ra chi tandihi ca ra, ta catyí ra:

—Quehen ndo. Ican ihya cuví coñe —catyí ra chi ra.

²³ Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandihi ra cachihí ra cha ñohó chichi vaso cuan. ²⁴ Ta catyí ra chi ra:

—Vinu cha yihí chichi vasu ihya tari niñi cuví. Ta chihin niñi tyihí tahan Nyoo tuhun chaa chihin ndo vatyi cucati cha cuenda cha vaha chi cuaha ñayivi. ²⁵ Cha ndicha catyí

chi ndo vatyi ma coho que vinu nyacua nya quivi nachai nu nyacá ñaha Nyoo ta cohi vinu chaa —catyí ra Jesús chi ra.

Nu catyí ra Jesús tyi cucatyí ra Pedro tyi ña ñohó nuu ra chi ra

(Mt. 26.30-35; Lc. 22.31-34; Jn. 13.36-38)

²⁶ Cha yaha cha cachita ra yaa, ta caquita ra cuahan coyo ra nya yucu yutun Olivo.

²⁷ Tyicuan ta catyí ra chi tandihi ra:

—Tandihí nyoho cusandoo notuhun maa ndo chii vityin cha cuaa. Vatyi catyí chi nu tutu tuhun Nyoo tyehe caa: “Cucañi chi ra sahá cumi mbee, ta mbee cacacono ti ityi cuan ityi ihya”, catyí chi. ²⁸ Soco cha yaha cha nandote, xihna que cuhun ityi Galilea ican saha nyoho —catyí ra Jesús chi ra.

²⁹ Tyicuan ta quichaha catyí ra Pedro chi ra:

—Vasi tandihí ra sandoo ra chuun, soco yuhu ma sandoi chuun —catyí ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyi suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cuví chuhun, soco ma tixehi cha ñohó nui chuun —catyí ra Pedro.

Ta tandihí ra cacatyí ra tyicuan caa.

Nu chicán tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachaa coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñí ra. ³⁴ Ta catyí ra chi ra:

—Tuví iñi añime noo tucuihya iñi, ta cuñí cahñi chi chii. Ndoo nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chicán ra chi Nyoo tatu cuvi cha ma nyehe ra tindoho cha cua cuvi chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuvi chuun. Tu yoho ta cuñún na canyaha tindoho ihya chii. Soco ma cuvi

tari cuhva cha cuñí mai, soco cuhva cha cuñí maun na cuví —catyí ra Jesús chican tahvi ra.

³⁷Yahá cuan ta nachaa ra nu nyicú ra. Ta nyehe ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora? ³⁸Conyito ndo ta cacan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñí aña ndo sacuvi ndo cha vaha, soco coño ñuhu ndo vita xaan cuñí chi —catyí ra Jesús chi ra.

³⁹Tyicuan ta cuahan ra inga chaha. Ta chican tahvi ra suri maa cha chican ra cha xihna ri. ⁴⁰Tyicuan ta nachaa tucu ra inga chaha, nyehe ra tyi caquixí ra. Vatyí nicunyasi maa chiti nuu ra chihin cha cacuñí xaan ra cusu ra. Ta ña cachitó ra ñáa cha nacahan ra chihin ra Jesús. ⁴¹Ta chahan ra cha cu uñi chaha, ta nachaa ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha chaá cuhva cha cucuhva cuenda ra chi yuhu Rayi cha quichi nya gloria ndaha ra ca iyó cuatyí. ⁴²Ndicuita ndo, coho ndo. Cha vachi ra naxicó tuhun chii —catyí ra Jesús chi ra.

Nu catiín ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³Ni cahan ca ra Jesús ta chaá ri ra Judas, noo ra chichi cha uchi uvi tahan ra chica noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi. ⁴⁴Cha ni cumañi ca cachaa coyo ra, ra Judas, ra cha naxicó tuhun chi ra, chahá ra noo seña chi ra ta catyí ra:

—Ra cha tyayuhi, ican ra cuan cuví. Tñin vaha ndo chi ra na cuhun ra chihin ndo.

⁴⁵Ta cuhva cha chaá ra tuhva ra nu nyaá ra Jesús ta catyí ra chi ra:

—Maestro.

Ta tyayuhu ra xitin ra. ⁴⁶Tyicuan ta catiín ra chi ra Jesús ta cuahan ra vehe caa.

⁴⁷Soco noo ra cha nyaá yucuan tava ra mityi ra ta chahnya ra soho musu ra cuví nuu chi tata sutu. ⁴⁸Tyicuan ta ra Jesús catyí ra chi ra cachaa coyo cuan:

—¿Atu vachi tñin ndo chii chihin mityi ta chihin yutun, tari cha vatyí cuví yuhu noo ra suhu? ⁴⁹Ndi quivi chinjayi chihin ndo

sañahi chichi vehe ñuhu cahnú cuan. Ta ni noo chaha ña tñin ndo chii. Soco cuví chi tyehé caa vityin, tacuhva chino cava tari cuhva catyí nu tutu tuhun Nyoo —catyí ra Jesús chi ra.

⁵⁰Tyicuan ta tandihi ra cachicá noo chihin ra, cachinó ra ta casandoó noo tuhun maa ra chi ra Jesús. ⁵¹Soco noo ri ca ra tyivaa nyicón ra chi ra, ndichí ra noo sinduhu ta catiín tucu ra chi ra. ⁵²Soco sandoó ra sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³Tyicuan ta cachinyaca ra chi ra Jesús nuu ra cuví nuu chi tata sutu, ta candu iñin ri tandihi ra chihin ra cacuví mandoñi, ta ra casacuaha cuenda ley vehe ñuhu. ⁵⁴Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policia sanasaá ra chi ra vatyin yunuhu.

⁵⁵Ra cacuví nuu chi tata sutu, ta tandihi ra cuví tyiño canducu ra ñáa noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra. ⁵⁶Vasi cuaha ñáyivi cahan ñu cuendu siqui ra, soco ña nacachí tahan tuhun cahan ñu. ⁵⁷Yihí ñu candicuita ñu ta catyaa ri maa ñu cuendu siqui ra, ta cacatyí ñu:

⁵⁸—Nyuhu chiñi ndi cha cahan ra vatyí cusatani ra vehe ñuhu cahnú cha savahá ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

⁵⁹Soco ni tyicuan caa ña nacachí tahan cha catyí ñu. ⁶⁰Tyicuan ta ra cuví nuu chi tata sutu ndicuita ra mahñu nu nyicú tandihi ra yucuan, ta quichahá ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáa cha cuví ihya cha cacahan ra sicun? —catyí ra chi ra.

⁶¹Soco ra Jesús taxi ri nanyaá ra, ta ña nacahan maa ra. Ta ra cuví nuu chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶²Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayi cha quichi nya gloria, cucunyai chiyo vaha Nyoo ra cha iyó

tandihi tunyee iñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnya ra sahma ra tari noo seña vatyí ña tahan iñi ra, ta catyí ra:

—¿Náa ca cha ndaa cuñi yo? ⁶⁴ Nyoho cha chiñi ndo vatyí chicoo cuatyí ra nuu Nyoo chihin tuhun cahán ra. ¿Yoso caa cuñi nyoho? —catyí ra.

Ta tandihi ra cacatyí ra vatyí tahan chi cúvi ra.

⁶⁵ Tyicuan ta suhva ra quichaha tyicu sii ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policia cacatu ra nuu ra.

Nu catyí ra Pedro vatyí ña ñohó nuu ra chi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta chaq noo ñaha sahá tyiño chihin ra cuví nuu chi tata sutu cuan. ⁶⁷ Ta cuhva cha nanyehé ña chi ra Pedro vatyí sanasaá ra chi ra yunuhu cuan, ndoq ña nyehé vavaha ña chi ra, ta catyí ña chi ra:

—Yoho ñandihi, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehe ra, ta catyí ra:

—Ña ñohó nui chi ra, ña chité ñáa tuhun cahún —catyí ra chi ña.

Tyicuan ta quita ra ityi yuvehe. Tyicuan ta chacu noo loho. ⁶⁹ Tyicuan ta ñaha cha nyaá tyiño yoo cuan, nanyehé tucu ña chi ra inga chaha ta quichaha catyí ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehe ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahni Nyoo chii tatu ña ndicha cha cahín! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nichon iñi ra Pedro tuhun cha cañan ra Jesús chihin ra:

“Cha ni cumañi ca cuacu loho uvi chaha, yoho cucatyun vatyí ña ñohó nuun chi yuhu uñi tahan chaha.” Nichon iñi ra Pedro ta quichaha chacu chaa ra.

15

Nu nanyaq ra Jesús nuu ra Pilato

(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu iñ ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihi ra cuví tyiño ñu Israel. Ta ra Jesús nuñi ra, chinacuhva cuenda ra chi ra chi ra Pilato. ² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuví. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra. ⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáa cha caca xiñi ra.

Nu cutuñi chi ra Jesús vatyí cucúvi ra

(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi. ⁷ Ta ñohó noo ra nañi Barrabás vehe caa cuan, iñ ri chihin inga ra cha cachahñi chi ñáyivi noo nu naquiqui ñáyivi siqui gobiernu. ⁸ Ta quichi coyo ñáyivi quichaha chican ñu chi ra Pilato na saña ra chi noo ra tari tuhvá maa ra. ⁹ Ta nacahan ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra. ¹¹ Soco ra cacuví nuu chi tata sutu cuan catyiyuhu ra chi ñáyivi na catyí ñu na saña ra chi ra Barrabás. ¹² Tyicuan ta ndaca tuhun ra Pilato chi ñu, ta catyí ra:

—¿Ta ñáa cha cuñi ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanachaq ñu, ta catyí ñu:

—¡Na cúvi ra nu cruzi! —catyí ñu, canachaá ñu.

¹⁴ Ta catyí ra Pilato chi ñu:

—Soco ¿ñáá cha ña vaha sacuví ra? —catyí ra.

Soco canachaá ca ñu ta catyí ñu:

—¡Na cúvi ra nu cruzi! —catyí ñu.

¹⁵ Tyicuan ta vatyí cuñí ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chahá cuenda ra chi ra vatyí cúvi ra nu cruzi.

¹⁶ Tyicuan ta chinyacá sindaro chi ra nuquehe vehe tyiño cuan. Ta casandu iñ ri ra tandihí sindaro. ¹⁷ Ta casacuihnó ra noo sahma tyacu nyaa chi ra. Ta caquicu ra noo corona chihin iñu. Ta catyihí ra xiñi ra. ¹⁸ Yaha cuan ta quichaha cacana cháa ra siquí ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú si ra chi ra. Ta cachicuñí chiti ra casaha ra tyi sacahnu ra chi ra. ²⁰ Cha yaha cha chacú nyaa ra chi ra tyicuan caa, tinyaa ra sahma nyaa cuan chi ra, ta sandihví noo ra sahma maa ra chi ra. Yaha cuan ta cuahan ra chihin ra vatyí cuatyaa ra chi ra nu cruzi.

*Nu cuacúvi ra Jesús nu cruzi
(Mt. 27.32-44; Lc. 23.26-43; Jn. 19.17-27)*

²¹ Yahá noo ra ñuu Cirene, nañi ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casaniñi sindaro chi ra na cuiso ra cruzi ra Jesús.

²² Ta cachinyacá ra chi ra Jesús noo nu nañi Gólgota. Ta cuñí chi catyi: Nu Cuví Yiqui Xiñi Ndiyi. ²³ Ta cachahá ra vinu nasacá chihin noo tatan cha nañi mirra coho ra. Soco ra Jesús ña chihí ra. ²⁴ Cha yaha catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

²⁵ Caa iin cha ñaha ri catyaa ra chi ra nu cruzi. ²⁶ Ta letra cha catyaa ra xiñi cruzi cuan, catyí chi ñáá cuatyí ra. Ta catyí chi tyehé caa: “Ican ra ihya cuví Rey cuenda ñu ñuu Israel.” ²⁷ Ta chinanyaa ra uvi ca cruzi nu chitacaá ra uvi tahan ra suhu, noo ra chiyo vaha ra, ta inga ra chiyo satyín ra.

²⁸ Ta tyicuan caa quitá chi tari cuhva catyí nu tutu tuhun Nyoo tyehé caa: “Sahá ñu

tuhun tyi cuví ra noo ra quiñi iyó.” ²⁹ Ta ñu yahá coyo chacú nyaa ñu chi ra. Ta quisi xiñi ñu, ta catyí ñu chi ra:

—¡Jaan! ¡Yoho cha catyun tyi cusatanun vehe ñuhu cahnu, ta chichi cha uñi quivi cunacoñehun inga chaha! ³⁰ ¡Sacacu maun chuun ta ngo nu cruzi chiña! —catyí ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacú ra, soco ña cuví sacacu ra chi maa ra! ³² Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahán ra chi ra.

Nu chihí ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandihí ñuhu ñayivi nduñaa, nyacua nya caa uñi cha cha iñi. ³⁴ Ta suri cuhva cuan canachaá ra Jesús chihin tandihí fuerza ra, ta catyí ra:

—Eloi, Eloi, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun sandoq noo tuhun maun chii? —catyí ra.

³⁵ Suhva ra tayucu yucuan cachiñí ra ta catyí ra:

—¡Xihna! Caná chaa ra chi ra profeta Elías —catyí ra.

³⁶ Tyicuan ta chinq noo ra yucuan chiquehen ra noo tari caa xixan ta satyí ra chihin vinu iya. Ta tyaa ra noo nu yutun ta satuhva ra yuhu ra na coho ra, ta catyí ra:

—Cuatú ndo. Na nyehe yo tatu quichi ra Elías sanoo ra chi ra —catyí ra cuan.

³⁷ Tyicuan ta ñihi xaan canachaá ra Jesús, ta chihí ra. ³⁸ Ta sahma cha tacaá chichi vehe ñuhu cahnu ndatá sava maa chi, nya siquí ta nyacua nya ityi yuvi. ³⁹ Ta noo capitán cuenda sindaro Roma nanyaa ra yatyin nuu ra Jesús cuan. Cha nyehé ra yoso caa cana chaa ra, ta yoso caa chihí ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

⁴⁰ Ta nya sava ri tayucú tucu suhva ñusihi canyehé ñu. Ta mahñu ñu cuan nanyaa cu María ñaha Magdala, ta cu María sihi ra José ta ra Jacobo ra tyivaa ca. Ta nanyaa tucu cu Salomé. ⁴¹ Ican ñusihi ihya cachinyicon chi ra Jesús, ta tyinyee ñu chi ra quivi chica noo

ra ityi Galilea. Ta siin ri nyicú cuaha ca ñu cha chaꝥ coyo chihin ra Jerusalén cuan.

Nu chicuchĩ ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quívi cha sanduvaha ñu cha cachi ñu vatyi inga quívi tuhvá ñu nyitatu.

⁴³ Ta cha cuaa cuan chaꝥ ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quíhvĩ ra nu nyaá ra Pilato, ta chican ra coño ñuhu ra Jesús chi ra. ⁴⁴ Iyo cuñí ra Pilato cha nacotó ra vatyi cha chihĩ ra Jesús. Ta cana ra chi capitán vatyi ndaca tuhun ra tatu cha yahꝥ chihĩ ra. ⁴⁵ Ta cha catyi capitán vatyi cha yahꝥ chihĩ ra, ra Pilato chahꝥ ra coño ñuhu ra chi ra José. ⁴⁶ Tyicuan ta satꝥ ra José noo sinduhu cha chinqo chihin sahma finu cha nañi lino, ta sanoꝥ ra coño ñuhu ra. Ta siquĩ noo ra chihin sinduhu cuan. Yahꝥ cuan ta chityihĩ ra chi ra noo chichi ñaña cha cachatyꝥ ra chichi noo yuu. Ta chasĩ ra yuhu ñaña cuan chihin noo yuu cahnu. ⁴⁷ Ta cu María ñaha Magdala cuan ta cu María sihi ra José, chaꝥ coyo ñu nyehe ñu nu tyihĩ ra chi ra.

16

Nu nandotó ra Jesús

(Mt. 28.1-10; Lc. 24.1-12; Jn. 20.1-10)

¹ Yahꝥ quívi nyitatu ñu. Tyicuan ta cu María ñaha Magdala ta cu María sihi ra Jacobo, ta cu Salomé satꝥ ñu ndutya vixi chahán ta cuahan coyo ñu cua tyihĩ ñu coño ñuhu ra Jesús. ² Ta timingu cuvĩ, quívi quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaꝥ coyo ñu nu ñaña. ³ Ta catyi ñu chi tahan ñu:

—¿Yóó cha cusacanyaha yuu yuhu ñaña cuan? —catyi ñu chi tahan ñu.

⁴ Soco cuhva cha nanyehe ñu, yuu cahnu cha nyasĩ yuhu ñaña cuan cha cuachiyó chi nya sava. ⁵ Quíhvĩ coyo ñu chichi ñaña yu-cuan. Ta nanyehe ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhví ñu.

⁶ Soco catyi ra chi ñu:

—Ma yuhví ndo. Nyoho nanducú ndo chi ra Jesús ra ñuu Nazaret, ra cha chihĩ nu cruzi. Soco cha nandotó ra. Ña ñohó ca ra ihya. Nyehe ndo nu chacun ra chi ra. ⁷ Cuahan ndo cua sacoto ndo chi ra Pedro ta chi inga ra cachicꝥ noo chihin ra.

Catyi ndo chi ra vatyi na cuhun coyo ra ityi Galilea vatyi yucuan nyatú ra Jesús chi ra, tari cuhva catyi ra chi ra. Vatyi ra Jesús cha cuahan ra ityi nuu —tyicuan caa catyi ángel cuan chi ñu.

⁸ Tyicuan ta cuahan coyo vavaha ñu, vatyi suri canihĩ ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuvĩ ra Jesús nuu cu María ñaha Magdala

(Jn. 20.11-18)

⁹ Cuví chi timingu quívi quichaha vitya cha nandotó ra Jesús. Yahꝥ cuan ta xihna ca nuu cu María ñaha Magdala tuvĩ ra. Maa ña cuvĩ ñaha cha tava ñehe ra ucha tahan tatyí ña vaha. ¹⁰ Ta chahan ña chisacoto ña chi ra cachicꝥ noo chihin ra, vatyi canyicú cuihya ra ta cachacú chaa ra. ¹¹ Soco cuhva cha cachiñĩ ra vatyi iyó ra Jesús ta vatyi nyehe ña chi ra, ña cachineo ñiñi ra.

Nu tuvĩ ra Jesús nuu uvi tahan ra chicꝥ noo chihin ra

(Lc. 24.13-35)

¹² Cha yahꝥ cuan, ra Jesús tuvĩ ra nuu uvi tahan ra cha cuahan coyo chica ityi ityi nu chiqui. Soco siin caa cuhva caá ra cananyehe ra chi ra. ¹³ Ta cuanuhu coyo ra ta sacotó ra chi tandihĩ ca ra. Soco suri ña cachineo ñiñi ra cha cacahan ra cuan.

Tuhun cha chahꝥ ra Jesús chi ra cha tyaty-ñiño ra chi

(Mt. 28.16-20; Lc. 24.36-49; Jn. 20.19-23)

¹⁴ Ta cuee ca ta tuvĩ ra Jesús nuu ndi uchi ñiñ ra cha cachicꝥ noo chihin ra, cha ni ri ca cha canyicú ra nu mesa. Ta cahán ra chi ra cha cuenda cha ña cachineo ñiñi ra, ta cha cuenda cha candava añima ra vatyi ña cachineo ñiñi ra tuhun cahán ñu nyehe tyi nandotó ra. ¹⁵ Ta catyi ra chi ra:

—Cuahan ndo nicacahnu ñuhu ñayivĩ, ta cahán ndo chihin tandihĩ ñáyivĩ, ta catyi ndo chi ñu yoso caa sacacú Nyoo añima ñu. ¹⁶ Ta ñu cha chinó ñiñi ta condutya ñu, cucacu añima ñu. Soco ñu cha ña chinó ñiñi cundoo catyí ñu siquĩ ñu ta cunaa ñu. ¹⁷ Ta tandihĩ seña ihya cusacuví ñu cha chinó ñiñi chii: Chihin sivi cutava ñehe ñu tatyí ña vaha. Cucahan ñu inga sahan cha ña chitó ñu. ¹⁸ Cutiñi ñu coo, ta tatu coho ñu cha yihĩ venenu, ma saha cuehe chi ñu. Ta siin

ri cutyiso ñu ndaha ñu siqui ñu cuhví, ta cunduvaha ñu.

*Nu nandaq xica ra Jesús andivi
(Lc. 24.50-53)*

¹⁹ Nu ndihi cahān Sutu Mañi yo Jesús chihin ra, ta nandaq xica ra andivi, ta chicunyaq ra chiyo vaha Nyoo. ²⁰ Tyicuan ta ra cachica noo chihin ra quita ra ta chahān coyo ra chicahān ra tuhun Nyoo yoso caa sacacú ra añima yo tandihi ri ityi. Suri maa Sutu Mañi yo tyinyee chi ra vatyi chahā ra cha sacuvi ra cuaha milagru. Ta tyicuan caa nyehé ñáyivi tyi ndicha tuhun cacahān ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

¹⁻³ Cha chitón yoho Tata Teófilo, vatyi cha cuaha ñáyivi nducu ñu cuhva ta tyaa ñu nuu tutu tuhun cha cuvi nu nyicú ndi. Tyaa ñu tari maa cuhva nacatyí ñáyivi chi yo, ñáyivi cha nyehe ta cahán tuhun ra Jesús nya quívi xihna ri. Ta vityin tahán tucu chi chi yuhu tyi sacote tuhun ra chuun. Vatyí cha yahá sacuahí ta nyehe vahi tandihi nya nu quichahá. Ta vityin ñañi ñañi ri cuatyai tuhun ra. ⁴ Vatyí coto vahun tyi ndicha cha sacoto ñáyivi chuun.

Nu sacoto noo ángel chi ra Zacarías ama cucacu ra Juan ra sacondutyá chi ñáyivi

⁵ Quívi cha cuví ra Herodes rey nicahnu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihi ra chinañi ña Elisabet. Ta vachi ñu tata ra Aarón, ra chiyo ta cha naha. ⁶ Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaa cuatyí síqui ñu. ⁷ Soco yori maa sehe ñu chicoo. Vatyí cu Elisabet, ña cuví coo sehe ña. Ta siin ri ninduvi tahan ñu chahnu xaan ñu.

⁸ Ta noo quívi tahan chi ityi cuenda ra Zacarías cha sacuvi ra tyiño nuu Nyoo. ⁹ Tari cuhva costumbre maa tata sutu, nyehe ra nya ra tahan chi nyatu chi. Ta tahan chi nyatu chi ra Zacarías cha quihvi ra chichi vehe ñuhu, vatyi chahmi ra cutu. ¹⁰ Cha ni ri ca cha ñohó ra chahmi ra cutu cuan, cuaha xaan ñáyivi chicán tahvi ñu ityi chata vehe. ¹¹ Yucuan ta tuví noo ángel cuenda Nyoo nuu ra Zacarías. Ta chicuinyaa ra chiyo vaha arta nu chahmi ra cutu. ¹² Ta cha nanyehé ra Zacarías chi ángel cuan, iyo xaan cuñí ra. Ta yuhví xaan ra. ¹³ Soco ángel cuan catyí ra chi ra:

—Zacarías, ma yuhvun. Vatyí Nyoo chiñí ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chi cue. ¹⁴ Siñ xaan cucuví chuun. Ta cuaha xaan ñu, cusii cuñi quívi cacu cue. ¹⁵ Vatyí sehun, cahnu xaan ra cucuví ra nuu Nyoo. Ma coho

ra vinu ta ni ndixi. Ta ñihi xaan cuquihi Tatyí li Nyoo chi ra nyata cumañi cacu ra ta tandihi tyembu cha coo ra. ¹⁶ Ta cuaha xaan ñáyivi Israel cunyicon chi Sutu yo Nyoo cha cuenda ra. ¹⁷ Ta cucoo tunyee iñi Nyoo chi ra. Ta cuquihi xaan Tatyí li Nyoo chi ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chi ñáyivi chihin sehe ñu. Ta cusañaha ra chi ñáyivi quiñi iyó nu quichaha ñu tuhun cahán Nyoo. Tyicuan caa cusanduvaha ra chi ñáyivi ta cuatu tuhva ñu chi Nyoo —catyí ángel chi ra Zacarías.

¹⁸ Ta ndaca tuhun ra Zacarías chi ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihi cha chahnu xaan ña ñandihí —catyí ra.

¹⁹ Ta ángel cuan quichahá catyí ra:

—Yuhu Gabriel nañí. Ta chiqué tyiño Nyoo. Maa ra tachí chii vatyi cahin nuun ta sacote tuhun vaha ihya chuun. ²⁰ Ta vityin nduñihun. Vatyí ña chinó iñun tuhun cahín. Ta ma cuvi chahnu nyacua nya chino cava tuhun cahin chuhun —catyí ángel cuan chi ra.

²¹ Ta ñáyivi cha nyatú chi ra Zacarías ityi chata vehe, iyo xaan cuñí ñu ñáá tuhun cha cucuee xaan ra chichi vehe ñuhu. ²² Soco cuhva cha quitá ra Zacarías, ña cuví maa cahan ra chihin ñu. Tyicuan ta tuví iñi ñu vatyi iyó cha nyehe ra chichi vehe ñuhu cuan. Ta quichahá cahan ra chihin ñu chihin seña ri. Vatyí ña cuví cahan ra.

²³ Ta quívi cha ndihí tyiño saha ra Zacarías vehe ñuhu cuan, ta cuanuhu ra nya vehe ra. ²⁴ Ta cha yahá tuhun cuan chicohon sehe ñasihi ra, cu Elisabet. Ta ña quitá maa ña chata vehe cha ni ri ca cha ohon yoo. Ta chicá xiñi ña: ²⁵ “Tyehe caa sacuví Sutu Mañi yuhu chihin, tacuhva ma cahan cuehe ca ñáyivi chii”, chicá xiñi ña.

Nu sacoto noo ángel chi cu María vatyi cucacu ra Jesús

²⁶ Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityi Galilea. ²⁷ Vatyí cucahan ra chihin noo ñaha tyivaa cha nañí María. Ta cha nyañaa cha tandaha ña chihin noo ra nañí José. Ta ra José cuan vachi ra tata rey David. ²⁸ Ta tuví ángel cuan nu nyaá ña. Ta quichahá catyí ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihi ca ñusihi —catyí ángel cuan chi ña.

²⁹ Ta cuhva cha chiñi ña cha cahān ra, iyo xaan cuñi ña tuhun cahān ra. Ta ndichí xiñi ña: “¿Ñáá tuhun cha chahā ra ihya nocumi chi yo tyicuan caa?” ndichí xiñi ña.

³⁰ Ta catyí ángel cuan:

—Ma yuhvun, María, vatyí ñihún tumañi iñi nuu Nyoo. ³¹ Vatyí cuacohon noo sehun. Ta sacunañun Jesús chi ra. ³² Cahnū xaan ra cuacuví ra. Ta cunañi ra Sehe Nyoo ra cuví nuu. Ta Nyoo Sutu Mañi yo cusacuví ra rey chi ra. Tari cuví ra David, ra vachi ra tata. ³³ Vatyí cunyaca ñaha ra chi ñáyivi Israel tandihi maa tyembu. Ta ma ndihi maa cha cunyaca ñaha ra —catyí ángel cuan chi ña.

³⁴ Yucuan ta ndacā tuhun cu María chi ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yui.

³⁵ Ta nacahan ángel ta catyí ra:

—Maa Tatyí li Nyoo cuquichi sicun. Ta tunyee iñi Nyoo cahnū cuquichi tari noo vico ta casí chi sicun. Yucuan chaha ra ii cha cucacu cunañi ra Sehe Nyoo. ³⁶ Tyicuan caa tucu cu Elisabet ñáyivi chuun. Cucacu noo sehe ña vasi cha chahnu ña. Ñaha cha catyí ñáyivi vatyí ña cuví maa coo sehe. Soco vityin cha ñohó sehe ña. Cha iñu yoo ñohó. ³⁷ Vatyí Nyoo ñahri cha ma cuví sacuvi ra —catyí ángel chi ña.

³⁸ Ta quichaha catyí cu María:

—Yuhu cuví musu Sutu yo Nyoo. Na sacuví maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quiví cuan, numi xaan cuahan cu María noo ñuu ityi Judea nu maa ri maa yucu cuví. ⁴⁰ Ta quihví ña chichi vehe ra Zacarías. Ta chahā ña nocumi chi cu Elisabet. ⁴¹ Cuhva cha chiñi cu Elisabet tuhun cahān cu María, natyooñ cha lee cha ñohó chichi ña. Ta chitu ña chihin Tatyí li Nyoo.

⁴² Ta chaa nacahan ña, ta catyí ña:

—Nyoo sahā ra tumañi iñi chuun cha nuu tandihi ñusihi. Ta nasocó ra chi sehun.

⁴³ ¿Ta yóó ñaha cuví yuhu? Vatyí quichi sihi Sutu Mañi yo quichi nyehe ña nu nyai.

⁴⁴ Cuhva cha chiñi tuhun cahān, ta natyooñ

sehi cha ñohó chichi. Vatyí sií xaan cuví chi ra. ⁴⁵ Ta sií xaan cuñi añimon vatyí chinó iñun cha cuacuví tuhun cahān Nyoo chuhun —catyí cu Elisabet.

⁴⁶ Ta quichahā catyí cu María:

—Sacahní chi Nyoo chihin tandihi añime.

⁴⁷ Ta sií xaan cuví chii vatyí sacacú Nyoo añime.

⁴⁸ Vatyí cuví yuhu noo ñaha ndahvi ta Nyoo tiin cuenda ra chii. Ta vityin tandihi quiví cucatyí ñáyivi chii vatyí cahnū xaan tumañi iñi ñihí.

⁴⁹ Vatyí Nyoo, cahnū xaan cuví ra. Ta cahnū cha sacuví ra chihin. Ta ii xaan sivi ra.

⁵⁰ Ta tyicuan ri ndahvi cuñi ra chi tandihi ñáyivi cha sahā ñáyivi chi ra.

⁵¹ Cahnū xaan cha sacuví ra chihin tunyee iñi iyó chi ra.

Sanaá ra cuhva chicá xiñi ñu cahnū sahā chi.

⁵² Sanocueé ra chi ñu sacahnú chii. Ta ra cha ña cahnū sahā chii, sacucahnú ra chi ra.

⁵³ Chahā Nyoo cha vaha chi ñu cuñi coto cha vaha,

ñu chitó vatyí chiñuhú Nyoo chi. Soco ñu tyayii cha cuñi maa tyi ñahri chiñuhu chi, chihin nundaha nu ndii ñu, sacuhún ra chi ñu.

⁵⁴ Tyinyee ra chi ñáyivi Israel cha cuví musu ra.

Ta ña naá iñi ra chi ñu. Nyehé ndahvi ra chi ñu.

⁵⁵ Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

⁵⁶ Ta cu María ndoo ña chihin cu Elisabet uñi yoo. Ta cha yahā uñi yoo cuan ta cuanuhū ña nya vehe ña.

Quiví cacū ra Juan, ra cha sacondutyā

⁵⁷ Ta chaa quiví cha cuacacu cha lee sehe cu Elisabet. Cacū cue ta rayii cuví cue. ⁵⁸ Ta cha chiñi ñáyivi cha nyicú yatyn yuvehe ña ta ñáyivi chi ña cha tyicuan caa, sií xaan cuví chi ñu. Ta sií xaan cuñi tucu maa ña. Vatyí vaha xaan cha sacuví Nyoo chihin ña. ⁵⁹ Ta nu cu uña quiví cha cacū cue, chahan ñu chihin cue vehe ñuhu. Vatyí cuhva cuenda ñu chi cue chi Nyoo. Ta sahā ñu circuncidar chi cue tari cuhva iyó maa ñu. Chahnyā ñu chiin ñii cue nu cuví cue

rayii. Ta cuñi ñu sacunañi ñu Zacarías chi cue tari sutu cue. ⁶⁰Soco sihi cue catyí ña:

—Ma cuvi. Juan, cunañi cue.

⁶¹Ta quichaha catyí ñu:

—¿Náa tuhun sacunañi Juan chi cue? Yori ñáyivi chi ndo cha nañi tyicuan caa —catyí ñu.

⁶²Ta quichaha ndaca tuhun ñu chihin seña ri chi sutu cue. Vatyí coto ñu ñáa sivi cuñi ra cha cunañi cue. ⁶³Ta chican sutu cue noo vitu, ta nuu vitu cuan tyaq ra tyehe caa: “Juan cuvi sivi cue”, tyaq ra.

Ta tandihi maa ñu cuan iyo xaan cuñi ñu tuhun cuan. ⁶⁴Ta nacahan ra Zacarías caa cuhva ri cuan. Ta quichaha sacahnu ra chi Nyoo. ⁶⁵Tandihí maa ñu iyó yatyin ri yuvehe ñu, yuhví xaan ñu tuhun ihya. Ta tandihí maa ñáyivi cha iyó yucu ityi Judea cuan nacatyí ñu chi tahan ñu tuhun ihya. ⁶⁶Ta tandihí maa ñáyivi cha chitó tuhun cuan, ndichí xiiñi ñu, ta ndaca tuhun ñu chi tahan ñu:

—¿Yóo ra cuvi cha lee cuan? —catyí ñu.

Vatyí ndicha, Nyoo nasoco xaan ra chi cue.

Nu sacahnú ra Zacarías chi Nyoo

⁶⁷Sutu cue, ra Zacarías, tyitú ra chihin Tatyí li Nyoo. Tyicuan ta quichaha cahan ra tuhun cha chahá Nyoo chi ra, ta catyí ra:

⁶⁸—Cahnu xaan ra cuvi Sutu Mañi yo Nyoo cuenda yo ñu Israel.

Vatyí quichi ra nu nyicú yo, cha cuvi yo ñáyivi chi ra.

Ta sacacu ra chi yo.

⁶⁹Ta chaha ra noo ra cahnu chi yo, cha cusacacu chi yo.

Tata ra David ra cha sacuvi tyiño nuu Nyoo vachi ra.

⁷⁰Tyicuan caa cahan Nyoo chihin yuhu ra cacuví profeta cuenda ra ta cha naha.

⁷¹Vatyí tyicuan caa cusacacu ra chi yo ndaha ra xaan iñi chi yo, ra cha tasi cuñi nyehé chi yo.

⁷²Tyicuan caa cundahvi cuñi nyehé ra chi ñáyivi chi yo ta cha naha.

Ta ma sanaa ra iñi ra tuhun cahan ra.

⁷³Ican ihya tuhun cahan Nyoo chihin ra Abraham sutu yo.

⁷⁴Catyí ra vatyí cusacacu ra chi yo ndaha ra xaan iñi chi yo.

Vatyí ma yuhvi ca yo sacahnu yo chi ra.

⁷⁵Ta maa ra sanducachi ra iyó yo nuu ra.

Ta vaha coo yo nuu ra tandihí quivi cha cua-coo yo ñáyivi —catyí ra Zacarías.

⁷⁶Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyivi chuun.

Vatyí cuhun ityi nuu Sutu Mañi yo. ta cu-cahun tuhun ra chihin ñáyivi vatyí cha cuñi quichi ra.

⁷⁷Ta cusacoton chi ñáyivi vatyí cunasaha Nyoo tucahnu iñi cuatyí ñu.

Ta tyicuan caa ta cacu añima ñu.

⁷⁸Vatyí Sutu yo Nyoo cuñi ra chi yo. Ta cundahvi cuñi ra chi yo.

Ta saquichí ra noo ra tyinyeé chi yo. Tari noo ñuhu ñanyii cucuvi ra.

⁷⁹Vatyí chihin cha sañahá ra chi yo sacundichín ra nu nyicú yo nu ñaa iñi cha catyí cuatyí yo.

Ta cusañaha ra chi yo yoso caa quihvi yo ityi vaha —catyí ra Zacarías.

⁸⁰Ta cha luhlu cuan cuahan chahnu ra. Nyee cuñi ra chihin Tatyí li Nyoo. Ta chicoq ra noo chiqui ndii nyacua nya quivi cha chichohon nuu ñáyivi Israel chi ra.

2

Quivi cacu ra Jesús (Mt. 1.18-25)

¹Ta quivi cuan iyó noo ra nyacá ñaha, nañi ra Augusto. Tachi ra tyiño natyaa ra sivi tandihí ñáyivi nicahnu ñuhu ñáyivi.

²Ta quivi cuan ra Cirenio cuvi ra ra nyacá ñaha tandihí ñuu ityi Siria. ³Ta tahan chi cuhun tandihí ñáyivi nya ñuu ñu. Vatyí cuhva ñu sivi ñu yucuan. ⁴Yucuan chaha quitá ra José ñuu Nazaret ityi Galilea. Ta chahan ra ityi Judea ñuu Belén nu cacu ra David. Yucuan chahan ra vatyí tata ra David vachi ra. ⁵Ta chahan ra chi cuhva ra sivi ra chihin cu María. Ta cha cuñi tandaha ña chihin ra. Ta ñohó sehe ña. ⁶Ta chiquitahan chaa quivi cha cacu sehe ña cha ni ri ca cha ñohó ñu Belén cuan. ⁷Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quiti. Vatyí cuaha xaan ñáyivi chaa coyo ñuu cuan. Ta ña nuña ca ni minoo vehe nu cunyata ñu.

Nu cahan ángel chihin ra sahá cumi mbee

⁸Yatyin ñuu Belén cuan nyicú suhva ra casahá cumi mbee sana ra cha cha cuaa cuan. ⁹Ta sana iñi ra ta tuví noo ángel

Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra. ¹⁰Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihí ñáyivi. ¹¹Vatyí vityin cacú ra sacacú aña ndo ñuu ra David. Noo ra cuví Cristo, ra cuví Sutu Mañi yo. ¹²Ta ihya cuví seña chahi chi ndo, cunyehe ndo chi cha lee cuan, siquí noo cue sahma. Catuví cue chichi noo nu chachí quiti —catyí ángel chi ra casahá cumi mbee cuan.

¹³Ta caa cuhva ri cuan chaá coyo cuaha xaan ca ángel casacahnú ra chi Nyoo, ta cacatyí ra:

¹⁴Sacahnu yo chi Nyoo nu nyaá ra gloria.

Ta ñáyivi iyó siquí ñuhu ñáyivi cha ñihi tumañi iñi ra, na coo taxi aña ñu, catyí ángel cuan.

¹⁵Yucuan ta cuanuhú coyo ángel cuan gloria. Tyicuan ta ra casahá cumi mbee quichaha catyí ra chi ra tahan ra:

—Coho ndo Belén. Cunyehe yo ñáa cha cuví. Vatyí maa Sutu yo Nyoo sacotó chi yo.

¹⁶Tyicuan ta numi xaan cuahan coyo ra Belén. Ta nañihí ra chi cue chihin cu María ta ra José. Ta catuví cue noo nu chachí quiti. ¹⁷Ta yahá cha canyehe ra chi cue, ta canacatyí ra chi ñu ñáa ndihí tuhun cahán ángel chihin ra cuenda cha lee cuan. ¹⁸Ta tandihí ñu chihí tuhun cahán ra, iyo xaan cuñí ñu. ¹⁹Soco cu María ta cuhva chicá ri xiñi ña tuhun cuan. ²⁰Ta ra sahá cumi chi mbee cuan cuanuhú coyo ra. Ta casacahnú ra chi Nyoo cha cuenda cha cachihí ra ta canyehe ra. Vatyí ching cava tandihí cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹Ta nu cu uña quiví, sahá ñu circuncidar chi cue, tari cuhva tuhva maa ñu. Ta sacunañi ñu chi cue, Jesús. Suri maa sivi cha catyí ángel chi cu María quiví cha cumañi ca cohon sehe ña.

²²Ta cha yahá quiví cha tahan chi vatyí ndundihí ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo. ²³Sacuví ñu tyicuan caa vatyí iñi caa maa catyí ley tyehe caa: “Tandihí rayi chi cuví sehe nuu ñu,

cucuhva cuenda ñu chi Nyoo”, catyí ley cuan. ²⁴Ta chahan ñu chicuhva cuenda ñu uvi tahan quiti tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵Ta quiví cuan iyó noo ra ñuu Jerusalén cha nañi Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quiví cusacacu Nyoo chi ñáyivi Israel. Ta yihí ra Tatyí li Nyoo. ²⁶Ta sacotó Tatyí li Nyoo chi ra vatyí maa cuví ra cha ñi ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi Sutu yo Nyoo. ²⁷Ta ra cuan chahan ra vehe ñuhu cuhva catyí maa Tatyí li Nyoo chi ra. Cuhva cuan chahan tucu sutu ta sihi cha lee cuan chinyaca ñu chi cue vehe ñuhu cahnu, vatyí sacuvi ñu tari cuhva catyí maa ley. ²⁸Ta quehen ra Simeón chi ra Jesús. Ta tyihí sucun ndaha ra chi ra. Ta quichaha sacahnu ra chi Nyoo. Ta catyí ra:

²⁹—Sutu Mañi yuhu. Na cuví mai vityin chihin cha vaha.

Vatyí cha sacuvun cha catyün chi yuhu cha cuví sehun.

³⁰Vatyí cha nyehí chihin nui chi ra cusacacu chi ndi.

³¹Vatyí sañahun chi ra nuu tandihí ñáyivi.

³²Cha catyí ra ta cucahnú ñáyivi Israel nuu inga ñáyivi.

Ta ican ra cuví ra cha sacundichin aña tandihí inga ñáyivi cha ñima ñu Israel cuví. Vatyí cusacuvi ra na cutuñi iñi ñu tuhun Nyoo —catyí ra Simeón.

³³Ta ra José chihin sihi ra Jesús, iyo xaan cuñi ñu cha cahán ra Simeón tuhun cha lee cuan. ³⁴Yucuan ta chican tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehe chi cha lee ihya. Vatyí cuaha xaan ñáyivi cuchino iñi ñu chi ra quiví coto ñu tuhun ra, ta cucacu aña ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra. ³⁵Ta cha tyicuan caa cusanatuví ra cha caa aña noo noo ñáyivi. Soco cha cuenda yoho, María. tari cha uhvi cha yahá sava noo tyicaa aña ñáyivi, tyicuan caa cha uhvi cunyeñun cha catyí cha lee ihya —catyí ra Simeón.

³⁶Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi

tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yíi ña ta chihí ri ra. ³⁷ Ta cha cumi xico cumi cuiya chihí yíi ña. Ta vehe ñuhu cahnu ña quitá ña, vatyi ndiyaca ta ñiyaca chicán tahvi ña chi Nyoo. Ta iyó cuhva cha ña chachi ña cha ni ri ca cha chicán tahvi ña. ³⁸ Ta cuhva cha ñohó ra José ta cu María chihin cha lee, chaq ña nu canyicú ñu. Ta nacuhva ña tyahvi nyoo chi Nyoo. Ta quichahá cahan ña tuhun ra Jesús chihin tandihí ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yahá cha sacuvi ñu tandihí maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañí Nazaret. ⁴⁰ Ta ra Jesús cuahan chahnu ca ra. Ta cuahan ndunye ca ra ta cuahan chicoo ca cha chiñi tuñi Nyoo. Vatyi nasoco Nyoo chi ra.

Nu ñohó ra Jesús chichi vehe ñuhu

⁴¹ Ra José chihin sihi ra Jesús ndihí cuiya ri tuhva ñu chahán nya Jerusalén cha vico pascua. ⁴² Ta quívi ndihí ra Jesús uchi uvi cuiya, chahan tandihí ñu Jerusalén tari tuhva maa ñu chahán cha vico. ⁴³ Ta quívi ndihí vico ta cuandichi ñu, ta ra Jesús ndog ra Jerusalén. Ta ña saha ñu cuenda. ⁴⁴ Cuñí maa ñu vatyi cuandichi ra mahñu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quívi. Tyicuan ta nanducy ñu chi ra chichi nu tuvi ñáyivi cuan, ⁴⁵ ta ña nañihí ñu chi ra. Tyicuan ta cuanuhu chata ñu cuananducu ñu chi ra nya Jerusalén.

⁴⁶ Cha yahá cha uñi quívi ta nañihí ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahan ra. Ta ndacá tuhun ra tuhun chi ra. ⁴⁷ Ta tandihí ñu chiñí tuhun cahan ra, iyo xaan cuñí ñu chihin cha chiñi tuñi ra, ta chihin tuhun cha nacahan ra. ⁴⁸ Cuhva cha nanyehé sutu ra ta sihi ra chi ra, iyo xaan cuñí ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyeh caa? Sutan ta yuhu chiqá xaan iñi ndi ta nanducy xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chito ndo vatyi ñiñi cuñí chi cha cahn tuhun Suti chihin ñáyivi? —catyí ra.

⁵⁰ Soco ña cutuñí iñi ñu tuhun cahan ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahan ñu. Ta sihi ra naquehen vaha ña tandihí tuhun ihya chichi aña ña. ⁵² Yucuan cuví nu cuacuahnu ca ra Jesús. Ta cuahan chaa ca cha chiñi tuñi xiñi ra. Ta si xaan cuví chi Nyoo chihin ra ta ñáyivi ñandihí.

3

Ra Juan, ra sacondutya, cahan ra tuhun Nyoo nu ñáyivi

(Mt. 3.1-12; Mr. 1.1-8; Jn. 1.19-28)

¹ Nu ndihí chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisania nyacá ñaha ra Abilinia quívi cuan. ² Ta ra Anás chihin ra Caifás, ican ra cuví ra ra cacuví nuu chi tandihí tata sutu. Ta quívi cuan cahan Nyoo chihin ra Juan sehe ra Zacarías noo nu chiqui ndii. ³ Ta ra Juan chicá noo ra tandihí ñuu cha nyaá yatyin ri nu nyaá noo yuvi cahnu cha nañí Jordán cahan ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra. ⁴ Tyeh caa cuvi tari cuhva catyí nu libru cha tyaa ra Isaías profeta Nyoo ta cha naha. Ta catyí ra:

Chiñí yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo aña ndo vatyi cuaquichi Sutu Mañi yo.

Nuñá ndo noo ityi ndoo chi ra na quihvi ra aña ndo.

⁵ Tari cha sanandutú ndo noo ticoho, ta tari sandundaá ndo noo yucu cahnu, ta tari sandundoó ndo cha yacua, ta tari sanduvií ndo nu quiñi caa, tyicuan caa nasama ndo cuhva iyó ndo.

⁶ Tyicuan caa ta tandihí ñáyivi ta nyehe ñu vatyi Nyoo chaha ra cha cacú aña ñu.”

⁷ Ta tyicuan caa cahan ra Juan chihin ñáyivi. Yucuan ta cuhva cha chiñí ñu tuhun cahan ra, ta catyí ñu chi ra vatyi na

sacondutya ra chi ñu. Yucuan ta quichaha catyí ra chi ñu:

—Nyoho tari noo tata coo xaan cuví ndo! ¿Yóó cha sañahá chi ndo vatyi chihin cha condutya ri ndo ta ma tachi tuñi ca Nyoo chi ndo? ⁸ Nasama ndo cuhva iyó ndo, na nyehe ñáyivi vatyi cha ndu uvi ñni ndo cuatyí ndo. Ta ma catyí ndo vatyi tata ra Abraham vachi ndo. Vatyi nyacua nya noo yuu ihyá, Nyoo cuví sananduvi ra noo ñáyivi chi ra Abraham. ⁹ Tari yutun cha ña chahá chiti, tyicuan caa cuví ndo. Vatyi ña sacuví ndo tari cuhva cuñí Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñí cuiri chuhun ndo nu cayu ñuhu —catyí ra Juan.

¹⁰ Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñí yoho? —catyí ñu.

¹¹ Ta nacahan ra Juan, ta catyí ra:

—Yóó ra cha iyó uvi tahan camisa, tahanan chi cuhva ra noo chi ra cha ñahri chi. Ta yóó ñu cha iyó cha cachi, tahanan chi cuhva ñu cha cachi ñu ñahri chi —catyí ra.

¹² Ta chaá coyo tucu suhva ra catavá xuhun cuenda gobiernu Roma, ta cuñí ra condutya ra. Ta candacá tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

¹³ Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

¹⁴ Yucuan ta quichaha candacá tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí síqui ñu tatu ñahri cuatyí ñu. Ta ndoqo ndo vaha yoso cuhva yahvi ndo —catyí ra Juan.

¹⁵ Iyo cuñí ñáyivi tuhun cahán ra Juan. Ta cuñí ñu tyi ican ra cuví Cristo, ra cha sacacú chi yo. ¹⁶ Soco ra Juan catyí ra chi tandihi ñu:

—Cha ndicha vatyi sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyi li Nyoo ta chihin ñuhu. Iyó ca tunyee ñni chi maa ra, ta ñima ca yuhu. Vatyi ña nañé cha cuví musu ra ta niri cha

ndachi ñni xityin ndichan ra. ¹⁷ Tari noo ra cha cuanaquehen vaha ñni, ta natyihi vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó ñni yo chi ra, cunaquehen vaha ra chi yo, ta cunyicu yo chihin ra. Soco tatu ña chinó ñni yo chi ra cutyihi ra chi yo anyaya nu cayu ñuhu cha ma ndahva ca maa —catyí ra Juan.

¹⁸ Ta tyehe caa cahán ra Juan chihin ñu. Ta cuaha xaan ca tuhun cahán ra nuu ñu tyi cuaquichi Sehe Nyoo ta cua sacacu ra chi yo. ¹⁹ Ta cahán ra Juan chi ra Herodes cha cuenda tandihi cuíi cha ña vaha nyacuví ra. Vatyi naquehen ra chi cu Herodías, ñasihi ra Felipe yañi ra. Ta cuaha ca cha ña vaha nyacuví ra. ²⁰ Soco ra Herodes tahanan chi cha tyasoho ra tuhun ihyá soco ña cuñí ra. Nu ndihi tuhun tyihí ndihi ra chi ra Juan vehe caa.

Quivi cua condutya ra Jesucristo

(Mt. 3.13-17; Mr. 1.9-11)

²¹ Cumañi ca cha cohon ra Juan vehe caa sacondutya ra chi tandihi ñáyivi. Ta sacondutya tucu ra chi ra Jesús. Ta cha ni ri ca cha chicán tahvi ra Jesús chi Nyoo ta nuña andivi. ²² Ta nyehe ra Tatyi li Nyoo quichí síqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta sii xaan cuñí chuhun —catyí ndusu cuan.

Ñáyivi vachi ra Jesucristo tata

(Mt. 1.1-17)

²³ Oco uchi cuiya ra Jesús ta quichahá saha tyiño ra tyiño Nyoo. Ta tandihi ñáyivi cuñí maa ñu vatyi sehe ra José cuví chi ra. Ta ra José, sehe ra Elí cuví chi ra. ²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melquí cuví chi ra. Ta ra Melquí, sehe ra Jana cuví chi ra. Ta ra Jana, sehe ra José cuví chi ra. ²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós, sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra. ²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías, sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra. ²⁷ Ta ra Judá, sehe ra Joana cuví chi ra. Ta ra Joana, sehe ra Resa cuví chi ra. Ta ra Resa, sehe ra Zorobabel cuví chi

ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra. ²⁸Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra. ²⁹Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra. ³⁰Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra. Ta ra José, sehe ra Jonán cuví chi ra. Ta ra Jonán, sehe ra Eliaquim cuví chi ra. ³¹Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra. ³²Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra. ³³Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra. ³⁴Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham, sehe ra Taré cuví chi ra. Ta ra Taré, sehe ra Nacor cuví chi ra. ³⁵Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra. ³⁶Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra. ³⁷Ta ra Lamec, sehe ra Matusalén cuví chi ra. Ta ra Matusalén, sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra. ³⁸Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

*Nu nducú nyehe cuihna chi ra Jesús
(Mt. 4.1-11; Mr. 1.12-13)*

¹Ta chitú ra Jesús chihin Tatyí li Nyoo cha yahá condutya ra. Yucuan ta quitá ra nu cuví yuvi cahnu Jordán ta cuanuhu ra. Ta Tatyí li Nyoo chinyacá chi ra noo nu chiqui ndii. ²Yucuan chinyaa ra uvi xico quivi. Ta nducú nyehe cuihna chi ra. Na chachí maa ra quivi cuan. Yahá cuan ta quichaha chisoco ra. ³Yucuan ta quichaha catyí cuihna chi ra:

—Tatu ndicha cha Sehe Nyoo cuví chuun, catyí chi yuu cha catuví ihya, na nanduvi pan.

⁴Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu añima ñu chihin tandihi tuhun cahán Nyoo —catyí ra Jesús chi cuihna.

⁵Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañaha ra tandihi nu nyacá ñaha ñáyivi siqui ñuhu ñáyivi. ⁶Ta cuihna catyí ra chi ra Jesús:

—Ndaha yuhu nyaá tandihi ñáyivi ihya. Vatyí chahá Nyoo cha cunyaca ñahi tandihi ihya siqui ñuhu ñáyivi. Ta cuví cuhve yóó chi cuñí mai cuhve. ⁷Cuhve tandihi ñáyivi cuan chuun tatu yoho ta cuñí chitun nui, ta sacahnun chii —catyí cuihna cuan chi ra Jesús.

⁸Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chi maa Nyoo sacahnu yo. Ta iin ri chi maa ra quichaha yo.”

⁹Yahá cuan ta quehen tucu cuihna cuan chi ra Jesús. Ta chinyacá ra chi ra nya ñuu Jerusalén. Ta sandaá ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuví chuun, sandupehla nyacua nya nu ñuhú.

¹⁰Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹Cunaquehen ra chuun chihin ndaha ra. Ta ma cuhva ra cha taxin chahun chihin yuu —catyí ra chi ra.

¹²Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³Ta cuihna ña cuví sandahvi ñaha ra chi ra Jesús. Ta cuahan ra suhva quivi.

Nu quichahā ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yahā tuhun cuan, ta nachaā ra ityi Galilea. Ta tyitú ra yihí chihin tunyee iñi Tatyí li Nyoo. Ta cahán ñáyivi tuhun ra tandihi ri ityi. ¹⁵ Ta sañahá ra chi ñáyivi nu cuví vehe ñuhu tandihi ri ñuu. Ta tandihi ñu sacahnú ñu chi ra.

Nu nyaá ra Jesús Nazaret ñuu nu chahnú ra
(Mt. 13.53-58; Mr. 6.1-6)

¹⁶ Tyicuan ta nachaā ra Jesús nya Nazaret, ñuu nu chahnú ra. Ta noo quívi nyitatu ñáyivi, ta quihví ra chichi vehe ñuhu, tari tuhva maa ra. Ta chicunanyaā ra vatyí cua sacuahā ra tuhun Nyoo. ¹⁷ Ta chahā ñu noo libru Nyoo chi ra cha tyaa ra Isafas ra profeta Nyoo ta cha naha. Ta cuhva cha nuñā ra, nañihí ra noo nu catyí tyehe caa. Ta quichahā sacuahā ra:

¹⁸ Nyaá Tatyí li Nyoo chihin vatyí maa ra tachi chii.

Vatyí nacachí ra chii vatyí sañahi tuhun vaha ra chi tandihi ñáyivi ndahvi.

Tachi ra chii vatyí sanduvahi chi ñu uhvi añima.

Tachi ra chii vatyí sacote tuhun ra chi ñu nyaá ndaha ra ña vaha, vatyí cusacacu Nyoo chi ñu.

Tachi ra chii vatyí sanyehi chi ñáyivi cuaa. Ta sacote chi ñu nyehe tindoho vatyí cucu ñu.

¹⁹ Ta sacote chi ñu vatyí cha chaā quívi cha chahā Nyoo tumañi iñi chi ñu.

²⁰ Ndihi sacuahā ra ta nacasi ra nu libru cuan. Ta nacuhvā ra chi noo ra cha nyaá vehe ñuhu cuan. Ta chicunyaā ra. Yucuan ta tandihi ñáyivi cha nyicú cuan ndoo ñu nyehe ñu chi ra. ²¹ Yucuan ta quichaha catyí ra chi ñu:

—Vityin quívi ihya chinō cava tuhun cha nyaá nu libru cha sacuahí nuu ndo —catyí ra Jesús chi ñu.

²² Tandihi ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyí vaha xaan cha cahán ra. Ta quichaha ndaca tuhun ñu chi tahan ñu:

—¿Atu ñima ra ihya cuví sehe ra José?

²³ Ta quichaha catyí ra Jesús chi ñu:

—Chité cha nacacá iñi ndo. Vatyí tyehe caa cua catyí ndo chii: “Tatu ra sanduvahá cuvún, sanduvaha xihna ca chi maun.

Tandihi cha chiñi ndi cha sacuvún ñuu Capernaum. Sacuvi tucu ñuu maun vityin.”

²⁴ Ta catyí tucu ra Jesús:

—Cha ndicha vatyí ni noo ra profeta Nyoo, ta ña quichaha ñáyivi ñuu ra chi ra.

²⁵ Ta cha ndicha catyí chi ndo vatyí cuaha xaan ñu chihí yí chiyó Israel ihya cuiya cha chica noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyó. ²⁶ Soco ña tachi Nyoo chi ra Elías vatyí tyinyee ra chi ni noo ñu chihí yí Israel cuan. Soco tachi Nyoo chi ra nu nyaá noo ñaha chihí yí ñuu Sarepta cha nyaá vatyin ñuu Sidón.

²⁷ Ta tyicuan caa tucu cuaha ra yihí cuehe cha tyahyu coño chi chiyó Israel quívi chica noo ra Eliseo, profeta Nyoo. Soco ña nduvahā ni noo ra Israel cuiya cuan. Minoo ri ra Naamán ra ñuu Siria nduvahā —catyí ra Jesús.

²⁸ Ta cha chiñi ñáyivi nyicú vehe ñuhu cuan tuhun cuan, cuxaan xaan tandihi cuii ñu. ²⁹ Ta nducuita ñu. Ta tiñ ñu chi ra Jesús. Tava ñu chi ra xiñi noo yucu nya yuhu ñuu, vatyí tuchi ñu chi ra yucuan. ³⁰ Soco ra Jesús yahā ri ra mahñu ñu ta cuahan ra.

Noo ra cha yihí tatyí ña vaha chi
(Mr. 1.21-28)

³¹ Ta cuahan ra Jesús Capernaum cha nyaá Galilea quívi nyitatu ñáyivi. Ta quichaha sañaha ra chi ñáyivi. ³² Ta iyo cuñí ñu tuhun cahán ra. Vatyí ñihi cahán ra tari noo ra iyó vaha ityi chi cha cahán.

³³ Ta chichi vehe ñuhu cuan nyaá noo ra cha yihí tatyí ña vaha chi. Ta quichaha canachaa ra, ta catyí ra:

³⁴ —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyí Sehe Nyoo cuví chuun —catyí tatyí ña vaha cuan sacahan chi chi ra cuan.

³⁵ Ta cahan ra Jesús chihin tatyí ña vaha cuan, ta catyí ra:

—Taxi ri. Saña chi ra ndahvi chiña —catyí ra.

Tyicuan ta tatyí ña vaha cuan sanduva chi ra cuan nu ñuhú. Ta quitā tatyí cuan chi ra ta cuahan. Ta ñahri ca sacuvi chi chi ra ndahvi cuan. ³⁶ Tandihi ñáyivi nayuhví ñu. Ta quichaha catyí ñu chi tahan ñu:

—¿Ñáá túhun cuví ihya? Ra Jesús ihya chihin cha iyó ityi chí ra ta chihin tunyee ñni ta tachi ra chí tatyí ña vaha cuan na quita. Ta quichaha chí nu cahán ra —catyí ñu.

³⁷Ta tandihi ri ityi cahán ñáyivi tuhun ra Jesús.

Nu sanduvahá ra Jesús chí maha tyiso ra Simón Pedro

(Mt. 8.14-15; Mr. 1.29-31)

³⁸Ta quita ra Jesús chichi vehe ñuhu cuan. Ta chaá ra vehe ra Simón. Ta tyiso ra Simón cuhvi ña chihin cahni. Ta quichaha cahán ñu chihin ra Jesús cha cuenda ña. ³⁹Ta nanyehé noo ra nu catuví ña. Ta quichaha catyí ra chí cahni cuan vatyi na quita. Ta caa cuhva ri cuan ta quita cahni cuan chí ña. Ta nducuita ri ña. Ta quichaha tyiñuhu ña chí ra.

Cuaha xaan ñu cuhvi sanduvahá ra Jesús
(Mt. 8.16-17; Mr. 1.32-34)

⁴⁰Ta cuhva cha quee ñanyii, tandihi maa ñu cha cumí chí ñu cuhvi tandihi nuu cuhe, chinyacá ñu chí ra Jesús. Ta tyiso ra ndaha ra siqui noo noo ñu. Ta tyicuan caa ta sanduvahá ra chí ñu. ⁴¹Ta chichi cha tandihi ñu yihí ñu cha yihí tatyí ña vaha chí, ta quita chí. Ta suri cana cha chí cuahan coyo chí, ta catyí chí:

—Yoho Sehe Nyoo cuví chuun —catyí chí.

Soco ña chaha ca ra Jesús cha cahan chí. Vatyi chitó chí vatyi ra Cristo, ra cha saquichí Nyoo cuví ra.

Nu cahán ra Jesús tuhun Nyoo nuu tandihi cuí ñáyivi ñu cha iyó Galilea

(Mr. 1.35-39)

⁴²Cundichin cuan ta quita ra Jesús ñu cuan. Ta cuahan ra noo nu taxi ri iyó. Soco ñáyivi nanducú ñu chí ra. Ta chaá ñu nya nu ñohó ra. Ta ña cuñí ñu cha cuhan ra. ⁴³Soco catyí ra Jesús chí ñu:

—Cumañi sacote chí ñáyivi inga ñu tuhun vaha yoso caa nyacá ñaha Nyoo aña ñu. Vatyi yucuan chaha vachi siqui ñuhu ñáyivi.

⁴⁴Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

5

Nu chahá ra Jesús noo nyatu cha ñihi ra cuaha xaan tiyaca

(Mt. 4.18-22; Mr. 1.16-20)

¹Noo quivi nyaá ra Jesús yuhu miñi nu cuví Genesaret. Ta chaá coyo cuaha xaan ñáyivi, vatyi cuñí ñu cuñí ñu tuhun Nyoo. Ta tihin xaan ñohó ra Jesús mahñu ñu. ²Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyi cha quita coyo ra catiñ tiyaca cuan. Ta cha quichaha canacatya ra yuhva ra. ³Yucuan ta quihvi ra Jesús chichi noo canoa cuan. Ta canoa cuan chí ra Simón cuví. Ta catyí ra chí ra vatyi na tyandaha ra suhva ca cuhan nya mahñu ca cuan. Tyicuan ta chicunyaag ra Jesús chichi canoa cuan. Ta quichaha sañaha ra chí ñáyivi. ⁴Cuhva cha ndihí cahan ra, catyí ra chí ra Simón:

—Sacuhun canoa nya nu cama ca ndutya cuan. Ta tuchi ndo yuhva vatyi tiñ ndo tiyaca —catyí ra Jesús chí ra.

⁵Ta nacahan ra Simón ta catyí ra:

—Maestro, cha sahá tyiño xaan ndi ñiyaca maa ta ni noo tiyaca ña ñihí ndi. Soco tatu maun catyi, cuatuchi tucu ndi yuhva —catyí ra Simón.

⁶Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnaya yuhva ra chihin cha vee ti. ⁷Tyicuan ta cachahá ra seña chí ra tahan ra, ra cha canyicú chichi inga canoa cuan, na quichi coyo ra ta tyinyee ra chí ra. Yucuan ta chaá coyo ra cuan. Ta casacutú ra ninduvi canoa cuan chihin tiyaca. Ta nyacua cuñi nyee canoa cuan cha tyitu yihí tiyaca. ⁸Cha nanyehé ra Simón Pedro cha tyicuan caa, ta chicuñi chiti ra nuu ra Jesús. Ta catyí ra chí ra:

—Cuachiyo chuun nui, Sutu Mañi yuhu, vatyi yuhu ra iyó cuatyi cuví —catyí ra.

⁹Vatyi ra Simón iyo xaan cuñi ra chihin tandihi ra canyicu chihin ra. Vatyi cuaha xaan tiyaca catiñ ra. ¹⁰Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chí ra Simón:

—Ma iyo xaan cuñun. Vatyi vityin ta nu cuahan ca chí quivi, ma tiñ con tiyaca. Soco cunducun ñáyivi, tavon chí ñu nu quiñi caa na quihvi ñu cuenda Nyoo —catyí ra Jesús chí ra Simón.

¹¹Yucuan ta casacunuho ra canoa nya ñuhu ityi. Ta casandoq ra tandihi cha iyó chí ra nyacua nya tiyaca cha tiñ ra. Ta cuahan ra chihin ra Jesús.

Nu sanduvahā ra Jesús chi noo ra tyahyu coño

(Mt. 8.1-4; Mr. 1.40-45)

¹² Noo quivi ñohó ra Jesús noo ñuu nu iyo noo ra cuhví. Ta tyahyu xaan coño ra. Ta cha nanyehe ra chi ra Jesús, ta chícuiñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

¹³ Tyicuan ta tyisq ra Jesús ndaha ra siqui ra. Ta catyí ra:

—Cuñí sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvahā ra cuan. ¹⁴ Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuñan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

¹⁵ Vasi ña cuñí ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu iin ri ñu, vatyí cuñí ñu cuñiñi ñu tuhun cahán ra. Ta cuñí xaan ñu nduvaha ñu. ¹⁶ Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chican tahvi ra chi Nyoo.

Nu sanduvahā ra Jesús chi noo ra cuhví cha ña cuví nacanda

(Mt. 9.1-8; Mr. 2.1-12)

¹⁷ Noo quivi sañahá ra Jesús chi ñáyivi. Ta chícunicú suhva ra fariseo, ra quichahá xaan ley vehe ñuhu cha tyaa ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhví. ¹⁸ Yucuan ta chaq coyo ra canyisó chihin noo chito chi noo ra ña cuví nacanda. Ta cuñí ra quihvi ra chichi vehe ta cacun ra chi ra nuu ra Jesús. ¹⁹ Soco ña cuví quihvi ra vatyí tuvi xaan ñáyivi. Tyicuan ta candaq ra itiyi xiñi vehe. Ta sacuachiyó ra suhva tyiyo. Tyicuan ta sanoq ra chi ra cuhví cuan maa maa nuu ra Jesús mahñu nu tuvi ñáyivi cuan. ²⁰ Yucuan cuví nu nyehe ra Jesús vatyí cacinó xaan

iñi ra chi ra. Ta quichaha catyí ra chi ra cuan:

—Xaa, cha chicoq ticahnu iñi tandihi cuatyun —catyí ra Jesús.

²¹ Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyí cuñí maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

²² Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa?

²³⁻²⁴ ¿Ñáá cha yii ca catyí yo? ¿Atu yii ca catyí yo: “Cuatyun cha yahā ndachi”, o yii ca catyí yo chi noo ñáyivi: “Ndícuita ta cacon”? Soco vityin cua sañahi chi ndo vatyí iyó itiyi chii cha sahi ticahnu iñi cuatyí. Vatyí yuhu Rayii cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndícuita. Naquehen chiton ta cuanuhu nya vehun.

²⁵ Ta caa cuhva ri cuan nducuitā ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo. ²⁶ Tandihí ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu canq ra Jesús chi ra Leví
(Mt. 9.9-13; Mr. 2.13-17)

²⁷ Yahā cuan ta quitā ra Jesús vehe cuan. Ta nanyehe ra chí noo ra cha tavá xuhun cuenda gobiernu ñuu Roma. Ta nañi ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Cqho chihin —catyí ra.

²⁸ Tyicuan ta nducuitā ra Leví. Ta sandoo ra tandihí cha iyó chi ra. Ta cuahan ra chata ra Jesús.

²⁹ Tyicuan ta savahā ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi. ³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi.
³²Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chi ñu nyicón chi ra, cusavaha ñu ayuno
(Mt. 9.14-15; Mr. 2.18-20)

³³Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quívi maa chachi ra ta chihi ra. ¿Ñáá tuhun? —catyí ra.

³⁴Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí sií cuñí ñu, ta cuñí ñu cachi ñu. ³⁵Soco cuchia quívi cuachiyo ra tandaha cuan nu nyicú ñu. Yucuan ndicha quívi, ta cusaha ñu ayunar.

Nu sañahá ra Jesús vatyí ña nacachi tahanan tuhun cahnu cha iyó ñáyivi chihin tuhun chaa cha sañahá ra
(Mt. 9.16-17; Mr. 2.21-22)

³⁶Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiýi sahma chaa cuan. Ta siin ri ma cuhva chi chihin sahma chahnu cuan. ³⁷Ta tyicuan caa tucu ma cuví tyihí ñáyivi vinu chaa chichi ñii chahnu. Vatyí cutahnya ñii cuan chihin vinu chaa cuan. Ta tiví vinu cuan ta tiví ñii chahnu cuan ñandihi. ³⁸Yucuan chaha tahán chi tyihí yo vinu chaa chichi ñii chaa. Vatyí tyicuan ta ninduvi ta saha cuenda chi tahanan. ³⁹Ta yori ñu chihí vinu chahnu, ta cuñí ñu coho ñu cha chaa. Vatyí catyí ñu, vaha cha vinu chahnu. Cuñí cha ñu vinu chahnu cuan vatyí ican cuan cuví costum-bre cha iyó maa ñu.

6

Tohon ra cachicá noo chihin ra Jesús yoco trigu quívi nyitatu ñáyivi

(Mt. 12.1-8; Mr. 2.23-28)

¹Noo quívi cha nyitatu ñáyivi, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan. ²Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahán chi sacuvi yo quívi nyitatu yo?

³Ta nacahan ra Jesús, ta catyí ra:

—¿Atu ta sacuahá ca ndo cha sacuví ra David chihin ra tahanan ra quívi cha chisoco ra? ⁴Quihví ra chichi vehe Nyoo. Ta quehen ra pan cha chacun ñáyivi nuu Nyoo. Ta chachí ra. Ta chaha ra chi ra candihí chihin ra. Ta maa ri maa tata sutu tahán chi cachi pan cuan —catyí ra Jesús.

⁵Yucuan ta catyí tucu ra Jesús:

—Yuhu cuví Rayii cha quichí nya gloria. Ta iyó ityí chii vatyí catyí chi noo noo ndo ñáá cha sacuvi ndo quívi nyitatu yo —catyí ra.

Nu sanduvahá ra Jesús chi noo ra cha ityí ndaha

(Mt. 12.9-14; Mr. 3.1-6)

⁶Inga quívi cha nyitatu ñáyivi, quihví ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyehé ra chi noo ra cha na ityí chiyo ndaha vaha. ⁷Ta ra casacuaha cuenda ley chihin ra fariseo, canducú nyehé ra chi ra Jesús, tatu sanduvaha ra chi ra cuhví cuan quívi nyitatu ñu. Tyicuan caa ta cuví tyaa ra cuatyí siquí ra. ⁸Soco ra Jesús chitó ra tuhun chicá xiñi ra. Ta catyí ra chi ra cha ityí ndaha cuan:

—Nducuita. Ta cuinanyaun mahñu ihya.

Tyicuan ta ra cha ityí ndaha cuan nducuita ra. Ta chicunanyaa ra mahñu. ⁹Tyicuan ta catyí ra Jesús chi ra canyicú cuan:

—Cua nducu tuhín noo tuhun chi ndo. ¿Yoso caa cuhva tahán chi cha sacuvi yo quívi nyitatu yo? ¿Atu tahán chi vatyí sacuvi yo cha vaha, o cha ña vaha? ¿Atu tahán chi vatyí sacacu yo chi ñáyivi, o cha cahñi ndihí yo chi ñu?

¹⁰Tyicuan ta ra Jesús nanyehé ra chi noo noo ra canyicú cuan. Ta quichaha catyí ra chi ra cuhví cuan:

—Sgnacaa ndahun.

Tyicuan ta ra cuhví cuan sanacaꝯ ra ndaha ra. Ta nduvahꝯ ndaha ra. ¹¹ Soco suhva ra canyicú cuan, cuxaan xaan ra. Ta quichahꝯ candaca tuhun ra chi ra tahan ra: —¿Yoso caa sacuví yo tacuhva cha ma cuvi ca cahan ra Jesús nuu ñáyivi? —catyí ra.

Nacachí ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Quívi cuan ndaa ra Jesús noo yucu. Ta ñiyaca maa chicán tahvi ra chi Nyoo. ¹³ Cuhva cha cundichin, canꝯ ra chi tandihí ri ñu nyicón chi ra. Ta nacachí ra uchi uvi tahan ri ra. Ta sacunañi ra chi ra, apóstol ra, ta cuñí chi catyí, ra caca tyiño nuu ra. ¹⁴ Ta ihya nyaá sivi ndi uchi uvi tahan ra: Ra Simón ra cha sacunañi ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé, ¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñí cahun cuatyí siquí gobiernu ñuu Roma cha nyacá ñaha chi ñu. ¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chi ra Jesús.

Nu sañahá ra Jesús chi cuaha xaan ñáyivi
(Mt. 4.23-25)

¹⁷ Noꝯ ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihí ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta chaꝯ ñáyivi cuan vatyí cuñi ñu tuhun cahán ra Jesús. Ta tandihí ñu cuhví cuñí ñu vatyí sanduvaha ra chi ñu. ¹⁸ Ta tandihí ñu cha yihí tatyí ña vaha chi, nduvahꝯ ñu saha ra. ¹⁹ Ta tandihí ñu cuñí ñu tiin ñu chi ra. Vatyí nduvaha ñu chihin tunyee iñi Nyoo, vasi tacuhva tiin ri ñu chi ra.

Ñu ñihí tumañi iñi, ta ñu ña ñihí tumañi iñi
(Mt. 5.1-12)

²⁰ Tyicuan ta nanyehꝯ ra Jesús chi ra cacticá noo chihin ra. Ta quichahꝯ catyí ra chi ra:

—Tandihí nyoho cha ndahvi ndo, sií xaan cuví chi ndo, vatyí tahan chi cha cunyaca ñaha Nyoo añima ndo.

²¹ Tandihí nyoho cha chisocó ndo vityin, sií xaan cuví chi ndo. Vatyí coo quívi cha ma nyehe ca ndo soco. Tandihí nyoho cha

chacú chaa ndo cha cuihya iñi ndo, sií xaan cuví chi ndo vatyí coo quívi ta ñahri ca tucuihya iñi coo chi ndo. Ta cuacu ndo chihin cha sií cuñi ndo.

²² Sií xaan cucuvi chi ndo, quívi cha tasi cuñí ñáyivi nyehé ñu chi ndo, quívi tavá ñehe ñu chi ndo nu nyaá ñu, quívi cahán ñu chi ndo, quívi catyí ñu vatyí ñáyivi ña vaha cuví ndo vatyí chinó iñi ndo chi yuhu Rayii cha quichi nya gloria. ²³ Sií xaan cucuvi chi ndo quívi nyehe ndo tindoho cuan vatyí tyicuan caa tucu sacuvi ñáyivi ta cha naha. Cahán vavaha ñu chi ra cacuvi profeta Nyoo. Caña ndava ndo chihin cha sií cuñí ndo. Vatyí cahnú xaan cha cucuhva Nyoo chi ndo gloria.

²⁴ Soco ndahvi nyoho, ñu tyayii. Vatyí vityin sií xaan cuñí ndo chihin tandihí cha tyayii ndo. Soco coo quívi maa maa ri tundoho cunyehe ndo. Vatyí ñahri cuñihi ndo nuu Nyoo.

²⁵ Ta ndahvi nyoho cha cuñí maa ndo vatyí ñahri cumañí chi ndo cha vityin, vatyí coo quívi cunyehe ndo soco. Nyoho cha sií cuñí ndo cha vityin, ndahvi nyoho vatyí coo quívi cunyehe ndo tucuihya iñi. Ta cuacu chaa ndo. ²⁶ Ta ndahvi nyoho vatyí vaha cahán ñáyivi siquí ndo. Vatyí tyicuan caa tucu ñáyivi ta cha naha, vaha xaan cahán ñu siquí ra cha cahán cha ña ndicha.

Cuñi ndo chi ñu xaan iñi chi ndo
(Mt. 5.38-48; 7.12)

²⁷ Tandihí nyoho cha chiñí ndo tuhun cahín, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo. ²⁸ Cahán ndo cha vaha chihin ñu cha cahán ña vaha siquí ndo. Cacan tahvi ndo chaha ñu cahán chi ndo. ²⁹ Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa cha-queta ñihno ndo, cuhva ndihí ndo camiseta ndo. ³⁰ Cuhva ndo ñáá ndihí cha chicán ñu chi ndo. Tatu tinyaa ñu ñáá cha iyó chi ndo, ma ndacan ndo chi ñu. ³¹ Tari cuhva cuñí ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² Tatu cuñí ndo chi maa ri maa ñu cha cuñí chi ndo, ñahri cha vaha xaan sacuví ndo. Vatyí tyicuan caa nyacuví tucu ñu quiñi iyó, cuñí ñu chi ñáyivi ñohó nuu ri ñu. ³³ O tatu sacuví ndo cha vaha chihin ñu cha sacuví cha vaha chihin ndo, ñahri cha

vaha xaan nyacuví ndo. Vatyí tyicuan caa nyacuví tucu ñu quiñi iyó. ³⁴O tatu sacuví ndo tumañi iñi chi noo ñáyivi, ta yihí iñi ndo vatyí cusacuví tucu ñu cuan tumañi iñi chi ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáá noo tumañi iñi sacuví ñu chi tahan ñu, nyatú ñu cha nacuhva tucu ñu cuan tumañi iñi chi ñu. ³⁵Soco nyoho, cuñi ndo chi ñu xaan iñi chi ndo. Ta sacuví ndo cha vaha chi ñu. Ta cùhva noo ndo chi ñu. Soco ma cuatu ndo ñáá tumañi iñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó. ³⁶Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

Ma cahan yo cha caa inga tahan yo
(Mt. 7.1-5)

³⁷Ma cahan ndo cha caá tahan ndo, tyicuan ta Nyoo ma tiin cuenda ra cha caá maa ndo. Ma soco ndo chi ñáyivi cha cahun ñu anyaya, tyicuan ta ma sacuhun Nyoo chi ndo anyaya. Saha ndo tucahnu iñi chi ñáyivi. Ta Nyoo cusaha ra tucahnu iñi chi maa ndo. ³⁸Cùhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáá cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyí tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹Ta chahá ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chi nonga ra cuaa. Vatyí ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo, vasi cuñi ra, soco ma cuví sañaha ra ityi Nyoo chi nonga ra. ⁴⁰Ni noo ra cuatyaa sicuela ma cuví coto ra cha chitó ra cha sañaha chi ra. Vatyí nicaa ni quichaha sacuaaha ra. Coto ra soco nya ndihi sacuaaha ra.

⁴¹¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahun cuenda cuatyí cahnu cha iyó chuun cha cuví tari vitu cahnu cha yihí nuu maun? ⁴²Tatu chiti nuu maun yihí

noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu

(Mt. 7.17-20; 12.34-35)

⁴³Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. ⁴⁴Tandihi yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi. ⁴⁵Ta tyicuan caa tandihi ñáyivi vaha, tuhun vaha cahán ñu. Vatyí yihí cha vaha añima ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha caquiñi añima ñu. Chihin yuhu ñu cahán ñu tandihi cha quiñi caa cha quitá añima ñu.

Cacu añima ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuví ndo tari cuhva cha catyí chi ndo?

⁴⁷Ihya cua catyí chi ndo yóó chi ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí.

⁴⁸Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta síquí yuu cuan savahá ra vehe ra. Ta quivi coon xaan savi, ta cama xaan ndutya yahá, ta ña nduva vehe cuan vatyí síquí yuu nanyaá chi. ⁴⁹Soco ñu cha chiñi tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quihi chaha vehe ra. Ta ñima nu yuu savahá ra vehe ra. Ta chaa quivi cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuví ñu, ma cacu ñu) —catyí ra Jesús.

7

Nu sanduvahā ra Jesús noo musu capitán sindaro
(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum. ² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cúvi ra. ³ Quiví cha chitó capitán cuan tuhun ra Jesús, tachi ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra. ⁴⁻⁵ Tyicuan ta chaā coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savahā ra noo vehe ñuhu yo. Ta tahán chi vatyí tyinyeun chi ra. Vatyí cuhví xaan noo musu ra. Ta cuñí ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca chaā ra nya vehe capitán cuan, capitán cuan tachi ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña ñaña ra cha cuhun, na. ⁷ Yucuan chaha ña caña iñi ra quichi ra nu nyaún. ¿Atu ma sahun noo tumañi iñi chi ra vatyí noo tuhun cahan run ihya ri, ta nduvaha ri musu ra, na? ⁸ Vatyí maa ra capitán cuví ra. Ta nyacá ñaha rey chi ra. Ta maa ra nyacá ñaha ra chi ra cuatyí ca cha nuu ra. Tatu tava ra tyiño chi noo ra cuatyí cuan, na cuhun ra. Cuhun ra. O tatu catyí ra chi nonga ra na quichi ra, quichi ra. O tatu tachi ra chi inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chi ra Jesús.

⁹ Cha chiñi ra Jesús cha catyí ra cuan ta iyo xaan cuñí ra. Ta nanyehē ra chi ñáyivi cha nyicú chihin ra, ta catyí ra:

—Ndicha ndicha cuí vatyí chinó xaan iñi capitán cuan. Ta nañihi que chi ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaā coyo ra nya vehe, ta nanyehē ra vatyí cha nduvahā musu cuan.

Nu sanandotō ra Jesús chi sehe noo ñaha ndahvi chihí yii

¹¹ Cha yahā tuhun cuan ta cuahan ra Jesús noo ñuu cha nañí Naín. Ta cuahan tucu ra cachicá noo chihin ra, ta cuaha xaan ñáyivi ñandihi. ¹² Tyicuan ta cuhva cha cua chaā ra yatyin ñuu cuan, nanyehē ra cuaha ñáyivi quitá coyo ñuu cuan. Ta canyisó ñu noo ndiyi, cuacuchi ñu sehe noo ñaha ndahvi cha chihí yii. Ta noo tuhun ri maa ra iyó chi ña, ta chihí ra. ¹³ Ta cha nanyehē ra Jesús chi ña, ta cundahvi cuñí nyehe ra chi ña. Ta quichahā catyí ra chi ña:

—Ma cuacun.

¹⁴ Tyicuan ta tuhva ra ta tiñ ra chatun cha yihí ndiyi cuan. Tyicuan ta ra canyisó chi ndiyi cuan chicutayucu ra. Ta catyí ra Jesús chi ndiyi cuan:

—Ndicuita, ra cuehe —catyí ra.

¹⁵ Tyicuan ta ndicuitā ndiyi cuan. Ta nicunyaā ra. Tyicuan ta quichaha cahan ra. Ta ra Jesús nacuhva cuenda ra chi ra chi sihi ra. ¹⁶ Cha nanyehē ñu cha tyicuan caa ta yuhvi xaan ñu cuví. Ta quichaha sacahnu ñu chi Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chi yo —catyí ñu.

¹⁷ Ta tandihí maa ñáyivi ñicahnu ityi Judea, chitó ñu cha sacuví ra Jesús.

Nu tachi ra Juan uvi tahan ra chicá noo chihin ra nu nyaá ra Jesús

(Mt. 11.2-19)

¹⁸ Ta ra cachicá noo chihin ra Juan nacatyí ra tuhun cha sacuví ra Jesús. Tyicuan ta canā ra Juan chi uvi tahan ra. ¹⁹ Ta tachi ra chi ra nu nyaá ra Jesús, vatyí cundaca tuhun ra chi ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra. ²⁰ Tyicuan ta ra cha tachi ra Juan, cuahan coyo ra. Ta chaā ra nu nyaá ra Jesús. Ta quichaha catyí ra:

—Ra Juan, ra sacondutyá, tachi ra chi ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chi inga ra —catyí ra.

²¹ Ta cuhva cha canyicú ra tachí ra Juan cuan, ra Jesús sanduvahá ra cuaha xaan ñu cuhví, ta cuaha xaan ñu yihí tatyí ña vaha chi. Ta sananyehé ra chi ñu cuaa. ²² Tyicuan ta catyí ra Jesús chi ra tachí ra Juan:

—Cuahan ndo. Ta nacatyí ndo chi ra Juan tandihí cha nyehé ndo, ta tandihí cha chiñi ndo. Ta catyí ndo chi ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa naciñi ra soho, yoso caa nandotó ndiyi, yoso caa cahín tuhun Nyoo chihin ñu ndahivi yoso caa sacacú ra añima ñu. Ta catyí tucu ndo chi ra vatyi ²³ siñ xaan cuví chi ñu ña chicá uvi iñi nyicón chii —catyí ra Jesús chi ra.

²⁴ Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyí ra:

—¿Ñáá cha chahan ndo chinyehe ndo quivi chahan ndo chiqui ndii cuan? ¿Atu chahan ndo chinyehe ndo noo ndoo cha naquisi tatyí? ²⁵ ¿O noo ra cha ñihnó sahma vaha chinyehe ndo vaha? Ñima. Vatyi chitó ndo vatyi ra ñihnó sahma vaha iyó vaha ra ñáyivi ta iyó ra vehe rey. ²⁶ ¿Atu ña chinyehe ndo chi noo profeta Nyoo? Ican. Ta cahnu ca ra cuví ra ican saha noo profeta. ²⁷ Ican tuhun ra Juan nyaá nuu tutu cha tyaa ra Isaías ta cha naha. Ta catyí Nyoo tuhun ra tyehe caa:

Yuhu tachí chi noo ra cahan tuhin ityi nuu nu cuahun.

Vatyi cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

²⁸ Ta catyí chi ndo vatyi chichi cha tandihí ra cha cacú, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyí ra Jesús.

²⁹ Cha chiñi ñu tuhun ihya, tandihí ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyi cuhva sacuví Nyoo vaha xaan. ³⁰ Soco tandihí ra fariseo chihin ra sacuahá cuenda ley vehe ñuhu, maa ra cuví ra ña cuñí cha sacondutyá ra Juan chi ra, vatyi ña cuñí ra quehen ra cha chahá Nyoo. ³¹ Ta catyí ra Jesús:

—¿Ñáá chihin sandu inuu ri chi nyoho, ñu iyó quivi ihya? ¿Yóó cha tari caa caá ndo? ³² Tari ra cuatyaa cuví nyoho. Vatyi ra cuatyaa nyasiquí ndotyin nuyahvi. Ta caná chaa ndotyin chi tahan ndotyin, ta catyí ndotyin: “Tivi ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahán iñi ndo. ³³ Vatyi ra Juan ra sacondutyá, quichi ra ta ña chachí vaha ra. Ta ña chihí ra vinu. Ta nyoho catyí ndo vatyi tatyí ña vaha yihí chi ra. ³⁴ Ta quichi tucu yuhu Rayii cha quichi nya gloria. Ta chachí ta chihí. Ta nyoho catyí ndo vatyi ra cuahyi cuví ta cuví noo ra tuhvá chihí. Ta ña tahán iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo, ³⁵ soco catyí chi ndo vatyi cha chiñi tuñi Nyoo, chahá ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyi vaha cha chiñi tuñi Nyoo —catyí ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañi Simón nacatyí tuhun ra chi ra Jesús noo vico vehe ra. Ta chaa ra Jesús vehe ra, ta chicunyaa ra mesa.

³⁷ Tyicuan ta noo ñaha cata iñi ñuu cuan chitó ña vatyi nyaá ra Jesús yucuan. Ta chaa ña chihin noo yutyi alabastro tyitu yihí ndutya vixi chahán. ³⁸ Ta chicunyaa ña yatyin ri chaha ra. Ta quichaha chacu chaa ña vatyi ndu uvi iñi ña cuatyí ña. Ta quitá ndutya nuu ña. Ta chihin ndutya nuu ña nacatya ña chaha ra. Yahá cuan ta sana ityi ña chaha ra chihin ixi xiñi ña. Ta tyayuhu ña chaha ra. Tyicuan ta choso ña ndutya vixi chahán cuan siqui chaha ra. ³⁹ Cuhva cha nyehé ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóó ñaha tiñ chaha ra, vatyi ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyí ra chi ra fariseo cuan:

—Yoho Simón, iyó noo tuhun cua catyí chuun —catyí ra chi ra.

Tyicuan ta nacahan ra Simón:

—Vaha, catyí chii, Maestro —catyí ra.

⁴¹ Ta quichaha catyí ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan

yosiycá ra ohon cientu denario. Ta nonga ra yosiycá ra uvi xico uchi ri denario (tari ohon cientu ri pesu). ⁴²Ta ninduvi tahan ra ña cuví tyiyahví ra. Ta ra tuhvá chahá noo cuan, sahá ra ticahnu iñi chi ninduvi tahan ra. Ta vityin catyi chii, yoho Simón ¿nya ra cua cuñi ca chi ra cha chahá noo cuan? —catyí ra Jesús.

⁴³Tyicuan ta nacahan ra Simón, ta catyí ra:

—Ra cha cuaha ca sahá ra tucahnu iñi chi —catyí ra.

Tyicuan ta catyí ra Jesús:

—Ndicha cha cahún.

⁴⁴Tyicuan ta nanyehé ra Jesús chi ñaha sihi cuan, ta catyí ra chi ra Simón:

—¿Nyhún chi ñaha ihya? Yuhu quihví chichi vehun. Ta ña chahún ndutya cha ndoo chahi tari cuhva costumbre cha iyó chi yo. Ta ñaha ihya nacatya ña chahi chihin ndutya nuu ña. Ta yahá cuan, ta sana ityi ña chihin ixi xiñi ña. ⁴⁵Yoho ña tyayuhún ndahi, tari costumbre cha iyó chi yo, soco maa ña nyacua nya cuhva cha quihví ihya ta ña sandihí ña cha tyayuhú ña chahi. ⁴⁶Ta yoho ña tyihún aceitye xiñi, soco ñaha ihya tyihí ña ndutya vixi chahán chahi. ⁴⁷Ta catyí chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñi xaan ña chii. Ta ñu sahí tucahnu iñi chiin ri cuatyí, chiin ri cuñi ñu chii —catyí ra Jesús.

⁴⁸Tyicuan ta quichaha catyí ra Jesús chi ña:

—Cuatyun cha yahá sandachi. Vatyí cha sahá Nyoo ticahnu iñi chuun —catyí ra chi ña.

⁴⁹Tyicuan ta ra nyicú chihin ra quichaha ndichí xiñi ra: “¿Yóó ra cuví ra ihya? Vatyí sahá ra tucahnu iñi cuatyí ñáyivi.”

⁵⁰Tyicuan ta quichaha catyí ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyí ra chi ña.

8

Ñusihi cha tyinyeé chi ra Jesús

¹Cha yahá tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi

uchi uvi tahan apóstol, ra cha tyatyíño ra chi, cuahan coyo ra chihin ra. ²Ta cuahan coyo tucu suhva ñusihi cha sanduvahá ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvahá ña. ³Ta cuahan tucu cu Juana ñasihi ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáá cha iyó chi ñu.

Nu sañahá ra Jesús vatyí tari noo ra chicá noo tachí, tyicuan caa cuví ra cahán tuhun Nyoo (Mt. 13.1-9; Mr. 4.1-9)

⁴Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyí ra chi ñu chihin noo cuhva:

⁵—Quitá noo ra vehe ra. Ta cuahan ra nu iyó tyiño sahá ra, vatyí cua quití ra chiti trigu nu ñuhú ra. Ta cuhva cha quití ra canacoyo suhva chiti cuan yuhu ityi. Ta chañi ñáyivi siqui. Ta quichí saa ta chachí ti. ⁶Ta suhva ca chiti cuan canacoyo ticu yuu. Cañá chiti cuan. Soco na ityi ri vatyí chiin xaan ñuhu yihí chaha. Ta siin ri ña cachin. ⁷Ta suhva ca chiti canacoyo chichi chiti iñu, soco quiví cañá tun iin ri, tu iñu cuan chahñi chi tun. ⁸Soco suhva ca chiti canacoyo nu ñuhú vaha ta quiví chahnu tun, vaha xaan chahá tun chiti. Vatyí noo ri chiti cuan, cientu chiti quitá chihin —catyí ra Jesús.

Ta cha yahá catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáá cuenda sañahá ra chihin cuhva ri (Mt. 13.10-17; Mr. 4.10-12)

⁹Yahá cuan ta ra cacticá noo chihin ra, ndacá tuhun ra chi ra ñáá cha cuñi chi catyí tuhun cha nacatyí ra chi ñáyivi. ¹⁰Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihí ca ñu cuan, cuhva ri chahí chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñi ñu soco ma cutuñi iñi ñu ñáá tuhun cuví.

Nu sacotó ra Jesús ñáá cha cuñí chi catyí tuhun ra tachí cuan

(Mt. 13.18-23; Mr. 4.13-20)

¹¹Cuhva cha catyí chi ndo, cuñí chi catyí tyehe caa: chiti cuan tari tuhun Nyoo cuví. ¹²Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichí cuhna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu. ¹³Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta si xaan cuví chi ñu suhva ri quivi. Soco vatyi ña yihí vaha yoho ñu, suhva ri quivi chingo iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu. ¹⁴Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuñí ñu sacuvi ñu tari cuhva chiñi ñu. Vatyi yihí ñu, nyaá ca xiñi ñu tuhun tindoho ican saha tuhun Nyoo. Ta nonga ñu nyiyo ca iñi ñu cha tyayí. Ta nonga tucu ñu si ca cuñí ñu chica noo yanga ri ñu. Ta tari cha ña chicoo chiti nuu ñu cuví cuan. ¹⁵Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha añaima ñu vatyi chinó iñi ñu chihin tandihi añaima ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuví ñu tandihi tuhun cahán ra.

Ma tyihi xehe yo ñuhú cha sandundichin Nyoo añaima yo coto tinyaa ra

(Mr. 4.21-25)

¹⁶Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin. ¹⁷Vatyi ñahri noo cha ñohó xehe, ta cuñún, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo. ¹⁸Yucuan chaha tyasoho ndo tuhun cahín. Vatyi tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihi maa chi ndo nyacua nya cha chiin ri cha cuñí maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹Tyicuan ta chaá sihi ra Jesús chihin yañi ra nu nyaá ra. Soco ña cuví chaa ñu vatyi tuví xaan ñáyivi. ²⁰Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñí ñu cahan ñu chuhun.

²¹Tyicuan ta nacahan ra Jesús, ta catyí ra: —Tandihí maa ñáyivi cha chiñi ta sacuví tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyi ñihi vavaha nu miñi

(Mt. 8.23-27; Mr. 4.35-41)

²²Cuví chi noo quivi cuan quihvi ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan. ²³Ta cha ni ri ca cha cuahan ra mahñu miñi cuan, tiñ ñumahna chi ra Jesús. Tyicuan ta sana iñi ra ta chaá noo tatyi ñihi vavaha. Ta quichaha tyihi chi ndutya chichi canoa cuan. Ta quichaha cuñi nyee canoa cuan vatyi cama xaan ndutya quihvi. ²⁴Tyicuan ta casandoyo ra chi ra Jesús. Ta quichaha catyí ra:

—¡Maestro! ¡Maestro! Cha cuñi nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyi cuan ta chi ndutya cuan, na cutaxin chi. Ta cutaxin ri. ²⁵Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyi yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñi ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyi nyacua nya tatyi ta ndutya ta quichahá tuhun cahán ra.

Nu nduvahá noo ra yihí tatyi ña vaha ñuu Gadara

(Mt. 8.28-34; Mr. 5.1-20)

²⁶Tyicuan ta chaá coyo ra ityi Gadara cha nyaá inga chiyo miñi ityi nuu Galilea.

²⁷Ta quita ra chichi canoa cuan. Ta yucuan chaá noo ra cha quichi noo ñuu ityi cuan chisatahan ra chi ra. Ta yihí tatyi ña vaha chi ra. Ta cha naha xaan ña ñihno maa ra sahna. Ni ri ña iyó ra vehe ra. Chicá noo ri maa ra nu ñaña calavari cuan. ²⁸⁻²⁹Ta tuhvá tatyi ña vaha cuan naquiqui chi ra.

Ta yucuan chaha chahñi ñu ndaha ra ta chaha ra chihin cadena. Soco tatyí ña vaha cuan chahá fuerza chi ra cha cahnya ra. Ta sacono chi chi ra. Ta chinyacá chi chi ra noo nu yori maa ñáyivi iyó. Ta cuhva cha nyehe ra chi ra Jesús, chicuiñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyi ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyi ra Jesús tachi ra chi tatyí ña vaha cuan, na quita chi ra ndahvi cuan. ³⁰Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyi cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra. ³¹Tyicuan ta tatyí ña vaha cuan catyí chi ra Jesús vatyi ma tuchi ra chi chi nu tindoho nu ma cuvi maa quita chi. ³²Ta chicán tatyí ña vaha cuan chi ra Jesús nacuhva ra caquihvi chi chichi quini cha canycú yuhu miñi cuan. Tyicuan ta chaha ra Jesús permiso cha caquihvi chi chichi quini cuan. ³³Ta quita tatyí ña vaha cuan chi ra ndahvi cuan. Ta caquihvi chi chichi quini cuan. Tyicuan ta cachino quini cuan. Ta yatyi cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihi ti chihin ndutya cuan.

³⁴Tyicuan ta ra casahá cumi chi quini cuan, yuhvi xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan. ³⁵Tyicuan ta chaá coyo ñáyivi cua nyehe ñu ñáá cha cuvi cuan. Tyicuan ta chaá ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihno ra sahma ra. Ta vaha cuñi ra. Ta yuhvi xaan ñu cuvi. ³⁶Tyicuan ta tandihí ñu cha nyehe cha cuvi cuan, nacatyí ñu chi tandihí ca ñáyivi yoso caa quita tatyí ña vaha chi ra ndahvi cuan, ta nduvahá ra. ³⁷⁻³⁹Yucuan ta tandihí ñáyivi ityi Gadara cuan quichaha catyí ñu chi ra Jesús na cunuhu ra ityi nu quichi ra. Vatyi yuhvi xaan ñu chihin cha sacuvi ra

chihin tatyí ña vaha cuan. Tyicuan ta ra cha quita tatyí ña vaha cuan chi, catyí ra chi ra Jesús, na cuhva ra cha cuhun ra chihin ra. Soco catyí ra Jesús chi ra:

—Cuñuhu nya vehun. Ta nacuhva cuendon chi ñáyivi chuun ñáá cha sacuvi Nyoo chuhun —catyí ra.

Yucuan ta ra Jesús nandihvi ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahvi cha nduvaha cuan, cuanuhu ra nya ñuu ra. Ta ityi cuahan ra nacatyí ra chi tandihí ñáyivi ñuu cuan yoso caa sanduvahá ra Jesús chi ra.

Nu nduvahá sehe ra Jairo ta ñaha sihi cha tiñ sahma ra Jesús

(Mt. 9.18-26; Mr. 5.21-43)

⁴⁰Quivi cha nachaa ra Jesús cha chahan ra inga chiyo miñi cuan, cuaha xaan ñáyivi nyatú ñu chi ra. Ta sii xaan cuñi ñu vatyi nachaa ra. ⁴¹Tyicuan ta chaá noo ra cha nañi Jairo, ra cuvi nuu vehe ñuhu, ta chicuiñi chiti ra nuu ra. Ta quichaha chachu ndahvi ra nuu ra, na cuhun ra vehe ra. ⁴²Vatyi iyó noo tuhun ri sehe ra, ta iyó uchi uvi cuiya ña. Ta cha cuñi cuvi ña chihin cuehe. Ta cuahan ra Jesús vehe ra. Ta cuaha xaan ñáyivi cuahan chihin ra Jesús, ta tihin xaan cuahan ra mahñu ñu. ⁴³Ta chihin ñáyivi cuan cuahan noo ñaha cuhvi. Cha iyó uchi uvi cuiya ndoho ña noo cuehe niñi. Ta cha ndihí maa xuhun ña sanaa ña, ta ña nduvahá ña. ⁴⁴Soco chaá ña nu nyaá ra Jesús ityi chata ra. Ta tiñ ña sahma ra. Ta caa cuhva ri cuan, ta chicunyasi cha chati niñi ña.

⁴⁵Tyicuan ta quichaha catyí ra Jesús:

—¿Yóó cha tiñ sahme?

Ta tandihí ñu cuahan chihin ñu catyí ra: —Yori.

Ta catyí ra Pedro ta ra tahan ra chi ra Jesús:

—Maestro, cuaha xaan ñáyivi cuahan chuhun, ta tihin xaan cuahan. Ta suri maa ñu tyandahá ñu chuun. Ta ndacá tuhun con “¿Yóó cha tiñ sahme?” —catyí ra.

⁴⁶Soco ra Jesús catyí ra:

—Chitó mai vatyi iyó noo cha tiñ sahme. Vatyi tuvi iñi cuahan suhva tunyee iñi cha iyó chii —catyí ra.

⁴⁷Tyicuan ta ñaha sihi cuan nyehe ña vatyi cha chitó ra. Ta quichaha niñi ña chihin cha yuhvi ña. Ta chicuiñi chiti ña nuu ra. Ta quichaha nacatyí ña chi ra

ñáá tuhun cha tñjn ña sahma ra, ta yoso caa nduvaha ña caa cuhva ri cuan. Ta chini tandihi ñáyivi cuan cha nacatyí ña.
⁴⁸Yucuan ta catyí ra Jesús chi ña:

—Yoho sihi, cha nduvahun vatyí chinó iñun chii. Cuahan chihin cha vaha —catyí ra.

⁴⁹Ni cahan ca ra Jesús tuhun ihya, ta chaa noo ra quita vehe ra cuví nuu vehe ñuhu cuan. Ta quichaha catyí ra chi ra Jairo cuan:

—Sehun cha yaha chihí ña. Ma sayanga con chi Ra Sacuaha chiña —catyí ra.

⁵⁰Soco cha chiniñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹Ta cuhva cha chaa ra Jesús vehe ra Jairo, ña chaha ra quihvi ñáyivi chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasihi ra, quihvi ñu chichi vehe cuan nu catuví cuehe luhlu cha chihí cuan. ⁵²Ta tandihi ñu chacú chaa ñu cha cuenda vatyí chihí cue. Soco ra Jesús catyí ra chi ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³Soco chacú nyaa ñu tuhun cahan ra. Ta ña chinó iñi ñu. Vatyí chitó ñu tyi cha chihí cue. ⁵⁴Tyicuan ta tñjn ra Jesús ndaha cue. Ta ñihi cahan ra ta catyí ra chi cue:

—Ndücüita, cuehe luhlu —catyí ra.

⁵⁵Tyicuan ta nandoto cue. Ta caa cuhva ri cuan ndücüita cue. Ta quichaha catyí ra Jesús:

—Cuhva ndo cha cachi cue.

⁵⁶Ta sutu cue ta sihi cue, iyo xaan cuñí ñu. Soco catyí ra Jesús chi ñu vatyí yori maa chihin cahan ñu tuhun cha cuví cuan.

9

Nu tachí ra Jesús ndi uchi uvi tahan ra cacticá noo chihin ra vatyí cuahan ra tuhun Nyoo

(Mt. 10.5-15; Mr. 6.7-13)

¹Sandu iin ri ra Jesús ndi uchi uvi tahan ra cacticá noo chihin ra. Ta chaha ra tunyee iñi chi ra vatyí cuví tava ra tatyí ña vaha, ta cuví sanduvaha ra chi ñu cuhví.

²Ta tachí ra tyiño chi ra vatyí na sanduvaha ra chi ñu cuhví, ta cahan ra tuhun Nyoo yoso caa nyacá ñaha ra añima ñáyivi.

³Ta catyí ra chi tandihi ra cuan:

—Ñahri cha cuison ndo ityi cuhun ndo, ni yutun ma tuvi ndo. Ni yitin, ta ni ri cha

cachi ndo ta ma cuison ndo. Ta ni ri xuhun ta ma cuison ndo. Tacuhva ñihnó ri ndo cūhun ndo. ⁴Ta savaha ri vehe cha chaa ndo, cūnyaa ndo yucuan nyacua nya cha chaa quivi cha cūhun ndo inga ñuu. ⁵Ta nu ña cuñí ñu cuiñí ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuvi chi tari minoo seña chi ñu, vatyí ña cuñí ñu tyasoho ñu tuhun Nyoo —catyí ra Jesús chi tandihi ra cuan.

⁶Tyicuan ta cuahan coyo ra tandihi cuii maa ñuu. Ta cahan ra tuhun vaha Nyoo ta yoso caa cuñí chi ta cacu ñu. Ta sanduvaha ra chi ñu cuhvi.

Nu cuñí ra Herodes coto ra yóo ra chicá noo cahan tuhun Nyoo ta sanduvahá chi ñáyivi
 (Mt. 14.1-12; Mr. 6.14-29)

⁷Ra Herodes ra cuví ra nyacá ñaha nicahnu ityi Galilea, ñihí ra tuhun cha sacuví ra Jesús. Ta ña ñihí vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto. ⁸Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto. ⁹Soco catyí ra Herodes:

—Maa mai tyihí tyiño chichanya sucun ra Juan. ¿Tu tyicuan caa, yóo ra chiñí xain tuhun ihya? —catyí ra.

Ta ra Herodes cuan nducú xaan ra cuhva yoso caa nehe ra chi ra cha chicá noo cuan.

Nu chaha ra Jesús cha cachi ohon mil rayii
 (Mt. 14.13-21; Mr. 6.30-44; Jn. 6.1-14)

¹⁰Ta cuhva cha nachaa coyo ra chicá tyiño nuu ra Jesús, canacatyí ra chi ra Jesús tandihi cuii maa cha cuví nu chahan coyo ra. Tyicuan ta tava siin ra Jesús chi ra ta cuahan coyo ra yatyn ri noo ñuu cha nañí Betsaida. ¹¹Soco cuhva cha ñihí ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvaha ra chi ñu cuhvi.

¹²Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chi ra:

—Catyí chi ñáyivi ihya na cunuhu ñu cunyitatu ñu, ta na conducu ñu noo cha cachi ñu noo ñuu cha nyaá yatyn ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chi ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chícá noo chihin ra chi ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihi ñáyivi ihya. Ni ri cusata ndi soco ma ñihi —catyí ra.

¹⁴ Vatyí ohon mil rayii nyicú yucuan. (Ta siin ri nyicú ñusihi chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyivi cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihi ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehé ndaa ra andivi, ta nacuhva ra tyahvi nyoo chi Nyoo. Tyicuan ta tahvi sava ra pan ta tiyaca cuan. Ta chahá ra chi ra cachicá noo chihin ra na casacha ra chi ñáyivi. ¹⁷ Tyicuan ta tandihi ñu chachi ñu. Ta chitu chichi ñu. Yahá cuan ta ndoo ca yiquin ta sacutu ra uchi uvi tahan tica chihin yiquin cuan.

Nu catyí ra Pedro tyi ra Jesús cuví ra Cristo, ra sacacú chi yo

(Mt. 16.13-19; Mr. 8.27-29)

¹⁸ Noo quivi quitá siin ra Jesús chihin ra cachicá noo chihin ra. Ta quichaha chicán tahvi ra chi Nyoo. Ta nu ndihi chicán tahvi ra, ta quichaha ndaca tuhun ra chi ra chícá noo chihin ra ta catyí ra:

—¿Ñáá catyí ñáyivi, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutya chi ñáyivi cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndacá tuhun ra Jesús chi tandihi ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quitá nu nyaá Nyoo.

Nu sacotó ra Jesús yoso caa cucahñi ñáyivi chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan. ²² Tyicuan ta catyí tucu ra chi ra:

—Yuhu Rayii cha quichí nya gloria cuví. Ta tahán chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quivi cunandote —catyí ra.

²³ Tyicuan ta quichaha catyí tucu ra chi tandihi ra:

—Tatu nya nyoho cuñi ndo cunyicon ndo chii, cahnya iñi ndo cha cuñi maa ndo sacuví ndo, tacuhva cuví sacuví ndo cha cuñi Nyoo. Ma ndu uvi iñi ndo cha yihí ndo cuende vasi ndiquivi nyehe ndo tundoho. Vatyí yucuan cuví cruzi cha tahán chi cuiso ndo. ²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyivi ndo cha catyí yuhu, cucacu añima ndo. ²⁵ ¿Ñáá cuenda quita chi ndo cha saha ganaa ndo tandihi cha iyó ñáyivi, tatu cuhun añima ndo anyaya? ²⁶ Vatyí tatu cahan nuu ndo cha cahán ñáyivi chi ndo cha catyí yuhu, ta cha catyí tuhun cahín, cucahan tucu nuu mai nyehi chi ndo nachaa quivi quichi inga chaha. Vatyí cuquichi chihin cha cahnu cuví, ta cha cahnu cuví Sutu yo Nyoo ta ángel cuenda ra. Vatyí yuhu cuví Rayii cha quichí nya gloria. ²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quivi yahá cha catyí ra Jesús tuhun cuan. Ta ndaa ra noo yucu vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra. ²⁹ Ta cha ni ri ca cha chicán tahvi ra Jesús, nasama cuhva caá sahma ra ta nuu ra. Tyaquí xaan cuichin nanduvi sahma ra. Ta xiño xaan. ³⁰ Tyicuan ta tuvi uvi tahan ra candatuhún chihin ra, ra Moisés ta ra Elías. ³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra. ³² Ta vasi cuñi xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra.

³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra. ³⁴ Ta cha ni ri ca cha cahán ra ta quichí noo vico siquí ra. Ta yuhví xaan ra cacuví cha caquihvi ra chichi vico cuan. ³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yahá cahán ndusu cuan, nanyehe ra Pedro ta ra ndihi chihin ra vatyi noo ri ca maa ra Jesús nanyaá yucuan. Ta yori maa chihin cacahan ra tuhun cha nyehé ra.

Nu sanduvahá ra Jesús chi noo ra cuehe luhlu cha yihí tatyí ña vaha chii
(Mt. 17.14-21; Mr. 9.14-29)

³⁷ Ta cha inga quívi cha noo ra Jesús yucu cuan, cuaha xaan ñáyivi chisatahan chi ra. ³⁸ Tyicuan ta chichi cha cuaha ñáyivi cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehé ndahvi chi sehi. Vatyi noo tuhun maa ra iyó chii. ³⁹ Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñí maa tatyí ña vaha cuan saña chi ra. ⁴⁰ Cha cahín chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra: —Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quívi cunyai chihin ndo ta cunyeé iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehun.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tavá ra chi tatyí ña vaha cuan. Ta sanduvahá ra chi cue. Tyicuan ta nacuhva cuenda ra chi cue chi sutu cue. ⁴³ Ta tandihí ñáyivi, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyivi chi ra

(Mt. 17.22-23; Mr. 9.30-32)

Cha ni ri ca cha iyo cuñí ñáyivi cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyi yuhu Rayi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñi iñi ra ñáá tuhun cahán ra. Vatyi Nyoo ña chahá ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóo ra cha cahnu ca cucuvi nu nyacá ñaha Nyoo

(Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra.

⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu. ⁴⁸ Ta quichaha catyí ra chi tandihí ra cuan:

—Tatu chihin sivi natíin cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natíin cuenda ndo. Ta tatu natíin cuenda ndo chii, chi maa Nyoo cha saquichí chii, natíin cuenda ndo. Vatyi ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo

(Mr. 9.38-40)

⁴⁹ Yucuan ta ra Juan catyí ra chi ra Jesús: —Maestro, nyehé ndi chi noo ra cuan. Cahán ra sivun ta tavá ra tatyí ña vaha. Soco ña chahá ca ndi. Vatyi ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahán ra. Vatyi yóo ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyi ña vaha cha chicá xiñi ra

⁵¹ Tuvi iñi ra Jesús vatyi cha nyañaa yatyin cha tahán chi cunuhu ra gloria, ta sanduníi ra iñi ra. Ta quehen ra ityi ta cuahan ra Jerusalén nu cucuví ra. ⁵² Ta tachí ra tyiño na cuhun coyo ra cachicá noo chihin ra ityi nuu ca noo ñuu ityi Samaria. Vatyi canducu

ra nu nyitatu ra. ⁵³ Soco ñu Samaria cuan, ña cuñí ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén. ⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? cacan yo chi Nyoo na saquichi ra ñuhu andívi síqui ñáyívi Samaria cuan, vatyí cayu ñu vatyí ña cuñí ñu cha ndoo yo ñuu ñu —cacyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi iñi ndo ñáá tyiño vachi yuhu. ⁵⁶ Vatyí yuhu Rayíi cha quichí nya gloria, ña vachi vatyí sanai añima ñáyívi, Soco vachi vatyí sacaqui chi ñu —cacyí ra.

Tyicuan ta cuahan coyo ra inga ñuu.

*Ñu cha cuñí quihvi cuenda ra Jesús
(Mt. 8.19-22)*

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñí cunyi quen chuun. Ta cuhin chuhun tandihí ri ityi cuahun —cacyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayíi cha quichí nya gloria ñahri maa nu cava xiñi iyó —cacyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —cacyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyi ñu chichi ñuhu. Soco yoho cuahan cua cahan tuhun Nyoo chihin ñáyívi nacuhva cuenda ñu chi ñu chi Nyoo na cunyaca ñaha ra chi ñu —cacyí ra.

⁶¹ Tyicuan ta quichaha catyí inga ra chi ra Jesús:

—Tata, cuñí cunyi quen chuun. Soco cuhva xihna na cuhin cuahin chihin ñu vehi —cacyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoo ra, ña yihí vaha iñi ra cha cuví cunyaca ñaha Nyoo chi ra —cacyí ra Jesús chi ra.

10

*Nu tachí ra Jesús chi uñi xico uchi tahan ra
cucahan tuhun Nyoo chihin ñáyívi*

¹ Cha yahá tuhun cuan ta nacachí Sutu Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihí ñuu ta tandihí ityi nu tahán chi cuhun ra Jesús. ² Ta catyí ra chi ra:

—Tari noo itu cahan vavaha, tyicuan caa nu tyiño sahí. Soco ña cuaha musu. Yucuan chaha cacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyívi. ³ Ta cuahan ndo ta nyehe ndo vatyí cua sacuhin chi ndo tari mbee mahñu lobo. Vatyí lobo tuhvá ti chachí ti chi mbee. Ta tyicuan caa cucuñi ñáyívi sataí iñi ñu chi ndo. ⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun. ⁵ Cuhva cha quihvi ndo chichi vehe noo ñáyívi, cahan vaha ndo chihin ñu. Ta catyí ndo, na coo cha vaha añima ñu. ⁶ Ta tyicuan caa tatu iyó ñáyívi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu. ⁷ Ta ndoo ndo suri maa vehe cuan. Tatu chaha ñu cha cachi ndo, cachi ndo. Tatu chaha ñu cha coho ndo, coho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. ñin ri maa vehe cuan cunyaa ndo nyacua nya cha chaa chi quívi cha cuhun ndo inga ñuu. ⁸ Ta nu chaa ndo noo ñuu ta vaha cahan ñu chihin ndo, cachi ndo ta coho ndo tandihí cha cuhva ñu chi ndo. ⁹ Ta sanduvaha ndo chi ñu cuhví ñuu cuan. Ta catyí ndo chi ñu: “Cha nyañaa yatyin Nyoo ra cunyaca ñaha añima ndo.” ¹⁰ Soco tatu chaa ndo noo ñuu ta ña cuñí ñu tyasoho ñu tuhun cahan ndo, quita ndo ityi cahnú. Ta catyí ndo chi ñu: ¹¹ “Nyacua nya ñiyaca ñuu ndo cha iñi chaha ndi, ta cunaquisí ndi. Vatyí tari noo seña vatyí ndoo cuatyí ndo síqui ndo. Vatyí Nyoo nyañaa yatyin ra chi ndo ta ña tyasoho ndo tuhun cahan ra yoso caa cuñí ra cunyaca

ñaha ra añima ndo.” Tyicuan caa catyi ndo chi ñu —catyi ra Jesús chi ra nyicón chi ra.

¹²Ta quichaha catyi tucu ra chi ra:

—Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyo ta cha naha ñuu Sodoma, ñu chih cha catyi cuatyí ñu —catyi ra Jesús.

Ñáyivi ña tyasohó tuhun cahán ra Jesús cunyehe ñu tundoho

(Mt. 11.20-24)

¹³Ta catyi ra:

—¡Ndahvi nyoho, ñáyivi ñuu Corazín! Ta ¡ndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu, ñahri nyatu cahnu nyehé ñu. Soco tyehe ta nyehé ñu quivi cuan cha nyehé nyoho vityin, tañi tyehe ri ndihvi noo ñu sahna tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan. ¹⁴Yucuan chaha, nyoho ñuu Corazín chihin ñuu Betsaida, ñihí ca cutachi tuñi Nyoo chi ndo ícan saha ñáyivi Tiro ta ñáyivi Sidón cuan. ¹⁵Ta nyoho ñu ñuu Capernaum, cuñí maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichahá ndo tuhun Nyoo —catyi ra Jesús.

¹⁶Ta catyi ra chi ndi uñi xico uchi tahan ra cuan:

—Ñáyivi cha tyasohó tuhun cahán nyoho, tuhun cahán yuhu tyasohó ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichj chii, ña quichahá ñu cuví cuan —catyi ra Jesús chi tandihí ra.

Nu nachaq coyo ndi uñi xico uchi tahan ra cha chichahan tuhun Nyoo

¹⁷Yucuan cuví nu nachaq coyo ndi uñi xico uchi ra cha chichahan tuhun Nyoo chihin ñáyivi. Ta sii xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyi ra.

¹⁸Tyicuan ta catyi ra Jesús chi ra:

—Ay, yuhu nyehi andivi nu cana cava cuihna, ra nañi Satanás. Tari noo tacha, tyicuan caa cana cava ra. ¹⁹Ta yuhu, chahj fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuvi chi ndo. ²⁰Soco ma sii xaan cuvi chi ndo vatyí cuví tava ñehe ndo tatyí ña vaha cuan. Sii ca cuvi chi ndo vatyí nyaá sivi ndo nu libru Nyoo —catyi ra Jesús.

Nu sacahnú ra Jesús chi Nyoo vatyí sii cuñí ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

²¹Cuhva cuan sii xaan cuñí ra Jesús sahá Tatyí li Nyoo, ta catyi ra:

—Sacahní chuun, Sutu Mañi yuhu, vatyí nyacá ñahun andivi ta ñuhu ñayivi. Vatyí maun sañahún tuhun maun chi ñu ndahvi ihyá. Ta ña sañahún chi ra chitó ta ra cha chihí tuñi. Tyicuan caa Sutu Mañi yuhu vatyí tyicuan caa cuhva cuñún —catyi ra Jesús.

²²Ta catyi ra Jesús chi tandihí ra sacuvi tyiño nuu ra:

—Tandihí maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyivi cuñí mai sacote tuhun ra, chi ñu cuan cusacote —catyi ra.

²³Tyicuan ta nanyehé ra chi ra cachicá noo chihin ra. Ta catyi ra chi ra:

—Sii xaan cuñí nyoho ta ñáyivi cha iyó vityin vatyí nyehé ndo cha sacuví. ²⁴Vatyí cuaha xaan rey ta ra profeta Nyoo ta cha naha cuñi ra nyehé ra cha nyehé nyoho vityin. Soco ña nyehé ra. Ta cuñí ra cuñi ra tuhun cha chihí nyoho vityin. Soco ña chihí ra —catyi ra Jesús.

Nu sañahq ra Jesús chi yo vatyí tahán chi tyinyee yo chi ñáyivi savaha ri

²⁵Tyicuan ta chaa noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehé ra chi ra. Ta catyi ra:

—Maestro, ¿yoso caa cunyacuví ta cuhin nu coi noo ñayivi cha ma naa ca maa?

²⁶Tyicuan ta nacahan ra Jesús, ta catyi ra:

—¿Náa catyi nu ley? ¿Yoso caa tuhun cha sacuahún?

²⁷Tyicuan ta nacahan ra sacuahá cuenda ley cuan ta catyi ra:

—Catyí ley, cūñi yo chi Nyoo chihin tandihí ańima yo ta chihin cha nii ińi yo, ta chihin tandihí fuerza yo, ta chihin cha tandihí cha chíni tuńi xińi yo. Ta cūñi yo chi ñáyivi tahan yo tari cha cuńi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu ańimon ta coun ñáyivi cha ma naa ca maa —catyí ra Jesús.

²⁹ Soco ra sacuaaha cuenda ley cuan cuńi ra savaha ra chi ra, ta quichaha catyí tucu ra chi ra Jesús:

—¿Yóo cha cuví ñáyivi tahir? —catyí ra.

³⁰ Tyicuan ta nacahan ra Jesús, ta catyí ra:

—Noo ra quita ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihí cuíi maa cha nyiso ra, nyacua nya sahma ra. Ta cańi ra chi ra nyacua chacun taxin ra chi ra. Ta sandoo maa ra chi ra yucuan. ³¹ Tyicuan ta yahá noo tata sutu ityi cuan. Soco cuhva cha nanyehé ra chi ra catuví cuan nya sava ri yahá ra.

³² Tyicuan ta yahá tucu nonga ra cha yińi cuenda vehe ñuhu, cha nańi levita. Soco cha nanyehé ra chi ra catuví cuan suri nya sava ri yahá ra. ³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehé ra chi ra catuví yucuan, ta quichi nundahvi cuńi ra nyehe ra chi ra.

³⁴ Ta tuhva ra nu catuví ra, ta quichaha saha ra tatan chi ra. Ta tyihí ra aceitye ta vinu nu cahvi chi ra. Ta sahvi ra noo sahma chata ra. Yahá cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra. ³⁵ Ta cha inga quivi cha cuńi cuhun ra Samaria cuan. Ta tava ra uvi tahan xuhun. Ta chahá ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cūhvon cha cachi ra. Ta şaton tatan chi ra na nduvaha ri ra. Tatu cuńi ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihí nacatyí ra Jesús tuhun ihya, quichaha ndaca tuhun ra chi ra sacuaaha cuan, ta catyí ra:

—Vaha. ¿Chichi cha uńi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuaaha cuan:

—Ra cha cundahvi cuńi chi ra —catyí ra. Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyí ra.

Nu chinyaq ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaá ra noo ñuu. Ta yucuan iyó noo ñaha cha nańi Marta. Ta chaá ra vehe ña. ³⁹ Ta cu Marta iyó noo cuhu ña cha nańi María. Ta cu María chicunyaq ña yatyin ri chaha ra Jesús, vatyi cuńi ña tuhun cahán ra. ⁴⁰ Soco cu Marta cuaha xaan tyiño nyaá sacuvi ña. Ta chaá ña nu nyaá ra Jesús, ta quichaha catyí ña chi ra:

—Tata. ¿Atu ña chicá xińi yoho vatyi cuhi sandoo maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xińun ta cutyiño xaan cuńun chihin tyiño chińa.

⁴² Soco iyó noo tuhun cha tahán chi caca xińi yo. Ta cu María ihya nacachí ña tyiño vaha ca sacuvi ña cha tyasohó ña tuhun cahín. Ta yuhu ma cuví tinyai chi ña —catyí ra Jesús chi cu Marta.

11

Nu sańahq ra Jesús chi ra cachicá noo chihin ra yoso caa cacan tahvi ra chi Nyoo (Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sańaha chi ndi yoso caa cacan tahvi ndi chi Nyoo. Tari sańahq ra Juan chi ra chicá noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa cacan tahvi ndo:

Sutu Mańi yuhu, yoho cha nyaun andivi. Sacahnu xaan ndi chuun.

Na quichi quivi cha nyaca ñahun ihya siqui ñuhu ñáyivi.

Na sacuvi ñáyivi ihya siqui ñuhu ñáyivi tandihí cuhva cuńi maun, tari cuhva cuví gloria.

³ Cūhva cha cachi ndi tacuhva yoso cuhva yaha ndi noo noo quivi.

⁴Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi ndi tacuhva ma sacuvi ndi cuatyí nuun.

Tyicuan caa cacán tahví ndo —catyí ra Jesús.

⁵Ta catyí tucu ra ñandihí:

—Saha yo tuhun tyi nyoho iyó noo amigon, ta chaa ra vehun cha ñuu ta catyí ra chuun: “Xaa, saha tumañi iñi chii, cuhva noo uñi tahan pan chii. ⁶Vatyí noo ra tahin nichaa ra vehi. Ta cañi xaan quichi ra. Ta ñahri maa cha iyó chii cuhve chi ra.” ⁷Ta yoho cunacahun ta catyun chi ra: “Ma sayangon chii, ndee. Vatyí nyasí yuvehi. Ta niquixi chihin sehi. Ta ña cuvi nducuite ta cuhve cha cuhve chuun cha vityin.” Tyicuan caa cucatyun chi ra. ⁸Ta catyí yuhu chuun. Vasi ra tahun cuví chi ra, ma nducuiton ta cuhvon chi ra cha numi ri. Soco tatu ndoq ra yucuan, ta ma cundihñi ra cacán ra chuun, sacachan ra yuehun ta cana chaa ra chuun tacuhva cha ma cuvi cusun, ta cundihñun cha sacachan ra yuehun, tyicuan ta nducuiton ta cuhvon chi ra, tacuhva cha ma sayanga ca ra chuun. ⁹Ta tyicuan caa tucu nyoho, cacán ndo chi Nyoo. Ta cuhva ra chi ndo. Nanducu ndo ta ñihi ndo. Sacachan ndo yuvehe ta nuña. ¹⁰Vatyí tatu chican ndo, ñihi ndo. Tatu nducu ndo, ñihi ndo. Ta tatu sacachan ndo yuvehe, nuña yuvehe.

¹¹Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chahá noo yuu chi sehe ndo tatu chican ndotyín pan. Ta ña tuhvá ndo chaha ndo noo coo chi sehe ndo, tatu chicán ndotyín tiyaca. ¹²Ta ña tuhvá ndo chaha ndo noo tisuhma chi sehe ndo tatu chicán ndotyín ndívi cachí ndotyín. ¹³Nyoho cha quiñi iyó ndo, soco chitó ndo yoso caa cuhva ndo cha vaha chi sehe ndo. Ta vihi ca Sutu Mañi yo cha nyaá andívi, cuaha ca cha vaha cuhva ra chi ndo tatu cacán ndo chi ra. Ta cuhva ra Tatyí li ra cunyaa añima ndo.

Ra xaan iñi chi ra Jesús catyí ra vatyí chihin fuerza cuihna sacuví ra milagru (Mt. 12.22-30; Mr. 3.20-27)

¹⁴Ra Jesús tavá ra tatyí ña vaha cha yihí chi noo ra cha ñihi sahá cuihna. Ta cuhva

cha quita tatyí ña vaha cuan chi ra ñihi cuan, nacahan ra. Tyicuan ta ñáyivi, iyo xaan cuñí ñu. ¹⁵Ta yihí ñu catyí ñu:

—Ra ihya, tavá ra tatyí ña vaha soco chihin fuerza ra Beelzebú ra cuví nuu chi cuihna —catyí ñu.

¹⁶Ta yihí ñu cuñí ñu nducu nyehe ñu chi ra, ta chican ñu chi ra Jesús na savaha ra noo seña chi ñu chihin tunyee iñi Nyoo.

¹⁷Soco ra Jesús chitó ra tuhun chicá xiñi ñu. Ta quichaha catyí ra chi ñu:

—Tatu gobiernu ta cacusiín ra, cuaha ri ityi nanduvi ra, cucañi tahan ra chihin tahan ra, ta cundihí tuhun cha cunyaca ñaha ra. Tatu noo vehe ta cacusiín ñu chihin tahan ñu, cutiví nu nyicú ñu. ¹⁸Ta tyicuan caa tucu cuihna. Tatu tandihí ra cacusiín ra chihin tahan ra cundihí fuerza cha iyó chi ra. Ta ihya catyí chi ndo tyehe caa vatyí nyoho catyí ndo vatyí chihin fuerza ra Beelzebú tavé tatyí ña vaha. ¹⁹Soco tyehe ta tavé tatyí ña vaha tari cuhva catyí ndo, ndaca tuhun ndo chi ra nyicú chihin ndo yóó chi fuerza tavá maa ra tatyí ña vaha. Maa ra sacoto ra chi ndo cha ndicha vatyí nyoho tondo ri chicá xiñi ndo. ²⁰Soco catyí chi ndo vatyí yuhu tave tatyí ña vaha chihin fuerza Nyoo. Ta cuñí chi catyí cuan vatyí ndicha cuii Nyoo ra nyacá ñaha añima ñáyivi cha chaq ra nu nyicú ndo.

Nu sañahá ra Jesús vatyí ñihi ca fuerza Nyoo ta ñima ca fuerza cuihna

²¹Tatu noo ra iyó vavaha fuerza chi ra ta nyisó ra mityi ra, ta sahá cumi ra vehe ra. Ñohó xehe vaha ndaha tyiño ra chichi vehe ra tacuhva cha ma cuvi tinyaa ra suhu.

²²Soco tatu quichi inga ra cha cuaha ca fuerza iyó chi, ta cañi tahan ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sachá ra chi ra tahan ra. ²³Ñáyivi ña sahá tyiño chihin, sativí ñu tyiño sahí. Ta ñu ña tyinyee chii cha chahán ñu tuhun Nyoo chihin ñáyivi, cuñí chi catyí vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo

(Mt. 12.43-45)

²⁴Tatu noo tatyí ña vaha quita chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña ñañihi

maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.”

²⁵ Yucuan ta nachaa chi añaia nu quita chi. Ta nanyehę chi vatyi ndii xaan ta vii xaan. ²⁶ Tyicuan ta cua naquehen chi ucha ca tahan tatyi ña vaha cha yaha ca cuhva ta ican saha maa chi. Tyicuan ta iin ri quihvi tandihi chi añaia ñu cuan. Yucuan chaha yaha ca cuhva nanduvi ñu ican saha cha cuvi maa ñu —catyi ra Jesús.

Ñu cha ndicha iyó vaha ñayivi

²⁷ Cha ni ri ca cha cahán ra Jesús tuhun cuan, ta cana chaa noo ñaha cha ñohó mahñu ñayivi cuan. Ta quichaha catyi ña:

—Ñana cha sii cuvi chi ñaha cha sacacu chuun ñaha cha chahę caxun —catyi ña.

²⁸ Soco ra Jesús catyi ra:

—Sii ca cuñi ñu cha chiñi tuhun cahán Nyoo ta quichahá ñu —catyi ra.

Ñáyivi ña vaha, maa ri maa nyatu cahnu cuñi ñu nyehe ñu

(Mt. 12.38-42; Mr. 8.12)

²⁹ Tyicuan ta chaa coyo ñáyivi nu nyaá ra Jesús. Ta quichaha catyi ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñi ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas. ³⁰ Tari ra Jonás cuvi ra seña chi ñáyivi ñuu Nínive ta cha naha, tyicuan caa tucu yuhu Rayii cha quichi nya gloria, cuvi tari noo seña chi ñáyivi cha iyó vityin. ³¹ Quivi tachi tuñi Nyoo chi ñáyivi cunandoto ñaha cuvi reina ityi sur ta cha naha, ta cucatyi ña vatyi cuhun ndo anyaya, vatyi maa ña vasi cañi ñuu ña, soco quichi ña, quichi tyasoho ña tuhun cha chiñi tuñi cahán ra Salomón. Ta ihya cahnu ca cuvi ra cha cahán chihin ndo vityin ta ñima ca ra Salomón. ³² Ta quivi cutuñi chi tandihi ñáyivi, cunducuita ñu chiyo ñuu Nínive ta cha naha, ta cucatyi ñu vatyi nyoho ñu cha iyó vityin cuhun ndo anyaya, vatyi maa ñu ñu Nínive, canasama ñu cuhva iyó ñu quivi cahán ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

Nu sañahę ra Jesús vatyi na saha yo cuenda añaia yo coto vaha ñahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja.

Vatyi ñuhu cuan tahán chi coso minoo nu sucun. Tacuhva quihvi ñáyivi vehe ndo, soco ndichin. ³⁴ Chiti nuu ndo noo cha sandichin chi ndo cuvi. Ta tyicuan caa tucu añaia ndo, tatu iyó cha ndichin Nyoo añaia ndo, vaha ñáyivi cuvi ndo. Tatu ñahri cha ndichin Nyoo nyaá tari noo ra cuaa cuvi ndo, ña cuvi nyehe ndo ityi vaha cha cuahan nu nyaá Nyoo. ³⁵ Yucuan chaha saha ndo cuenda añaia ndo. Tatu nyaá cha ndichin Nyoo chihin ndo, o nyaá cha ñaa iñi. ³⁶ Tatu tyitu añaia ndo chihin cha ndichin Nyoo ñahri ca maa noo nu ñaa iñi iyó chi ndo, vatyi sandichin chi tandihi ndo. Tari cha nyaá noo lámpara sacatá chi ñuhu chi ndo cuvi cuan —catyi ra Jesús.

Cahán ra Jesús chi ra casacuaha cuenda ley vehe ñuhu ta chi ra fariseo, ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihę cahán ra Jesús nuu ñáyivi, noo ra fariseo, ra quichaha xaan ley vehe ñuhu, catyi ra chi ra Jesús, vatyi na cuhun ra cucachi ra nya vehe ra. Ta chaa ra Jesús vehe ra. Ta quihvi ra chicunyaa ra mesa.

³⁸ Tyicuan ta ra fariseo cuan iyo cuñi ra vatyi ña nacatyę ra Jesús ndaha ra, tari cuhva costumbre maa ñu cha cumañi cachi ñu. ³⁹ Soco ra Jesús catyi ra chi ra:

—Nyoho, ra cacuvi fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyi ña nacatyá ndo. Tyicuan caa nyoho. Vatyi cuñi ñáyivi vatyi vaha ñáyivi cuvi ndo. Soco xehe ri suhu ndo ta ña sacuvi ndo cha vaha. ⁴⁰ Ndava xaan iñi ndo. ¿Atu ña chitó ndo vatyi ra cha savahá ityi chata vaso, suri maa ra savahá ityi chichi? Vatyi tari vaso cuvi ndo. ⁴¹ Tahán chi sahá ndo tumañi iñi chi ñáyivi, ta tyinyee ndo chi ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyi nyoho vasi vaha chaha ndo diesmo chi Nyoo cuenda yucu cha nañi menta ta ruda ta ñáá ndihę ca yucu cha tachi ndo, soco ña quichahá ndo cuhva cha vaha cha cuñi Nyoo sacuvi yo, ta cha cuñi yo chi ra. Ta ican ihya cuvi cha tahán chi sacuvi ndo, soco ma sandihę ndo cha cuhva ndo diesmo ñandihę. ⁴³ ¡Ndahvi nyoho cha cuvi ndo fariseo! vatyi cuñi ndo cunyaa ndo nu

tyayu vaha ca chichi vehe ñuhu. Ta cuñí ndo cha saha ñáyivi ñáyivi chi ndo nuyahvi. ⁴⁴¡Ndahvi nyoho ra sacuahá cuenda ley, ta nyoho ra fariseo! Vaha sahá ndo chi ndo, soco cuví ndo tari noo ñaña ndiyi cha ña quetuví. Vatyí yahá ñáyivi siquí soco ña chitó ñu ñáa cha ñohó chichi ñaña cuan. Vatyí ñahri seña catuví nu yihí ndiyi cuan. Cuñí maa ñu vatyí vaha ndo, soco ña chitó ñu vatyí ña vaha añima ndo —catyí ra Jesús.

⁴⁵Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chi nyuhu —catyí ra.

⁴⁶Tyicuan ta quichaha catyí ra Jesús chi ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducuaha ca ndo ley cha tachí Nyoo ta cha naha. Ta ña tahán chi. Ta yori ndoyó carga cuan, ta saniñi ndo na sacuvi ñu ta ni maa ndo ni chiin ña tyinyee ndo chi ñáyivi. ⁴⁷¡Ndahvi nyoho! Vatyí sanduvahá vaha ndo ñaña nu ñohó yiquí ra profeta Nyoo cha cachahñi sutu chahnu ndo ta cha naha. ⁴⁸Chihin cuan cuñí chi catyí vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chi ra profeta Nyoo. Ta nyoho sanduvahá ndo ñaña ra. ⁴⁹Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chi ra. ⁵⁰Ta ndicha tyicuan caa sacuví ndo. Nyoo cutachi tuñi ra chi ndo cha cuenda tandihí ra profeta ra cachahñi sutu chahnu ndo nyata chingo ñuhu ñáyivi ta nyacua nya vityin. ⁵¹Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu vatyin nu nyaá arta. Yucuan chaha catyí Nyoo vatyí cutachi tuñi ra chi ñáyivi cha iyó vityin cha catyí cuatyí ñu chiyo ta cha naha. ⁵²¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihvi ñáyivi ityi Nyoo. Ta ni maa ndo ña quihvi ndo nu nyaá Nyoo. Ta ni ri ña chahá ndo cha quihvi inga ñáyivi cha cuñí quihvi —catyí ra Jesús.

⁵³⁻⁵⁴Ndihí cahan ra Jesús tuhun cuan, ta quitá ra. Soco ra casacuaha ley vehe

ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siquí ra.

12

Nu sañahá ra Jesús vatyí ma cuvi tixehe yo cuatyí yo

¹Cuenda mil ñáyivi ndu iin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuvi tixehe ra cuatyí ra. ²Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi. ³Yucuan chaha ñáa ndihí tuhun cha cahan ndo nu xehe, cuquita chi nu ndichin. Ta ñáa ndihí tuhun cha cahan ndo chichi vehe ndo, cucuiñi tandihí ñáyivi noo quiví.

¿Yóó chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴Ta catyí chi ndo cha cuví ndo ra tahin, vatyí ma yuhvi ndo chi ra chahñi coño ñuhu ri. Vatyí yahá tuhun cuan ta ñahri ca cha cuví sacuvi ra. ⁵Soco cua catyí chi ndo yóó chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyivi ndo. Ta yaha cuan ta cuví tyihí ra añima ndo anyaya.

⁶Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihí ri ti, Nyoo ña naa iñi ra chi ni noo ti. ⁷Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahan yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸Catyí chi ndo vatyí nya ndo cahan ndo tuhín chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyí yuhu Rayi cha quichi nya gloria cuví. ⁹Soco nya nyoho cha cahan nuu ndo cahan ndo tuhín chihin ñáyivi, tyicuan

caa tucu yuhu, ma cahin tuhun ndo nuu ángel cuenda Nyoo. ¹⁰ Ta vasi cahán ñáyivi chí yuhu Rayii cha quichí nya gloria, Nyoo cusaha ra tucahnu iñi chí ñu. Soco yóó cha cahán ña vaha siqui Tatyí li Nyoo ma ñihi ñu tucahnu iñi cuenda cuan.

¹¹ 'Cuhva cha cunyaca ñáyivi chí ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo. ¹² Vatyí cuhva cha cua nacahan ndo, yucuan cuhva cuhva maa Tatyí li Nyoo ñáá tuhun tahán chí nacahan ndo —catyí ra Jesús.

Nu chahá ra Jesús cuhva vatyí ña tahán chí cunyicon yo cha tyayii

¹³ Noo ra cha ndihi chihin ñáyivi cuaha cuan, catyí ra chí ra Jesús:

—Maestro, catyí chí yañi vatyí natahvi sava ra cha tyayii cha sandoo sutu ndi chí ndi —catyí ra.

¹⁴ Tyicuan ta catyí ra Jesús chí ra:

—¿Yóó cha tyiso chí yuhu cha cuví juez ta catyí ndo vatyí tahvi sava yuhu cha chí ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyivi —catyí ra.

¹⁶ Tyicuan ta chahá ra Jesús noo cuhva ihya chí ñu:

—Chiyó noo ra tyayii. Ta cuaha xaan tyiño sahá ra iyó. ¹⁷ Tyicuan ta ndichi xiñi ra: “¿Yoso caa cusacuví? Ñahri nu naquehen vahi tandihi tyiño sahi. ¹⁸ Soco cha chité yoso caa cunyacuví. Cusatani yaca nyihi nu yihí ñiñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihi maa ñiñi cha cuquita nu iyó tyiño sahi. ¹⁹ Tyicuan ta cuaha cuiya ma saha tyiño que. Cunyatiti ta cusí cuñi. Ta cachi vahi. Ta cucoho vahi”, ndichi xiñi ra. ²⁰ Soco catyí Nyoo chí ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chí cua ndoo?” ²¹ Tyicuan caa cuví chí ñáyivi cha sacayá tandihi cha tyayii soco ñahri maa iyó chí ñu nuu Nyoo —catyí ra Jesús.

Ma caca xaan iñi yo ñáá ndihi cha chiñuhú chí yo
(Mt. 6.25-34)

²² Tyicuan ta quichaha catyí ra Jesús chí ra cachicá noo chihin ra:

—Catyí chí ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo. ²³ Vatyí yahvi ca nyaá ñáyivi yo ican saha cha cachi yo. Ta yahvi ca nyaá coño ñuhu yo ican saha cha cuihno yo. ²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa. ²⁵ Ta vasi chicá xaan xiñi ndo soco ma cuví sandusucun ca ndo ni chiin ca chí ndo. ²⁶ Tatu ni chiin cuan ña cuví chí ndo, ¿ñáá tuhun cha chicá xaan xiñi ndo tuhun tandihi ca cha chiñuhu chí ndo?

²⁷ 'Saha ndo cuenda yoso caa iyó tu ita vatyí ña sahá tyiño tun. Soco catyí chí ndo vatyí ni rey Salomón chihin tandihi cha tyayii ra ta ña tyaqui cha ñihnó ra tari cha sacuihno Nyoo chí tu ita cuan. ²⁸ Tatu tyicuan caa sacuihnó Nyoo chí tun ita cha iyó nu chiqui vityin, ta tyaan cucayu tun chichi horno, ta nyaca cuví chí nyoho ta ma sacuihno ra. Soco maa ndo ña chinó vaha iñi ndo chí ra. ²⁹ Ma caca xaan xiñi ndo tuhun cha cachi ndo ta cha coho ndo. ³⁰ Vatyí ñáyivi cha ña chinó iñi chí Nyoo chicá xiñi ñu tuhun ihya. Soco nyoho chinó iñi ndo chí Sutú yo Nyoo ta maa ra chitó ra ñáá cha chiñuhú chí ndo. ³¹ Vaha ca cha nanducu ndo yoso caa nacuhva cuenda ndo chí ndo chí Nyoo vatyí cunyaca ñaha ra añaima ndo. Ta tyicuan caa ta ñihi ndo tandihi cha chiñuhú chí ndo.

Cha vaha cha iyó gloria

(Mt. 6.19-21)

³² 'Ma yuhvi nyoho, mbee sane. Vasi ña cuaha ndo soco Sutú yo Nyoo cuñi ra chí ndo. Yucuan chaha cucuhva ra quihvi ndo nu nyacá ñaha ra. ³³ Xico ndo cha iyó chí ndo. Ta cuhva ndo chí ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quiti, yori cha sativi iyó yucuan. ³⁴ Vatyí nuu cunyaa cha tyayii ndo, yucuan cuví nu nyaá xiñi ndo. Ta yucuan cucunyyaa añaima ndo —catyí ra.

Nu sañahá ra Jesús chí yo yoso caa cuatu tuhva yo chí ra quívi quichi ra inga chaha

³⁵ 'Cuatu tuhva vaha ndo quiví quichi inga chaha. ³⁶ Ta cuví ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyi tacuhva tañi tyehe ri nuña ra yuvehe cuhva cha sacachan chitoho ra cha nachaa ra. ³⁷⁻³⁸ Ta caa cuhva ri cuan sii xaan cuñí ra nyehe ra chi ra. Vatyi nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyi tyicuan caa nyacuví chitoho ra chihin ra. ³⁹ Ta coto ndo tuhun ihya vatyi tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra. Vatyi coto quehen ra tandihí cha iyó chi ra. ⁴⁰ Ta tyicuan caa cuví tucu nyoho, cuatu tuhva ri ndo. Vatyi yuhu Rayii cha quichi nya gloria, sana ri iñi ndo ta cuquichi —catyí ra Jesús.

Musu vaha ta musu ña vaha
(Mt. 24.45-51)

⁴¹ Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya?
¿Atu cha cuenda maa ri maa ndi, o cha cuenda tandihí ñáyivi?

⁴² Tyicuan ta nacahan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyi sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan. ⁴³ Ta sii xaan cuví chi musu cuan tatu cuhva cha sahá tyiño ra, ta nachaa chitoho ra. Vatyi quichaha ra tandihí cha tahán chi sacuvi ra. ⁴⁴ Ta catyí chi ndo vatyi cha ndicha cuví. Vatyi chitoho ra cunatyaa ra tandihí cuui cha cumí ra ndaha ra. Vatyi vaha quichahá ra chihin tyiño sahá ra. ⁴⁵ Soco tatu chicá xiñi musu cuan vatyi naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra. ⁴⁶ Tyicuan ta sana iñi ra ta ndichi chitoho ra quiví cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷ 'Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra. ⁴⁸ Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chihin ri, vatyi ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan tahán chi nacuhva cuenda ra chi chitoho ra.

Nu catyí ra Jesús vatyi cha catyí ra cucañi tahan ñáyivi chihin tahan ñu
(Mt. 10.34-36)

⁴⁹ 'Tari cha sanatahín ñuhü siqui ñuhu ñáyivi, tyicuan caa cuví tyiño vachi. ¡Ñana cha cuñí cha nacayu catyin ri ñuhü ihya! ⁵⁰ Vatyi nyaá yahi noo tundoho cahnu, ta ñana cha nyehí tundoho nyacua nya ndihí tyiño sahí. ⁵¹ Cuñí maa ndo vatyi cha vachi cuhve cha taxi ri coo ndo siqui ñuhu ñáyivi ihya. Soco yuhu vachi vatyi sasiin chi ndo. ⁵² Vatyi cha vityin ta ityi nuu ca, ohon ñáyivi noo vehe cucusñin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu. ⁵³ Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyivi vatyi ña nacotó ñu vatyi cha chaa quiví cha quichi Sehe Nyoo

(Mt. 16.1-4; Mr. 8.11-13)

⁵⁴ Catyí tucu ra Jesús chi ñáyivi cuaha cha nyicú yucuan:

—Tatu cha nyehe ndo vatyi cha ndihvi vico, catyí ndo vatyi cua coon savi. Ta tyicuan caa cuví. ⁵⁵ Tatu cha nyehe ndo vatyi cha caá tatyi ityi tyañuhu, catyi ndo vatyi cha chaa quiví ihñi. Ta tyicuan caa cuví. ⁵⁶ Nyoho sahá ndo tyi chitó ndo, ta nacotó ndo tandihí tuhun andivi, ta tandihí tuhun ñuhu ñáyivi. Soco ¿ñáá tuhun cha ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyí chaha yo coto cahun yo vehe caa
(Mt. 5.25-26)

⁵⁷ ¿Ñáá tuhun ña sahá ndo cuenda nya cha vaha ta nya cha ña vaha? ⁵⁸ Tatu noo ra chican cuatyí chahun ta cuahun chihin ra nu nyaá ra cuví tyiño, ityí cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policia. Ta policia cuan cutyihi ra chuun chichi vehe caa. ⁵⁹ Tatu tyicuan caa cuví, catyí chuun vatyi ma quiton nyacua nya tyiyahvun tandihi cha tahán chi tyiyahvun —catyí ra Jesús.

13

Cuñi chi cha nasama yo cuhva iyó yo o cunyehe yo tundoho

¹ Tyicuan ta suri quivi cuan canyicu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyí tyihi ra tyiño na cucahñi sindaro chi ra Galilea cha cachaha ofrenda chi Nyoo vehe ñuhu. Ta nasacá ra niñi ra cuan chihin niñi quiti cha cua cuví ofrenda cuan. ² Ta nacahan ra Jesús ta catyí ra chi ra:

—¿Atu chicá xiñi nyoho vatyi cahnu xaan ca cuatyí ra Galilea cuan cha nuu tandihi ra ityí ñuu ra. Ta yucuan chaha cachihí ra? ³ Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho. ⁴ Ta ndi chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo? ⁵ Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶ Tyicuan ta chahá ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyi ñahri. ⁷ Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra. ⁸ Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga

cuiya ihya. Cusanduvite ñuhú chaha tun ta cutyihi ñuhú tyahyu. ⁹ Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quivi nyitatu ñáyivi sanduvahá ra Jesús chi noo ñaha tihí chata

¹⁰ Noo quivi cha nyitatu ñáyivi sañahá ra Jesús chi ñu chichi vehe ñuhu. ¹¹ Ta yucuan nyaá noo ñaha cha yihí tatyí ña vaha chi. Ta cha chahun uñi cuiya cuhví ña cha ndutihi chata ña. Ta ña cuví ndundoo ña. ¹² Tyicuan ta nanyehe ra Jesús chi ña. Ta caná ra chi ña. Ta quichaha catyí ra chi ña:

—Cha nduvahun. Ñahri ca cuehe ndo—hún —catyí ra chi ña.

¹³ Tyicuan ta tyiso ra ndaha ra siqui ña. Ta caa cuhva ri cuan ta ndundo ña. Tyicuan ta quichaha sacahnu ña chi Nyoo. ¹⁴ Soco ra cuví nuu vehe ñuhu, cuxaan xaan ra. Vatyí quivi nyitatu ñáyivi sanduvahá ra Jesús chi ña. Ta quichaha catyí ra chi ñáyivi canyicú cuan:

—Iyó iñu tahan quivi tahán chi saha tyiño yo. Yucuan quivi quichi ndo quichi cuvi tatan chi ndo. Ta ma quichi ndo quivi nyitatu yo —catyí ra.

¹⁵ Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quiti sana ndo vatyi sacoho ndo ndutya chi ti quivi nyitatu yo?

¹⁶ Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñi ña chihin cuehe ihya sahá ra ña vaha. Ta yori ndachi chi ña. ¿Atu ña tahán chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihi maa ra xaan iñi chi ra cahán cuvi nuu ra. Soco tandihi maa ñáyivi cusii cuñi ñu chihin cha cahnu cha sacuví ra Jesús.

Nu catyí ra Jesús vatyi tari noo chiti mostaza cuví cha nyacá ñaha Nyoo aña maa yo

(Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandiqui tahin cha nyacá ñaha Nyoo aña maa yo? ¿Ñáá chihin sandu inuu ri yo? ¹⁹ Tari noo chiti mostaza, tyicuan caa cuví. Vatyí noo ra tachí ra noo chiti

nu ñuhú, ta chahnũ tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyi tari yuchan iya tyicuan caa cuví cha nyacá ñaha Nyoo añima yo

(Mt. 13.33)

²⁰Tyicuan ta quichaha catyí ra Jesús inga chaha:

—¿Náa ca chihin sandu inuu ri yo yoso caa nyacá ñaha Nyoo añima yo? ²¹Cuví chi tari noo yuchan iya cha nasacá noo ñaha sihi chihin uñi cuhva yutyi pan. Vatyi tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo añima —catyí ra.

Yuvehe tihin ta ityi cuiñi cha cuahan nu nyaa Nyoo

(Mt. 7.13-14, 21-23)

²²Ityi cuahan ra Jesús Jerusalén cahán ra tuhun Nyoo chihin ñáyivi tandihi ñuu nu yahá ra. ²³Ta quichaha ndaca tuhun noo ra chi ra:

—¿Atu ña cuaha maa ñáyivi cucacu añima? —catyí ra.

Tyicuan ta nacahan ra Jesús, ta catyí ra:

²⁴—Nanducu ndo cuhva quihvi ndo yuvehe tihin. Vatyi yii xaan quihvi ndo nu nyacá ñaha Nyoo. Vatyi cuaha xaan ndo cha cucuñi ndo quihvi ndo yucuan. Ta ma cuví. ²⁵Vatyi tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Nuña yuvehe.” Ta ra cuan cucatyí ra chi ndo: “Ña chité nya ityi quichi nyoho.” ²⁶Tyicuan ta nyoho cucatyí ndo: “Nyuhu chachi ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan. ²⁷Soco ra cuan cunacahan ra chihin ndo ta cucatyí ra: “Cha catyi chi ndo vatyi ña chité nya ityi quichi nyoho. Canyaha ndo nu nyai, tandihi nyoho ñu nyacuví cha ña vaha”, cucatyí ra chi ndo. ²⁸Yucuan ta cuacu ndo ta sacahñi noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihi ra profeta Nyoo cha chiyo ta cha naha. Vatyi canyicú ra nu nyacá ñaha Nyoo. Ta nyoho ndoo ndo ityi chata. ²⁹Ta cuquichi ñáyivi ityi tyañuhu,

ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra. ³⁰Ta yóó ñu cha cuñi cuhun ityi nuu, ican ñu cuhun nu ndihi. Ta ñu cuahan nu ndihi, ican ñu cuhun ityi nuu —catyí ra.

Nu nducuihya iñi ra Jesús nyehé ra chi ñáyivi ñuu Jerusalén

(Mt. 23.37-39)

³¹Suri maa quívi cuan chaá coyo suhva ra fariseo. Ta catyí ra chi ra Jesús:

—Quita ihya vatyi ra Herodes cuñi ra cahñi ra chuuu —catyí ra.

³²Soco ra Jesús quichaha catyi ra chi ra:

—Cuahan ndo ta catyi ndo chi ra ñucuii quiñi iyó cuan, vatyi nyacua nya nu chaa maa chi quívi cha ndihi tyiño sahí cha tave tatyí ña vaha ta cha sanduvahi chi ñu cuhví, tyicuan ta cundihi tyiño sahí. ³³Soco nya tahán chi cha ndihi maa tyiño sahí, tyicuan ta cuhun mai cucuvi nya Jerusalén. Vatyi ma cuví cha cúvi noo ra profeta Nyoo ityi chata Jerusalén.

³⁴¡Ndahvi nyoho ñáyivi Jerusalén! vatyi chahñi ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihi ra cha saquichí Nyoo nu nyicú ndo. Ta yuhu cuaha xaan chaha cuñi saha cuende chi ndo tari noo ndivi cha sahá cuenda ti chi sehe ti, ta naquehen vaha ti chi ti chichi ndichin ti. Soco maa ndo ña cuñi ndo. ³⁵Nyehe ndo vityin vatyi cha sandoi chi ndo. Ta catyí chi ndo vatyi ma nyehe ca ndo chii nyacua nya chaa chi quívi cuacatyí ndo vatyi cahnu xaan ra vachi chihin sivi Nyoo —catyi ra Jesús.

14

Nu sanduvahá ra Jesús chi noo ra cuhví cha yihí cuiño chi

¹Cuví chi noo quívi nyitatu ñáyivi. Ta ra Jesús cuahan ra cua cachi ra vehe noo ra cuví nuu chi ra fariseo. Ta suhva ca fariseo cuan cañañi ra chi ra Jesús tatu ñáa cha ña vaha cunyacuví ra. ²Yucuan ta nuu ra Jesús nyaá noo ra cuhví cha yihí cuiño chii. ³Tyicuan ta quichaha catyi ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhví quívi nyitatu yo? —catyí ra.

⁴Tyicuan ta tandihi ra cuan, taxi taxi cacuví ra. Yucuan cuví nu tyiso ra Jesús

ndaha ra siqui ra cuhvi cuan. Ta sanduvaha ra chi ra. Ta natachi ra chi ra na cunuhu ra. ⁵Tyicuan ta quichaha catyi ra Jesús chi ra fariseo:

—Tatu canacava noo burru sana ndo, o nonga quiti sana ndo chichi noo xahva, ¿atu ma cutava ndo chi ti ña tyehe ri, vasi quivi nyitatu yo cuvi? —catyi ra.

⁶Tyicuan ta inga chaha tucu taxi cuii ri nicunyicu ra fariseo. Vatyí ña ñihi ca ra tuhun nacahan ra.

Nu sañaha ra Jesús chi yo vatyí ma cahnu saha yo chi yo

⁷Cha nyehe ra Jesús vatyí tandihi ra canyicu vico cuan nacachi ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸—Nya quivi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo, ⁹ta coto quichi ra cha nacatyí tuhun ta catyi ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihi. ¹⁰Soco catyi chi ndo, vatyí nya quivi nacatyí tuhun ra chi ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chi ndo ta catyi ra chi ndo: “Ra tahir, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicu yuhu mesa chuhun. ¹¹Vatyí yóo ra cha cahnu sahá chii, cuquehen ra ticahan nuu. Ta yóo ra cha ndahvi sahá chii, cahnu cu-cuvi ra —catyi ra Jesús.

¹²Tyicuan ta quichaha catyi tucu ra chi ra nacatyí tuhun chi ra:

—Nya quivi coo vico vehun, ma nacatyí tuhun chi ra tahun, ni chi yañun, ni ri chi ñáyivi chuun, niri chi ñu nyicu yuehun ñu tyayii. Vatyí ñu cuan cuvi nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun. ¹³Soco cua catyi chuun vatyí nya quivi coo vico vehun, nacatyí tuhun chi ñu ndahvi, chi ñu cuhvi, chi ñu coxo, ta chi ñu cuaa. ¹⁴Tyicuan ta sii cuvi chuun, vatyí ñu cuan ma cuvi natyiyahvi ñu chuun. Soco cuñihun yavun quivi cunandoton chihin ñáyivi vaha.

Nu chaha ra Jesús noo cuhva yoso caa nacatyí tuhun ra chi yo vatyí quihvi yo nu nyacá ñaha Nyoo

(Mt. 22.1-10)

¹⁵Ta chiñi noo ra cha nyaá yuhu mesa cuan tuhun cahán ra Jesús. Ta quichaha catyi ra chi ra:

—Sii xaan cuvi chi ñu cachi nu nyacá ñaha Nyoo —catyi ra.

¹⁶Tyicuan ta catyi ra Jesús:

—Noo ra cuan savaha ra noo vico cahnu vavaha vehe ra. Ta nacatyí tuhun ra chi cuaha xaan ñáyivi. ¹⁷Tyicuan ta chaa cuhva cha cuxiñi ñu, ta tachí ra chi musu ra nacana ra chi ñu. Vatyí cha chaa cuhva cha cuxiñi ñu. ¹⁸Soco tandihi ñu cuan quichaha catyi ñu vatyí ma cuhun ñu. Ta noo ra cuan catyi ra: “Ni sate noo ñuhú. Ta cuñi chi cuhin cunyehe. Ican tuhun chiquén na saha ra tucahnu iñi chii vatyí ma cuhin.”

¹⁹Tyicuan ta inga tucu ra cuan catyi ra: “Ni sata cuiri ohon tahan yunta quiti. Ta cuhin cunyehe tatu vaha ti. Ican tuhun chiquén tumañi iñi chi ra na saha ra tucahnu iñi chii, vatyí ma cuvi cuhin.” ²⁰Tyicuan ta inga tucu ra cuan catyi ra: “Ni ndihi tandahi, ta ma cuvi cuhin”, catyi ra. ²¹Tyicuan ta musu ra cuan cuanuhu ra. Ta nacatyí ra tandihi tuhun cuan chi ra cha tachí chi ra. Cha chiñi ra savaha vico cuan cha tyicuan caa, ta cuxaan xaan ra. Ta catyi ra chi musu ra: “Cuhan tandihi maa ityi. Ta quichi nyacon chi ñu ndahvi, chi ñu cuhvi, ta chi ñu coxó, ta chi ñu cuaa”, catyi ra. ²²Ta cha yaha nachaa musu cuan ta catyi ra chi ra cha tachí chi ra: “Cha sacuvi tandihi maa cha catyún. Ta nuñá ca chichi vehe”, catyi ra. ²³Tyicuan ta chitoho ra catyi ra chi ra: “Cuhan cua nducu ca chi ñu tandihi maa ityi. Ta sanñun chi ñu na quichi coyo ñu, vatyí na cutu chichi vehi. ²⁴Vatyí catyi chuun vatyí ni minoo ñu cha nacatyí tuhun cha xihna ri, ma cachi ñu chihin” —catyi ra Jesús.

Cuaha xaan tundoho nyehe yo tatu cuenda ra Jesús yihí yo

(Mt. 10.37-38)

²⁵Cuaha xaan ñáyivi nyicón chi ra Jesús. Tyicuan ta nanyehe ra chi ñu, ta quichaha catyi ra:

²⁶—Tandihí nyoho cha nyicón ndo chii, tatu cuñi ca ndo chi ñáyivi chi ndo ican saha chi yuhu, ñima cuende yihí ndo. Ta

tatu cuñí ca ndo chi maa ndo ican saha chi yuhu, ñima cuende yihí ndo. ²⁷ Vatyí nya nyoho cha ña cuñí ndo nyehe ndo tundoho cha cunyicon ndo chii, ña tahán chi cuví ndo ñu cuende, vatyí cha nyehe ndo tindoho yucuan cuví cruzi cha tahán chi cuiso ndo. ²⁸ Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan. ²⁹ Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyivi chi ndo. ³⁰ Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu. ³¹ O tatu noo rey cha cuñí cañi tahan chihin inga rey çatu ña chicunyaa xihna ra ta ndichi xiñi ra tatu ñihí uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan? ³² Tatu chitó ra vatyí ma cuví chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihí tuhun yucuan ri. ³³ Ta tyicuan caa cuví chi nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuví cunyicon ndo chii.

Nu sañahá ra Jesús vatyí tari ñii cha ndihí cha uhva, tyicuan caa cuví yo tatu ndu uvi iñi yo cha chino iñi yo chi ra

(Mt. 5.13; Mr. 9.50)

³⁴ Vaha ñii vatyí sacú uhva chi cha cachi yo. Soco tatu ndihí cha uhva chi, ña vaha ca chi. ³⁵ Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñí iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuví yo

(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuñi ra tuhun cahán ra. ² Tyicuan ta ra fariseo ta ra casacuaha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³ Tyicuan ta ra Jesús cahán ra noo cuhva ihya, ta catyí ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, çatu ma sandoo ndo chi tandihí ca ti cuan nu chiquí. Ta cunanducu ndo chi quiti cha cuanaa cuan, nyacua nya cha nañihí ndo chi ti? ⁵ Ta cuhva cha nañihí ndo chi ti, ta natyiso soco ndo chi ti. Ta sii vavaha cuví chi ndo. ⁶ Ta cuhva cha nachaa ndo vehe ndo, ta ndu iin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chi ñu vatyí na cusii cuñi ñu chihin ndo vatyí nañihí ndo chi mbee sana ndo cha chinaa. ⁷ Ta ihya catyí chi ndo, vatyí sii xaan ca cuví chi ángel Nyoo andívi cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahun cumi tahan ñáyivi cha ñahri cuatyí.

Ñaha sihi cha cuanaa xuhun ta nañihí ña

⁸ Ta catyí chi ndo, tatu iyó noo ñaha cha iyó uchi tahan xuhun ña, ta tatu cuanaa noo xuhun ña, tyaa ña noo candil. Ta tihvi ña tandihí cuii maa chichi vehe ña. Ta nanducu ña tandihí cuii nyacua nya cha nañihí ña xuhun cuan. ⁹ Ta cuhva cha yahá nañihí ña, cuahan ña cua nanducu ña chi ñaha tahan ña, ta ñáyivi cha nyicú yuvehe ña, ta catyí ña chi ñu: “Cusii cuñi ndo chihin vatyí cha nañihí xuhin cha chinaa”, catyí ña. ¹⁰ Ta catyí chi ndo vatyí tyicuan caa sii cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuñí Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyó uvi tahan sehe ra. ¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahán chi chi ra. Tyicuan ta sutu ra chahá ra chi ninduvi sehe ra. ¹³ Ta ña cuaha ri quívi cuan ta ra luhlu ca cuan xico ra tandihí cuii maa cha chahá sutu ra chi ra. Ta sandu iin ri ra xuhun ra, ta quehen ra ityí ta cuahan ra noo ñuu cañi. Ta yucuan chiyó ra, sanaa ra tandihí maa xuhun ra chihin tusii iñi. Ta quíni xaan chícá noo ra. ¹⁴ Tyicuan ta chaa noo tama ityí nu iyó ra. Ta quichaha chisoco ra vatyí ndihí xuhun ra sanaa ra. ¹⁵ Tyicuan ta chahan ra chicachan ra tyiño chi

noo ra ñuu cuan. Ta ra cuan tachí ra chi ra noo nu iyó quini sana ra, vatyí cusaha cuenda ra chi tí. ¹⁶Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuvi ñi ra cachi ra cha cachachí quini cuan soco yori maa chaha cha cachi ra. ¹⁷Tyicuan ta nicohon ñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuñí cúvi soco ihya. ¹⁸Vityin cunuhin nu nyaá suti. Ta catyí chi ra tyi chicoo cuatyí nuu Nyoo ta nuu maa ra. ¹⁹Ta ña naña que cha cuvi sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

²⁰Tyicuan ta quehen ra ityí cuanuhu ra nya vehe sutu ra. Cañi ca vachi ra ta nanyehé sutu ra chi ra, ta cundahví cuñi ra nyehe ra chi ra. Ta chingo ra chisatahan ra chi sehe ra. Ta nanumi ra chi ra. ²¹Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuví sehun chii”, catyí ra chi sutu ra. ²²Soco sutu ra tyihi ra tyiño, ta catyí ra chi musu ra: “Tava ndo sahma vaha ca ta sacuihno ndo chi ra. Ta tyihi ndo noo xehe nundaha ra. Ta nyaca ndo zapato quihí chaha ra ñandihí. ²³Ta siñ ri cahñi ndo noo becerru cha xahan ca, vatyí cachi yo chi tí. Vatyí vityin cucoo yo noo vico. ²⁴Vatyí ra sehi ihya cha chihí ra saha mai tuhun. Cuñí mai vatyí ma nyehe que chi ra, soco natuví ra”, catyí sutu ra. Tyicuan ta quichaha chicoo ñu vico. Ta si xaan cacuñí ñu vatyí natuví ra cuan.

²⁵Tyicuan ta inga sehe ra, ra cha chahnu ca, ñohó ra nu chiquí. Ta cuhva cha cuanachaa ra nya vehe ra, ta quichaha chiñí ra yaa. Ta chiñí ra vatyí si xaan cachitá chaha ñu. ²⁶Tyicuan ta cuhva cha cuyatyn ra nya vehe ra ta cana ra chi noo musu ra. Ta ndaca tuhun ra ñáa cha cuví cuan. ²⁷Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chi noo becerru xahan ca. Vatyí vaha ri nachaa yañun, ta ñahri cha cuví chi ra”, catyí ra. ²⁸Tyicuan ta cuxaan xaan cuñí ra. Ta ña cuñí ra ndihvi ra chichi vehe. Soco sutu ra chahan ra chichahan ndahvi ra chihin ra, vatyí na ndihvi ra chichi vehe. ²⁹Tyicuan

ta nachahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun cahún. Ta ni noo chaha ta ta nachahnu que nu cahún. Soco ni noo ndixihyu lee ta cuhva con chii vatyí coi vico chihin ra tahin. ³⁰Soco vityin cha nachaa sehun ihya, ra cha sanaa xuhun chihin ñu cata ñi. Ta vityin chahun noo becerro quiti xahan ca chi ra”, catyí ra chi sutu ra. ³¹Tyicuan ta nachahan sutu ra ta catyí ra chi ra: “Sehi, yoho tyicuan ri nyaún chihin. Ta tandihí cha cumi, chuun cuví. ³²Soco vityin tahan chi sacuvi yo vico ihya. Ta cusí cuñí yo. Vatyí nachaa yañun, ra cha saha mai tuhun vatyí chihí. Tari quivi nandoto ra cuví ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa saha yo tumañi ñi chihin cha iyó chi yo

¹Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayí vavaha ra. Ta iyó noo ra yindaha tandihí tyiño saha ra. Ta chahan coyo musu ra canacatyí ra chi ra tyayí cuan, vatyí ra yihí ndaha tyiño cuan, sanaa ra tandihí cha iyó chi ra. ²Tyicuan ta cana ra tyayí cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihí tyiño cha sacuvun chii. Vatyí ma saha tyiño con chihin”, catyí ra chi ra. ³Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñí ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu. ⁴Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahí, ta vaha chai vehe ñu”, ndichi xiñi ra. ⁵Tyicuan ta cana ra chi noo noo ra yosoyicá chi chitoho ra. Ta quichaha catyí ra chi noo ra cuan: “¿Yoso yosoyicón chi chitohi?” catyí ra. ⁶Tyicuan ta nachahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra. ⁷Tyicuan ta chaa inga ra. Ta quichaha ndaca tuhun tucu ra chi ra

cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigo”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra. ⁸Tyicuan ta chitó chitoho ra cha ña vaha cha chinyacuví ra. Ta iyo xaan cuñí ra vatyí yatyí xaan sahá ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñáyivi ña vaha aña yatyí xaan ca sahá ñu chi ñu ican saha ñáyivi vaha aña.

⁹Ta catyí chi ndo, vatyí cotyiño ndo cha tyayii cha iyó siquí ñuhu ñáyivi ihyá, ta sahá ganaa ndo amigo. Ta quívi cha ndihi cha tyayii cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰Tatu chitó ndo cotyiño ndo chiin cha iyó chi ndo cha cuenda cha vaha, tyicuan caa coto tucu ndo cotyiño ndo tatu cuaha iyó chi ndo. Soco tatu ña chitó ndo cotyiño ndo chiin cha iyó chi ndo, tyicuan caa ma coto tucu ndo cotyiño ndo tatu cuaha coo chi ndo. ¹¹Ta catyí chi ndo, tatu ña sahá ndo tumañi iñi chihin cha iyó chi ndo siquí ñuhu ñáyivi ihyá, Nyoo ma cuhva ra noo cha tyayii cha ndicha chi ndo. ¹²Tandihí cha iyó chi ndo maa Nyoo chahá noo chi ndo. Soco tatu ña sahá ndo tumañi iñi chihin cuan, ma cuhva ra cha tahán chi chi ndo.

¹³Noo musu ma cuvi coo uvi tahan chitoho ra. Vatyí musu cuan cuñí ca ra chi noo ra, ta ñima ca chi inga ra. O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyayii —catyí ra Jesús.

¹⁴Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chachu cuehe ra nyehe ra chi ra. Vatyí maa ra fariseo cuan cuñí xaan ra chi xuhun.

¹⁵Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñáyivi. Soco chitó Nyoo vatyí aña ndo ña vaha. Ta tandihí cha catyí ñáyivi vatyí cahnu xaan ihyá siquí ñuhu ñáyivi, Nyoo ña cuñí nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo aña yochi yo

¹⁶Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chi ñáyivi nyacua nya quívi chaá ra Juan. Ta maa ra Juan quichaha cahan ra tuhun vaha vatyí cha cuñí quichi Nyoo vatyí cunyaca ñaha ra. Ta tandihí ñáyivi cha nducú cuhva yoso caa cunyaca ñaha Nyoo aña ñu, ican ñu quihvi ndaha ra.

¹⁷Soco catyí chi ndo, vasi cunaa andivi ta ñuhu ñáyivi, soco cha cuví ley Nyoo cha tyaa ra Moisés, ma naa nyacua nya cha yaha cuvi tandihí.

Sañahá ra Jesús vatyí ña vaha cha sandoo rayii chi ñasihi ra

(Mt. 19,1-12; Mr. 10,1-12)

¹⁸Tatu noo rayii iyó ñasihi ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayii chihin noo ñaha cha sandoo yii chii, coo tucu cuatyí ra nuu Nyoo.

Nu sañahá ra Jesús tuhun noo ra tyayii chihin ra Lázaro

¹⁹Chiyó noo ra tyayii. Ta vaha ñihnó ra. Ta tandihí quívi iyó ra vico ta chachí vaha ra. ²⁰Ta chiyó tucu noo ra ndahvi cha nañi Lázaro. Ta cuaha xaan ndihyi iñi ra. Ta nyaá ra yuvehe ra tyayii cuan. ²¹Ta ra ndahvi cuan, cuñí ra cachi ra, vasi cha canacoyo nu mesa ra tyayii cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra. ²²Ta noo quívi cuan chihí ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihí tucu ra tyayii cuan. Ta chicuchi ñu chi ra.

²³Tyicuan ta ra tyayii cuan nyehé xaan ra tundoho nu ñohó ra anyaya. Ta nanyehé ra nu cañi. Ta nanyehé ra chi ra Abraham chihin ra Lázaro, nyaá ra chihin ra yucuan.

²⁴Tyicuan ta canachaá ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiiin nundaha ra. Ta na satoo ra iin titi ndutya nu yai. Vatyí nyehé xain tundoho nu cayú ñuhu ihyá”, catyí ra.

²⁵Soco ra Abraham catyí ra chi ra: “Ñicohon iñun vatyí vaha chiyon ñuhu ñáyivi. Ta ra Lázaro, ña vaha chiyó ra. Vityin vaha iyó ra ihyá, ta yoho nyehún tundoho. ²⁶Ta siin ri, mahñu ihyá cono xaan. Ta ma cuvi yaha ra iyó tyehe cuhun ra chiña. Ta ma cuvi yaha ra iyó chiña, quichi ra tyehe”, catyí

ra Abraham chi ra. ²⁷ Tyicuan ta quichaha catyí ra tyayíi cuan: “Tata Abraham, sahun tumañi iñi chii. Ta tachun chi ra Lázaro nya vehe suti. ²⁸ Vatyí iyó ohon tahan yañi. Ta cuñí vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra. ²⁹ Tyicuan ta quichaha catyí ra Abraham: “Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñí ra”, catyí ra Abraham. ³⁰ Tyicuan ta quichaha catyí ra tyayíi cuan: “Tata Abraham. Ma quichaha ra. Soco tatu yóo cha nandoto, ta cuhun cucahan chihin ra, yucuan ta tyasoho ra ta nasama ra cuhva iyó ra”, catyí ra cuan. ³¹ Soco ra Abraham catyí ra: “Tatu ña cuñí ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino iñi ra tuhun cahan noo ndiyi tatu nandoto ra ta cahan ra chihin ra.”

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha
(Mt. 18.6-7, 21-22; Mr. 9.42)

¹ Tyehé caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativí chi ñáyivi. Soco ndahvi ra ndahvi ra sativí chi ñáyivi. ² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativí ra chi ñu ni nasama cuhva iyó ihya.

³ Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra. ⁴ Ta ñi ri maa sacuvi ra cha ña vaha chihin ndo ucha tahan chaha cha noo quivi. Tatu ndi ucha tahan chaha ta catyí ra chi ndo vatyí ndu uvi iñi ra cha sacuví ra chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuví sacuvi yo cuaha cha vaha

⁵ Tyicuan ta quichaha catyí ra cachicá tyiño nuu ra Jesús chi ra:

—Cuhva cha chinó ca iñi ndi chuun —catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chiin ri tari cuhva noo chiti mostaza luhlu, cuví

catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

Yoso caa tahán chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chí sahatyíño ra, o chí saha cumi ra quiñi sana ndo, ¿atu catyí ndo chí ra: “Cunya ta cachun”? Ña catyí ndo chí ra tyicuan caa. ⁸ Soco tyehé caa catyí ndo chí ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chí ra. ⁹ Ni ña tuhvá ndo nacuhva ndo tyahvi nyoo chí ra vatyí sacuvi ra ñáá noo tyiño tava ndo chí ra. ¹⁰ Tyicuan caa tucu nyoho chihin Nyoo. Quivi ndiñi sacuvi ndo cha catyí Nyoo chí ndo, tahán chí catyí ndo: “Nyuhu chiin ri cha tachun chí ndi, yucuan ri sacuvi ndi. Ta ña yaha ca.”

Nu sanduvahá ra Jesús chi uchi tahan ra tyahyu coño

¹¹ Ityi cuahan ra Jesús ityi ñuu Jerusalén yaha ra nu cuví xahñi Samaria chihin Galilea. ¹² Nu chaá ra noo ñuu, quita coyo uchi tahan ra cuhví chihin cha tyahyu coño ra. Ta chicutayucu ra nyasava ri. ¹³ Ta quichaha cacanchaa ra chí ra Jesús, ta catyí ra:

—Yoho, Maestro Jesús, cundahvi cuñi chí ndi —catyí ra.

¹⁴ Tyicuan ta nanyehé ra Jesús chí ra ta catyí ra chí ra:

—Cuahan ndo. Ta cua sañaha ndo chí ndo chí tata sutu vatyí cha nduvahá ndo.

Tyicuan ta cuahan coyo ra cuan. Ta ityi cuahan coyo ra ta cananyehé ra vatyí nduvahá ra. ¹⁵ Tyicuan ta cuhva cha nanyehé noo ra cuan vatyí nduvahá ra, cuanuhu chata ra nu nyaá ra Jesús. Ta cana chaa ra, ta sacahnu ra chí Nyoo. ¹⁶ Ta chicuñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chí ra. Ta ra cuan, ra Samaria cuví ra.

¹⁷ Tyicuan ta catyí ra Jesús chí ra:

—¿Atu ñima uchi tahan ndo nduvahá? ¿Nya nyaá inga iin tahan ca ra?

¹⁸ ¿Ñáá tuhun cha noo tuhun ri maa ra inga ñuu nandichi chata ra ta sacahnu ra chí Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Ndycuita ta cuahan. Nduvahun vatyí chinó iñun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candacá tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya síqui ñuhu ñáyivi, ñima cha nyehé yo cuví. ²¹ Ma cuvi catyí ñáyivi: “Ma ra nyaá ihya, o ma ra nyaá ityí cuan.” Vatyí Nyoo cha chaá ra mahñu ndo, ta nyacá ñaha ra aña ñáyivi cuenda ra —catyí ra chi ra.

²² Yahá cuan ta catyí ra chi ra cachicá noo chihin ra:

—Cuchaa chi quívi vatyí cucuñi ndo nyehe ndo chi yuhu Rayii cha quichi nya gloria. Soco ma nyehe ndo chii. ²³ Cuchaa tucu chi quívi ta cucatyí ñáyivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyi-con ndo chi ra cuan vatyí ñime cuví. ²⁴ Vatyí tandihí ñáyivi cunyehe chi yuhu Rayii cha quichi nya gloria quívi quichi inga chaha. Tari nyehé tandihí ñáyivi nu quihvi tacha nicahnu andívi, tyicuan caa cucuvi. ²⁵ Soco cunyehe xihne tundoho. Vatyí ñáyivi cha iyó cha vityin cua cutasi cuñi nyehe ñu chii.

²⁶ Tari cuví quívi ra Noé, tyicuan caa cucuvi quívi quichi yuhu Rayii cha quichi nya gloria inga chaha. ²⁷ Quívi ra Noé, chachí ñu. Chihí ñu. Tandahá ñu. Ta chahá ñu sehe ñu tandaha. Nya quívi quihvi ra Noé chichi barcu ra, ta coon savi xaan. Ta tandihí ñu cachihí ñu. ²⁸ Tyicuan caa tucu cuví quívi ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu. ²⁹ Soco quívi cha quita ra Lot ñuu Sodoma cuan, coon ñuhu chihin azufre andívi. Ta chihí tandihí ñáyivi Sodoma. ³⁰ Ta tyicuan caa cucuvi quívi cha quichi tucu yuhu Rayii cha quichi nya gloria inga chaha.

³¹ “Ta quívi cuan tatu nyicú ndo nuquehe ndo, ma ndihvi ndo chichi vehe ndo vatyí tava ndo ndaha tyiño ndo. O tatu chicá noo ndo nu chiquí, ma cunuhu ndo nya vehe ndo. ³² Nichon iñi ndo ñasihi ra Lot, ñáa cha cuví chi ña. ³³ Tandihí ndo cha cuñí ca ndo cha iyó síqui ñuhu ñáyivi ihya, cucunaa

ndo. Ta tandihí ndo cha ña quichaha ndo cha iyó ñáyivi ihya, cucacu ndo.

³⁴ “Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra.

³⁵ Ta uvi tahan ñusihi iñ ri cu nyicó ñu quívi cuan. Noo ri ña, cunaquehin. Ta nonga ña cundoo ña. ³⁶ Ta catyí chi ndo vatyí uvi tahan ra cohon nu chiquí. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chiñi ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihi, yucuan cundu iñ ri chii.

18

Nu sañahá ra Jesús vatyí tari chicán noo ñaha chihí yii chi juez, tyicuan caa tahán chi cacán yo chi Nyoo

¹ Tyicuan ta chahá ra Jesús noo cuhva ihya. Vatyí na cacán tahvi ñu tyicuan ri maa, ta ma cundihñi ñu. ² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyivi chi Nyoo. Ta ni ri ña quichaha maa ra chi ñáyivi. ³ Ta suri ñuu cuan iyó tucu noo ñaha ndahvi cha chihí yii. Ta chahan ña chichan ña chihin ra, vatyí chicá ña cuatyí chaha noo ra xaan iñi chi ña. ⁴ Ta juez cuan ña quichahá maa ra chi ña. Ña sandaa maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: “Vasi ña yuhví chi Nyoo, ta ñahri cuende chi ñáyivi, ⁵ soco ñaha ihya sayangá xaan ña chii. Ta yucuan chaha cua sacaqui chi ña. Vatyí coto quichi ca ña, ta sanaquiqui ña tisihi”, ndichi xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quíni iyó ra ta tyinyee ra chi ñaha ndahvi cuan, ⁷ ta nyaca cuví Nyoo, ¿atu ma tyinyee ra chi ñáyivi cha chicán ndiyaca ta ndiquívi chi ra? ¿Atu cuatu xaan ra cha tyinyee ra chi ñu? ⁸ Catyí chi ndo, vatyí numi ri cutyinyee ra chi ñu. Soco quívi quichi yuhu, Rayii cha quichi nya gloria, inga chaha, chitó Nyoo tatu nañihi que chi ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹Tyicuan ta chahá ra Jesús nonga cuhva cuenda ra savahá chii, ta ña cuñi nyehe ra chi inga ra. Ta quichaha catýí ra:

¹⁰—Iyó uvi tahan ra chahan chichi vehe ñuhu chiacan tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra. ¹¹Ta ra fariseo cuan chicuinyaa ra, ta quichaha cahan ra chihin Nyoo. Ta cahnu saha ra chi ra. Ta catýí ra: “Sutu Mañi yuhu, nacuhve tyahvi nyoo chuun vatyi yuhu ñima tari inga ñáyivi cuví. Vatyi suhu ñu. Quiñi iyó ñu. Iyó ñasihi ra ta iyó inga ñusihi chi ra. Ta ni ri ñima tari ra tavá xuhun cuan cuví. ¹²Vaha ca quichahí tuhun maun ta ñima ca inga ñáyivi. Vatyi uvi chaha cha noo vitya ña chachí. Ta chahí uchi siqui noo noo cientu cha sahá ganai chuun”, catýí ra. ¹³Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyi ndu uvi iñi ra cuatyi ra. Ta catýí ra: “Sutu Mañi yuhu. Nyehe ndahvi chii vatyi iyó xaan cuatyi”, catýí ra —catýí ra Jesús.

¹⁴Ta catýí tucu ra Jesús tyehe caa:

—Catýí chi ndo vatyi Nyoo sahá ra tucanhun iñi chi ra tavá xuhun cuan. Sanaa Nyoo cuatyi ra ta cuanuhu ra nya vehe ra. Soco ra fariseo cuan, ñahri tucanhun iñi ñihi ra, vatyi yóo ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducanhun ra chi ñu —catýí ra Jesús.

Nu nasocó ra Jesús chi ra cuatyaa
(Mt. 19.13-15; Mr. 10.13-16)

¹⁵Tyicuan ta quichi nyaca ñáyivi chi ra cuatyaa chi ra Jesús vatyi na tyiso ra ndaha ra xiñi ndotyin. Soco cuhva cha nanyehe ra cacticá noo chihin ra vatyi tyicuan caa, ña chahá ca ra. ¹⁶Tyicuan ta caná ra Jesús chi ra cacticá noo chihin ra, ta catýí ra chi ra:

—Saña ndo chi ra cuatyaa na quichi maa ndotyin nu nyai. Ta ma casi ndo, vatyi ñu nyacá ñaha Nyoo añima, cuví ñu tari ra cuatyaa ihya. ¹⁷Ta catýí chi ndo vatyi tatu ña ita iñi ndo chi Nyoo, tari noo ra cuatyaa ita iñi ndotyin chi sutu ndotyin, ma cuvi quihvi ndo nu nyacá ñaha Nyoo.

Nu chahá ra Jesús tuhun vatyi yíi xaan nacuhva cuenda noo ra tyayii chi ra chi Nyoo

(Mt. 19.16-30; Mr. 10.17-31)

¹⁸Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catýí ra:

—Maestro, ra vaha cuvún. ¿Yoso caa cunyacuvi ta ñihi ñáyivi cha ma naa ca maa coi? —catýí ra.

¹⁹Tyicuan ta catýí ra Jesús chi ra:

—¿Ñáá tuhun catyún vatyi ra vaha cuví? Noo ri maa Nyoo cuví ra ra vaha. (Ta cha catyún tyi vahí, nacotón tyi Nyoo cuví.) ²⁰Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihi chuun. Ma cahñun chi ñáyivi. Ma suhun. Ma cahun cuendu siqui ñáyivi. Ta sahun ñáyivi chi sutun ta chi sihun” —catýí ra Jesús.

²¹Tyicuan ta ra cuan catýí ra:

—Tandihí ihya ta quichahí nyata luhli ta nyacua nya vityin —catýí ra.

²²Nu chiiñi ra Jesús cha catýí ra cuan, tyicuan ta catýí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta cuhva chi ñu ndahvi. Ta quichun chate. Tyicuan ta coo cha tyayii chuun nya gloria —catýí ra.

²³Soco ra cuan nu chiiñi ra tuhun cuan, nducuihya xaan iñi ra, vatyi tyayii xaan ra.

²⁴Cha nanyehe ra Jesús vatyi nducuihya iñi ra, ta quichaha catyi ra:

—Yíi xaan ta cuvi nacuhva cuenda ñu tyayii chi ñu na cunyaca ñaha Nyoo añima ñu. ²⁵Tañi tyehe yaha noo camello xiu noo yiqui ticu, ta ñima ca cha quihvi noo ñu tyayii nu nyacá ñaha Nyoo —catýí ra.

²⁶Ta ñu cha cachiñi tuhun ihya catýí ñu:

—Tatu tyicuan caa, ¿yóo cha cuví cacu vii? —catýí ñu.

²⁷Tyicuan ta ra Jesús catýí ra:

—Tandihí cha ña cuví sacuvi rayii, Nyoo cuví sacuvi ra —catýí ra.

²⁸Tyicuan ta ra Pedro catýí ra:

—Sutu Mañi yuhu, nyuhu tandihí maa cha iyó chi ndi sandog ndi, ta nyicón ndi chuun —catýí ra.

²⁹Tyicuan ta catýí ra Jesús chi ra:

—Cha ndicha catýí chi ndo. Vatyi tandihí ndo cha sandoo ndo vehe ndo, o ñasihi ndo, o yañi ndo, o sutu ndo, o sehe

ndo cha catyi cha chahā ndo cha cunyaca ñaha Nyoo añima ndo, ³⁰ cuaha xaan cha vaha cunañihi ndo ihya ñayivi ta cunañihi ndo inga ñayivi cha ma naa ca maa —catyi ra Jesús.

Inga chaha sacotó ra Jesús yoso caa cucahñi ñáyivi chi ra

(Mt. 20.17-19; Mr. 10.32-34)

³¹ Ta canā siin ra Jesús chi ndi uchi uvi ra cachicá noo chihin ra, ta catyi ra chi ra:

—Vityin cuhun yo nya Jerusalén. Vatyí yucuan cuchino cava tandihi tuhin cha tyaa ra profeta Nyoo ta cha naha. Vatyí yuhu Rayii cha quichi nya gloria cuví. ³² Vatyí cu-cuhva cuenda ra chii chi ra inga ñuu, ra cha ñima ra ñuu Israel cuví. Ta cucuacu nyaa ra chii. Ta cucahan ra chii. Ta cutycusi ra nui. ³³ Ta cucañi ra chii, ta cucahñi ra chii, soco nu cu uñi quivi ta cunandote —catyi ra Jesús.

³⁴ Ta ra cachicá noo chihin ra ña cutuñi iñi ra tuhun cuan ni ña cachitó ra ñáa tuhun cahán ra Jesús chihin ra. Vatyí ña chahā Nyoo vatyí cacutuñi iñi ra.

Nu sananyehé ra Jesús chi noo ra cuaa ñuu Jericó

(Mt. 20.29-34; Mr. 10.46-52)

³⁵ Cuhva cha cua chaa ra Jesús ñuu Jericó. Ta yuhu ityi cuan nyaá noo ra cuaa. Ta chican ra limuxtan. ³⁶ Tyicuan ta chiñi ra vatyí cuaha xaan ñáyivi cua yaha. Ta ndaca tuhun ra ñáa cha cuví cuan. ³⁷ Ta ñáyivi nacatyí ñu chi ra vatyí ra Jesús, ra ñuu Nazaret, ican cua yaha cuan. ³⁸ Tyicuan ta quichaha cana chaa ra:

—Yoho Jesús, ra vachi tata rey David! ¡Cundahvi cuñi nyehun chii! —catyi ra.

³⁹ Ta ra cha cuahan coyo ityi nuu cuan, quichaha cacatyí ra chi ra, nacasi ra yuhu ra. Soco chaa ca caná chaa ra, ta catyi ra:

—Yoho, ra vachi tata ra David! ¡Cundahvi cuñi nyehun chii! —catyi ra.

⁴⁰ Tyicuan ta chicuñi ra Jesús yucuan. Ta tachí ra tyiño na cuquehen chi ra cuaa cuan. Ta cuhva cha chaá ra cuaa cuan nu nanyaá ra Jesús, ta ra Jesús quichaha ndaca tuhun ra chi ra, ta catyi ra:

⁴¹ —¿Náa cha cuñun vatyí sacuvi chuun?

Tyicuan ta ra cuaa cuan nacahan ra, ta catyi ra:

—Sutu Mañi yuhu, cuñi nanyehi —catyi ra.

⁴² Tyicuan ta catyi ra Jesús chi ra:

—Nanyehe. Cha nduvahā chiti nuun, vatyí chinó iñun chii —catyi ra.

⁴³ Ta caa cuhva ri cuan, ra cuaa cuan nanyehé ra. Ta cuahan ra chata ra Jesús. Ta sacahnú ra chi Nyoo. Ta tandihi ñáyivi cha nyehe ñu tyicuan caa, sacahnú ñu chi Nyoo.

19

Nu cuahan ra Jesús vehe ra Zaqueo

¹ Yucuan ta quihvi ra Jesús ñuu Jericó cuan. Ta cua yaha ra chichi ñuu cuan. ² Ta yucuan iyó noo ra tyayii vavaha. Nañi ra Zaqueo. Ta ra cuví nuu cuenda ra catava xuhun cuenda gobiernu ñuu Roma cuví ra. ³ Ta cuñi xaan ra cohon nuu ra chi ra Jesús. Ta ña cuví nyehe ra chi ra vatyí cuaha xaan ñáyivi. Ta maa ra tyaha xaan ra. ⁴ Yucuan ta chino vavaha ra cuahan ra ityi nuu, ta ndaa ra nu noo yutun cha nañi sicómoro cha nanyaá yuhu ityi nu cua yaha ra Jesús, tacuhva cuvi nyehe ra chi ra. ⁵ Ta cuhva cha yahā ra Jesús nanyehé ndaa ra ityi siqui ta nanyehé ra chi ra Zaqueo. Ta quichaha catyi ra chi ra:

—Zaqueo, sanumi ta noun nu yutun chiña. Vatyí vityin cuhin vehun —catyi ra chi ra.

⁶ Tyicuan ta numi ri noo ra Zaqueo nuu yutun cuan. Ta sii vavaha cuví chi ra. Ta quehen cuenda ra chi ra Jesús. Ta cuahan ra chihin ra nya vehe ra. ⁷ Ta cha nyehe ñáyivi cha tyicuan caa, ta tandihi ñu quichaha cahán nyaa ñu chi ra Jesús. Ta catyi ñu vatyí ndoo ra vehe noo ra iyó cuatyí. ⁸ Nu canyicú ra chichi vehe cuan, ra Zaqueo nicuinanyaa ra. Ta quichaha catyi ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyivi chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyi ra chi ra.

⁹ Tyicuan ta catyi ra Jesús:

—Vityin cacu añimon, ta ñáyivi chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo. ¹⁰ Vatyí yuhu Rayii cha quichi nya gloria vachi nanduqui ta vachi sacaqui chi ñáyivi cha cua naa —catyi ra Jesús.

Nu sañahá ra Jesús na saha tyiño yo chihin cha chahá Nyoo chi yo

(Mt. 25.14-30)

¹¹ Ta cha ni ri ca cha chiñi ñáyivi tuhun cahan ra Jesús, quichaha cahan tucu ra inga cuhva ihyá. Vatyí cha cuyatyin chaa ra Jerusalén. Ta ñáyivi cuñí maa ñu vatyí cha cua quichaha ra cunyaca ñaha ra yucuan. ¹² Tyicuan ta catyí ra:

—Chiyo noo ra vaha ta cuñí cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey. ¹³ Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra. ¹⁴ Soco suhva ñáyivi ñuu ra, tasi cuñí ñu nyehe ñu chi ra ta ña cuñí ñu cha cuví ra rey chi ñu. Ta tachí ñu chi suhva ra cuhun chata ra, vatyí catyí ra vatyí ña cuñí ñu cha cuví ra rey chi ñu. ¹⁵ Soco ra cuan nduví ra rey. Tyicuan ta nachaa ra nya ñuu ra. Ta quivi cha nachaa ra, cana ra chi musu ra, ra cha sandoq ra xuhun chii. Vatyí coto ra yoso saha ganaa xuhun ra cha ni ri ca cha chahan ra. ¹⁶ Ta chaq noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra. ¹⁷ Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiñon chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra. ¹⁸ Tyicuan ta chaq tucu inga ra cha chaha ra xuhun chii. Ta quichaha catyí ra: “Ma xuhun ihyá. Saha ganai ohon tahan ca chaha siqui xuhun cha sandoun chii”, catyí ra. ¹⁹ Tyicuan ta catyí rey chi ra: “Yoho cunyaca ñahun ohon tahan ñuu”, catyí ra. ²⁰ Tyicuan ta chaq tucu inga ra cuan. Ta quichaha catyí ra: “Ma xuhun ihyá cha chahun chii. Yuhu chicumí vahi chichi noo pañitu. ²¹ Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyivi”, catyí ra cuan. ²² Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehin cha ña saha tyiñe, ²³ ¿ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan. ²⁴ Ta quichaha catyí

ra chi ra canyicú cuan: “Tĩnyaa ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra. ²⁵ Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra. ²⁶ Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca saha tyiño chihin cha chahí chi, cucuhva que chi ra. Ta ra cha chahí chiin ri, ta ña cuñí ra saha tyiño ra chihin cuan, cutinyaa ndihi chi ra. ²⁷ Ta tandihi ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén

(Mt. 21.1-11; Mr. 11.1-11; Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityí Jerusalén. ²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra. ³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuñí ti. Ndachi ndo chi ti. Ta nyaca ndo chi ti tyehe. ³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chihuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihi ra chi ti tari cuhva catyí maa ra Jesús. ³³ Ta cuhva cha candachi ra chi ti, chaq coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chihuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casandaa ra chi ra Jesús siqui ti. ³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityí nu cua yaha ra, yosó ra burru cuan. ³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chi ra chihin cha sií cuví chi ñu. Ta sacahnú ñu chi Nyoo vatyí cuaha xaan cha vaha

nyehē ñu cha sacuvī ra. ³⁸ Yucuan chaha catyí ñu:

—¡Na sacahnu yo chi Rey ihya vatyi vachi ra chihin sivi Nyoo! ¡Na coo cha taxi ri andiví! ¡Ta na sacahnu yo chi Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyi cuihya iñi ra. ⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo. ⁴³ Soco cuchaa quivi ña vaha vatyi ra xaan iñi chi ndo cutyihí chacu ra chi ndo. Vatyi tandihí ri ityi cuquichi coyo ra siqui ndo. Ta cacañi tahan ra chihin ndo. ⁴⁴ Ta cucacun ñuhú ra chi ndo ta cucahñi ra chi ndo. Ta ni noo yuu yoso nyitahan ta ma sandoo ra. Tyicuan caa cucuví vatyi ña cuñí ndo nacoto ndo cha quichi Nyoo quichi sacacu ra chi ndo.

Nu tavá ñehe ra Jesús chi ra caxico chichi vehe ñuhu cahnu

(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihí ra caxicó ta casatá yucuan. ⁴⁶ Ta catyí ra chi ra:

—Nu tutu Nyoo catyí chi vatyi vehe Nyoo, nu chicán tahvi yo chi ra cuví. Soco nyoho sananduví ndo vehe nu nyicú ra suhu —catyí ra.

⁴⁷ Ta tandihí quivi chahán ra Jesús chisañaha ra chi ñáyivi chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra. ⁴⁸ Soco ña ñihí maa ra cuhva yoso caa sacuvi ra. Vatyi tandihí ñáyivi ta vaha tyasohó ñu tuhun cahán ra Jesús.

20

Nu ndacq tuhun ra fariseo chi ra Jesús yóo cha tachí chi ra vatyi cahán ra nuu ñáyivi

(Mt. 21.23-27; Mr. 11.27-33)

¹ Noo quivi cuan cha ni ri ca cha sañahá ra Jesús chi ñáyivi chichi vehe ñuhu cahnu, ta cahán ra tuhun yoso caa sacacú Nyoo chi ñu. Ta chaq coyo ra cuví nuu chi tata sutu chihin ra casacuahá cuenda ley vehe ñuhu, iñ ri chihin ra cacuví mandoñi. ² Ta cacatyí ra chi ra:

—Catyi chi ndi zyóó cha tyaa tyiño chuun vatyi sacuvun tyehe caa? —catyí ra.

³ Tyicuan ta ra Jesús quichaha catyí ra chi ra:

—Yuhu tucu cua ndaca tuhin noo tuhun chi ndo. ⁴ ¿Yóó cha tachí chi ra Juan vatyi sacondutya ra chi ñáyivi? ¿Atu Nyoo tachí chi ra, o ñáyivi?

⁵ Tyicuan ta cacatyí ra cuan chi ra tahan ra:

—Tatu catyí yo vatyi Nyoo tachí chi ra Juan cuan, cucatyí ra chi yo “Ñáá tuhun ña chinó iñi ndo tuhun cahán ra.” ⁶ Ta tatu catyí yo vatyi ñáyivi tachí chi ra, ñáyivi cahñi ñu chi yo chihin yuu. Vatyi tandihí ñu, ta cuñí ñu vatyi Nyoo tachí chi ra —cacatyí ra.

⁷ Tyicuan ta cacatyí ra chi ra Jesús vatyi ña cachitó ra yóo cha tachí chi ra Juan vatyi na sacondutya ra chi ñáyivi. ⁸ Tyicuan ta ra Jesús catyí ra chi ra:

—Ni ri yuhu, ta ma catyi chi ndo yóo cha tachí chii, cha sacuvi tyehe caa.

Nu sañahá ra Jesús vatyi tari ra sahá tyiño ña vaha tyicuan caa cuví ra cha cucahñi chi ra

(Mt. 21.33-44; Mr. 12.1-11)

⁹ Tyicuan ta quichaha catyi ra Jesús noo cuhva ihya chi ñáyivi:

—Noo ra tachí ra cuaha yoho tichaha ndivi nu ñuhú ra. Yahá cuan ta chahá noo ra ñuhú cuan chi suhva ra casaha tyiño. Tyicuan ta naha cuahan ra inga ñuu. ¹⁰ Ta chaq quivi cha iñí chiti cuan. Tyicuan ta tachí ra chi noo musu vatyi cuquehen ra suhva chiti cha tahán chi chi ra. Soco cacañi xaan ra casahá tyiño cuan chi musu cuan. Ta sacunuhu ra chi ra chihin nu ndaha nu ndii ra. ¹¹ Tyicuan ta chitoho yoho tichaha ndivi cuan tachí tucu ra chi inga musu. Suri cacañi xaan ra chi ra. Ta cacahan uhvi ra chi ra. Ta natachí ra chi ra. Soco suri ñahri cachaha ra cuiso ra cunuho. ¹² Tyicuan ta

chitoho cuan tachi tucu ra chi inga ra. Soco suri tyicuan caa chinyacuvi tucu ra chihin ra. Ta sañicuehe ra chi ra. Ta tava ñehe ra chi ra yucuan.

¹³ Yaha cuan ta quichaha catyi chitoho ñuhu cuan: “¿Yoso caa cunyacuvi vityin? Cua tachi chi sehi, ra cha cuñi vavahi. Ta cha nanyehe ra chi ra, vasi casaha ra ñáyivi chi ra, vatyi sehi cuví chi ra.” ¹⁴ Soco cuhva cha cananyehe ra casahá tyiño cuan chi ra, catyi ra chi ra tahan ra: “Ican ra ihya cundoo chihin ñuhú ihya tatu chihi sutu ra. Soco nacahñi yo chi ra. Vatyi ndoo maa yo chihin ñuhú ihya”, catyi ra. ¹⁵ Tyicuan ta tava ñehe ra chi sehe chitoho ñuhú cuan ityi chata chachu. Ta cachahñi ra chi ra —catyi ra Jesús.

Tyicuan ta catyi ra Jesús chi ñáyivi nyicú cuan:

—¿Ñáa cha cusacuvi chitoho ñuhú cuan chi ra cachahñi chi sehe ra cha cuhva cha cuñi nyoho? ¹⁶ Catyi chi ndo vatyi quichi ra ta cahñi ra chi ra casahá tyiño cuan. Ta cuhva ra ñuhú cuan chi inga ra —catyi ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyi ñu:

—¿Ña cuñi Nyoo ta cuvi tyicuan caa! —catyi ñu.

¹⁷ Soco ra Jesús nanyehe ra chi ñu ta catyi ra:

—Tyicuan caa cucuvi. Vatyi nyaá nu tutu Nyoo ta catyi chi tuhin tyeha caa: Yuu cha ña cuñi ra casavahá vehe cotyiño ra,

Ican cuan cuví yuu cha niñi ca.

¹⁸ Tari tahnu noo ra cha canacava siqui yuu, tyicuan caa tivi ñu ña cuñi quichaha tuhun cahín. Ta siin ri, tari taxin nyihi noo ra cha canacava yuu siqui, tyicuan caa cunaa ñu ña cuñi quichaha tuhun cahín —catyi ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuvi iñi ra vatyi tuhun cha catyi ra Jesús, chi maa ra nañi cuan. Ta cuñi ra catiin ra chi ra Jesús vatyi cacahñi ra chi ra. Soco ña cachitó maa ra yoso caa. Vatyi yuhví ra chi ñáyivi.

Tuhun cha tyiyahví ñu xuhun chi gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachi ra chi suhva ra vatyi cunducu nyehe ra chi ra Jesús. Ta casahá

ra tyi ra vaha cacuvi ra. Vatyi coto ra ñáa noo tuhun ña vaha cahán ra Jesús tacuhva cuví catiin ra chi ra. Ta cuhva cuenda ra chi ra chi gobernador. ²¹ Yucuan chaha candaca tuhun ra casavaha chii cuan chi ra Jesús:

—Maestro, chitó ndi vatyi vaha tuhun cahún. Ta sañahún cha vaha chi ñáyivi. Ta ñima cuhva iyó ri ñu nyehun soco aña ñu ñandihi. Ta maa ri maa ityi Nyoo sañahún. ²² Catyi chi ndi zatu vaha cha tyiyahvi yo cha chicán gobiernu ñuu Roma chi yo, o ña vaha? —catyi ra.

²³ Soco ra Jesús tuví iñi ra vatyi cuñi ra nducu nyehe ra chi ra. Ta catyi ra chi ra:

—¿Ñáa tuhun cuñi ndo nducu nyehe ndo chii? ²⁴ Sañaha ndo noo xuhun chiña chii, na nyehi. ¿Yóo chi nuu ta yóo chi sivi nyaá nu xuhun ihya? —catyi ra.

Tyicuan ta nacahan ra cuan, ta catyi ra:

—Nuu gobiernu, ta sivi ra ñandihi —catyi ra.

²⁵ Tyicuan ta catyi ra Jesús:

—Tu tyicuan caa, cuhva ndo xuhun chiña chi ra cuví gobiernu cuan vatyi chi maa ra tahn chi. Ta cuhva tucu ndo chi Nyoo cha tahn chi chi ra —catyi ra Jesús chi ra.

²⁶ Ta ña cuví maa sandahvi ñaha ra chi ra Jesús chihin tuhun cahán ra nuu ñáyivi. Ta iyo xaan cacuñi ra tuhun cha nacahan ra. Ta taxi ri cuví ra.

Nu cacuñi ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yaha cuan ta cha coyo suhva ra saduceo nu nyaá ra Jesús. Maa ra cuví ra casañahá vatyi ña nandotó ndiyi.

²⁸ Tyicuan ta catyi ra chi ra Jesús:

—Maestro, sandoo ra Moisés tuhun ihya vatyi tatu noo ra chihí ra ta ndoo ñasihi ra, tatu yori sehe ra chiyo chihin ña, tahn chi cha tandaha yañi ra chihin ña tacuhva cha ma cunaa tata yañi ra. ²⁹ Soco cuñi ndi coto ndi vatyi chiyo ucha tahan ra chihin yañi ra. Ta ra cha ñihi ca chicoo ñasihi ra, soco yori sehe ñu chiyo, ta chihí ra. ³⁰ Tyicuan ta naquehen ra cha cu uvi suri maa ña cuan. Ta yori tucu sehe ñu chiyo. Ta chihí tucu ra cuan. ³¹ Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyo chihin ña. ³² Ta nu ndihi tuhun chihí ndihi maa ña. ³³ Ta cuñi ndi coto ndi yóo ra cuví

ñasihi chi ña chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴Tyicuan ta nacahan ra Jesús, ta catyí ra: —Ihya ñayivi, rayii ta ñusihi tandaha ñu.

³⁵Soco ñu cha tahn chi nandoto inga ñayivi nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha. ³⁶Ta ñahri tuhun chihi iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandotó ñu. ³⁷Cha ndicha cuví vatyí ra Moisés nu sacotó ra tuhun cha cayu taca ñu cuan, yucuan sacotó ra chi yo vatyí ñu chihi nandotó ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra. ³⁸Vatyí Nyoo ñima Nyoo cuenda ñayivi chihí cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó añaima yo vasi chihí coño ñuhu yo —catyí ra Jesús.

³⁹Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

⁴⁰Yucuan ta ña caña ca maa ñi ra candaca tuhun ra ñáa ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

⁴¹Tyicuan ta ndacá tuhun ra Jesús chi ñu:

—¿Ñáa tuhun cha catyí ndo vatyí ra Cristo tata ra David vachi ra? ⁴²⁻⁴³Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunya chiyo vahi nyacua nya cuhve chi ra xaan ñi chuun vatyí cuaca chahun siqui ra”, catyí Nyoo chihin yuhu ra David ta cha naha.

⁴⁴¿Yoso caa cha ra vachi tata ra David cuví chi ra Cristo, ta suri maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

⁴⁵Tandihí ñayivi cachini ñu tuhun cahán ra Jesús chihin ra cachicá noo chihin ra nu catyí ra tyehe caa:

⁴⁶—Saha ndo cuenda chi ndo chihin ra casacuahá ley vehe ñuhu. Tahn xaan ñi ra cuihno ra sahma cañi. Ta cuñi ra vatyí

saha ndo ñayivi chi ra nuyahvi ta cuhva ndo nocumi chi ra. Ta nanducú ra tyayu vaha cunyaa ra chichi vehe ñuhu ta nu cuahan ra vico. ⁴⁷Ta naha chicán tahvi ra chi Nyoo nu tuvi, cha cuñi ra cha catyí ñayivi tyi vaha ñayivi cuví ra. Soco suri maa ra tinyaa ra vehe ñu ndahvi cha chihí yí vatyí ña cuví tyiyahvi ñu xuhun cha tavá ra siqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

Noo ofrenda cha chahá noo ñaha sihi cha chihí yí

(Mr. 12.41-44)

¹Ta nyehe ra Jesús vatyí cuaha xaan ñu tyayí catyihí ra xuhun chichi caja cha nanyaa chichi vehe ñuhu cahnu. ²Ta nyehe tucu ra noo ñaha ndahvi cha chihí yí. Ta tyihí ña uvi tahan ri xuhun cuatyí. ³Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihí ñu tyayí cuan. ⁴Vatyí cha ndoó ri siqui chi ñu catyihí ñu. Soco ñaha ihya tyihí ña tandihí cha iyó chi ña —catyí ra.

Nu catyí ra Jesús vatyí cucani ñayivi vehe ñuhu cahnu

(Mt. 24.1-2; Mr. 13.1-2)

⁵Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaquí xaan yuu. Tyaquí xaan tacaá cha chahá ñayivi. Tyicuan ta quichaha catyí ra Jesús:

⁶—Coo quivi ta tandihí cha nyehé ndo ihya cutani. Ni noo yuu ta ma coso ca siqui tahan. Vatyí cusanacoyo ra xaan ñi chi ndo.

Ñáa ndihí seña cha cucuvi cha ni cumañi ca naa ñayivi

(Mt. 24.3-28; Mr. 13.3-23)

⁷Tyicuan ta quichaha candaca tuhun ra chi ra Jesús, ta catyí ra:

—Maestro, ¿ama cucuvi tandihí tuhun cahun ihya? ¿Yoso caa ta coto ndi tatu cha cuyatyn cha naa ñayivi? —cacatyí ra.

⁸Tyicuan ta catyí ra Jesús:

—Saha vaha ndo cuenda, coto sandavi ñaha ra chi ndo. Vatyí cuaha xaan ra cuquichi, ta cucotyíño ra sivi, ta cucatyí ra: “Yuhu cuví Cristo ra cha saquichi Nyoo chi.

Cha cuñí cunaa ñáyiví”, cucatyi ra. Soco ma cunyicon ndo chi ra. Ta ma chino iñi ndo chi ra. ⁹ Ta quívi ñihi ndo tuhun tyi iyó cuatyí ta cañí tahan ñáyiví, ma nayuhvi ndo. Vatyí tandihí cuan cutahan chí cuví xihna ca. Soco cumañi ca chaa quívi cha naa ñáyiví.

¹⁰ Ta catyí tucu ra:

—Ñáyiví iyó noo ñuu cucañi tahan ñu chihin ñáyiví inga ñuu. Ta cucoo cuatyí. ¹¹ Ta cutaan nahnu. Ta cucoo tama. Ta cucoo cuehe tandihí ri ityi. Ta cunyehe ñáyiví cuaha xaan cha yuhví andiví. Cuaha xaan seña nahnu cha ña tuhvá ñu nyehe cunyehe ñu. ¹² Soco cha cumañi ca cuví ihya, cutasí iñi ñáyiví chi ndo. Ta cucacan ñu cuatyí chaha ndo. Vatyí cucutuñi chi ndo ta cucuhva cuenda ñu chi ndo chi tata sutu. Ta cutyihí ñu chi ndo chichi vehe caa. Ta cunyaca ñu chi ndo nuu rey ta nuu ra cacuví tyiño cha catyí yuhu. ¹³ Tyicuan ta cuví cahan ndo tuhin chihin ñu. ¹⁴ Soco saha ndo cuenda ta ma caca xiñi ndo ñáá tuhun cunacahan ndo chihin ra cuví tyiño cuan. ¹⁵ Vatyí yuhu cucuhve tuhun cunacahan ndo. Ta cucuhve cha chiñi tuñi xiñi ndo. Vatyí ni noo ra xaan iñi chi ndo ta ma cuví chasaha ra chi ndo chihin tuhun cahán ra. ¹⁶ Soco ñáyiví cunacuhva cuenda ñu chi ndo nuu ñu xaan iñi chi ndo. Nyacua nya sutu ndo ta sihi ndo, yañi ndo, tahan ndo, ta ra tahan ndo cunacuhva cuenda ra chi ndo chi ñu xaan iñi chi ndo. Ta yihí nyoho cucahñi ñu chi ndo. ¹⁷ Tandihí ñáyiví ta cutasí cuñí ñu nyehe ñu chi ndo cha catyí yuhu. ¹⁸ Soco ni noo ixi xiñi ndo ta ma cunaa. ¹⁹ Tatu ma ndu uvi iñi ndo chii, cucacu añima ndo.

²⁰ Quívi nyehe ndo vatyí nicachico yuhu ñuu Jerusalén ihya nyicú sindaro, coto ndo vatyí cha cuñi chaa quívi cha sanaa ra ñuu ihya. ²¹ Ta ñáyiví cha nyicú ityi Judea, na cono ñu ta na tixehe nuu ñu ityi yucu. Ta ñu nyicú ñuu Jerusalén ihya, na quita ñu. Ta ñu nyicú nu chiqui, ma ndichí ñu ñuu ihya. ²² Vatyí yucuan quívi cutachi tuñi Nyoo chi ñáyiví ñuu ihya. Vatyí cuchino cava tandihí cuhva catyí maa nu tutu Nyoo. ²³ Ta ndahví ñusihi cha ñohó sehe quívi cuan. Ta ndahví ñu cha iyó cha lee sehe cha ni chaxín ca. Vatyí cuaha xaan tindoho cunyehe ñu ta tandihí ñáyiví. Vatyí cuxaan xaan Nyoo chihin ñáyiví ñuu Jerusalén ihya. ²⁴ Sindaro cucahñi ra chi suhva ñáyiví chihin mityi

ra. Ta suhva ñu cutiin ra ta cunyaca ra chi ñu vehe caa inga ñuu. Ta ñáyiví cha ñima ñu Israel cuví, cucuaca chaha ñu Jerusalén nyacua nya quívi cha catyí maa Nyoo.

Yoso caa cuquichi Rayii cha quichi nya gloria inga chaha

(Mt. 24.29-35, 42-44; Mr. 13.24-37)

²⁵ Tyicuan ta cuaha cha iyo cunyehe ñáyiví nu ñanyii, ta nu yoo, ta nu tiño. Ta ihya siquí ñuhu ñáyiví cunayuhvi ñáyiví chihin cha iyo cunacatyin tyañuhu. ²⁶ Ta cucuña ñu chihin cha yuhví ñu cha chicá xiñi ñu ñáá ndihí cha cua cuví ihya siquí ñuhu ñáyiví. Vatyí nyacua nya cha iyó andiví cunacanda. ²⁷ Tyicuan ta cunyehe ñu chi yuhu Rayii cha quichi nya gloria vachi chichi noo vico tyaquí chihin tunyee iñi Nyoo, ta chihin cha cahnu cuví ra. ²⁸ Ta cuhva cha quichaha tuhun ihya, sandunii ndo iñi ndo ta cusii cuñi ndo vatyí numi xaan ta cucacu ndo —catyí ra.

²⁹ Tyicuan ta chahá ra Jesús noo cuhva ihya, ta catyí ra:

—Saha ndo cuenda noo yutun cha nañi higuera, o ñáá nonga yutun. ³⁰ Tatu cha cua cuyatyin cha coon savi cha nduyutya numa tun. ³¹ Ta tyicuan caa tucu nyoho, tatu cha nyehe ndo vatyí cha quichaha tandihí tuhun cha catyí chi ndo, coto ndo vatyí cha cuyatyin quívi cha cunyaca ñaha Nyoo siquí ñuhu ñáyiví ihya.

³² Soco catyí chi ndo vatyí tuhun ihya cucuvi cha ni ri ca cha iyó ñáyiví. ³³ Ta coo quívi cucunaa andiví ta ñuhu ñáyiví, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñáyiví ihya. Ta coto sana iñi ndo ta chaa quívi quichi yuhu ta quichi tundoho siquí ndo. ³⁵ Vatyí tyicuan caa cucuvi chi tandihí ñáyiví iyó siquí ñuhu ñáyiví. Sana iñi ñu ta tari noo cha cua nacasi Nyoo nu ñohó ñu ta ma cuví quita ñu. ³⁶ Soco nyoho cuatu tuhva ri ndo. Cacan tahvi ndo chi Nyoo tandihí quívi, tacuhva tyinyee ra chi ndo. Ta ma cunaa ndo quívi cuan, tacuhva cuví chaa vaha ndo nuu yuhu Rayii cha quichi nya gloria —catyí ra Jesús.

³⁷ Ta cha ñucahñu sañahá ra Jesús chi tandihí ñáyiví chichi vehe ñuhu cahnu. Ta

cha cha cuaa chahán ra yucu Olivo. ³⁸ Ta tandihí ñáyivi chaꝯ coyo ñu chichi vehe ñuhu cahnu ndihí ñaha ri. Vatyí cuiñi ñu tuhun cahán ra.

22

Nu cua xico ra Judas Iscariote chi ra Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quivi cha coo vico pascua vico nu tuhva ñu chachi pan cha ñahri yuchan iya yihí chihin. ² Ta ra cacuví nuu chi tata sutu chihin ra casacuahá cuenda ley vehe ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñáyivi.

³ Tyicuan ta quihví cuilhna chi ra Judas cha catyí ñáyivi Iscariote chi. Ta maa ra cuví noo ra cha uchi uvi tahan ra cha nacachí ra Jesús. ⁴ Ta ra cuan, chahan ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús. ⁵ Ta ra cuan sii xaan cacuví chi ra. Ta tyaa ra cuhva vatyí cuhva ra xuhun chi ra Judas. ⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñáyivi nyicú chihin ra.

Nu cuxiñí ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaꝯ quivi cha cuví vico nu chachí ñu pan cha ñahri yuchan iya yihí. Ta suri quivi cuan tuhva ñu chahñi ñu noo mbee luhlu cha vico pascua cuan. Vatyí cachi ñu chi ti. ⁸ Ta ra Jesús tachí ra chi ra Pedro chihin ra Juan, ta catyí ra chi ra:

—Cuahan ndo cua sanduvaha ndo mbee cha cuxiñi yo —catyí ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰ Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quiyi ndutya. Ta cuahan ndo chata ra nyacua nya nu quihví ra chichi vehe. ¹¹ Ta catyí ndo chi chitoho vehe cuan: “Ra Sacuaha, cuñí ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin

ra, vatyí casanducahnu ra vico pascua.” Tyicuan caa catyí ndo chi ra. ¹² Tyicuan ta maa ra cuan cusañaha ra cuarto cahnu ityi siqui nu cu uvi piso chi ndo. Ta cha yahá nduvii. Ta yucuan sanduvaha ndo cha cuxiñi yo —catyí ra chi ra.

¹³ Tyicuan ta cuahan coyo ra. Ta nañihí ra tandihí tari cuhva catyí ra Jesús. Tyicuan ta casanduvahá ra cha cuxiñi ra cha vico pascua cuan.

¹⁴ Yucuan ta cha chaꝯ cuhva cha cuxiñi ra Jesús ta tandihí apóstol ra, cachicunicyú ra yuhu mesa. ¹⁵ Tyicuan ta ra Jesús quichaha catyí ra:

—Cuñí xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehi tundoho ta cúvi. ¹⁶ Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyí ra.

¹⁷ Tyicuan ta quehen ra noo vasu vinu. Ta nacuhvá ra tyiyahvi nyoo chi Nyoo, ta sayahá ra chi tandihí ra nyicú chihin ra. Ta quichaha catyí ra:

—Quehen ndo ihya. Ta cõho ndo suhva suhva. ¹⁸ Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñáyivi ihya —catyí ra.

¹⁹ Ta yahá cuan ta quehen ra pan. Ta nacuhvá ra tyahvi nyoo chi Nyoo. Ta tahví sava ra. Ta chahá ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri ñicohon iñi ndo chii ta cuxiñi ndo tyehe caa —catyí ra.

²⁰ Ta cha yahá cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari niñi cuví. Ta cha catyí nyoho ta cucatí niñi. Vatyí cucúvi cha catyí ndo.

²¹ Soco vityin, ra cha cua nacuhva cuenda chii chi ra xaan iñi chii, ñin ri yoso ndaha ra chihin ndahi nu mesa ihya. ²² Vatyí yuhu Rayii cha quichi nya gloria cua cuví chii tari cuhva cha nyaá maa tyi cuví chii. Soco ñdahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan

ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cañu ca cuví

²⁴Yahá cuan ta quichaha candatuhun ra cachicá noo chihin ra Jesús nya ra cañu ca cuví. ²⁵Soco ra Jesús catyí ra:

—Chitó nyoho vatyí ra nyacá ñaha chi ñáyivi iyó siquí ñuhu ñáyivi, ñihi xaan yosó ra siquí ñu. Ta cacuí ra vatyí catyí ñáyivi tyi tyinyee ra chi ñu. ²⁶Soco nyoho ña tahán chi sacuí ndo tari sacuí ra cuan. Vatyí tatu cuñí ndo cuví ndo ra cuví nuu, tahán chi sacuí ndo tyiño nuu ñáyivi. Vatyí tatu sacuí ndo tyiño nuu ñáyivi, ican ndo cuví ra cuví nuu. ²⁷Vatyí ihya siquí ñuhu ñáyivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuí ra tyiño nuu ra. Soco yuhu ra cuví nuu cuví, ta sacuí tyiño nuu ndo.

²⁸Soco nyoho tyicuan ri ndihi ndo chihin, tandihí chaha cha nyehí tundoho. ²⁹Yucuan chaha, yuhu chahí noo nu cunyaca ñaha ndo tari cha chahá Suti chii cha cunyaca ñahi. ³⁰Vatyí cucachi ndo cucoho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaquí. Ta cunyaca ñaha ndo chi ndi uchi uvi tahan itiyí ñáyivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra

(Mt. 26.31-35; Mr. 14.27-31; Jn. 13.36-38)

³¹Tyicuan ta catyí ra Jesús chi ra Pedro:

—Nyehé vahun, yoho Simón. Vatyí cuihna, ra nañí Satanás, cha chicán noo nu cunyahva ra itiyí chi ra vatyí quisi ñihno ra chi ndo tari naquisi ñihno yo trigu, tacuhva ndu uvi iñi ndo chi Nyoo. ³²Soco chicán xain chi Nyoo cha catyun, vatyí ma ndihi cha chinó iñun chi ra. Ta quívi ndu uvi iñun cuatyun ta na chino vaha iñun chii cutyinyeyun chi ra tahun cha ma sandihí ra cha cachino iñi ra chii —catyí ra Jesús chi ra Simón.

³³Ta ra Simón catyí ra chi ra:

—Sutu Mañi yuhu, cha iyó vahi vatyí chuhin chuhun vasi vehe caa, vasi tuhun chihí —catyí ra.

³⁴Tyicuan ta catyí ra Jesús chi ra:

—Pedro, catyí chuun vatyí vityin cha ni ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñí chaa cuhva cha cunacuhva cuenda ra Judas chi ra Jesús

³⁵Tyicuan ta ndacá tuhun ra Jesús chi ra cachicá noo chihin ra, ta catyí ra:

—Ñicohon iñi ndo quívi cha tachí chi ndo vatyí cucahan noo ndo nuu ñáyivi ta ñahri nyiso ndo, ni ri cha cachi ndo, ni ri xuhun, ni ri sahma ndo. ¿Atu chiyo cha cumañi chi ndo quívi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahma ndo ta sata ndo. ³⁷Vatyí catyí chi ndo, vatyí tandihí tuhun cha nyaá nu tutu Nyoo cuchino cava vatyí tyehé caa catyí chi: “Sahá ñu tuhun tyí cuví ra noo ra quívi iyó.” Tyicuan caa catyí tuhun nu tutu Nyoo. Ta tandihí cuan cuchino cava —catyí ra.

³⁸Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chicán tahvi ra Jesús chi Nyoo Getsemaní

(Mt. 26.36-46; Mr. 14.32-42)

³⁹Tyicuan ta quitá ra Jesús vehe cuan. Ta cuahan ra nya yucu Olivo. Tari cuhva tuhvá maa ra chahan. Ta ra cachicá noo chihin ra cuahan coyo ra chata ra. ⁴⁰Ta cuhva cha chaa ra yucuan, quichaha catyí ra chi ra cachicá noo chihin ra:

—Cacán tahvi ndo chi Nyoo tacuhva ma cuvi chasaha cuihna chi ndo.

⁴¹Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo, ⁴²ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco na cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³Tyicuan ta tuví noo ángel, vatyí cuhva ca ra tunyee iñi chi ra. ⁴⁴Ta cha ni ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitá ta canacoyó nu ñuhú, ta tari caa ñihi caa.

⁴⁵Yucuan ta nducuita ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehe ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixi ra.

⁴⁶Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta cacan tahvi ndo chi Nyoo, tacuhva cha ma cuvi chasaha cuihna chi ndo.

Nu chaha cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷Ni cahan ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo chihin ra Jesús cuví ra. Ta tuhva ra chi ra Jesús vatyí cua tyayuhu ra xitín ra. ⁴⁸Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Rayii cha quichi nya gloria, chi ra xaan iñi chii? —catyí ra Jesús.

⁴⁹Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha. ⁵²Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiín ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo? ⁵³Ndiquivi chinyai chichi vehe ñuhu cahnú, ¿ñáá tuhun ña cuví tiín ndo chii? Soco vityin chaa cuhva cha ñaa iñi vatyí ra ña vaha nyacá ñaha. Yucuan chaha vachi tiín ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴Tyicuan ta catiín ra chi ra Jesús. Ta cua nyaca ra chi ra nya vehe ra cuví nuu chi tata sutu. Ta ra Pedro nyasava ri cuahan ra chata ra. ⁵⁵Ta cha chaa coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicun-yaá tucu ra Pedro mahñu ñáyivi cuan. ⁵⁶Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehe ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷Soco ra Pedro catyí ra:

—Yuhu ña ñohó nui chi ra cuan.

⁵⁸Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹Ta cha yaha noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰Tyicuan ta catyí ra Pedro:

—Ña chité ñáá tuhun cahun —catyí ra.

Ta caa cuhva ri cuan, ni cahan ca ra Pedro tuhun cuan, ta chacu chaa ri noo loho.

⁶¹Tyicuan ta ra Jesús nanyehe ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶²Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra. ⁶⁴Cachahñi ra sahna nuu ra, ta quichaha cacatu ra nuu ra. Ta cacatyí ra chi ra:

—Nacoto yóó cha cañi chuun —cacatyí ra chi ra.

⁶⁵Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu in ri ra chahnu nuu cuan chihin ra cuvi nuu chi tata sutu, ta ra casacuahá cuenda ley vehe ñuhu. Ta caquehen ra chi ra Jesús. Ta cuahan coyo ra chihin ra nya nu cuvi junta cahnu. Ta quichaha candaca tuhun ra chi ra:

⁶⁷ —Catyi chi ndi zatu ra Cristo ra cha saquichi Nyoo cuvún? —catyí ra chi ra.

Ta ra Jesús nacahan ra, ta catyí ra:

—Tatu catyi chi ndo vatyí ican, ma chino iní ndo. ⁶⁸ O tatu ndaca tuhín ñáá cha ndaca tuhín chi ndo, ma nacahan ndo ni ma saña ndo chii. ⁶⁹ Soco vityin ta ityi nuu ca yuhu Rayi cha quichi nya gloria cucunyai chiyo vaha Nyoo ra cha iyó tandihi tunyee iní chi —catyí ra.

⁷⁰ Tyicuan ta tandihi ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —catyí ra.

Tyicuan ta nacahan ra Jesús ta catyí ra:

—Suri maa ndo catyí tyi ican cuví.

⁷¹ Tyicuan ta quichaha cacatyí ra cuan chi ra tahan ra:

—Nyehe nuu. Yuhu maa ra quitá. Ña niñi ca cha tava yo cha ndaa. Vatyí suri maa yo chini —cacatyí ra.

23

Nu nyehe ra Pilato vatyí ñahri cuatyí ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihi ra nducuita ra. Ta cua nyaca ra chi ra nya nu nyaá ra Pilato, ra cuví gobernador. ² Tyicuan ta quichaha cacatyí ra chi ra Pilato:

—Ra ihya, sativí ra chi ñáyivi chihin cha cahán ra nuu ñu, ta catyí ra vatyí ña vaha tyiyahvi ndi xuhun chí gobiernu ñuu Roma. Ta siin ri catyí ra vatyí ra Cristo ra cha saquichi Nyoo vatyí cuví ra rey cuví ra —cacatyí ra.

³ Tyicuan ta ra Pilato quichaha ndaca tuhun ra chi ra Jesús, ta catyí ra:

—¿Atu ican yoho cuví Rey cuenda ñu Israel? —catyí ra.

Ta nacahan ra Jesús, ta catyí ra:

—Ican, suri maun catyí.

⁴ Tyicuan ta quichaha catyí ra Pilato chi ra cuví nuu chi tata sutu ta chi ñáyivi:

—Ñahri cuatyí ra ihya —catyí ra chi ñu.

⁵ Soco xaan ca nanduví ñu. Ta quichaha cacatyí ñu:

—Cahnu xaan cuatyí ra. Cuaha xaan tisihi chahá ra, vatyí cahán ra nuu ñáyivi. Cha xihna ri quichaha cahán noo ra nuu ñáyivi ityi Galilea. Ta nicañi maa ityi vachi ra cahán ra chihin ñáyivi nyacua nya chaa ra Judea ihya —catyí ñu.

Nu tachi ra Pilato chi ra Jesús nuu ra Herodes

⁶ Cuhva cha chini ra Pilato tuhun ihya, quichaha ndaca tuhun ra tatu ra Galilea cuví ra Jesús. ⁷ Ta catyí ñáyivi chi ra vatyí ican. Tyicuan ta sacuhun ra Pilato chi ra nya nu nyaá ra Herodes. Vatyí ra Herodes cuví ra gobernador nicahnu Galilea. Soco quivi cuan ñohó ra ñuu Jerusalén. ⁸ Ta cuhva cha nanyehé ra Herodes chi ra Jesús, sihi xaan cuví chi ra. Vatyí cha naha xaan cuñí ra nyehe ra chi ra. Vatyí ñihí ra tuhun vatyí cuaha xaan milagru sacuví ra. Ta cuñí xaan ra nyehe ra noo milagru cha sacuví ra Jesús. ⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra. ¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuatyí siquí ra. ¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahma yahvi ta tyaquí chi ra, tari cha tuhvá rey ñihnó. Tyicuan ta natachi ra Herodes chi ra inga chaha nuu ra Pilato. ¹² Ta quivi cuan ra Pilato chihin ra Herodes nduvaha iyó ra chihin tahan ra. Vatyí nu quichi chi, ña cuví canyehe ra chi tahan ra.

Nu cutuñi chi ra Jesús vatyí cucuvi ra

(Mt. 27.15-26; Mr. 15.6-15; Jn. 18.39—19.16)

¹³ Tyicuan ta ra Pilato sandu in ri ra chi ra cuví nuu chi tata sutu, ta chi ra cuví tyiño, ta chi ñáyivi ñandihí. ¹⁴ Ta catyí ra chi ñu:

—Nyoho quichi nyaca ndo chi ra ihya chii. Ta catyí ndo vatyí sativí ra chi ñáyivi. Soco yuhu cha sacutuñi chi ra nuu ndo. Ta ñahri cuatyí ra ñanihi tari cuhva catyí ndo. ¹⁵ Ta ni ri ra Herodes ña ñanihi ra ni noo cuatyí ra. Yucuan chaha sandichi ra chi ra inga chaha nu nyai. Nyehe ndo vatyí ñahri cha sacuví ra, ñahri cuatyí ra. Ta ña tahn chi cha cúvi ra. ¹⁶ Yucuan chaha cua tachi tuñi ri chi ra. Yahá cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyí cha ni ri ca cha iyó vico cuan, tahn chi cha saña ra

noo ra ñohó vehe caa, tari cuhva cha tuhva maa ra. ¹⁸Soco tandihí ñu ñin ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹Ta ra Barrabás cuan ñohó ra vehe caa cha cuenda cha cuñi ra nacanda ra siqui ra cuví tyiño. Ta siin ri chahñi ra chi ñáyivi. ²⁰Ta ra Pilato cuñi ra saña ra chi ra Jesús. Ta quichaha catyí ra chi ñáyivi cuan inga chaha vatyi cusaña ra chi ra. ²¹Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²²Tyicuan ta cha cu uñi chaha catyí ra Pilato chi ñu:

—Soco ¿ñáá cha ña vaha sacuvi ra ihya? Nyehi tyi ña tahn chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³Soco ñáyivi caná chaa ca ñu, ta catyí ñu vatyi tyaa ra chi ra nu cruzi. Ta cuví chasaha ñu. Vatyi maa ñu ta ra cacuví nuu chi tata sutu caná chaa ñu. ²⁴Tyicuan ta sacuvi ra Pilato tari cuhva catyí ñu. ²⁵Ta tari cuhva catyí ñáyivi, saña ra chi ra Barrabás cha ñohó vehe caa cha cuenda cha cuñi ra nacanda ra siqui ra cuví tyiño ta cha cuenda cha chahñi ra. Ta sacuvi ra chi ra Jesús tari cuhva catyí ñu.

Nu cua cunyaa ra Jesús nu cruzi

(Mt. 27.32-44; Mr. 15.21-32; Jn. 19.17-27)

²⁶Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷Ta cuaha xaan ñáyivi cuahan chata ra. Ta cuaha xaan ñusihi chacú chaa ñu cha cuihya iñi ñu cha catyí ra. ²⁸Soco ra Jesús nanyehé ra chi ñu. Ta quichaha catyi ra chi ñu:

—Tandihí nyoho ñusihi ñuu Jerusalén, ma cuacu ndo cha catyi yuhu. Cuacu ndo, soco cha catyi maa ndo ta cha catyi sehe ndo. ²⁹Vatyi cuquichi quivi nu cunyehe xaan ndo tundoho. Ta cucahan ñáyivi chihin tandihí ndo cha cuví ndo ñusihi cha yori sehe ndo iyó. Ta cucatyi ñu chi ndo: “Vaha xaan vatyi yori sehe ndo iyó vatyi cuaha xaan tundoho nyehé yo vityin”, cucatyi ñu chi ndo. ³⁰Vatyi quivi cuan cucuñi ñu vatyi na canacoyo yucu siqui ñu tacuhva sahvi chi chi ñu. ³¹Vatyi tatu tyehe

caa sacuvi ñu chihin yuhu cha ñahri cuatyí. Yaha ca cuhva cunyacuvi tucu ñu chihin maa ndo cha iyó cuatyí ndo —catyí ra Jesús.

³²Ta quehen tucu sindaro cuan chi uvi tahan ra quiñi iyó, vatyi cahñi ra chi ra ñin ri chihin ra Jesús. ³³Tyicuan ta cachaa ra noo nu nañi Nu Cuví Yiqui Xiñi Ndiyi. Ta yucuan chicatacañ ra chi ra Jesús nu cruzi. Ta tyicuan caa tucu chinyacuvi ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra. ³⁴Ta cuhva cha tacaá ra Jesús nu cruzi cuan, quichaha catyi ra:

—Sutu Mañi yuhu, saha tucahnu iñi chi ra. Vatyi ña chitó ra ñáá cha nyacuví ra chihin —catyí ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan. ³⁵Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyí ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyi ra.

³⁶Ta suri cahan cuehe tucu sindaro chi ra. Ta catuhva ra chi ra. Ta chaha ra vinu iya coho ra. ³⁷Ta quichaha cacatyi ra chi ra:

—Tatu rey cuenda ñáyivi Israel cuvún. Sacacu chuun —cacatyi ra.

³⁸Ta siqui cruzi ityi xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahan letra cuan: “Ican ra ihya cuví Rey cuenda ñu ñuu Israel” —catyí nu vitu cuan.

³⁹Ta noo ra quiñi iyó cha tacaá xiin ra Jesús, quichaha cahan ra chihin ra, ta catyí ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyí ra.

⁴⁰Soco inga ra cuan catyí ra chi ra:

—¿Atu ña yuhvún chi Nyoo? Vatyi nyehún suri tundoho cha nyehé maa ra vityin.

⁴¹Maa yo nyehé yo tundoho ihya vatyi iyó cuatyí yo. Soco ra ihya ñahri cuatyí ra iyó —catyí ra.

⁴²Tyicuan ta quichaha catyi ra chi ra Jesús:

—Yoho Jesús, ñichon iñun tuhin quivi cunyaca ñahun —catyí ra.

⁴³ Tyicuan ta ra Jesús catyí ra chi ra:

—Cha ndicha catyí chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyí ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

⁴⁴ Tyicuan ta ñáá cuhva ora quichaha nduñaa ñayivi, nyacua nya caa uñi cha cha iñi. ⁴⁵ Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnya sava.

⁴⁶ Tyicuan ta quichaha cana chaa ra Jesús: —Sutu Mañi yuhu, natyaí añime chichi ndahun —catyí ra.

Ta cuhva cha catyí ra tuhun ihya, ta chihí ra.

⁴⁷ Ta ra cuví nuu chi sindaro cuan, nyehe ra tandihí cha cuví cuan. Ta sacahnú ra chi Nyoo, ta catyí ra:

—Ñahri ndicha cuii cuatyí ra iyó —catyí ra.

⁴⁸ Ta tandihí ñáyivi cha canyicú yucuan canyehe ñu cha cuví cuan. Ta cuahan coyo ñu ta suri cacañí ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús. ⁴⁹ Ta tandihí ñu cha ñohó nuu chi ra Jesús, ta ñusihi cha chinyicón chi ra nya Galilea, canyicú ñu nya sava ri. Ta nyehe ñu tandihí cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

⁵⁰ Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel. ⁵¹ Ta ra José cuan nyatú ra quivi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan. ⁵² Tyicuan ta चाहन ra chicanan ra coño ñuhu ra Jesús chi ra Pilato. ⁵³ Ta yahá cha sanoo ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chi ra chichi noo ñaña chaa cha cuví yavi yuu cha savahá ñu. ⁵⁴ Ta viarni cuví, quivi cha sanduvahá ñáyivi cha cachi ñu cha sabaru inga quivi, quivi nyitatu ñu. Ta cha cuñi cuví sabaru.

⁵⁵ Ta tandihí ñusihi cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra. ⁵⁶ Ta

cuanuhu coyo ñu nya vehe ñu. Ta sanduvahá ñu ndutya vixi चाहन vatyí cutyihí ñu coño ñuhu ra Jesús coto coo xico. Vatyí tyicuan caa cuví costumbre cuiya cuan. Tyicuan ta nyitatú ñu inga quivi cuan tari cuhva catyí maa tuhun cha tachí Nyoo chi yo.

24

Nu nandotó ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quivi nu quichaha vitya. Ta ñaha cuiri cuahan coyo ñusihi cuan nya nu ñaña ra Jesús. Ta nyisó ñu ndutya vixi चाहन cha sanduvahá ñu. ² Ta cuhva cha चाह coyo ñu, nanyehe ñu vatyí ña nyasí ca yavi yuu cuan tari cuhva chinyasí maa. ³ Ta quihví ñu chichi, soco ña nañihí ñu coño ñuhu Sutu Mañi yo Jesús. ⁴ Ta yucuan tayucú ñu chihin cha yuhví ñu. Ta ña chitó ñu ñáá cunyacuví ñu. Ta tuví uvi tahan rayiñ nuu ñu. Ta xiño vavaha sahma cañihno ra. ⁵ Ta chihin cha yuhví ñu, ta chicuiñi chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu:

—¿Ñáá tuhun nanducú ndo chi ra Jesús ihya nu ñohó ndiyi? ⁶ Yori ra ñohó ihya, vatyí cha nandotó ra. Nicohon iñi ndo tuhun cha चाहन ra chihin ndo quivi chicá noo ra Galilea. ⁷ Catyí ra vatyí tahan chi cucuhva cuenda ñu chi ra ndaha ra iyó cuatyí. Vatyí cuví ra Rayi cha quichi nya gloria. Ta tahan chi cucañi ra chi ra nu cruzi. Soco nu cu uñi quivi cunandoto ra. Tyicuan caa catyí ra chi ndo —catyí ángel cuan chi ñu.

⁸ Tyicuan ta nichohon iñi ñu tuhun चाहन ra Jesús quivi cuan. ⁹ Ta cuanuhu coyo ñu. Ta nacatyí ñu chi ndi uchi iñi tahan ra apóstol ra Jesús chihin tandihí ca ñáyivi. ¹⁰ Ta ñu sacotó tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihi. ¹¹ Soco ra cachica noo chihin ra Jesús cuñi maa ra vatyí चाहn ri maa ñu. Ta ña chinó iñi ra tuhun चाहn ñu.

¹² Soco ra Pedro nducuita ra ta chino vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú inchiyo xiin. Tyicuan ta cuanuhu ra nya

vehe. Ta iyo cuñí ra vatyí ñahri ca coño ñuhu ra Jesús catuví chichi ñaña cuan.

*Noo cha cuví ityi Emaús
(Mr. 16.12-13)*

¹³ Suri maa quívi cuan, uvi tahan ra chicá noo chihin ra Jesús cuahan coyo ra nya ñuu cha nañí Emaús, tari noo cha uchi iin kilómetro cha quita yo Jerusalén. ¹⁴ Ta cuahan coyo ra ta ndatuhún ra tuhun ñáá ndihi cha cuví. ¹⁵ Ta cha ni ri ca cha candatuhún ra, ta ra Jesús natahan ra chi ra nu cuahan coyo ra. ¹⁶ Soco ni ri maa nyehé ra chi ra Jesús, ña canicohon nuu ra chi ra. Vatyí tari cha iyó noo cha chasi nuu ra tacuhva cha ma canicohon nuu ra chi ra Jesús. ¹⁷ Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha nañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyí cuví ra noo ra profeta Nyoo. Ta chihin tunyee iñi cahnu Nyoo sacuví ra cha vaha nuu Nyoo ta nuu ñáyivi. ²⁰ Soco ra cacuví nuu chi tata sutu ta ra cacuví nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihí ra nu cruzi. ²¹ Ta cha vityin cha iyó uñi quívi cuví tuhun cuan. Ta nyuhu cuñí maa ndi vatyí ican ra cuví ra cusacacu chi ñáyivi Israel. ²² Soco vityin iyo xaan cuñí ndi cha nacatyí suhva ñusihi chí ndi. Vatyí maa ñu, ñaha cuii ri chahan coyo ñu nu ñaña ra.

²³ Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehe ñu uvi tahan ángel. Ta catyí ángel cuan chi ñu vatyí ra Jesús nyitó ra. ²⁴ Yaha cuan ta chahan coyo tucu suhva ra tahan ndi nu ñaña. Ta nyehe ra vatyí cha ndicha cuví tari cuhva catyí ñusihi cuan. Vatyí ñahri ca coño ñuhu ra Jesús catuví —catyí ra chi ra.

²⁵ Tyicuan ta ra Jesús catyí ra chi ra:

—Chiin xaan cutuñí iñi ndo. Ta cuee xaan chinó iñi ndo tuhun tyaa ra profeta Nyoo ta cha naha. ²⁶ ¿Atu ña chitó ndo vatyí tahán chi cha cunyehe xihna ra Cristo

tundoho? Yaha cuan ta tahán chi cuñihi ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaa ra Moisés ta cha naha. Ta yaha cuan ta cahan ra tuhun tandihi libro cha tyaa ra profeta Nyoo.

²⁸ Ta cuhva cha chaq ra nya ñuu Emaús cuan nu cuahan coyo ra, ta saha ra Jesús vatyí cañi ca cuahan ra. ²⁹ Tyicuan ta cacatyí ra chi ra na ndoo ra chihin ra. Ta catyí ra:

—Ndgo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan. ³⁰ Ta cuhva cha chicunyaq ra yuhu mesa chihin ra, quehen ra pan. Ta chahq ra tyahvi nyoo chi Nyoo. Ta chahnq sava ra, ta chahq ra chi ra. ³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra. ³² Tyicuan ta quichaha catyí ra chi ra tahan ra:

—Yucuan chaha vaha xaan cuñí añima yo cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatu ra, ta cuanuhu coyo ra nya Jerusalén. Ta yucuan nañihi ra chi ndi uchi iin ra chicá noo chihin ra Jesús, canyicú ra. ³⁴ Tyicuan ta quichaha canacatyí ndi uchi iin tahan ra chi ra cha nichaa coyo cuan:

—Ndicha vatyí Sutu Mañi yo, nandoto ra. Vatyí ra Simón nyehe ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhún ra Jesús chihin ra ityi cuahan ra ñuu Emaús, ta yoso caa canicohon nuu ra chi ra nu chahnq ra pan.

Nu tuvi ra Jesús nu canyicu ra cachica noo chihin ra

(Mt. 28.16-20; Mr. 16.14-18; Jn. 20.19-23)

³⁶ Ni cahan ca ra tuhun cuan ta tuví ra Jesús nu canyicú ra. Ta chahq ra nocumi, ta catyí ra:

—Na coo cha taxi ri añima ndo.

³⁷ Tyicuan ta canayuhví xaan ra. Ta cacuñí maa ra vatyí noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi iñi ndo? ³⁹ Nyehe ndo ndahi. Ta nyehe ndo chahi. Vatyí suri mai

cuví. Tíin ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehé ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra. ⁴¹ Soco maa ra chaha cha iyo cacuñí ra ta sii cacuñí ra nyacua ña chinó vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chahā ra chiin yuhu tiyaca tyihyo chihin tyañuñu chi ra. ⁴³ Ta quehen ra. Ta quichaha chachi ra. ⁴⁴ Ta catyí ra chi ra:

—Tandihi cha cuví chii, ican ihya cuví cha catyí chi ndo quivi cuan. Ta catyí chi ndo vatyí tyicuan caa cucuvi, tari cuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chahā ra Jesús vatyí na cuntuñi iñi tandihi ra cuan yoso caa catyí nu tutu Nyoo. ⁴⁶ Tyicuan ta catyí ra Jesús chi ra vatyí tyicuan caa nyaá nu tutu Nyoo vatyí tahán chi cha cúvi ra Cristo. Ta nu cu uñi quivi nandoto ra. ⁴⁷ Ta tahán chí coto ñáyivi tuhun sivi ra Cristo ñuu Jerusalén, ta yaha cuan ta tandihi ñuu nicanu ñuhu ñáyivi. Tacuhva cuvi ndu uvi iñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihi tuhun ihya. ⁴⁹ Ta cusaquichi mai Tatyí li Nyoo siqui ndo tari catyí Suti tyi cuhva ra chí ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee iñi Tatyí li Nyoo cuquihi chi ndo —catyí ra Jesús.

*Nu nandaq xica ra Jesús andivi
(Mr. 16.19-20)*

⁵⁰ Tyicuan ta ra Jesús cuahan ra chihin tandihi ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra. ⁵¹ Ta cha ñi ri ca cha nasoco ra chi ra, nandaq xica ra andivi. ⁵² Tyicuan ta tandihi ra sacahnú xaan ra chi ra. Ta sii xaan cacuví chi ra, cuanuhu coyo ra Jerusalén. ⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chí Nyoo.

Tuhun Nyoo Cha Tyaã San Juan

Tuhun Cahán Nyoo nanduví noo rayíi, ta ican cuví ra Cristo

¹ Nyata quívi xihna ri, nyata ni cumañi ca coo tandihí cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra. ² Ta chicoo ra chihin Nyoo nyata quívi xihna ri. ³ Ta chihin ra, savaha Nyoo tandihí cuíi maa cha iyó. Ta ñahri savaha Nyoo cha maa ri maa ra. ⁴ Ta chihin ra cuví Tuhun Cahán Nyoo nyaá ñayiví cha ma naa ca maa. Ta ñayiví cuan, ican cuví cha sacundichín añaíma ñáyiví. ⁵ Ta cha ndichin ihya, sacundichín chi nu ñaa íñi. Ta cha ñaa íñi ña cuñihí chi ndahva chi cha ndichin cuan.

⁶ Chiyó noo ra cha tachí Nyoo chí. Ta nañí ra Juan. ⁷ Quichí ra cuví ra noo cha ndaa. Vatyí cahān ra tumañi íñi cuenda ra cuví cha ndichin cuan, tacuhva vatyí chino íñi tandihí ñáyiví chí ra. ⁸ Ra Juan, ñima chi ndichin cuan cuví ra. Noo cha ndaa ri cuví ra cha cuenda cha ndichin cuan. ⁹ Vatyí cha ndichin cha ndicha vaha cuan, ni cuachaa chí siquí ñuhu ñayiví, tacuhva vatyí sacundichín chí añaíma tandihí ñáyiví cha iyó siquí ñuhu ñayiví ihya.

¹⁰ Ra cuví Tuhun Cahán Nyoo quichí ra siquí ñuhu ñayiví. Ta ican ra cuví ra Cristo. Ta suri maa ra savaha ra ñuhu ñayiví, Soco ñáyiví iyó siquí ñuhu ñayiví, ña nícohon nuu ñu chí ra. ¹¹ Quichí ra nu nyicú ñáyiví cha savaha ra, soco ñáyiví cha savaha ra ña natiñ cuenda ñu chí ra. ¹² Soco tandihí ñu natiñ cuenda chí ra, ta chinó íñi ñu chí ra, ican chí ñu cuan, chahā ra ityí vatyí nanduví ñu sehe Nyoo. ¹³ Vatyí nacacū chaa ñu. Soco ñima tari cacū ñu ta lee ñu cuenda coño ñuhu ñu. Ta ni ñima cha cuenda cha quichi cuví íñi noo rayíi coo ra chihin noo ñaha sihi. Ñima cha cuenda cha cuñí ñáyiví coo sehe ñu. Soco maa Nyoo sanacacū chaa chí ñu.

¹⁴ Ta ra cuví Tuhun Cahán Nyoo nanduví ra noo rayíi. Ta chicoo ra chihin yo. Ta nyehe ndi cha cahnu cuví ra. Ta cahnu cuví ra vatyí Sehe mañi Sutu yo Nyoo cuví chí ra. Tyitu yihí ra chihin cha ndicha ta tumañi íñi cha cua cuhva ra chí yo. ¹⁵ Ta ra Juan

cuan cahān ra tumañi íñi cuenda ra, ta catyí ra:

—Ican ra ihya cha cahñ tuhun quívi cuan, vatyí ra cha vachí ityí chate, cahnu ca ra cuví ra ican saha yuhu. Vatyí nyata tyembu chahnu ta cha iyó maa ra —catyí ra Juan.

¹⁶ Tandihí yo naquehén cuenda yo tumañi íñi cahnu cha chahā ra chí yo, vatyí nasocó xaan ra chí yo. ¹⁷ Ra Moisés chahā cuenda ra ley Nyoo chí yo. Soco ra Jesucristo cundahví íñi ra chí yo ta saha ra ticahnu íñi cuatyí yo. Ta chahā ra cha ndicha coo chí yo. ¹⁸ Ta yori ca maa nyehé chí Nyoo. Notuhun ri maa Sehe mañi ra cha iyó iñi chí hin ra. Ican ra cuví ra chahā cha cohon nuu yo chí Sutu ra.

Nu cahān ra Juan, ra sacondutyá, tumañi íñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chí ñu Israel cha iyó ñuu Jerusalén, catachí ra chí tata sutu ta chí ra cacuví levita nu nyaá ra Juan na ndaca tuhun ra chí ra yóo ra cuví ra. ²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candacā tuhun ra inga chaha chí ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chí ra.

Ta ra Juan nacahan ra:

—Ñima ra cuan cuví.

Ta sañihí ca ra candacā tuhun ra chí ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candacā tuhun ra chí ra:

—¿Yóo ra cuví yoho? Vatyí cuñí chí cuiso ndi tyiño chí ra cha tachí chí ndi. ¿Yóo ra cuví yoho? —catyí ra chí ra.

²³ Ta ra Juan nacahan ra:

—Yuhu cuví ra cahān ta canachaá noo nu chiqui ndíi, ta catyí: “Ñuñá ndo noo ityí ndoo chichi añaíma ndo vatyí cha vachí Sutu Mañi yo.” Tari cuhva cahān ra Isaías profeta Nyoo tuhun ta cha naha —catyí ra Juan chí ra.

²⁴ Ra cha cacahan chihin ra Juan, ra cacuví fariseo tachí chí ra. ²⁵ Ta candacā tuhun tucu ra chí ra:

—Tatu ñima ra Cristo, ni ra Elías, ni ra profeta cuan cuvún, ¿ñaá tuhun cha sacondutyón chi ñáyivi? —cacatyí ra chi ra Juan.

²⁶ Ta ra Juan catyí ra chi ra:

—Yuhu sacondutyé chihin ndutya. Soco mahñu ndo nanyaá noo ra cha ña ñohó nuu ndo. ²⁷ Ican ra cuví ra vachi chate. Soco cha iyó maa ra ta caqui. Ta ña ñaña mai ni cha cuví musu ra ta ndachi ñi xityin ndichan ra —catyí ra Juan.

²⁸ Tandihí tuhun ihya cuví noo nu ñañi Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quivi nanyehé ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñáyivi ra tacuhva cahnya ra cuatyí ñáyivi iyó síqui ñuhu ñáyivi. ³⁰ Tuhun maa ra cahin quivi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu cahnu ta cha iyó ra. ³¹ Ni yuhu ta ña ñohó nui chi ra quivi cuan. Soco vachi sacondutyé chihin ndutya tacuhva vatyí ñu ñuu Israel cohon nuu ñu chi ra —catyí ra Juan.

³² Ta catyí tucu ra Juan ñandihí:

—Yuhu nyehí chi Tatyí li Nyoo quichi ityi andivi vachi chi tari noo paloma, ta ndoo chí síqui ra. ³³ Yuhu ta coto que yóo ra cuví ra quivi cuan. Soco Nyoo, ra cha tachí chii na sacondutye chihin ndutya, catyí ra chii: “Quivi nyehun Tatyí li yuhu, vachi noó síqui noo rayíi, ican ra cuan cuví ra sacondutyá chihin Tatyí li yuhu”, catyí Nyoo chii. ³⁴ Yuhu cha yaha nyehí chi ra. Ta cuví cha ndaa vatyí ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

³⁵ Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicón chi ra. ³⁶ Ta cuhva cha nyehé ra, yahá ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

³⁷ Cha chihí ninduvi ra nyicon chi ra Juan tuhun cahān ra, ta cananyicon ra chi ra Jesús. ³⁸ Tyicuan ta nanyehé ra Jesús ityi

chata ra, ta nyehé ra tyi canyicón ra chi ra, ta catyí ra:

—¿Ñáá cha nducú ndo?

Tyicuan ta canacahan ra ta catyí ra:

—Maestro, ¿nya iyón?

³⁹ Ta ra Jesús catyí ra chi ra:

—Coho ndo chihin. ta nyehé ndo —catyí ra chi ra.

Tyicuan ta cuahan coyo ra chihin ra. Ta canyehé ra nu iyó ra. Ta yucuan cuaa ndihí ra vatyí tari cha caa cumi cha cha iñi cuhva cha chaā ra yucuan.

⁴⁰ Chichi cha ninduvi ra cha chihí tuhun cahān ra Juan ta nanyicon ra chi ra Jesús, noo ra cuví ra ra Andrés yañi ra Simón Pedro. ⁴¹ Ta ra Andrés numi ri chinanducū ra chi yañi ra, ra Simón, ta catyí ra chi ra:

—Nañihí ndi chi ra cha cuví Mesías —catyí ra.

Ta tuhun Mesías cuan cuñi chi catyí, ra Cristo, o ra cha nacachí vaha Nyoo, vatyí cuví ra rey chi yo.

⁴² Tyicuan ta ra Andrés chinyacā ra chi ra Simón yañi ra nu nyaá ra Jesús. Ta cuhva cha nyehé ra Jesús chi ra Simón, ta catyí ra chi ra:

—Yoho Simón, sehe ra Jonás cuví chuun. Soco cunañun Cefas. —catyí ra chi ra.

Ta Cefas cuñi chi catyí Pedro chihin sahan griego, ta ninduvi tahan sivi cuan, cuñi chi catyí “yuu”.

Nu canā ra Jesús chi ra Felipe ta chi ra Natanael

⁴³ Cha inga quivi tyaa ra Jesús cuhva cuhun ra ityi Galilea. Tyicuan ta nañihí ra chi ra Felipe. Ta catyí ra chi ra:

—Cunyicon chii —catyí ra.

⁴⁴ Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro.

⁴⁵ Tyicuan ta cahān ra Felipe chinanducū ra chi ra Natanael. Ta catyí ra chi ra:

—Nyehe ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶ Ta catyí ra Natanael:

—¿Atu cuvi quita cha vaha ñuu Nazaret cuan? —catyí ra chi ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷ Yaha cuan ta cuachaa ra Natanael nu nyaá ra Jesús. Ta cuhva cha nanyehé ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndacá tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehí chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹ Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chi ra Natanael:

—¿Atu chinó inun chii cha cuenda vatyí catyí tyi nyehí chuun chaha tun higo? Soco nahnu ca cha cunyeheun ican saha cuan —catyí ra chi ra.

⁵¹ Ta catyí tucu ra Jesús:

—Cha ndicha catyí chi ndo vatyí nyoho cunyehe ndo andiví cuitanuña ta cuaha ángel Nyoo cundaa ra, ta cunoo ra siqui yuhu ra cuví Rayíi cha quichí nya gloria —catyí ra Jesús chi ra.

2

Noo vico tandaha iyó ñuu Caná ityi Galilea

¹ Yaha uñi quivi ta chicoq noo vico tandaha ñuu Caná ityi Galilea. Ta sihi ra Jesús ñohó ña yucuan. ² Ta suri canacatyí tuhun ñu chi ra Jesús ta chi ra cacticá noo chihin ra cha chuhun coyo ra vico tandaha cuan.

³ Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyí sihi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Ñáá cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco sihi ra catyí ña chi ra cha catyinyeé vico cuan:

—Sacuvi ndo tandihí cha catyí ra chi ndo —catyí ña chi ra.

⁶ Ta tayucú inu tahan quisi yuu nahnu cha quihí ndutya cha catuhvá ra Israel chotyíno nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru

ndutya. ⁷ Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutya —catyí ra chi ra.

Tyicuan ta sacuvi ra tari cuhva catyí ra.

⁸ Tyicuan ta catyí ra Jesús chi ra:

—Vityin tava ndo suhva ta cunyaca ndo chi ra cuví nuu cuenda vico ihya —catyí ra Jesús chi ra.

Ta tyicuan caa casacuví ra. ⁹ Ra cuví nuu cuenda vico cuan chihí ra ndutya cha nanduví vinu cuan. Soco ña chitó ra nya quichi. Maa ri maa ra catyinyee vico cuan cachtó ra, vatyí maa ra catavá ndutya cuan. Tyicuan ta ra cuví nuu cuenda vico cuan cana ra chi ra cha tandaha cuan. ¹⁰ Ta catyí ra chi ra:

—Tandihí ñáyivi, xihna ca vinu vaha tuhvá ñu tava. Yaha cuan ta tatu cha cachihi xaan ñu, tyicuan ta tava ñu vinu pehe ca. Soco yoho chicumí vahun vinu vaha. Ta nya vityin tavon —catyí ra chi ra.

¹¹ Cha sacuvi ra Jesús ñuu Caná ityi Galilea, ican cuan cuví milagru cha xihna ri savaha ra vatyí sañaha ra cha cahnu cuví ra. Ta ra cacticá noo chihin ra cachingo iní ra chi ra vatyí ican ra cuví ra cha tachí Nyoo.

¹² Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cacticá noo chihin ra. Ta yucuan chinyicu ñu suhva quivi.

Nu tava ra Jesús chi ñu caxicó chichi vehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Cha cuñí chaa quivi vico cha nañí pas-cua cha sanducahnú ñu Israel. Yucuan chaha cuahan ra Jesús ñuu Jerusalén. ¹⁴ Ta chaa ra ñuu cuan, ta quihví ra nuquehe vehe ñuhu cahnu cuan, ta nanyehé ra chi ra caxicó sindiqui, mbee, ta paloma. Ta na nyehe tucu ra chi ñu nyicú nasama xuhun chí ñáyivi. ¹⁵ Ta cha nyehe ra Jesús cha tyicuan caa, savaha ra noo yoho. Ta chihin yoho cuan tava ñehe ra chi tandihí ñu nuquehe vehe ñuhu in ri chihin mbee ta chihin sindiqui sana ñu. Ta ñu nasamá xuhun cuan, sacuita ra xuhun ñu nu ñuhu ta sanduva ra mesa ñu. ¹⁶ Ta catyí ra chí ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahvil! —catyí ra chí ñu.

¹⁷ Tyicuan ta ra cachicá noo chihin ra, canicohon iñi ra cha catyí nu tutu Nyoo tyehé caa: “Cuiño xain chihin vehun”, catyí chi, nicohon iñi ra.

¹⁸ Tyicuan ta quichaha candaca tuhun ra cacuví nuu chi ñu Israel chi ra:

—¿Ñáá seña cuhvon chi ndi ta sañahun vatyí chaha Nyoo ityi chuun cha sacuvun tyehé caa? —catyí ra chi ra.

¹⁹ Ta nacahan ra Jesús ta catyí ra:

—Satani ndo vehe ñuhu ihya, ta chichi cha uñi quivi, yuhu cusanandai inga chaha —catyí ra chi ra.

²⁰ Tyicuan ta quichaha cacatyí ra cuan chi ra:

—Uvi xico iñu cuiya cañohq ra casavahā ra vehe ñuhu ihya. Ta yoho catyún tyi chichi cha uñi quivi cusanandaun inga chaha —catyí ra chi ra.

²¹ Soco vehe ñuhu cha cahan ra Jesús tuhun, ican cuví coño ñuhu ra. ²² Yucuan chaha ra cachicá noo chihin ra canicohon iñi ra tuhun ihya quivi nandotq ra Jesús. Ta cutuñi iñi ra vatyí tuhun cha nyaá nuu tutu Nyoo cahan chi cuenda ra Jesús. Ta canachinq iñi ra tuhun cahan ra Jesús ta tuhun cha nyaá nu tutu Nyoo.

Ra Jesús chitó ra cha caá añima ñáyivi

²³ Quivi cha ñohó ra Jesús Jerusalén, quivi vico pascua cuan, cuaha xaan ñu nachino iñi ñu chi ra cha cuenda cha cuaha xaan milagru sacuví ra. ²⁴ Soco ra Jesús ña cunii iñi ra nyehé ra chi ñu vatyí chitó ra cha caá añima tandihí ñu. ²⁵ Ña chiñuhú ri cha nacatyí yo chi ra yoso caa ñáyivi, vatyí maa ra chitó ra ñáá cha caá chichi añima ñu.

3

Nu ndatuhún ra Nicodemo chihin ra Jesús

¹ Chiyó noo ra fariseo cha nañi Nicodemo. Ta cuví ra noo ra cuví nuu chi ra ñuu Israel. ² Ra Nicodemo ihya, chahan ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyí Nyoo tachí chuun quichi sañahun chi ndi. Vatyí yori ñáyivi cuvi sacuvi milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyí tatu ma nacacu chaa ñáyivi inga chaha, ma cuvi nyehé ñu nu nyacá ñaha Nyoo —catyí ra.

⁴ Tyicuan ta ndaca tuhun ra Nicodemo ta catyí ra:

—¿Yoso caa cuví cacu noo rayii inga chaha tatu cha chahnu ra? ¿Atu cuvi ndihvi ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyivi chihin coño ñuhu ñu ta cuví quihvi ñu nu nyacá ñaha Nyoo. Soco ñiñi tucu cuñí chi cha nacacu ñu chihin Tatyí li Nyoo. ⁶ Vatyí ñáyivi cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí li Nyoo, iyó Tatyí li Nyoo añima ñu. ⁷ Ma iyo cuñun cha catyí chuun tuhun ihya vatyí tandihí ñu, cuñí chi nacacu chaa ñu. ⁸ Tari caá tatyí tandihí ri ityi nu cuñí chi ta chiñún cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihí ñu nacacu chihin Tatyí li Nyoo —catyí ra Jesús chi ra.

⁹ Tyicuan ta ndaca tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra:

—Yoho cha cuvún noo ra sacuahā cuenda ñu Israel, tahnā chi coton tuhun ihya. ¹¹ Cha ndicha catyí chuun vatyí cahnā cha chitē ta cuví cha ndaa cha nyehi. Soco nyoho ña chinó iñi ndo cha catyí chi ndo. ¹² Tatu ña chinó iñi ndo chii nu cahnā tuhun ñáyivi ihya chihin ndo, ¿yoso caa chino iñi ndo tu cahnā tuhun andivi chihin ndo?

¹³ Yori chahan andivi chinyehē yoso caa iyó. Noo ri yuhu Rayii cha quichi nya gloria nyehí, vatyí yucuan iyé. ¹⁴ Tari nacatacaq ra Moisés noo coo cha chino chihin caa nu noo chiqui ndii, tyicuan caa cunacataca tuu ñu chi yuhu Rayii cha quichi nya gloria, ¹⁵ tacuhva vatyí tandihí ñu cha chinó iñi chii, ma cunaa ñu. Soco coo ñu ñáyivi cha ma naa ca maa.

Nyoo cuñí xaan ra chi ñáyivi

¹⁶ Vatyí Nyoo cuñí xaan ra chi tandihí ñáyivi iyó siqui ñuhu ñáyivi. Yucuan cuenda chahā ra vatyí cúvi Sehe mañi ra nu cruzi cha cuenda ñu. Tacuhva vatyí tandihí ñu cha chinó iñi chi Sehe ra, ma cunaa ñu, soco coo ñu noo ñáyivi cha ma naa ca maa. ¹⁷ Nyoo ña tachí ra chi Sehe ra siqui ñuhu ñáyivi vatyí sacunaa ra chi

ñáyivi, soco tachí ra chi ra na sacacu ra añima ñu tacuhva ma cuhun ñu anyaya cha catyí cuatyí ñu.

¹⁸ Vatyí ñu chinó iñi chi Sehe Nyoo ma cunaa ñu, soco ñu ña chinó iñi chi ra, cha cuanaa ñu cha cuenda cha ña chinó iñi ñu chi noo ri Sehe mañi Nyoo. ¹⁹ Ñu ña chinó iñi, cha cuanaa ñu. Vatyí quívi quichí ra cuví ñuhu ndichin cha sacundichín siquí ñuhu ñáyivi, ña natiñ cuenda ñu chi ra tyi tahan ca iñi ñu nu ñaa iñi vatyí nyacuví ñu cha ña vaha. ²⁰ Tandihí ñu cha nyacuví cha ña vaha, ña tahan iñi ñu ñuhu ndichin, vatyí coto quetuví cha ña vaha cha nyacuví ñu. ²¹ Soco ñu nyacuví cha ndicha, nanyitá ñu nu ndichin tacuhva na cundichin nyehe ñáyivi vatyí sacuví ñu cuhva cuñí Nyoo vatyí nyaá ra chihin ñu —catyí ra Jesús.

Nu cahan ra Juan, ra sacondutyá, tuhun ra Jesús inga chaha

²² Cha yahá tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoq ra suhva quívi yucuan, vatyí casacondutya ra chi ñáyivi.

²³ Tyicuan caa tucu ra Juan cuan ñohó ra sacondutyá ra chi ñáyivi nu cuví Enón yatyin ri nu cuví Salim, vatyí yucuan ñohó cama ndutya. Ta ñáyivi chaá coyo ñu ta condutya ñu. ²⁴ Tuhun ihya cuví ta ni cumañi ca catyihí ra chi ra Juan vehe caa.

²⁵ Tyicuan ta suhva ra nyicón chi ra Juan quichahá cuvi yuhu ra chihin noo ra ñuu Israel siquí yoso caa sandundi ñáyivi chi ñu nuu Nyoo. ²⁶ Tyicuan ta cuahan coyo ra nu nyaá ra Juan. Ta catyí ra chi ra:

—Maestro, ra cha ñohó chuhun inga chiyo yuvi cahnu Jordán, ra cha cahun tuhun chihin ndi, vityin sacondutyá ra ta tandihí ñu nanyicón ñu chi ra —catyí ra chi ra.

²⁷ Tyicuan ta ra Juan catyí ra chi ra:

—Ni noo yo ta ñahri cha cuví sacuvi yo, tyehé ta ña chahá Nyoo tunyee iñi ra chi yo. ²⁸ Suri maa ndo chiñj vaha ndo cha cahin vatyí yuhu ñima ra Cristo cuví. Noo ra cha tachí ri Nyoo ityi nuu ra cuví yuhu. ²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusii cuñí ra chiñí ra tuhun cahan ra cha cuatandaha. Ta tyicuan caa tucu yuhu, sii cuñí vatyí naquehen ñáyivi tuhun cahan ra Jesús ta nyicón ñu chi ra. ³⁰ Maa ra cahnu ca

ra cuacuvi ra. Ta yuhu cunocuee que vatyí tyicuan caa tahan maa chi.

Ra quitá nya gloria ta quichi siquí ñuhu ñáyivi

³¹ Ra cha quichí nya gloria, cahnu ca ra cuví ra cha nuu tandihí ñáyivi. Vatyí ra iyó siquí ñuhu ñáyivi, cuenda ñuhu ñáyivi cuví ra. Ta cahan ra tuhun ñuhu ñáyivi. Soco ra quichí nya gloria, cahnu ca ra cuví ra. ³² Ta cahan ra cha nyehé ra ta cha chiñí ra, soco yori chinó iñi tuhun cahan ra. ³³ Soco tatu nya noo yo chinó iñi yo chi ra, cuví yo noo cha ndaa vatyí Nyoo ndicha cha cahan ra. ³⁴ Vatyí ra cha tachí Nyoo chii, tuhun Nyoo cahan ra vatyí Nyoo ña tyicuhvá ra Tatyí li ra chahá ra chi ra. Chahá ra naniñ Tatyí li ra chi ra. ³⁵ Nyoo Sutu yo cuñí ra chi Sehe ra. Ta natyaa ra tandihí ndaha ra. ³⁶ Ñu cha chinó iñi chi Sehe Nyoo, iyó ñu noo ñáyivi chaa cha ma naa ca maa. Soco ñu ña cuñí chino iñi chi ra, ma coo ñu ñáyivi cuan. Ta cutachi tuñi Nyoo chi ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyí cuaha ca ñáyivi nyicón chi ra Jesús ican saha ra Juan. Ta cuaha ca ñu sacondutya ra ñandihí. ² Vasi ñima maa ra Jesús sacondutyá, soco ra cachicá noo chihin ra, ican casacondutya. ³ Ta quívi chitq ra Jesús vatyí cachito ra tuhun ihya, ta quitá ra Judea cuan ta cuanuhu ra nya Galilea. ⁴ Ta ityi cuanuhu ra, tahan chi yaha ra nu cuví Samaria. ⁵ Yucuan ta chaq ra noo ñuu cha nyaá ityi Samaria cha nañí Sicar yatyin nu nyaá ñuhú ra Jacob nu chahá ra chi ra José sehe ra. ⁶ Ta yucuan nyaá noo yavi ndutya cha catyí ñu tyi chi ra Jacob cuví. Ta vatyí chitatú xaan ra Jesús cha chica ityi ra, ta chicunyaq ra yuhu yavi cuan, ñáa cuhva hora cuví. ⁷⁻⁸ Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachí ra. Tyicuan ta chaq noo ñaha Samaria cuatava ña ndutya chichi yavi cuan. Ta quichaha catyí ra Jesús chi ña:

—Cuhva chihin ndutya cohi —catyí ra chi ra.

⁹ Tyicuan ta ñaha Samaria cuan catyí ña chi ra Jesús:

—Yoho cha cuvún noo ra ñuu Israel, ¿yoso caa cha chícón ndutya cohun chi yuhu cha cuví ñaha Samaria? —catyí ña vatyi ñu Israel ña vaha iyó ñu chihin ñu Samaria.

¹⁰Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chícán ndutya chuun, maun cucacon ndutya chii. Ta yuhu cuhve ndutya nyitó chuun —catyí ra chi ña.

¹¹Tyicuan ta catyí ña chi ra:

—Tata, ni ñahri vihi chihin tavon ndutya ihya. Vatyi yavi ihya cono xaan. ¿Nya cuquehun ndutya nyitó cuhvon cohi?

¹²Vatyi sutu chahnu yo, ra Jacob sandoo ra yavi ihya chi yo. Ta suri ihya chihí tucu maa ra ndutya. Ta suri ihya chihí tucu sehe ra ta quití sana ra. ¿Atu cahnu ca ra cuví yoho ican saha ra cuan? —catyí ña chi ra.

¹³Tyicuan ta nacahan ra Jesús ta catyí ra chi ña:

—Tandihí ñu chihí ndutya ihya, cu ityi ca ñu ndutya. ¹⁴Soco ñu chihí ndutya cha chahá yuhu, ma cu ityi ca ñu. Vatyi ndutya cha chahí chi ñu cucaña chi tari noo ndohyo chichi añima ñu tacuhva coo ñu ñayivi cha ma naa ca maa —catyí ra chi ña.

¹⁵Tyicuan ta quichaha catyí ña chi ra:

—Tata, cuhva ndutya cuan cohi, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chi ra.

¹⁶Tyicuan ta ra Jesús catyí ra chi ña:

—Cuahan cuacana chi yün ta quichun —catyí ra chi ña.

¹⁷Ta nacahan ña ta catyí ña:

—Yori yí iyó —catyí ña.

Tyicuan ta catyí ra Jesús chi ña:

—Ndicha cha cahun, vatyi yori yün iyó.

¹⁸Vatyi cha ohon tahan yün chiyó, ta ra nyaá chuhun vityin ñima yün cuví chi ra. Ndicha tuhun cha cahún —catyí ra chi ña.

¹⁹Cha chihí ña tuhun cahán ra, quichaha catyí ña chi ra:

—Tata, tuví iñi vatyi noo profeta cuenda Nyoo cuvún. ²⁰Sutu chahnu ndi, ra Samaria, sacahnü ra chi Nyoo yucu ihya. Soco nyoho ñu Israel catyí ndo vatyi Jerusalén yucuan tahanan chi sacahnü yo chi Nyoo —catyí ña chi ra.

²¹Tyicuan ta ra Jesús nacahan ra ta catyí ra chi ña:

—Chino iñun tuhun cahín chuhun. Vatyi vachi cuhva vatyi cusacahnü ndo chi Sutu yo Nyoo. Soco ña chihühü ri cha quichi ndo yucu ihya o cohun ndo nya Jerusalén.

²²Nyoho ñu Samaria, ña chitó ndo yóo chi sacahnü ndo. Soco nyuhu chitó ndi yóo chi sacahnü ndi. Vatyi chitó ndi vatyi cuenda noo ra Israel cuasacacu Nyoo chi ñáyivi.

²³Soco chaa chi cuhva ta cuhva cuan nyaa yo vityin vatyi ñáyivi cha ndicha sacahnü chi Sutu yo Nyoo, cusacahnü ñu chi ra chihin añima ñu ta cha ndicha. Tari cuhva saquehen ityi Tatyi li Nyoo chi ñu. Vatyi Sutu yo Nyoo tyicuan caa cuñí ra cha sacuvi ñu cha sacahnü chi ra. ²⁴Vatyi Nyoo Tatyi li cuví ra. Ta ñu sacahnü chi ra cuñí chi sacahnü ñu chi ra chihin cha ndicha tari cuhva saquehen ityi Tatyi li chi ñu —catyí ra chi ña.

²⁵Ta nacahan ña ta catyí ña chi ra:

—Yuhu chitó vatyi cuquichi ra cuví Mesías, ra Cristo, ra cuví rey chi yo. Ta quivi quichi ra, maa ra cunacatyí tandihí chi yo —catyí ña chi ra.

²⁶Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

²⁷Tyicuan ta canachaa coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha sihi. Soco ni noo ra ña caña iñi ra ndaca tuhun ra ñáá cha cuñí ra o ñáá cuenda ndatuhún ra chihin ñaha cuan. ²⁸Tyicuan ta sandoo ña quiyi ña ta cuanuhu ña chichi ñuu. Ta catyí ña chi ñáyivi ñuu ña:

²⁹—Ñaha ndo cunyehe ndo chi noo ra cha catyí tandihí cha cai. ¿Atu ñima ra Cristo cuví ra? —catyí ña chi ñu.

³⁰Tyicuan ta quitá coyo ñu ñuu cuan ta cuahan coyo ñu nu nyaá ra Jesús. ³¹Ta cha niri ca cha cumañi chaa ñu nu nyaá ra, ra cachicá noo chihin ra, saniñi ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

³²Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

³³Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichi nyaca cha cachi ra, vaha? —cacatyí ra.

³⁴Soco ra Jesús catyí ra chi ra:

—Cha chachí yuhu ican cuví cha sacuví cuhva cuñí ra cha tachí chii ta sacuví tyiño chahá ra chii. ³⁵Nyoho catyí ndo: “Soco cumañi cha cumi yoo ta naquehen yo cha tachí yo.” Soco yuhu catyí chi ndo vatyí nyehe ndo ta saha ndo cuenda cha cuaha ñáyivi cuñí ñu quichi ñu chihin, cuví ñu tari noo itu cha cuan ta cuñí chi cha cahnu yo niñi. ³⁶Ra cha naquehén niñi cuan niñi ra yahvi ra. Ta niñi cha naquehen vaha ra cuví ñu cha niñi noo ñáyivi cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén niñi cuan iin ri cacusiñ cuñí ra. ³⁷Ta iyó noo tuhun ñáyivi cha catyí vatyí siin ñu tachí ta siin ñu naquehén niñi. Ta ndicha tuhun cuan. ³⁸Yuhu sacuhin chi ndo vatyí cucahnu ndo niñi cha iyó nu ña saha tyiño ndo. Vatyí inga ra saha tyiño. Ta nyoho nyari cucahnu ndo ta naquehen vaha ndo niñi cuan —catyí ra Jesús chi ra.

³⁹Ta cuaha xaan ñu ñuu Samaria cuan canachinqo iñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihí cha cai chii”, catyí ña. ⁴⁰Ta cuhva cha cachaa coyo ñu Samaria nu nyaá ra Jesús, cha cundahvi ñu nuu ra nandoo ra chihin ñu. Ta ra Jesús ndoo ra yucuan uvi quivi chihin ñu. ⁴¹Ta cuaha ca ñu cachino iñi ñu cha chihí ñu tuhun cahán maa ra. ⁴²Tyicuan ta quichaha catyí ñu chi ñaha sihi cuan:

—Vityin chinó iñi ndi, ñima cha cuenda vatyí catyun chi ndi, soco vatyí chihí maa ndi chihin soho ndi tuhun cahán ra, ta chitó vaha ndi vatyí ican ra cuví Cristo ra sacacú chi ñáyivi iyó siquí ñuhu ñáyivi ihyā —catyí ñu.

Nu sanduvahā ra Jesús chi sehe noo ra cuví tyiño

⁴³Cha yaha uvi quivi ta quita ra Jesús ñuu Samaria cuan ta cuahan ra ityi nu cuví Galilea. ⁴⁴Vatyí suri maa ra Jesús catyí ra vatyí ñáyivi ñuu noo ra cuví profeta, ra chahá cuenda tuhun cahán Nyoo, ña sahá ñu ñáyivi chi ra. ⁴⁵Tyicuan ta cuhva cha chaa ra Galilea, ñu iyó yucuan vaha tyiñuhu ñu chi ra, vatyí chahan coyo tucu maa ñu Jerusalén vico cuan, ta nyehe ñu cha vaha cha sacuví ra.

⁴⁶Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño

cuenda rey, ta iyó noo sehe ra cha cuhvi ñuu Capernaum. ⁴⁷Quivi cha chito ra cuan vatyí nachaa ra Jesús Galilea cha chahan ra Judea, chahan ra chinyehē ra chi ra, ta chican ra tumañi iñi chi ra na cuhun ra vehe ra ta sanduvaha ra chi sehe ra, vatyí cha cuñí cuii ri cúvi sehe ra. ⁴⁸Tyicuan ta ra Jesús catyí ra chi ra:

—Nyoho ma chino iñi ndo tatu ma nyehe xihna ndo noo milagru —catyí ra chi ra.

⁴⁹Soco ra cha vaha cuan catyí ra chi ra Jesús:

—Tata, coho chihin cha numi ri vityin cha ta cúvi ca sehi —catyí ra chi ra.

⁵⁰Tyicuan ta ra Jesús catyí ra chi ra:

—Cuanuhu nya vehun. Sehun cha nduvaha ra —catyí ra chi ra.

Tyicuan ta ra cha vaha cuan chinó iñi ra tuhun cahan ra Jesús ta cuanuhu ra. ⁵¹Ta cuhva cha cuanachaa ra nya vehe ra, quita coyo musu ra ta cacatyí ra chi ra:

—¡Cha nduvaha sehun!

⁵²Tyicuan ta quichaha ndaca tuhun ra chi ra ñáá cuhva nduvaha ra. Ta cacatyí ra chi ra:

—Icu cuhva ca iin cha yaha hora tinyaa cahni chi ra —cacatyí ra.

⁵³Tyicuan ta tuví iñi ra cha vaha cuan, vatyí cuhva cuan catyí ra Jesús chi ra, “Cuanuhu vatyí sehun cha nduvaha ra.” Ta maa ra ta tandihí ñáyivi chi ra nachino iñi ñu chi ra Jesús.

⁵⁴Ican ihyā cuví cha cu uvi milagru cha sacuví ra Jesús cha nachaa ra Galilea cha chahan ra Judea.

5

Nu sanduvahā ra Jesús chi noo ra ña cuví caca

¹Cha yaha tuhun cuan ta ra Jesús cuahan ra Jerusalén inga chaha vatyí ñu ñuu Israel sanducahnu ñu noo vico. ²Ta ñuu cuan iyó noo yuvehe cha nañi Yuvehe Cuenda Mbee. Ta yatyin ri nyaá noo vehe cahnu. Ta chichi vehe cuan ñohó ndutya. Ta cha chihin sahan hebreo nañi chi Betesda. Ta iyó ohon tahan corredor. ³Ta yucuan cayucu cuaha ñu cuhvi: ñu cuaa, ñu coxo, ta ñu ña cuví nacanda. Canyatú ñu ñáá cuhva nacanda ndutya cuan. ⁴Vatyí ña naha ña naha ri ta noó noo ángel sanacanda ra ndutya cuan. Ta yóó cha quihvi xihna ca cha yaha nacanda ndutya cuan, nduvaha ñu niri maa

ñáá ca cuehe ndoho ñu. ⁵Ta yucuan catuví noo ra cuhví cha iyó oco chahun uñi cuiya cuhví ra. ⁶Cuhva cha nanyehe ra Jesús chi ra catuví ra yucuan, tuví iñi ra vatyí cha cañi xaan cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷Ta ra cuhví cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyí tahan ri cha cuñí quihví, inga ñu quihví xihna ca —catyí ra cuhví cuan chi ra Jesús.

⁸Tyicuan ta catyí ra Jesús chi ra:

—Ndícuíta ta naquehen yuvun ta cacon —catyí ra chi ra.

⁹Ta caa cuhva ri cuan nduvahá ra, naquehen ra yuvi ra, ta nacaca ra. Soco vatyí quívi nyitatu ñu cuví, ¹⁰ra cacuví nuu chi ñu Israel catyí ra chi ra cha nduvahá cuan:

—Quívi nyitatu yo cuví vityin, ña tahan chi cuison yuvun —catyí ra chi ra.

¹¹Ta ra cha nduvahá cuan nacahan ra ta catyí ra:

—Ra cha sanduvahá chii, ican ra catyí chii: “Naquehen yuvun ta cacon”, catyí ra chii.

¹²Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³Soco ra cha nduvahá cuan ña chitó ra yóo cha sanduvahá chi ra. Vatyí cuaha xaan ñáyivi yucuan, ta ra Jesús yori ca ra vatyí cha cuahan ra. ¹⁴Yahá cuan ta nañihí ra Jesús chi ra chichi vehe ñuhu cahnu, ta catyí ra chi ra:

—Nyehe, vityin cha nduvahun, ma sacuví con cuatyí, coto ñáa ca cha cahnu ca cuvi chuun —catyí ra chi ra.

¹⁵Tyicuan ta chahan ra chicatyí ra chi ra Israel cuan vatyí ra Jesús cuví ra cha sanduvahá chi ra. ¹⁶Ta cha cuenda cha sacuví ra Jesús tyihe caa quívi nyitatu ñu, yucuan chaha cuxaan xaan ra cacuví nuu chi ñu Israel chi ra Jesús. Ta cuñí ra cahñi ra chi ra. ¹⁷Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiño —catyí ra.

¹⁸Ta cha cuenda cha cahñ ra tuhun ihya, xaan ca cuñí ra Israel cuan. Ta ñihi ca cuñí ra cahñi ra chi ra vatyí cuñí maa ra vatyí ña sahá ra ñáyivi quívi nyitatu ñu, ta siin rí tyi

sahá ra tuhun tyi iin ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuvi tucu maí. ²⁰Vatyí cuñí xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo. ²¹Tari sanandotó Nyoo Suti chi ndiyi, ta chahá ra ñáyivi coo ñu, tyicuan caa tucu yuhu cha cuví Sehe ra, chahí ñáyivi chi ñu cuñí mai cuhve. ²²Ta Suti Nyoo ña sandaa ra cuatyí ni noo ñu, soco chi yuhu cha cuví Sehe ra chahá ra ityi na sandai cuatyí ñáyivi. ²³Tyicuan caa sacuví Suti Nyoo vatyí cuñí ra tyi sacahnu ñáyivi chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

²⁴Ta cha ndicha catyí vatyí ñu tyasohó tuhun cahín ta chinó iñi ñu chi ra cha tachí chii, iyó ñu noo ñáyivi chaa cha ma naa ca maa. Ta ma cuhun ca ñu anyaya cha catyí cuatyí ñu vatyí cha sacacú Nyoo aña ñu ndaha tuhun chihí, ta nacuhva ra ñáyivi chaa coo ñu. ²⁵Ñáyivi tari cha ndiyi cuví ñu soco cha ndicha catyí chi ndo vatyí vachí chi quívi vatyí cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñáyivi cha ma naa ca maa. Ta vityin cuví quívi cha cahín tuhun. ²⁶Vatyí Nyoo Suti iyó ra ñáyivi cha ma naa ca maa. Ta chahá tucu ra ityi chi yuhu cha cuví Sehe ra vatyí cuhve ñáyivi coo ñáyivi. ²⁷Ta Nyoo chahá ra vatyí sandai cuatyí ñáyivi, vatyí Rayíi cha quichi nya gloria cuví yuhu. ²⁸Ma iyo cuñi ndo tuhun ihya, vatyí cuchaa chi quívi vatyí ñu ndiyi chichi ñaña cucuiñi ñu ndusu Sehe Nyoo. ²⁹Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñáyivi chaa. Soco ñu ña sacuví cha vaha cunandoto ñu vatyí cuhun ñu anyaya nu cutachi tuñi Nyoo chi ñu.

Nu sañahá chi vatyí ra Jesús iyó ityi chi ra cha cuhva ra ñáyivi chaa coo ñáyivi

³⁰Yuhu ñima noo tuhun ri mai sacuví ñáa noo cha sacuví. Nyehí cha caá aña

ñáyivi yoso cuhva catyí Suti. Ta vaha cuhva nyehí vatyí ña sacuví cuhva cuñí mai, soco cuhva cuñí Suti, ra cha tachí chii. ³¹Ta tatu suri mai cuví cha ndaa chi mai, ñahri yahvi nyaá cha ndaa cuan. ³²Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha. ³³Nyoho chindaca tuhun ndo chi ra Juan. Ta tuhun cha cahán ra, ndicha vaha. ³⁴Soco yuhu ña chiñuhú cha cuví rayíi cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyí chino iñi ndo chii ta cacu añima ndo. ³⁵Ra Juan cuví ra tari noo lámpara cha cayú ta sacundichín. Ta nyoho tahan iñi ndo cusii iñi ndo nu ndichin ñuhu ra suhva ri quívi. ³⁶Soco yuhu iyó noo cha ndaa vaha ca cha nuu cha catyí ra Juan. Vatyí tandihí cha sacuví yuhu, maa Suti catyí chii na sacuvi. Ta ican cuví cha ndaa cha nyehé ndo vatyí ndicha vatyí maa Suti tachí chii. ³⁷Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra. ³⁸Ta tuhun ra cha cahán nuu ndo, ña ndóo chí añima ndo vatyí ña chinó iñi ndo vatyí Nyoo tachí ra chii. ³⁹Nyoho chihin cuenda xaan sacuahá ndo nu tutu Nyoo, vatyí cuñí maa ndo vatyí nuu cuan cuanañihí ndo ñáyivi chaá cha ma naa ca maa. Soco nu tutu Nyoo cuan, tuhun yuhu cahán chi. ⁴⁰Ta nyoho ña cuñí ndo quichi ndo nu nyaí tacuhva vatyí cuhve ñáyivi chaá cuan coo ndo.

⁴¹Yuhu ña nduqui nu cuvahi nuu ñáyivi.

⁴²Vatyí yuhu ñohó nui chi nyoho ta chité vatyí ña cuñí ndo chi Nyoo. ⁴³Yuhu vachi cuenda Suti ta nyoho ña naquehén ndo tuhun cahán. Soco tatu inga ra vachi ra cuenda maa ra, chi ra cuan nachino iñi ndo. ⁴⁴Nyoho ña cuví chino iñi ndo chii vatyí cuñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó. ⁴⁵Ma cuñí ndo vatyí cutyaa yuhu cuatyí chaha ndo nuu Suti. Ra Moisés cuví ra tyaa cuatyí chaha ndo vatyí ña sacuví ndo ley cha tyaa ra. Ta ley ra cuñí maa ndo vatyí cunyaca chi chi ndo andiví. ⁴⁶Vatyí tyehe ta chinó iñi ndo tuhun cahán ra Moisés, chinó tucu iñi ndo tuhun cahán yuhu. Vatyí tuhun yuhu ican tyaa ra. ⁴⁷Soco tatu ña chinó iñi ndo tuhun cha tyaa ra, ¿yoso caa cuchino iñi ndo tuhun cahán

yuhu? —catyí ra Jesús chi ra cacuví nuu chi ñu Israel.

6

Nu chahá ra Jesús cha cachi ohon mil rayíi (Mt. 14.13-21; Mr. 6.30-44; Lc. 9.10-17)

¹Cha yahá cuan, ra Jesús cuahan ra inga chiyo miñi cahnu cha nañí Tyañuhu Galilea. Ta suri miñi cuan nañí chi Miñi Tiberias. ²Cuaha xaan ñáyivi cuahan nyicon chi ra cha cuenda vatyí nyehé ñu milagru cha sacuví ra vatyí sanduvahá ra chi ñu cuhvi. ³Tyicuan ta ra Jesús ndaa ra noo yucu ta chicunyaá ra yucuan chihin ra cachicá noo chihin ra. ⁴Ta cha nyaña quívi vico cha nañí pascua cha sanducahnú ñu Israel. ⁵Cha nanyehé ra Jesús vatyí cuaha ñáyivi nyicón chi ra, ta quichahá catyí ra chi ra Felipe:

—¿Yoso caa cusata yo cha cachi tandihí ñáyivi cuaha ihya? —catyí ra chi ra.

⁶Soco catyí ri maa ra chi ra Felipe cha nducú nyehe ra chi ra ñáá catyí ra, vatyí ra Jesús chitó vaha ra ñáá cha cuasacuví ra. ⁷Tyicuan ta nacahan ra Felipe ta catyí ra:

—Yahvi cha quehen yo cha sahá tyiño yo ucha tahan yoo ta ma ñihi sata yo cha cachi ñu chihin chiiñ —catyí ra Felipe.

⁸Ta ra Andrés nonga ra nyicón chi ra Jesús, ta yañi ra Simón Pedro cuví chi ra, catyí ra chi ra Jesús:

⁹—Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyivi ihya? —catyí ra Andrés.

¹⁰Tyicuan ta ra Jesús catyí ra chi ra:

—Catyí ndo chi tandihí ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayíi, ta siñ ri ñusihi chihin ra cuatyaa. ¹¹Tyicuan ta quehen ra Jesús pan cuan ta cha yahá nacuhva ra tyahví nyoo chi Nyoo, chahá ra chi ra cachicá noo chihin ra. Ta ra cachicá noo chihin ra casachá ra chi tandihí ñu canyicú cuan. Suri tyicuan caa sacuví tucu ra chihin tiyaca cuan, chahá ra cachi ñu nyacua nya cha chitu chi ñu. ¹²Ta cuhva cha ndaha iñi ñu, ra Jesús catyí ra chi ra cachicá noo chihin ra:

—Nacoñehe ndo yiquin cha ndoo tacuhva vatyí ñahri cha tiví —catyí ra chi ra.

¹³ Canacoñehe ra, ta casacutü ra uchi uvi tahan tica chihin yiquin cha ndoo cuan cha cuenda ohon tahan pan cuan. ¹⁴ Tyicuan ta cha yahä nyehe ñáyivi cuan milagru cha savahä ra Jesús, ta catyí ñu:

—Ican ndicha cuii ra ihya cuví profeta, ra chahá cuenda tuhun cahan Nyoo cha nyaá cha quichi siquí ñuhu ñáyivi ihya —catyí ñu.

¹⁵ Soco tuví iñi ra Jesús vatyi cuñí ñu quehen ñu chi ra chihin fuerza vatyi sacuvi ñu rey chi ra. Ta cuahan ri ra nu sucun yucu cuan inga chaha vatyi cunyaa notuhun maa ra.

Nu chicá ra Jesús nu ndutya
(Mt. 14.22-27; Mr. 6.45-52)

¹⁶ Ta cha cuaa, ta noq coyo ra cachicá noo chihin ra Jesús yuhu miñi cuan. ¹⁷ Ta quihvi coyo ra chichi canoa ta cuayaha sava ra mahñu miñi cuan vatyi cuchaa ra Capernaum. Cha cuñaa ta ra Jesús suri cha ta ndichi ca ra. ¹⁸ Tyicuan ta chaq noo tatyí ñihi. Ta iyo ndicuita ndutya miñi cuan. ¹⁹ Tyicuan ta cha cayahä ra chihin canoa cuan tari noo cha ohon o iñu kilómetro, ta cananyehe ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhvi ra. ²⁰ Soco ra Jesús catyí ra chi ra:

—¡Yuhu cuví, ma yuhvi ndo!

²¹ Tyicuan ta chihin cha casií cuñi ra caquehen cuenda ra chi ra Jesús chichi canoa. Tyicuan ta tañi ri ta cachaa ra yuhu miñi nu cuahan coyo ra.

Nu nanducú ñáyivi chi ra Jesús

²² Tuví inga quivi cuan cha ñaha cuii chitó ñáyivi cha ndog inga chiyo miñi cuan vatyi ra cachicá noo chihin ra Jesús cuahan coyo ra chihin noo canoa cha iyó cuan. Vatyi noo ri maa iyó. Ta chitó ñu tyi ña cuahan ra Jesús chihin ra. ²³ Soco chaq coyo ca canoa cha quitä coyo ñuu Tiberias. Chaq chi yatyn ri ityi nu cachachi ñu pan, yahä cha nacuhva Sutu Mañi yo tyahvi nyoo chi Nyoo. ²⁴ Tyicuan ta cha nanyehe ñu tyi yori ra Jesús yucuan ta ni ra cachicá noo chihin ra, quihvi coyo ñu chichi inga canoa cuan ta cuahan ñu nya Capernaum cuananducu ñu chi ra.

Ra Jesús cuví pan cha chahá ñáyivi chaa coo yo

²⁵ Cha chaq coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chi ra:

—Maestro, ¿ama chaun ihya? —catyí ñu chi ra.

²⁶ Soco ra Jesús catyí ra chi ñu:

—Cha ndicha catyí chi ndo vatyi nyoho nanducú ndo chii soco cha cuenda vatyi chachi ndo nyacua nya cha chitu chi ndo. Soco ñima vatyi nyehe ndo milagru cha sacuvi. ²⁷ Ma saha tyiño ndo cuenda nyayu cha ndihí, soco saha tyiño ndo cuenda nyayu cha ña ndihí ta chahá chi noo ñáyivi chaa cha ma naa ca maa coo ndo. Ican ihya cuví nyayu cha cucuhve chi ndo vatyi Nyoo Suti tyaa tyiño cuan chii vatyi yuhu cuví Rayii cha quichi nya gloria —catyí ra Jesús.

²⁸ Tyicuan ta quichahä ndaca tuhun ñu chi ra ta catyí ñu:

—¿Ñáa cha cuví sacuvi ndi tacuhva sacuvi ndi cuhva cuñí Nyoo? —catyí ñu.

²⁹ Tyicuan ta ra Jesús catyí ra chi ñu:

—Cha cuñí Nyoo cha sacuvi ndo ican cuví ihya: Cha chino iñi ndo chi yuhu, ra cha tachi ra chi —catyí ra Jesús chi ñu.

³⁰ Ta candaca tuhun tucu ñu chi ra, ta catyí ñu:

—¿Ñáa seña cuhvon chi ndi tacuhva vatyi nyehe ndi ta chino iñi ndi chuun? ¿Ñáa cha cuasacuvun? ³¹ Sutu chahnun ndi chachi ñu maná chiqui ndi nu yori ñáyivi iyó quivi cuan, tari catyí tuhun Nyoo: “Nyoo chahä ra pan cha quichi ityi andivi cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chahä pan cha quichi ityi andivi cachi ñu, soco Nyoo Suti cuví ra chahá pan cha ndicha vaha cha quichi ityi andivi.

³³ Vatyi pan cha chahá Nyoo, ican cuví ra cha noq ityi andivi. Ta ican cuví ra cha chahá noo ñáyivi chaa coo ñu iyó siqui ñuhu ñáyivi —catyí ra Jesús.

³⁴ Tyicuan ta quichahä cacatyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito aña ndo. Ñu vachi nu nyaí ma cusoco ca aña ñu, ta ñu chino iñi chii ma cu ityi ca maa aña ñu. ³⁶ Soco cha yahä catyí chi ndo vatyi nyoho ña chinó iñi ndo vasi

cha nyehé ndo chii. ³⁷ Tandihí ñáyivi cha chahá Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu. ³⁸ Vatyí yuhu quichí ityi andívi soco ñima cha cuenda cha sacuí cuhva cuñí mai, soco sacuí cuhva cuñí ra cha tachí chii. ³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyí sanandote chi ñu nu cuandihí quívi. ⁴⁰ Suti, ra cha tachí chii, cuñí ra vatyí tandihí ñáyivi cha nyehe chí yuhu ra cha cuví Sehe Nyoo, ta chino iñi ñu chii, coo ñu noo ñáyivi cha ma naa ca maa. Ta suri yuhu cusanandote chi ñu nu cuandihí quívi —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichí ityi andívi”, catyí ra. ⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chí sutu ra ta chí síhi ra. ¿Yoso caa cha catyí ra vatyí ityi andívi quichí ra? —catyí ñu.

⁴³ Tyicuan ta ra Jesús catyí ra chi ñu:

—Sandihí ndo tuhun cha cahan nyaa ndo. ⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusanandote chi ñu nu cuandihí quívi. ⁴⁵ Nu libru cha catyaa ra profeta Nyoo ta cha naha catyí chí tyehe caa: “Nyoo cusañaha ra chí tandihí ñáyivi.” Yucuan chaha vatyí ñu cha tyasohó tuhun cahan Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chí Nyoo Suti, vatyí yori nyehé chí ra. Soco noo ri mai nyehé chí ra. Ta iquen cuví ra cha quitá nu nyaá ra. ⁴⁷ Cha ndicha catyí chí ndo vatyí ñu chinó iñi chí coo ñu noo ñáyivi chaa cha ma naa ca maa. ⁴⁸ Yuhu cuví pan cha chahá cha conyito aña ndo. ⁴⁹ Sutu chahnu ndo chachí ñu maná chiqui ndí cuan, soco suri cachihí ñu. ⁵⁰ Soco yuhu, tuhun pan cha quichí ityi andívi cahín chihin ndo, vatyí nya ñu cachi pan cuan, ma cúvi aña ñu. ⁵¹ Suri mai cuví pan nyitó cha quichí ityi andívi. Yoó cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi. Ta cuhve ñáyivi cha cuenda tandihí ñáyivi iyó síqui ñuhu ñáyivi —catyí ra Jesús chí ñu.

⁵² Tyicuan ta ra Israel cuan quichaha can-dahun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chí ndo, yuhu cuví Rayii cha quichí nya gloria, ta tatu nyoho ta ma cachi ndo coño ñuhi, ta tatu ma coho ndo ñiñi, ma cuví coo ndo ñáyivi chaa. ⁵⁴ Ñu chachí coño ñuhi ta chíhi ñu ñiñi, iyó ñu noo ñáyivi chaa cha ma naa ca maa. Ta yuhu cusanandote chí ñu nu cuandihí quívi. ⁵⁵ Vatyí coño ñuhi ican cuví pan cha ndicha vaha cha tahán chí cachi ndo, ta ñiñi cuví vinu cha ndicha vaha cha tahán chí coho ndo. ⁵⁶ Ñu chachí coño ñuhi ta chíhi ñiñi, iñi ri cuví ñu chihin. Ta mai iñi ri cuví chihin ñu. ⁵⁷ Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chí. ⁵⁸ Tuhun pan cha quichí ityi andívi cahín. Pan ihya ñima tari maná cha chachí sutu chahnu ndo, vatyí suri chíhi ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu iñi ri ñu chíhi vehe ñuhu Capernaum.

⁶⁰ Cuaha xaan ñáyivi nyicón chí ra Jesús. Ta cuhva cha chíhi ñu tuhun ihya catyí ñu:

—Tuhun cha cahan ra ihya, yíi xaan cha natiñ cuenda yo. Yori cuví quichaha tuhun cahan ra —catyí ñu.

⁶¹ Tyicuan ta tuví iñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chí ñu:

—¿Atu quiñi cuñí ndo cha cahín tuhun ihya? ⁶² Ta ¿yoso caa sacuí ndo tatu nyehe ndo chí yuhu Rayii cha quichi nya gloria nandaa xica tiqui inga chaha ityi nu quite quívi xihna ri? ⁶³ Tatyí li Nyoo ican cuví cha chahá ñáyivi chaa. Coño ñuhu, ña tyinyee chí coo yo ñáyivi cuan. Ta tuhun cha cahín chihin ndo, Tatyí li Nyoo cuví ta chahá chí cha conyito aña ndo. ⁶⁴ Soco yihí suhva ndo cha ña chinó iñi ndo chí —tyicuan caa catyí ra Jesús.

Vatyí nya quívi xihna ri ta chitó ra yóó cha ña chinó iñi chí ra ta yóó cha cunaxico tuhun chí ra. ⁶⁵ Ta catyí ra:

—Yucuan chaha catyí chí ndo vatyí yori ñu cuví quichi nu nyaí tatu ñima Nyoo Suti cana chí ñu —catyí ra Jesús.

⁶⁶ Nya ndaha quívi cuan cuaha xaan ñu nyicón chí ra Jesús sandoq ñu chí ra. Ta

ña chicá noo ca ñu chihin ra. ⁶⁷Tyicuan ta ra Jesús ndacá tuhun ra chi ndihi uchi uvi tahan ra chicá noo chihin ra, ta catyí ra:

—¿Atu cuñí tucu nyoho cuhun ndo? —catyí ra chi ra.

⁶⁸Soco nacahan ra Simón Pedro ta catyí ra:

—Sutu Mañi yuhu, ¿yóó chi cunyicon ndi? Ta noo tuhun yoho cahún tuhun ñáyivi cha ma naa ca maa coo ndi. ⁶⁹Nyuhu chinó iñi ndi, ta ñoho nuu ndi chuun vatyi yoho cuvún ra cuví Cristo Sehe Nyoo nyitó.

⁷⁰Ta nacahan ra Jesús ta catyí ra:

—¿Atu ñima yuhu nacachi chi ndi uchi uvi nyoho? Ta noo nyoho cuví cuihna —catyí ra.

⁷¹Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyi ra Judas cuví ra cucuhva cuenda chi ra Jesús chi ra xaan iñi chi ra, vasi noo ra cha uchi uvi cuan cuví ra.

7

Nu ña cachinó iñi yañi ra Jesús chi ra

¹Cha yahá tuhun ihya, ta ra Jesús chicá noo ra ityi Galilea. Ña cuñí ra cuhun ra Judea vatyi ra cacuví nuu chi ñu Israel cuan cacuñí ra cacahñi ra chi ra. ²Ta cha nyaña quívi vico cha sanducahnu ñu Israel ndi cuíya ri. Ta nañí chi vico Tabernáculo. ³Yucuan chaha yañi ra Jesús cacatyí ra chi ra:

—Ma ndoun ihya. Cuahan Judea tacuhva vatyi ñu naquehén tuhun cahún cha nyicú yucuan nyehe ñu tyiño cha sacuvún. ⁴Vatyi tatu cuñí yo cha cohon nuu ñáyivi chi yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuvi nuu tandihi ñáyivi —cacatyí yañi ra chi ra.

⁵Tyicuan caa cacatyí ra vatyi ni yañi ra ta ña chinó iñi ra chi ra. ⁶Tyicuan ta ra Jesús catyí ra chi ra:

—Ta chaa ca cuhva cha cuhun yuhu. Soco nyoho savahri quívi cuví cuhun ndo. ⁷Vatyi ñáyivi ña cutasi cuñí ñu nyehé ñu chi ndo, soco chi yuhu tasi cuñí ñu nyehé ñu cha cuenda vatyi cachi ri catyi chi ñu vatyi ña vaha cha nyacuví ñu. ⁸Cuahan nyoho vico cuan. Yuhu ma cuhin vatyi ta chaa ca cuhva cha tahán chi cuhin —catyí ra.

⁹Yahá cuan ta ndoq ra nya Galilea.

Nu ñohó ra Jesús vico Tabernáculo

¹⁰Cha yahá cuahan coyo yañi ra Jesús, cuahan tucu maa ra vico cuan, soco xehe ri.

¹¹Ta ra cacuví nuu chi ñu Israel cananducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

¹²Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chi ñáyivi”, catyí ñu.

¹³Soco yori cahán ndichin tuhun ra cha cuenda cha yuhví ñu chi ra cacuví nuu cuan.

¹⁴Cha cusava iyó vico ta quihví ra Jesús chichi vehe ñuhu cahnu quichahá cahan ra nuu ñáyivi. ¹⁵Ta ra cacuví nuu cuan iyó cacuñí ra ta cacatyí ra chi ra tahan ra:

—¿Yoso caa chitó ra ihya ta ña sacuahá ra? —catyí ra.

¹⁶Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tachí chii cuví. ¹⁷Tatu yihí nyoho cha cuñí ndo sacuvi ndo cuhva cuñí Nyoo, cua coto ndo vatyi cuenda Nyoo sacote ta ñima cha cuenda mai. ¹⁸Ra cha cahán cuenda maa, cahán ra na sacahnu ñáyivi chi ra. Soco ra nanducú cha sacahnu ñu chi Nyoo, ra cha tachí chi ra, ican ra cuan cahán cha ndicha. Ta ñahri cha sandaví ñaha ra.

¹⁹¿Atu ña ndicha vatyi ra Moisés chahá ley chi ndo? Soco ni noo nyoho ña quichahá ndo ley cuan. ¿Ñáá tuhun cuñí ndo cahñi ndo chii? —catyí ra.

²⁰Ta nacahan ñáyivi ta catyí ñu chi ra:

—Noo tatyi ña vaha yihí chi yoho. Yori cuñí cahñi chuun —catyí ñu chi ra.

²¹Ta catyí ra Jesús:

—Cha catyi noo milagru cha sacuvi quívi nyitatu yo, iyo xaan cuñí nyoho. ²²Soco ra Moisés catyí ra chi ndo vatyi sacuvi ndo costumbre circuncisión. Vasi ñima ra quichahá chihin tuhun cuan, soco ñáyivi chi ra ityi chata, casacuvi tyicuan caa. Yucuan chaha nyoho sacuvi ndo costumbre cuan vasi tahán chi quívi nyitatu yo. ²³Ta vityin, vaha tatu cha cuenda cha ña cuñí ndo nahnu ndo ley ra Moisés sacuvi ndo tyicuan caa vasi quívi nyitatu yo tahán chi. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyi sanduvahí nani coño ñuhu noo ra cuan quívi nyitatu yo? ²⁴Ma tyaa ndo cuatyí

siqui ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

²⁵ Tyicuan ta suhva ñu iyó Jerusalén, quichaha ndaca tuhun ñu:

—¿Atu ñima chi ra ihya canducu ra cha cahñi ra? ²⁶ Ta maa ra nanyaá cuan cahán ra nuu ñáyivi. Ta yori maa catyí ñáá cha catyí chi ra. ¿O vasi ca chinó tucu ñi ra cacuví nuu vatyi ra ihya ra Cristo ra cuví rey cha saquichi Nyoo cuví ra? ²⁷ Soco yoó chitó yo nya quita ra ihya. Soco quívi quichi ra Cristo yori coto nya ityi quichi ra cuan —catyí ñu.

²⁸ Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyí ra:

—¡An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chii, ra cha cuví cha ndicha. Ta nyoho ña ñohó nuu ndo chi ra. ²⁹ Yuhu ñohó nui chi ra vatyi cuenda ra vachi, ta maa ra tachí chii —catyí ra Jesús.

³⁰ Tyicuan ta cuñí ñu tyihi ñu chi ra chichi vehe caa. Soco ni noo ñu ña tñin ñu chi ra cha cuenda vatyi ta chaa ca quívi cha tahán chi tñin ra chi ra. ³¹ Soco cuaha xaan ñu chinó ñi chi ra. Ta catyí ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyí ñu.

Nu tachi ra cuví fariseo policía cuquehen chi ra Jesús cohon ra vehe caa

³² Cha chiñi ra fariseo cha cahán ñáyivi tuhun ra Jesús, maa ra ta ra cacuví nuu chi tata sutu catachí ra chi policía cuenda vehe ñuhu cuan cuquehen ra chi ra tyi cohon ra vehe caa. ³³ Tyicuan ta ra Jesús catyí ra:

—Cunyai chihin ndo suhva ri ca quívi. Yahá cuan ta cunuhi nu nyaá ra cha tachí chii. ³⁴ Nyoho cunanducu ndo chii. Soco ma ñañihi ndo chii. Vatyi ma cuví cuhun ndo nu cuacunyai —catyí ra Jesús.

³⁵ Tyicuan ta quichaha candaca tuhun ra cacuví nuu chi ñu Israel chi ra tahan ra:

—¿Nya cuhun ra ihya cha ma ñañihi yo chi ra? ¿O cuhun ra nu nyaa ra Israel cha ca iyó ñuu Grecia vatyi sañaha ra chi ñu iyó yucuan, vaha? ³⁶ Ñáá cha cuñí chi catyí

tuhun cahan ra chihin yo? Vatyi catyí ra: “Cuananducu ndo chii soco ma ñañihi ndo chii. Vatyi ma cuví cuhun ndo nu cuacunyai” —tyicuan caa cacuví yuhu ra tuhun ra.

Ñu chinó ñi chi Nyoo cucohon Tatyí li ra aña ñu

³⁷ Quívi nu ndihi chiyo vico, yucuan quívi cha ñi ca. Ta quívi cuan ndicuita ra Jesús ta ñihi cahán ra ta catyí ra:

—Tatu nya noo ndo ityi aña ndo tuhun Nyoo, ñaha ndo ta nachino ñi ndo chii. ³⁸ Ñu cha chinó ñi chii, chichi aña ñu cucono tari noo yuvi ndutya cha nyitó, tari cuhva catyí nu tutu Nyoo —catyí ra Jesús.

³⁹ Soco chihin cuan cuñí ra catyí ra vatyi ñu chinó ñi chi ra cunaquehen ñu Tatyí li Nyoo, vatyi quívi cuan ta quichi ca Tatyí li Nyoo vatyi ra Jesús, ta cunuha ca ra nya gloria nu cusacahnu Sutu ra chi ra.

Nu cusñin ñáyivi cha ña tahán ñi tuhun cahan ra

⁴⁰ Suhva ñáyivi cha chiñi ñu tuhun ihya, catyí ñu:

—Ndicha vatyi ra ihya profeta Nyoo cha nyaá quichi cuví ra —catyí ñu.

⁴¹ Ta inga ñu catyí ñu:

—Ican ra cuví Cristo —catyí ñu.

Soco inga ñu catyí ñu:

—¿Yoso caa cha ra Galilea cuví ra Cristo?

⁴² Vatyi nu tutu Nyoo catyí chi vatyi ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyí ñu.

⁴³ Tyicuan ta ñáyivi cuan canatahvi sava ñu cha cuenda ra Jesús. ⁴⁴ Yihí ñu cuñí ñu quehen ñu chi ra cutyihi ñu chi ra chichi vehe caa. Soco yori tñin chi ra.

Ra cacuví nuu vehe ñuhu ña cachinó ñi chi ra Jesús

⁴⁵ Tyicuan ta policía vehe ñuhu cahnu cuan, cuanuhu coyo ra nu nyicú ra fariseo ta ra cuví nuu chi tata sutu. Ta candaca tuhun ra ñihi cuan ta cacatyi ra:

—¿Ñáá tuhun ña quehen ndo chi ra?

⁴⁶ Ta policía cuan cacatyi ra:

—¡Ni noo chaha ta ni yori tuhva cahan tari cahán ra cuan! —cacatyi ra.

⁴⁷ Tyicuan ta ra fariseo catyí ra chi policía cuan:

—¿Atu sandaví ñaha ndihi ra chi nyoho ñandihí? ⁴⁸ ¿Nyehe ndo vatyi ni noo ra cuví nuu chi ndi cha cuví ndi fariseo ta ña chinó

iñi chi ra cuan? ⁴⁹Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyí ra.

⁵⁰Tyicuan ta ra Nicodemo, ra cha chahan nu nyaá ra Jesús cha cha cuaa, cuví ra noo ra fariseo, ta catyí ra chi ra:

⁵¹—Catyí ley vatyi ma cuví tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáa cha sacuví ra —catyí ra chi ra.

⁵²Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuahá nu tutu Nyoo ta nyehun, vatyi ni noo ra chahá cuenda tuhun cahán Nyoo ta ña nyaá chi cha quichi ra ityi Galilea —cacatyí ra.

Ñaha sihi cha natuví chihin rayií ta iyó yii ña

⁵³Tyicuan ta tahan tahan ra cuanuhu coyo ra vehe ra.

8

¹Soco ra Jesús cuahan ra yucu cha nañi Olivo. ²Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandiñi ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu. ³Tyicuan ta ra sacuahá cuenda ley ta ra cuví fariseo chaá coyo ra chihin noo ñaha iyó yii vatyi natiñ ra chi ña nu cuatyí ña chihin inga rayií. Ta cuatyaa ra chi ña mahñu ñáyivi nyicú cuan. ⁴Ta quichaha cacatyí ra chi ra Jesús:

—Maestro, ñaha sihi ihya natiñ ndi chi ña nu cuatyí ña chihin inga rayií. ⁵Ta ley cha tyaa ra Moisés catyí chi vatyi nacahñi yo chihin yuu chi ñusihi cha sacuví tyehe caa. ¿Ta yoho, yoso caa catyun vityin? —catyí ra chi ra.

⁶Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí siqui ra. Tyicuan ta ra Jesús chicunyaá tyayii ra nu ñuhú ta quichaha tyaa ra letra nu ñuhú chihin nundaha ra. ⁷Soco vatyi candacá tuhun ca ra chi ra, tyicuan ta nicuinanyaá ra ta catyí ra chi ra:

—Xihna ca nyoho cha ñahri cuatyí ndo quēhen ndo yuu ta cañi ndo chi ña —catyí ra chi ra.

⁸Ta nicunyaá tucu ra ta quichaha sañihi ra tyaa ra letra nu ñuhú. ⁹Soco maa ra cha cachiñi ra tuhun ihya, tuví iñi ra tyi iyó tucu cuatyí maa ra. Ta quichaha quita coyo tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndoo noo tuhun ca maa ra Jesús chihin ñaha sihi cuan mahñu nu nyicu ñáyivi.

¹⁰Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta catyí ra chi ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñi cahñi chuun? —catyí ra chi ña.

¹¹Ta nacahan ña ta catyí ña:

—Ni nonga ra, Tata.

Tyicuan ta ra Jesús catyí ra chi ña:

—Ni yuhu ta ma cahñi chuun. Cuahan vityin. Ta ma sacuví con cuatyí —catyí ra chi ña.

Ra Jesús cuví cha ndichin cha sandichin aña ñáyivi

¹²Tyicuan ta cahan tucu ra Jesús nuu ñáyivi inga chaha, ta catyí ra chi ñu:

—Yuhu cuví ra cha sandichin aña ñáyivi iyó siqui ñuhu ñáyivi. Yóo cha nyicón chii, coo ñu noo ñáyivi chaa nu ndichin. Ta ma caca noo maa ñu nu ñaa iñi —catyí ra Jesús chi ñu.

¹³Tyicuan ta ra cacuví fariseo cacatyí ra chi ra:

—Yoho, cahún tumañi iñi cuenda maun. Ta yucuan ña ndicha —catyí ra chi ra.

¹⁴Nacahan ra Jesús ta catyí ra:

—Vasi suri mai cahín tumañi iñi cuende, soco ndicha cha cahín vatyi yuhu chité nya ityi quichi ta nya ityi cuahín. Soco nyoho ña chitó ndo nya ityi quichi ni nya ityi cuahín. ¹⁵Nyoho yatyin xaan cahan ndo cha caa ñáyivi. Soco yuhu, yori chi cahín cha caa. ¹⁶Soco tatu catyí cha caa ñáyivi, catyí cha ndicha. Vatyi ñima noo ri mai nyehí, soco Suti ra cha tachi chii, ican ra nyehé chihin. ¹⁷Nu ley nyoho nyaá vatyi tatu uvi ra chaha cha ndaa, cuñi chi chinó iñi yo cha ndaa cuan. ¹⁸Ta vityin vaha, suri mai cuví cha ndaa cuenda mai. Ta Suti, ra cha tachi chii, cuví inga cha ndaa —catyí ra Jesús chi ra.

¹⁹Tyicuan ta candacá tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chi Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰Tuhun ihya cahan ra Jesús cha ni ri ca cha sañahá ra chichi vehe ñuhu cahnu, nu nyaá caja nu tyihí ñáyivi xuhun. Soco yori tyihí chi ra vehe caa, vatyí ta chaa ca quívi cha tahán chi cohon ra.

“Nu cuhun yuhu ma cuvi cuhun ndo”, catyí ra Cristo

²¹Ra Jesús catyí ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo síqui ndo. Nu cuahan yuhu, nyoho ma cuvi cuhun ndo —catyí ra Jesús chi ñu.

²²Tyicuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyí catyí ra vatyí ma cuvi cuhun yo nu cuahan ra —cacatyí ra.

²³Tyicuan ta ra Jesús catyí ra:

—Nyoho ra cuenda ityí yuvi ihya cuví ndo. Soco yuhu ra cuenda ityí síqui cuví. Nyoho ñu ñuhu ñáyivi ihya cuví ndo. Soco yuhu ñima ra ñuhu ñáyivi ihya cuví.

²⁴Yucuan chaha catyí chi ndo vatyí cucúvi ndo ta cundoo cuatyí ndo síqui ndo. Vatyí tatu ña chinó iñi ndo cha yuhu cuví ra tinyaá cuatyí ndo, cundoo cuatyí ndo síqui ndo quívi cúvi ndo —catyí ra Jesús chi ra.

²⁵Tyicuan ta quichaha candaca tuhun ra chi ra, ta catyí ra:

—¿Yóó ra cuví yoho?

Ta ra Jesús nacahan ra ta catyí ra:

—Cha yaha catyí chi ndo nyata quívi xihna ri. ²⁶Cuaha xaan ca cha nyaá cha catyí chi ndo, ta cuaha xaan ca nyaá catyí cha caá ndo. Soco tuhun cha catyí yuhu chi ñáyivi iyó síqui ñuhu ñáyivi, tuhun cha chihí cha cahan ra cha tachí chii cuví. Ta maa ra cahan ra cha ndicha —catyí ra.

²⁷Soco maa ra cacuví nuu chi ñu Israel ña cutuñi iñi ra vatyí tuhun Nyoo Sutu yo cahan ra chihin ra. ²⁸Yucuan chaha catyí ra chi ra:

—Cutyaa ndo chi ra cuví Rayi cha quichi nya gloria nu cruzi. Tyicuan ta cunacoto ndo vatyí yuhu cuví, ta cucoto ndo vatyí tyiño sahí ñima cha cuenda mai sacuví, soco cahan cha sañahá Suti chii. ²⁹Vatyí Suti, ra cha tachí chii, nyaá ra chihin. Ta ña

sandoó ra chii cha maa ri mai. Vatyí yuhu tyicuan ri sacuví cuhva cuñí ra —catyí ra Jesús.

³⁰Cha cahan ra Jesús tuhun ihya, cuaha ra quichaha chino iñi ra chi ra.

Ñu cha cuví Sehe Nyoo ta ñu cha sacuví cha quiñi caa

³¹Tyicuan ta catyí ra Jesús chi ra cacuvi nuu chi ñu Israel cha chinó iñi chi ra:

—Tatu nyoho ta sañihi ca ndo sacuvi ndo cuhva sañahí chi ndo, cuchaa ndo cuví ndo noo ñu yihi cuende. ³²Ta cucoto ndo cha ndicha. Ta chihin cha ndicha cuan cundoo ndo libre —catyí ra.

³³Ta canacahan ra ta catyí ra:

—Nyuhu ñáyivi vachí tata ra Abraham cuví ndi. Ta ni noo chaha ta cuvi ca ndi musu chi ni noo ñáyivi. ¿Yoso caa cha catyí yoho tyi ndoo ndi libre? —catyí ra chi ra.

³⁴Ta ra Jesús catyí ra:

—Cha ndicha catyí chi ndo vatyí tandihí ñu sacuví cha quiñi caa, musu cuenda cha quiñi caa cuví ñu. ³⁵Noo musu ña nyaá ra vehe chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra. ³⁶Yucuan chaha tatu yuhu cha cuví Sehe Nyoo ta tave chi ndo ndaha ra ña vaha, ndicha cuii cucoo ndo libre. ³⁷Cha chité vatyí ñáyivi chi ra Abraham cuví chi ndo. Soco yihí ndo cuñí ndo cahñi ndo chii, vatyí ña tiñ cuenda ndo tuhun cahn. ³⁸Yuhu cahn cha sañahá Suti chii. Ta nyoho sacuví ndo cha catyí sutu ndo chi ndo —catyí ra chi ra.

³⁹Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra. ⁴⁰Soco nyoho, vasi catyí chi ndo cha ndicha cha sañahá Nyoo chii, nyoho cuñí ndo cahñi ndo chii. ¡Ra Abraham ña sacuví ra cha tyicuan caa! ⁴¹Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahví ñu cuví chi ndi. Iyó noo ri sutu ndi ta ican ra cuví Nyoo —catyí ñu.

⁴²Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñí ndo chii. Vatyí yuhu quite nu nyaá ra ta chaí nyehe. Ña vachí cuenda

mai, soco Nyoo tachí chii. ⁴³¿Ñáá tuhun cha ña cutuñí iñi ndo tuhun cha catyí chi ndo? Cha cuenda tyi ña cuñí ndo tyasohó ndo tuhun cahín. ⁴⁴Cuihna ican ra cuví sutu ndo. Ta sehe ra cuví chi ndo. Ta cuñí ndo sacuvi ndo cuhva cuñí ra. Ra chahñí ñáyivi cuví cuihna nyata quívi xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyí cuendu ra. Ta sutu ñu cuendu cuví chi ra. ⁴⁵Ta yuhu vatyí cahín cha ndicha, ña chinó iñi ndo chii. ⁴⁶¿Nya noo nyoho cuví catyí ndo vatyí yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó iñi ndo chii? ⁴⁷Ñu cuenda Nyoo tyasohó ñu tuhun cahán Nyoo. Soco vatyí nyoho ñima ñu cuenda Nyoo cuví ndo, yucuan chaha ña cuñí ndo tyasoho ndo tuhun cahín —catyí ra Jesús.

Ra Cristo, nyata nicumañi coo ra Abraham, ta cha iyó ra

⁴⁸Tyicuan ta ra cacuví nuu chi ñu Israel cacatyí ra chi ra:

—¿Atu ña ndicha vatyí yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

⁴⁹Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui. ⁵⁰Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii. ⁵¹Cha ndicha catyí vatyí ñu quichahá tuhun cahín ma chaa tuhun chihí aña ñu —catyí ra Jesús chi ra.

⁵²Tyicuan ta ra Israel cuan canacahan ra ta catyí ra:

—Vityin chitó vaha ndi vatyí yihí noo tatyí ña vaha chuun. Vatyí ra Abraham ta tandihí ra cuví profeta Nyoo cachihí ra. Ta yoho catyún vatyí ñu quichahá tuhun cahín ma cúvi maa ñu. ⁵³¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñí maun? —catyí ra chi ra.

⁵⁴Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyi

Nyoo cuenda ndo cuví chi ra. ⁵⁵Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra. ⁵⁶Ra Abraham sutu chahnu ndo cusii xaan cuñí ra vatyí cunyehe ra quívi quichi yuhu siquí ñuhu ñáyivi. Ta nyehe ra ta cusii xaan cuñí ra —catyí ra Jesús chi ñu.

⁵⁷Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

⁵⁸Ta ra Jesús nacahan ra ta catyí ra:

—Cha ndicha catyí chi ndo vatyí nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹Tyicuan ta quehen ra yuu vatyí cañi ra chi ra Jesús. Soco maa ra quihví xehe ra, ta quita ra chichi vehe ñuhu cuan. Ta yahá ra mahñu ra ta cuahan ra.

9

Nu sanduvahá ra Jesús chi noo ra cha cuaa nyata cacu

¹Cuhva cha yahá ra Jesús noo nu yahá ra, nyehe ra chi noo ra cha cuaa nyata cacu.

²Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tunyee iñi ra chihin ra.

⁴Cha ni ri ca cha ñicahñu, cuñí chi cha sacuvi tyiño ra cha tachí chii. Vatyí vachi cha cuaa cha ma cuvi ca saha tyiño yo. ⁵Cha ni ri ca cha nyaí siquí ñuhu ñáyivi ihya, ñuhu ndichin cuenda ñáyivi iyó siquí ñuhu ñáyivi cuví.

⁶Cha yahá cha catyí ra Jesús tuhun ihya, ta tyicu sii ra nu ñuhú. Ta savahá ra chiin nyahyu chihin sii ra ta tyaa ra chiti nuu ra cuaa cuan. ⁷Tyicuan ta catyí ra chi ra:

—Cuañan cuanacatya nuun nya tanque Siloé cuan. —Sivi cuan cuñí chi catyí: “Tachí Chuun.”

Tyicuan caa ta ra cuaa cuan chahan ra chinacatyá ra nuu ra. Ta cuhva cha nachaa

ra, cha nyehe ra. ⁸ Tyicuan ta ñu nyicú yatyin yuvehe ra, ta ñu cha nyehe chi ra cha cucuaa ra ta caya ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañí Jesús cuan, ican savaha nyahyu ta tyaa ra chiti nui ta catyí ra chii: “Cuahan nya tanque Siloe ta nacatyon nuun.” Tyicuan ta chahin. Ta cha yaha nacatye nui ta nanyehi —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanahma ra cuví fariseo chi ra cha cucuaa ta nanyehé

¹³ Tyicuan ta chinyaca ñu chi ra cha cucuaa cuan nuu ra cuví fariseo. ¹⁴ Vatyí quivi cha savaha ra Jesús nyahyu ta sanduvaha ra chi ra cha cucuaa cuan, quivi nyitatú yo cuví. ¹⁵ Yucuan chaha ra fariseo candaca tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyaa ra nyahyu chiti nui, ta nacatye ta vityin ndichin nyehí —catyí ra chi ra.

¹⁶ Tyicuan ta suhva ra fariseo cacatyí ra:

—Ra cha sacuví tyehe caa ñima ra cuenda Nyoo cuví ra, vatyí ña sahá ra ñáyivi quivi nyitatú yo —cacatyí ra.

Soco inga ra cacatyí ra:

—¿Yoso caa cha cuví sacuví ra milagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra. ¹⁷ Ta candaca tuhun tucu ra inga chaha chi ra cha cucuaa cuan, ta catyí ra chi ra:

—¿Ta yoho, ñáa catyún cuenda ra cha sanduvaha chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuví nuu chi ñu Israel ña cuñí ra chino iñi ra cha cucuaa ra cuan ta vityin nyehé ra. Ta nyacua nya cha cacana ra chi sihi ra ta chi sutu ra cha nduvaha cuan. ¹⁹ Ta candaca tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaa ra ta cacu ra? ¿Yoso caa cha cuví nyehe ra vityin? —catyí ra.

²⁰ Ta nacahan sutu ra ta sihi ra ta catyí ñu:

—Chitó ndi vatyí ican ra ihya cuví sehe ndi. Ta cuaa ra nyata cacu ra. ²¹ Soco ña chitó ndi ñáa tuhun cha cuví nyehe ra vityin. Ta ni ña chitó ndi yóo cha sanduvaha chiti nuu ra. Ndaca tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²² Sutu ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyí cha catyihí tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo. ²³ Yucuan chaha catyí ñu: “Cha ñihi ra. Ndaca tuhun ndo chi maa ra.”

²⁴ Tyicuan ta canacana tucu ra chi ra cha cucuaa cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi rayi cuan, ra iyó cuatyí cuví ra —cacatyí ra.

²⁵ Tyicuan ta nacahan ra cha cucuaa cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuai, ta vityin ndichin nyehí —catyí ra.

²⁶ Ta candaca tuhun tucu ra chi ra inga chaha ta catyí ra:

—¿Ñáa cha sacuví ra chuun? ¿Yoso caa sacuví ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáa tuhun cha cuñí ndo cha catyí inga chaha? ¿Atu cuñí tucu nyoho cunyi-con ndo chi ra?

²⁸ Tyicuan ta cacahan ra chi ra, ta catyí ra:

—Yoho yihún cuenda ra, soco nyuhu cuenda ra Moisés yihí ndi. ²⁹ Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quita ra —cacatyí ra.

³⁰ Tyicuan ta nacahan ra cucuaa cuan ta catyí ra:

—¿Ñana vaha cha cuví ihya! Nyoho ña chitó ndo nya quita ra, ta chi yuhu

sananyehē ra. ³¹ Chitó vaha yo vatyi Nyoo ña tyasohó ra nu chicán ra iyó cuatyí. Soco ra cha sacahnú chi ra ta sacuví cuhva cuñi ra, tyasohó Nyoo nu chicán ra cuan. ³² Ni noo chaha ta cuiñi ca yo vatyi iyó noo ra sananyehē chi noo ra cuaá nyata cacu. ³³ Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra.

Ta catava ñehe ra chi ra vehe ñuhu.

Ñu cha ñahri tuhun Nyoo caa añima tari cha cuaa ñu

³⁵ Ra Jesús chitó ra vatyi catava ñehe ra chi ra cucuaa cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó iñi yoho chi Rayi cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyí chii, yóo ra cuví ra vatyi chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutu Mañi yuhu —catyí ra chi ra Jesús.

³⁹ Ta ra Jesús catyí ra:

—Yuhu vachí vatyi catyí cha caá añima ñáyivi iyó siqui ñuhu ñayivi ihya. Vatyi ñu cuaa, ñu ña chitó tuhun Nyoo cunanyehē ñu vatyi cucava tuhun Nyoo añima ñu. Ta ñu cuñi maa tyi ndichin nyehē tyi catyí ñu tyi chitó ñu tuhun Nyoo, coto ñu tyi cuaa ñu tyi ña chinó iñi ñu chii —catyí ra Jesús.

⁴⁰ Tyicuan ta suhva ra cuví fariseo cha nyicú yucuan chiñi ra cha cahan ra Jesús, ta catyí ra chi ra:

—¿Atu cuaa tucu nyuhu ñandihí? —catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón nuu ndo tyi chinuhú tuhun Nyoo chi ndo, ta ma coo cuatyí ndo. Soco vatyi catyí ndo tyi nyehé ndo ta chitó ndo, yucuan chaha ndoó cuatyí siqui ndo —catyí ra chi ra.

10

Mbee sana Nyoo cuví ñáyivi yihí cuenda ra, ta ñohó nuu ñu chi ra cha tachí Nyoo vatyi sahá cumi ra chi ñu

¹ Cahán ca ra Jesús ta catyí ra:

—Cha ndicha catyí chi ndo, tatu noo ra cuaquihvi chichi noo chachu mbee, ta cha nuu cha quihvi ra yuhu chachu, quihvi ra inga ityi, ra suhu cuví ra. ² Soco ra quihvi ityi yuhu chachu, ra sahá cumi mbee cuan cuví ra. ³ Ra nyaá yuhu chachu cuan nuña ra na quihvi ra sahá cumi mbee cuan. Ta mbee cuan nicohón soho ti ndusu ra. Noo noo ti ta iyó sivi ti sahá ra, ta cana ra chi ti ta tava ra chi ti ityi chata chachu. ⁴ Ta cha yaha tava ra chi ti, ta cuahan ra ityi nuu ti ta nyicón ti chi ra, vatyi nicohón soho ti ndusu ra. ⁵ Soco tatu ña ñohó soho ti ndusu ra, chinó ti chi ra ta ma cunyicon ti chi ra.

⁶ Tyehe caa tuhun cahan ra Jesús chihin ñu. Soco maa ñu ña cutuñi iñi ñu ñáá tuhun cuñi ra cahán ra cha tyicuan caa.

Ra Jesús cuví ra sahá cumi vaha mbee

⁷ Tyicuan ta catyí ra Jesús inga chaha chi ñu:

—Cha ndicha catyí chi ndo vatyi yuhu cuví tari noo yuhu chachu nu quihvi coyo ñáyivi cuende cha cuví ñu tari mbee sane. ⁸ Tandihí ra cha yaha caquichí coyo, ra suhu cacuví ra. Soco mbee ña quichaha ti cha cacahan ra. ⁹ Yuhu cuví yuvehe gloria. Ñu quihvi cuende, cacu ñu cha ma cuhun ñu anyaya. Ta cuví ñu tari noo mbee cha quihvi ta quitá chichi chachu cuan. Ta ñihí ti cuhu cachi ti.

¹⁰ Noo ra suhu vachí ra, soco vachí suhu ra, vachí cahñi ra, vachí sativi ra. Soco yuhu vachí vatyi coo ndo noo ñayivi chaa cha ma naa ca maa. ¹¹ Yuhu cuví noo ra vaha sahá cumi mbee. Vatyi ra sahá cumi mbee chahá ra ñayivi ra cuenda sana ra. ¹² Soco ra cuví musu, tatu nyehé ra vachí lobo cha cuví noo quití xaan, sandoo maa ra chi mbee sana chitoho ra. Ta chinó ra. Vatyi ñima sana maa ra cuví ti. Tyicuan ta tiñi quití xaan chi mbee cuan. Ta saquicono ti chi ti ityi cuan ityi ihya. ¹³ Musu cuan chino ra cha cuenda vatyi cha cuenda xuhun ri sahá tyiño ra. Ta ñahri cuenda ra chi mbee, tyi ñima sana ra cuví.

¹⁴ Yuhu cuví ra sahá cumi vaha mbee sane. Ta ñohó nui chi ti. Ta maa ti ñohó

nuu ti chii, ¹⁵tari ñohó nuu Suti chii, ta yuhu ñohó nui chi ra. Yuhu चाहिं ñayiví cuenda mbee sane. ¹⁶Iyó tucu inga mbee sane cha ñima chichi chacu ihya iyó ti. Cuñí chi cha cuhin cunaquehin chi ti. Ta cuquichaha ti chii. Ta coo noo ri nu quíhi tandíhi ti. Ta noo ri ra sahá cumi chi ti cucoo.

¹⁷'Suti cuñí ra chii vatyí चाहिं ñayiví cha catyí ñáyiví cuende. Soco yaha cuan, nacuhva tucu ra ñayiví inga chaha. ¹⁸Yori tinyaá ñayiví, soco cha iyó vaha iñi mai ta चाहिं. Iyó ityi chii cha cuhve ñayiví ta cúvi, ta iyó tucu ityi chii cha naquehen tiqui inga chaha vatyí cunandote. Ican ihya cuví tyiño cha tyaa Suti chii —catyí ra Jesús.

¹⁹Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñi tucu ra chihin tahan ra inga chaha.

²⁰Ta cuaha xaan ra catyí ra:

—¿Ñáa tuhun cha quichaha ndo chi ra chiiña? Ta yíhi noo tatyí ña vaha chi ra, ta loco ra —cacatýí ra.

²¹Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñí ra cacuví nuu chi ñu Israel chi ra Jesús

²²Nya ñuu Jerusalén yoo vichin cuví. Ta sanducahnú ñu noo vico quívi nanduchin cuiya cha suhñi ñu vehe ñuhu cahnu cuan.

²³Ta ra Jesús chícá noo ra vehe ñuhu cuan ityi corredor ra Salomón. ²⁴Ta ra cacuví nuu chi ñu Israel cacticuitayucu cutya ra nuu ra. Ta quichaha ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

²⁵Ta ra Jesús catyí ra:

—Cha yaha catyí chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende. ²⁶Soco nyoho ña chinó iñi ndo chii vatyí ñima mbee sane cuví chi ndo. Tari cuhva catyí chi ndo ndaa ri. ²⁷Mbee sane nichón soho ti ndusi, ta yuhu ñohó nui chi ti. Ta maa ti nyicón ti chii. ²⁸Yuhu चाहिं ñayiví cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi. ²⁹Maa Suti chaha chi ti chii. Ta cahnu ca cuví maa ra ican saha tandíhi ca. Ta yori cuví tinyaa chi ti chichi ndaha ra.

³⁰Yuhu ta Suti Nyoo, noo ri cuví ndi —catyí ra Jesús.

³¹Tyicuan ta ra cacuví nuu chi ñu Israel cuan caquehen tucu ra yuu vatyí tuchi ra chi ra. ³²Ta ra Jesús catyí ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

³³Ta ra cacuví nuu chi ñu Israel cuan cacatýí ra:

—Ñima cha cuenda noo cha vaha sacuví cutuchi ndi yuu chuun, soco cha cuenda vatyí yahun nuu Nyoo chihin tuhun cahún. Noo rayii ri cuvín, soco sahún tari Nyoo chuun —cacatýí ra chi ra.

³⁴Tyicuan ta catyí ra Jesús chi ra:

—Nu tutu tuhun Nyoo nyaá vatyí Nyoo catyí ra: “Nyoho cuví ndo nyoo”, catyí Nyoo. ³⁵Chitó yo vatyí cha cahán tuhun Nyoo, ma cuvi catyí yo tyi ña ndicha. Ta Nyoo sacunañi ra nyoo chi ñu naquehen tuhun cahán ra. ³⁶Ta tatu maa Nyoo nacachi chi yuhu ta tachi ra chii siqui ñuhu ñayiví ihya ¿yoso caa catyí nyoho vatyí yahá yuhu nuu Nyoo nu catyí tyi Sehe Nyoo cuví chii?

³⁷Tatu ña sacuví cha sacuví Suti, ma chino iñi ndo chii. ³⁸Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyí Nyoo Suti iñi ri cuví ra chihin. Ta yuhu iñi ri cuví chihin Nyoo Suti —catyí ra Jesús.

³⁹Inga tucu chaha cacuñi ra catyíhi ra chi ra vehe caa, soco ra Jesús cuahan ri ra. ⁴⁰Tyicuan ta cuanuhu ra ityi nu caña ñanyii inga chiyo yuvi cahnu Jordán cuan nu sacondutya ra Juan ta xihna ri. ⁴¹Cuaha ñáyiví chahan chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandíhi tuhun cha cahan ra cuenda ra ihya ta ndicha —catyí ñu.

⁴²Ta cuaha xaan ñu cachinq iñi ñu chi ra Jesús ityi cuan.

11

Nu chihí ra Lázaro

¹Iyó noo ra cuhví cha nañi Lázaro ñuu Betania nu cuví ñuu cu María ta cu Marta cuhu ña. ²Ta cu María, cuhva ra Lázaro cuan ican ña cuví ñaha cha choso ndutya vixi chahan chaha Sutu Mañi yo, ta chihin ixi xiñi ña nacuhva ña. ³Ta tyicuan caa ninduvi tahan ñu, cu María chihin cuhu ña, tachi ñu tyiño na cucatýí ra chi ra Jesús tyehe caa;

—Sutu Mañi ndi, amigon cuhvi ra —catyí ñu, tachi ñu tyiño.

⁴Ta cha chihñi ra Jesús tuhun ihya ta catyí ra:

—Cuehe cuan ma cahñi chi chi ra. Cuhvi ra tyehe caa tacuhva vatyí quivi nduvaha ra cunyehe ñáyivi tyi cahnua xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵Cuñí vavaha ra Jesús chi cu Marta ta chi cuhu ña, ta chi cuhva ña, ra Lázaro. ⁶Soco cuhva cha catyí ñu chi ra tyi cuhvi ra Lázaro, ndoq ra nu ñohó ra uvi ca quivi. ⁷Tyicuan ta catyí ra chi ra cacticá noo chihin ra:

—Coho ndo inga chaha nya Judea —catyí ra.

⁸Tyicuan ta ra cacticá noo chihin ra cacatyí ra chi ra:

—Maestro, ta cunaha ca cha cuñí ra cacuví nuu chi ñu Israel cahñi ra chuun chihin yuu. Ta vityin, ñinga chaha cuñún chuhun yucuan? ¿Ñáa tuhun?

⁹Ta catyí ra Jesús:

—¿Atu ñima uchi uvi hora iyó noo quivi? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuví ra tyiño nuu Nyoo. ¹⁰Soco tatu cha cha cuac chicá noo ra, nduva ra vatyí ñahri ñuhu.

¹¹Tyicuan ta quichaha catyí tucu ra Jesús: —Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹²Tyicuan ta catyí tucu ra cacticá noo chihin ra:

—Tata, tatu quixí ra, cuñí chi catyí vatyí cuanduvaha ra —cacatyí ra.

¹³Soco ra Jesús cuñí ra catyí ra vatyí cha chihñi ra Lázaro. Ta ra cacticá noo chihin ra, cuñí maa ra vatyí cha ndicha quixí ra cuan.

¹⁴Tyicuan ta catyí cachi ra Jesús chi ra:

—Ra Lázaro cha chihñi ra. ¹⁵Ta cusñi cuñí vatyí yori chinyaa yucuan. Vatyí tyicuan caa vaha ca cha cuenda nyoho, tacuhva chino iñi ndo chii. Coho ndo cunyehe ndo chi ra —catyí ra chi ra.

¹⁶Tyicuan ta ra Tomás, cha catyí ñu: “ra tinihi cuan”, catyí ra chi inga ra cacticá noo chihin ra Jesús:

—Coho tucu yo vatyí cúvi yo iin ri chihin ra —catyí ra.

Ra Jesús cuví ra sanandotó chi yo ta chahá ra ñáyivi coo yo

¹⁷Cha chaq ra Jesús Betania, ñihñi ra tuhun vatyí ra Lázaro cha cumi quivi ñohó ra

chichi ñuhú. ¹⁸Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava. ¹⁹Ta cuaha ra cacuví nuu chi ñu Israel cuahan ra cuanyehe ra nu nyaá cu Marta ta cu María vatyí chihñi cuhva ñu. ²⁰Ta ñihñi cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoq ña vehe. ²¹Ta cu Marta catyí ña chi ra Jesús:

—Sutu mañi yuhu, tyehe ta nyaun ihya, ma cúvi cuhve. ²²Soco yuhu chité vatyí Nyoo cusacuví ra tandihi cha cacon chi ra —catyí ña chi ra.

²³Ta ra Jesús catyí ra chi ña:

—Cuhvon cunandoto ra.

²⁴Ta cu Marta catyí ña:

—Ndicha, chité vatyí cunandoto ra quivi nandoto ndiyi nu cuandihñi quivi —catyí ña.

²⁵Tyicuan ta catyí ra Jesús chi ña:

—Yuhu cuví ra sanandotó chi ndiyi. Ta chahí cha conyito ñáyivi. Ñu chinó iñi chii, vasi cha chihñi ñu soco coo tucu ñu. ²⁶Ta tandihi ñu nyitó ca ta chinó iñi ñu chii, ma cúvi maa ñu. ¿Atu chihñó iñun tuhun ihya? —catyí ra chi ña.

²⁷Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi siqui ñuhu ñáyivi ihya —catyí ña.

Nu chacu ra Jesús nu ñaña ra Lázaro

²⁸Cha yaha cha catyí cu Marta tuhun ihya, ta chahan ña chiquehen ña chi cuhu ña, cu María, ta catyí xehe ña chi ña:

—Cha chaq Ra Sacuaha. Ta tachi ra tyiño nacuhun nu nyaá ra —catyí ña.

²⁹Ta cha chihñi cu María tuhun ihya, nducuita ri ña, ta cuahan ña nu nyaá ra Jesús,

³⁰Ta ra Jesús ta quihvi ca ra chichi ñuu cuhva cuan, nyaá ra nu nañihñi cu Marta chi ra. ³¹Ta nya vehe cu María, nyicú ra cacuví nuu chi ñu Israel tyinyeé ra chi ñu. Ta nyehe ra vatyí numi ri quita ña. Ta cuñí maa ra tyi cuahan ña nu ñaña cuacuacu ña. Ta cuahan coyo ra chata ña.

³²Ta cuhva cha chaq cu María nu nyaá ra Jesús chicuññi chiti ña chaha ra, ta catyí ña:

—Sutu Mañi yuhu, tyehe ta chinyauñ ihya, cuhve ma cúvi ra —catyí ña.

³³Nyehe ra Jesús cha chacu cu María chihin ra Israel cha vachi coyo chihin ña, ta nducuihva xaan cuñí aña ra. ³⁴Ta ndaca tuhun ra chi ñu:

—¿Nya maa maa tyihí ndo chi ra?
—catyí ra.

Ta catyí ñu:

—Tata, cõho ta nyehun —catyí ñu chi ra.

³⁵ Ta ra Jesús chacu ra.

³⁶ Tyicuan ta catyí ra Israel cuan:

—Nyehe ndo yoso cha cuñí ra chi ra
—catyí ra.

³⁷ Soco suhva ñu catyí ñu:

—Ican ra ihya cha sananyehẽ chi ra cuaa cuan. ¿Atu ña cuví sanduvaha tucu ra chi ra Lázaro ihya? —catyí ñu.

Nu sanandotõ ra Jesús chi ra Lázaro

³⁸ Ndücüihya cuñí ra Jesús inga chaha ta tuhva ra nu ñaña cuan. Noo chichi yuu cuví. Ta nyasí noo yuu yuhu chi. ³⁹ Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha caña xico, Sutu Mañi yuhu, vatyí cha cumi quívi cha chihí ra —catyí ña.

⁴⁰ Soco ra Jesús catyí ra chi ña:

—¿Atu ña cha catyí chuun vatyí tatu chinó ñiun, cunyahun yoso cha cahnu cuví Nyoo? —catyí ra chi ña.

⁴¹ Tyicuan ta sacanyahã ñu yuu cuan. Ta ra Jesús nanyehẽ ndaa ra ityi andiví, ta catyí ra:

—Sutu Mañi yuhu, tyahvi nyoo chuun tyi chiñun cha cahín. ⁴² Yuhu chité vatyí tyicuan ri chiñun tuhun cahín. Soco tyehe caa cahín cha cuenda cha vaha chi ñáyivi nyicú ihya, tacuhva nachino ñiñ ñu tyi yoho tachí chii —catyí ra Jesús chi Nyoo.

⁴³ Cha yahã cha catyí ra tuhun ihya, canachaa ra, ta catyí ra:

—¡Lázaro, quita chiña!

⁴⁴ Ta quita ra cha chihí cuan, nuññí ndaha ra ta nuññí chaha ra chihin sahma. Ta nuññí nuu ra chihin noo sahma. Ta ra Jesús catyí ra chi ñáyivi nyicú yucuan:

—Ndächí ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

⁴⁵ Ta cuaha xaan ra cacuví nuu chi ñu Israel cha chahan coyo chihin cu María nachino ñiñ ñu cha nyehe ñu cha sacuví ra Jesús. ⁴⁶ Soco suhva ra chahan ra chisacoto ra chi ra fariseo cha sacuví ra Jesús. ⁴⁷ Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáá cha sacuví yo? Vatyí cuaha xaan milagru sacuví ra cuan. ⁴⁸ Tatu cuhva yo cha sacuví ca ra tyicuan caa, tandihí ñáyivi cuchino ñiñ ñu chi ra. Ta ra cacuví tyiño nya ñuu Roma cuquichi ra ta cusatani ra vehe ñuhu yo ta ñuu yo —cacatyí ra chi ra tahan ra.

⁴⁹ Soco ra cuví nuu cahnu ca chi tata sutu cuiya cuan, ra nañí Caifás cahan ra ta catyí ra chi ra:

—Nyoho ñahri maa cha chitó ndo. ⁵⁰ Ni ña cutuñí ñiñ ndo vatyí vaha ca cha cúvi noo ri rayíi cha cuenda tandihí ñáyivi ñuu, ta ñima ca cha cúvi tandihí yo —catyí ra Caifás.

⁵¹ Soco ra Caifás cuan ñima cha cuñí maa ra ta cahan ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chi ra. Vatyí catyí ra vatyí ra Jesús cucuví ra cha cuenda tandihí ñáyivi ñuu Israel. ⁵² Ta ñima cha cuenda ri ñu cuan, soco vatyí cusandu ñiñ ri ra chi tandihí ñu cuví sehe Nyoo cha iyó inga ñuu ñandihí. ⁵³ Yucuan ta nyacua nya quívi cuan ta ra cacuví nuu chi ñu Israel cuan, nducu ra cuhva yoso caa cahñi ra chi ra Jesús.

⁵⁴ Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañí Efraín cha nyaá yatyin ri ñuhu ityi. Ta yucuan ndoó ra chihin ra cachicá noo chihin ra.

⁵⁵ Ña cuaha ri ca quívi ta chaã vico cuenda ñu Israel, vico cha nañí pascua. Ta cuaha xaan ñáyivi quita ñu ñuu ñu ta cuahan ñu Jerusalén cuasacuví ñu cha tuhva maa ñu sacuví cha sandundí ñu chi ñu nuu Nyoo cha ni cumañi ca chaã quívi vico cuan. ⁵⁶ Nanducú ñu chi ra Jesús. Ta cuhva cha nyicú ñu chichi vehe ñuhu cahnu cuan ta ndacã tuhun ñu chi tahan ñu, ta catyí ñu:

—¿Yoso caa cuñí nyoho? ¿Atu cuquichi ra vico ihya, o ma quichi ra? —catyí ñu chi tahan ñu.

⁵⁷ Ta ra cacuví fariseo ta ra cacuví nuu chi tata sutu, catyí ra vatyí tatu nya noo ñu chitó ñu nya nyaá ra Jesús, nacatyí ñu. Vatyí cutiñ ra chi ra vatyí cohon ra vehe caa.

12

Nu chosó cu María ndutya vixi chahán chaha ra Jesús

(Mt. 26.6-13; Mr. 14.3-9)

¹ Cumaní iñu ca quívi cha cuatahan chi vico pascua, ta chaá ra Jesús ñuu Betania nu iyó ra Lázaro, ra cha sanandoto ra Jesús chi.

² Yucuan savahá ñu cha cuxiñi ra Jesús. Cu Marta tyihí ña coho nu mesa. Ta chicunyaá ra Jesús nu mesa. Ta nyaá tucu ra Lázaro chihin ra. ³ Tyicuan ta cu María quehen ña ta cha sava litro ndutya vixi chahán cha chinqo chihin maa ri nardo, noo cha yahvi xaan nyaá. Ta cuhví ña chaha ra Jesús chihin ndutya vixi chahán cuan. Yahá cuan ta sana ityi ña chihin ixi xiñi ña. Tandihí chichi vehe cuan chitú chihin xico ndutya vixi chahán cuan. ⁴ Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chi ra Jesús nuu ra xaan iñi chi ra. Ta quichaha catyí ra Judas cuan chi ñu cuan:

⁵ —¿Ñáá tuhun ña xico ndo ndutya vixi chahán ihya chi ñáyivi, cuhva ñu cuenda mil chi ndo chihin, ta tyinyee ndo chi ñu ndahvi? —catyí ra.

⁶ Soco ra Judas ña catyí ra tuhun ihya cha cuenda cha ndahvi cuñi ra nyehe ra chi ñu ndahvi, soco vatyi ra suhu cuví ra. Ta vatyi ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan.

⁷ Tyicuan ta catyí ra Jesús chi ra:

—Saña chi ña, vatyi ñaha ihya sacuví ña tyehe caa cha cuenda cha cuquihvi coño ñuhi chichi ñuhu. ⁸ Ñu ndahvi tyicuan ri cu cunycú ñu chihin ndo, soco yuhu ña tyicuan ri —catyí ra Jesús chi ra Judas cuan.

Nu nducu cahñi ra chi ra Lázaro

⁹ Cuaha xaan ñu Israel ñihí ñu tuhun tyi ra Jesús ñohó ra Betania, ta chahan coyo ñu nyicuan. Nima cha cuñi ñu nyehe ñu chi ra Jesús ri, soco cuñi tucu ñu nyehe ñu chi ra Lázaro, ra cha sanandoto ra Jesús chi. ¹⁰ Tyicuan ta ra cacuví nuu chi tata sutu catyihí tahan ra tuhun vatyi cuahñi tucu ra chi ra Lázaro ñandihí. ¹¹ Vatyi cha cuenda ra ta cuaha xaan ñu Israel cacusiin ñu chihin ra ta nachino iñi ñu chi ra Jesús.

Nu quihvi ra Jesús ñuu Jerusalén
(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu Jerusalén cha vico pascua. Ta cha inga quívi cachitó ñu tyi ra Jesús cuachaa ra. ¹³ Tyicuan ta chahnya ñu ndaha tunducaha ta cuahan coyo ñu cuasatahan ñu chi ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chi ra vachi ihya chihin tunyee iñi Nyoo! ¡Nasoco xaan Nyoo chi Rey cuenda yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chicoso ra chi ti tari cuhva catyí maa nu tutu Nyoo tyehe caa:

¹⁵ Ma yuhvi ndo ñáyivi ñuu Sión

Nyehe ndo, vachi Rey ndo.

Yosó ra noo burru —catyí chi nu tutu Nyoo.

¹⁶ Quívi cuan ra cachicá noo chihin ra Jesús, ña cacutuñi iñi ra tuhun cuan cha nyaá nu tutu Nyoo. Soco cha yahá cuanuhu ra Jesús gloria, canicohon iñi ra vatyi tandihí tuhun cuan ta nyaá nu tutu Nyoo tyi tyicuan caa cucuvi chi ra. Ta tyicuan caa cuví chi ra.

¹⁷ Ta ñáyivi cha nyehe quívi cha cana ra Jesús chi ra Lázaro chichi ñaña, quívi sanandoto ra chi ra, nacytí ñu cha nyehe ñu. ¹⁸ Ta yucuan chaha cuaha xaan ñáyivi chisatahan ñu chi ra Jesús, vatyi chito ñu milagru cha sacuví ra. ¹⁹ Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyi ñahri maa cuví sacuví yo, vatyi tandihí ñáyivi nyicón chi ra —cacatyí ra.

Nu nducú suhva ra ñuu Grecia chi ra Jesús

²⁰ Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan. ²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñi ndi cahan ndi chihin ra Jesús —cacatyí ra.

²² Ta ra Felipe chahan ra chicatyi ra chi ra Andrés. Ta ninduvi ra chinacatyí ra chi ra Jesús vatyi ra Grecia cuan cuñi ra cahan ra chihin ra. ²³ Ta nacahan ra Jesús, ta catyí ra:

—Chaa cuhva vityin vatyi yuhu cha cuví Rayi cha quichi nya gloria, cuananuhu tiqui nya gloria, ta cusacahnu Suti chii. ²⁴ Cha ndicha catyí chi ndo vatyi tatu noo chiti ta ma quihí chichi ñuhú ta ma tyahyu chi, noo ri chiti cucuvi chi tyicuan ri maa.

Soco tatu tyahyu chi, nduchaa chi inga chaha ta coo cuaha ca chiti chi. ²⁵ Ñu cuñí xaan ñáyiví iyó ñu, cucunaa ñu. Soco ñu ña cuñí ñáyiví ñuhu ñáyiví ihya, cunañihi ñu noo ñáyiví cha ma naa ca maa cucoo ñu.

²⁶ Tatu yihí ndo cuñí ndo sacuvi ndo tyiño nui, cunyicon ndo chii. Ta nu cuacunyaí, yucuan cucunyaá tucu ñu sacuví tyiño nui. Tatu nya nyoho sacuví ndo tyiño nui, Suti cusacahnu ra chi ndo.

Nu cahán ra Jesús tuhun yoso caa cucúvi ra

²⁷ Vityin chicá xaan xiñi. Ta ¿ñáá cha cucatyí? ¿Atu catyí chi Suti na sacanyaha ra tindoho cha nyaá cunyehe vityin? Ma catyí cha tyicuan caa vatyi cha cuenda cuan vachi siquí ñuhu ñáyiví ihya. ²⁸ Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahán noo ndusu ityi andívi ta catyí chi tyehe caa:

—Cha yahá sacahni sivi, ta cusacahni inga chaha —catyí ndusu cuan.

²⁹ Ta ñu nyicú yucuan, chiñi ñu ndusu cuan, ta catyí ñu vatyi savi cahán. Ta inga ñu catyí ñu:

—Noo ángel cahán chihin ra.

³⁰ Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahán ndusu cuan soco cha cuenda cha vaha chi maa ndo cuví. ³¹ Vityin cuví cuhva cutachi tuñi Nyoo chí ñáyiví iyó siquí ñuhu ñáyiví. Ta vityin cuhva cutava ñehe Nyoo chí ra nyacá ñaha siquí ñuhu ñáyiví ihya.

³² Ta cuhva cha cuitacai nu cruzi, yucuan cuhva cunaxite chi tandihí ñáyiví —catyí ra Jesús.

³³ Cahán ra tyehe caa cha cuñí ra na cutuñi iñi ñu tyi tyicuan caa cuhva cucúvi ra. ³⁴ Ta ñáyiví nacahán ñu ta catyí ñu chi ra:

—Tuhvá ndi chiñi ndi sacuahá ra nu libru ley yo vatyi ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chí Rayii quichi nya gloria nu cruzi? ¿Yóo ra cuví Rayii cha quichi nya gloria cha cahún tuhun? —catyí ñu, ndacá tuhun ñu chí ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quívi. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyi ñu chicá noo nu ñaa

iñi ña chitó ñu nya ityi cuahan ñu. ³⁶ Chino iñi ndo chí yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyiví iyó nu ndichin.

Cha yahá catyí ra Jesús tuhun ihya tixehe nuu ra chí ñu.

Nu catyí chí ñáá tuhun cha ña cachinó iñi ra cacuví nuu chí ñu Israel chí ra Jesús

³⁷ Vasi cuaha xaan milagru sacuví ra Jesús nuu ñu soco ña chinó iñi ñu chí ra. ³⁸ Vatyi tahán chí cha cuví tari catyí ra Isaías profeta Nyoo, nu cahán ra tyehe caa:

Sutu Mañi yuhu, yori cuñí chino iñi tuhun cahán ndi.

Yori cutuñí iñi tunyee iñi iyó chuun, Sutu Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyi ña cuví chino iñi ñu vatyi suri tyaa tucu ra Isaías tyehe caa:

⁴⁰ Nyoo sanducuaa ra chí ñu. Ta sandundava ra aña ñu,

tacuhva cha ma nyehe ñu chihin chiti nuu ñu,

ta ma cutuñi iñi aña ñu,

ta ni ma nacuhva cuenda ñu chí ñu chí ra tacuhva sanduvaha ra chí ñu.

⁴¹ Ra Isaías catyí ra tyehe caa vatyi nyehe ra nu nyacá ñaha Sutu Mañi yo Jesús ta cahán ra tuhun ra.

⁴² Soco cuaha ñu Israel chinó iñi chí ra Jesús, ta nyacua nya suhva ra cacuví nuu, soco ña saquetuví ra nuu ñáyiví vatyi yuhví ra chí ra cacuví fariseo coto tava ñehe ra chí ra vehe ñuhu. ⁴³ Vatyi cuñí ca ra cuvaha ra nuu ñáyiví ta ñima ca cha cuvaha ra nuu Nyoo.

Tuhun cahán ra Jesús cusacutuñi chí ñáyiví

⁴⁴ Ñihi cahán ra Jesús, ta catyí ra:

—Ñu chinó iñi chí, ñima chí maa ri mai chinó iñi ñu, soco chinó tucu iñi ñu chí ra cha tachi chí. ⁴⁵ Ta ñu nyehé chí, nyehé tucu ñu chí ra cha tachi chí. ⁴⁶ Yuhu cha cuví tari noo cha ndichin vachi ñuhu ñáyiví ihya, vatyi tacuhva vatyi ñu chinó iñi chí ma ndoo ñu nu ñaa iñi. ⁴⁷ Soco tatu yihí ndo chiñi ndo tuhun cahán, ta ña sacuví ndo cha cahán, ñima yuhu tachi tuñi chí ndo. Vatyi ña vachi yuhu ñuhu ñáyiví ihya vatyi tachi tuñi chí ñáyiví. Soco vachi sacaqui aña ñu. ⁴⁸ Ñu ña cuñí naquehen tuhun cahán ta ña cuñí ñu sacuví ñu tari cuhva cuñí, iyó

cha cutachi tuñi chi ñu. Tuhun cha cahín, ican cuan cutachi tuñi chi ñu nu cundihi quivi. ⁴⁹ Vatyí ñima cuenda mai cahín. Suti ra cha tachí chii, chahá ra tuhun chii ñáa cha cucahin ta ñáa cha cusañahi. ⁵⁰ Ta chité vatyí tuhun cha chahá ra, chahá chi noo ñayivi cha ma naa ca maa coo ñayivi. Yucuan chaha, tuhun cha cahín, cahín soco cuhva catyí maa Suti cha cahín cuví.

13

Nu nacatyá ra Jesús chaha ra cachicá noo chihin ra

¹ Nonga quivi cumañi ta chaa vico pascua chitó ra Jesús vatyí cha chaa cuhva cha cuaquita ra ñuhu ñayivi ihya ta cunuhu ra nu nyaá Sutu ra. Tyicuan ri cuñi xaan ra chi ñu cuenda ra cha iyó siqui ñuhu ñayivi ihya. Ta vityin cua sañahá ra chi ñu tyi cuñi xaan ra chi ñu vatyí cuacúvi ra cha cuenda ñu.

² Ta cuxiñí ra Jesús chihin ra cachicá noo chihin ra. Ta cha quihvi cuihna añima ra Judas Iscariote sehe ra Simón tyiyuhu ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi ra. ³ Soco ra Jesús chitó ra vatyí chahá cuenda Sutu ra tandihi chi ra vatyí cunyaa ndaha ra. Ta chitó ra vatyí nu nyaá Nyoo quitá ra ta suri yucuan cunanuhu ra. Ta nyaá ra Jesús cuxiñí ra. ⁴ Tyicuan ta nicuinanyaa ra ta tava ra sahma chata ra, ta chahñi ra noo toalla chichi ra. ⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cua-nacatyon chahi?

⁷ Tyicuan ta catyí ra Jesús:

—Vityin ña cutuñí iñun cha sacuví. Soco cucutuñi maa iñun nu cuahan ca chi.

⁸ Soco ra Pedro catyí ra chi ra:

—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chi ra:

—Ñu cha ni chityi, ña cuñí chi cha ndoo tandihí coño ñuhu ñu. Chaha ri ca ñu cuñí chi, vatyí cha ndii maa nanii ñu. Nyoho cha ndii ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndii ra vatyí chitó ra yóo cha cunaxico tuhun chi ra chi ra xaan iñi chi ra.

¹² Ta cha yahá cha nacatya ra Jesús chaha ra cachicá noo chihin ra, ndihvi noo ra sahma ra, ta nicunyaq tucu ra inga chaha nu mesa ta catyí ra chi ra:

—¿Atu cutuñí iñi nyoho cha sacuví chi ndo? ¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví. ¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñi tucu chi cha nacatya ndo chaha tahan ndo. ¹⁵ Yuhu chahí noo cuhva chi ndo vatyí sacuvi ndo tari cuhva sacuví mai. ¹⁶ Cha ndicha catyí chi ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra. ¹⁷ Tatu cutuñí iñi ndo tuhun ihya, ta sacuví ndo, sii xaan cucuví chi ndo.

¹⁸ Ñima cha cuenda tandihí ndo cahín. Yuhu chité yóo chi nacachí mai. Soco cuñí chi cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo. ¹⁹ Catyí chi ndo tuhun ihya cha ni cumañi ca chino cava tacuhva vatyí quivi nacuvi tyehe caa, chino iñi ndo tyi iquen cuví ra cha tinyaa cuatyí ndo. ²⁰ Cha ndicha catyí chi ndo vatyí ñu tiñ cuenda chi ñu tachí yuhu chi, chi yuhu tiñ cuenda ñu cuví cuan. Ta ñu cha tiñ cuenda chi yuhu, tiñ cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra

(Mt. 26.20-25; Mr. 14.17-21; Lc. 22.21-23)

²¹ Cha yahá cha catyí ra Jesús tyehe caa, quichahá nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichahá canyehe ra nuu tahan ra, ta ña cachtó ra yóo chi tuhun cahán ra Jesús.

²³ Noo ra chicá noo chihin ra nyañáa ra chi

ra Jesús nu cuxiñí ra. Ta ican ra cuví ra cha cuñí xaan ra Jesús chi. ²⁴Ta ra Simón Pedro savahā ra seña chi ra, na ndaca tuhun ra yóó chi tuhun cahán ra. ²⁵Tyicuan ta nyañaá ra chi ra Jesús, ta ndacā tuhun ra chi ra:

—Sutu Mañi yuhu, ¿yóó ra cuví ra cha cahún tuhun?

²⁶Ta nacahan ra Jesús ta catyí ra:

—Cuasatyíi chiin pan, ta ra cha cuhve chi, ican ra cuan cuví ra —catyí ra.

Tyicuan ta quehen ra chiin pan ta satyíi ra, ta chahā ra chi ra Judas Iscariote, sehe ra Simón. ²⁷Ta cha quehen ra Judas pan cuan ta quihví ra ña vaha añima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸Soco ni noo ra canyicú nu mesa cuan, ña cacutuñí iñi ra ñáá tuhun cha catyí ra chi ra tyicuan caa. ²⁹Soco cha cuenda vatyi ndaha ra Judas nyaá yitin xuhun, yucuan chaha yihí ra cuñí maa ra vatyi cuñí ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñí maa ra. ³⁰Cha yaha chachi ra Judas pan, tyicuan ta quita ra. Ta cha cuaa cuví cuan.

Ley cha chahā ra Jesús cha cuñi yo chi tahan yo

³¹Cha yaha cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayíi cha quichí nya gloria. Ta cuanyehe ñu yoso cha cahnu Nyoo cha cuende. ³²Ta tatu Rayíi cha quichí nya gloria sacahnú ra chi Nyoo, tyicuan ta Nyoo cusacahnu ra chi ra. Ta cha cha quivi cuasacahnu ra chi ra. ³³Sehe luhli, ña naha ca cuacunyai chihin ndo. Nyoho cunan-ducu ndo chii, soco tari catyí chi ra cacuví nuu chi ñu Israel cuan, catyí chi ndo vityin, vatyi ma cuvi cuhun ndo nu cuahin. ³⁴Chahí noo tuhun chaa chi ndo. Cuñi ndo chi tahan ndo. Tari cuñí yuhu chi ndo, tyicuan caa cuñí chi cha cuñí ndo chi tahan ndo. ³⁵Tatu cuñí ndo chi tahan ndo, tandihí ñáyivi ta coto ñu vatyi ñu nyicón chii cuví ndo.

Nu catyí ra Jesús vatyi ra Pedro cucatyí ra vatyi ña ñohó nuu ra chi ra

(Mt. 26.31-35; Mr. 14.27-31; Lc. 22.31-34)

³⁶Ra Simón Pedro ndacā tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuvi cunyicon chii. Soco nu cuahan ca chi, ta cunyicon chii —catyí ra Jesús.

³⁷Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuvi cunyiquen chuun vityin? Nyái cha cuhve ñáyivi cha cuendon —catyí ra.

³⁸Ta nacahan ra Jesús ta catyí ra:

—¿Atu ndicha cha cuhvon ñáyivun cha cuende? Cha ndicha catyí chuun, vatyi cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityi cuhun yo ta chaa yo nu nyá Sutu yo Nyoo

¹Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii. ²Vehe Suti cuaha xaan nuu coo ndo iyó. Tyehé ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo. ³Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyai. ⁴Nyoho chitó ndo nya cuhin, ta chitó ndo ityi.

⁵Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñáyivi coo ndo. Noo tuhun ri cha cuenda yuhu, cuvi chaa ndo nu nyaá Suti. ⁷Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyi cha nyehé ndo chi ra —catyí ra Jesús.

⁸Tyicuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹Ta nacahan ra Jesús, ta catyí ra:

—Yoho Felipe, cha naha nyái chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehe ndi chi Sutu yo Nyoo”?

¹⁰¿Atu ña chinó iñun tyi iin ri cuví yuhu chihin Suti Nyoo? Ta maa ra iin ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin. ¹¹Chino iñi ndo chii vatyi iin ri ra cuví chihin Nyoo Suti. Ta Nyoo Suti iin ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví. ¹²Cha ndicha catyí chi ndo vatyi ñu chinó iñi chii, cusacuvi tucu ñu cha sacuví yuhu. Ta cahnu ca cusacuvi ñu, vatyi yuhu cuhin nu nyaá Nyoo Suti. ¹³Ta tandihí cha cacan ndo chihin sivi, yuhu cusacuvi tacuhva vatyi sacahnu ñáyivi chi Suti Nyoo cha cuenda cha cuví Sehe ra. ¹⁴Yuhu cusacuvi ñáá cha cacan ndo chihin sivi.

Nu catyí ra Jesús vatyi cuhva ra Tatyí li ra chi yo

¹⁵Tatu cuñí ndo chii, quichaha ndo tuhun cahín. ¹⁶⁻¹⁷Ta cacan tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí li Nyoo, ra cha cahán maa ri cha ndicha. Ta cucunyaa ra chihin ndo tyicuan ri maa. Soco ñáyivi cha tahán ca iñi cha iyó siqui ñuhu ñáyivi ihya ma cuví naquehen ñu Tatyí li Nyoo vatyi ña cuví nyehe ñu chi ra. Ta ni ña caá ra añima ñu. Ta ni ña ñohó nuu ñu chi ra. Soco nyoho ñohó nuu ndo chi ra vatyi nyaá ra chihin ndo ta cuandoo ra chihin ndo. ¹⁸Ma sandoo maa ri mai chi ndo. Quichi tiqui nu nyaá ndo. ¹⁹Chiin ri ca, ta ñáyivi cuenda ñuhu ñáyivi ma nyehe ca ñu chii. Soco nyoho nyehé ndo chii. Vatyi yuhu iyé, yucuan chaha nyoho coo ndo ñandihí. ²⁰Quivi cuan cucoto ndo tyi yuhu iin ri cuví chihin Suti. Ta nyoho iin ri cuví ndo chihin. Ta yuhu iin ri cuví chihin ndo. ²¹Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñi ra chi ñu. Ta cuñí tucu yuhu chi ñu ta cusañahi chi ñu yóo ra cuví yuhu —catyí ra Jesús.

²²Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chi nyuhu cusañahun chuun, ta ñima chi ñu cuenda ñuhu ñáyivi?

²³Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chi ñu. Ta quichi ndi nu

nyaá ñu ta coo ndi chihin ñu. ²⁴Ñu ña cuñí chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachí chii cuví.

²⁵Catyí tandihí tuhun ihya chi ndo cha ni ri ca cha nyaá chihin ndo. ²⁶Soco nu cuahan ca chi cutachi Suti Tatyí li ra tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusanicohon ra iñi ndo tuhun cha yaha cahín chihin ndo.

²⁷Sandoí noo cha taxi coo añima ndo, tari cha taxi cuñí añime. Ican चाहí chi ndo. Ñima tari cha taxi cha ñihí ndo siqui ñuhu ñáyivi ihya. Ma caca xaan iñi ndo ta ma yuhvi ndo. ²⁸Chiñi ndo tuhun cha cahín nu catyí vatyi cuahin ta quichi tiqui nu nyicú ndo. Tatu cuñí ndo chii, cucusi cuñí ndo tyi catyí vatyi cuahin nu nyaá Suti. Vatyi cahnu ca cuví Suti ican saha yuhu. ²⁹Ta vityin catyí tiqui chi ndo cha ni cumañi ca cuhin, tacuhva quivi cuhin, cunachino iñi ndo chii.

³⁰Ma cahan cuaha que chihin ndo. Vatyi vachi ra nyacá ñaha siqui ñuhu ñáyivi ihya. Vasi ña nyacá ñaha ra chii. ³¹Soco cuñí chi nacoto ñáyivi iyó siqui ñuhu ñáyivi vatyi yuhu cuñí chi Nyoo Suti, ta sacuví tyiño tyaá ra chii.

‘Ndícuíta ndo. Cōho ndo, naquita yo ihya.

15

Tari noo yoho tichaha ndivi cha ndicha vaha cuví ra Jesucristo

¹Yuhu cuví yoho tichaha ndivi cha ndicha vaha. Ta Suti cuví ra sahá cumi chi yoho cuan. ²Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduví ra, tacuhva nacuhva ca chi cuaha ca chiti. ³Suti cha sandundi ra chi ndo chihin tuhun cha cahín chihin ndo. ⁴Sañihi ca ndo cu iin ri ndo chihin, tari yuhu iin ri cuví chihin ndo. Tari noo soco yoho cuan ma cuví cuhva chi chiti cha maa ri maa chi tatu ña nyañáa chi chata yoho cahnu, tyicuan caa nyoho, ma cuví sacuvi ndo cha vaha tatu ña iin ri cuví ndo chihin.

⁵Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañáa chii, ta yuhu nyañái chi ñu, cuaha cha vaha sacuví ñu, vatyi ñahri cha cuví sacuvi ndo tatu yori yuhu nyaá chihin ndo. ⁶Ñu cha

ña nyaña chii, cusacuita Suti chi ñu, tari sacuitá yo soco yoho cha chahnyá yo vatyi ña chahá chiti. Ta na ityi ta nasataca yo, ta cucayu nu ñuhu.

⁷ Tatu nyoho ta tyicuan ri nyaña ndo chii, ta ña naa iñi ndo tuhin, cacán ndo ñáa cha cuñi ndo, ta yuhu cuhve. ⁸ Tatu cuaha cha vaha sacuví ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii. ⁹ Yuhu cuñi chi ndo, tari cuñi Suti chii. Ma naa iñi ndo cuhva cuñi chi ndo. ¹⁰ Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñi xaan ra chii.

¹¹ Cahín tyehe caa chihin ndo tacuhva na cusii cuñi ndo chihin. Ta cucusii vavaha cuñi ndo. ¹² Tuhun cha catyí chi ndo, ican cuví ihya: na cuñi ndo chi tahan ndo, tari cuñi yuhu chi ndo. ¹³ Tatu yaha xaan cuñi yo chi tahan yo, caña iñi yo cuhva yo nyacua nya ñayiví yo cha cuenda ñu. ¹⁴ Nyoho cuví ndo amigue, tatu sacuví ndo cha catyí chi ndo. ¹⁵ Na catyí que vatyi musi cuví chi ndo, vatyi noo musu ña chitó ra ñáa cha sacuví chitoho ra. Amigue, catyí chi ndo vatyi sacoté chi ndo tandihí maa cha catyí Suti chii. ¹⁶ Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuví ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha niñi cucoo, ta ma tiví maa chi. Ta tyicuan caa ta Suti cuhva ra tandihí cha cacán ndo chihin sívi. ¹⁷ Ican ihya cuví cha catyí chi ndo: Cuiñi ndo chi tahan ndo.

Ñáyiví cuenda ñuhu ñayiví tasi cuñi nyehé ñu chi ra Jesús ta chi ñu nyicón chi ra

¹⁸ Tatu ñu cuenda ñuhu ñayiví ña cuñi nyehé ñu chi ndo, coto ndo vatyi xihna ca chi yuhu ña cuñi nyehé ñu. ¹⁹ Tyehe ta cuví ndo ñu cuenda ñuhu ñayiví, cucuñi ñu chi ndo tari cuñi ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñi nyehé ñu chi ndo, vatyi ñima ca ñu cuenda ñuhu ñayiví cuví ndo. ²⁰ Nicohon iñi ndo tuhun cha catyí chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyicuan caa cuquichaha tucu ñu tuhun sañaha ndo chi ñu. Ta tatu sataí iñi ñu chii, cusatasi iñi tucu ñu chi nyoho. ²¹ Tandihí ihya cusacuví ñu chi ndo

cha catyí yuhu, vatyi ña ñohó nuu ñu chi ra cha tachí chii.

²² Tyehe ta ña quichí cahin chihin ñu, yucuan ndicha ñahri cuatyí ñu. Soco vityin ñahri síqui tyaa ñu cuenda cuatyí ñu, vatyi cha yahá catyí chi ñu. ²³ Ñu cha tasi cuñi nyehé chii, tasi cuñi nyehé ñu chi Suti ñandihí. ²⁴ Ñahri cuatyí ñu, tyehe ta ña sacuví milagru cha ni nonga ñáyiví ta sacuvi ca. Soco cha nyehé ñu tandihí ihya. Ta vasi cha nyehé ñu soco tasi cuñi nyehé ñu chii, ta chi Suti ñandihí. ²⁵ Soco tandihí tuhun ihya cuví chi tyehe caa, vatyi cuñi chi cha chino cava tari cuhva catyí nu tutu ley cha sacuaaha ñu nu catyí chi tyehe caa: “Ñahri vihi tuhun, ta cutasi cuñi ñu nyehé ñu chii”, catyí chi.

²⁶ Soco cuquichi Tatyí li, ra cha cahán maa ri cha ndicha. Maa ra cuví ra cha naquehen ndahvi chi ndo. Nachai nu nyaá Suti ta cusaquichi ndi chi ra nu nyicú ndo. Ta quiví quichi ra, cucahan ra tumañi iñi cuende. ²⁷ Ta nyoho tucu cucahan ndo tumañi iñi cuende, vatyi nyaá ndo chihin nyata quiví quichahá sahatyiñe.

16

¹ Catyí tuhun ihya chi ndo tacuhva cha ma sandihí ndo cha chinó iñi ndo chii. ² Cutava ñehe ñáyiví chi ndo vehe ñuhu. Ta cuchaa chi quiví vatyi ñu cahni chi ndo, cucuñi ñu vatyi tyiño nuu Nyoo sacuví ñu. ³ Tyehe caa cusacuví ñu cha cuenda vatyi ni chiin maa ta cohon nuu ca ñu ni chi Suti ta ni chi mai. ⁴ Catyí tuhun ihya chi ndo tacuhva vatyi quiví chaa chi tari cuhva catyí chi ndo, nichon iñi ndo vatyi cha yahá catyí chi ndo.

Tyiño sahá Tatyí li Nyoo

⁵ Ña catyí tuhun ihya chi ndo quiví xihna ri cha cuenda tyi nyaá que chihin ndo. ⁶ Soco vityin cuhin vatyi cunyai chihin ra cha tachí chii. Ta ni noo nyoho ña ndacá tuhun ndo chii nya cuhin. ⁷ Soco nducuihya ndihí iñi ndo cha catyí tuhun ihya chi ndo. ⁸ Soco catyí cha ndicha chi ndo: vaha ca cha cuhin cha cuenda cha vaha chi ndo. Vatyi tatu ma cuhin, ma quichi Tatyí li cha naquehen ndahvi chi ndo. Soco tatu cuhin, cutachi mai chi ra. ⁹ Ta quiví quichi ra cusacoto ra chi ñáyiví iyó síqui ñuhu ñayiví vatyi iyó cuatyí ñu. Ta cusañaha ra chi ñu vatyi iyó noo cuhva vaha tahán chi coo ñu.

Ta cusacoto ra chi ñu vatyi cutuñi chi ñu nuu Nyoo. ⁹Cusacoto ra chi ñu tyi iyó cuatyí ñu cha cuenda cha ña chinó iñi ñu chii. ¹⁰Cusacoto ra chi ñu tyi iyó noo cuhva vaha cha tahán chi coo ñu, vatyi yuhu cuhin nu nyaá Suti ta ma nyehe ca ndo chii. ¹¹Ta cu coto ñu tyi cusandaa Nyoo cuatyí ñu vatyi cha yaha cunda cuatyí ra cuví cuihna, ra nyacá ñaha siquí ñuhu ñayiví ihya.

¹²Ta cuaha ca tuhun nyaá catyí chi ndo, soco ma cutuñi iñi ndo vityin. ¹³Soco quivi quichi Tatyí li cha cahán maa ri cha ndicha, maa ra cusañaha tandihí cha ndicha chi ndo. Vatyi ñima cuenda maa ra cucahan ra, soco cucahan ra tandihí cha chiñí ra. Ta cusacoto ra tuhun ñáa cha cucuví nu cuahan ca chi. ¹⁴Cusacahnu ra chii, vatyi cunaquehen ra tuhun ta cusañaha ra chi ndo. ¹⁵Tandihí cha iyó chi Suti, chi mai cuví ñandihí. Yucuan chaha vatyi Tatyí li cuquehen cuenda ra cha iyó chii, ta cusañaha ra chi nyoho.

Ra cha cachicá noo chihin ra Jesús cuihya iñi ra, soco nu cuahan ca chi cucusií cuñi ra, catyí ra Jesús

¹⁶Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyi yuhu cuhin nu nyaá Suti —catyí ra Jesús.

¹⁷Tyicuan ta suhva ra cachicá noo chihin ra, candaca tuhun ra chi tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyi ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyi cuhun ra nu nyaá Sutu ra. ¹⁸¿Ñáa cha cuñí chi catyí cha ña naha ca cuan? Ña cutuñi iñi yo ñáa tuhun cahan ra —cacatyí ra.

¹⁹Ra Jesús tuví iñi ra vatyi cacuñí ra candaca tuhun ra chi ra, ta catyí ra:

—Yuhu catyí chi ndo vatyi ña naha ca ta ma nyehe ca ndo chii, soco yaha cuan ta manyehe tucu ndo chii. ¿Atu ican ihya cuví cha ndacá tuhun ndo chi tahan ndo?

²⁰Cha ndicha catyí chi ndo vatyi nyoho cucuacu ndo ta cunducuihya iñi ndo, soco ñu cuenda ñuhu ñayiví cusíí cuñi ñu. Soco vasi cuihya iñi ndo vityin, tucuihya iñi cha iyó chi ndo cunanduvi chi tusíí iñi. ²¹Cuhva cha cuacacu sehe noo ñaha sihi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca

iñi ña cha cuenda cha sií cuñí ña vatyi cacu noo cha lee sehe ña. ²²Tyicuan caa tucu nyoho vityin, nducuihyá iñi ndo. Soco cunanyehe tiquí chi ndo inga chaha. Tyicuan ta cundusií tucu iñi añima ndo. Ta yori cuví tinyaa tusíí iñi cuan chi ndo.

²³Quivi cuan ñahri ca cha cundaca tuhun ndo chii. Cha ndicha catyí chi ndo vatyi Nyoo Suti cucuhva tandihí cha cacan ndo chi ra chihin sivi. ²⁴Nya vityin ta ta ñaha ca cha cacan ndo chihin sivi yuhu. Cacan ndo ta cuñihi ndo tacuhva na cusíí xaan cuñi ndo.

Ra Jesucristo cuví chasaha ra chi cha ña vaha iyó ñayiví

²⁵Maa maa ri chihin cuhva ri sañahí chi ndo. Soco nu cuahan ca chi, ñima ca chihin cuhva cuasañahi chi ndo, soco cuacatyí cachi chi ndo tuhun Suti. ²⁶Quivi cuan chihin sivi cucacan ndo cha cacan ndo chi ra. Ta ña chiñuhú ca cha cucuacu ndahvi nuu Suti cha cuenda ndo. ²⁷Vatyi maa Nyoo Suti suri cuñí ra chi ndo. Cuñí ra chi ndo vatyi nyoho cuñí ndo chii. Ta nachinó iñi ndo vatyi nu nyaá Nyoo quite. ²⁸Nu nyaá Suti quite vatyi quichi siquí ñuhu ñayiví ihya. Soco vityin cusandoi ñuhu ñayiví ihya vatyi cunuhi nu nyaá ra —catyí ra Jesús.

²⁹Tyicuan ta ra cachicá noo chihin ra cacatyí ra:

—Vityin ndicha catyí cachun chi ndi.

³⁰Vityin nyehe ndi vatyi chitón tandihí maa tuhun, ta ña nyatun cha ndaca tuhun ndi chuun, vatyi cha chitón nyacua nya tandihí cha chicá xiñi ndi. Yucuan chaha chinó iñi ndi vatyi nu nyaá Nyoo quiton —cacatyí ra chi ra Jesús.

³¹Ta catyí ra Jesús:

—Ta vityin zatu chinó iñi ndo chii?

³²Soco catyí chi ndo vatyi cha vachi chi cuhva ta vityin cuví cuhva vatyi nyoho cuquiti cuatyí ndo siin siin ityi, ta cusandoo ndo notuhun mai. Soco ñima notuhun ri mai nyaá, vatyi nyaá Suti chihin. ³³Catyí tuhun ihya chi ndo tacuhva na coo cha taxi ri añima ndo cha cuenda cha iin ri cuví ndo chihin. Nuhu ñayiví ihya cunyehe ndo tindoho, soco sanyee ndo iñi ndo vatyi yuhu cha cuví chasahi chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

¹Cha yahā cha catyi ra Jesús tuhun ihya, nanyehe ndaa ra ityi andivi ta catyí ra:

—Sutu Mañi yuhu, cha chaā cuhva vityin. Sacahnu chi yuhu cha cuví sehun, tacuhva sacahnu tucu yuhu chuun. ²Vaty tyaun tyiño chii siqui tandihí ñáyivi, vaty cuhve ñayiví cha ma naa ca maa chi tandihí ñu chahun chii. ³Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vaty noo tuhun ri maun cuví Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

⁴Cha sacahni chuun ihya siqui ñuhu ñayiví ta cha sandihí tyiño cha chahun chii.

⁵Ta vityin, Sutu Mañi yuhu, cua ndichi nu nyaun, nacuhva cha cahnun cuví maun chii, tari cuhva cha chiyo chii nyata ni cumañi ca chino ñuhu ñayiví.

⁶Tandihí ra cha chahun chii ra cha natava vahun mahñu ñu iyó siqui ñuhu ñayiví ihya sacote chi ra yóo ra cuví yoho. Chi maun cuví chi ra ta chahun chi ra chii. Ta quichahá ra tuhun cahún. ⁷Vityin cachitó ra vaty tandihí cha chahun chii, nu nyaún quitā. ⁸Vaty catyi chi ra tuhun cha catyun chii, ta maa ra canatijn cuenda ra. Ta tuiy iñi ra vaty ndicha cha quite nu nyaún, ta chinó iñi ra tyi maun tachí chii.

⁹Yuhu chiquén cha cuenda ra chuun. Ña chiquén cha cuenda ñáyivi ña ñohó nuu chuun, soco chiquén cha cuenda ra cha chahun chii, vaty chi maun cuví chi ra.

¹⁰Tandihí cha iyó chii, chi maun cuví. Ta tandihí cha chuun, chi mai cuví. Ta tandihí cuan sacahnú chii.

¹¹Yuhu ma ndoo que ñuhu ñayiví ihya, soco maa ra cundoo ra ñuhu ñayiví ihya. Ta yuhu cuhin tyi cunyai chuhun. Sutu Mañi yuhu, sgha cumi chihin cha ndicha ñuhu chi ra cha chahun chii, tacuhva na cu iin ri ra chihin ra tahan ra, tari yoho chihin yuhu, iin ri cuví yo. ¹²Quiví chinyai ñuhu ñayiví ihya chihin ra, sahā cumi chi ra cha chahun chii chihin cha ndicha ñuhun. Ta sahí cuenda chi ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyí nu tutu maun.

¹³Vityin cha vachi nu nyaún, soco cha ni ri ca cha nyaí siqui ñuhu ñayiví ihya,

catyí tuhun ihya tacuhva na cusii cuñi ra tari mai. ¹⁴Yuhu catyi chi ra tuhun cahún, soco ñáyivi cuenda ñuhu ñayiví tasi cuñí nyehe ñu chi ra nyicón chi yo, cha cuenda vaty ñima ra cuenda ñuhu ñayiví cuví ra, tari yuhu, ñima ra cuenda ñuhu ñayiví cuví.

¹⁵Ña chiquén chuun cha tavon chi ra nyicón chi yo nu ñuhu ñayiví ihya, soco saha cumun chi ra coto ñáá cha saha ra ña vaha chi ra. ¹⁶Tari yuhu ñima ra cuenda ñuhu ñayiví cuví, tyicuan caa tucu ra ihya, ñima ra cuenda ñuhu ñayiví cuví ra. ¹⁷Cuhva cha ndicha chi ra nasacuvi ra maa maa ri cuhva cuñí maun. Tuhun cahún, ican cuví cha ndicha. ¹⁸Tari tachun chi yuhu nu nyicú ñu iyó siqui ñuhu ñayiví, tyicuan caa tachí tucu yuhu chi maa ra nyicón chi yo nu nyicú ñu iyó siqui ñuhu ñayiví. ¹⁹Ta cha cuenda cha vaha chi ra, sacuví yuhu maa maa ri cuhva cuñí maun, tacuhva vaty chihin cha ndicha, cuví sacuvi tucu maa ra maa maa ri cuhva cuñí maun.

²⁰Soco ñima cha cuenda ri ra ihya chiquén chuun, soco chicán tiqui cha cuenda ñáyivi cha cuchino iñi chii chihin tuhun cahán ra ihya nu cuahan ca chi.

²¹Chiquén chuun na tandihí ñu ta iin ri na cuvi ñu chihin tahan ñu. Ta noo ri na cuvi ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu iin ri cuví ñu chihin yo, tacuhva vaty tandihí ñáyivi iyó siqui ñuhu ñayiví chino iñi ñu tyi maun tachí chii. ²²Yuhu chahí cha ndicha ñuhu chi ñu nyicón chi yo, suri cha ndicha ñuhu cha chahun chii. Vaty chihin cuan na iin ri cuví ñu tari yoho chihin yuhu noo ri cuví yo. ²³Yuhu nyaí chihin ñu ta yoho nyaún chihin, tacuhva na cuvi yo noo ri chihin ñu. Tyicuan caa ta coto tandihí ñáyivi iyó siqui ñuhu ñayiví tyi maun tachí chii, ta cuñí xaun chi ñu nyicón chi yo tari cuñún chi yuhu.

²⁴Sutu Mañi yuhu, maun chahun chi ñu chii. Ta cuñí cha cunyata ñu chihin nu cuacunyai, tacuhva nanyehe ñu cha ndicha ñuhu cha chahun chii vaty cuñún chii nyata ni cumañi ca chino ñuhu ñayiví. ²⁵Sutu Mañi yuhu, ra vaha cuvún, ta ñu cuenda ñuhu ñayiví ña ñohó nuu ñu chuun, soco yuhu ñohó nuu chuun. Ta ra nyicón chi yo ihya chitó ra tyi maun tachí chii. ²⁶Cha catyi chi ra yóo ra cuvún, ta cucatyí tiqui inga chaha, tacuhva vaty tari cuhva cuñún chii,

tyicuan caa cuhva cuacuñi tucu maa ra chi ra tahan ra. Ta yuhu cunyai añima ra.

18

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

¹Cha yahā cha catyī ra Jesús tuhun ihya, quita ra ta cuahan ra chihin ra cachicá noo chihin ra inga chiyo yuhu yuvi Cedron. Ta yucuan nyaá noo chachu yutun yucu. Ta yucuan quihvi ra Jesús chihin ra cachicá noo chihin ra. ²Ta ra Judas, ra cha naxicó tuhun chi ra, chitó ra nu cuahan ra Jesús. Vatyī tuhvá ra Jesús chahán ra yucuan chihin ra cha cachicá noo chihin ra. ³Ta yucuan chaā ra Judas chihin cuaha sindaro ta cuaha policia cuenda vehe ñuhu cha tachī ra cuvī nuu chi tata sutu ta ra cuvī fariseo. Chaā coyo ra yucuan, canyisó ra mityi, ta canyiso ra lámpara ta ñuhu yiti. ⁴Ta vatyī ra Jesús cha chitó ra tandihī cha cucuvi chi ra, quita ra ta ndacā tuhun ra chi ra:

—¿Yóó chi nanducú ndo? —catyī ra.

⁵Ta cacatyī ra chi ra:

—Chi ra Jesús ra ñuu Nazaret.

Ta catyī ra Jesús:

—Yuhu cuvī —catyī ra.

Ta ra Judas, ra cha naxicó tuhun chi ra Jesús nuu ra xaan iñi chi ra, nanyaá ra chihin ra yucuan. ⁶Ta cuhva cha catyī ra Jesús: “Yuhu cuvī”, tandihī ra canandacā chata ra ta canduvā ra nu ñuhú. ⁷Tyicuan ta inga tucu chaha ndacā tuhun ra Jesús chi ra, ta catyī ra:

—¿Yóó chi nanducú ndo?

Ta cacatyī ra:

—Chi ra Jesús ra ñuu Nazaret.

⁸Ta catyī ra Jesús:

—Cha catyī chi ndo tyi yuhu cuvī. Tatu chii nanducú ndo, saña ndo chi ra chica noo chihin na cunuhun coyo ra —catyī ra Jesús chi ra.

⁹Ican tyehe caa catyī ra Jesús tacuhva na chino cava cha catyī maa ra ta ityi chata ca nu catyī ra: “Ra cha chahā Suti chii, ni noo ra ña cuanaá.” ¹⁰Tyicuan ta ra Simón Pedro nyisó ra noo mityi. Ta tavā ra ta chahnyā ra soho chiyo vaha noo ra cha nañí Malco. Cuvī ra cuan musu ra cuvī nuu chi tandihī tata sutu. ¹¹Soco ra Jesús catyī ra chi ra Pedro:

—Natyihī mityun chichi veno. Tatu Nyoo Suti ta cuñí ra cha nyehi tindoho, tahán chi cha nyehi —catyī ra Jesús chi ra.

Nu nanyaq ra Jesús nuu ra cuvī nuu chi tata sutu

(Mt. 26.57-58; Mr. 14.53-54; Lc. 22.54)

¹²Tyicuan ta sindaro cuan chihin capitán ra, ta policia cuenda vehe ñuhu, catiñ ra chi ra Jesús, ta chahñī ra chi ra vatyī cahun ra vehe caa. ¹³Tyicuan ta chinyacā ra chi ra vehe ra Anás, vatyī ra Anás cuan tyiso ra Caifás cuvī chi ra. Ta cuiya cuan cuvī ra Caifás ra cuvī nuu chi tata sutu. ¹⁴Ican ra Caifás ihya cuvī ra cha catyī chi ra cacuvī nuu chi ñu Israel vatyī vaha ca cha cuvī noo ri rayii cha cuenda tandihī ñáyivi ñuu.

Nu catyī ra Pedro tyi ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuvī nuu chi tata sutu cuan ñohó nuu ra chi inga ra cuan. Yucuan chaha quihvi ra cuan chihin ra Jesús nuquehe ra cuvī nuu cuan. ¹⁶Soco ra Pedro ndoq ra yuvehe chata vehe. Yucuan chaha quita ra cha ñohó nuu chi ra cuvī nuu chi tata sutu cuan, ta cahan ra chihin ñaha cha nyaá yuvehe cuan. Ta tyihī ra chi ra Pedro chichi nuquehe cuan. ¹⁷Tyicuan ta ñaha cha nyaá yuvehe cuan ndacā tuhun ña chi ra Pedro, ta catyī ña:

—¿Atu ñima noo ra chica noo chihin rayii cuan cuvún?

Ta ra Pedro catyī ra:

—Ñime cuvī —catyī ra chi ña.

¹⁸Tyicuan ta musu ta policia cha tayucú yucuan, casanatahan ra ñuhu vatyī vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahmā ra cuvī nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹Tyicuan ta ra cuvī nuu chi tata sutu quichahā ndaca tuhun ra chi ra Jesús, yóó ra cuvī ra cachicá noo chihin ra, ta ñáá cha sañahá ra chi ñáyivi. ²⁰Ta ra Jesús catyī ra chi ra:

—Yuhu chihin nuu tandihī ñáyivi cahín.

Ta sañahī chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu iñ ri tandihī ñu Israel. Ta ñahri tuhun xehe cahín. ²¹¿Ñáá tuhun cha ndacā tuhun chii? Vaha taxin ca ndacā tuhun chi ñu cha chihī tuhun cahín, ta maa ñu nacatyī ñu ñáá

tuhun cahin chihin ñu. Maa ñu chitó ñu ñáá tuhun cahin —catyí ra Jesús chi ra.

²² Cuhva cha catyí ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacahún nu cahán ra cuví nuu chi tata sutu? —catyí ra chi ra Jesús.

²³ Ta ra Jesús catyí ra:

—Tatu cahin noo tuhun ña vaha, catyí chii nya maa maa ña vaha cahin. Soco tatu cahin tuhun vaha, ¿ñáá tuhun cha cañun chii? —catyí ra Jesús chi ra cuan.

²⁴ Yahá cuan ta nuhñi ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyí ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵ Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶ Tyicuan ta noo musu ra cuví nuu chi tata sutu, noo ra cha cuví ñayivi chi ra cha chahnya ra Pedro soho, quichahá ndaca tuhun ra ta catyí ra:

—Ta caa cuiri tyi nyehi chuun chihin ra chichi chacu cuan —catyí ra chi ra Pedro.

²⁷ Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yahá cuan ta quitá coyo ra chihin ra Jesús vehe ra Caifás ta chinyacá ra chi ra vehe tyiño gobernador. Cha vachi cundichin ta ra Israel ña caquihvi ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihvi ñu vehe savahri vatyí coto ma cuví cuxiñi ñu quivi vico pascua cuan. ²⁹ Yucuan chaha quitá ra Pilato vatyí cahan ra chihin ra, ta catyí ra:

—¿Ñáá cuatyí tyáá ndo siqui ra ihya? —catyí ra Pilato chi ra ñuu Israel.

³⁰ Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cutuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahñi ndi chi ni noo ñáyivi —catyí ra.

³² Tyicuan caa chinq cava cha catyí ra Jesús yoso caa cucúvi ra. ³³ Tyicuan ta nandihvi tucu ra Pilato chichi vehe tyiño cuan inga chaha. Ta caná ra chi ra Jesús ta ndaca tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhin chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhva cuenda chuun chii. ¿Ñáá cha sacuvun? —catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñayivi ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caqui ta vachi ñuhu ñayivi ihya, vatyí catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yahá cha ndaca tuhun ra tuhun ihya, quitá ra Pilato chichahan ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya. ³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñi ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihi ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹Tyicuan ta quehen ra Pilato chi ra Jesús ta tachi ra na cucañi sindaro chi ra. ²Ta sindaro savaha ra noo corona chihin iñu ta catyihí ra xiñi ra Jesús. Ta sacuihno ra chi ra chihin noo sahma tyacu nyaa tari cha tuhvá rey cañihno. ³Tyicuan ta catuhvá ra nu nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chi ra.

⁴Tyicuan ta quita tucu ra Pilato inga chaha ta catyí ra chi ra:

—Nyehe ndo cuatave chi ra ityi nuu ndo tacuhva nanyehe ndo vatyí ni noo cuatyí ra ña nañihí —catyí ra Pilato chi ra.

⁵Ta quita ra Jesús yihí corona iñu cuan xiñi ra, ta ñihno ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶Cuhva cha cananyehe ra cacuví nuu chi tata sutu ta policia chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyí yuhu ni noo cuatyí ra ña nañihí.

⁷Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñí chi cha cúvi ra vatyí nasahá ra Sehe Nyoo chi ra —cacatyí ra.

⁸Cha chiñi ra Pilato tuhun ihya, nayuhví ca ra. ⁹Ta ndihví tucu ra inga chaha chichi vehe tyiño, ta ndaca tuhun ra chi ra Jesús:

—¡Nya quita yoho? —catyí ra chi ra.

Soco ra Jesús ñahri cha nacahan ra.

¹⁰Tyicuan ta ra Pilato catyí ra chi ra:

—¡Ñáá tuhun ña nacahún nu cahán yuhu? ¡Atu ña chitón vatyí ra cuví tyiño cuví ta iyó ityi chii cha tyai chuun nu cruzi, ta iyó tucu ityi chii cha sañe chuun? —catyí ra Pilato chi ra Jesús.

¹¹Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí ra ican saha yoho —catyí ra Jesús chi ra Pilato.

¹²Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyí tandihi ri ra cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunyaá ra Pilato nu tyayu ra nu tuhvá ra sandaa cuatyí ñáyivi nu nañí chi Gabata chihin sahan hebreo, ta cuñí chi catyí: “Nu yihí yuu”. ¹⁴Ta cuví chi noo quivi cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵Soco maa ra Israel canachaa ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¡Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶Tyicuan ta ra Pilato chaha cuenda ra chi ra Jesús chi ra na cunyaa ra nu cruzi. Ta quehen sindaro chi ra, ta cuahan ra chihin ra.

Nu chihí ra Jesucristo nu cruzi
(Mt. 27.32-44; Mr. 15.21-32; Lc. 23.26-43)

¹⁷Ta nyisó ra Jesús cruzi ra, cuahan ra noo nu nañí: “Yiqui Xiñi Ndiyi”. Ta chihin sahan hebreo nañí chi Gólgota. ¹⁸Ta yucuan catyaa ra chi ra nu cruzi chihin clavu. Ta iin ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu. ¹⁹Ta ra Pilato tachi ra tyiño na cunyaa letra xiñi cruzi cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.” ²⁰Ta cuaha ñu Israel sacuahá ñu tuhun cuan, vatyí yatyn ri ñuu ñu cuví nu chinanyaa ra cruzi ra Jesús. Ta letra cuan nyaá chihin sahan hebreo,

ta sahan griego, ta sahan latín. ²¹ Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yahā tyai, nandoo maa ty-icuan caa —catyí ra chi ra.

²³ Cha yahā cha catyaa sindaro cuan chi ra Jesús nu cruzi, canaquehen ra sahma ra ta cha cumi tahan ra quehen ra noo noo sahma ra. Ta ndoo nonga sahma ra cha ña quicu ñu. Noo ri savahā ñu nyacua nya siqui ta nya yuvi. ²⁴ Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahan chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casachā ra sahme ta chahan ra noo sihva chihin chi, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihi ra Cleofas, ta cu María ñaha Magdala. ²⁶ Ta nanyehē ra Jesús chi sihi ra, nanyaá ña yatyin ri. Ta nanyehē tucu ra chi ra cha chicā noo chihin ra, ra cha cuñi xaan ra chi. Ta catyí ra chi sihi ra:

—Ma sehun nanyaá chiña —catyí ra.

²⁷ Tyicuan ta catyí ra chi ra cha cuñi xaan ra chi:

—Ma sihun nanyaá chiña —catyí ra chi ra.

Ta nya quiví cuan ta naquehen cuenda ra chi ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yahā tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Itiy ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quiyi tyitú chihin vinagre. Tyicuan ta casatyí ra chihin noo xixan ndutya iya cuan. Ta tyaa ra noo nu soco yutun cha nañi hisopo, ta catyañaa ra nya yuhu ra. ³⁰ Chihí ra Jesús ndutya cuan ta catyí ra:

—Cha iyó vaha tandihi vityin —catyí ra. Tyicuan ta nacañi noo ra xiñi ra ta chihí ra.

Nu quiñi lanza yiqui naha ra Jesús

³¹ Noo ri ca quiví cumañi ta cuví quiví cahnu ca vico pascua cuan, ta ra cacuví nuu chi ñu Israel ña cuñi ra cha ndoo coño ñuhu cuan nu cruzi quiví nyitatú ñu, vatyí quiví nyitatú ñu quiví ii cuví. Yucuan chaha chican ra tumañi iñi chi ra Pilato na tachi ra na cucahnu sindaro sihin ra cha catacoyo nu cruzi cuan tacuhva na cacuví ra cha numi ri, ta cañehe ra coño ñuhu ra.

³² Tyicuan ta cuahan coyo sindaro nu tayucú cruzi cuan. Ta chahnú ra sihin noo ra cha tacaá yucuan. Tyicuan ta chahnú tucu ra sihin inga ra cha tacaá xiin ra Jesús. ³³ Soco cuhva cha cuatuhva ra nu tacaá ra Jesús, cananyehē ra vatyí cha chihí ra. Ta yucuan chaha ña cachahnú ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quitañi ñiñi ta ndutya. ³⁵ Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyí maa ra chitó ra vatyí cha ndicha cahán ra, tacuhva nachino tucu iñi nyoho.

³⁶ Vatyí tuhun ihya cuví chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnu.” ³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihví ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

³⁸ Cha yahā tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuví ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chahā ra Pilato permisú ra chi, ta ra José chahan ra chinaquehen ra coño ñuhu cuan. ³⁹ Chahan tucu ra Nicodemo, ra cha chahan chichahan chihin ra Jesús cha cha cuaa. Chaā ra chihin ndutya vixi chahán. Ta noo ndutya vixi chahán cha nañi mirra nasacā ñu chihin inga cha nañi áloe. Ta quitañi chi tari noo oco uchi kilu cha tandihi. ⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuñi cahyu ra ndutya vixi chahán cuan, tari cuhva noo tuhun cha iyó chi ñu Israel tu cuatyihí ñu noo ndiyi chichi ñuhú.

⁴¹ Yatin nu cachahní ra chi ra Jesús nu cruzi

nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyi. ⁴² Yucuan tyihí ra coño ñuhu ra Jesús vatyí yatyin ri cuan nyaá ñaña cuan ta vatyí cha cua quichaha quívi nyitátú ñu Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasí yuhu ñaña cuan. ² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñí xaan ra Jesús chi. Ta catyí ña chi ra:

—Quehen ñáyivi coño ñuhu Sutu Mañi yo chichi ñaña, ta ña chitó yo nya chinyaca ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña. ⁴ Ninduvi ra ñin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaq nu ñaña. ⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihví ra chichi ñaña. ⁶ Yahá cuan ta chaq ra Simón Pedro chata ra, ta quihví ra chichi ñaña cuan. Suri nyehe tucu ra cuan sahma cuan catuví. ⁷ Ta suri nyehe tucu ra vatyí sahma cha squí noo xiñi ra Jesús, ña ñin ri cayucú chihin inga sahma cuan, soco catuví siin. ⁸ Tyicuan ta quihví tucu inga ra chica noo chihin ra Jesús cuan, ra cha chaq cha xihna ri nu ñaña cuan. Ta nyehe ra cha cuví cuan, ta chingo iñi ra. ⁹ Vatyí cha cuví maa ta cutuñi ca iñi ra cha catyí nu tutu Nyoo, vatyí ra Jesús cuñí chi cha nandoto ra cha yahá chihí ra. ¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tují ra Jesús nuu cu María ñaha ñuu Magdala

(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaa ña. Cha ñiri ca cha chacú ña, nyehe ñihñi ña chichi ñaña. ¹² Ta nyehe ña uvi tahan ángel ñihnó ra sahma cuichin, nyicú ra nu catuví coño ñuhu ra Jesús. Noo ra nyaá ityi nu catuví xiñi ra, ta

nonga ra ityi nu catuví chaha ra. ¹³ Ta ángel cuan ndaca tuhun ra chi ña ta catyí ra:

—Maha, ¿ñáá tuhun chacú chaun?

Ta catyí ña:

—Vatyí quehen ñu chi Sutu Mañi yuhu, ta ña chité nya tyihí ñu chi ra —catyí ña chi ángel cuan.

¹⁴ Ni cahan ña tuhun ihya ta nanyocava ña ta nanyehé ña chi ra Jesús yucuan. Soco ña chitó ña cha ra Jesús cuví ra. ¹⁵ Tyicuan ta ra Jesús ndaca tuhun ra chi ña:

—¿Ñáá tuhun chacún? ¿Yóó chi nanducún? —catyí ra chi ña.

Cuñí maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehun chi ra Jesús, catyí chii nya sandoun chi ra, vatyí naquehin chi ra —catyí ña chi ra.

¹⁶ Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahan ña chihin ra chihin sahan hebreo, ta catyí ña:

—¡Raboni! —Ta cuñí chi catyí: “Maestro”.

¹⁷ Ta catyí ra Jesús chi ña:

—Ma tiun chii, vatyí ta nandaa que nu nyaá Suti. Soco cuahan ta catyun chi tandihí yañi vatyí cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

¹⁸ Tyicuan ta chahan cu María ñaha Magdala cuan chisacoto ña chi ra cachica noo chihin ra Jesús vatyí nyehe ña chi ra Jesús ta catyí ra tuhun cuan chi ña.

Nu tují ra Jesús nuu ra cachica noo chihin ra

(Mt. 28.16-20; Mr. 16.14-18; Lc. 24.36-49)

¹⁹ Suri maa quívi cuan cha quichaha vitya, cha cuacuaa ta candu ñin ri ra cachica noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tují ra ta chicuínanyaq ra mahñu. Ta chahá ra nocumi chi ra, ta catyí ra:

—Na coo cha taxi ri añima ndo —catyí ra.

²⁰ Cha yahá cha catyí ra tuhun ihya ta sañaha ra ndaha ra ta yiquí naha ra. Ta maa ra cacusii cuñi ra cha nanyehé ra chi Sutu Mañi yo. ²¹ Ta catyí tucu ra Jesús inga chaha chi ra:

—Na coo cha taxi ri ańima ndo. Tari tachí Suti tyińo chii, tyicuan caa tachí tyińo chi nyoho —catyí ra chi ra.

²²Tyicuan ta tiví ra siquí ra ta catyí ra chi ra:

—Ñaquehen ndo Tatyi li Nyoo. ²³Ñu cha sahá ndo tucahnu ińi chi, iyó tucahnu ińi chi ñu. Ta ñu cha ña sahá ndo tucahnu ińi chi, ñahri tucahnu ińi iyó chi ñu —catyí ra Jesús chi ra.

Nu nyehę ra Tomás chi Sutu Mańi yo cha yaha nandotę ra

²⁴Soco ra Tomás, noo ra chica noo chihin ra Jesús, ra cha catyí ñu: “ra tinihi”, yori ra nyaá chihin ra cuhva cha quichí ra Jesús.

²⁵Yaha cuan ta canacatyí ra cachica noo chihin ra Jesús chi ra:

—Nyehe ndi chi Sutu Mańi yo —cacatyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino ińi —catyí ra Tomás.

²⁶Uńa quiví yaha ta canycíu tucu ra cachica noo chihin ra Jesús noo vehe. Ta nyaá ra Tomás chihin ra. Tyicuan ta vasi nyaá vaha yuvehe soco quihví ra Jesús ta chicuinyaa ra mahńu ra. Ta chahę ra nocumi ta catyí ra:

—Na coo cha taxi ri ańima ndo.

²⁷Tyicuan ta quichaha catyí ra chi ra Tomás:

—Tyihí nu ndahun nu cahví ndahi. Ta tyihí ndahun yiqui nahi. Ta ma caca uvi ińun, soco chíno ińun —catyí ra Jesús chi ra Tomás.

²⁸Tyicuan ta nacahan ra Tomás ta catyí ra:

—¡Sutu Mańi yuhu! ¡Nyoo Suti cuví chuun! —catyí ra Tomás.

²⁹Ta catyí ra Jesús chi ra:

—Yoho Tomás, vityin chinó ińun tyi nye-hún chi. Si ca cuńi ñu cha ña nyehe ta chinó ińi ñu —catyí ra Jesús chi ra Tomás.

Nu sacoto ra Juan ńáa cuenda chingo libru ihya

³⁰Ta cuaha ca milagru sacuví ra Jesús nuu ra cachica noo chihin ra, ta ñahri chicunyaa nu libru ihya. ³¹Soco chicunyaa tuhun ihya vatyí tacuhva chino ińi ndo vatyí ra Jesús cuví Cristo, ra cuví Sehe Nyoo, ta vatyí coo

ndo ñayiví cha ma naa ca maa tatu chinó ińi ndo chi ra.

21

Nu tuví ra Jesús nuu ucha tahan ra cachica noo chihin ra

¹Cha yaha cuan ta tuví tucu ra Jesús nuu ra cachica noo chihin ra inga chaha. Tyehe caa tuví ra yuhu mińi Tiberias. ²İn ri nyicú ra Simón Pedro ta ra Tomás cha catyí ñu: “ra tinihi” chi, ta ra Natanael, ra ñuu Caná nu cuví Galilea. Nyicú tucu sehe ra Zebedeo ta uvi ca ra cachica noo chihin ra Jesús. ³Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihví coyo ra chichi noo canoa, soco cha cuaa cuan ni noo tiyaca ña catiın ra. ⁴Cha vachi cundichin cuan tuví ra Jesús nu ńiti yuhu mińi cuan. Soco ra cachica noo chihin ra, ña canicohón nuu ra chi ra. ⁵Tyicuan ta catyí ra chi ra:

—Yoho ra tahan yo, ¿atu ta ńihi ca ndo tiyaca?

Ta canacahan ra ta catyí ra:

—Ta ńihi ca ndi.

⁶Tyicuan ta nacahan ra Jesús ta catyí ra:

—Tyihí ndo tarraya chiyo vaha canoa chińa, ta ńihi ndo —catyí ra Jesús chi ra.

Tyicuan caa casacuví ra, ta yaha cuan ta nyacua ña cuví tava ra tarraya cuan nu ndutya chaha cha cuaha tiyaca yihí. ⁷Ta ra cha cuńi xaan ra Jesús chii catyí ra chi ra Pedro:

—¡Sutu Mańi yo cuví! —catyí ra chi ra Pedro.

Cha chińi ra Simón Pedro vatyí Sutu Mańi yo cuví, ndihví noo ra sahma ra, vatyí tava ra cha cuatiin ra tiyaca, ta quini ra cuahan ra chichi ndutya cuan. ⁸Ta inga ra cachica noo chihin ra Jesús chaę coyo ra nya yuhu mińi cuan chihin canoa, caxitá ra tarraya cuan tyitú yihí tiyaca, vatyí yatyin ri yuhu mińi cuan cańohó ra ta cha noo cientu metru ri. ⁹Cuhva cha canoó ra nu ńuhú, cananyehe ra noo nu caá titi ńuhu. Ta catuví noo tiyaca siquí titi ńuhu cuan, ta pan ńandihí. ¹⁰Ta ra Jesús catyí ra chi ra:

—Nyaca ndo suhva tiyaca cha ni tiın ndo —catyí ra Jesús chi ra.

¹¹ Ta ra Simón Pedro ndaꝥ ra nu canoa ta quichaha xita quiñoho ra tarraya tyitú yihí tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan. ¹² Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachica noo chihin ra ña cacaña iñi ra candaca tuhun ra yóo ra cuví ra vatyí cachtó ra vatyí Sutu Mañi yo cuví ra. ¹³ Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuvi ra chihin tiyaca. ¹⁴ Ican ihya cuví chaha cu uñi cha tuví ra Jesús nuu ra cachica noo chihin ra cha yaha cha nandoto ra.

Nu cahán ra Jesús chihin ra Simón Pedro

¹⁵ Cha yaha cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñí con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñí chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñún chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñí chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

¹⁷ Ta chaha cu uñi ndaca tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndaca tuhun ra chi ra cha cu uñi chaha tatu cuñí ra chi ra, ra Pedro nducuihya iñi ra, ta catyí ra chi ra:

—Sutu Mañi yuhu, maun chitón yoso caa añime ta maun chitón tyi cuñí chuun —catyí ra Pedro.

Ta ra Jesús catyí ra chi ra:

—Saha cuenda mbee sane. ¹⁸ Cha ndicha catyí chuun vatyí ta tyivaun ndihvi noun sahmon ta chahun nu cuñún. Soco na cuchahnun, cusanacaun ndahun ta inga ra cusandihvi noo chuun. Ta cunyaca ra

chuun nu ña cuñún huhun —catyí ra Jesús chi ra Pedro.

¹⁹ Cha catyí ra Jesús tuhun ihya cuñí ra catyí ra yoso caa cucuvi ra Pedro ta cusacahnun ra chi Nyoo cha cuenda cuan. Yaha cuan ta catyí ra Jesús chi ra Pedro:

—¿Cunyicon chii! —catyí ra chi ra.

Nu cahán ra Juan tuhun maa ra

²⁰ Tyicuan ta nyocava ra Pedro ta nanyehe ra vatyí nyicón inga ra cha chica noo chihin ra Jesús, ra cha cuñí xaan ra Jesús chi. Suri maa ra chinyañaꝥ ra chi ra Jesús cha cuxiñi ra quivi cuan. Ta ndaca tuhun ra ta catyí ra: “Sutu Mañi yuhu, ¿yóo ra cunaxico tuhun chuun?” catyí ra, ndaca tuhun ra quivi cha ni cumañi cuví ra Jesús. ²¹ Cuhva cha nanyehe ra Pedro chi ra, ndaca tuhun ra chi ra Jesús:

—Sutu Mañi yuhu, ta ra ihya, ¿ñáá cha cucuvi chi ra? —catyí ra chi ra.

²² Nacahan ra Jesús ta catyí ra:

—Tatu cuñí mai cha coo ra nyacua nya ndichi inga chaha, ¿ñáá cha cuenda yoho? Yoho cunyicon chii —catyí ra Jesús chi ra Pedro.

²³ Tyicuan ta chitya tuhun ihya nu canyicú yañi yo vatyí ra cuan, ma cuví ra. Soco ña catyí ra Jesús cha ma cuví ra. Catyí ra: “Tatu cuñí yuhu cha coo ra nyacua nya quichi inga chaha, ¿ñáá cha cuenda yoho?”

²⁴ Yuhu cuví ra yucuan, ra cha cahán ra Jesús tuhun. Ta nyehj tandihí cuii maa cha cuví ta tyai nu libru ihya. Yuhu chite vatyí tandihí cha tyai, ndicha.

²⁵ Iyó cuaha ca cha sacuvi ra Jesús. Tyehe ta chicunyaꝥ tahan tahan tuhun cuan nu libru, cahví iñi tyi naniñ ñuhu ñayivi ma cutahan tandihí libru cuan.

Tyiño Cha Casacuví Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí li Nyoo

¹Yoho Teófilo, yuhu ra Lucas sacuhín tutu chuun quívi cuan. Ta nu sacuhín tutu cha xihna ri cuan, tyaj tandihí cha quichahá sacuvi ra Jesús ta tandihí cha sañahá ra nya quívi xihna ri ²ta nya quívi nandaá xica ra andívi. Ta cha cumañi ca nandaa ra andívi, nacachí ra chí ra apóstol cuenda ra. Ta tyatyíño ra chí ra chihin Tatyí li Nyoo tyi cacaca ra tyiño ra. ³Ta maa ra Jesús nyehe ra tindoho ta chíhi ra. Ta cha yahá cuan, nandotó ra ta tuví ra nu canyicú ra apóstol. Ta chichi cha uvi xico quívi, cuaha xaan chaha tuví ra nu canyicú ra, vatyi na cacoto ra vatyi ndicha cha nyitó ra. Ta cahán ra tuhun yoso caa nyacá ñaha Nyoo chí yo.

⁴Cuhva cha nyaá ca ra chihin ra, ra Jesús catyí ra chí ra:

—Ma quita ndo Jerusalén ihya, nyacua nya naquehen ndo Tatyí li cha catyí Suti tyi cuhva ra chí ndo, tari catyí chí ndo quívi cuan. ⁵Chihin ndutya sacondutya ra Juan chí ñáyivi. Soco nyoho ña cuaha ca quívi ta cucondutya ndo chihin Tatyí li —catyí ra Jesús.

Nu nandaá xica ra Jesús andívi

⁶Cuhva cha canyicú ra apóstol iin ri chihin ra Jesús, ta candacá tuhun ra chí ra:

—Sutu Mañi yuhu, ¿atu vityin ri cusacacun chí ñuu yo Israel ihya ndaha ra ñuu Roma? —catyí ra.

⁷Ta nacahan ra Jesús ta catyí ra:

—Ña tahn chí coto nyoho nya quívi. Noo tuhun ri maa Nyoo Sutu yo cuacatyí ra ama. ⁸Soco cuhva cha quichi Tatyí li síqui ndo cunaquehen ndo tunyee iñi, ta cuquita ndo vatyi cahan ndo tuhun Jerusalén ihya ta tandihí ñuu cha nyicú Judea ta Samaria, ta nicahnu ñuhu ñáyivi.

⁹Ta cha yahá cha catyí ra Jesús tuhun ihya, ta cha ni ri ca cha canyehé ra chí ra, nandaá xica ra andívi, ta quihví ra chíhi noo vico. Ta ña canyehé ca ra chí ra.

¹⁰Ta cuhva cha canyehé ndaa ra andívi, ta tuví uvi tahan ángel yatin nu canyicú ra.

Ñihnó ra sahma cuichin. ¹¹Ta cacatyí ra cuan chí ra:

—Nyoho ra Galilea, ¿ñáá tuhun cha ndoo ndo nyehé ndaa ndo andívi? Suri maa ra Jesús cha nyehe ndo nandaá xica ihya, tyehe caa cuquichi tucu ra inga chaha.

Nu canacachí ra apóstol chí ra Matías vatyi ndihvi ra tyiño nuu ra Judas

¹²Tyicuan ta quita coyo ra apóstol nu chinyicu ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatin ri nyaá ñuu cuan, tari sava hora ri. Ta sava ri hora cuví caca ñáyivi quívi nyitatu ñu, vatyi tyicuan caa catyí ley cha tyaa ra Moisés. ¹³Cuhva cha nachaa coyo ra Jerusalén cuan, candaá ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuí naquiqui síqui gobiernu Roma, ta ra Judas yañi ra Jacobo. ¹⁴Ta nyita ri ndu iin ri ra ta iin ri cuhva cachicá xiñi ra ta cachicán tahvi ra chí Nyoo. Ta nyicú tucu yañi ra Jesús ta cu María síhi ra, ta inga ñusihi ñandihí.

¹⁵Tari noo ciento oco ñáyivi ndu iin ri ñu quívi cuan. Ta nicuinanayaá ra Pedro. Ta catyí ra chí ñu:

¹⁶—Nyoho yañi, cuñi chí cha cuví tari cuhva catyí nu tutu Nyoo. Vatyi cahán Tatyí li chihin yuhu ra David yoso caa cuhva cuenda ra Judas chí ra Jesús chí ra xaan iñi chí ra. ¹⁷Ta ra Judas cuví ra noo ra chindihí chihin yo. Ta iin ri chica ra tyiño Sutu Mañi yo chihin yo. ¹⁸Soco chahan ra, ta satá ra noo ñuhú chihin xuhun cha ñihí ra cha chahá cuenda ra chí ra Jesús. Yahá cuan ta canacava ra chihin xiñi ra, ta ndata chíhi ra ta quita tandihí chíti yihí ra. ¹⁹Ta quívi cha cachito ñu ca iyó Jerusalén ihya cha chíhi ra, casacunañi ñu chí ñuhu cuan Acéldama. Ta cha chihin sahan maa ñu cuñí chí catyí Nu Catuvi Niñi. ²⁰Vatyi nu libro Salmo catyí chí tuhun ra Judas tyehe caa: Na ndoo maa ri maa vehe ra.

Ta yori coo chíhi.

Ta catyí tucu chí:

Inga ra cunanduvi tyiño nuu ra.

²¹⁻²²Ta vityin nyicú ra cachica noo chihin yo quívi chinyaa Sutu Mañi yo Jesús chihin yo; nya quívi sacondutya ra Juan chí ra, ta nya quívi nandaá xica ra andívi. Ta

vityin cuñí chi cha ndu iin ri noo ra chihin yo, vatyí cuví ra cha ndaa cha cuenda cha nandotó ra Cristo —catyí ra Pedro.

²³Tyicuan ta cacana ra chi uvi tahanan ra, chi ra José cha nañi Barsabás, ta suri nañi tucu ra Justo; ta cacana tucu ra chi ra Matías. ²⁴Ta cachican tahvi ra tyehe caa:

—Sutu Mañi yuhu, yoho chitón cha caa añaima tandihi ndi. Sañaha chi ndi chichi cha uvi tahanan ra ihya, nya ra cha nacachi maun, ²⁵vatyí sacuví ra tyiño cha sacunaa ra Judas cha cuenda cuatyí ra, ta cuahan ra nu tahán chi kuhun ra —cacatyí ra, chicán tahvi ra.

²⁶Tyicuan ta cachahan ra noo sihva, tacuhva nyehe ra nya ra tahán chi nyatu cuan chi. Ta tahanan chi chi ra Matías. Ta yucuan cuví nu ndu iin ri ra chihin ndi uchi iin apóstol.

2

Nu chaq Tatyí li

¹ Ta iin ri nyicú ñáyivi yihí cuenda ra Jesús ta chaq quívi vico Pentecostés cha sanducahnú ñáyivi Israel. Ta iin ri cuhva chicá xiñi ñu. ² Ta sana iñi ñu ta naciñi ñu noo cha cayu vachi ityi andivi. Tari cha cayu yahá noo tatyí ñihi. Ta iyo cuví tandihi chichí vehe nu canyicú ñu. ³ Tyicuan ta tuví tari yaa ñuhu quití cuatyí siquí noo noo ñu. ⁴ Ta tandihi ñu chitu ñu chihin Tatyí li. Ta quichahá cahan ñu inga sahan yoso cuhva saquehen ityi maa Tatyí li chí ñu.

⁵ Ta quívi cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi nicahnu siquí ñuhú ñáyivi chaq coyo vatyí casanducahnu ra vico Pentecostés. ⁶ Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñi iñi ra ñáa cha cuví cuan, vatyí noo noo ra cachiñi ra cahan ñu cuhva sahan cha cacahan maa ra. ⁷ Iyo cuñí ra ta catyí ra chi ra tahanan ra:

—¿Atu ñima ñu Galilea cuví tandihi ñu cha cahan ihya? ⁸ ¿Ñáa tuhun cha chinií yo cahan ñu cuhva sahan noo noo yo? ⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia. ¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi Africa. Ta nyicú tucu ñu ñuu Roma cha iyó ñuu ihya.

Ta suhva ñu cuví ñu ñu Israel nya quívi cacú ñu. Ta inga ñu cuví ñu ñáyivi nanduví cuenda ñu Israel ta nyicon ñu ley ra Moisés. ¹¹ Iyó tucu ñáyivi ñuhú Creta ta ñu Arabia. Soco tandihi yo ta chinií yo cahan ñu chihin sahan cha cahan yo. Ta nacatyí ñu cha cahnu cha sacuví Nyoo —cacatyí ra.

¹² Tandihi ra, iyo xaan cacuñi ra, ta yihí ra ndacá tuhun ra chi tahanan ra:

—¿Ñáa cha cuñí chi catyí chi tandihi tuhun ihya? —catyí ra.

¹³ Soco inga ra cahan nyaa ra ta cacatyí ra vatyí cachiñi ñu.

Nu cahan noo ra Pedro nuu ñáyivi

¹⁴ Tyicuan ta nicuinanyaa ra Pedro chihin inga uchi iin tahanan apóstol. Ta chihin cha chaa cahan ra ta catyí ra:

—Nyoho yañi, cha cuví ndo ra Israel, ta tandihi nyoho cha iyó ndo Jerusalén ihya. Coto ndo tuhun ihya. Ta cuñi vaha ndo tuhun cha cuacatyí chí ndo. ¹⁵ Vatyí cuñi maa ndo tyi chinií ndi. Soco ña chinií ndi, vatyí ña tuhvá ñáyivi chinií cha cuhva ihya, vatyí ni ca iin cha ñaha ri cuví. ¹⁶ Soco ihya cuví tuhun cha cahan ra Joel, ra cuví profeta Nyoo ta cha naha. Vatyí catyí ra:

¹⁷ Nu cuandihí ca quívi, catyí Nyoo, cusaquichi Tatyí li siquí tandihi ñáyivi. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chí ñu. Ta ra cahnu cunyehe ra ñumahna.

¹⁸ Cusaquichi Tatyí li siquí ñu sacuví tyiño nui. Ta cucahan ñu cuende, catyí Nyoo.

¹⁹ Ta catyí ra vatyí cusañaha ra cha iyo cucuvi ityi andivi. Ta ityi nu ñuhu ñáyivi cusañaha ra seña, seña ñiñi, seña ñuhu, ta vico ñuhma.

²⁰ Cunduñaa ñanyii. Ta yoo tari caa tyacu ñiñi cunanduvi. Tyicuan caa cucuvi cha niri ca cha chaá quívi quichi Sutu Mañi yo. Ta cucuvi noo quívi cahnu vatyí cututuñi chí yo nuu ra.

²¹ Ta tandihi ñu chicán tahvi sivi ra cucucu ñu. Tyicuan caa catyí ra Joel.

²² Cuñi ndo nyoho ra Israel. Cuñi ndo tuhun cha cuacatyí ihya. Ra Jesús ra Nazaret cuví ra noo ra cha cachi Nyoo chí vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuví Nyoo nu

canyicú yo cha cuenda ra Jesús. Ta nyoho chitó vaha ndo tuhun ihya. ²³ Soco quivi quehen cuenda ndo chi ra, sacuví ndo tari cuhva tyaa maa Nyoo cuhva nyata quivi xihna ri. Vatyí chahá cuenda ndo chi ra chi ra quini iyó. Ta chitacaá ra chi ra nu cruzi. Ta tyicuan caa chahni ndo chi ra. ²⁴ Soco Nyoo sanandoto ra chi ra vatyí sacacú ra chi ra ndaha tuhun chihí. Vatyí tuhun chihí ña cuví cunyaca ñaha chi ra. ²⁵ Vatyí ra David cahan ra tuhun ra Cristo ta cha naha, ta catyí ra:

Tyicuan ri nyehí chi Sutu Mañi yo ityi nui. Maa ra nyaá iin chiyo vahi ta ñahri maa cha cuví sayuhvi chii.

²⁶ Yucuan chaha cusii xaan cuñí añime. Ta chité yaa chihin cha sii cuñí.

Ta siin ri coño ñuhi cunitatu chi vatyí chité tyi cunandote.

²⁷ Vatyí yoho Nyoo Suti, ma sandoun añime nu nyicu ñu chihí, ta ni ma cuhvon cha tyahyu coño ñuhi.

Vatyí sehe iun cuví chii.

²⁸ Sañahún ityi cha cuahán nu coi ñayivi chaa cha ma naa ca maa. Ta sacutún chii chihin tusii iñi vatyí nyaún chihin, catyí ra David ta cha naha.

²⁹ Nyoho yañi, chitó cachi yo vatyí ra David sutu chahnu yo chihí ra ta quihvi ra chichi ñuhu. Ta ñaña ra nyaá ca chi ihya nra vityin. ³⁰ Soco ra David cuví ra noo profeta cuenda Nyoo. Ta chitó ra vatyí Nyoo tyaa ra cuhva ta iin ri tuhun cahan ra chihin ra vatyí suri tata maa ra ican cuacacu ra Cristo. Ta ra Cristo, ican ra cunyaca ñaha. ³¹ Ta tyicuan caa ra David tari cha vatyí nyehé ra cha cuacuví nu cuahan ca chi quivi. Ta cahan ra tuhun cha cunandoto ra Cristo. Ta catyí ra vatyí ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra. ³² Ta ra Jesús ihya sanandoto Nyoo chi ra. Ta tuhun ihya tandihí maa ndi cuví ndi cha ndaa. ³³ Nyoo sacahnú ra chi ra Jesús, ta cuatyaa ra chi ra chiyo vaha ra andivi. Ta ra Jesús naquehen cuenda ra Tatyí li cha catyí Sutu yo Nyoo ta cha naha vatyí cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chini ndo. ³⁴ Vatyí ñima ra David nandaá ra andivi. Vatyí suri maa ra David cahan ra tuhun ra Jesús, ta catyí ra:

Catyí Suti Nyoo chi Suti ra Cristo: “Cunyaá chiyo vahi

³⁵ cha niri ca cha caquin chi ra xaan iñi chuun chahun”, catyí Nyoo chi ra Cristo chihin yuhu ra David.

³⁶ Nyoho ta tandihí ca ñu Israel, coto vaha ndo vatyí tuhun ra Jesús ican cahn ihya. Chitacaá ndo chi ra nu cruzi. Soco Nyoo cuatyaa ra chi ra tyi cuví ra Sutu Mañi yo, ra nyaca ñaha chi yo —catyí ra Pedro.

³⁷ Cuhva cha chihí ñu tuhun cahan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihí ca ra apóstol, ta catyí ñu:

—Nyoho yañi, ¿yoso caa sacuví ndi vityin? —catyí ñu chi ra.

³⁸ Yucuan ta catyí ra Pedro chi ñu:

—Noo noo ndo ndu uvi iñi ndo cuatyí ndo ta nasama ndo cuhva iyó ndo nuu Nyoo. Ta condutya ndo chihin sivi ra Jesucristo. Tacuhva na saha ra ticahnu iñi cuatyí ndo. Tyicuan caa ta cua cuhva Nyoo Tatyí li ra chi ndo. ³⁹ Vatyí cha naha catyí Nyoo vatyí cuhva ra Tatyí li ra chi maa ndo, ta chi sehe ndo, ta chi ñu cha cañi nyaa ñandihí. Vatyí tandihí ñu cha nacana Sutu Mañi yo Nyoo chii cucuhva ra Tatyí li ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Ndycu ndo cuhva na sacacu Nyoo chi ndo, tacuhva cuví sandoo ndo cha caa ñayivi quini iyó ihya —catyí ra chi ñu.

⁴¹ Tyicuan ta tandihí ñu cha natiin cuenda tuhun cahan ra Pedro condutya ñu. Ta quita tari noo uñi mil ñu, ta ndu iin ri ñu chihin ñu yihí cuenda ra Jesucristo. ⁴² Ta tyicuan ri ndu iin ri tandihí ñu, ta chihin cha ñi iñi ñu tyasoho ñu cha sañahá ra apóstol chi ñu. Ta iin ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

⁴³ Ta cuaha milagru ta seña sacuví Nyoo chihin ndaha ra apóstol. Ta tandihí maa ñayivi iyo cuñí ñu. ⁴⁴ Tandihí ñu yihí cuenda ra Cristo iin ri cacuví ñu chihin cha iyó chi ñu. ⁴⁵ Xicó ñu cha tyayí ñu ta cha iyó chi ñu. Ta sachá ñu xuhun ñu chi tahan

ñu yoso cuhva cha chiñuhú chi noo noo ñu. ⁴⁶Ndiquivi ta ndu ñin ri ñu nya vehe ñuhu cahnu. Ta ndu ñin tucu ri ñu noo noo vehe tahan ñu ta chachí ñu pan ta chihí ñu vinu. Ta ñin ri cachachí ñu chihin cha sii cuñí añima ñu. Ta chahá ñu cha cachi tahan ñu chihin cha nii ñin ñu. ⁴⁷Ta sacahnú ñu chi Nyoo. Ta vaha cahán tandihí ñáyivi siqui ñu. Ta tahan tahan quivi cuahan sanducuahá ca Sutu Mañi yo chi ñu cha cuahán sacacu ra.

3

Nu nduvahá noo ra coxo

¹Noo quivi cuahán coyo ra Pedro chihin ra Juan vehe ñuhu cahnu. Cuví chi cuhva caa uñi cha cha ñin, cuhva cha tuhvá ñáyivi Israel cachicán tahvi ñu chi Nyoo. ²Ta ndi quivi maa nyaá noo ra ndahvi, ra coxo nyata cacu, yuvehe ñuhu cahnu cuan. Vatyí chinyacá ñu chi ra na cacan ra limuxtan chi ñáyivi quihvi yuvehe cuan, ta nañi chi: Yuvehe Tyaqui. ³Tyicuan ta nanyehé ra coxo cuan chi ra Pedro ta chi ra Juan cha cuaquihvi ra chichi vehe ñuhu cahnu. Ta chican ra noo limuxtan chi ra. ⁴Ta cananyehé ra Pedro ta ra Juan chi ra. Ta ra Pedro catyí ra chi ra:

—Nyehe chi ndi —catyí ra.

⁵Tyicuan ta quichahá nyehe ra coxo cuan chi ra. Cuñí maa ra vatyí iyó cha cuacuhva ra chi ra. ⁶Soco ra Pedro catyí ra chi ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuuta ta cācon —catyí ra Pedro chi ra.

⁷Tyicuan ta tiñi ra Pedro ndaha chiyo vaha ra ta nacoñehé ra chi ra. Ta caa cuhva ri cuan nicoo fuerza chaha ra ta tatu chaha ra. ⁸Tyicuan ta ra coxo cuan ndava ra noo, ta nicuinanyaa ra. Ta quichahá chica ra. Ta quihvi ra chihin ra chichi vehe ñuhu. Ta chica ra. Ta cañá ndava ra. Ta sacahnú ra chi Nyoo. ⁹Tandihí ñáyivi nyehe ñu chica ra ta sacahnú ra chi Nyoo. ¹⁰Ta iyo xaan cuñí ñu ta yuhví ñu cha cuenda cha nduvahá ra cuan. Vatyí nicohón nuu ñu chi ra. Ta chitó ñu vatyí suri maa ra cuví cha tuhva chinyaa Yuvehe Tyaqui cuan chican ra limuxtan.

Nu cahán noo ra Pedro tuhun ra Cristo nuu ñáyivi nu cuví corredor ra Salomón

¹¹Ra coxo cha nduvahá cuan, ña saña maa ra chi ra Pedro ta ra Juan. Ta tandihí ñáyivi iyo cuñí ñu ta chinqo ñu nataca ñu nu nyicú ra, nya nu cuví corredor ra Salomón chichi vehe ñuhu. ¹²Cha nanyehé ra Pedro cha tyicuan caa, catyí ra chi ñáyivi:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chi nyuhu? Tari cha vatyí chihin tunyee ñin maa ndi, o cha cuenda cha cachi iyó ndi nuu Nyoo, sanduvahá ndi chi rayii ihya, cuñí maa ndo. ¹³Nyuhu ña cuví sanduvaha ndi chi ñáyivi. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chi Sehe ra, ra Jesús. Ta maa ndo chahá cuenda ndo chi ra chi ra Pilato, ra cuví tyiño. Ta maa ra cuñi ra saña ra chi ra. Soco nyoho ña chahá ndo. ¹⁴Cha nuu cha cacan ndo cha saña ra chi ra vaha, ra ii cuan, nyoho chican ndo cha saña ra chi noo ra tuhvá chahñi ñáyivi. ¹⁵Tyicuan caa chahñi ndo chi ra cha chahá ñáyivi chaa coo yo chihin Nyoo. Soco Nyoo sanandoto ra chi ra. Ta ña ndoo ra chihin ñu chihí. Ta nyuhu cuví ndi cha ndaa. ¹⁶Ta suri maa ra Jesús cuví ra chahá fuerza chaha ra coxo ihya. Vatyí chinó ñin ndi tyi iyó tunyee ñin chi ra Jesús. Yucuan chaha ndunyeé chaha ra ihya, ta ñohó nuu vaha ndo chi ra ihya. Ta nduvahá ra vatyí chinó ñin ndi chi ra Jesús. Ta tandihí nyoho cha nyehe maa ndo vityin.

¹⁷Chité yañi —catyí ra Pedro— vatyí quivi cha chahñi ndo chi ra Jesús, ña chito ndo tyi ña vaha cha nyacuví ndo. Ta tyicuan caa tucu ra cuví nuu chi ndo, ña cachitó ra. ¹⁸Soco tyehe caa chinqo cava tuhun cahán Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho. ¹⁹Yucuan chaha ndu uvi ñin ndo cuatyí ndo. Ta nacuhva ndo añima ndo chi Nyoo, tacuhva na ndachi cuatyí ndo. Tyicuan ta Sutu Mañi yo sandunyeé ra añima ndo vatyí cohon ra añima ndo. ²⁰Tyicuan ta cutachi ra chi ra Jesús ra cuví Cristo na quichi ra inga chaha. Vatyí quivi xihna ri tyaa Nyoo cuhva tyi quichi ra cha cuenda ndo. ²¹Tahán chi cha ndoo ra Jesucristo andivi cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha. ²²Vatyí tyicuan caa catyí ra Moisés chi sutu chahnu yo: “Cusaquichi

Sutu yo Nyoo chi noo ra cahan cuenda ra. Ta suri ñáyivi chi yo cucuvi ra. Ta cuacahan ra tuhun Nyoo chihin ndo tari cahan yuhu. Quichaha ndo tandihi cha catyí ra chi ndo. ²³ Vatyí tandihi ñu cha ma tyasoho tuhun cahan ra, cunaa ñu, vatyí ma cu iin ri ñu chihin ñáyivi cachi Nyoo chii”, catyí ra Moisés.

²⁴ Ta tyicuan caa tucu tandihi profeta cuenda Nyoo nya quívi ra Samuel ta nyacua nya vityin, casacotó ra tuhun cha cuví vityin. ²⁵ Tandihi promesa cha chahá Nyoo cha cahan ra profeta tuhun ta cha naha, chi maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chi ra Abraham: “Tandihi ñáyivi cha iyó siquí ñuhu ñáyivi cunasoque chi ñu cha cuenda ñáyivi chuun.” ²⁶ Ta quívi sanandotó Nyoo chi Sehe ra, xihna ca nu nyicú ndo tachí ra chi ra, vatyí nasoco ra chi ndo. Tacuhva vatyí tahan tahan ndo sandoo ndo cha quiñi caa —catyí ra Pedro chi ñu.

4

Nu catiñ ra cacuví nuu vehe ñuhu cahanu chi ra Pedro ta chi ra Juan

¹ Ni cahan ca ra Pedro ta ra Juan chihin ñáyivi, ta chaá coyo tata sutu cuenda ñu Israel chihin ra cuví nuu chi ra sahá cumi vehe ñuhu, ta chihin ra cuví saduceo. ² Cacuxaan xaan ra vatyí ra Pedro ta ra Juan sañahá ra chi ñáyivi ta catyí ra vatyí ndicha cha nandotó ñu chihí, vatyí ra Jesús nandotó ra. ³ Tyicuan ta catiñ ra chi ra. Ta catyihí ra chi ra vehe caa. Ta candog ra nyacua nya inga quívi vatyí cha iñi xaan cuhva cuan. ⁴ Soco cuaha ñu cha chiñi tuhun cahan ra Pedro nachinó iñi ñu. Ta candu iin ri ñu chihin ñu yihí cuenda ra Jesús. Ta cha tandihi ñu vasi quita ohon mil ñu cha maa ri maa rayi ri.

⁵ Tuví inga quívi ta candu iin ri ra cacuví tyiño chi ñu Israel, ra chahnu, ta ra casacuaha cuenda ley cha tyaá ra Moisés, nya Jerusalén cuan. ⁶ Ta ñohó tucu ra Anás ra cuví nuu chi tata sutu. Ta ra Caifás, ta ra Juan, ta ra Alejandro. Ta nyicú tucu tandihi ñáyivi chi ra cacuví nuu chi tata sutu. ⁷ Tyicuan ta catachí ra tyiño chiquehen chi ra Pedro ta chi ra Juan. Ta chitayucú ra chi ra mahñu. Ta candacá tuhun ra chi ra:

—¿Yóó cha chahá ityi chi ndo vatyí san-duvahá ndo chi ra cuan? ¿Yóó chi cha cuenda nyacuví ndo tyehe caa? —cacatyí ra chi ra.

⁸ Ta ra Pedro tyitu ra yihí Tatyí li Nyoo. Ta catyí ra chi ra:

—Nyoho ra nyacá ñaha Israel ñuu yo ihya. Ta nyoho ra chahnu. ⁹ Vityin ndacá tuhun ndo chi ndi tuhun vaha cha cuví chi noo ra coxo ihya, vatyí cuñí ndo coto ndo yoso caa nduvahá ra. ¹⁰ Yucuan chaha cunacatyí ndi chi ndo tacuhva nacoto tandihi ñáyivi Israel. Vatyí ra ihya nanyaa ra nuu tandihi ndo. Vatyí nduvahá ra chihin tun-yee iñi ra Jesucristo ra ñuu Nazaret, ra cha chahá cuenda ndo vatyí cúvi ra nu cruzi. Soco Nyoo sanandotó ra chi ra. ¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotyíño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña cuñí ndo yuu cha chiñuhu ca cuan. ¹² Vatyí yori inga ra cuví sacacú chi yo. Vatyí noo tuhun ri maa ra chahá Nyoo vatyí sacacu ra chi yo. —catyí ra Pedro chi ñu.

¹³ Tyicuan ta cachiñi ra cacuví tyiño cuan vatyí ñi xaan iñi ra Pedro ta ra Juan cacahan ra. Ta ñima ra cañohó vaha sicuela cacuví ra. Ta iyo xaan cuñi ra. Tyicuan ta nichon nuu ra chi ra vatyí ican ra cuví ra cha cachicá noo chihin ra Jesús. ¹⁴ Ta siin ri, ra cha nduvahá cuan, nanyaa ra chihin ra yucuan. Yucuan chaha ña cuví cahan ña vaha ra cacuví tyiño cuan siquí ra Pedro ta ra Juan. ¹⁵ Tyicuan ta catyí ra chi ra naquita coyo ninduñi ra chata vehe. Ta candog maa ra cacuví tyiño cuan candatuhun tahan ra. ¹⁶ Ta catyí ra:

—¿Yoso caa cunyacuví yo chihin ra ihya? Vatyí tandihi maa ñu Jerusalén chitó ñu seña cha casacuví ra ihya. Ta ma cuví catyí yo vatyí ña ndicha. ¹⁷ Soco tacuhva cha ma cono tuhun ihya nicahnu chichi ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —cacatyí ra.

¹⁸ Tyicuan ta cacana ra chi ra Pedro ta ra Juan. Ta catyí ra chi ra vatyí ni chii ca maa ta ma cahan ca ra tuhun ra Jesús. Ta ma sañaha ca ra chi ñáyivi. ¹⁹ Soco ra Pedro ta ra Juan canacahan ra ta catyí ra:

—Ndíchi xiñi nyoho ta nyehe ndo tatu vaha ca cha quichaha ndi chi maa ndo o

vaha ca cha quichaha ndi chi Nyoo. ²⁰ Vatyí nyuhu ma cuvi cha sandihí ndi cha nacatyí ndi tuhun cha nyehe ndi ta chinií ndi —catyí ra.

²¹ Tyicuan ta nacatyanaha tucu ra chi ra. Soco saña ra chi ra vatyí ña ñihí ra cuhva tachi tuñi ra chi ra. Vatyí tandihí ñáyivi sacahnú ñu chi Nyoo cha cuenda cha cuví cuan. ²² Vatyí rayii cha nduvaha cuan, yaha ca uvi xico cuiya ra, ta tyicuan cuiya nyehe ra tindoho ta nduvaha ra saha Nyoo.

Nu chicgn ñu yihí cuenda ra Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandihí cha cacatyí ra chahnu ta ra cacuví nuu chi tata sutu chi ra. ²⁴ Cuhva cha cachiñií ñu tuhun ihya tandihí ñu ta iin ri quichaha chican tahvi ñu chi Nyoo. Ta catyí ñu:

—Sutu Mañi yuhu, yoho savahun andivi ta ñuhu ñayivi. Savahun tyañuhu. Ta tandihí ca cha iyó, maun savaha. ²⁵ Ta yoho chihin Tatyí iun sacahun chi ra David ta cha naha. Ta catyí ra:

¿Ñáá tuhun cha naquiquí ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha siquí ñuhu ñayivi ihya candu cuita ra sicun Sutu Mañi yuhu, ta siquí ra Cristo, catyí ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu iin ri ra ñuu Jerusalén ihya chihin ra ñuu Roma ta chihin ra Israel vatyí cahni ra chi ra Jesús Sehe iun cha cachí vahun. ²⁸ Ta tyicuan caa ta casacuví ra, tari cuhva cha catyí maun ta cha naha tyi cucuvi. ²⁹ Ta vityin, Sutu Mañi yuhu, nyehe cha tyanaha ra chi ndi. Ta cuhva cha cuñi ca iñi ndi tyi tyiño nuu maun sacuvi ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi. ³⁰ Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee iñi ra Jesús Sehe iun —catyí ñu chicán tahvi ñu.

³¹ Ta cuhva cha ndihí savaha ñu oración ta taan nu nyicu ñu. Ta tandihí ñu chitu ñu chihin Tatyí li ta cahan ñu tuhun Nyoo chihin cha ñi iñi ñu.

Ñahri cha cumañi chi ñu yihí cuenda Nyoo

³² Tandihí ñu cha chinó iñi, iin ri cuví ñu, ta iin ri cuhva chicá xiñi ñu. Ni noo ñu ta ña catyí ñu vatyí chi maa ñu cuví cha iyó chi ñu, soco chi tandihí ñu cuví, catyí ñu. Vatyí iin ri nyicú ñu. ³³ Ta chihin tunyee iñi cahnu, cacahán ra apóstol tuhun cha nandoto Sutu Mañi yo Jesús. Ta Nyoo nasoco xaan ra chi tandihí ra. ³⁴ Ta ni noo ñu ta ñahri cumañi chi ñu vatyí tandihí ñu cha iyó vehe o ñuhú, xicó ñu. Ta quichi nyacá ñu xuhun. ³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chihuhú chi ñu. ³⁶ Tyicuan caa sacuví noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyí sivi cuan: Ra Naquehen Ndahvi. ³⁷ Ta ra Bernabé cuan xico ra ñuhú ra. Ta chahá ra xuhun cuan chi ra apóstol.

5

Cuatyí ra Ananías ta cu Safira

¹ Soco noo ra cha nañi Ananías chihin cu Safira ñasihi ra, xico ñu noo ñuhú. ² Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyí ra vatyí tandihí xuhun cha quiyahvi ñuhú cuví cuan. ³ Tyicuan ta catyí ra Pedro chi ra:

—Yoho Ananías, ¿Ñáá tuhun cha chahun cha quihvi ra ña vaha añimon, vatyí cuñún sandavi ñahun chi Tatyí li, ta catyún vatyí tandihí xuhun cha quiyahvi ñuhu cuví ihya ta ndoún chihin suhva? ⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyi tandihí xuhun chahun? Ñima chi nyuhu sandavi ñahun, chi Nyoo sandavi ñahun —catyí ra Pedro chi ra Ananías.

⁵ Cha chinií ra Ananías tuhun cha cahan ra Pedro, nduva ra ta chihí ra. Ta quichi noo cha yuhvi cuñi ñáyivi cha chito ñu tuhun ihya. ⁶ Tyicuan ta quichi coyo suhva ra tyivaa ta tyihí ra coño ñuhu ra chichi noo sahna. Ta chahan ra chityihí ra chi ra chichi ñuhú. ⁷ Yaha noo uñi hora ta chaa ñasihi ra Ananías ta quihvi ña nu nyicú ra apóstol. Soco ña chito ña cha cuví cuan. ⁸ Ta quichaha ndaca tuhun ra Pedro chi ña ta catyí ra:

—¿Atu tyehe cuví yahvi cha quiyahvi ñuhú ndo? —catyí ra.

Ta nacahan ña ta catyí ña:

—Ay, tyehe cuví yahvi chi —catyí ña chi ra.

⁹Tyicuan ta catyí ra Pedro chi ña:

—¿Ñáá tuhun cha ñohó naha ndo tuhun ta sandavi ñaha ndo chi Tatyí li Sutu Mañi yo Nyoo? Cha cuandichi coyo ra cha chahan chityihi chi yíun chichi ñuhú. Ta vityin cuhun tucu ra cutyihí ra chi yoho —catyí ra Pedro chi ña.

¹⁰Caa cuhva ri cuan ta nduva ña chaha ra Pedro, ta chihí ña. Ta caquihví coyo ra tyivaa cuan, ta nyehe ra vatyí chihí ña. Ta canacöhehe ra chi ña ta chityihí ra chi ña xiin yí ña. ¹¹Ta tandihí ñáyiví yihí cuenda ra Cristo, ta tandihí ca ñu chitó tuhun cuan, canayuhvi xaan ñu.

Cuaha milagru ta seña sacuvi ra apóstol

¹²Cuaha seña ta milagru sacuvi ra apóstol sahá Nyoo nu nyicú ñáyiví. Ta tandihí ñu yihí cuenda ra Cristo ndu iin ri ñu nu cuví corredor ra Salomón. ¹³Ta ni nonga ñu cha inga cuenda ta ña cañá iñi ñu cutahan ñu chihin ñu yihí cuenda ra Cristo. Soco vaha cahán ñáyiví siquí ñu. ¹⁴Ta cuaha xaan ñáyiví nachinó iñi chi Sutu Mañi yo Jesús, tari rayí ta ñusihí. ¹⁵Ta nyacua tavá ñu chi ñu cuhví ityí cahnu, chacún ñu chi ñu nu chito. Vatyí tatu yaha ra Pedro soco vasi xiñahñu ra yaha siquí ñu, ta nduvaha ñu. ¹⁶Tyicuan tucu ñu iyó yatyin ri Jerusalén cuan, quichí nyaca ñu chi ñu cuhví ta ñu cha yihí tatyí ña vaha chi. Ta nduvaha tandihí ñu.

Nu nyehé ra Pedro ta ra Juan tindhó

¹⁷Tyicuan ta ra cuví nuu chi tata sutu, ta ra cayihí cuenda ra cuví saduceo, quiñi cuñi ra nyehe ra chi ra apóstol cha cuenda cha vaha cha casacuví ra chihin tunyee iñi chahá Nyoo chi ra. ¹⁸Tyicuan ta catiñ ra chi ra apóstol. Ta catyihí ra chi ra vehe caa. ¹⁹Soco cha cuaa cuan quichí noo ángel cha tachi Sutu Mañi yo, ta nuñá ra yuvehe caa cuan. Ta tavá ra chi ra. Ta catyí ra chi ra:

²⁰—Cuahan ndo ta cuñanyaa ndo chichi vehe ñuhu cahnu. Ta ñacatyí ndo chi ñáyiví yoso caa cuví coo ñu ñáyiví chaa cha iyó ndo —catyí ángel cuan chi ra.

²¹Cha cachiñi ra tuhun cahan ángel cuan, ta cuahan coyo ra. Ta ñaha cuií ri quihví coyo ra chichi vehe ñuhu cahnu. Ta quichahá sañaha ra chi ñáyiví. Ta cha ni ri ca cha sañahá ra apóstol cuan, ndu iin ri ra cuví nuu chi tata sutu ta ra ndihí chihin ra. Ta caná ra chi ra cacuví tyiño cuenda ñáyiví Israel vatyí coo ra junta. Tyicuan ta tachi ra na cuquehen chi ra apóstol nu cañohó ra vehe caa cuan. ²²Soco cuhva cha chaá coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu.

²³Ta cacatyí ra chi ra:

—Nyasi yuvehe caa cuan ta chaá ndi. Ta sindaro, tayucú ra yuvehe casahá cumi ra. Soco cuhva cha nuñá ndi, ña nañihí ndi chi ni noo ra chichi vehe caa cuan —catyí ra chi ra.

²⁴Cuhva cha cachiñi tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñí ra. Ta candatuhun tahan ra yoso caa sacuvi ra ta cundiñi tuhun cuan. ²⁵Tyicuan ta chaá noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyiví —catyí ra.

²⁶Tyicuan ta ra cuví nuu chi ra casahá cuenda vehe ñuhu, chahan ra chihin policia, ta chiquehen ra chi ra chihin cha víi ri ta ña cañi ra chi ra, vatyí yuhví ra chi ñáyiví coto tuchi ñu yuu chi ra. ²⁷Chinyaca ra chi ra nuu ra cacuvi tyiño vehe ñuhu cahnu. Ta ra cuví nuu chi tata sutu catyí ra chi ra:

²⁸—Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihí maa chichi ñuu Jerusalén sacotó ndo tuhun ra. Ta cuñí ndo natyaa ndo siquí ndi vatyí nyuhu chahñi ndi chi ra cuan —catyí ra cuví nuu chi tata sutu chi ra apóstol.

²⁹Tyicuan ta nacahan ra Pedro ta inga ra apóstol, ta catyí ra:

—Nyaá siquí ndi cha quichaha xihna ca ndi chi Nyoo ta ñima ca chi rayí. ³⁰Nyoo cuenda sutu chahnu yo ican sanandotó chi ra Jesús, ra cha chitacaá ndo nu cruzi ta chahñi ndo chi ra. ³¹Ta ra Jesús ican ra cuví ra cha sacahnú xaan Nyoo chi, ta cuatyaa ra chi ra chiyo vaha ra, vatyí cunyaca ñaha ra tandihí. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu

uvi iñi yo cuatyí yo tacuhva saha ra ticahnu iñi cuatyí yo. ³²Ta nyuhu cuví ndi cha ndaa cuenda ihya. Ta tyicuan caa tucu Tatyí li cha chahā Nyoo cunyaa añima ñu quichahā chi ra —catyí ra Pedro chi ra.

³³Ta cha cachiñi ra cha catyí ra Pedro, nduxaan xaan ra. Ta cuñi ra cahñi ra chi ra. ³⁴Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyivi sahá xaan ñu ñáyivi chi ra. Ta ra Gamaliel cuan, nicuinanyaa ra. Ta tachi ra naquita coyo ra apóstol cuan noo cuhva ri. Tyicuan ta quita coyo ra. ³⁵Ta quichahā catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña. ³⁶Ñicohon iñi ndo vatyí cha iyó suhva quívi ndicuitá noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayii chinyicon chi ra. Soco yaha cuan chahñi ñáyivi chi ra. Ta tandihi ra chinyicon chi ra nacutya cuatyí ra. Ta ndihi tuhun. ³⁷Yaha cuan ta nu cuahan ca chi, quívi nacahvi ra gobiernu chi ñáyivi, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri chahñi ñáyivi chi ra. Ta tandihi ñu cha chinyicon chi ra chitya cuatyí ñu. ³⁸Yucuan chaha saña ndo chi ra chiña. Ta ma tyihi ndo chi ndo chihin ra vatyí tatu tuhun ñáyivi ri cuví cha chicá noo ra, cundihi tuhun. ³⁹Soco tatu ndicha tyi tuhun Nyoo cuví, ma cuví chi nyoho sativi ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰Tandihí ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasí ra nu cahan ca ra tuhun ra Jesús. Tyicuan ta saña ra chi ra. ⁴¹Ta quita coyo ra apóstol nuu ra cuví tyiño. Ta sii xaan cacuñi ra vatyí chahā Nyoo cuhva vatyí nyehé ra tindoho cha cuenda ra Jesús. ⁴²Ta ña casandihí ra cha cacahán ra. Ta ndiquivi ri sañahá ra tuhun ra Jesucristo vehe ñuhu ta vehe ñáyivi ñandihí.

6

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

¹Ta nu cuahan ca chi quívi cuaha xaan nanduví ñáyivi cha yihí cuenda ra Cristo. Tyicuan ta ñu cha cahán sahan griego quichahā cahan ñu siqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo chi ñu chihí yíi cuenda ñu, cuhva cha sachá ra cha cacachi ñu ndiquivi ri. ²Tyicuan ta ndi uchi uvi tahan apóstol sandu iin ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo. ³Yucuan chaha yañi, nanducu ndo ucha tahan ra nu canycú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí li. Ta cuhva yo tyiño ihya chi ra. ⁴Ta nyuhu sañihí ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵Tandihí ñu ndoo ñu vaha. Ta nacachí ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí li. Ta nacachí tucu ra chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel. ⁶Tyicuan ta quichí nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷Ta cuahan chitya ca tuhun Nyoo. Ta nducuahā ca ñu yihí cuenda ra Cristo ñuu Jerusalén. Ta na chingo iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyivi cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nycú ñáyivi. ⁹Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyivi Ndo Libre, candu iin ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichahā cuvi yuhu ra chihin ra Esteban. ¹⁰Soco ña cacuví chasaha ra chi ra, vatyí ra Esteban cahán ra chihin cha chiñi tuñi cha chaha Tatyí li chi ra. ¹¹Tyicuan ta catyiyahvi ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra siqui

ra Moisés, ta síqui Nyoo. ¹² Yucuan chaha tandihi ñáyivi cuan naquiqui ñu. Tyicuan ta ra chahnu ta ra sacuahá cuenda ley ra Moisés, catiñ ra chi ra Esteban. Ta chahān ra chinyaca ra chi ra nu ndu iñ ri ra cuví tyiño cuenda vehe ñuhu ñu Israel. ¹³ Ta canducy ra chi ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra síqui vehe ñuhu yo ta síqui ley ra Moisés. ¹⁴ Ta chihí ndi cahan ra vatyí ra Jesús ra Nazaret cuan cusatani ra vehe ñuhu cahnu ihya. Ta cunasama ra costumbre cha sandoō ra Moisés chi yo na —catyí ra cuendu cuan síqui ra Esteban.

¹⁵ Tyicuan ta ra cacuví tyiño ta ra canyicú yucuan canyehe ra chi ra Esteban vatyí tari maa nuu ángel tyicuan caa nuu ra cuhva cuan.

7

Nu cahan ra Esteban tuhun Nyoo chihin ñáyivi nducú cahñi chi ra

¹ Tyicuan ta ra cuví nuu chi tata sutu ndacā tuhun ra chi ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutu yo Nyoo cha cahnu ca tuví ra nuu sutu chahnu yo, ra Abraham quivi nyaá ra ityi Mesopotamia cha niri ca cha cumañi cucoo ra nya ñuu Harán. ³ Ta catyí ra chi ra: “Sandoo ñuun, ta chi tandihi ñáyivi chuun. Ta cunuhu inga ñuu cha cusañahi chuun”, catyí Nyoo chi ra Abraham. ⁴ Tyicuan ta ra Abraham quita ra ñuu Caldea ityi Mesopotamia cuan, ta cuanuhu ra nya ñuu Harán. Ta yucuan cuví nu chihí sutu ra. Yaha cuan saquichi Nyoo chi ra ñuhú nu iyó yo vityin. ⁵ Soco ñahri ñuhú chahā Nyoo chi ra quivi cuan. Ni noo nu cuinanyaa chaha ra ta ña chahā ra. Soco catyí Nyoo chi ra vatyí cucuhva ra. Ta cutahan chi chi sehe ra chata cha yaha cúvi ra. Tyicuan caa catyí Nyoo chi ra Abraham, vasi ta coo ca sehe ra quivi cuan. ⁶ Ta siñ ri catyí Nyoo chi ra vatyí ñáyivi chi ra cucoo ñu inga ñuu. Ta cusacuví ñu tyiño nuu ñáyivi ñuu cuan, ta ma tityahvi ñu chi ñu. Ta cunyehe ñu tindoho cumi cientu cuiya. ⁷ Soco catyí tucu Nyoo chi ra tyehe caa: “Ñáyivi ñuu cuan cusanyehe ñu

tindoho chi ñáyivi chuun. Yucuan cuenda cuatachi tuñi yuhu chi ñu. Ta yaha cuan ta cuquita ñáyivi chuun ñuu cuan ta cuquichi ñu ihya. Ta cusacuví ñu tyiño nuu mai ihya”, catyí Nyoo chi ra Abraham.

⁸ Tyicuan caa natyihí tahanan Nyoo tuhun chihin ra. Ta chahā Nyoo noo costumbre cha cuasacuví ñu coto naa iñi ñu. Chahā ra tyi cutahnya chiin ñii xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yaha uña quivi cha cacū ra Isaac sehe ra Abraham, tyicuan caa chinyacuví ra chihin ra. Ta suri tyicuan caa sacuví tucu ra Isaac chihin ra Jacob sehe ra. Ta ra Jacob tucu chihin uchi uvi tahanan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹ Ta ican uchi iñ tahanan ra sehe ra Jacobo ihya catasi cuñí ra nyehe ra chi ra José yañi ra cha cuenda vatyí vaha ca ra nuu sutu ra. Yucuan chaha caxico ra chi ra na cahun ra Egipto. Soco Nyoo ña sandoó ra chi ra José. ¹⁰ Ta sacacū ra chi ra nu nyehé ra tindoho. Ta chahā ra cha chihí tuñi ra chi ra. Ta chahā ra cha vaha coo ra nuu ra Faraón, ra cuví rey Egipto. Ta rey cuan chahā ra cha cuvi ra José gobiernu Egipto cuan. Ta chinyacā ñaha tucu ra vehe maa rey ñandihí.

¹¹ Tyicuan ta chiyó tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihi sutu chahnu yo cha chicoo tyambu cuan ña cañihí ra cha cachi ra. ¹² Soco quivi chito ra Jacob vatyí iyó trigu nya Egipto, ta tachí ra chi sehe ra na cuquehen ra. Ta chahān coyo ra noo chaha. ¹³ Ta cha cu uvi chaha cha chahān coyo ra, ra José sacoto ra chi ra vatyí yañi ra cuví chi ra. Yucuan quivi chito ra Faraón yóo chi tata vachi ra José. ¹⁴ Tyicuan ta tachí ra José tyiño na quichi sutu ra, ra Jacob, chihin tandihi ñáyivi chi ra, uñi xico chahun tahanan ñu. ¹⁵ Ta tyicuan caa cuvi cha cuahan ra Jacob cuacoo ra Egipto cuan. Yaha cuan ta chihí ra yucuan. Ta chihí tucu sehe ra, ra cacuví sutu chahnu yo. ¹⁶ Tyicuan ta chahā quivi cha chinanyacā ñu yiquí ra Jacob ta yiquí sehe ra nya Siquem. Ta yucuan quihvi ra chichi ñuhú nu satā ra Abraham noo ñaña chi sehe ra Hamor ta cha ñaña.

¹⁷ Soco cha ni cumañi ca quita ñu Egipto, ñáyivi chi ra Abraham cha iyó Egipto cuan cuaha xaan nanduví ñu. Ta cha nyaña

yatyin quivi cha cuacuhva Nyoo ñuhú chi ñu tari cuhva catyi cachi ra chi ra Abraham.¹⁸ Tyicuan ta quichaha nyaca ñaha noo rey cha ña ñohó nuu chi ra José.¹⁹ Rey cuan sandavi ñaha ra chi ñáyivi chi yo cuan. Ta sanyehé xaan ra tindoho chi ñu, ta saniñi ra chi ñu na sanandoo ñu chi sehe ñu cha ni cacu vatyi na cúvi ndotyin.²⁰ Ta suri quivi cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña.²¹ Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra.²² Yucuan chaha cutuhva ra Moisés tandihí cha chitó ñu Egipto. Ta siin ri nyee xaan cuhva cahan ra, ta cuhva sacuví ra ñandihí.

²³ Ta quivi cha chaq uvi xico cuiya ra Moisés quichi cuvi iñi ra cahun ra cunyehe ra nu nyicú ñu Israel, ñáyivi chi ra.²⁴ Tyicuan ta noo quivi nyehé ra nu cañí noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vatyi sata si iñi ra chi ra Israel ra ñuu ra.²⁵ Cuñí maa ra Moisés cuan vatyi ñáyivi Israel cuan cutuñi iñi ñu tyi Nyoo tachi chi ra vatyi cusacacu ra chi ñu. Soco maa ñu ña tuví iñi ñu cha tyicuan caa cucuvi.²⁶ Tyicuan ta cha inga quivi cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: “Ña vaha cha cacañi tahan nyoho, vatyi suri yañi ndo cuvi”, catyi ra chi ra.²⁷ Tyicuan ta ra cha cañí chi tahan cuan tyandahá ra chi ra Moisés, ta catyi ra chi ra: “¿Yóó cha tyatyíño chi yoho vatyi cunyaca ñahun ta cuvun juez chi ndi? ²⁸ ¿Atu cuñun cahñun chii tari chahñun chi ra Egipto cuan icu?” catyi ra chi ra Moisés.²⁹ Cuhva cha chiñi ra Moisés cha catyi ra, chino ra. Ta cuahan ra nya ñuu Madián. Yucuan ñihí ra ñasihi ra. Ta yucuan chiyo uvi tahan sehe ra.

³⁰ Yaha uvi xico cuiya. Tyicuan ta noo quivi chicá noo ra Moisés chiqui ndii yatyin noo yucu cha nañí Sinaí. Ta nyehé ra noo taca iñu cha cayú. Tyicuan ta tuví noo ángel chichi ñuhú cha cayu cuan.³¹ Iyo xaan cuñí ra Moisés cha nyehé ra yucuan. Ta cuhva cha tuhva yatyin ca ra vatyi tacuhva nyehé vaha ra, chiñi ra noo ndusu Sutu

Mañi yo. Ta catyi ra tyehe caa: ³² “Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob”, catyi Nyoo chi ra. Tyicuan ta ra Moisés quichaha nihi ra chihin cha yuhvi ra. Ta ña caña iñi ra nanyehé ra.³³ Ta quichaha catyi tucu Sutu Mañi yo chi ra: “Tava ndichan chahun vatyi ñuhú nu chañun, ñuhú ii cuví.³⁴ Yuhu nyehí tandihí tindoho cha nyehé ñáyivi cuende ñuu Egipto chiña. Ta chiñi ndusu ñu cha chacú chaa ñu. Yucuan chaha noó xique vityin vatyi sacaqui chi ñu. Ñaha, vatyi cutachi chuun nya Egipto”, catyi Nyoo chi ra Moisés.

³⁵ Quivi cuan ña cuñi ñáyivi Israel chi ra Moisés cha cunyaca ñaha ra chi ñu, ta catyi ñu chi ra: “¿Yóó cha tyatyíño chi yoho vatyi cunyaca ñahun ta cuvun juez chi ndi?”, catyi ñu chi ra. Ta vasi ña cuñi ñu cha cunyaca ñaha ra chi ñu, soco Nyoo tachi chi ra vatyi cuvi ra nuu, ta sacacu ra chi ñu. Vatyi tyicuan caa catyi ángel cha tuví nuu ra nu taca iñu cha cayu cuan.³⁶ Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuví tucu ra nu yaha ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuví tucu ra ñandihí.³⁷ Ta suri maa ra Moisés cuan cuví ra cha catyi chi ñu Israel ta cha naha tyehe caa: “Nyoo cutachi ra noo profeta ra tari tachi ra chi mai. Ta cucuvi ra noo ra Israel tari maa ndo. Quichaha ndo chi ra”, catyi ra.³⁸ Ta suri maa ra Moisés cuan ndihí ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha cahan ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chi yo.

³⁹ Soco ñáyivi chahnu yo ña quichaha ñu chi ra. Tava xiin ñu chi ra. Ta cacuñi ñu cunuhu coyo ñu nya Egipto.⁴⁰ Yucuan chaha culva cha nyaá ca ra Moisés yucu Sinaí ta cahan ñáyivi chihin ra Aarón ta catyi ñu: “Savahun sulva nyoo cha cahun coyo ityi nuu ndi. Vatyi ña chitó ndi ñáá cha cuví chi ra Moisés, ra cha tava chi ndi Egipto”, catyi ñu.⁴¹ Tyicuan ta casavaha ñu noo becerru xuhun cuan. Tyicuan ta cachahñi ñu quiti vatyi culva cuenda ñu chi xitohyo cuan. Ta sii xaan cuñi ñu cachiyo ñu vico cuenda xitohyo cha casavaha ñu chihin ndaha ñu.⁴² Tyicuan ta

Nyoo cuachiyo ra chi ñu. Ta saña ndaha ra chi ñu vatyí cusacahnu ñu chi ñanyii, chi yoo, ta ñáá ndihi tiño cha iyó ityi andivi. Vatyí tyehe caa catyáa ra profeta cuenda Nyoo nu libru ta cha naha:

Nyoho ñáyivi Israel, ¿atu chahñi ndo quití vatyí cuhva cuenda ndo chi yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnú ndo chi nyoo cha nañi Moloc, ta sacahnú tucu ndo chi nyoo cha nañi Renfán cha caá tari caá tiño andivi.

Suri maa ndo savahá xitohyo cuan, vatyí sacahnú ndo.

Yucuan chaha yuhu cuatave chi ndo ñuu ndo, ta cuasacuhin chi ndo noo nu cañi ityi nuu ca Babilonia, catyi Nyoo chi ñu.

⁴⁴ Nu chicá noo sutu chahnu yo ñuhú ityi cuan, chicumi ra noo vehe ñuhu cha chinó chihin ñii quití. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañahá maa Nyoo chi ra. ⁴⁵Yucuan ta ra Josué nanduví ra nuu chi ñu. Ta quehen ñu vehe ñuhu ta chicoo ñu chihin nu nyaá yo ihyá vityin. Vatyí Nyoo tavá ñehe ra chi ñáyivi chiyo ñuhu ihyá ta nacuhvá cuenda ra chi ñu Israel ñáyivi chi yo. Ta chotyíño ñu vehe ñuhu cuan nyacua nya quivi chiyo rey David. ⁴⁶Ta rey David ñihí ra tumañi iñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihyá sacahnú ra Jacob ta cha naha. ⁴⁷Soco ra Salomón savahá vehe Nyoo. ⁴⁸Vasi ña iyó Nyoo chichi vehe ñuhu cha savahá ñáyivi. Tari catyi ra chihin yuhu ra profeta ta cha naha tyehe caa:

⁴⁹ Andivi cuví tyayu nu nyaí ta nyacá ñahi tandihí. Ta ñuhu ñáyivi, yucuan cuví nu chañi chahi.

¿Atu cuví savaha ndo vehi ta coi chichi, cuñi maa ndo?

¿Ta nya maa maa cuvi nyitati, cuñi maa ndo?

⁵⁰ ¿Atu ña chitó ndo vatyí mai savahi andivi ta ñuhu ñáyivi? catyi Nyoo.

⁵¹ Soco nyoho —catyi ra Esteban— tyicuan ri tuhvá ndo sandava ndo iñi ndo. Ta ña cuñi ndo naquehen ndo tuhun cahán Nyoo. Tyicuan ri ña quichahá ndo chi Tatyí

li. Inuu ri caa ndo chihin sutu chahnu ndo. ⁵²Sutu chahnu ndo sataşí iñi ra ta cachahñi ra chi tandihí ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichi ra vityin, nyoho ña cuñi nyehe ndo chi ra, ta cachahñi ndo chi ra. ⁵³Nyoho naquehen cuenda ndo ley Nyoo cha chahá ángel chi ndo, soco ña cuñi ndo sacuvi ndo cuhva catyi ley cuan —catyi ra Esteban.

Nu chihí ra Esteban

⁵⁴ Cuhva cha chiñi ra cacuví tyiño vehe ñuhu cahnu tuhun ihyá, xaan xaan cuñi ra, nyacua casacahñi noho ra nyehé ra chi ra Esteban. ⁵⁵Soco ra Esteban tyitú cuii maa ra chihin Tatyí li ta nanyehé ra ityi andivi. Ta nyehé ra cha cahnu cuví Nyoo. Ta suri nyehe ra chi ra Jesús nanyaá ra chiyo vaha Nyoo. ⁵⁶Tyicuan ta catyi ra Esteban:

—¡Nyehe ndo! Nyehe tanuña andivi. Ta nyehí chi ra Jesús, Rayi cha quichi nya gloria, nanyaá ra chiyo vaha Nyoo —catyi ra Esteban.

⁵⁷Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi ra. Ta tandihí ra cuahan coyo ra siqui ra Esteban. ⁵⁸Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha casacuví cha ña vaha cuan, casandoo ra sahma cha nyaa chata ra vatyí sahacumi noo ra tyivaa cha nañi Saulo. ⁵⁹Cha niri ca cha cacañi ra yuu chi ra Esteban, quichahá chican tahvi ra Esteban chi Nyoo, vatyí tuvi iñi ra cuacuví ra. Ta catyi ra tyehe caa:

—Sutu Mañi yuhu Jesús, naquehen añime —catyi ra.

⁶⁰Yahá cuan, tyicuan ta chicuñi chiti ra, ta chaa canachaá ra ta catyi ra:

—Sutu Mañi yuhu, ma tiin cuendon cuatyí cha sacuví ñu —catyi ra.

Ta cha yahá catyi ra tyehe caa, ta chihí ri ra.

8

Nu chicá nyicon ra Saulo chi ñáyivi yihí cuenda ra Cristo

¹Ta ra Saulo ña chinó iñi ra chi ra Jesús, ta ndoó ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyí cucahñi ñu chi ñu. Soco ra apóstol ña caquita ra. Candoo ra

nyicú ra Jerusalén. Ta tandihí ca ñu cachino ñu, cuahan coyo ñu cuacoo ñu ityi Samaria, ta ityi Judea. ²Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacu xaan ra cha cuenda ra. ³Cha niri ca cha tyicuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoño ñaa ra chi ñu, ta chahá cuenda ra chi ñu vatyi cohon ñu vehe caa, rayii ta ñusihi.

Nu cacahán ñu tuhun ra Cristo ityi Samaria

⁴Soco tandihí ñu cha quitá ñuu Jerusalén, cahán ñu tuhun yoso caa sacacú ra Cristo añima ñu tandihí ri maa ityi nu chaá coyo ñu. ⁵Minoo ra cha nañí Felipe chaá ra noo ñuu ityi Samaria. Ta quichahá cahan ra tuhun ra Cristo chihin ñu. ⁶Ta tandihí ri ñáyivi ta tyasohó ñu tuhun cha cahán ra. Ta nyehe ñu milagru ta seña cha savahá ra. ⁷Vatyi cuaha vavaha ñáyivi cha yihí tatyí ña vaha chii nduvaha ñu. Vatyi tatyí ña vaha cha yihí chi ñu, quitá chi ta suri canachaa chi cuahan chi. Ta cuaha vavaha ñáyivi coxo ta ñáyivi cha ña cuví nacanda, nduvaha ñu. ⁸Yucuan chaha ñáyivi ñuu cuan, sii xaan cacuví chi ñu.

⁹Soco ñuu Samaria cuan iyó noo ra tasi cha nañí Simón. Ta sandaví ñaha ra chi ñáyivi cuan. Catyí ra vatyi cuví ra noo ra cahnu. ¹⁰Ndii cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyi tunyee iñi Nyoo nyaá chihin ra ihya —catyí ñu.

¹¹Quichahá xaan ñu tuhun cahán ra vatyi cha naha xaan sandaví ñaha ra chi ñu chihin tuhun tasi. ¹²Tyicuan ta quichí ra Felipe. Ta sacoto ra chi ñu yoso caa nyacá ñaha Nyoo añima ñáyivi. Ta yoso cuhva cha cahnu cuvi ra Jesucristo. Ta yucuan ta chino iñi ñu chi ra Cristo, rayii ta ñusihi. Ta condutyá ñu. ¹³Nyacua nya ra Simón cuan, ta nachingo iñi ra chi ra Cristo, ta condutyá ra. Ta quichahá chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuví ra Felipe cuan.

¹⁴Tyicuan ta ra apóstol cha canyicú ñuu Jerusalén cuan ñihí ra tuhun cha canachinó iñi ñáyivi ityi Samaria cuan tuhun Nyoo. Ta catachí ra chi ra Pedro ta chi ra Juan.

¹⁵Cuhva cha chaá coyo ra yucuan, ta chican tahvi ra chaha ñu quihvi cuenda ra Cristo vatyi tacuhva tyi naquehen ñu Tatyí li. ¹⁶Vatyi ñu cuan, ta naquehen ca ñu Tatyí li. Tacuhva condutyá ri ñu chihin sivi Sutu Mañi yo Jesús. ¹⁷Tyicuan ta ra Pedro ta ra Juan catyiso ra ndaha ra siqui ñu, ta naquehen ñu Tatyí li. ¹⁸Ta ra Simón cuan nyehe ra cuhva cha catyiso ra apóstol ndaha ra siqui ñu cuan, ta naquehen ñu Tatyí li. ¹⁹Ta quichahá catyi ra tyeha caa:

—Yoso xuhun cuñi ndo ta cuhva ndo tunyee iñi chiña chii, vatyi tacuhva cuvi tyise ndahi siqui ñáyivi, ta naquehen tucu ñu cuan Tatyí li —catyi ra Simón cuan chi ra apóstol.

²⁰Tyicuan ta nacahan ra Pedro ta catyí ra:

—Na cunaun iin ri chihin xuhun chiña. Vatyi chicá iñun tyi cuví sata yo chihin xuhun nyatu cha chahá maa Nyoo chi yo. ²¹Yoho, ña tahán chi tyihun chuun chihin tuhun ihya. Vatyi añimon ña vaha nuu Nyoo. ²²Ndu uvi iñun cuhva chicá xiñun chiña, vatyi cahnu cha quiñi caa cuví cuan nuu Nyoo. Ta cacan tahvi chi ra na nyehe yo tatu saha ra ticahnu iñi chuun cha cuenda cha caa chichi añimon. ²³Vatyi nyehí tyi chichi añimon tyitú maa yihí cha quiñi caa cha cuvi tari cha uva. Ta cha quiñi caa cuan, ña chahá coton cha vaha. —catyí ra Pedro chi ra Simón cuan.

²⁴Tyicuan ta nacahan ra Simón ta catyí ra:

—Cacan tahvi maa ndo cha cuende nuu Nyoo, ta cuhva cha ma quichi tandihí tuhun cha catyún chiña siqui —catyí ra Simón chi ra Pedro.

²⁵Cha yahá cuan ta ra apóstol nacatyí ra tandihí cha nyehe ra cha sacuví ra Cristo. Ta cahan ra tuhun Nyoo. Tyicuan ta cuanuhú coyo ra nya Jerusalén. Ta suri sacoto ra tuhun yoso caa sacuví yo ta cacu añima yo tandihí ñuu ityi Samaria nu yahá ra.

Nu cahán ra Felipe tuhun Nyoo chihin noo ra Etiopía

²⁶Cha yahá tuhun cuan tyicuan ta cahan noo ángel Nyoo chihin ra Felipe, ta catyí ra: —Ndicuita ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yahá noo ñuhú ityi.

²⁷Tyicuan ta ra Felipe ndicuita ra ta cuahan

ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuví ra noo ra cuví tyiño cahnu ñuu Etiopía, vatyí sahá cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnú ra chi Nyoo nya Jerusalén. ²⁸ Ta ityi cuanuhú ra nya ñuu ra nyaá ra siquí carru ra. Ta sacuahá ra libru cha tyaa ra Isaías ra profeta cuenda Nyoo ta cha naha. ²⁹ Tyicuan ta Tatyí li catyí chi ra Felipe:

—Sátuhva ca nu cuahan carru cuan.

³⁰ Ta cuhva cha tuhva ra Felipe, chiñi ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra:

—¿Atu cutuñi iñun cha sacuahún? —catyí ra.

³¹ Tyicuan ta nacahan ra cuan ta catyí ra:

—¿Yoso caa cutuñi iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³² Ta nu cuahan sacuahá ra, catyí chi tyehe caa:

Chahñi ra chi ra tari chahñi ra noo mbee.

Vatyí tari ña chacú mbee tatu cuasatya ra ixi ti, ta tari ña chacú ti tatu chahñi ra chi ti, tyicuan caa cuví ra cuan tyi nyehé ra tindoho ta ñahri maa catyí ra.

³³ Sanocueé ñu chi ra ta yori cuñi sacacu chi ra.

¿Yóó ra cuvi nacatyí tuhun sehe ra cha cuacoo?

Yori, vatyí chihí ra.

Catyí chi nu tutu cha sacuahá ra cuan.

³⁴ Tyicuan ta ra cuan quichahá ndaca tuhun ra chi ra Felipe, ta catyí ra:

—Saha tumañi iñi chii, ta catyun chiin chii yóó chi tuhun cahán ra profeta ihya. ¿Atu tuhun maa ra, o yóó chi tuhun cahán ra? —catyí ra chi ra Felipe.

³⁵ Tyicuan ta ra Felipe quichahá cahan ra siquí tuhun cha cha yahá sacuahá ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo. ³⁶ Tyicuan ta cha cuayahá ra noo nu ñohó ndutya. Ta ra cuan quichahá catyí ra chi ra Felipe:

—Ihya ñohó ndutya. ¿Atu ma cuvi condutye vityin? —catyí ra.

³⁷ Tyicuan ta nacahan ra Felipe, ta catyí ra:

—Tatu chinó iñun chihin cha tandihí añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuñi ra carru cuan. Tyicuan ta canoo nduvi tahan ra. Ta caquihvi ra chi ndutya. Tyicuan ta sacondutya ra Felipe chi ra. ³⁹ Ta cuhva cha caquita coyo ra chichi ndutya cuan, Tatyí li Sutu Mañi yo naquehen chi chi ra Felipe. Ta ra cuan ña nyehé ca ra chi ra. Soco sii xaan cuví chi ra, cuanuhu ra. ⁴⁰ Ta ra Felipe chaá ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha chaá ra ñuu Cesarea.

9

*Nu nachinó iñi ra Saulo chi ra Cristo
(Hch. 22.6-16; 26.12-18)*

¹ Cha ni ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu, ² chican ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tiin ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayi o ñusihi.

³ Ñihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuí ri iñi ra, ta quichi noo nduva ñuhu ityi andivi, sacundichin nicachico maa nu cuahan ra. ⁴ Tyicuan ta ra Saulo nduva ra nu ñuhú. Ta chiñi ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵ Tyicuan ta nacahan ra Saulo ta ndaca tuhun ra chi ra ta catyí ra:

—¿Yóó yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quiti tahví ñuhu chi ti cha chañi nyaa ti nu noo cha xaan cha saquehen ityi ra chi ti —catyí ra Jesús chi ra.

⁶ Tyicuan ta ra Saulo suri ñihí ra chihin cha yuhvi ra. Ta catyí ra:

—Sutu Mañi yuhu, ¿ñáá cha cuñun tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndjcuita ta quihvun chichi ñuu Damasco chihña. Ta yucuan cucatyí noo ra chuun ñáa cha cusacuvun —catyí ra Jesús chi ra Saulo.

⁷ Ra cha candihi chihin ra Saulo, yuhvi xaan ra cacuvi. Ta ña cañihí ra tuhun cahan ra vatyí cachiñi ra ndusu cuan soco yori chi nyehe ra. ⁸ Tyicuan ta ra Saulo ndicuita ra. Soco cuhva cha nuña ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindaha ra ndaha ra ta chinyaca ra chi ra ñuu Damasco cuan. ⁹ Yucuan chinyaa ra uñi tahan quivi. Ta ña cuví nyehe ra. Ta niri ña chachi ra, ta ña chihí ra ndutya.

¹⁰ Ñuu Damasco cuan iyó noo ra chinó iñi chi Nyoo. Ta nañi ra Ananías. Ta nyehe ra noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹ Tyicuan ta Sutu Mañi yo catyí ra:

—Ndjcuita, ta cahun noo ityi cahnu cha nañi Ndoo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo. ¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyeha ra inga chaha —catyí Sutu Mañi yo chi ra Ananías.

¹³ Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuví ra Saulo cuan chihin ñu yihi cuendon nya ñuu Jerusalén. ¹⁴ Ta vityin vachi tucu ra ihya vatyí chaha ra cacuví nuu chi tata sutu ityi chi ra cha tyihi ra chi ñáyivi chicán tahvi chihin sivun vehe caa —catyí ra Ananías chi Sutu Mañi yo.

¹⁵ Soco Sutu Mañi yo catyí ra chi ra:

—Cuahan vatyí yuhu cha nacachi vahi chi ra Saulo cuan, vatyí cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandihi. ¹⁶ Yuhu cusañahi chi ra yoso caa

cha cuaha tindoho cunyehe ra cha cuende —catyí Sutu Mañi yo chi ra Ananías.

¹⁷ Tyicuan ta cuahan ra Ananías vehe nu nyaá ra Saulo. Chaa ra vehe cuan ta quihvi ra chichi vehe. Ta tyiso ra ndaha ra siqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachi chii vatyí tacuhva cuví nanyehun inga chaha. Ta cusacutu ra chuun chihin Tatyí li ra —catyí ra Ananías chi ra Saulo.

¹⁸ Caa cuhva ri cuan ta cana coyo noo cha tari caa soo tiyaca cha yihi chiti nuu ra Saulo. Tyicuan ta cuví nanyeha ra inga chaha. Yaha cuan ta condutya ra. ¹⁹ Yaha cuan ta chachi ra. Ta ndunyea coño ñuhu ra inga chaha. Ta ndoo ra suhva quivi chihin ñu yihi cuenda ra Cristo ñuu Damasco cuan.

Nu quichaha cahan ra Saulo tuhun ra Cristo chihin ñáyivi ñuu Damasco

²⁰ Tyicuan ta numi ri quichaha cahan ra Saulo tuhun ra Cristo chihin ñáyivi tandihi vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra. ²¹ Ndii cuii maa ñáyivi cha chihí tuhun cahan ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi tian chi ñu ityi tyehe vatyí cucuhva cuenda ra chi ñu chi ra cacuví nuu chi tata sutu? —catyí ñu.

²² Soco ra Saulo ñihi ca cahan ra tuhun ra Cristo chihin cha ñi ca iñi ra. Ta sañahá ra vatyí ra Jesús cuví ra Cristo, Sehe Nyoo. Nyacua ña cutuñi iñi ra Israel nyicú Damasco cuan nya ityi chino iñi ra.

Nu chingo xehe ra Saulo chi ra Israel

²³ Cha yaha suhva quivi, ta ra Israel cha ña chinó iñi chi ra Cristo catyihí tahan ra tuhun cha cahní ra chi ra Saulo. ²⁴ Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan. ²⁵ Tyicuan ta ñáyivi cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanog ñu chi ra ityi ventana noo vehe cha cacú chihin barda cha nyaá nicachico yuhu ñuu cuan. Ta tyicuan caa chingo ra cuahan ra.

Nu ñohó ra Saulo Jerusalén

²⁶ Quívi cha chaq̄ ra Saulo Jerusalén, cuñi ra ndu iin ri ra chihin ñu yihí cuenda ra Cristo. Soco tandihí maa ñu cuan ta yuhví ñu chi ra. Vatyí ña chinó iñi ñu cha yihí ra cuenda ra Jesús. ²⁷ Soco noo ra cha nañí Bernabé, naquehen ra chi ra. Ta chaha cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahan Sutu Mañi yo chihin ra. Ta yoso caa cahan ra tuhun ra Cristo chihin cha ña yuhví ra nya ñuu Damasco cuan. ²⁸ Tyicuan ta ndoq̄ ra Saulo Jerusalén chihin ñu yihí cuenda ra Cristo. ²⁹ Ta cahan ra tuhun Sutu Mañi yo chihin cha ña yuhví ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducy ra cuhva yoso caa ta cacahñi ra chi ra. ³⁰ Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachí ra chi ra nya Tarso ñuu ra.

³¹ Tyicuan ta ñu yihí cuenda ra Cristo cha nyicú tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeé ca iñi ñu chihin fuerza Nyoo vatyí quichahā vaha ñu cuhva catyí Nyoo, vatyí yuhví ñu coto ma sacuví ñu cuhva cuñí ra. Iyó ñu chihin cha tyinyeé Tatyí li chi ñu. Ta cuaha xaan ñu cuahan nanduvi.

Nu nduvahq̄ ra Eneas

³² Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañí Lida. ³³ Yucuan nañihí ra chi noo ra cuhví. Nañi ra Eneas. Ta cha uña cuiya catuví ra ña cuvi nacanda ra vatyí ndundava coño ñuhu ra. ³⁴ Soco ra Pedro catyí ra chi ra:

—Yoho Eneas, ra Jesucristo sanduvaha ra chuun. Ndícuita ta natuví yuvun —catyí ra chi ra.

Tyicuan ta caa cuhva ri cuan ndicuita ra Eneas. ³⁵ Ta nyehe tandihí ñáyivi ñuu Lida cuan tyi nduvahā ra. Ta ñáyivi ñuu Sarón ñandihí. Tyicuan ta ñu cuan nachingo iñi ñu chi Sutu Mañi yo. Ta sandoq̄ ñu tuhun chahnu cha chinq̄ iñi ñu ta cumañi ca coto ñu tuhun ra Cristo.

Nu nandotō cu Dorcas

³⁶ Quívi cuan chiyo noo ñaha chinó iñi chi ra Cristo ñuu Jope. Ta nañí ña Tabita, soco chihin sahan griego, Dorcas nañí ña. Ta tyicuan ri sacuví ña cha vaha chihin ñáyivi. Tyinyeé ña chi ñu ndahvi. ³⁷ Ta quívi cuan cu Dorcas quehen noo cuehe chi ña ta chihí ña. Ta cha yahā sacutyí ñu chi ña, chicacun ñu chi ña chichi noo cuarto nu cu uvi piso. ³⁸ Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachí ñu chi uvi tahan ra na cucatyí ra chi ra Pedro vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndicuita ra ta cuahan ra chihin ra. Ta cuhva cha chaā ra, chinyaca ra chi ra nya cuarto nu caa ndiyi cuan. Ta tandihí maa ñu chihí yí catuhva ñu nicachico chata ra. Suri chacú chaā ñu. Ta sañahā ñu sahma cha quicu cu Dorcas ta chinyito ña. ⁴⁰ Tyicuan ta ra Pedro tava ra chi tandihí ñáyivi cuarto cuan. Tyicuan ta chicuñi chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichahā catyí ra chi ña:

—Hermana Tabita, ndícuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunyaā ña. ⁴¹ Tyicuan ta ra Pedro tiñn ra ndaha ña ta sandicuita ra chi ña. Tyicuan ta canā ra chi ra hermano, ta chi ñu chihí yí. Ta nacuhva cuenda ra chi ña chi ñu vatyí nandotō ña. ⁴² Yahā cuan ta ndii cuii maa ñu Jope chitó ñu cha nandotō ña cuan. Ta cuaha vavaha ñu nachingo iñi chi Sutu Mañi yo. ⁴³ Ta ra Pedro ndoq̄ ra quaha ri quívi ñuu cuan. Nyaá ra vehe noo ra satyahyu ñii. Nañí ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañí Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañí. ² Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta siñ ri cuaha vavaha xuhun chahá ra chi ñu ndahvi ñu Israel. Ta tyicuan

ri chicán tahvi ra chi Nyoo. ³ Ta cuví noo quiví cuan cuhva cha caa uñi cha cha iñi, nyehe ra noo visión. Ta yucuan cuví nu cachi xaan nyehe ra vatyi noo ángel cha tachí Nyoo quihvi nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehe ra Cornelio chi ángel cuan. Ta yuhvi xaan ra cuvi. Ta quichaha ndaca tuhun ra ta catyí ra:

—¿Náa cha cuví ihya, Tata? —catyí ra chi ángel cuan.

Tyicuan ta ángel cuan quichaha catyi ra chi ra:

—Nyoo chiní ra ra ndii cuii maa cha chicón chi ra. Ta tahán iñi ra vatyi tyinyeé xaan chi ñu ndahvi. ⁵ Ta vityin cuñí chi cha tachun tyiño nya ñuu Jope na cuquehen chi noo ra cha nañ Simón Pedro. ⁶ Ta maa ra cuan cuacatyí ra chuun ñáa cha tahán chi sacuvun. Ta iyó ra vehe noo ra cha nañ tucu Simón, cuví ra noo ra satyahyú ñii. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yahá cuahan ángel cuan, ra Cornelio caná ra chi uvi tahan musu ra, ta chi noo sindaro cha chinó xaan iñi chi Nyoo. Ta cuví tucu ra noo ra sahá cuenda chi ra Cornelio ñandíhi. ⁸ Ndií cuii tuhun cahan ángel cuan chihin ra Cornelio ta nacatyí ra chi nduñi tahan ra cuan. Ta tachí ra chi ra ñuu Jope.

⁹ Tuví inga quiví ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyi cuacacan tahvi ra chi Nyoo, ta cha cuñí hora cuví cuhva cuan. ¹⁰ Ta chaá noo soco chi ra ta chisocó vavaha ra. Soco cha niri ca cha sanduvahá ñu cha cachi ra, quichaha nyehe ra noo visión. ¹¹ Ta nyehe ra vatyi nicuitacoho andiví. Ta nyehe ra cua noo noo sahma cahnu vavaha ityi andiví. Ta tari quiví nuhñi noo noo tutun sahma cuan ta cuahan noo ityi nu ñuhu. ¹² Ta chichi sahma cuan ñohó tandíhi maa nuu quiti cha cumi tahan chaha. Ta tandíhi nuu coo, ta tandíhi nuu saa. ¹³ Tyicuan ta chiní ra noo ndusu cha catyí chi ra:

—Pedro, ndicuita ta cahñi quiti ihya, ta cahun —catyí ndusu cuan chi ra.

¹⁴ Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quiti cha catyí ley tyi yica cha cachi ndi —catyí ra Pedro.

¹⁵ Tyicuan ta quichaha catyi tucu ndusu cuan chi ra inga chaha:

—Ma catyun vatyi yica cha cahun noo cha cha yahá sanduví yuhu —catyí ndusu cuan chi ra Pedro.

¹⁶ Uñi tahan chaha sañaha Nyoo visión ihya chi ra. Tyicuan ta sahma cahnu cuan ndaa cuanuhu tucu ityi andiví. ¹⁷ Cha niri ca cha chicá xiñi ra Pedro ñáa cha cuñí chi catyi visión cuan, chaá coyo musu cha tachí ra Cornelio. Ta candaca tuhun ra nya nyaá vehe ra Simón. ¹⁸ Ta cha chaa coyo ra ityi yuvehe candaca tuhun ra tatu yucuan iyó noo ra cha nañ Simón Pedro. ¹⁹ Ta ra Pedro suri cha chicá xiñi ra ñáa cha cuñí chi catyi visión cha nyehe ra. Tyicuan ta Tatyí li quichaha catyi chi ra:

—Nyehe Pedro, uñi tahan ra nanducú chuun. ²⁰ Ndicuita ta cahun chihin ra, ta ma quihí uvi iñun vatyi mai tachí chi ra ihya —catyí Tatyí li chi ra.

²¹ Tyicuan ta ra Pedro noo ra nu canyicu ra cha tachí ra Cornelio, ta catyí ra chi ra:

—Yuhu cuví ra nanducú ndo. ¿Náa tyiño vachi ndo?

²² Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyivi cuví. Ta vaha xaan quichahá ra nu cahan Nyoo. Ta tandíhi maa ra Israel ityi Judea ihya cacuñí ra chi ra chaha cha cuenda cha vaha ñáyivi cuví ra. Ta noo ángel Nyoo catyi chi ra vatyi na cana ra chuun, vatyi cahun vehe ra vatyi tacuhva cuiñi ra tuhun cha cuacahun —cacatyí musu ra Cornelio chi ra Pedro.

²³ Tyicuan ta chahá ra Pedro quihvi coyo ra chichi vehe. Ta candoo ra chihin ra cha cuaa cuan. Ta cha inga quiví cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandíhi.

²⁴ Cha inga quiví chaá coyo ra nya Cesarea nu nyatú ra Cornelio chi ra chihin ñáyivi chi ra, ta chihin tandíhi ra tahan ra. ²⁵ Cuhva cha chaá ra Pedro vehe ra, ra Cornelio quita ra ta cahan ra chihin ra. Ta chicuñi chiti ra nuu ra ta quichaha sacahnu ra chi ra. ²⁶ Soco ra Pedro nacoñehe ra chi ra, ta catyí ra chi ra:

—Ndĩcuita vatyí noo rayĩ ri cuví yuhu tari yoho, ta ñima Nyoo cuví —catyí ra chi ra.

²⁷ Ta cha niri ca cha cahán ra chihin ra, quihví ra ta nanyehe ra cuaha ñáyivi candu iin ri. ²⁸ Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu iin ri ndi chihin ñáyivi inga ñuu. Ta ni ri chichi vehe ñu ta ma cuví quihví ndi. Soco Nyoo sañahá ra chii, ta catyí ra: “Yoho, ma catyun chi ni noo ñáyivi tyi ña vaha ñu”, catyí Nyoo chii. ²⁹ Yucuan chaha quívi cha caná ndo chii, numi ri vachi. Ta vityin cuñí cote ñáa cuenda caná ndo chii —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quívi vityin, suri maa cuhva ihya cha nyaí vehi ta ña chachí ta chicán tahvi chi Nyoo cha cha iñi. Ta tuví noo ra nui. Ñihnó ra noo sahma xiño vavaha. ³¹ Ta catyí ra chii: “Yoho Cornelio, Nyoo chiñí ra cha chicán tahvun. Ta nicohón iñi ra cha sacuvún vatyí tyinyeún chi ñu ndahvi. ³² Tachi tyiño nya ñuu Jope na quichi ra Simón Pedro. Nyaá ra vehe inga tucu ra cha nañí Simón, noo ra cha satyahyu ñii. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuhun”, catyí ángel cuan chii. ³³ Tyicuan ta numi ri tachi tyiño vatyí cuquehen chuun. Ta vaha vatyí vachun. Ta vityin tandihí yo nyicú yo nuu Nyoo. Ta cuñí ndi cuñí ndi tandihí cuíi maa cha tachi Sutu Mañi yo chuun vatyí nacatyun chi ndi.

Nu cahan ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñí ra chi tandihí ñáyivi. Cuví ri yo ñu Israel, o cuví ri yo ñu inga ñuu. ³⁵ Soco naquehen ra chi yo tatu quichaha yo chi ra, ta sacuví yo cha vaha. ³⁶ Cahan ra chihin nyuhu ñu vachi tata ra Israel, ta sacoto ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandihí maa yo. ³⁷ Nyoho chitó vaha ndo tandihí cha cuví ñuu Israel ñui, yoso caa quichahá chi nu cuví Galilea cha yahá cha cahan noo ra Juan nuu ñáyivi, ta sacondutya ra chi ñu. ³⁸ Chitó ndo yoso caa chahá Nyoo tunyee iñi Tatyí li ra chi ra

Jesús, ra Nazaret. Ta chica noo ra sacuví ra cha vaha, sanduvahá ra chi tandihí ñu cha nyehé tindoho sahá ra ña vaha. Tyehe caa sacuví ra Jesús vatyí Nyoo nyaá ra chihin ra. ³⁹ Nyuhu cuví ndi cha ndaa tandihí cha sacuví ra Jesús nicahnu Judea ta ñuu Jerusalén. Yahá cuan ta chahñi ñu chi ra nu cruzi. ⁴⁰ Soco sanandoto Nyoo chi ra nu cu uñi quivi. Ta tuví ra nuu ndi. ⁴¹ Ña tuví ra nuu tandihí ñáyivi. Soco tuví ra nuu nyuhu vatyí nacachí ra chi ndi nyata ityi chata ca vatyí cuví ndi cha ndaa cuenda ra. Nyuhu chachí ndi ta chihí ndi chihin ra cha yahá cha nandoto ra. ⁴² Ta tachí ra chi ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chi ra Jesús tyi cuví ra juez chi ñu cha nyitó ta ñu cha chihí. ⁴³ Ta tyicuan caa tucu nyata ityi chata ca, cacahan tandihí ra profeta Nyoo tuhun ra Jesús. Ta cacatyí ra vatyí tandihí ñu cha chinó iñi chi ra Jesús, cusandachi Nyoo cuatyi ñu cha cuenda maa ra.

Nu naquehen ñu Tatyí li ta ñima ñu Israel cuví ñu

⁴⁴ Ni cahan ca ra Pedro ta noq xica ri Tatyí li siqui tandihí ñu tyasohó tuhun cahan ra.

⁴⁵ Ta ra Israel cha cayihí cuenda ra Jesús cha chaá coyo chihin ra Pedro iyo xaan cuñí ra vatyí chahá tucu Nyoo Tatyí li ra chi ñu cha ñima ñu Israel cuví. ⁴⁶ Chitó ra tyi tyicuan caa cuví vatyí chiñí ra cahan ñu inga sahan, ta sacahnú ñu chi Nyoo. ⁴⁷ Tyicuan ta quichahá catyí ra Pedro chi ra cha chaá coyo chihin ra:

—Ma cuví casi yo nu condutya ñáyivi ihya. Vatyí cha naquehen tucu maa ñu Tatyí li tari maa yo —catyí ra chi ra.

⁴⁸ Tyicuan ta tachí ra Pedro chi ñu ni ñihí Tatyí li na condutya ñu chihin sivi ra Jesucristo. Tyicuan ta chacu ndahvi ñu nuu ra Pedro vatyí cuñí ñu cha ndoo ra suhva quívi chihin ñu.

11

Nu nacatyí ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehen ñu tuhun Nyoo. ² Tyicuan ta nachahá ra Pedro Jerusalén. Ta ra cha catyí vatyí cuñí chi cha

sacuvi yo costumbre circuncisión ta cuhva cuvi cacu yo, xaan xaan cuñi ra nyehe ra chi ra Pedro. ³Ta cacatyí ra chi ra tyehé caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴Tyicuan ta ra Pedro nacatyí ra nya nu quichaha tandihi cha cuví chi ra ta catyí ra:

⁵—Yuhu nyaí ñuu Jope. Ta cuhva cha chicán tahvi chi Nyoo ta nyehi noo visión. Ta nyehi tari noo sahma cahnu cha noó ityi andivi. Tari cha nuñi noo noo tutun ta cuahan noo ityi nu ñuhú nu nyaí. ⁶Ta nanyehé vahi ñáá cha ñohó chichi. Ta nyehi quiti cha cumi chaha, quiti cuhu, ta coo, ta saa. ⁷Ta chini noo ndusu cha catyí chii: “Ndicuita Pedro. Cahni quiti ihya ta cahun”, catyí ndusu cuan chii. ⁸Ta nacahin ta catyí tyehé caa: “Sutu Mañi yuhu, ma cuvi, vatyí ni noo chaha ta ta cachi que coño quiti quini caa.” ⁹Tyicuan ta ndusu andivi nacahan chi chihin inga chaha, ta catyí chi: “Ma catyí yoho vatyí ma cahun noo cha yaha sanduvii”, catyí ndusu cuan chi. ¹⁰Uñi chaha cuví tyehé caa. Yaha cuan ta nandaq tandihi chihin sahma cuan ityi andivi. ¹¹Ta caa cuhva ri cuan chaq coyo uñi tahan ra vehe nu nyaí, quitá ra ñuu Cesarea ta nanducu ra chii. ¹²Ta Tatyí li tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaq ndi nya Cesarea quihvi ndi chichi vehe noo ra. ¹³Ta nacatyí ra cuan chi ndi yoso caa nyehe ra chi noo ángel chichi vehe ra. Nanyaá ángel cuan ta catyí ra chi ra vatyí na tachí ra musu ra ñuu Jope na cana ra chi noo ra cha nañi Simón Pedro. ¹⁴Vatyí ican ra cucatyí ra chi ra yoso caa cacu añaia ra ta añaia tandihi ñáyivi chi ra, catyí ángel cuan chi ra cuan na. ¹⁵Ta sacuvi ra cuan tari cuhva catyí ángel cuan chi ra. Ta cuhva cha chaí vehe ra quichaha cahin chihin ñu. Ta quichi ri Tatyí li siquí ñu tari quichi siquí yo cha xihna ri. ¹⁶Tyicuan ta nicohon iñi cha catyí Sutu Mañi yo quivi cuan. Ta catyí ra tyehé caa: “Ndicha vatyí ra Juan sacondutya ra chi ñáyivi chihin ndutya. Soco nyoho cucondutya ndo chihin Tatyí li”, catyí ra. ¹⁷Nyoo chaha tucu ra Tatyí li ra chi ñu cuan tari chaha ra chi maa yo quivi

chino iñi yo chi Sutu Mañi yo Jesucristo. Ta cha tyicuan caa zyóó ra cuvi yuhu vatyí casi cha sacuvi Nyoo? —catyí ra Pedro chi ra.

¹⁸Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnú ra chi Nyoo. Ta cacatyí ra:

—Tu tyicuan caa cuvi, cuñi chi catyí vatyí Nyoo chahá tucu ra chi ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñáyivi cha ma naa ca maa —cacatyí ra.

Ñu yihí cuenda ra Cristo ñuu Antioquía

¹⁹Quivi cha cachahni ra chi ra Esteban, quichaha chica nyicon ra chi inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahnu tyañuhu cha nañi Chipre. Ta yihí ñu chaq coyo ñu ñuu Antioquía. Ta suri cahan ñu tuhun ra Cristo soco iin ri maa chihin ñu Israel, ²⁰Ta chihin ñu cha cuahan coyo cuan, ndihi suhva ñáyivi ñuhú Chipre. Ta yihí tucu suhva ñu ñuu Cirene. Ta cha chaq coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu añaia yo. ²¹Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivi casandoq ñu tuhun chahnú cha chingo iñi ñu. Ta nachino iñi ñu chi Sutu Mañi yo. ²²Tyicuan ta chaq tuhun cuan nya Jerusalén. Ta ñu yihí cuenda Cristo tachí ñu chi ra Bernabé na cuhun ra nya Antioquía. ²³Ta cha chaq ra Bernabé Antioquía cuan, nyehe ra yoso caa nasocó Nyoo chi ñu. Ta ndusii xaan cuñi ra. Ta cahan ra nuu ñu na cunyicon ñu chi Sutu Mañi yo chihin cha ñi iñi ñu. ²⁴Tyicuan caa sacuvi ra Bernabé vatyí cuví ra noo ra vaha. Tyitú ra chihin Tatyí li. Ta chinó xaan iñi ra chi Nyoo. Ta tyicuan caa ta cuaha ñáyivi quihvi ñu cuenda Sutu Mañi yo. ²⁵Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía. ²⁶Ta cachinyicu ra chihin ñu yihí cuenda Nyoo ñuu cuan noo cuiya nañi ta sañaha ra tuhun Nyoo chi cuaha ñáyivi. Ta suri ñuu Antioquía cuan cuvi nu quichaha catyí ñáyivi: Cristiano chi ñu, o ñu yihí cuenda ra Cristo cuví cuan.

²⁷ Ta quiví cuan chaꝥ coyo ra cachahá cuenda tuhun cahán Nyoo, ra cacuví profeta. Quitꝥ ra ñuu Jerusalén ta chaꝥ coyo ra Antioquíꝥ. ²⁸ Ta noo ra cuan nañí ra Agabo chicuinyaaꝥ ra nu nyicú ra yihí cuenda ra Cristo ta cahan ra tuhun cha chahꝥ Tatyí lí chi ra. Ta catyí ra vatyi cuquichi noo tama nicacahnu ñayiví. Ta tyicuan caa cuví quiví chinyaaꝥ ra Claudio cuví ra rey cahnu. ²⁹ Tyicuan ta ñu yihí cuenda Cristo nya Antioquíꝥ tyihí tahan ñu tuhun vatyi cucuhva ñu yoso cuhva cundaa iñi maa noo noo ñu, vatyi cutyinyee ñu chi ñu yihí cuenda Cristo cha iyó ityi Judea. ³⁰ Tyicuan caa sacuví ñu ta sacuhun ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyacꝥ ra xuhun cuan.

12

Nu chihí ra Jacobo ta nu quihví ra Pedro vehe caa

¹ Ta quiví cuan quichahꝥ chica nyicon rey Herodes chi suhva ñu yihí cuenda ra Cristo. ² Ta tachí ra tyiño vatyi na cahñi ra chi ra Jacobo yañi ra Juan chihin mityi. ³ Ta nyehe ra Herodes vatyi tahan xaan iñi ñu Israel cha sacuví ra tyicuan caa, ta tyihí ra tyiño vatyi tiin ndihí ra chi ra Pedro. Ta cuví chi noo quiví vico pascua nu tuhva ñu chachi ñu pan cha ñahri yuchan iya yihí chihin. ⁴ Cha yahꝥ cha tiin ra chi ra Pedro, tyihí ra chi ra vehe caa. Ta cumi ityi sindaro sahá cumi chi ra. Ta cumi sindaro cha noo ityi ra ta sahá cuenda ra suhva suhva cuhva chí ra. Ta tyaaꝥ ra Herodes cuhva vatyi nayahá vico cuan ta cucuhva cuenda ra chi ra chi ñáyiví. ⁵ Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ní ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuii ri maa cha cuenda ra.

Nu sacacꝥ Nyoo chi ra Pedro vehe caa

⁶ Ta tyaaꝥ ra Herodes cuhva vatyi cha ñaha ri inga quiví cuan cutava ra chi ra Pedro nuu ñáyiví. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñí ra chihin uvi cadena. Ta uvi ca sindaro canyicú ra yuvehe casahá cumi ra. ⁷ Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa

cuan. Ta ángel cuan tiin ra xiin ra Pedro. Ta sandoyoꝥ ra chi ra. Ta catyí ra chi ra:

—Sanumi. Ndícuita —catyí ángel cuan chi ra.

Tyicuan ta ndachí cadena cha nuhñi ndaha ra Pedro. ⁸ Ta ángel cuan catyí ra chi ra:

—Nacuhñi vaha chichun ta natyihi ndichan chahun —catyí ángel cuan.

Tyicuan caa sacuví ra Pedro. Ta catyí ángel chi ra:

—Quehen sahmon ta tyauñ chaton ta quichun chate —catyí ángel cuan chi ra Pedro.

⁹ Ta ra Pedro quitꝥ ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyi visión nyehé ra. ¹⁰ Soco cuahan ra chata ángel cuan ta cayahꝥ ra noo nu sahá cumi sindaro. Tyicuan ta cayahꝥ ra inga tucu nu casahá cumi sindaro cuan. Yahꝥ cuan ta chaꝥ coyo ra yuvehe caa cahnu nu quita ñáyiví ta quihví ñu chichi ñuu. Ta yuvehe cuan nuña ri maa. Ta quitꝥ coyo ra. Ta cha yahꝥ yaha ra noo ityi cahnu, ta sandoyoꝥ ángel cuan chi ra. ¹¹ Tyicuan ta nacotoꝥ ra Pedro vatyi ndicha ta quichaha catyí ra:

—Ndicha, ñima visión cuvi. Soco maa Sutu Mañi yo tachí ra noo ángel vatyi sacacꝥ ra chii ndaha ra Herodes ta ndaha ra Israel —catyí ra Pedro.

¹² Chicá xiñi ra tuhun ihya ityi cuahan ra. Ta chaꝥ ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo. ¹³ Ta cuhva cha sacachan ra Pedro yuvehe nuquehe, quitꝥ noo ñaha tyivaa cha nañí Rode chinyehe ña yóo cha sacachan cuan. ¹⁴ Soco cuhva cha nicohon soho ña ndusu ra Pedro, ña nuñꝥ ña yuvehe. Vatyi sii xaan cuñí ña, ta chino ña cua nacatyí ña. Ta catyí ña vatyi ra Pedro nanyaaꝥ ra yuvehe. ¹⁵ Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyi ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶ Ta ra Pedro sañihí ca ra sacachan ra yuvehe. Ta cuhva cha nuñꝥ ñu ta nanyehe ñu chi ra, iyo xaan cuñí ñu ta yuhví ñu cuví. ¹⁷ Soco savahꝥ ra seña chihin ndaha ra nacutaxin ñu. Ta nacatyí ra chi ñu yoso caa

tava Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityi. ¹⁸Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro. ¹⁹Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yahá cuan ta quitá ra Herodes ityi Judea cuan ta cuahan ra ñuu Cesarea cuacoo ra.

Nu chihí ra Herodes

²⁰Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñí ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu iñ ri ñu ta cuahan coyo ñu cuacutahan ñu chihin noo ra cha nañí Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu. ²¹Tyicuan ta catyí ra Herodes vatyí cuhun ñu nu nyaá ra noo quívi. Ta chaá quívi cuan ta ndihvi noo ra sahma tyiño ra. Ta chicunya ra nu tyayu cahnu ra. Ta cahán noo ra nuu ñu. ²²Tyicuan ta quichaha canachaá ñáyivi, ta catyí ñu:

—Ra cha cahán ihya ñima noo rayii ri cuví ra. Nyoo cuví ra —catyí ñu.

²³Ta caa cuhva ri cuan noo ángel Sutu Mañi yo chahá ra noo cuehe chi ra Herodes vatyí chahá ra cha catyí ñáyivi tyi Nyoo cuví ra. Ta quihvi tindacu chi ra, ta chihí ra.

²⁴Soco tuhun Nyoo cuahan chitya ca. Ta cahán ñu tuhun Nyoo tandihí ri ityi.

²⁵Quívi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹Vehe ñuhu Antioquía cuan iyó ra cacuvi profeta Nyoo. Ta iyó tucu ra cha sañahá tuhun Nyoo chí ñáyivi. Ta sivi ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu iñ ri chihin ra Herodes cha cuví rey ityi Galilea, ta ra Saulo. ²Ta noo quívi nyicú tandihí ra ta casacahnú ra chí Sutu Mañi

yo. Ta casahá ra ayunar: ña cachachi ra ta cananducu ra chí Nyoo cuví cuan. Tyicuan ta catyí Tatyí li chí ra:

—Tava siin ndo chí ra Bernabé ta ra Saulo cha cuenda tyiño cha cané chí ra —catyí Tatyí li chí ra.

³Tyicuan ta cha ndihí saha ra ayunar, ta catyiso ra ndaha ra siquí ra, ta cachican tahvi ra chí Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴Yahá cuan tachí Tatyí li chí ra Bernabé ta chí ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihvi ra chichi noo barcu ta cuahan ra nya ñuhú Chipre cha nyaa mahñu tyañuhu.

⁵Yucuan ta cachaa coyo ra noo ñuu yuhu tyañuhu cha nañí Salamina. Ta quichaha cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chí ra. ⁶Tyicuan ta cuahan coyo ra cahán ra tuhun Nyoo noo noo ñuu cha nyaa Chipre cuan nyacua nya chaa coyo ra ñuu cha nañí Pafos. Ta yucuan nañihí ra chí noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra. ⁷Ta ra tasi cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta cana ra chí ra Bernabé ta chí ra Saulo, vatyí cuñí ra cuñi ra tuhun Nyoo. ⁸Ta ra tasi cuan nañí tucu ra Elimas, ta chasí ra nu chino iñi gobernador cuan chí ra Cristo. ⁹Tyicuan ta ra Saulo cha nañí tucu Pablo, tyitú ra chihin Tatyí li. Ta nyehe vavaha ra chí ra Elimas cuan. ¹⁰Ta catyí ra chí ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihí cha vaha. Ta tyicuan ri chasún ityi vaha Sutu Mañi yo. ¹¹Ta vityin Sutu Mañi yo cutachi tuñi ra chuun, vatyí cunducuaun. Ta ma cuvi nyehun ñuhú ñanyii suhva quívi —catyí ra Pablo chí ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta nducy ra noo ra tiin ndaha ra vatyí ña ndichin ca nyehe ra. ¹²Cuhva cha nyehe gobernador cuan cha cuví chí ra Elimas, chino iñi ra chí ra Jesucristo. Vatyí iyo cuñi ra nyehe ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityi Pisidia

¹³Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityi Panfilia. Soco ra Juan Marcos sandoꝝ ra chi ra ta cuanuhu ra nya Jerusalén. ¹⁴Yahá cuan ta caquitá ra Perge cuan, ta cuahan coyo ra ñuu Antioquía cha nyaá ityi Pisidia. Yucuan quihví coyo ra chichi vehe ñuhu ñu Israel ta cuví chi noo quívi nyitatu ñu. Ta chicunycú ra. ¹⁵Tyicuan ta quichahá sacuahá ñáyivi nu libru ley cha tyaa ra Moisés. Ta sacuahá tucu ñu libru cha tyaa ra cacuví profeta Nyoo ta cha naha. Yahá cuan ta ra cacuví nuu vehe ñuhu catyí ra chi ra hermano nyicú cuan, vatyi tatu iyó noo tuhun cuñí ra cahan ra chihin ñáyivi, cuví cahan ra. ¹⁶Tyicuan ta ndicuitá ra Pablo ta sacuví ra noo seña chihin ndaha ra vatyi na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo. ¹⁷Nyoo cuenda yo, ñu Israel, nacachi vaha ra chi sutu chahnu yo. Ta quívi cha iyó ca ñu ityi Egipto sacuví ra noo ñuu cahnu chi ñu. Vasi ñima ñáyivi ñuu cuan cuví ñu, soco sanducuahá ra chi ñu. Yahá cuan ta tava ra chi ñu ityi cuan chihin tunyee iñi chi ra. ¹⁸Ta cunyeꝝ iñi Nyoo tandihi cuhva chiyo ñu nu chicá noo ñu ñuhú ityi chichi cha uvi xico cuiya. ¹⁹Ta sanaa ra ucha tahan ñuu nahnu cha chiyo nicalnu Canaán, vatyi chahá ra ñuhú cuan chi sutu chahnu yo. ²⁰Yahá cuan ta sacuví Nyoo vatyi cunyaca ñaha maa maa ri juez chi ñáyivi cuan. Tari noo cumi ciento sisava cuiya chinyacá ñaha juez chi ñu nyacua nya quívi chinyacá ñaha ra profeta Samuel chi ñu. ²¹Tyicuan ta maa ñu chican ñu noo rey cha cunyaca ñaha chi ñu. Ta Nyoo chahá ra chi ra Saúl sehe ra Cis chi ñu, vatyi cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyacá ñaha ra chi ñu. ²²Yahá cuan ta Nyoo tava ra chi ra Saúl cha cuví ra rey. Ta chahá ra vatyi cuví ra David rey. Ta catyí ra: “Nyhí vatyi ra David sehe ra Isái cuví ra noo rayi cha tahán iñi cuhva iyó. Ta cusacuví ra tandihi cha cuñí yuhu”, catyí Nyoo tuhun ra David. ²³Ta minoo ra vachi tata ra David cuan ican cuví ra Jesús. Ta maa Nyoo tachi chi ra vatyi sacacu ra chi yo ñu Israel, tari catyí ra chi sutu

chahnu yo. ²⁴Ta cumañi ca quichi ra Jesús, ra Juan ra sacondutya chi ñáyivi cahan ra nuu tandihi ñáyivi Israel. Ta catyí ra chi ñu vatyi cuñí chi cha ndu uvi iñi ñu cuatyí ñu, ta condutya ñu. ²⁵Ta cha cuandihi tyiño saha ra Juan ta catyí ra: “¿Atu cuiñí maa ndo vatyi yuhu cuví noo ra cahnu cha saquichi Nyoo? Soco ñima yuhu cuví ra cahnu cuan. Vatyi chata cha yahá yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyi cahnu xaan ra cuví ra”, catyí ra Juan.

²⁶Hermano —catyi ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu aña maa yo. ²⁷Ñáyivi ñuu Jerusalén ta ra cuví nuu chi ñu cuan, ña chitó ñu vatyi ra Jesús cuví ra cha sacacú chi yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuahá vavaha ñu tuhun cuan tandihi quívi cha nyitatu ñu, soco ña cutuñí iñi ñu. Ta quívi chahñi ñu chi ra Jesús chinq cava tari cuhva catyí ra profeta Nyoo cuan. ²⁸Vatyi vasi ñahri cuatyí ra nañihí ñu, soco chican ñu chi ra Pilato na tyihí ra tyiño cucahñi chi ra. ²⁹Ta cha yahá sacuví ñu chi ra tari cuhva catyí maa tuhun ra nu libru Nyoo ta chihí ra. Tyicuan ta sanoꝝ ñu chi ra nu cruzi. Ta tyihí ñu chi ra chichi ñuhú. ³⁰Soco Nyoo sanandoto ra chi ra. ³¹Ta chichi cha cuaha quívi tui ra nuu ra cha quichi coyo chihin ra quívi quitá ra ityi Galilea, ta quichi ra Jerusalén. Ta ican ra cuan cacahán tuhun ra chihin ñáyivi vityin. ³²Ta yucuan chaha nyuhu cahán ndi tuhun vaha cha catyí Nyoo chi sutu chahnu yo vatyi cuhva ra chi yo. ³³Vatyi cha cuenda cha vaha chi maa yo cha cuví yo ñáyivi vachi tata ñu cuan, sacuví maa Nyoo cha catyí ra. Vatyi sanandoto ra chi ra Jesús tari cuhva nyaá nu cu uvi salmo nu catyí Nyoo tyehé caa: “Sehi cuví chuun, ta yuhu chahí ñáyivi coun vityin”, catyí Nyoo. ³⁴Nyoo tyaa ra cuhva vatyi sanandoto ra chi ra, tacuhva cha ma tyahyu coño ñuhu ra. Vatyi catyí nu tutu Nyoo: “Cuhve chi nyoho cha vaha cha catyí chi ra David.” ³⁵Yucuan chaha catyí tucu nu inga salmo tyehé caa. “Ma cuhvon cha tyahyu coño ñuhu Sehe iun”, catyí chi. ³⁶Ra David sacuví ra tyiño nuu ñu cha chiyo quívi chiyo ra, yoso cuhva cha catyí Nyoo

chi ra tyi sacuvi ra. Yahā cuan ta chihī ra ta chicuchī ñu chi ra tari chicuchī ñu chi sutu ra. Ta tyahyū coño ñuhu ra. ³⁷ Soco ra cha sanandoto Nyoo chi, ña tyahyū coño ñuhu ra. ³⁸ Yañi, cuñi chi coto ndo vatyí cha cuenda cha chihī ra Jesús tyiño nuu yo, Nyoo sahá ra ticahnu iñi cuatyí yo. ³⁹ Ta cha cuenda ra Jesús sahá Nyoo ticahnu iñi chi tandihí ñu cha chinó iñi chi ra, tyi ley ra Moisés ña cuví sacuvaha chi yo nuu Nyoo. ⁴⁰ Saha ndo cuenda coto ndoo siqui ndo cha catyaa ra profeta Nyoo nu catyí ra tyehe caa:

⁴¹ Nyehe nyoho, ra chacú nyaa, tahán chi cha iyo cuñi ndo ta cunaa ndo. Vatyí yuhu cuví Nyoo, ta sacuví minoo cha cahnu quívi cha iyó ndo vityin.

Soco ma chino iñi ndo tandihí cha sacuví yuhu vasí nacatyí ñáyivi chi ndo, catyí Nyoo.

⁴² Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chi ra, vatyí na cahan tucu ra tuhun ihya chihin ñu inga vitya quívi cha nyitatu ñu. ⁴³ Cuhva cha ndihí ndu iin ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chi ra Pablo ta chi ra Bernabé. Ta chahā ra tuhun chi ñu vatyí na cahun ca ñu ityí nuu ca chihin Nyoo. Ta naquehen vaha ñu tumañi iñi cha chahá Nyoo chi ñu. ⁴⁴ Cha inga vitya quívi nyitatu ñu, ndu iin ri ñu. Ta cha yatyin cha tandihí ñáyivi ñuu cuan ndu iin ri ñu vatyí cuiñi ñu tuhun Nyoo. ⁴⁵ Soco cuhva cha canyehe ra Israel, cuxaan ra vatyí nyehe ra vatyí cuaha ñáyivi nyicón chi ra cuan. Ta quichaha cacuví yuhu ra chihin ra Pablo, ta cacahan ra chi ra. ⁴⁶ Soco ña yuhví ra Pablo ta ra Bernabé. Ta quichaha cacatyí ra chi ra:

—Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo naquehen ndo. Ta cuñi maa ndo vatyí ña naña ndo cha ñihí ndo ñáyivi chaa cha ma naa ca maa. Yucuan chaha cahun ndi cucahan ndi chihin ñu cha ñima ñu Israel cuví. ⁴⁷ Vatyí tyicuan caa tachí Sutu Mañi yo chi ndi ta catyí ra tyehe caa:

Tyaji chuun tari ñuhu chi ñáyivi nicahnu ñuhu ñáyivi.

Tacuhva vatyí cusañahun ityí chi ñu yoso caa cacu añima ñu, catyí Nyoo.

⁴⁸ Cuhva cha cachiñi ra cha ñima ra Israel cuví, ndusiñ cuñi ra. Ta quichaha catyí ra vatyí tuhun Nyoo vaha xaan. Ta nachino iñi tandihí ñu cha nacachi maa Nyoo chii, vatyí coo ñu ñáyivi chaa cha ma naa ca maa. ⁴⁹ Ta tyicuan caa chitya tuhun Nyoo tandihí ityí ñuu cuan. ⁵⁰ Soco ra Israel cacahan ra chihin suhva ñusiñ tyayii cha nyicón ley ra Moisés. Catyí ra chi ñu vatyí ña vaha tuhun cahan ra Pablo. Ta cahan tucu ra chihin ra cuví nuu chi ñuu cuan. Ta yucuan cuví nu quichahā chica nyicon ñu chi ra Pablo ta chi ra Bernabé, nyacua nya cha tava ñehe ñu chi ra ñuu cuan. ⁵¹ Tyicuan ta canaquisi ra ñiyaca chaha ra tari noo seña vatyí ndoo cuatyí ñáyivi cuan siqui maa ñu. Ta cuahan coyo ra ñuu Iconio. ⁵² Soco ñu yihí cuenda Nyoo ñuu Antioquia cuan sii xaan cacuví chi ñu. Ta tyitu ñu chihin Tatyí li.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquihvi ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyivi. Ta cuaha xaan ñu nachino iñi ñu chi ra Cristo, ñu Israel ta ñu cha ñima ñu Israel cuví ñandihí. ² Soco ra Israel cha ña chinó iñi chi ra Cristo catiyiyuhū ra chi ñu cha ñima ñu Israel cuví vatyí caca ña vaha iñi ñu nyehe ñu chi ra yihí cuenda ra Cristo. ³ Yucuan chaha ra Pablo ta ra Bernabé candoo ra yucuan cuaha quívi. Ta chihin cha ñi iñi ra cacahan ra tuhun ra Cristo. Ta chinó xaan iñi ra chi Sutu Mañi yo. Ta Sutu Mañi yo tyinyee ra chi ra cha cacahan ra tuhun ra yoso caa cuñi ra chi yo. Ta chahā Sutu Mañi yo cha casacuví ra seña ta milagru tacuhva coto ñáyivi tyi ndicha cha cahan ra. ⁴ Soco ñáyivi ñuu, ña iin ri cuví ñu. Yihí ñu cuahan ñu tumañi iñi chi ra Israel. Ta inga tucu ñu cuahan ñu tumañi iñi chi ra apóstol. ⁵ Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchi ra yuu chi ra. ⁶ Soco ra Pablo ta ra Bernabé ñihí ra tuhun vatyí cusacuví ra tyicuan caa, ta cuahan coyo ra nya ñuu Listra, ta nya ñuu Derbe ityí Licaonia. Ta cachica noo ra ityí

cuan. ⁷Ta cacahan tucu ra tuhun Nyoo yoso caa sacacu ra añaima yo.

Nu cañi ñáyivi yuu chi ra Pablo nya ñuu Lистра

⁸Nya Lистра iyó noo rayii cha pehe chaha. Ta nya ndaha cacu ra ta ña cuví caca ra. Vatyí pehe ninduvi chaha ra. ⁹Ta suri maa ra pehe chaha cuan tyasohó vavaha ra nu cahan ra Pablo. Ta ra Pablo, tuví iñi ra vatyí chinó iñi ra cuan vatyí cuví nduvaha ra. ¹⁰Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinyaa ndoo —catyí ra Pablo chi ra.

Ta ra cuan, noo ri caña ndava ra, ta nicuinyaa ra. Ta quichaha chica ra. ¹¹Cha nyehé ñáyivi cha sacuví ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayii chaq coyo nu nyicú yo —catyí ñu.

¹²Ta catyí ñu tyi ra Bernabé cuví ra noo nyoo cha nañi Júpiter, ta ra Pablo cuví nyoo cha nañi Mercurio, vatyí ican ra cuví ra cahan. ¹³Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichi nyaca ra toro ta ita vatyí maa ra ta ñáyivi cuñí ñu sacahnu ñu chi ra Pablo ta chí ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñí ñu tyi nyoo cacuví ra. ¹⁴Soco cuhva cha catuví iñi ra apóstol, ra Bernabé ta ra Pablo, cha chicá xiñi ñu, quichaha chahnya ra sahma ra. Ta casacuví ra tyicuan caa tari noo seña vatyí ña ndoó ra vaha. Ta quihví coyo ra mahñu nu tuvi ñáyivi, ta cacana chaa ra, ¹⁵ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayii ri cuví ndi tari maa ndo. Ta vachi ndi vatyí catyí ndi chi ndo vatyí na saña ndo cha sacuví ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savaha andiví ta ñuhu ñáyivi. Ta savaha ra tyañuhu ta tandihí cha iyó chichi tyañuhu cuan. ¹⁶Ta tyiembu chahnu ta nya vityin, Nyoo saña ndaha ra chí ñáyivi na sacuví maa ñu yoso cuhva cuñí ñu, ¹⁷vasi tyicuan ri sañahá ra chí ñu yóo ra cuví ra, chihin cha vaha cha sacuví ra. Maa ra sacoón ra savi nu canyicú yo. Chahá ra cha vaha coo tyiño saha yo quiví tahan chi. Ta

chahá ra cachi yo. Ta chahá ra cha cusí cuñí añaima yo —catyí ra Pablo chí ñu.

¹⁸Soco vasi catyí ra tyicuan caa, yíi xaan ta chasi ra cha cahñi ñu toro cuan, vatyí cuñí ñu sacahnu ñu chí ra chihin cuan.

¹⁹Tyicuan ta chaq coyo suhva ra Israel, ra ña chinó iñi chí ra Cristo, ra ñuu Antioquía, ta ra ñuu Iconio. Ta tyiyuhu ra chí ñáyivi, ta catyí ra vatyí na tuchi ñu yuu chí ra Pablo. Ta tyicuan caa sacuví ñu. Ta cuñi maa ñu vatyí cha chihí ra. Ta xita quíñoño ñu chí ra ityi chata ñuu. ²⁰Soco candu iñi ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu. Ta cha inga quiví cuahan ra ñuu cha nañi Derbe ta cuahan ra Bernabé chihin ra.

²¹Ta cahan tucu ra tuhun Nyoo nya ñuu Derbe yoso caa sacacu Nyoo añaima yo. Ta cuaha ñáyivi nacuhva ñu chí ñu chí Nyoo. Yaha cuan ta cuanuhu coyo ra ityi quichi ra. Ta yaha ra ñuu Lистра ta ñuu Iconio inga chaha, ta nachaa ra nya Antioquía. ²²Ta tandihí ñuu cuan sanduní ca ra iñi ñu yihí cuenda Nyoo. Ta catyí ra chí ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chí ñu vatyí tatu cuñí yo cha cunyacá ñaha Nyoo chí yo, cuñí chí cha nyehe yo tindoho. ²³Ta canatyiso ra chí ra ca quihí ndaha chí ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita ta cachican tahvi ra chí Nyoo cha cuenda ra. Yaha cuan ta catyí ra chí ra:

—Chino iñi ndo chí Sutu Mañi yo. Maa ra na cocumi ra chí ndo —catyí ra chí ra.

Nu cuanuhu coyo ra Pablo ta ra Bernabé Antioquía ityi Siria

²⁴Yaha cuan ta yaha coyo ra Pablo ta ra Bernabé ityi Pisidia, ta chaq coyo ra ityi Panfilia. ²⁵Cacahan ra tuhun Nyoo ñuu Perge. Yaha cuan ta chahan ra ñuu Atalia. ²⁶Yucuan quihví coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chí ra ndaha Nyoo tyi cusacuví ra tyiño nuu ra, ta vityin cha nachaa coyo ra. ²⁷Cuhva cha nachaa coyo ra Antioquía sandu iñi ri ra chí ñu yihí cuenda Nyoo. Ta nacatyí ra chí ñu tandihí cha sacuví Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñima ñu Israel cuví. ²⁸Ta naha xaan ndoq ra

Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹Nyaá ca ra Pablo ta ra Bernabé Antioquía, ta chaá coyo ra quitá coyo ityi Judea. Ta quichahá sañahá ra chi ra yihí cuenda Nyoo. Ta catyí ra vatyí cuñí chi sacuvi ra costumbre circuncisión tari cuhva catyí ra Moisés, tyicuan ta cacu ra. ²⁻³Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyí cuhun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahá ra ityi Fenicia ta Samaria. Ta canacatyí ra chi ñu yihí cuenda Nyoo yoso caa sañá ñu cha ñima ñu Israel cuví tuhun chahnu cha chingo iñi ñu. Vatyí nacuhvá cuenda ñu chi ñu chi Nyoo. Ta tandihí ñu hermano cusii xaan cuñí ñu cha chitó ñu tuhun cuan.

⁴Quivi chaá coyo ra Pablo ta ra Bernabé Jerusalén, cuahan ra nu ndu iin ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chi ñu, chahá ñu lugar chi ra. Ta canacatyí ra tandihí cha sacuví Nyoo chihin ra. ⁵Soco suhva ra fariseo cha cacinó iñi chi ra Cristo, nicuinanyaa ra ta catyí ra:

—Tandihí ra cha ñima ra Israel cuví ta chinó iñi ra chi ra Jesús, niñi cuñí chi cha sacuvi ra costumbre circuncisión. Ta cuñí tucu chi cha sacuví ra cuhva catyí ley cha tyaa ra Moisés —catyí ra.

⁶Tyicuan ta candu iin ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan. ⁷Cha yahá cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihí yo cachí Nyoo chi yuhu ra ndahvi quivi cuan, vatyí cahin tuhun yoso caa cacu añaíma yo chihin ñu cha ñima ñu Israel cuví, vatyí nachino iñi ñu chi Sutu Mañi yo. ⁸Ta Nyoo, ra chitó añaíma tandihí ñáyivi, sañahá ra chi yo vatyí cuñí ra chi ñu cuan. Ican tuhun chahá ra Tatyí li ra chi ñu, tari chahá ra chi yo. ⁹Nyoo ña sahá ra tyi vaha

ca yoó cha nuu ñu cuan. Soco sanduví tucu ra añaíma maa ñu cha cuenda cha chinó iñi ñu chi ra. ¹⁰Vityin nacaca xiñi yo cuhva cuñí Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví naquehen vaha yo ley cuan. ¹¹Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuví Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹²Tyicuan ta taxi ri cacuví tandihí ra. Ta tyasohó ra tuhun cahan ra Bernabé ta ra Pablo. Vatyí canacatyí ra seña ta milagru cha sacuví Nyoo nu cacahan ra tuhun Nyoo nu nyicú ñu cha ñima ñu Israel cuví. ¹³Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuñi ndo tuhun cahín.

¹⁴Cha nacatyí ra Simón Pedro chi yo yoso caa quichaha chahá Nyoo tumañi iñi chi ñu cha ñima ñu Israel cuví. Vatyí cachí tucu ra chi suhva ñu vatyí cuví ñu noo ñáyivi cuenda ra. ¹⁵Ta iin ri nanduvi tuhun ihya chihin tuhun cha cahan ra profeta cuenda Nyoo ta cha naha, tari cuhva nyaa nu tutu Nyoo tyehé caa:

¹⁶Yaha tandihí tuhun ihya cuquichi tiqui nu nyaá ndo.

Quivi chiyo ra David, vaha sacahnu ñáyivi chii.

Soco yahá cuan sandihí ñu tuhun cha sacahnu ñu chii.

Soco cuquichi tiqui ta tari cha cunacoñehi vehe ñuhu ra David inga chaha.

Vatyí cusacahnu tucu ñáyivi chii.

¹⁷Tacuhva cuví nanducu tandihí ca ñáyivi chii, tandihí ñu cha ñima ñu Israel cuví cha chicán tahvi chihin sivi.

¹⁸Tyicuan caa catyí Sutu Mañi yo ta sañahá ra tuhun ihya chi ñáyivi chiyo ta cha naha ta chí ñáyivi cha iyó vityin.

¹⁹Yucuan chaha catyí yuhu vatyí ña vaha sayanga yo chí ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñí chi cha quichaha ñu ley chahnu. ²⁰Vaha ri maa chihin cha sacuhun yo tutu chí ñu. Ta catyí yo chí ñu vatyí ma cachí ñu coño cha chahá cuenda ñáyivi chí xitohyo. Ta ni noo ñu ta ma coo ri maa ñusihi o rayi chí ñu, tatu ñima ñasihi o yii ñu cuví. Ta ma cachí ñu coño quiti chíhí cha cava ñu sucun

ta ña chati niñi. Ta ma cachi ñu niñi. ²¹Vaty nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quivi quivi nyitatu ñu, sacuahá ra tuhun cha tyaá ra Moisés —catyí ra Jacobo chi ra.

²²Tyicuan ta ra apóstol ta ra cayihi ndaha chi ñu nyicú vehe ñuhu chihin tandihi ñu yihí cuenda Nyoo nacachi ñu chi suhva ra. Ta yaha cuan ta tachi ñu chi ra vatyí cuhun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañi Barsabás, ta ra Silas. Ican ra cacuví ra ra cananyiso tyiño vehe ñuhu ñuu Jerusalén cuan. ²³Ta chihin ra tachi ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihi ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihi ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chi tandihi ri ndo. ²⁴Chitó ndi vatyí quita suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chi ra tyi cuhun ra cusayanga ra chi ndo chihin tuhun cahan ra. Satondo ra cuan xiñi ndo vatyí catyí ra chi ndo tyi cuñi chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cuhun ra cucatyí ra chi ndo tyicuan caa.

²⁵Yucuan chaha ndu iñ ri ndi ta nacachi tahan tuhun cahan ndi ta vaha cuñi ndi cha tachi ndi chi ra hermano ihya chihin ra Pablo ta ra Bernabé nu nyicu ndo. ²⁶Nduvi tahan ra ihya nyehé xaan ra tindoho cha cuenda Sutu Mañi yo. Ta vasi cuñi ñáyivi cahñi ñu chi ra soco ña sandihí ra tuhun cha sacoto ra tuhun Sutu Mañi yo Jesucristo.

²⁷Ta yucuan chaha tachi ndi chi ra Judas ta chi ra Silas. Ta maa ra cucahan ra chihin yuhu ra chihin ndo, vatyí nacatyí ra tandihí cha tyaá ndi nu tutu ihya. ²⁸Vatyí niri Tatyí li ta niri nyuhu ta ña cuñi ndi tyiso ca ndi carga siqui ndo, soco ihya ri cha niñi ca tahán chi cha naquehen vaha ndo. ²⁹Ma cachi ndo coño cha chahá cuenda ñu chi xitohyo. Ta suri ma cachi ndo niñi, ni coño quiti cha chihí ta ña chati niñi ti. Ta ma coo ñusihi o rayi chi ndo tatu ñima ñasihi ndo o yí ndo cuví. Tatu ma sacuvi ndo tyicuan

caa, vaha xaan cuacoo ndo. Ta Nyoo na cocumi ra chi ndo”, catyí ra nu carta cuan.

³⁰Ta cuahan coyo ra cha catachi ra chi cuan. Ta chaá coyo ra Antioquía. Ta sandu iñ ri ra chi tandihí ñu, ta nacuhva cuenda ra carta cuan. ³¹Cuhva cha sacuahá ñu carta cuan ndusií xaan cuñi ñu vatyí vaha xaan cahan chi. ³²Ta ra Judas ta ra Silas cuví tucu ra cuan profeta cuenda Nyoo. Ta sandunií ra iñi ra hermano chihin tuhun cahan ra. ³³Ta cha yahá chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihí ñu yihí cuenda ra Cristo catyí ñu vatyí na cuhun vaha ra. ³⁴Soco ra Silas natyaá ra cuhva vatyí cundoo ra. ³⁵Ta ra Pablo ta ra Bernabé candoo tucu ra Antioquía yucuan. Ta maa ra chihin cuaha ca ra casañahá ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusiin ra chihin ra Bernabé

³⁶Ta cha yahá suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yihí cuenda ra Cristo tandihí ri ñuu nu cahan yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

³⁷Ta ra Bernabé cuñi ra cha cuhun tucu ra Juan Marcos chihin ra. ³⁸Soco ra Pablo ña tahán iñi ra cha cuhun ra Juan chihin ra, vatyí sandoq ra chi ra nya Panfilia quivi cuan. Ta ña cahan ca ra chisaha tyiño ra chihin ra. ³⁹Ta ña chitahan iñi ni noo ra, ta cacusiin ra. Ra Bernabé cuahan ra chihin ra Juan Marcos. Ta quihvi ra chichi noo barcu ta cuahan coyo ra Chipre. ⁴⁰Ta ra Pablo cachí ra chi ra Silas. Ta cha yahá chican tahvi ra hermano chi Nyoo na tyinyee ra chi ra, ta cuahan coyo ra. ⁴¹Ta yahá ra ityi Siria, ta ityi Cilicia, ta sandunií ca ra iñi ñu yihí cuenda Nyoo noo noo ñuu.

16

Nu cuahan ra Timoteo chihin ra Pablo ta ra Silas

¹Ra Pablo ta ra Silas chaá coyo ra ñuu Derbe, ta ñuu Listra. Ta yucuan nañihí ra chi noo ra yihí cuenda Cristo. Nañi ra Timoteo. Ta šihi ra cuví ña noo ñaha Israel. Ta suri yihí tucu ña cuenda ra Cristo. Soco sutu ra ra Grecia cuví ra. ²Vaha xaan chicí ra Timoteo chihin Nyoo catyí ñu yihí cuenda Cristo ñuu Listra ta ñuu Iconio. ³Ta

ra Pablo cuñí ra cha cuhun ra Timoteo chihin ra. Ta sahā ra circuncidar chi ra Timoteo. Vatyí coto ma cuñíi ñu Israel cha iyó ityi cuan tuhun ra Cristo cha cahán ra. Vatyí tandihí ñu chitó ñu vatyí sutu ra cuví ra ra ñuu Grecia. ⁴Tyicuan ta cuahan coyo ra noo noo ñuu. Ta nacatyí ra chi ñu yihi cuenda ra Cristo tuhun cha chahā ra apóstol ta ra yihi ndaha chi ñu nyicu vehe ñuhu Jerusalén chi ra. ⁵Ta tyicuan caa ta ndunií ca iñi ñu yihi cuenda ra Cristo ta chino ca iñi ñu chi Nyoo. Ta tahan quívi ta cuahan nducuaha ca ñu.

Nu nyehé ra Pablo noo visión chi noo ra Macedonia

⁶Na chahā Tatyí li cha cahan ra tuhun Nyoo ityi Asia. Yucuan chaha yahā sava ra ityi Frigia nu iyó xahñi ñuhu chihin ityi Galacia. ⁷Ta chaā coyo tucu ra ityi Misia. Ta cuñí tucu ra cuhun coyo ra ityi Bitinia, soco Tatyí li ra Jesucristo ña chahā cuhun coyo ra. ⁸Tyicuan ta nya sava ri yahā ra ñuu Misia ta canoō coyo ra ñuu Troas cha nyaá yuhu tyañuhu. ⁹Cañohó ra ñuu Troas cuan, ta noo cha cuaa nyehé ra Pablo noo visión. Nyehé ra chi noo rayíi ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndi”, catyí ra. ¹⁰Ta cha nyehé ra Pablo visión cuan, yuhu ra Lucas chihin ra Pablo ta inga ra sanduvahā ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo canā chi ndi, vatyí cahan ndi tuhun ra yoso caa sacacú ra añima yo chihin ñáyivi ityi cuan.

Nu ñohó ra Pablo ta ra Silas ñuu Filipos

¹¹Quihví ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quívi chaā ndi ñuu Neápolis. ¹²Ta yucuan quitā ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha nuu tandihí ñuu ityi Macedonia cuan. Ta yucuan chinyicu ndi suhva quívi. ¹³Noo quívi cha nyitatu ñáyivi ta quitā ndi ityi chata ñuu, yatyin noo yutya nu tuhvá ñu chican tahvi ñu chi Nyoo. Chicunyaā ndi yucuan ta cahan ndi tuhun Nyoo chihin ñusihi cha candu iin ri yucuan. ¹⁴Noo ñaha nañi ña Lidia. Ta ñuu ña cuví Tiatira. Ta tuhvá ña xico ña sahma finu, tyacu nya. Yucuan cuví tyiño sahā

ña. Ta sacahnú ña chi Nyoo tari ñu Israel. Ta chiní ña cha cahán ra Pablo. Ta Nyoo nuña ra añima ña na quichaha ña cha cahan ra. ¹⁵Ta condutyā ña chihin ñáyivi chi ña. Ta yahā cuan ta chacú ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, coo ndo vehi —catyí ña chi ndi.

Ta saniñi ña chi ndi cha ndoo ndi vehe ña.

¹⁶Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihi noo tatyí ña vaha chi ña. Yucuan chaha cuví nacoto ña ñáá ndihi cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahā ganaa ña cuenda chitoho ña, vatyí cuví nacotó ña. ¹⁷Ta ñaha tyivaa cuan quichaha nyicon ña chi ndi, ta chi ra Pablo ñandihí. Ta canā chaa ña ta catyí ña:

—Rayíi ihya ra casacuví tyiño nuu Nyoo cahnu cuví ra. Ta cahán ra tuhun yoso caa cuví cacu añima yo —catyí ña.

¹⁸Cuaha quívi sacuví ñaha tyivaa cuan tyicuan caa. Tyicuan ta ra Pablo ña cunye ca iñi ra, ta nanyocavā ra ta catyí ra chi tatyí ña vaha cha yihi chi ña:

—Chihin sivi ra Jesucristo catyí chuun vatyí quíton chi ñaha tyivaa ihya —catyí ra.

Ta tatyí ña vaha cuan quitā chi chi ña caa cuhva ri cuan.

¹⁹Soco cuhva cha canyehe chitoho ña vatyí ma cuví ca saha ganaa ra xuhun chihin ña, catiñ ra chi ra Pablo ta ra Silas chinyacā ra chi ra nya vehe tyiño. ²⁰Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyivi ñuu yo. ²¹Ta sañahá ra costumbre cha ña cuví naquehen yo, niri ña cuví sacuví yo vatyí ñu cuenda ñuu Roma cuví yo —catyí ra.

²²Tyicuan ta nduxaan ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun. ²³Cha yahā cha cañi vavaha ra chi ra, ta catyihí ra chi ra vehe caa. Ta tachí ra chi ra sahā cumi chi ra na saha vaha ra cuenda chi ra. ²⁴Cuhva cha quehen ra sahā cumi cuan tuhun, tyihí ra chi ra nya chichi cuí vehe caa. Ta tyihí vaha ra chaha ra ticu vitu. ²⁵Soco ñáá cuhva hora ñuu cuan cachitá vavaha ra Pablo ta

ra Silas. Ta cacticán tahlvi ra chi Nyoo. Ta ra cañohó vehe caa cuan catyasohó ra.

²⁶Ta saná iñi ra ta quichí noo cha taan ñihi vavaha. Ta naquisi chi cimientu vehe caa cuan, ta caa cuhva ri cuan nuña tandihí yuvehe, ta ndachi cadena tandihí ra ñohó vehe caa cuan. ²⁷Ta cha ndoyo ra sahá cumi cuan, nyehe ra vatyi tacoho yuvehe. Tyicuan ta tava ra mityi ra vatyi cahñi maa ra chi ra. Vatyi chicá xiñi ra vatyi ndihí ra ñohó vehe caa cuan cachingo. ²⁸Soco ra Pablo cana chaa ra chi ra, ta catyí ra:

—Ma cahñun chuun, vatyi tandihí ndi nyicú ndi ihya —catyí ra chi ra.

²⁹Tyicuan ta ra sahá cumi cuan chican ra noo ñuhu. Ta quicono ra quihvi ra nu cañohó ra. Ta nihí ra chihin cha yuhví ra. Ta chicuiñi chiti ra nuu ra Pablo ta ra Silas. ³⁰Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

³¹Ta ra cuan canacahan ra ta cacatyí ra:

—Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

³²Ta cacahan ra tuhun Sutu Mañi yo chihin ra ta chihin tandihí ñu nyicu vehe ra. ³³Ta suri maa cha cuaa cuan ra sahá cumi vehe caa cuan nacatya ra nu cahvi chi nduvi tahan ra nu cañi ra chi ra. Yahá cuan ta maa ra ta tandihí ñáyivi chi ra condutya ñu suri cha cuaa cuan. ³⁴Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sii xaan cuñi ñu vatyi chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

³⁵Tuvi inga quivi ta catachi ra cacuvi tyiño chi policia nu nyaá ra sahá cumi cuan, ta catyí ra vatyi na saña ra chi ra Pablo.

³⁶Tyicuan ta ra sahá cumi vehe caa cuan catyí ra chi ra Pablo:

—Chaa tyiño chi saha ra cuví tyiño, vatyi sañe chi ndo. Ican tuhun cha cuví quita ndo vityin —catyí ra chi ra.

³⁷Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahan chi. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa

ra chi ndi —catyí ra Pablo chi ra sahá cumi cuan.

³⁸Ta ra policia nacatyí ra chi ra cacuvi tyiño. Ta ra cuan cayuhvi ra cuví cha cachtó ra vatyi ra cuenda ñuu Roma cuví ra Pablo.

³⁹Ta chahan coyo ra chinandacan ra ticahnu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan. ⁴⁰Ta cha quita coyo ra vehe caa, chahan coyo ra vehe cu Lidia. Ta yaha cuan ta chinyehe ra chi ra hermano ta sanduniñi ra iñi ra ta cuahan coyo ra.

17

Nu naquiqui ñáyivi ñuu Tesalónica

¹Nu cuahan coyo ra Pablo ta ra Silas, cayaha coyo ra ñuu Anfipolis, ta ñuu Apolonia. Yahá cuan ta chaa coyo ra ñuu Tesalónica nu nyaá noo vehe ñuhu ñu Israel. ²Ta chahan ra Pablo vehe ñuhu cuan tari cuhva tuhva maa ra chahan noo noo ñuu. Ta cahan ra tuhun Nyoo chihin ñáyivi chichi vehe ñuhu cuan uñi tahan quivi nyitatu ñu. ³Quehen ra libru tuhun Nyoo ta sañaha ra tuhun ra Cristo chi ñu yoso caa catyí chi vatyi cunyehe ra tindoho ta cucuvi ra. Yahá cuan cunandoto ra. Ta catyí ra chi ñu vatyi suri maa ra Jesús cha cahan ra tuhun chihin ñu cuví ra Cristo.

⁴Ta suhva ñáyivi Israel cuan nachino iñi ñu. Ta candu iin ri ñu chihin ra Pablo ta ra Silas. Ta cachingo tucu iñi cuaha ñu Grecia cha sacahnú chi Nyoo. Ta cuaha ñusihi tyayii ñuu cuan ñandihí. ⁵Soco ra Israel cha ña chinó iñi, quiñi cacuñi ra cha nyehé ra vatyi nyicón ñáyivi chi ra Pablo. Ta sandu iin ri ra chi noo ityi ra quiñi iyó cha cacticá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chi ra Pablo ta chi ra Silas, vatyi tava ra chi ra, ta nacuhva cuenda ra chi ra chi ñáyivi. ⁶Soco cha cuenda cha ña nañihí ra chi ra Pablo ta ra Silas yucuan, ta quehen ra chi ra Jasón. Ta xita quiñocho ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta cana chaa ra ta catyí ra:

—Ra ihya cuví ra cacticá noo satondó chi tandihí ñáyivi nicahnu ñuhu ñáyivi. Ta vityin chaa coyo tucu ra ihya. ⁷Ta ra Jasón chiña chaha ra vehe ra cunyicu ra. Ta tandihí maa ra ña sahá ra ñáyivi chi ra cuví

rey cahnu nya Roma. Vatyí catyí ra vatyí iyó nonga rey ta nañí ra Jesús.

⁸ Cha cachiñi ñu tuhun cuan, ñáyivi ta ra cacuví tyiño canaquiñi ñu. ⁹ Soco ra Jasón ta inga ra cachahá ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quiyi cuii ri casacuhun ra hermano chi ra Pablo ta ra Silas ityi ñuu Berea. Ta cha chaá coyo ra yucuan ta chahan coyo ra vehe ñuhu ñu Israel.

¹¹ Ta ra Israel cha iyó ñuu Berea cuan vaha ca ñáyivi cacuví ra ta ñima ca ra Tesalónica.

Vatyí chihin cha ñi ñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra.

¹² Yucuan chaha cuaha vavaha ñu nachino ñi ñu chi ra Cristo. Ta ñu Grecia nachino tucu ñi ñu cuan, tari ñusihi tyayí ta rayí ñandihi. ¹³ Soco cha cachiñi ra Israel cha ca iyó ñuu Tesalónica vatyí ra Pablo ñohó ra Berea cahán ra tuhun Nyoo, ta chahan coyo ra ta sanaquiñi ra chi ñáyivi yucuan.

¹⁴ Soco ra hermano numi cuii ri tachí ra chi ra Pablo nya ityi yuhu tyañuhu. Soco ra Silas ta ra Timoteo candoo ra Berea.

¹⁵ Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhu coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cuhun ra nu nyaá ra.

Nu ñohó ra Pablo ñuu Atenas

¹⁶ Cha niri ca cha nyatú ra Pablo chi ra Silas ta ra Timoteo ñuu Atenas cuan quiñi cuñí añima ra cha nyehé ra vatyí cuaha xaan xitohyo iyó ñuu cuan. ¹⁷ Yucuan chaha chahan ra chihin ra Israel, ta chihin inga ra cha tuhvá sacahnú chi Nyoo chichi vehe ñuhu cuan. Ta ndi quivi cahán ra chihin ñu cha nyicu nuyahvi ñandihi. ¹⁸ Ta ñiñi tahan ra chihin ñu cha sacuaa tuhun sañahá noo ityi ñáyivi cha nañi ñu epicúreo. Ta ñiñi tahan tucu ra chihin ñu cha sacuaa tuhun sañahá ñáyivi estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahán ra ihya —catyí ra.

Tyehe caa catyí ra vatyí ra Pablo cahán ra tuhun ra Jesús, ta cahán tucu ra tuhun cha nandoto ñáyivi chihí. ¹⁹ Tyicuan ta chinyaca ra chi ra Pablo noo nu nañí Areópago, nu tuhva ra cacuví tyiño ndu ñi ri ra. Ta cacatyí ra chi ra:

—Cuñí ndi coto ndi tuhun chaa cha vachi sañahún. ²⁰ Vatyí sacotón tuhun cha ña chitó ndi. Ta cuñí ndi coto ndi ñáá cha cuñí chi catyí tandihi tuhun ihya —cacatyí ra chi ra.

²¹ Vatyí tandihi ñu Atenas ta ñu inga ñuu cha iyó yucuan tahná xaan ñi ñu tyasoho ñu ta nacatyí ñu ñáá ndihi tuhun chaa.

²² Tyicuan ta ra Pablo nicuinanyaa ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan ñi ndo chi cuaha nyoo.

²³ Vatyí chahin chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo. ²⁴ Nyoo cha savahá ñuhu ñáyivi ta tandihi cha iyó siqui ñuhu ñáyivi. Chi maa ra cuví andivi ta ñuhu ñáyivi. Ta ña iyó ra chichi vehe ñuhu cha savahá ñáyivi. ²⁵ Ta ña itá ñi ra cha tyinyeé ñáyivi chi ra. Vatyí suri maa ra chahá ra ñáyivi coo tandihi yo. Ta chahá ra tatyí cha xitá yo. Maa ra chahá tandihi chi yo. ²⁶ Cha xihna ri savahá Nyoo chi noo tuhun ri rayí. Ta maa ra cuví sutu tandihi yo. Yucuan chaha noo ri ñiñi nyisó tandihi yo. Ta chahá Nyoo cha coo yo nicahnu ñuhu ñáyivi. Cha ni cumañi ca savahá ra chi yo ta catyí ra ñáá cuiya coo noo noo yo siqui ñuhu ñáyivi ihya. Ta catyí tucu ra nya cucoo noo noo yo. ²⁷ Tyicuan caa sacuví ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuvi nañihí yo chi ra. Soco cha ndicha, Nyoo ña cañi nyaá ra chihin noo noo yo. ²⁸ Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyivi chi Nyoo cuví chi yo”, catyí ra. ²⁹ Tatu ñáyivi chi Nyoo cuví yo, ña tahná chi caca xiñi yo vatyí Nyoo cuví ra noo xitohyo cha chingo chihin xuhun cuaan, o xuhun cuichin, o chihin yuu vaha cha savahá ñáyivi cuhva chicá xiñi maa ñu.

³⁰ Nyoo sahá ra ticahnu iñi chi ñu chiyo ta cha naha, vatyí ña chitó ñu. Soco vityin catyí ra chi tandihi ñáyivi tandihi ri ityi vatyí na ndu uvi iñi ñu cuatyí ñu. ³¹ Vatyí Nyoo tyaa ra cuhva vatyí coo noo quívi cha cucutuñi chi ñáyivi iyó siqui ñuhu ñáyivi nuu noo ra cha nacachí vaha maa ra chi. Ta sañahá ra chi tandihi yo vatyí tyicuan caa cuví vatyí sanandotó ra chi ra cuan cha yaha chihí ra —catyí ra Pablo.

³² Cuhva cha chiñí ñu tuhun cha nandotó ñu chihí, yihí ñu chachu nyaá ñu, ta inga ñu catyí:

—Quíchun inga quívi ta cahun tuhun ihya chihin ndi —catyí ñu.

³³ Tyicuan ta cuahan ra Pablo. ³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañí ra Dionisio, ta cuví ra noo ra cuví tyiño ñuu cha tuhvá ndu iin nya Areópago cuan. Ta noo ñaha sihi cha nañí Dámaris chino tucu iñi ña, ta inga tucu ñu ñándihi.

18

Nu ñohó ra Pablo ñuu Corinto

¹ Yaha cuan ta quita ra Pablo ñuu Atenas ta cuahan ra ñuu Corinto. ² Ta yucuan nañihí ra chi noo ra Israel tari maa ra. Nañí ra Aquila. Ta ñuu Ponto cacu ra. Ta maa ra chihin ñasihi ra, cu Priscila quita ñu Italia. vatyí ra Claudio, ra cuví rey cahnú yucuan, tava ra tandihi ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan. ³ Ta iin ri tyiño sacuví ra chihin ñu. Savahá ñu vehe sahma. Ta ndoo ra chihin ñu vatyí sahá tyiño ñu iin ri. ⁴ Ta quívi nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra cuhva cha chino iñi ñu chi ra Jesucristo.

⁵ Ta quívi chaq coyo ra Silas ta ra Timoteo cha quita ra Macedonia, ra Pablo sandoq ra tyiño sahá ra ta iin ri ca tyiño cha cahán ra tuhun Nyoo nicunyaq ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu. ⁶ Soco ñu cuan xaan cuñi ñu. Ta quichahá cahan ña vaha ñu siqui Sutu Mañi yo. Tyicuan ta ra Pablo naquisi ra sahma ra tari noo seña vatyí cuandoo cuatyí ñu siqui ñu. Ta catyí ra chi ñu:

—Cuatyi maa ndo cuví tatu cuhun ndo anyaya. Nahri ca nyaá siqui. Vityin ta ityi

nuu ca cuhin cuahin chihin ñu cha ñima ñu Israel cuví —catyí ra chi ñu.

⁷ Ta quita ra vehe ñuhu cuan. Ta cuahan ra vehe noo ra cha nañí Justo. Noo ra cha sacahnú chi Nyoo. Ta nyaá vehe ra ityi xiin vehe ñuhu cuan. ⁸ Ta noo ra cha nañí Crispo, ra cuví nuu vehe ñuhu cuan nachino iñi ra chi Sutu Mañi yo, ta ñáyivi chi ra ñándihi. Ta cuaha ca ñáyivi iyó Corinto cuan, cha yaha cha chiñi ñu tuhun cahán ra Pablo, nachino tucu iñi ñu chi ra Jesús, ta condutya ñu. ⁹ Tyicuan ta noo cha cuaa nyehe ra Pablo noo visión. Ta cahan Sutu Mañi yo chihin ra, ta catyí ra:

—Ma yuhvun. Cahan ca tuhin ta ma sandihun cha cahun. ¹⁰ Vatyí yuhu nyaí chuhun. Ta yori cuví satsai iñi chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹ Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹² Soco quívi cha cuví ra Galión gobernador nicahnu ityi Acaya cuan, candu iin ri ra Israel siqui ra Pablo. Ta cachican ra cuatyí chaha ra nuu ra gobernador. ¹³ Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴ Tyicuan ta cuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnú o cuatyí ndiyi cuví sandai yoso cuhva tahan chi. ¹⁵ Soco maa maa ri tuhun cahán ri cuví ihya. Ta yuhu ña cuñí sandai tyiño ihya, ta siin ri cuenda ley maa ndo cuví. Nyehe maa ndo. Sandaa ndo tyiño vatyí yuhu ña cuñí cuvi juez cuenda ihya —catyí gobernador cuan.

¹⁶ Ta tava ra chi ra nu cuví vehe tyiño ra. ¹⁷ Tyicuan ta tandihi ra Grecia catiñ ra chi ra Sóstenes, ra cuví nuu vehe ñuhu ñu Israel. Ta cacañi ra chi ra suri maa nuu ra Galión, ra cuví gobernador cuan. Soco ra Galión cuan ña cahan ri ra.

Nu cuanuhu ra Pablo ñuu Antioquía. Yaha cuan ta cuahan tucu ra tuhun Nyoo, cha cu uñi chaha

¹⁸ Ta ra Pablo ndoo ca ra ñuu Corinto cuaha quívi. Yaha cuan ta catyi ra chi ra hermano vatyí cuhun ra. Ta cuahan ra

Aquila chihin cu Priscila chihin ra Pablo. Tyicuan ta chaꝥ coyo ñu Cencrea. Ta ra Pablo satya ndii ra xiñi ra vatyí sacuví ra noo cha tyaá ra cuhva tyi sacuví ra nuu Nyoo. Tyicuan ta caquihvi ñu chichi noo barcu cha cuahan ityi Siria. ¹⁹Ta cha chaꝥ barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahan ra chihin ñu Israel cha ndu iñ ri yucuan. ²⁰Ta chacu ndahvi ñu nuu ra na ndoo ra cuaha ca quiví. Soco ña cuñí ra. ²¹Ta catyí ra chi ñu vatyí cha cuahan ra, ta catyí tucu ra tyehe caa:

—Cuñí chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityi Siria. ²²Quiví nachaꝥ ra ñuu Cesarea ityi Siria cuan, chahan ra chicuhva ra nocumi chi ñu yihí cuenda Nyoo Jerusalén. Yahaꝥ cuan ta cuahan ra Antioquía. ²³Ta cha yahaꝥ chinyaa ra suhva quiví yucuan, quita ra ta cuahan ra tahan tahan ñuu ityi Galacia ta Frigia. Ta sanduniñ ra iñi tandihí ñu yihí cuenda Nyoo.

Nu cahan ra Apolos tuhun Nyoo ñuu Éfeso

²⁴Quiví cuan chaꝥ noo ra Israel ñuu Éfeso. Nañí ra Apolos. Ta ñuu ra cuví Alejandría. Ta cuví ra minoo ra vaha cahan tuhun Nyoo. Ta chitó xaan ra tuhun Nyoo tuhun chahnu cha nyaá nu libru. ²⁵Ta vaha xaan cutuhva ra tuhun Sutu Mañi yo. Ta cahan ra chihin cha ñi iñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra. ²⁶Ta quichahaꝥ cahan ra chichi vehe ñuhu chihin cha ñi iñi ra. Ta cuhva cha chiñi ra Aquila ta cu Priscila, tava siñ ñu chi ra ta nacatyí cachi ca ñu tuhun ityi Nyoo chi ra. ²⁷Tyicuan ta quichaha cuñí ra Apolos cuhan ra ityi Acaya. Ta ra hermano catyinyee ra chi ra. Ta catyaꝥ ra noo carta chi ñu yihí cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu chaꝥ ra. Tyicuan ta cuahan ra. Ta cuhva cha chaꝥ ra Acaya cuan tyinyee xaan ra chi ñu chinó iñi chi Nyoo cha cuenda tumañi iñi cha chahaꝥ ra chi ñu. ²⁸Vatyí nu tuvi sañahꝥ cachí xaan ra yoso caa cuhva

ña vaha cha sacuví ñu Israel. Ta sañahꝥ ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

¹Cha ñi ri ca cha ñohó ra Apolos ñuu Corinto, ra Pablo yahaꝥ ra ityi yucu ta chaꝥ ra nya ñuu Éfeso. Ta yucuan nañihí ra chi cuaha ri ra yihí cuenda Nyoo. ²Ta ndacaꝥ tuhun ra chi ra:

—¿Atu naquehen ndo Tatyí li quiví nachingó iñi ndo? —catyí ra Pablo chi ra.

Ta canacahan ra cuan ta catyí ra:

—Ni chihin ña chitó ndi cha iyó Tatyí li.

³Tyicuan ta ra Pablo ndacaꝥ tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi iñi cuatyí. Soco catyí tucu ra chi ñu vatyí cuñí chi cha chino iñi ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

⁵Cuhva cha cachiñiñ ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús. ⁶Ta cuhva cha tyisoꝥ ra Pablo ndaha ra siqui ra, quichi Tatyí li siqui ra. Ta quichaha cahan ra inga sahan. Ta sahaꝥ ra profetizar, o chahaꝥ cuenda ra tuhun chahaꝥ Tatyí li Nyoo chi ra cuví cuan. ⁷Ta uchi uvi tahan ra cha tandihí ra.

⁸Tyicuan ri chicaꝥ ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ñi iñi ra. Ta ñihi cahan ra chihin ñu yoso caa nyacá ñaha Nyoo añaima yo. ⁹Soco yihí ñu sandavaꝥ ñu añaima ñu. Ta ña cuñí ñu chino iñi ñu. Ta cahan ña vaha ñu siqui tuhun ra Cristo nuu ñáyivi, ta catyí ñu vatyí ña vaha ityi Sutu Mañi yo. Tyicuan ta ra Pablo canyahaꝥ ra nu nyicú ñu. Ta chinyacaꝥ ra chi ñu chinó iñi chi ra Cristo noo sicuela ra cha nañí Tiranno. Ta yucuan cahan ra tuhun ra Cristo chihin ñáyivi ndiquiví ri.

¹⁰Ta tyicuan caa chinyacuví ra chichi cha uvi cuiya. Ta tandihí ñáyivi nicahnu ityi Asia cuan chiñi ñu tuhun Sutu Mañi yo

Jesús, tari ñu Israel ta ñu cha ñima ñu Israel cuvi ñándihi. ¹¹ Ta nahnu milagru sacuvi Nyoo chihin ndaha ra Pablo. ¹² Vatyí nyacua nya pañitu ta sahma cha tiin ra Pablo, ta chinyaca ñu chi ñu cuhvi ta nduvaha ñu. Ta ñu yihí tatyí ña vaha chi, quita chi chi ñu.

¹³ Ta iyó suhva ra Israel cha cachica noo tahan tahan ñuu. Catava ra tatyí ña vaha chi ñáyivi. Ta cacuñí ra cotyiño ra sivi Sutu Mañi yo Jesús vatyí tava ra chi tatyí ña vaha. Ta catyí ra chi tatyí ña vaha cuan:

—Chihin sivi ra Jesús cha cahán ra Pablo tuhun catyí chi ndo vatyí quita ndo —catyí ra.

¹⁴ Tyehe caa chinyacuví ndi ucha tahan sehe noo ra Israel cha nañí Esceva. Ta ra Esceva cuan cuví ra noo ra cuví nuu chi tata sutu. ¹⁵ Ta cha cacahan ra cuan chihin tatyí ña vaha cuan, nacañan tatyí ña vaha cuan chihin ra ta catyí chi tyehe caa:

—Ñohó nui chi ra Jesús. Ta chité yóó ra cuví ra Pablo. Soco nyoho yóó ra cuví nyoho? —catyí tatyí ña vaha cuan chi ra.

¹⁶ Tyicuan ta ra cha yihí tatyí ña vaha cuan chii, ndava ra siquí ra cuan. Ta chihin cha cuaha fuerza ra cuví chasaha ra chi tandihi ra. Ta chahnya cuatyí ra sahma ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahan coyo ra. ¹⁷ Tyicuan ta tandihi ñu Éfeso, ñu Israel, ta ñu cha ñima ñu Israel cuví ñándihi, chito ñu tuhun cuan. Ta yuhvi xaan ñu cuví. Ta sacahnú ñu sivi Sutu Mañi yo Jesús.

¹⁸ Ta cuaha xaan ñu chinó iñi ñu chi ra. Ta cha coyo ñu ta nahma ñu cuatyí ñu, tandihi cha ña vaha cha chinyacuví ñu ta ityi chata ca. ¹⁹ Ta cuaha ñu cha sacuahá tuhun tasi, quichí nyaca ñu libru ñu. Ta chahmí ñu libru cuan nuu tandihi ñáyivi. Ta natava ñu cuenda yoso yahvi libru cuan. Cha tandihi quita ta cha uvi xico uchi mil xuhun cuichin. ²⁰ Ta tyicuan ri ta cuahan chitya ca tuhun Sutu Mañi yo. Ta nducuahá ca ñu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chi ra.

²¹ Ta cha yaha tuhun ihya, ra Pablo natyaa ra cuhva cha cuhun ra ityi Macedonia, ta ityi Acaya. Yaha cuan ta cunuhu ra nya Jerusalén tyaa ra cuhva. Ta catyí ra vatyí yaha cuan ta cuñi chi cha cuhun ra nya ñuu Roma. ²² Tyicuan ta tachí ra chi uvi tahan ra tyinyee chi ra nya Macedonia, ra Timoteo

ta ra Erasto. Soco ndoo maa ra suhva ca quivi ityi Asia cuan.

Nu naquiquí ñáyivi Éfeso siquí tuhun Nyoo

²³ Ta suri quivi cuan naquiquí ñáyivi ñuu Éfeso siquí tuhun Nyoo, ²⁴ vatyí noo ra cha nañí Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra. ²⁵ Ta cana ra Demetrio cuan chi ra cha sahá tyiño chihin ra. Ta cana tucu ra chi ra cha casahá tyiño iin ri tyiño cuan. Ta catyí ra chi ra:

—Nyoho ra tahan yo, chito ndo vatyí chihin tyiño ihya iyó cha tyayí yo. ²⁶ Soco nyoho nyehé ndo ta chinií ndo yoso caa sacuví ra Pablo ñuu yo Éfeso ihya, ta nicahnu ityi Asia. Vatyí catyí ra tyi nyoo cha savahá ñáyivi ñima Nyoo cuví. Ta cuaha xaan ñáyivi nachino iñi sahá ra. ²⁷ Ta ña vaha cha sacuví ra vatyí ma quiyahvi ca xitohyo cha savahá yo. Ta siin ri ma sacahnu ca ñáyivi chi nyoo Diana ta ma saha ca ñu ñáyivi vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihi ñáyivi ityi Asia chihin ñu nicahnu ñáyivi sacahnú ñu chi ña. Ta nu cuahan ca chi quivi ma sacahnu ca ñáyivi chi ña tatu chino iñi ñu cha cahán ra Pablo —catyí ra Demetrio.

²⁸ Ta cuhva cha cachiñí ra cha catyí ra, Xaan xaan cacuñí ra. Ta quichaha cacana chaa ra ta cacatyí ra:

—Cahnu xaan cuvi cu Diana, nyoo cuenda ñáyivi Éfeso ihya —catyí ra.

²⁹ Ta cutondo xiñi tandihi ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxita quinocho ra chi ra nyacua nya nu tuhva ñu candu iin ri ñu. ³⁰ Ta ra Pablo cuñí ra quihvi ra nu nataca ñáyivi vatyí cahán ra chihin ñu. Soco ra hermano, ña chahá ra. ³¹ Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahán chi tyihi ra chi ra yucuan. ³² Ta nu ndu iin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chito ñu ñáa tuhun cha natacá ñu. ³³ Tyicuan ta ñu Israel, tyatyino ñu chi noo ra cha nañí Alejandro

na quita ra ityi nuu. Ta suhva ñu tayucú yucuan nacatyí ñu chi ra yoso caa cucahan ra. Tyicuan ta sacuví ra seña chihin ndaha ra vatyí na taxi ri cuví ñu vatyí cuñí ra catyí ra vatyí ñahri cuatyí ñu Israel. ³⁴Soco cuhva cha chito ñu vatyí ra Israel cuví ra, tandihi maa ñu caná chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵Tyicuan ta secretario ñuu cuan cuhva cha cuví sacutaxin ra ñáyívi, ta catyí ra:

—Nyoho tata ñuu Éfeso ihya. Tandihi ñáyívi chito ñu vatyí nyaá síqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha caná cava ityi andívi. ³⁶Ta yori cuví catyí tyi ña ndicha. Taxi ri ño, ta ma cunyacuví ri maa ndo tatu ña chito ndo ñáá cha cuacunyacuví ndo. ³⁷Vatyí ra cha quichí nyaca ndo ihya ñahri cha suhú ra vehe ñuhu ndo. Ta ni ña cahán ña vaha ra síqui nyoo cuenda ndo. ³⁸Tatu ra Demetrio ta ra cha sahá tyiño chihin ra chicán ra cuatyí chaha noo ra, na cuhun ra nu nyaá juez. Cuví cacán ra cuatyí nuu ra cuan, ta maa ra cusandaa ra cuatyí cuan. ³⁹Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley. ⁴⁰Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquíqui yo —catyí ra cuví secretario cuan.

⁴¹Ta cha yahá catyí ra tuhun cuan catyí ra vatyí na cunuhu ñu nya vehe ñu.

20

Nu yahá ra Pablo ityi Macedonia ta cuahan ra Grecia

¹Cha yahá tuhun cha naquíqui ñáyívi ñuu Éfeso cuan, caná ra Pablo chi tandihi ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chi ñu. Vatyí maa ra chaá chi quívi cha cuhun ra inga ityi. Ta cahan ra chihin ñu. Tyicuan ta cuahan ra Macedonia. ²Ta cahan ra tandihi ityi cuan ta sanduní ca ra iñi tandihi ñu yihí cuenda ra Cristo cha iyó ityi cuan chihin tuhun cahán ra. Tyicuan ta chaá ra ityi Grecia. ³Ta yucuan ndoo ra uñi yoo. Ta cha nyaá ra cha cuaquehen ra barcu ta cuhun ra Siria,

ta chito ra vatyí nducú ñáyívi Israel chi ra vatyí cahni ñu chi ra. Yucuan chaha natyaa ra iñi ra cha cuhun ra chihin chaha ra ityi nu ñuhu ri. Ta nayahá ra inga chaha ityi Macedonia. ⁴Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo. ⁵Ra hermano ihya cayahá ra ityi nuu ta canyatú ra chi ndi ñuu Troas. ⁶Ta nyuhu nyatu ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quitá ndi ñuu Filipo chihin barcu. Ta nu cu ohon quívi ta natahan ndi chi ra cha cuahan ityi nuu nya ñuu Troas. Ta yucuan ndoo ndi ucha quívi.

Nu cahán ra Pablo tuhun Nyoo ñuu Troas

⁷Ta cha timingu cuan ndu iñi ri ndi chihin ñu yihí cuenda Nyoo ñuu Troas cuan. Ta quívi cuan cuacachi ndi pan ta coho ndi vinu vatyí nicohon iñi ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuví ora ñuu, vatyí cha nyaá cha cuhun ndi inga quívi cuan. ⁸Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhu candil cayú. ⁹Ta noo ra tyivaa cha nañí Eutico nyaá ra ventana tyasohó ra, soco ña cunyeé ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra nya nu ñuhu. Ta nacoñehé ra chi ra soco cha chihí ra. ¹⁰Tyicuan ta ra Pablo noo ra ta chaá ra nu catuví ra tyivaa cuan. Ta natyihi nundaha ra chi ra tyivaa cuan, ta catyí ra chi ndi hermano:

—Ma yuhvi ndo. Nyitó ra —catyí ra.

¹¹Tyicuan ta nandaá tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra. ¹²Ta ra tyivaa cuan nandoto ra ta cuanuhu ra nya vehe ra. Ta sii xaan nanduví cuñí ñu.

Nu quita ra Pablo ñuu Troas ta cuahan ra nya ñuu Mileto

¹³Nyuhu yahá ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaa maa ndi tyiño chihin

ra. Vatyí maa ra cuñí ra cuhun ra ityi nu ñuhú ri chihin chaha ra. ¹⁴ Ta cuhva cha nañihí tahan ndi chihin ra nya ñuu Asón cuan, quihví ra chichi barcu chihin ndi ta cuahan ndi nya ñuu Mitilene. ¹⁵ Quitá ndi yucuan ta yahá ndi ityi nuu noo ñuhú luhlu cha nañí Quío nyaá mahñu tyañuhu. Ta cha inga quívi cuan chaá ndi inga ñuhú luhlu cha nañí Samos. Yahá ndi yucuan ta nyitatu ndi ñuu Trogilio. Ta cha inga quívi chaá ndi nya ñuu Mileto. ¹⁶ Tyicuan caa cuví vatyí ra Pablo ña cuñí ra cunyaa ca ra cuaha quívi ityi Asia. Ña cuñí ra cuhun ra Éfeso vatyí numi ri cuñí ra chaa ra ñuu Jerusalén, vatyí tatu cuhva chi cuhva cunyaa ra quívi vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷ Ta cuhva cha nyicu ndi ñuu Mileto, caná ra Pablo chí ra yihí ndaha chi ñu yihí cuenda Nyoo Éfeso. ¹⁸ Ta cuhva cha chaá coyo ra, catyí ra tyehe caa chi ra:

—Maa ndo chitó ndo yoso caa cuhva chica nói nyata quívi xihna ri cha chá Asia ihya. ¹⁹ Tandihí quívi cha chinyaj chihin ndo ta sacuví tyiño nuu Sutu Mañi yo chihin cha nduquí cuhva cha ma cahnu sahi chíi, vasi cuaha tindoho chihin cha cuaha tucuihya iñi. Ta cuaha tindoho quichi siqui sacuví ñáyivi Israel. ²⁰ Soco ña sandihí cha cahán nói tuhun Nyoo nuu ndo. Vatyí ihya cuví tandihí cha chiñuhú chi ndo tacuhva coo vaha ndo. Ta sañahí tuhun Nyoo chi ndo nu ndu ñin ri ndo ta nya vehe ndo ñandihí. ²¹ Ta sañahí tuhun ihya chí ñu Israel ta chí ñu cha ñima ñu Israel cuví. Sañahí chí ñu na nasama ñu cuhva iyó ñu nuu Nyoo ta nachino iñi ñu chí Sutu Mañi yo Jesucristo. ²² Ta vityin cuhin nya ñuu Jerusalén vatyí maa Tatyí li catyí. Ta ña chité ñáá cha cucuvi chíi yucuan. ²³ Soco noo ri cha chité vatyí tandihí ri nu cuahín Tatyí li catyí chíi vatyí nyatú vehe caa chíi, ta cuaha tindoho ñandihí. ²⁴ Soco ni noo ihya ta ña chicá xiñi. Ta ni ñayiví ta ña vale cha cuenda mai, tacuhva vatyí chihin tusii iñi ta cuví sañihí sahatyiñe tyiño cha chahá Sutu Mañi yo Jesús chíi, cha sañahi tuhun vaha yoso cuhva cuñí Nyoo chí yo.

²⁵ Ta vityin chitó vahi vatyí tandihí nyoho cha cahín tuhun Nyoo chihin ndo, ma nyehe ca maa ndo chíi. ²⁶ Yucuan chaha

cuñí catyí chí ndo vityin vatyí ñahri ca cuatyí yuhu cha cuenda ni noo nyoho. ²⁷ Vatyí chihin cha ñiñi cuñí ta cahín tuhun Nyoo chihin ndo ta ñahri cha tixehí. ²⁸ Yucuan chaha saha ndo cuenda chí ndo. Ta saha tucu ndo cuenda chí tandihí ñu yihí cuenda Nyoo. Vatyí maa Tatyí li tyatyinó chí ndo vatyí saha cuenda ndo chí ñáyivi iyó vehe ñuhu Sutu Mañi yo. Maa ra satá ra chí ñu chihin ñiñi ra. ²⁹ Vatyí chité vatyí quívi cuhin, cuquichi inga ra. Ta cuñi ra satívi ra chí ñu yihí cuenda Sutu Mañi yo. Tari lobo xaan cha chahñí chí mbee, tyicuan caa cuquichi ra cuan satívi ra añaíma ndo. ³⁰ Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyi-con ndo chí ra. ³¹ Yucuan chaha saha vaha ndo cuenda. Nícohon iñi ndo vatyí chíi chíi cha uñi cuiya ña sandihí cha cahín tuhun Nyoo nuu ndo. Cha ñicahñu ta cha cuaa cahín chihin noo noo nyoho, ta chihin cha cuihya iñi coto sandihí ndo tuhun Nyoo.

³² Ta vityin nyoho yañi, natyaí chí ndo ndaha Nyoo. Saha ndo cuenda ndii tuhun cahan ra chihin yo. Sacotó ra chí yo tyi cuñí xaan ra chí yo. Ta yucuan sandunyeé xaan chí iñi yo tacuhva cuvi yo ñáyivi yihí vaha cuenda ra chihin tandihí inga ñu cha nacuhva cuenda ñu chí ñu chí ra. ³³ Yuhu ña nyiyó iñi ni minoo cha iyó chí ndo. Ni ri xuhun ndo, ni ri sahma ndo. ³⁴ Nyoho chitó vaha ndo vatyí sahá tyiño xain chihin ndahi tacuhva ñiñi cha chiñuhú chíi chihin ra chicá noo chihin. ³⁵ Tyicuan ri sañahí chí ndo vatyí cuñí chí cha saha tyiño ndo ta tyinyee ndo chí ñu iyó cha chiñuhu chí. Ta nícohon iñi ndo tuhun cahán Sutu Mañi yo Jesús nu catyí ra tyehe caa: “Sii ca cuñi noo ñáyivi ñu chahá, ta ñima ca ñu ita iñi”, catyí Sutu Mañi yo.

³⁶ Cha yahá cha catyí ra Pablo tuhun ihya, chicuñí chíi ra. Ta chican tahvi ra chihin tandihí ñu. ³⁷ Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chí ra. ³⁸ Vatyí ra Pablo catyí ra tyi cuhun ra inga ñuu ta ma cuhun ca ra nu nyicu ñu. Tyicuan ta chinyacá ñu chí ra nyacua nya nu quihví ra chíi barcu.

21

Nu cuahan ra Pablo ñuu Jerusalén

¹ Tyicuan ta sandoꝝ ndi chi ra hermano ta quihvĩ ndi chichi barcu. Ta cuahan ndi iin ndoo ityi ri nya Cos noo ñuhú luhlu mahñu tyañuhu. Ta cha inga quivĩ chaꝝ ndi nya Rodas inga ñuhú luhlu ri. Yucuan ta cuahan ndi nya Pátara. ² Ta ñuu Pátara cuan nañihĩ ndi nonga barcu cha cuahan nya Fenicia. Ta quihvĩ ndi chichi inga barcu cuan ta cuahan ndi. ³ Ta cha cuahan ndi nyehe ndi ñuhú Chipre chiyo satyin ndi. Ta yahá ri ndi cuahan ndi ityi nu ca, ityi Siria. Ta chaꝝ ndi nya ñuu Tiro vatyi yucuan cuatava ra carga cha nyisó barcu cuan. ⁴ Ta cha nañihĩ ndi chi ñu yihĩ cuenda Nyoo ñuu cuan, ndoo ndi chihin ñu ucha quivĩ. Ta catyĩ ñu chi ra Pablo vatyi ña tahán chi cha cuhun ra Jerusalén vatyi tyicuan caa sañahá Tatyĩ li chi ñu. ⁵ Soco cha ndihĩ ucha quivĩ cuan quita ndi ñuu cuan. Ta nu cuaquita ndi tandihĩ ra hermano chihin ñasihĩ ra ta sehe ra chinyacá ñu chi ndi nyacua nya ityi chata ñuu. Ta nu ñiti yuhu tyañuhu cuan nicuĩñĩ chiti ndi, ta chicán tahvi ndi chi Nyoo. ⁶ Tyicuan ta nanumi ndi chi tahan ndi. Tyicuan ta quihvĩ ndi chichi barcu. Ta maa ñu cuanuhũ coyo ñu vehe ñu.

⁷ Ta quita ndi ñuu Tiro cuan ta cuahan ndi nya ñuu Tolemaida. Ta yucuan chahá ndi nocumi chi ñu hermano. Ta ndoo ndi chihin ñu noo quivĩ. ⁸ Ta cha inga quivĩ quita ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chi ñáyivĩ yoso caa sacacu Nyoo ańima ñu. Cuvĩ ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra. ⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuvi chi cuan sahá ñu profetizar. ¹⁰ Ta cha cuaha ri quivĩ cha chaꝝ ndi yucuan, tyicuan ta chaꝝ noo profeta Nyoo cha nañĩ Agabo. Quichĩ ra ityi Judea. ¹¹ Quichĩ nyehe ra nu nyicu ndi. Ta quehen ra sincho ra Pablo, ta cháhñĩ ra chaha ra ta ndaha ra, ta catyĩ ra:

—Tatyĩ li Nyoo catyĩ chii vatyi tyehẽ caa cunuhñĩ chitoho sincho ihya nya Jerusalén. Ta cuhva cuenda ñáyivĩ Israel chi ra chi ra inga ñuu —catyĩ ra Agabo.

¹² Cha chiñĩ ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyi ma cuhun ra Jerusalén. ¹³ Soco ra Pablo catyĩ ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñĩ ri, vasi cahñĩ ra chii soco cha cuenda Sutu Mañi yo Jesús —catyĩ ra chi ndi.

¹⁴ Ta cha nyehe ndi tyi ña cuvĩ chasaha ndi chi ra, saña ndi. Ta catyĩ ndi:

—Na cuvi maa cuhva cuñĩ maa Sutu Mañi yo.

¹⁵ Cha yahá tuhun ihya sanduvahá ndi chi ndi ta cuahan ndi nya Jerusalén. ¹⁶ Ta cuahan suhva ra Cesarea ra yihĩ cuenda ra Cristo chihin ndi. Ta cuahan tucu noo ra ñuhú Chipre. Mnasón nañĩ ra. Cuaha xaan cuiya chinó iñi ra chi ra Cristo. Maa ra chinyacá ra chi ndi nya vehe ra cha nyaá Jerusalén vatyi yucuan cunyaa ndi.

Nu cuanyehe ra Pablo nu nyaá ra Jacobo

¹⁷ Cuhva cha chaꝝ ndi Jerusalén, ñu yihĩ cuenda ra Cristo chihin cha siñ cuñĩ ñu cahán ñu chihin ndi. ¹⁸ Ta inga quivĩ cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihĩ ra yihĩ ndaha vehe ñuhu. ¹⁹ Chahá ra Pablo nocumi chi ra. Yahá cuan ta nacatyĩ ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuvĩ. ²⁰ Cuhva cha cachiñĩ ñu tuhun ihya, casacahnu ñu chi Nyoo, ta catyĩ ñu chi ra Pablo:

—Vaha yañi yo, soco cha nyehun vatyi cuaha xaan mil ñu Israel chinó iñi ñu chi ra Cristo. Ta tandihĩ ñu catyĩ ñu vatyi niñĩ cha cunyicon yo ley ra Moisés. ²¹ Ta ñihĩ ñu tuhun vatyi yoho sañahún chi tandihĩ ñu Israel cha iyó inga ñuu vatyi ma quichaha ca ñu ley cha sañahá ra Moisés, ta catyún chi ñu vatyi ña tahán chi sacuvĩ ñu costumbre circuncisión chihin cha lee sehe ñu, ta ni ma sacuvi ca ñu costumbre chahnu yo. ²² ¿Yoso caa sacuvi yo vityin? Vatyi ñáyivĩ cuañihĩ ñu tuhun tyi chaun ihya. ²³ Vaha taxin ca cha sacuvun tyehẽ caa. Ihya iyó cumi tahan rayĩ cha nyaá sacuvi ra noo cha tyaa ra cuhva tyi sacuvi ra nuu Nyoo. ²⁴ Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndii xiñi ra cuhva catyĩ ley. Ta cha sacuvun tyicuan caa ta coto tandihĩ ñáyivĩ vatyi ña ndicha cha cahán ñu sicun, soco cunyehe ñu vatyi quichahá tucu yoho ley ra Moisés.

²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu, ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quiti cha cava ñu sucun ta ña chati niñi. Ta ni noo ñu ta ma coo ñusihi o rayi chi ñu tatu ñima ñasihi o yá ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶ Tyicuan ta tuví inga quívi ta cuahan ra Pablo chihin ndi cumi tahan ra cuan. Ta sandundi ra chi ra nuu Nyoo ñin ri chihin ra cuan. Tyicuan ta quihví ra chichi vehe ñuhu cahnu vatyí sacoto ra chi tata sutu ama cundihi cha ucha quívi cha ndundi ndi cumi tahan ra cuan, ta cuacuhva ra ofrenda cha cuenda noo noo ra. ²⁷ Soco cha cuñi cuí ri ndihi ucha quívi cuan, ta suhva ra Israel cha quichi nya Asia canyehe ra chi ra Pablo chichi vehe ñuhu. Ta casanaquiquí ra chi tandihi ñáyivi, ta catiñ ra chi ra Pablo. ²⁸ Ta cacanacháa ra ta cacatý ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihi ri ityi. Ta sañahá ra chi tandihi ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyag ra Moisés, ta ña vaha vehe ñuhu ihya. Ta siin ri vityin tyihí ra chi suhva ra Grecia chichi vehe ñuhu sativí ra nu ii ihya —catyí ra canacháa ra.

²⁹ Tyehe caa cacatý ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Efeso. Ta cacuñi maa ra vatyí ra Pablo chinyaca chi ra chichi vehe ñuhu. ³⁰ Ta tandihi ri ñáyivi ñuu naquiquí ñu. Ta ñáyivi chinó vavaha ñu vachi coyo ñu. Tyicuan ta catiñ ñu chi ra Pablo. Ta caxita quiñoho ñu chi ra nya ityi chata vehe ñuhu, ta numi ri nacasi ñu yuvehe. ³¹ Cha cuñi ñu cahñi ñu chi ra, ta chañ tyiño chi comandante cuenda sindaro vatyí tandihi ñu Jerusalén iyó xaan naquiquí. ³² Tyicuan ta comandante cuan sandu ñin ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihí ñu cha cañi ñu chi ra Pablo. ³³ Tyicuan ta tuhva comandante nu nyaá ra Pablo. Ta tachi ra tyiño natiin sindaro chi ra, ta chahñi ra chi ra chihin uvi

tahan cadena. Yahá cuan ta ndaca tuhun ra chi ra yóo ra cuví ra, ta ñáa cha sacuví ra. ³⁴ Soco ñáyivi siin siin tuhun canacháa ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachi ra cha cunyaca sindaro chi ra Pablo nya cuartel. ³⁵ Cuhva cha cacháa ra nu cuayi yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra. ³⁶ Vatyí tandihi ñu nyicón ñu chi ra, ta canacháa ñu ta catyí ñu:

—¡Cahñi ndo chi ra! —cacatý ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego? ³⁸ Tu tyicuan caa, ñima yoho cuví ra ñuu Egipto cha quichi quívi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityi ñuhu ityi —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caqui noo ñuu cha nañi Tarso cha cuví minoo ñuu cahnu ityi Cilicia. Soco saha noo tumañi iñi chii vatyí cuhvon nacadin chihin chihin ñáyivi —catyí ra Pablo chi comandante cuan.

⁴⁰ Tyicuan ta chahá comandante cuan permiso chi ra. Tyicuan ta nicuinanyaa ra nu cuayi ta chahá ra noo seña chi ñu na cutaxin ñu. Ta cahán ra chihin sahan hebreo, ta catyí ra:

22

¹ —Nyoho tata, ta nyoho yañi, cuiñi ndo cha catyí chi ndo tyi coto ndo vatyí yuhu ñahri cuatyí —catyí ra Pablo chi ñáyivi cuan.

² Cha cachiñi ñu vatyí cahán ra chihin ñu chihin sahan hebreo, taxi ri cacuví ñu. Ta ra Pablo catyí ra:

³ —Yuhu ra Israel cuví tari maa ndo. Ta caqui ñuu Tarso ityi Cilicia. Soco Jerusalén ihya chahni. Ta ra Gamaliel sañaha chii tandihi maa cuhva yoso caa quichahi ley sutu chahnu yo. Ta tyicuan ri nduquí cuhva sacuví tyiño nuu Nyoo chihin cha tandihi

añime, tari maa cuhva nyacuví nyoho quiví vityin. ⁴Yuhu, nu quichi chi chicá nyiquen ta sataí iñi chi ñu yihí cuenda ra Cristo. Ta nacuhva cuende chi ñu na cacahñi ra chi ñu. Ta tyihí chi ñu chichi vehe caa, rayii ta ñusihi. ⁵Ra cuví nuu chi tata sutu chihin ra cacuví mandoñi, cacuví ra cha ndaa vatyi ican ra chahá tutu vatyi cuvi tiin chi yañi yo, ra yihí cuenda ra Cristo ñuu Damasco. Chahin nyicuan chinanduquí chi ñu chinó iñi chi ra Cristo, vatyi tacuhva cunuhñi ñu chihin cadena, ta quichi nyaque chi ñu nya Jerusalén ihya vatyi cutachi tuñi ra chahnu chi ñu.

Nu nacatyí ra Pablo yoso caa nanduví ra cuenda ra Cristo

(Hch. 9.1-19; 26.12-18)

⁶Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi. ⁷Tyicuan ta nduve nu ñuhú. Yahá cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehé caa?” catyí ndusu cuan chii. ⁸Tyicuan ta ndacá tuhin chi ra ta catyí: “¿Yóó yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chi”, catyí ra. ⁹Ndii ra cha cuahan coyo chihin canyehé ra ñuhú cuan, ta nayuhví ra. Soco ña cachiñi ra ndusu ra cha cahán chihin. ¹⁰Tyicuan ta quichahá catyí yuhu chi ra: “Sutu Mañi yuhu, ¿ñáá cha tahán chi sacuvi?” Ta catyí ra chii: “Ndícuíta ta cuahan nya Damasco. Ta yucuan cucatyí noo ra chuun tandihí cha tahán chi sacuvun”, catyí Sutu Mañi yo chii. ¹¹Ta vatyi nducuaí saha ñuhú cuan, ra tahn cayindahá ndahi ta cachinyacá ra chii nya Damasco.

¹²Ta yucuan iyó noo ra cha nañí Ananías. Ta sacahnú xaan ra chi Nyoo cuhva catyí ley cha tyaa ra Moisés. Ta tandihí ñu Israel cha iyó Damasco catyí ñu vatyi vaha xaan ñáyiví cuví ra Ananías. ¹³Quichí nyehé ra cuan chii. Ta cuhva cha chaá ra, catyí ra chii: “Yañi Saulo, nanyehé inga chaha”, catyí ra chii. Ta caa cuhva ri cuan nanyehí. Ta cuví nyehi chi ra Ananías cuan. ¹⁴Ta catyí ra chii: “Nyoo cuenda sutu yo nacachí ra chuun nyata ityi chata ca, vatyi coton cuhva cuñí ra, ta nyehun chi ra

Jesucristo vatyi vaha ra, ta cuiñun ndusu ra. ¹⁵Vatyi yoho cuacahun tuhun ra nuu tandihí ñáyiví. Cuanacatyun cha nyehun ta cha chiñun. ¹⁶Ta vityin, ma cuatu con. Ndícuíta ta condutyon. Ta cacán tahvun chi Sutu Mañi yo tyi cuasandachi ra cuatyun”, catyí ra Ananías chii.

Nu nacatyí ra Pablo yoso caa chahá Nyoo tyiño chi ra vatyi cuhun ra inga ñuu cucahan ra tuhun ra Cristo

¹⁷Yahá cuan ta cuanuhin Jerusalén ta cuhva cha nachaj, chahin vehe ñuhu cahnu chicachán tahvi. Ta nyehí noo visión. ¹⁸Nyehí chi Sutu Mañi yo. Ta catyí ra chii: “Sanumi. Quíta cha numi ri Jerusalén vatyi ma chino iñi ñu tuhin cha cucahun”, catyí ra chii. ¹⁹Tyicuan ta quichaha catyí yuhu chi ra: “Sutu Mañi yuhu, maa ñu chitó ñu vatyi yuhu chahin tandihí vehe ñuhu. Ta tiñ chi ñu chinó iñi chuun, ta tyihí chi ñu vehe caa ta cañi chi ñu. ²⁰Ta quiví chati ñiñi ra Esteban ra cha cahán cuendon, yuhu ñandihí nyaí yucuan. Ta ndoj vaha cha chahñi ñu chi ra. Ta sahacumi sahma ra cha cachahñi chi ra”, catyí yuhu chi Sutu Mañi yo. ²¹Tyicuan ta catyí ra chii: “Cuahan, vatyi tachí chuun nu cañi, nu nyicu ñu cha ñima ñu Israel cuví”, catyí Sutu Mañi yo chii.

Nu nyaá ra Pablo ndaha ra comandante cuenda ñuu Roma

²²Ihya ri tyasohó ñu tuhun cahán ra Pablo. Tyicuan ta quichahá canachaa ñu ta catyí ñu:

—¡Cahñi ndo chi ra chiña! Ña tahán chi coo ra ñáyiví —catyí ñu.

²³Ta canachaa ca ñu. Ta sacaa ñu sahma ñu. Ta sacaa ñu ñiyaca nu tatyi cha cuenda cha xaan xaan cuñí ñu. ²⁴Yucuan chaha comandante cuan catyí ra na cutyihí sindaro chi ra chichi cuartel. Ta tachí ra tyiño na cañi ra chi ra, vatyi cuñí ra cha quita cha ndaa ñáá tuhun cha canachaa ñáyiví siqui ra cha tyicuan caa. ²⁵Soco cha yahá cachahñi ra chi ra ta cuacañi ra chi ra, tyicuan ta ra Pablo nacatyí ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatyi yuhu ra cuenda ñuu Roma cuví ta siin ri ta cutuñi ca chii nu juez —catyí ra Pablo chi ra.

²⁶ Cuhva cha chiñi capitán cha cahan ra Pablo, chahan ra chisacoto ra chi comandante. Ta catyí ra chi ra:

—Saha cuenda chuun chihin cha nyacuvún. Vatyí ra cuan, ra cuenda ñuu Roma cuví ra —catyí ra chi ra.

²⁷ Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatyí ra cuenda ñuu Roma cuví ra. Ta ra Pablo catyí ra vatyí ican. ²⁸ Tyicuan ta catyí comandante cuan chi ra:

—Yuhu cuaha xaan xuhun tyiyahví ta nanduví noo ra cuenda Roma.

Ta ra Pablo catyí ra:

—Soco yuhu ra cuenda Roma cuví nyata caqui —catyí ra.

²⁹ Ta tyicuan caa ta sindaro cha cuacañi chi ra canyahá ra ta cuahan coyo ra. Ta nyacua nya comandante ta nayuhví ra cha cuenda cha cháñi ra chi ra chihin cadena. [Vatyí cuatyí cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu iin ri ra Israel

³⁰ Tuví inga quivi ta comandante cuan cuñí ra coto ra ñáá cuatyí tyáá ñu Israel chaha ra Pablo. Ta ndachí ra cadena cha nuñhí ra. Ta tachí ra tyiño na ndu iin ri ra cuví nuu chi tata sutu, ta tandihí ra cuenda junta. Tyicuan ta tava ra chi ra Pablo vehe caa ta chinyaca ra chi ra nu iyó junta cuan.

23

¹ Ta ra Pablo nyehe ra chi tandihí ra chihin cha ña cahan nuu ra, ta catyí ra chi ra:

—Nyoho ra yañi yo, nyacua nya quivi ihyá iyó vahi nuu Nyoo ta ñahri cha ña vaha sacuví nuu ra —catyí ra Pablo.

² Tyicuan ta ra Ananías ra cuví nuu chi tata sutu tachí ra chi ra nyicú yatyin ri nu nyaá ra Pablo, na nacañi ra ndaha yuhu ra.

³ Soco ra Pablo nacahan ra nu cahan ra ta catyí ra:

—¡Xihna ca chi maun cucañi Nyoo, vatyí sahá xaun tyi ra vaha cuvún nyaún chiña! ¿atu cutuñi chii nuun tari cuhva catyí ley? ¿Ñáa tuhun cha tachun nacañi ra chii? ta ñiima tyicuan caa catyí ley —catyí ra Pablo.

⁴ Tyicuan ta ra canyicu yucuan catyí ra chi ra:

—Ña vaha cha cahun chi ra cuví nuu chi tata sutu cuenda Nyoo —catyí ra chi ra Pablo.

⁵ Tyicuan ta ra Pablo catyí ra:

—Yañi yuhu, ña chite tatu ra cuví nuu chi tata sutu cuví ra. Vatyí catyí tuhun Nyoo tyi ma cahan ña vaha yo siqui ra cuví tyiño ñuu yo —catyí ra.

⁶ Tyicuan ta tuví iñi ra Pablo vatyí suhva ra cuenda junta cuan, yihí ra cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñí chi nuu ndo vatyí chinó iñi tyi nandotó ñu chihi —catyí ra Pablo.

⁷ Cuhva cha catyí ra tuhun ihyá, ra fariseo ta ra saduceo, quichahá candatuhun tahan ra suri chihin tahan maa ra, ta cacusiñ ra. ⁸ Vatyí ra saduceo catyí ra vatyí ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó iñi ra tandihí ihyá. ⁹ Tandihí ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehe xihna ndo, ñahri cha ña vaha sacuví ra ihyá. Soco tatu noo ángel cahan chihin ra, saha yo cuenda coto vaha siqui Nyoo cahan ña vaha yo —catyí ra.

¹⁰ Cha chiñi ra tuhun ihyá, vaa ri ca cananduví ra. Nyacua nayuhví comandante cuan coto cahnnya cuatyí ra chi ra Pablo. Yucuan chaha tachí ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel. ¹¹ Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sandunñi iñun, Pablo. Vatyí tari cahun tuhun Jerusalén ihyá, tyicuan caa tucu cuahan tucun nya ñuu Roma —catyí Sutu Mañi yo chi ra Pablo.

Nu tyáa ra Israel cuhva cahní ra chi ra Pablo

¹² Cha inga quivi, suhva ra Israel catyihí tahan ra tuhun. Catyí ra vatyí ni ma cacachi ra, ni ma coho ra nyacua nya cahní ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra. ¹³ Yaha ca uvi xico ra catyihí tahan tuhun ihyá nuu Nyoo. ¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu iin ri tuhun cahan ndi nuu Nyoo vatyi ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi. ¹⁵ Ta vityin nyoho sacuhun ndo tuhun chi comandante. Catyi ndo chi ra na quichi nyaca ra chi ra Pablo nuu ndo ityaan. Saha ndo tuhun vatyi cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe cuhva ra Pablo chiñi cue cha cahan ra. Ta chahan cue chisacoto cue chi ra Pablo nya cuartel. ¹⁷ Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyi iyó noo tuhun cuñí cue sacoto cue chi ra —catyí ra Pablo chi ra.

¹⁸ Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyi quichi nyaque chi ra cuehe luhlu ihya vatyi cuñí cue cahan cue chuhun —catyí ra chi ra.

¹⁹ Tyicuan ta tiin comandante ndaha ra cuehe luhlu cuan ta tava siin ra chi cue ta catyí ra chi cue:

—¿Náá túhun cuñún cатыun chii?

²⁰ Ta ra cuehe luhlu cuan catyí cue chi ra:

—Ra Israel cатыihí tahan vaha ra tuhun vatyi catyi ra chuun na sacuhun chi ra Pablo nu iyó junta tyaan. Vatyi casaha ri maa ra cha cuñí ra cha cutuñi vaha ca chi ra. ²¹ Soco ma chino iñun chi ra vatyi yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyi ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacúvi noo noo maa ra na. Ta vityin nyatú tuhva ra coto ra náá cucatyí maun —catyí cue.

²² Tyicuan ta catyí comandante chi ra cuehe luhlu cuan vatyi yori chihin cahan cue tuhun cha catyi cue chi ra. Yaha cuan ta natachi ra chi cue.

Nu cacu ra Pablo ndaha ra Israel ta cuahan ra nuu ra gobernador cha ñañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyi cuhun ndo Cesarea cuhva caa iin cha cha cuaa. Cuacuhun uvi ciento sindaro chihin chaha

ra, ta uñi xico uchi ra chihin caballo, ta uvi ciento ra cuiso ra lanza. ²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵ Tyicuan ta tyaá ra noo tutu quindaha ra cuhun ra. Ta tuhun cha tyaá ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi yoho, tata gobernador Félix, vatyi vaha ñáyivi cuvun. Ihya vachi nocumi chuun.

²⁷ ‘Ra Pablo ihya, catiin ra Israel chi ra. Ta cacuñi ra cacahñi ra chi ra. Soco cuhva cha chite vatyi ra cuenda ñuu Roma cuví ra, chahin chihin sindaro ta sacaquí chi ra.

²⁸ Ta vatyi cuñí cote ñáá cuatyí tyaá ñu síqui ra, chinyaque chi ra nu iyó junta ra cacuví mandoñi ñu Israel. ²⁹ Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahñi yo chi ra. Ta ni ri ña tahan chi cohon ra vehe caa. ³⁰ Soco vatyi ñihí tuhun vatyi ra Israel canducu cahñi ra chi ra, yucuan chaha tachí chi ra nuu yoho. Ta catyí tiquí chi ra cha tyaá cuatyí síqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaá ra.

³¹ Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antipátris suri maa cha cuaa cuan. ³² Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo. ³³ Ta cuhva cha chaq coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihi. ³⁴ Cha yaha cha sacuahá ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyi ra Cilicia cuví ra ³⁵ ta catyí ra chi ra:

—Na quichi xihna ra tyaá cuatyí chahun.

Tyicuan ta cusandai tyiñon —catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savaha ra Herodes ta cha naha.

24

Nu cutuñi chi ra Pablo nuu ra Félix

¹ Yaha ohon quivi ta ra Ananías, ra cuví nuu chi tata sutu, chaq ra ñuu Cesarea cuan

chihin suhva ra cacuví mandoñi, ta chihin noo ra cahan chaha ñáyivi cha nañí Tértulo. Chaá coyo ra nuu ra gobernador Félix vatyi cacán ra cuatyí chaha ra Pablo. ²Tyicuan ta tachí ra Félix na quichi nyaca sindaro chi ra Pablo. Tyicuan ta quichahá chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyi taxi ri iyó ñuu ndi, ta vaha iyó ndi vatyi yindaha vahun ñuu ndi. ³Nacuhvá xaan ndi tyahvi nyoo chi yoho tata Félix, vatyi yoho, vaha ñáyivi cuvún. ⁴Soco ña cuñí sayangue chuun chihin cha cuaha tuhun cahin, yucuan chaha chiquén noo tumañi ñi chuun na cuiñun suhva tuhun cuacahan ndi. ⁵Vatyi chitó ndi tyi rayíi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret. ⁶Nyacua cuñí ra sacuvi ra noo cha ña tahán chi vatyi ña sahá ra ñáyivi vehe ñuhu cahnu. Ta nyuhu tiñi ndi chi ra, tacuhva tachí tuñi ndi chi ra tari cuhva ley maa ndi. ⁷Soco comandante Licias chasí ri ra ta chihin cuaha fuerza ta tinyaa ra chi ra chi ndi. ⁸Ta catyí ra vatyi tatu cuñí ndi cacán ndi cuatyí chaha ra, cuñí chi cha cacán ndi nuu maun. Nyehe maun. Sanaahmon chi ra ta coton tyi ndicha cha catyí ndi —catyí ra Tértulo.

⁹Tyicuan caa tucu ra Israel cha canyicu yucuan, catyí ra vatyi ndicha tandihí tuhun cahan ra Tértulo. ¹⁰Tyicuan ta ra Félix savahá ra seña chi ra Pablo vatyi nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha sii vavaha cuñí vatyi nuu maun cuacutuñi chi yuhu vityin. ¹¹Tatu ndaca tuhun cuacoton tyi cha iyó ri noo uchi uvi quívi cha chahin Jerusalén. Chahin yucuan vatyi sacahni chi Nyoo. ¹²Ta yori chihin cuví yuhi. Ni ña sanaquiquí chi ñáyivi chichi vehe ñuhu cahnu. Ñahri maa sacuvi, ni ri chichi vehe ñuhu, ni ri chichi ñuu. ¹³Ta cuatyí cha tyaá ra ihya siqui, ña ndicha maa. ¹⁴Soco noo cha catyí chi ndo vityin vatyi yuhu sacahni chi Nyoo cha sacahnú sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó ñi ndii maa tuhun cha nyaá nu libru ley cha tyaá ra

Moisés. Ta chinó ñi tandihí tuhun catyaa ra profeta cuenda Nyoo ñandihí. ¹⁵Ta suri chinó ñi vatyi Nyoo cusanandoto ra ñáyivi chihí, ñu vaha ta ñu quiñi iyó, tari chinó ñi tucu maa ra ihya. ¹⁶Ta yucuan chaha tyicuan ri nduquí cuhva cha cachi coí nuu Nyoo, ta nuu ñáyivi ñandihí.

¹⁷Cuaha cuiya chica noi inga ityi. Yaha cuan ta cuanuhi nya Jerusalén ñui vatyi nacuhva cuende xuhun chi ñu ndahvi ñu yihí cuenda Nyoo, ta vatyi cuhve noo cha cuhve chi Nyoo. ¹⁸Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yaha cha sandundi chii nuu Nyoo cuhva catyí maa nu ley ndi. Soco ña cuaha ñáyivi nyicu, ta ni ña naquiquí ñu. ¹⁹Ican ra cha nyehe chii cuan, cuñí chi cha quichi ra ta cuhva ra cuenda tatu iyó cha sacuvi. ²⁰O nacatyí maa ra cha canyicu ihya tatu nañihí ra cuatyí yuhu quívi cutuñi chii nuu ra nu chiyo junta ra cacuví nuu chi ñu Israel. ²¹O vasi cuví chi cha cuenda noo ri tuhun cahin chihin nuu ra nyicú junta cuan tyehe caa: “Nyoho nducú ndo cuatyí chahi cha cuenda tyi chinó ñi cha nandotó ñáyivi chihí” —catyí ra Pablo.

²²Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³Tyicuan ta tachí ra Félix chi capitán na cunatyihí ra chi ra Pablo vehe caa. Soco ma ñihi xaan saha cumi ra chi ra. Ta na cuhva ra cuhan ra tahan ra nu ñohó ra, ta cahan ra chihin ra.

²⁴Yahá suhva quívi ta nachaa ra Félix inga chaha chihin cu Drusila ñasihi ra. Ta cuví ña ñaha Israel. Ta tachí ra na quichi ra Pablo vatyi cuñí ñu tyasoho ñu yoso caa tuhun cha chinó ñi ra chi ra Jesucristo. ²⁵Ta ra Pablo cahan ra tuhun yoso caa tahán chi sacuvi yo cha vaha, yoso caa cunyaca ñaha maa yo chi yo ta ma sacuvi yo cha quiñi caa. Ta cahan tucu ra yoso caa cucutuñi chi yo nuu Nyoo quívi tahan chi. Ta ra Félix yuhvi xaan ra cuvi, ta catyí ra chi ra:

—Cuahan vityin. Ta na nanuña xihne, ta cana mai chuun inga chaha —catyí ra chi ra.

²⁶ Ta ra Félix cuñí maa ra tyi ra Pablo cucuhva ra xuhun chi ra, tacuhva vatyí numi ri saña ra chi ra. Yucuan chaha vatyí tyito tyito ri cana ra chi ra, vatyí ndatuhun ra chihin ra. ²⁷ Uvi cuiya yaha, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chi ra Pablo vehe caa.

25

Nu cutuñí chi ra Pablo nuu ra Festo

¹ Tyicuan ta cha cu uñi quívi cha cuví ra Festo tyiño, quita ra ñuu Cesarea cuan ta cuahan ra nya ñuu Jerusalén. ² Chaa ra Jerusalén, tyicuan ta chaa coyo ra cuví nuu chi tata sutu ta ra cuví tyiño ñu Israel ta cachican ra cuatyí chaha ra Pablo. ³ Ta chican ra noo tumañi ñiñi cahnu chi ra Festo. Cuñí ra vatyí tachi ra Festo tyiño na quichi nyaca sindaro chi ra Pablo nya Jerusalén. Vatyí maa ra cuñí ra cahñi ra chi ra ityi vachi ri ra. ⁴ Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyai cuhva cha cunuhi yucuan cha numi ri. ⁵ Yucuan chaha, nyoho cha cuví ndo tyiño ñuu ihya, cuhun maa ndo chihin. Tyicuan ta cuví cacan ndo cuatyí chaha ra tatu iyó cha sacuví ra —catyí ra Festo chi ra.

⁶ Uña o uchi ri quívi chi nyaa ra Festo Jerusalén, ta cuanuhu ra Cesarea. Ta cha inga quívi chaa ra chichi vehe tyiño ra vatyí cutuñi chi ra ca iyó cuatyí nuu ra. Tyicuan ta cana ra chi ra Pablo. ⁷ Cuhva cha quihví ra Pablo, catuhva ra Israel cha quichi coyo nya Jerusalén, ta quichaha catyaa ra cuatyí cahnu siquí ra. Soco ñahri maa cha ndaa catava ra. ⁸ Tyicuan ta cahan ra Pablo ta catyí ra:

—Yuhu ni noo cuatyí ta sacuvi que, ni siquí ley ñu Israel, ni siquí vehe ñuhu cahnu Jerusalén, ni siquí rey cahnu Roma —catyí ra.

⁹ Soco vatyí cuñí ra Festo ndoo vaha ra chihin ra Israel, ndacá tuhun ra chi ra Pablo:

—¿Atu cuñún cuhun Jerusalén vatyí sandái tyiñon nyicuan? —catyí ra chi ra.

¹⁰ Ta ra Pablo catyí ra:

—Cha nyai nu maun. Ta maun cuví ra cuví tyiño cuenda rey cahnu Roma. Ihya cuví nu tahañ chi cutuñi chií, vatyí ra

cuenda ñuu Roma cuví. Ta chitó vahun tyi ñahri maa sacuví chi ñu Israel. ¹¹ Tatu sacuvi noo cuatyí cahnu cha tahañ chi cahñi ndo chií, ma nduqui cuhva caqui. Soco tatu ña ndicha tuhun cha cahan ra Israel ihya, yori cha iyó ityi chií cha cuhva cuenda chií chi ra cuñí cahñi chií. Chiquén vatyí cuhin nuu rey cahnu vatyí cutuñi chií nuu maa ra —catyí ra Pablo chi ra Festo.

¹² Tyicuan ta ra Festo cha yaha cha cahan tahañ ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cuhun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³ Yaha suhva quívi, tyicuan ta chaa rey Agripa chihin cu Berenice nya Cesarea, vatyí cuacuhva ñu nocumi chi ra Festo.

¹⁴ Quita suhva quívi chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayii ihya cha sandoo ra Félix vehe caa. ¹⁵ Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chaha cuenda ra noo tutu cuatyí ra, ta chicán ñu na cuví ra. ¹⁶ Ta catyí yuhu chi tandihi ra vatyí ña tuhvá ra cuví tyiño cuenda Roma chahñi chi noo ñáyivi tatu ta cahan tahañ ca ñu ta nducu ñu cuhva sacacu ñu chi ñu. ¹⁷ Yucuan chaha, quívi quichi coyo ra cacuví nuu chi ñu Israel cuan, ña sacunaj cuhva. Ta cha inga quívi chahin vehe tyiño vatyí cutuñi chi ra cha cacahan ra tuhun. Ta tachi tyiño na quichi ra cuan. ¹⁸ Soco ra catyaa cuatyí siquí ra, ña cuaha maa tuhun cacahan ra. Ta cuñí maa yuhu vatyí cahnu cuatyí cuatyaa ra siquí ra.

¹⁹ Cuñí ra cuan cuatyí chihin ra cha cuenda tuhun costumbre, cuhva chinó ñiñi ñu Israel. Cahan ra tuhun noo ra cha nañi Jesús cha chihí. Ta ra Pablo catyí ra vatyí iyó ra. ²⁰ Ta ña chité yoso caa sacuvi chihin tuhun cha tyicuan caa, ta ndaca tuhun chi ra Pablo tatu cuñí ra cuhun ra Jerusalén, vatyí cutuñi chi ra cuenda tuhun ihya. ²¹ Soco maa ra chicán ra cha cutuñi chi ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²² Tyicuan ta ra Agripa catyí ra chi ra Festo:

—Cuñí tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³Tuví inga quivi ta chaꝥ ra Agripa chihin cu Berenice. Iyo xaan caa ñu quihví coyo ñu chichi vehe vatyí rey cuví ñu. Quihví tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo. ²⁴Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehe ndo chi ra ihya. Tandihí ñu Israel ñuu Jerusalén ta ñu Cesarea cahan ñu siquí ra. Ta ña sandihí ñu cha catyí ñu chii vatyí tahán chi cúvi ra. ²⁵Soco cha cuenda yuhu ñahri cuatyí ra cha tahán chi cúvi ra. Ta suri maa ra chicán cha cutuñi chi ra nuu ra Augusto. Yucuan chaha cutachi chi ra. ²⁶Soco vatyí ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chi ra nyacá ñaha chi yo. Yucuan chaha canꝥ chi ra Pablo nuu ndo, ta nuu yoho Rey Agripa, tacuhva tyi ndaca tuhun chi ra ta cote ñáa cha tahán chi sacote chi rey cahnu. ²⁷Vatyí ña vaha cha sacuhín chi ra tatu ñahri tuhun cahín ñáa cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaꝥ ra ndaha ra ta catyí ra tyeha caa:

² —Sií xaan cuñí vatyí cuví cahin nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel siquí. ³Vatyí, yoho chitón tandihí costumbre cha iyó chi yo ñu Israel. Ta chitón tuhun tuhva yo cuví yuhu. Yucuan chaha chiquén chuun nacuiñi vahun cha cahín.

Nu catyí ra Pablo chi ra Agripa yoso caa ñayiví ra cha ni cumañi ca quihví ra cuenda ra Cristo

⁴ Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén. ⁵ Ta suri chitó ñu vatyí nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha

cahín. ⁶ Ta vityin nanyaí ihya ta cutuñi chii cha cuenda vatyí chinó iñi cha sanandotó Nyoo chi ñáyivi chihí, tari cuhva catyí ra chi sutu chahnu yo ta cha naha. ⁷ Ndi uchi uvi tahan ityi ñáyivi Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chi ñáyivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyí suri cha cuenda tuhun ihya tyaá ra Israel cuatyí siquí vityin, yoho rey Agripa. ⁸ ¿O ña chinó iñi nyoho vatyí Nyoo sanandotó ra chi ñu chihí?

⁹ Ta quivi cuan suri mai chicá xiñi vatyí vaha cha tachi tuñi chi ñáyivi chinó iñi chi ra Jesús ra ñuu Nazaret. ¹⁰ Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi. ¹¹ Cuaha chaha sanyehí tindoho chi ñu ta sahí fuerza chi ñu nacahan ña vaha ñu siquí ra Jesús. Tyeha caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chicá nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo
(Hch. 9.1-19; 22.6-16)

¹² Ta yucuan chaha cuahin quivi cuan nya ñuu Damasco chihin ndusu yuhu ra cuví nuu chi tata sutu. ¹³ Soco yoho Rey, ityi cuahin ñáa cuhva ora, nyehí noo nduva ñuhu quichí andívi, ñihí ca ican saha ñuhu ñanyii. Sandundichin chi nicachico nu cuahin ta ra cuahan coyo chihin. ¹⁴ Tyicuan ta tandihí ndi nduvá ndi nu ñuhú. Ta chihí noo ndusu cha cahán chihin, chihin sahan yo hebreo, ta catyí chi chii: “Saulo, Saulo, ¿ñáa tuhun cha chicá nyicon chii? Tari noo quiti chañí nyaa ti chata cha xaan cha saquehén ityi ra chi ti, tyicuan caa cuiñun sañicuehun suri chi maun”, catyí ndusu cuan chii. ¹⁵ Tyicuan ta catyí yuhu: “¿Yóó yoho tata?” Ta Sutu Mañi yo catyí ra chii: “Yuhu cuví ra Jesús, ra cha chicá nyicon chi. ¹⁶ Ndiçuita ta cuiñanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi. ¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin.

¹⁸ Vatyí na ñuñon nuu ñu, ta sañahun chi ñu cha ndicha, ta ma sacuvi ca ñu cha ña vaha. Soco sacuvi ñu cha vaha nu ndichin Nyoo vatyí quita ñu chichi ndaha ra ña vaha ta ndihvi ñu ndaha Nyoo tacuhva vatyí tyicuan caa cusahi ticahnu iñi cuatyí ñu ta cunaquehen ñu cha vaha cha chahá Nyoo chi ñáyivi yihí cuenda ra”, catyí Sutu Mañi yo chii.

¹⁹ Yucuan chaha rey Agripa, sacuví cha catyí Sutu Mañi yo ra Jesucristo chii nu sañahá ra chí ra chii. ²⁰ Ta cahín tuhun ra xihna ca chihin ñu nyicu ñuu Damasco. Yahá cuan ta cahín chihin ñu ñuu Jerusalén ta tandihí ityi Judea. Ta cahín chihin ñu cha ñima ñu Israel cuví ñandihí. Sacoté chi ñu nandu uvi iñi ñu cuatyí ñu, ta nandihvi ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuvi ñu cha vaha. ²¹ Cha cuenda ihya catiñ ra Israel chii chichi vehe ñuhu cahnu. Ta cacuñi ra cahñi ra chii. ²² Soco maa Nyoo tyinyeé chii. Ta iyó que nya vityin. Ta cahín tuhun Nyoo chihin tandihí ñáyivi, ñu ndahvi ta ñu tyayii. Ta ña cahín inga tuhun cha ña catyí ra Moisés ta ra profeta, vatyí cucuvi nu cuahan ca chí. ²³ Vatyí catyí ra vatyí tahán chi cha cunyehe ra Cristo tindoho. Ta cha yahá cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhu ityi cuahan ñáyivi vatyí sacotó ra yoso caa cacu aña ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñi ra cha nachino iñi rey Agripa ta cunyicon ra chí ra Cristo

²⁴ Cuhva cha catyí ra Pablo tuhun ihya, ra Festo canachaa ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chí ra.

²⁵ Soco ra Pablo catyí ra chí ra:

—Ña loco yuhu, yoho tata Festo. Soco cha cahín, maa maa ri tuhun ndicha cuví. ²⁶ Iha nyaá rey Agripa. Ta chitó vaha ra tuhun ihya. Yucuan chaha cahín chihin cha ña cahán nui. Vatyí chité tyi chitó tucu maa ra tuhun ihya, vatyí ñima tuhun xehe cuví. ²⁷ Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chité vatyí chinó iñun —catyí ra Pablo chí ra Agripa.

²⁸ Tyicuan ta ra Agripa catyí ra chí ra:

—Suhva cuii ri ca ta nachino iñi tuhun cahun ta quihvi cuenda ra Jesús —catyí rey Agripa chí ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chiñi tuhun cahín. Noo ri cha ña cuñi, cha quihí cadena ndaha ndo tari mai vityin —catyí ra Pablo.

³⁰ Cha yahá cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan. ³¹ Ta cha yahá quita coyo ñu, ta cacatyí ñu chí tahan ñu:

—Ñahri cuatyí ra ihya cha ñihí xaan. Ña tahán chí cúvi ra. Ta ni ña tahán chí cohon ra vehe caa —catyí ñu.

³² Ta ra Agripa catyí ra chí ra Festo:

—Cuví saña yo chí ra, tyehe ta ñima maa ra chicán cha cutuñi chí ra nuu ra cuví rey cahnu —catyí ra.

27

Nu tachi ra Festo chí ra Pablo nya ñuu Roma

¹ Quiví cha catyaa ra Festo ta ra Agripa cuhva tyi tachi ra chí ndi nya ñuu Roma ityi Italia, nacuhva cuenda ra chí ra Pablo ta suhva ca ra chí noo capitán cha nañi Julio. Yihí ra noo batallón sindaro, cha nañi Cuenda Ra Augusto. ² Ta cuahan tucu ra Aristarco chihin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cahun chi ñuu cha nyicú yuhu tyañuhu ityi Asia. ³ Cha inga quiví cha ndi puerto Sidón. Ta ra Julio vaha ñáyivi cuví ra chihin ra Pablo. Ta chahá ra cha cunyehe ra chí ra tahan ra ñuu cuan. ⁴ Yahá cuan ta quita ndi Sidón ta casandaa ra sahna barcu cuan ta chihin fuerza tatyí ri cuahan ndi. Ta vatyí caa tatyí siqui ndi yahá ndi chiyo xehe ca ñuhú Chipre. Vatyí ña ñihí xaan caa tatyí chiyo cuan. ⁵ Yahá sava ndi tyañuhu ityi nuu Cilicia ta Panfilia, ta chaa ndi noo ñuu cha nañi Mira ityi Licia. Ta noo ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chí Italia. Ta catyí capitán na quihvi ndi barcu cuan vatyí cahun ca ndi nu cuahan ndi. ⁷ Cuaha quiví chica ndi cuee ri. Ta chihin cha cuaha tindoho ta chaa

ndi yatyin ri ñuu Gnido. Ta cha cuenda cha ñihi xaan caá tatyí, ña chahá chi cha cuhun ndi ityi nuu, ta yahá ndi yatyin ri ñuu Salmón. Ta nacuico ndi ityi yuhu ñuhú Creta. ⁸ Nducú ndi cuhva cha cuhun ndi yuhu tyañuhu cuan ta chaá ndi nu nañi Buenos Puertos yatyin ri ñuu Lasea.

⁹ Cha cuaha xaan quivi yahá ta cha yica xaan nanduví cha caca noo ndi ityi nu tyañuhu. Vatyí cha yahá quivi vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chahá ra tuhun chi ra sacaca barcu cuan, ¹⁰ ta catyí ra:

—Nyoho ra canyicú ihya, cuiñi ndo tuhun cahín. Nyehí vatyí yica xaan cuhva cuahan yo. Ta tuví iñi vatyí cuaha xaan cusacunaá yo. Cunaá barcu ta cha nyisó chi ta nyacua nya maa yo ñandíhi. Vaha taxin ca nandoo yo ihya —catyí ra chi ra.

¹¹ Soco capitán cuenda sindaro cuan quichahá ca ra chi ra sacacá barcu chihin chitoho barcu ta ñima ca chi ra Pablo. ¹² Ña cuví yaha ndi yoo vichin yucuan tyi ñihi xaan tuhvá caa tatyí, ta yica xaan cuenda barcu. Yucuan chaha tandíhi ra ta catyí ra:

—Vaha ca cha quita yo ihya ta nducu yo cuhva chaá yo nya ñuu Fenice suri ñuhú Creta ihya. Yucuan cuví noo nu vaha cun-yaa barcu vatyí nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³ Tyicuan ta quichahá caa chiin tatyí cha quichi ityi sur. Ta cuñi maa ra vatyí vaha xaan vatyí ñima tatyí ñihi cuví, ta cuví cuhun ra chihin barcu ra nicañi ri yuhu tyañuhu ñuhú Creta cuan. ¹⁴ Ña cuaha ri chicá ra ta quichahá caa noo tatyí xaan cha quichi ityi norte. Ta tyandahá chi barcu inga ityi. ¹⁵ Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñi maa chi. ¹⁶ Ta tyandahá tatyí chi ndi ityi chiyo satyin noo ñuhú luhlu cha nañi Claudia. Ta chihin cha yíi xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chi. ¹⁷ Ta cha yahá natyihí ra lancha cuan, yucuan ta chahñi vaha ra yoho nicachico barcu vatyí coo fuerza chi. Ta yuhví ra coto tahan ra nu yaxin ndutya ta quihví barcu cuan chichi ñiti vita iyó

yuhu tyañuhu nu nañi chi Sirte, yucuan chaha sanoó ra sahma barcu ta chahá ra cha cuhun barcu yoso cuhva tyandahá tatyí. ¹⁸ Ta cha inga quivi suri ñihi xaan caá tatyí. Yucuan chaha quichahá catuchi ra carga nu tyañuhu. ¹⁹ Ta cha cu uñi quivi quehen ndi ndaha tyiño barcu ta tyihí ndi nu tyañuhu. ²⁰ Ta cuaha quivi ña nyehe ndi ni ñanyii ta ni tiño. Ta ñihi tatyí nañi chi ndi. Yucuan chaha ña tyaa ca ndi cuhva cha cacu ndi.

²¹ Cuaha quivi yahá ta ña chachí ndi. Tyicuan ta catyí ra Pablo chi tandíhi ra:

—Nyehe ndo, vaha ca tyehe ta quichahá ndo chii quivi cuan, ta ndoo taxin yo Creta cuan. Ta vityin nyehé xaan yo tindoho ihya ta cuaha ndaha tyiño sacunaá yo. ²² Soco vityin ma caca xaan iñi ndo vatyí ni noo yo ta ma cuví yo. Barcu ihya cuví cha cunaá. ²³ Vatyí Nyoo nyacá ñaha ra chii, ta sacuví tyiño nuu ra, sanyehé ra noo visión chii cuñi. Ta tuví noo ángel nui. ²⁴ Ta catyí ángel cuan chii: “Ma yuhvun, Pablo. Vatyí cuñi chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandíhi ra canyicu chuhun chichi barcu”, catyí ángel cuan chii. ²⁵ Yucuan chaha nyoho cha ñohó ndo chichi barcu, sañi ndo iñi ndo. Vatyí yuhu chinó iñi chi Nyoo. Ta chitó vahi vatyí cuvi tari cuhva catyí ángel cuan chii. ²⁶ Vasi cuanyee barcu soco cuachaa yo noo ñuhú luhlu —catyí ra Pablo chi tandíhi ndi.

²⁷ Noo cha cuaa quivi ndíhi chahun quivi chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú. ²⁸ Tyicuan ta tyicuhvá ra cha cono ndutya. Ta nyehe ra tyi oco chahun iñi tahan metro iyó. Cuahan ndi chiin ca ityi nuu ca. Ta tyicuhvá tucu ra inga chaha. Ta iyó oco ucha metro. ²⁹ Ta cayuhví ra coto nañi barcu cuan chata yuu. Yucuan chaha casanoó ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin. ³⁰ Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoó ra lancha cuan nu ndutya ityi nuu barcu cuan. Ta sahá ri maa ra tyi inga caa casanoó ra. ³¹ Soco ra Pablo

sacoto ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuvi cacu ndo —catyí ra chi ra.

³² Tyicuan ta sindaro cachahnyā ra yoho lancha. Ta casanacava ra nu ndutya. ³³ Ta cha ñaa ca cuan ra Pablo catyí ra chi tandihi ra:

—Cha iyó uchi cumi quivi cha ta cachi ca yo. ³⁴ Catyí chi ndo, na cachi yo vityin. Niñi xaan cuñi chi cha cachi yo ta ndunyee coño ñuhu yo. Vatyí cucacu yo ta ni noo ixi xiñi yo ta ma cunaa.

³⁵ Ta cha catyí ra tuhun ihya, ra Pablo quehen ra noo pan ta nacuhva ra tyahvi nyoo chi Nyoo nuu tandihi ra. Tyicuan ta tahvi ra ta quichaha chachi ra. ³⁶ Tyicuan ta tandihi ca ra canduniñ ca iñi ra ta cachachi ra ñandihí. ³⁷ Ta cha tandihi ndi cha ñohó ndi chichi barcu cuan, quita uvi ciento uñi xico chahun iñi tahan ñáyivi. ³⁸ Cuhva cha ndihi ca chachi ra ta tuchi ra yitín cha yihi trigu nu tyañuhu na nduñahma ca barcu.

Nu nyeé barcu

³⁹ Yahā cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan. ⁴⁰ Cachahnyā ra yoho cha nuñi caa vee cuan. Ta sandoq ra chichi tyañuhu. Ta casandutaya ra vitu cha sanacuico barcu. Tyicuan ta casandaa ra sahma cha tuhva chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan. ⁴¹ Ta chaā barcu cuan noo nu nañi tahan ndutya. Ta nyee xiñi chi chichi ñiti. Ta ña cuví ca natava ra. Ta suhva ca cha ña quihvi chichi ñiti, ñihi xaan cañi tyañuhu chi chi, nyacua tahvi cuatyí chi. ⁴² Tyicuan ta sindaro cacuñi ra cahñi ra chi ndi cuii maa ra cuahan cuacutuñi chi nuu ra cuví rey cahnú, coto cacono ra. ⁴³ Soco capitán sindaro cuñi ra sacacu ra chi ra Pablo. Yucuan chaha ña chahā ra cahñi ra chi ra, soco catyí ra vatyí nya ra cachitó sutya, na cuhun cuee ra nu ndutya ta quita ra nya ñuhú ityi. ⁴⁴ Ta tandihi ca ra cha ña cacuví sutya, na quehen ra vitu cha nyisó barcu, ta suhva ra chihin yiquín vitu barcu cha tahvi tyañuhu. Ta tyicuan caa cacacu tandihi ndi ta quita ndi ñuhú ityi.

28

Nu ñohó ra Pablo ñuhú Malta

¹ Cuhva cha cha yahā cacu ndi ta catyí ñáyivi iyó ñuhú cuan vatyí nu nyaá ndi nañi chi Malta, o Melita. ² Ta vaha xaan tyiñuhu ñu chi ndi. Ta sanatahan ñu ñuhú vatyí coón savi ta vichin xaan. Ta catyí ñu chi tandihi ndi, natuhva ndi yuhu ñuhú cuan natava ndi cha vichin ndi. ³ Tyicuan ta ra Pablo naquehen ra suhva nducu tyihí ra nu ñuhu. Ta noo coo quita chichi nducu cuan, cha cuenda cha iñi. Ta chachi yihi ti ndaha ra Pablo ta ndoo ti tacaq ti ndaha ra. ⁴ Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chi tahan ñu:

—Ra ihya vasi noo ra chahñi ñáyivi cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵ Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra. ⁶ Tandihí ñu nyatú ñu ñáá cuhva ndaa nu tyaq ti, o ñáá cuhva cúvi ra. Soco cha yahā nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahan ra chihin ndi. Ta tyiñuhu xaan ra chi ndi, ndoo ndi vehe ra uñi quivi. ⁸ Ta cuhvi xaan sutu ra chihin cahñi ta cha chiyó ra. Ta ra Pablo chahan ra chinyehe ra nu catuví ra. Ta chican tahvi ra chaha ra. Ta tyiso ra ndaha ra siqui ra ta nduvaha ra. ⁹ Yahā cuan ta quichaha caquichi tucu inga ñu cuhvi cha iyó nuu cuan. Ta nduvaha tucu ñu. ¹⁰ Ta tandihí ñu tyiñuhu xaan ñu chi ndi. Ta quivi quihvi ndi chichi barcu cha cuacuhun ndi, chahā ñu tandihí cha cuchiñuhu chi ndi ityi cuhun ndi.

Nu chaq ra Pablo ñuu Roma

¹¹ Uñi yoo ñohó ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chi Malta nya yahā yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chi. Quihvi ndi barcu cuan ta cuahan ndi. ¹² Ta chaq ndi ñuu Siracusa. Ta yucuan ndoo ndi uñi quivi. ¹³ Ta yucuan ta quita ndi ta cuahan ndi ityi yuhu tyañuhu nyacua nya chaq ndi ñuu

Regio. Ta cha inga quivi cuan caa xaan tatyí cha quichi ityi sur ta chica ndi uvi quivi ta chaq ndi ñuu Puteoli. ¹⁴ Yucuan ñihj tahan ndi chihin suhva ra hermano. Ta catyí ra chi ndi cha ndoó ndi noo vitya chihin ra. Yahā cuan ta quita ndi ta cuahan ndi nya ñuu Roma. ¹⁵ Ta ñu yihí cuenda Nyoo ñuu Roma cuan ñihj ñu tuhun tyi cua cha ndi. Ta chahan coyo ñu chisatahan ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihj tahan ñu chihin ndi nya nu nañi Tres Tabernas. Ta cha nanyehē ra Pablo chi ñu, nacuhva ra tyahvi nyoo chi Nyoo. Ta ndunhi ca iñi ra. ¹⁶ Cuhva cha chaq ndi Roma cuan, capitán cuan nacuhva cuenda ra chi ra ca iyó cuatyí cuan chi noo ra cuví nuu chi ra sahá cumi vehe caa. Ta chahā ra cuan cha coo siin ra Pablo. Ta noo ri sindaro sahá cumi chi ra.

Nu cahán ra Pablo tuhun Nyoo ñuu Roma

¹⁷ Uñi quivi cha yahā chaq ndi yucuan. Tyicuan ta tachi ra Pablo tyiño naquichí coyo ra cacuví nuu cuenda ñayivi Israel cha iyó ñuu Roma cuan. Ta cuhva cha ndu iin ri ra, quichaha catyí ra chi ra:

—Nyoho yañi, vasi ñahri sacuví chi ñu Israel tahan yo, ta ni ñahri sacuví siquí cos-tumbre sutu chahnu yo, soco chahā cuenda ra Israel chii chi ra ñuu Roma. Ta ñohi vehe caa Jerusalén ndaha ra ñuu Roma. ¹⁸ Ta cha cutuñí chi, ta cuñí ra nyacá ñaha casaña ra chii. Vatyí ñahri cuatyí cha cahnu cha tahán chi cuví. ¹⁹ Soco cha cuenda cha nduxaán xaan ra Israel siquí, chican taxin cha cutuñi chii nuu maa rey cahnu. Vasi ñahri cuatyí cuacaquen siquí ñu ñui nuu ra. ²⁰ Yucuan chaha canē chi nyoho vatyí cohon nui chi ndo, ta sacoté chi ndo vatyí nuhñí yuhu chihin cadena vityin cha cuenda cha yihí iñi yo, ñu Israel, chi Nyoo —catyí ra Pablo.

²¹ Tyicuan ta catyí ra Israel chi ra Pablo:

—Ña chitó maa ndi tuhun yoho. Ta yori casacotó chi ndi, ni chihin carta, ta ni ta yori ca quichi ityi Judea sacoto cha caun, o cahā ña vaha ñu sicun. ²² Soco cuñí ndi cuñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha ñayivi siquí tuhun chaah ihya —catyí ra Israel chi ra Pablo.

²³ Tyicuan ta catyihí tahan ra tuhun nya quivi quichi coyo ra inga chaha. Ta cha chaq

quivi cuan, chaq coyo cuaha ñayivi nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo añima yo. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra. ²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu. ²⁵ Ta vatyí ña iin ri chino iñi ñu ta siin siin tuhun cahán ñu, ta quichahā cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí Ii chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chi ñayivi ihya tyehe caa:

Nyoho cucuñi ndo tuhun Nyoo.

Soco ma cutuñi iñi ndo.

Ta cunyehe ndo chihin chiti nuu ndo cha sacuví Nyoo.

Ta ma tuvi iñi ndo.

Tyicuan caa catyí chi ñu.

²⁷ Vatyí añima ñu cha ndundava xaan.

Ta chiñí ri maa ñu tuhun Nyoo.

Ta natahán chiti nuu ñu,

tacuhva cha ma cuvi nyehe ñu.

Ta nicunyasí soho ñu.

Yucuan chaha ña chiñí ñu, ta ndundava añima ñu.

Yucuan chaha ña cuñí ñu quihvi ñu chichi ndahi na sanduvahi chi ñu, catyí Tatyí Ii chihin yuhu ra Isaías ta cha naha.

²⁸ 'Coto vaha nyoho vatyí vityin ta ityi nuu ca cuhin cusacote chi ñu cha ñima ñu Israel cuví vatyí sacacú Nyoo chi ñu. Ta maa ñu cuatyasoho ñu, —catyí ra Pablo chi ñu.

²⁹ Cuhva cha catyí ra Pablo tyehe caa, ra Israel cuahan coyo ra suri cuví yuhu ra chihin ra tahan ra tuhun cha cahā ra Pablo chihin ra.

³⁰ Uvi cuiya naniñ ndoq ra Pablo vehe nu nyaá ra cuenda yoo ñuu Roma cuan. Ta vaha cahán ra chihin tandihí ñu chahan vehe ra. ³¹ Ta chihin cha niñ iñi ra ta cahā ra tuhun yoso caa nyacá ñaha Nyoo añima yo. Ta sañahá ra tuhun Sutu Mañi yo ra Jesucristo. Ta yori chasí cha cahán ra.

Carta Cha Sacuhun Ra Apóstol Pablo Chi ñáyivi Ñuu

Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

¹Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyi cuví apóstol chi ra, tacuhva vatyi sacote chi ñáyivi yoso caa sacacu Nyoo aña yoy.

²Ihya cuví tuhun cha catyi Nyoo chi yo tyi cusacuví ra, ta chicunyaá nu tutu tuhun ra tandihí cha tyaa ra profeta ta cha naha.

³Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyi quichi ra siqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra. ⁴Ta Nyoo chihin Tatyí li ra sacotó cachi ra chi yo vatyi Sehe ra cuví chi ra, vatyi sanandotó ra chi ra chihin cha ndicha ñuhu ra. ⁵Ta cha cuenda maa ra Jesucristo chahá Nyoo tumañi iñi chi nyuhu cha cuhun ndi cucaca ndi tyiño ra, tacuhva nachino iñi ñáyivi chi ra nicahnu ñuhu ñáyivi, ta quichaha ñu chi ra. ⁶Ta mahñu ñu cuan, ñohó tucu nyoho vatyi suri nacana tucu ra Jesucristo chi nyoho.

⁷Sacuhín tutu ihya chi tandihí nyoho cha iyó ndo ñuu Roma. Cuñí Nyoo chi ndo ta nacana ra chi ndo vatyi coo ndo noo ñáyivi cachi cha sacahnu ndo chi ra. Na naquehen ndo cha vaha ta cha taxi ri cuñí aña ndo cha chahá Sutu yo Nyoo ta Sutu Mañi yo Jesucristo chi yo.

Nu catyi ra Pablo vatyi cuñí ra cuhun ra ñuu Roma

⁸Cha xihna ri चाहí tyahvi nyoo chi Nyoi chihin sivi ra Jesucristo, cha cuenda tandihí nyoho. Vatyi tandihí ri ityi cahán ñu tuhun vatyi chinó xaan iñi ndo chi ra Jesucristo. ⁹Ta tyiño nuu Nyoo sacuví yuhu chihin cha tandihí añaime. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyi chitó ra tyi tyicuan ri nicohón iñi chi ndo cuhva cha chican tahvi chi ra. Ta chican tahvi cha cuenda ndo. ¹⁰Chiquén chi Nyoo na cuvi cuhva cuñí ra, ta cuhin nu nyicú ndo, vatyi cha naha xaan cuñí cuhin. ¹¹Vatyi cuñí

tyinyei chi ndo, ta naquehen ndo cha vaha cha chahá Nyoo ta cuní ca iñi ndo. ¹²O cuñí chi catyi vatyi saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³Yañi, cuñí tyi coto ndo vatyi cuaha xaan chaha cuñí cunyehe nu nyicú ndo, soco nya vityin ta ña chahá chi cuhva chii. Cuñí vatyi cuní ca iñi ndo tari nduní ca iñi ñu vehe ñuhu inga ñuu nu chahín. Vatyi tatu nduní iñi ndo, nduní tucu iñi yuhu. ¹⁴Vatyi nyaá siqui cha cahin tuhun Nyoo chihin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñí iñi. Tahán chi cha cahin chihin tandihí ri ñu. ¹⁵Yucuan chaha, cha cuenda yuhu, cuñí xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶Yuhu ña cahán nui cahín tuhun Nyoo, vatyi ihya cuví fuerza Nyoo cha sacacú chi tandihí ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu. ¹⁷Vatyi tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: “Ñu cha nduvahá aña saha Nyoo, coo ñu noo ñáyivi chaa chihin cha chinó iñi ñu chi ra.”

Tandihí ñáyivi ta iyó cuatyí ñu

¹⁸Ta nyehé yo vatyi nya nu nyaá Nyoo nya andivi ta tachí tuñi ra chi ñáyivi quiñi iyó, ñáyivi ña vaha. Ta cha quiñi iyó ñu, ña chahá chi coto ñu cha ndicha. ¹⁹Chitó vaha ñu tyi tuhun vaha cuví tuhun Nyoo vatyi suri maa Nyoo sañahá ra chi ñu. ²⁰Vatyi vasi ña nyehé yo chi ra, cuví coto yo vatyi iyó ra vatyi nyehé yo tandihí cha savahá ra. Nyata chingo ñuhu ñáyivi ta tandihí cha savahá ra ta sañahá chi chi yo vatyi maa ra cuví Nyoo, ta tunyee iñi cha iyó chi ra ma ndihí maa. Yucuan chaha ma cuvi catyi ñáyivi tyi yori Nyoo iyó. ²¹Ta vasi cha chitó ñu tyi iyó noo Nyoo cahnu, soco ña sacahnú ñu chi ra tari cuhva tahán chi cha sacahnu yo chi ra. Ni ña nacuhva ñu tyahvi nyoo chi ra. Soco maa maa ri tuhun cha ñima ri tuhun chicá xihni ñu. Ta cha cuenda cha ndava aña ñu, cutondó cha chini tuñi xihni ñu ta ndoo ñu

nu ñaa iñi. ²²Vasi catyí ñu tyi chitó xaan ñu soco ñu tondo cuví ñu. ²³Vatyí cha nuu cha sacahnú ñu chi Nyoo ra cahnu ca cuví, ra ña tuhva chihi; sacahnú ñu chi xitohyo cha caá tari caá ñáyivi tuhva chihi. Ta nyacua nya xitohyo cha tari caá saa, ta coo, ta quití cha cumi tahan chaha, ta sacahnú ñu.

²⁴Yucuan chaha saña ndaha ndihi Nyoo chi ñu na sacuvi ñu tandihi cha quiñi caa cha quichí cuvi iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu. ²⁵Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savaha Nyoo ta ña cuñí ñu sacahnú ñu chi maa maa ra. Vatyí chi maa ra tahán chi sacahnú yo tyicuan ri maa. Ta na cuví chi tyicuan caa.

²⁶Yucuan chaha saña ndaha Nyoo chi ñu na sacuvi ca ñu cha chahá ticahan nuu chi ñu. Vatyí nyacua nya ñusihi nasama ñu cuhva nyacuví ñu, vatyí ca iyó ñu chihin tahan sihi ñu, ta ña tahán chi tyicuan caa.

²⁷Ta tyicuan caa tucu rayii, casandihí ra cha ca iyó ra chihin ñasihi ra, ta quichí cuvi iñi ra cacoa ra chihin tahan yii ra. Ta canyacuví ra chihin ra tahan ra, tuhun cha chahá ticahan nuu chi ra. Ta cha cuenda cuan tachí tuñi Nyoo chi ra ta tiví ra cha cuenda cha quiñi caa cha canyacuví ra. ²⁸Ta chaha cha ña cuñí ca ñáyivi nacoto nuu ñu chi Nyoo, yucuan chaha saña ndaha ra chi ñu na caca maa xiñi ñu cha quiñi caa, ta sacuvi ñu cha ña tahán chi sacuvi ñu. ²⁹Vatyí tandihi nuu cha ña vaha sacuví ñu. Iyó ñu chihin inga rayii ta ñima yii ñu cuví. Ta iyó ra chihin inga ñusihi ta ñima ñasihi ra cuví. Quiñi xaan iyó ñu. Quichi cuví xaan iñi ñu coo ca chi ñu. Nyacuví ñu cha quiñi caa. Nyiyó xaan iñi ñu cha chi inga ñáyivi. Chahñí ñu. Iyó ñu tisihi chihin tahan ñu. Sandaví ñaha ñu chi tahan ñu. Ta quiñi xaan ca iyó ñu. Ta ñii ñu cuendu. ³⁰Cahán ña vaha ñu siqui inga ñáyivi. Ta tasi cuñí ñu nyehe ñu chi Nyoo. Tyityi iñi ñu. Ta cahnu sahá ñu chi ñu. Casanducuahá ca ñu cha quiñi caa. Ta ña quichahá ñu chi sutu ñu, ta chi sihi ñu. ³¹Ña cuñí ñu tyasoho ñu tuhun vaha. Ña sacuví ñu tuhun cahán ñu. Yori maa chi cuñí ñu. Ta ña casahá ñu ticahnu iñi chi tahan ñu. Na ndahvi cuñí ñu nyehe ñu chi tahan ñu. ³²Maa ñu chitó vaha ñu ñáa cha catyí Nyoo tyi sacuví ñu, chitó ñu vatyí

ñu casacuví cha ña vaha, tahán chi tuhun chihi chi ñu ta cuhun ñu anyaya. Soco maa ñu sañihí ca ñu sacuví ñu. Ta nyacua sii cuñí ñu tatu sacuví inga ñáyivi cha quiñi caa.

2

Tachí tuñi Nyoo chi ñáyivi soco chihin cha ndicha

¹Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu nyehún cha caá inga ñu ta cahún, suri maun sacóun cuatyun. Vatyí suri iin ri cha sacuvún chihin ñu nyehún ta cahún. ²Vatyí chitó yo vatyí Nyoo tachí tuñi ra chi ñu nyacuví tyehe caa, soco chihin cha ndicha ta chihin cha ndaa, tachí tuñi ra. ³Ta yoho cha cahán nyaun chi inga ñu, suri iin ri cha sacuvún chihin ñu. Cutachi tuñi Nyoo chuun cha cahún tyehe caa. ⁴¿Ñáa tuhun ña quichahún cha cundahvi cuñí Nyoo nyehé ra chi yo ta cunyeé xaan ra cha sacuví yo? Vaha xaan ñáyivi cuví ra chihin yo. ¿Atu ña tuví iñun vatyí cha cuenda cha cundahvi cuñi ra nyehé ra chuun, ta nyatú ra cha nasamon cuhva iyón? ⁵Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaan, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quivi cutachi tuñi ra chi ñáyivi. Ta cunyehe yo tyi chihin cha ndaa ta chihin cha ndicha tachí tuñi ra chi yo. ⁶Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quivi cutachi tuñi ra chi yo. ⁷Ta cuhva ra ñáyivi cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihi cuan chi ñu cha cuenda vatyí sacuví ñu maa maa ri cha vaha chihin cha cama iñi ñu. ⁸Soco ñihi xaan cutachi tuñi ra chi ñáyivi sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha. ⁹Cuaha xaan tindoho ta tucuihya iñi cunyehe tandihi ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyivi cuenda ra. Ta tyicuan caa tucu cutachi tuñi ra chi ñu cha ñima ñu Israel cuví. ¹⁰Soco chi tandihi ñu cha sacuví cha vaha, Nyoo cucuhva ra cha cucahnu ñu

chihin ra, cha xihna ri chi ñu Israel, tyicuan ta chi ñu cha ñima ñu Israel cuví. Ta cucatyí ra tyi sii cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, iin ri cuhva cuñí maa ra chi yo. ¹² Vatyí tandihí ñu casacuví cuatyí ta ña chitó ñu ley cha chahā Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chahā Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan. ¹³ Vatyí ñu cha chiñí ley, ta ña nyacuví ñu cuhva catyí Nyoo, ñima ñáyivi vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo. ¹⁴ Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu. ¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu. ¹⁶ Cha tyaa Nyoo tyiño chi ra Jesucristo vatyí coo quívi cusandaa ra cuatyí tandihí ñáyivi iyó siqui ñuhu ñáyivi cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chahā Nyoo chi ra Moisés

¹⁷ Soco yoho catyún tyi ra Israel cuvún. Ta catyún tyi sacuvún cuhva catyí ley cha chahā Nyoo chi ra Moisés, ra cuví nuu chi ñu Israel quívi cuan. Ta cahnu sahún chuun tyi catyún tyi caá tuhun Nyoo añimon. ¹⁸ Ta chitón cuhva cuñí Nyoo ta ley cuan sañahá chi chuun cha nacachún cha vaha, catyún. ¹⁹ Ta vaha xaan sañahún ityi chi ñu cuaa, cuñí maun. Vaha xaan sacatón ñuhú chi ñu cuahan nu ñaa iñi, cuñí maun. ²⁰ Ta cuñí maun vatyí chitón saquehen ityun chi ñu cha ña chitó. Ta vatyí chitón tandihí cuí ley ta cha ndicha, chitón yoso caa sañahun chi ñu ña chitó, cuñí maun. ²¹ Tatu tyicuan caa yoho sañahún chi inga ñáyivi, ñáá tuhun ña sañahún chi maun? Tatu suri maun catyún vatyí ña tahán chi suhu yo, ñáá tuhun cha tyi maun suhún? ²² Tatu suri maun catyún vatyí ña tahán chi coo

inga ñusihí chi noo rayíi, o inga rayíi chi noo ñaha sihi, ñáá tuhun cha vatyí maun tyicuan caa sacuvún? Tatu tasi cuñún chi xitohyo, ñáá tuhun cha suhún cha tyayíi cha iyó nu nyicú chi chichi vehe ñuhu?

²³ Cahnu sahún chuun vatyí chitón ley Nyoo, soco ticahan nuu chahún chi Nyoo cha cuenda cha ña sacuvún ley cuan. ²⁴ Yucuan chaha vatyí nu tutu tuhun Nyoo catyí chi tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chi.

²⁵ Ndicha vatyí cha sacuví ñu tuhun cha tahnya chiin ñii xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chi Nyoo cuvún. Tuhun cuan tyinyeé chi chuun soco tatu quichahún tandihí ley cha chahā Nyoo chi ra Moisés ñandihí. Soco tatu ña sacuvún cha catyí ley cuan, tari quívi cha ña sacuvún costumbre circuncisión cuví cuan. ²⁶ Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuví ñu costumbre circuncisión cuan, vasi ña sacuví ñu. ²⁷ Ra cha ña sacuví costumbre cuan, soco quichahá ra cuhva catyí ley, cusanatuyi ra chi yoho cha ña quichahún, ta yoho, ra chitó ley ta ra sacuví costumbre circuncisión cuvún. ²⁸ Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chi Nyoo. Ta ni ñima cha cuenda cha sacuví ndo tuhun circuncisión. ²⁹ Vatyí ñáyivi nyaá ley Nyoo añima, ican ñu cuví ñu ñu Israel cha ndicha vaha. Tari quívi tyaa Tatyí li seña cuan añima ñu, ta ñima ñii ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuví ñu ñu vaha nuu Nyoo, ta ñima nuu ñáyivi ri.

3

¹ Tatu tyicuan caa, ñáá cha tyinyeé chi yo cha cuví yo ñu Israel? ¿O atu tyinyeé chi chi yo cha sacuví yo tuhun circuncisión?

² Cuaha cuhva tyinyeé chi. Cha xihna ri, Nyoo chahā ra ley maa ra chi yo ñu Israel.

³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuví ca Nyoo cuhva catyí ra? ⁴ ¡Ñima! Soco na saha yo cuenda vatyí Nyoo ndicha ra. Sacuví ra tandihí cuhva cha catyí ra. Vasi tandihí ñáyivi

cahán ñu cuendu. Vatyí nu tutu Nyoo catyí chi tuhun ra tyehe caa:

Sutu Mañi yuhu, cunyehe ñáyivi vatyí ñahri cuendu cahún.

Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuví noo cha ndii tatu nyaá noo cha mecú xiin. Ndií xaan ca nyehe cuan. Cha ndicha cuví cuan. Soco catyí ñáyivi vatyí tyicuan caa tucu maa Nyoo chihin yo, ndii xaan ca natuvi ra tatu yóo ta cunyacuví ca yo cha quiñi caa. Sacahnú yo chí ra cuví cuan, catyí ñu. Tyicuan ta ña tahán chí tachi tuñi ra chí yo, catyí ñu. Soco tatu tachí tuñi ra chí yo, ña vaha ra vatyí yóo sacahnú yo chí ra, catyí ñu. ⁶ Ña vaha cuhva cahán ñu, vatyí tyehe ta ña vaha Nyoo ma cuví tachi tuñi ra chí yo. Soco chitó yo tyi tahán chí tachi tuñi ra chí yo cha cuenda cuatyí yo. ⁷ Tatu nyehé yo tyi vaha Nyoo chihin cuatyí sacuví ñáyivi, ¿atu tahán chí tachi tuñi ra chí ñu? Catyí ñu tyi ña tahán chí, soco ña ndicha. ⁸ Tyehe ta ndicha cha cahán ñu cuan, vaha taxín ca sacuví yo maa maa ri cha quiñi caa tacuhva nyehe ñáyivi tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chí ñu chaha cha catyí tyi cahán ñu cuendu siquí ndi.

Tandihi yo ta iyó cuatyí yo

⁹ Ta yoso caa ¿atu vaha ca yóo ñu Israel ta ñima ca inga ñáyivi? ¡Ñima! Vatyí cha yaha sañahi chí ndo vatyí iyó cuatyí tandihi yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo. ¹⁰ Tyicuan caa catyí nu tutu Nyoo, nu catyí chí tyehe caa:

Yori maa ñáyivi vaha iyó, cha ni ña noo maa.

¹¹ Yori ñu cutuñí iñi tuhun Nyoo.

Yori maa nanducú chí Nyoo.

¹² Tandihí ñu sandoó ñu chí Nyoo, ta tandihí ñu ta sacunaq ñu chí ñu.

Yori maa ñu sacuví cha vaha.

Cha ni ña noo maa.

¹³ Tari noo ñaña ndiyi cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chí tahan ñu.

¹⁴ Maa maa ri ca maa cha quiñi caa cahán ñu.

¹⁵ Vatyí xaan ñu cha cacahñi ñu chí tahan ñu.

¹⁶ Chahá xaan ñu tundoho ta tucuihya iñi chí ñáyivi chihin cuhva iyó ñu.

¹⁷ Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸ Ni ña chicá iñi ñu tatu tachi tuñi Nyoo chí ñu noo quívi, catyí chí nu tutu Nyoo.

¹⁹ Chitó yo vatyí tandihí cha catyí ley chahnu cha quehen cuenda ra Moisés, catyí chí cha cuenda ñu nyicón ley cuan, tacuhva vatyí ma cuví catyí ñu tyi ñahri cuatyí ñu. Soco coto ñu vatyí cutahan chí cutachi tuñi Nyoo chí ñu vatyí iyó cuatyí ñu. Ta tyicuan caa tucu tandihí ñáyivi iyó siquí ñuhu ñáyivi. ²⁰ Ni minoo ñáyivi ma cuví cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá chí cha cuenda vatyí sacotó chí chí yo tyi iyó cuatyí yo.

Cha cuenda cha chinó iñi yo chí Nyoo ta cuvaha yo nuu ra

²¹ Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chí yo nu tutu tuhun ra cha tyaq profeta ta cha naha. Tatu sacuahá yo yucuan, coto yo noo cha ndicha. ²² Vatyí cha cuenda cha chinó iñi yo chí ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chí yo tatu ñu Israel cuví yo o ñima.

²³ Tandihí ri ñáyivi sacuví ñu cuatyí, ta cañi xaan nyaá ñu chihin cuhva cuñí Nyoo, ta cha tyaquí Nyoo ma cuví cunyata chihin ñu. ²⁴ Soco cha cuenda cha vaha ñáyivi cuví Nyoo chihin yo, chahá maa ra cha cuvaha yo nuu ra, ta ña tiñ cuenda ca ra cuatyí yo. Vatyí chahnya ra Cristo Jesús cuatyí yo.

²⁵ Nyoo saquichí ra chí ra Cristo vatyí cati niñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnú iñi chí yo tatu chinó iñi yo chí ra Cristo. Ta cuví chí tyehe caa, tacuhva nyehe ñáyivi tyi Nyoo vaha ra. Ta tyembu chahnu, Nyoo ña tiñ cuenda ra cuatyí ñáyivi cha cuenda vatyí cuchaa chí noo quívi cha cuquichí ra Cristo ta sanaa ra cuatyí ñu. ²⁶ Ta tyicuan caa cuví tacuhva vatyí nyehé ñáyivi vatyí Nyoo tyicuan ri vaha ra, ta sahá ra tuhun tyi vaha tandihí ñu chinó iñi chí ra Jesús.

²⁷ ¿Atu cuví sacahnu yo chi yo vityin? Ma cuvi. ¿Ñáá tuhun? Cha cuenda vatyí ma cuví catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri ñiñi yo chi ra ta cuvaha yo nuu ra. ²⁸ Cha chító vaha yo vityin vatyí Nyoo sacuvahá ra chi yo nuu ra chihín cha chinó ñiñi yo chi ra, ta ñima chihín cha sacuví yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra. ³⁰ Vatyí noo tuhun ri maa ra iyó. Ta ican ra sacuvahá ra chi yo nuu ra cha cuenda cha chinó ñiñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví. ³¹ Tatu tyicuan caa, ¿atu ña vaha ca ley chahnu cuan? ¿Ñima cha ña vaha ca! Vaha. Soco vityin chihín fuerza maa ra Cristo sañahá yo vatyí ndii maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

¹ ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra? ² Tyehe ta cuvahá ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chi ra, soco ñima nuu Nyoo. ³ Vatyí ¿ñáá catyí nu tutu tuhun Nyoo? Catyí chi vatyí ra Abraham chinó ñiñi ra chi Nyoo, ta cha cuenda cha chinó ñiñi ra chi Nyoo, Nyoo sahá ra tuhun tyi vaha ra. ⁴ Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño sahá ra, ican cuví. ⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihín noo ra cha ña nducu cuhva cacu cha cuenda cha sacuví ra ley, soco chinó ñiñi ra vatyí Nyoo sahá ra tucahnu ñiñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó ñiñi ra chi ra. ⁶ Ra David cahan ra tuhun tusii ñiñi cha iyó chi ñáyivi cha sahá Nyoo tuhun vatyí vaha ta ña tiín cuenda ra cuatyí cha sacuví ñu. ⁷ Tyehe caa catyí ra David:

Ñáyivi cha sahá Nyoo tucahnu ñiñi cuatyí, sii xaan cuñí ñu, vatyí Nyoo ña tiín cuenda ra cuatyí ñu.

⁸ Sii xaan cuñí ñu ña tiín cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ñiñi cuví tusii ñiñi ihya, o cuví tucu chi cha cuenda ñu ña sacuví cuan? Cha yahá sañahi chi ndo vatyí Nyoo sahá ra tuhun tyi vaha ra Abraham cha cuenda cha chinó ñiñi ra chi ra. ¹⁰ Soco ¿ama sahá ra tuhun tyi vaha ra? ¿Atu cha ni cumañi ca sacuví ra Abraham tuhun circuncisión cuan, o cha yahá? Ñima nya cha yahá, soco cha ni cumañi ca. ¹¹ Yahá cuan ta sacuví ra Abraham tuhun cuan, tari noo seña ri o sellu vatyí Nyoo cha yahá sahá ra tuhun tyi vaha ra cha cuenda cha chinó ñiñi ra chi ra. Ta cha cuenda ihya cuví ra Abraham tari noo sutu tandihi yo ñu chinó ñiñi Nyoo vasi ña sacuví yo tuhun circuncisión. Ta tyicuan caa, Nyoo sahá ra tuhun vatyí vaha yo. ¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu ñiñi ñu chi Nyoo tari chinó ñiñi tucu maa ra Abraham sutu chahnu yo, quívi cha ta sacuví ca ra tuhun cuan.

Chihin cha chinó ñiñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyivi chihín ra. Soco savahá Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó ñiñi ra chi Nyoo, ta Nyoo sahá ra tuhun vatyí vaha ra. ¹⁴ Tyehe ta maa maa ri ñu cha sacuví cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó ñiñi yo chi Nyoo, ta ni ñahri yahvi nyaá cha catyí ra tyi cuhva ra chiyo. ¹⁵ Vatyí ley cuan sañahá chi vatyí tahán chi tachi tuñi Nyoo chi yo tatu ña sacuví yo cuhva catyí chi. Soco tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó ñiñi yo chi ra, tacuhva vatyí cuví chi noo tumañi ñiñi cha chahá ra chi tandihi yo cha cuví yo ñáyivi chi ra Abraham. Ñima ñu chinó ri ñiñi chi Nyoo ta quichahá ley cuan cuñihi, soco cuñihi tucu ñu cha ña ita ñiñi ley, soco chi Nyoo ri chinó ñiñi ñu tari chinó ñiñi ra Abraham.

Ican ra cuví sutu tandihí ñáyivi cha chinó iñi chi Nyoo. ¹⁷ Vatyí tari catyí Nyoo nu tutu ra tyehe caa: “¿Yoho cucuvun tari noo sutu cuaha xaan ñáyivi?”, coo síqui ñuhu ñáyivi¹, catyí ra chí ra Abraham. Ta cha catyí ra tyicuan caa, cuñí chí catyí vatyí cuví yo sehe ra Abraham nuu Nyoo. Chinó iñi ra Abraham chí Nyoo, vatyí Nyoo sanandotó ra ndiyí, ta chihin tuhun cahán ra sacoo ra cha cumañi ca coo.

¹⁸ Ra Abraham chinó iñi ra chí Nyoo vasi ma cuvi ñihi ra promesa cuan tyaa maa ra cuhva, vatyí cha chahnu xaan ra. Soco yihí iñi ra cha cuñihi ra. Ta tyicuan caa, ñihi ra promesa Nyoo ta cuví ra sutu cuaha ñáyivi, tari cuhva catyí Nyoo chí ra: “Tyehe caa cucucuahe ñáyivi chuun”, catyí ra chí ra. ¹⁹ Ra Abraham ña sandihí ra cha chinó iñi ra, vasi cha noo cientu cuiya ra ta tuví iñi ra vatyí cha cuñí cúvi ra. Tari maa ra ta tari cu Sara ñasihi ra, ma cuvi ca coo sehe ñu, tyi cha chahnu xaan ñu. ²⁰ Soco ña ndu uvi iñi ra cha cuñihi ra cha catyí Nyoo tyi cuhva ra chí ra. Soco chinó iñi ra chihin cha ñi iñi ra. Ta yihí ca iñi ra chí Nyoo. Ta sacahnú ra chí ra, ²¹ cha cuenda vatyí chitó vaha ra vatyí Nyoo iyó tunyee iñi chí ra cha cusacuví ra cha catyí ra chí ra. ²² Yucuan chaha Nyoo sahá ra tuhun tyi vaha ra cha cuenda cha chinó iñi ra chí ra.

²³ Sahá Nyoo tuhun vatyí vaha ra Abraham chaha cha chinó iñi ra chí ra. Ña chicunyaá nuu tutu vatyí noo ri ra Abraham cuvaha ra, ²⁴ soco chicunyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó iñi yo chí ra, vatyí ican ra sanandotó chí ra Jesús, Sutu Mañi yo. ²⁵ Ta maa ra chahá cuenda chí ra Jesús tyi cúvi ra cha cuenda cuatyí yo, ta nandotó ra tacuhva vatyí cuvi cuvaha yo nuu ra.

5

Vityin cha nicoo vaha yo chihin Nyoo, cuaha cha vaha cucuhva ra chí yo

¹ Ta cha yahá nduvahá añaima yo nuu Nyoo cha cuenda cha chinó iñi yo chí ra, nicoo vaha yo chihin ra cha cuenda Sutu Mañi yo Jesucristo. ² Vatyí cha cuenda ra Cristo ñihí yo cha vaha Nyoo cha cuenda cha chinó iñi yo chí ra. Yucuan chaha ñi iñi yo ta sií cuñí yo, ta yihí vaha iñi yo vatyí cucuhva ra cha cuahnu cuvi yo

chihin ra. ³ Ta ñiima yucuan ri cusii cuñí yo, tahán tucu chí cusii cuñí yo quivi nyehé yo tindoho. Vatyí chitó yo vatyí cha nyehé yo tindoho cuan cutuhva ca yo coo cha cama iñi yo. ⁴ Ta tatu chihin cha cama iñi yo, yahá yo tindoho, quita vaha yo nuu Nyoo. Ta yucuan ta chitó vaha yo tyi cuñihi yo ndii maa cha cucuhva ra chí yo. ⁵ Tatu yihí iñi yo chí maa ra, ma cucahan nuu yo nyehé yo chí ra, vatyí cuñí xaan ra chí yo cha cuenda Tatyí li ra cha chahá ra runyaa añaima yo.

⁶ Vatyí quivi cha ña ñihi ca yo yoso caa sacuvi yo chihin cha cuaha cuatyí yo, quivi cuan quichi ra Cristo, quichi cúvi ra cha cuenda yo ñu iyó cuatyí. ⁷ Chitó yo vatyí yori caña iñi cúvi tyiño nuu noo ñáyivi. Vasi xityi ri caña iñi ñu cuhva ñu ñáyivi ñu cha cuenda noo ñu vaha xaan. ⁸ Soco yucuan cuví nu sañahá Nyoo vatyí cuñí ra chí yo, vatyí quichi cúvi ra Cristo cha cuenda yo vasi iyó xaan cuatyí yo. ⁹ Ta vityin cha cha yahá cuvaha yo nuu Nyoo cuenda cha chihí ra Cristo, yucuan chaha chitó vaha yo tyi ma cuhun ca yo anyaya nu cutachi tuñi Nyoo chí ñáyivi ña chinó iñi chí ra. ¹⁰ Quivi cuan xaan cuvi iñi yo chí Nyoo, soco sanicoo vaha ra chí yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihi ra chí yo vatyí iyó ñáyivi ra Cristo añaima yo vityin cha iyó vaha yo chihin ra. ¹¹ Ta ñiima ihya ri, soco cusii tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayii quihvi cuatyí síqui ñuhu ñáyivi ta chicoo tuhun chihi. Ta tuhun chihi cuan chicoo chí síqui tandihí ñáyivi vatyí tandihí ñu sacuvi ñu cuatyí cha cuenda ra Adán. ¹³ Nyata ni cumañi ca cuhva Nyoo ley chí ra Moisés ta cha iyó cuatyí síqui ñuhu ñáyivi, soco ña tiñ Nyoo cuenda cuatyí ñáyivi ta ni cumañi ca cuhva ra ley cuan. ¹⁴ Soco nyacua nya quivi ra Adán ta nyacua nya quivi ra Moisés, chinyaca ñaha tuhun chihi chí ñu cha sacuvi cuatyí, vasi ñiima tahan cuatyí ra Adán cuví, cha ña quichahá ra chí Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chí chihin tumañi iñi cha chahá Nyoo chí

yo. Vatyí cha cuenda cuatyí noo rayíi cuan, cuaha xaan ñáyívi chihí. Soco sacacú Nyoo chí yo cha caha ri, cha cuenda noo ri rayíi ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chí cuaha ñáyívi cuví. ¹⁶ Cuatyí noo ri rayíi ra Adán cuan, ma cuví ndiquí tahan chí chihin cha sacacú Nyoo chí yo. Vatyí cha cuenda cuatyí noo ri ra cuan, Nyoo tachí tuñi ra chí ñáyívi. Soco vityín chihin cha ñahri tyyahví yo, Nyoo sacacú ra chí yo ta sahá ra tuhun tyí vaha yo nuu ra, vasi cuaha xaan cuatyí sacuví yo. ¹⁷ Ndicha vatyí quichahá nyaca ñaha tuhun chíhi siquí ñuhu ñáyívi cha cuenda cuatyí noo ri rayíi. Ta cha tyicuan caa chitó yo vatyí cahnu ca cuví cha vaha cha sacuví nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvahá ñu nuu ra, ta iyó ñu ñáyívi chaa chihin tunyee íni ra Jesucristo. ¹⁸ Tari cha catyí cuatyí ra Adán ta tachí tuñi Nyoo chí tandihí ñáyívi iyó siquí ñuhu ñáyívi, tyicuan caa tucu cha cuenda cha vaha cha sacuví ra Jesucristo, Nyoo sahá ra tuhun tyí vaha ñáyívi nuu ra ta chahá ra noo ñáyívi vaha coo tandihí ñu. ¹⁹ O cuñí chí catyí tyehe caa: Cha cuenda cha ña quichahá ra Adán cuan nu cahán Nyoo, cuaha xaan ñu chicoq cuatyí ñu. Ta suri tyicuan caa tucu cha catyí cha quichahá ra Cristo nu cahán Nyoo, cuaha xaan ñu cucuvaha ñu nuu Nyoo.

²⁰ Vatyí Nyoo chahá cuenda ra ley cuan chí ra Moisés tacuhva nacoto ñáyívi tyí iyó cuatyí ñu. Ta vasi quetuví xaan cuatyí yo cha cuenda ley cuan, soco Nyoo cahnu ca tucahnu íni iyó chí ra chihin yo vatyí cuñí xaan ca ra chí yo. ²¹ Tari chinyacá ñaha cuatyí chí yo ta chahá chí tuhun chíhi chí yo, tyicuan caa tucu nyacá ñaha tumañi íni Nyoo chí yo vityín ta sacuvaha ra chí yo nuu ra vatyí coo yo noo ñáyívi cha ma naa ca maa cha cuenda Sutu Mañi yo Jesucristo.

6

Ma sacuví ca yo cuatyí soco sacuví yo cuhva catyí ra Cristo

¹ ¿Yoso caa catyí yo vityín? ¿Atu cusacuví ca yo cuatyí tacuhva vatyí sañaha Nyoo vatyí cuaha xaan tucahnu íni iyó chí ra? ² Ma sacuví ca yo. Yoó cha yahá ndu uvi íni yo cuatyí yo. Tari quívi chíhi cuatyí yo

cuví cuan. Ta ¿yoso caa cuví sacuví ca yo vityín? Ma cuví ca. ³ ¿Atu ña chító nyoho vatyí cha ndu íin ri yo chihin ra Cristo Jesús cha cuenda cha condutya yo? Tari quívi chíhi yo chihin ra cuví cuan. ⁴ Vatyí cha cuenda cha condutya yo, tari quívi cha quihví yo chíhi ñuhú íin ri chihin ra Cristo quívi chíhi ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñáyívi chaa chihin ra.

⁵ Ta íin ri coño ñuhu nanduví yo chihin ra, tari quívi chíhi yo íin ri chihin ra cuví cuan, ta cha tyicuan caa, cunandoto tucu yo tari nandoto ra. ⁶ Ta chító yo vatyí tandihí cuhva chíyo yo ta ityí chata ca, cha yaha chíhi chí nu cruzi chihin ra Cristo, tacuhva vatyí coño ñuhu cuatyí yo ma cuví ca cunyaca ñaha chí chí yo. ⁷ Vatyí ñu cha yahá chíhi, ma cuví ca sacuví ñu cuatyí. ⁸ Ta tatu cha yahá chíhi yo chihin ra Cristo, chinó íni yo vatyí cucoo tucu yo chihin ra. ⁹ Ta chító yo vatyí cha yahá chíhi ra Cristo, noo ri chaha nandoto ra, ta ma cuví ca ra. Ñahri ca tunyee íni iyó chí tuhun chíhi cha cunyaca ñaha ca chí chí ra. ¹⁰ Yahá cha chíhi ra Cristo cha catyí cuatyí ñáyívi, nandoto ra cha ma cuví ca maa ra. Ta vityín iyó ra cha cuenda maa Nyoo. ¹¹ Ta tyicuan caa tucu maa yo, ma sacuví ca yo cuatyí. Saha yo tuhun tyí cha yahá chíhi yo cha cuenda cuatyí cuan. Soco coo yo cuhva cuñí Nyoo cha cuenda cha íin ri cuví yo chihin ra Cristo Jesús Sutu Mañi yo.

¹² Yucuan chaha yoó ma cuhva yo ityí cha cunyaca ñaha ca cuatyí chí coño ñuhu yo. Ma cuhva yo ityí chí coño ñuhu yo cha saniñi chí chí yo cha sacuví yo noo cha ña vaha cha cuñí chí. ¹³ Ma cuhva yo ityí chí coño ñuhu yo cha sacuví chí cha quíni caa. Soco cuhva cuenda yo chí yo chí Nyoo, tari noo ñáyívi cha chíhi ta nandoto. Cuhva cuenda yo coño ñuhu yo chí Nyoo tacuhva vatyí sacuví yo cha vaha. ¹⁴ Vatyí cuatyí yo ma cuví ca chasaha chí chí yo. Vatyí ley cha tyaa ra Moisés, ña nyacá ñaha ca chí chí yo, soco cha cacú añima yo ta iyó yo cha cuenda tumañi íni cha chahá Nyoo chí yo.

Cuví yo tari noo musu cha sacuví cha vaha

¹⁵ Iyó yo cha cuenda tumañi íni cuan, ta vityín ña nyacá ñaha ca ley chí yo. ¿Ta tatu ña nyaca ñaha ca ley chí yo, atu tahan chí

sacuvi ca yo cuatyí? Ña tahán chi. ¹⁶Nyoho chitó vaha ndo vatyí tatu cuví ndo musu noo ra, tahán chi sacuvi ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuvi yo, tari noo chitoho yo cuví cuatyí cuan, vatyí quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyí vaha yo. ¹⁷Soco tyahvi nyoo chí Nyoo, tyí nyoho nu quichi chí cuví ndo noo musu chí cuatyí vatyí quichahá ndo chí cuan. Soco vityin chihin cha níi íñi ndo quichahá ndo tuhun Nyoo cha sañahá ñu chí ndo. ¹⁸Cha yaha cundaá cuatyí ndo, ta vityin ña nyacá ñaha ca chí chí ndo. Ta vityin cuví ndo noo musu cha cua sacuvi cha vaha. ¹⁹Cahín noo cuhva cha ña yíi ri chihin ndo vatyí ta cutuñi vaha ca íñi ndo tuhun Nyoo. Quívi cuan chahá cuenda ndo coño ñuhu ndo chí cha quiñi caa ta cha ña vaha vatyí sacuví ndo cha ña vaha. Vityin ñacuhva cuenda ndo coño ñuhu ndo chí Nyoo tacuhva vatyí coo ndo noo ñayiví cachi, ta maa maa ri cha vaha sacuvi ndo nuu ra.

²⁰Quívi cuví ndo musu cha quiñi caa, ña cuví sacuví ndo cha vaha. ²¹Soco ¿ñáá cha ñihí ndo chihin cuan? Maa ri ticahan nuu chahá cuan chí ndo. Ta ña tuví íñi ndo. Maa ri tuhun chihi ta anyaya nyisó cuan. ²²Soco vityin ña nyacá ñaha ca cuatyí chí ndo. Ta vityin cha sacuví ndo tyíño nuu Nyoo. Ta ihya ndicha tyinyeé chí chí ndo vatyí chihin ihya cuví coo ndo noo ñayiví cachi. Ta nu ndihi tuhun tyicuan ri maa cucoo ndo chihin Nyoo. ²³Cha sacuví yo cuatyí, ican cuan chahá tuhun chihi chí yo. Soco tumañi íñi cha chahá Nyoo chí yo, ican cuan cuví ñayiví cha ma naa ca maa. Ta ican cuan chahá ra ta ñahri tyiyahvi yo, cha cuenda cha ñin ri cuví yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yíhi cuenda ra Cristo

¹Yañi, nyoho ñu chitó ley cuví ndo, chitó ndo vatyí ley nyacá ñaha chí chí noo ñayiví cha ní ri ca cha iyó ñu. ²³Ta cuñun, noo ñaha tandaha, catyí ley vatyí coo ña chihin yíi ña nyacua nya cúvi ra. Ta tatu iyó ña chihin inga rayíi cha ní ri cha iyó yíi ña,

chicoo cuatyí ña nuu Nyoo. Soco tatu cha yaha chihi yíi ña, ña nyacá ñaha ca ley cuenda ñu tandaha chí ña, ta cuví tandaha ña chihin inga ra, ta ma coo cuatyí ña nuu Nyoo.

⁴Ta tyicuan caa tucu nyoho yañi. Cha chihí ndo cha cuenda ley chahnu ta cuví ndo ñu cuenda ra Cristo vatyí ican ra cuví yíi ndo vityin. Ta ican ra cuví ra cha nandoto, tacuhva vatyí cuví cotyíño Nyoo chí yo ta sacuvi yo cha vaha. ⁵Quívi chíyo yo cuhva cuñí coño ñuhu yo, ley chahnu cha tyaa ra Moisés, tacuhva sanaquiquí ri chí chí yo cha sacuvi yo cha quiñi caa, vatyí catyí chí tyi ma sacuvi yo. Soco sacuví yo, ta yucuan cuví cha chahá tuhun chihi chí añima yo. ⁶Soco vityin ña nyacá ñaha ca ley chahnu cuan chí yo, vatyí cha yaha chihi cha quiñi caa yo chihin ra Cristo. Ta vityin cuví sacuvi yo tyíño nuu Nyoo vatyí iyó yo ñayiví chaa cha chahá Tatyí lí Nyoo chí yo, ta ña sacuví ca yo tari sacuví yo quívi nyicón xaan yo ley chahnu cuan.

Ley Nyoo, ican sañahá vatyí iyó cuatyí yo

⁷Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuví ley cuan, ma cote ñáá cha cuví cuatyí. Ní ma cote tyi ña vaha cha quichi cuví íñi cha chíi inga ñayiví, tyehe ta ña catyí ley cuan vatyí ña vaha. ⁸Tyehe ta ñahri ley cuan, ma cote ñáá cha cuví cuatyí, ta ma cuñi xain sacuvi, soco quívi cha chitó ñáá cha cuví cuatyí, yucuan quívi quichí cuví xaan íñi sacuvi, vatyí naquiquí cha quiñi caa cha iyó chí. Soco tyehe ta ñahri ley, ma coto yo tyi iyó cuatyí. ⁹Ta quívi cha ña chite ñáá tuhun cahán ley cha chahá Nyoo chí ra Moisés, chicá íñi vatyí ñahri cuatyí iyó nuu Nyoo. Soco quívi chite ley cuan, ta chite vatyí tahán chí cunai nuu Nyoo vatyí iyó cuatyí. ¹⁰Catyí ley cuan tyi tatu quichahí chí chí, cucoi tyicuan ri maa. Soco cha nuu cha ñihí tahvi añime chihin ley cuan, cunaa ndihi nuu Nyoo. ¹¹Ta cuatyí cha iyó chíi, sandaví ñaha chí chíi vatyí chotyíño chí ley chahnu cuan tacuhva vatyí tahán chí cunai nuu Nyoo, vatyí ña quichahí nu cahán ley cuan.

¹²Ley cha chahá Nyoo chí ra Moisés, vaha xaan, vatyí tuhun cha chahá maa Nyoo cuví, ta tandihí cha catyí ra vatyí sacuvi yo, vaha xaan ta cuñi xaan. ¹³Ta ley vaha cuan,

¿atu ican cuan sativí chii? Ñima. Cuatyi cha sacuví, ican sativí chii, yucuan chaha tahán chi cunai nuu Nyoo. Vatyí ley vaha cuan, ican cuví cha sañahá chii vatyí cuatyi cuví cha sacuví. Ta cha tyicuan caa, sañahá ley vatyí quiñi xaan caa cha sacuví yo cuatyi.

¹⁴Ta chitó yo vatyí ley cuan, Nyoo chaha. Ta ñahri cuatyi ley cuan. Soco mai iyó cuatyi vatyí sacuví cha quiñi caa ta nyacá ñaha cuatyi cuan chii. ¹⁵Ña cutuñi iñi ñáa cha tahin. Vatyí cuñi sacuvi cha vaha, ta ña cuví sacuvi. Ta cha ña vaha cha ña cuñi sacuvi, ican cuan sacuví. ¹⁶Cuñi xain sacuvi cha vaha, soco ña cuví sacuvi, ta cha tyicuan caa tiin cuenda vatyí ley chahnu Nyoo, vaha chi. ¹⁷Ñima ca mai sacuví cha ña vaha, soco cuatyi cha iyó chii, ican cuan sacuví cha ña vaha. ¹⁸Vatyí chité vatyí iyó cuatyi cha cuenda coño ñuhi. Yucuan chaha ñahri cha vaha sacuví, vatyí quichí cuvi iñi sacuvi cha vaha, soco ña cuví. ¹⁹Cuñi sacuvi cha vaha, soco ña sacuví ta sañihí que sacuvi cha ña vaha. ²⁰Ta tatu sacuví cha ña cuñi sacuvi, ñima ca mai sacuví, soco cuatyi cha iyó chii, ican cuan sacuví.

²¹Ta tyehe caa iyó noo cha tahin, tatu cuñi sacuvi cha vaha, maa ri cha ña vaha sacuví. ²²Vatyí chichi añime tahán xaan iñi ley Nyoo. ²³Soco iyó inga ley chichi coño ñuhi, ta ña tahán iñi chi cuhva cha tahán iñi añime. Ta chahá chi cha cunyaca ñaha cuatyi cha iyó chichi coño ñuhi chii. ²⁴¡Ndahví yuhu ra ndahví! ¿Yóó ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi? ²⁵Noo tuhun ri maa Nyoo sacacú ra chii cha cuenda ra Jesucristo. ¡Tyahví nyoo chi Nyoo cha cuenda cuan! Ta vityin nyehí vatyí chihin añime cuñi sacuví ley Nyoo, soco coño ñuhi cuñi chi sacuví chi ley cuatyi.

8

Tatyí li Nyoo tyinyeé chi chi yo ta cuví coo yo noo ñayiví chaa

¹Soco vityin, Nyoo ma tachi tuñi ca ra chi ñu ndu iin ri chihin ra Cristo Jesús, ta ña iyó ca ñu cuhva cuñi coño ñuhu ñu, soco iyó ñu cuhva cuñi Tatyí li ra. ²Ta tyicuan caa tucu yuhu, Tatyí li Nyoo nyacá ñaha chii vityin vatyí ndachí chi chii, ta chahá chi noo ñayiví chaa coi cha cuenda cha iin

ri cuví chihin ra Cristo Jesús. Ta vityin ña nyacá ñaha ca ley cuatyi ta tuhun chihí chii.

³Nyoo sacuví ra noo cha ña cuví sacuvi ley cha quehen cuenda ra Moisés, vatyí ña cuví chasaha chi coño ñuhu cuatyi yo cha nyacá ñaha chi yo. Yucuan chaha Nyoo saquichí ra chi Sehe ra. Quichí ra chihin noo coño ñuhu tari maa yo, ta chihí ra cha cuenda cuatyi yo, ta sandihí ra tuhun cha nyacá ñaha cuatyi chi yo. ⁴Sacuví Nyoo tyehe caa tacuhva cuvi sacuvi yo cuhva catyí ley ra, vatyí ñima ca cuhva cuñi coño ñuhu yo iyó yo, soco iyó yo cuhva cuñi Tatyí li Nyoo.

⁵Vatyí ñu iyó cuhva cuñi coño ñuhu, cuhva cuñi chi chicá xiñi ñu, soco ñu iyó cuhva cuñi Tatyí li Nyoo, cuhva cuñi Tatyí li Nyoo chicá xiñi ñu. ⁶Ta ñu chicá xaan xiñi maa maa ri tuhun cha cuñi coño ñuhu ñu, cunaa ñu nuu Nyoo. Soco ñu chicá xiñi cuhva cuñi Tatyí li. Iyó cha taxi ri añima ñu ta cucoo ñu ñayiví tyicuan ri maa chihin Nyoo. ⁷Ñu cha maa maa ri cuhva cuñi coño ñuhu chicá xiñi, ñu xaan iñi chi Nyoo cuví ñu, vatyí ni ña cuñi ñu ta ni ña cuví sacuvi ñu cha catyí ley ra. ⁸Yucuan chaha ñu iyó cuhva cuñi coño ñuhu, ña cuví sacuvi ñu cuhva tahán iñi Nyoo. ⁹Soco nyoho ña iyó ca ndo cuhva cuñi coño ñuhu, vatyí tatu ndicha cha iyó Tatyí li Nyoo añima ndo, iyó ndo chihin cha iin ri cuví ndo chihin Tatyí li Nyoo. Ñu cha yori Tatyí li ra Cristo ñohó añima, ñima ñu cuenda ra Cristo cuví chi ñu. ¹⁰Soco ñu iyó ra Cristo añima, nyitó añima ñu vatyí sanduvahá Nyoo. Soco coño ñuhu ñu chihí chi cha catyí cuatyi. ¹¹Nyoo sanandoto ra chi ra Jesús cha yahá cha chihí ra. Ta tyicuan caa tucu nyoho, tatu iyó Tatyí li Nyoo añima ndo, cusanandoto tucu Nyoo chi coño ñuhu ndo chihin Tatyí li ra.

¹²Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo cuhva cuñi coño ñuhu yo. ¹³Vatyí tatu iyó ndo maa maa ri cuhva cuñi coño ñuhu ndo, cunaa ndo nuu Nyoo. Soco tatu iyó ndo cuhva cuñi Tatyí li Nyoo chihin tunyee iñi ra, cuví chasaha ndo chi cha quiñi caa cha cuñi coño ñuhu ndo ta cuconyito ndo cha ndicha cuí.

¹⁴Vatyí tandihí ñu sacuví cuhva saquehen ityi Tatyí li Nyoo, sehe Nyoo cuví chi ñu.

¹⁵Nya quiví cha tiin cuenda yo Tatyí li Nyoo ta ña yuhví ca yo chi ra, vatyí ñima tari noo

ra nyacá ñaha chihin cha xaan cuví ra, ta vityin nanduví yo sehe ra. Tatyí li sacahán chí yo na cahan yo chihin Nyoo tyehe caa: “Sutu Mañi yuhu”, catyí yo chí ra.

¹⁶ Ta suri maa Tatyí li cuan ndú ñin ri chí chihin cha chíñi tuñi yo ta sacoto chí chí yo vatyí cha cuví yo sehe Nyoo. ¹⁷ Ta cha cuenda cha cuví yo sehe ra, iyó ityi chí yo cha ñihi yo cha vaha cha catyí Nyoo tyí cuhva ra chí yo, ñin ri chihin ra Cristo. Vatyí tatu ñin ri nyehé yo tindoho chihin ra Cristo, suri ñin ri cucahnu yo chihin ra.

¹⁸ Chité vatyí tindoho cha nyehé yo vityin, noo cha luhlu ri cuví cha nuu cha tyaquí cha cunyehe yo nachaa yo nuu nyaá Nyoo.

¹⁹ Tandihí cha savahá Nyoo cuñí xaan chí nyehé chí, ta nyatú chí quívi cha cusañaha ra yóo cha cuví tandihí sehe ra. ²⁰ Vatyí tandihí cha savahá Nyoo tiví chí. Vasi ña cuñí chí tiví chí soco Nyoo chahá ra cha tiví chí cha cuenda cuatyí cha sacuví ñáyivi. Soco catyí Nyoo tyí coo quívi ta cunduchaa tucu chí inga chaha. ²¹ Tandihí cha savahá Nyoo ta cunduchaa tucu chí inga chaha, ta ma cutiví ca, quívi cha cunasama Nyoo cuhva iyó chí vityin. Ta cucusií cuñí chí ñin ri chihin tandihí sehe Nyoo vatyí ma tiví ca chí. ²² Chitó yo vatyí tandihí cha savahá Nyoo ta nyehé xaan chí tindoho. Cahnú xaan tindoho nyehé chí tari cha uhvi cha nyehé noo ñaha sihi cha cacú sehe ña. ²³ Ta ñima maa ri maa chí nyehé tindoho, soco nyehé tucu yóo. Vasi cha natíñ cuenda yo Tatyí li cha chahá quívi Nyoo chí yo, soco cahnú xaan tindoho nyehé yo, vatyí cuñí xaan yo cha tahán ri chí quívi cha cunanduví yo sehe ra. Vatyí cunasama ra cuhva iyó coño ñuhu yo. ²⁴ Vasi ta ñihi ca yo tandihí cuan soco chitó yo tyí cuñihi yo vatyí chino ñini yo ta chihin cuan cacú yo. Tatu nyatú yo cha cutahan chí chí yo, cuñí chí catyí vatyí ta ñihi ca yo. Tatu cha yahá ñihi yo chí chí, ma cuatu ca yo. ²⁵ Soco tatu yihí ñini yo cha ñihi yo noo cha ta nyehé ca yo, cuñí chí cha cuatu yo chihin cha cama ñini yo. ²⁶ Ta suri tyicuan caa tyinyeé tucu Tatyí li chí yo chihin cha vita cuñí yo vatyí ña chitó yo yoso caa cacan tahvi yo chí Nyoo cuhva tahán chí. Ta Tatyí li cuan chicán tahvi chí chí Nyoo cha cuenda yo chihin noo tuhun cha ña cuví nacatyí yo. ²⁷ Chitó maa Nyoo ñáá cha caá ñima yo, ta chitó ra ñáá

cha cuñí Tatyí li ra cacan chí, vatyí chicán chí cuhva cuñí maa ra cha cuenda ñáyivi cuenda ra.

²⁸ Chitó yo vatyí ñáyivi, ñu cuñí vavaha chí Nyoo, tandihí cha cuví chí ñu ta tyinyeé chí chí ñu, vatyí maa ñu cuví ñu nacachí ra, tari cuhva tyaa ra cuhva chí ñu. ²⁹ Vatyí nya quívi xihna ri, ta cha ñohó nuu Nyoo yóo cuví ñu cucunyicon chí ra. Ta tyaa ra cuhva chí ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandihí ca yañi ra, ñu yihí tuhun Nyoo. ³⁰ Ta ñu cha tyag Nyoo cuhva tyí cuví ñu sehe ra, nacanā tucu ra chí ñu. Ta ñu cha nacanā ra, suri sacuvahá ra chí ñu nuu ra. Ta ñu cha sacuvahá ra chí, chahá ra cha cucahnú cuví ñu chihin ra.

³¹ ¿Ñáá cha catyí yo cha tyicuan caa? Tatu Nyoo ta nyaá ra tumañi ñini chí yo, ¿yóo cha cuví tyaa cuatyí siquí yo? Yori. ³² Nyoo ña catyí ra cha ma cuhva cuenda ra sehe ra, soco chahá cuenda ra chí ra vatyí cúvi ra cha cuenda tandihí yo. Ta tatu tyicuan caa, ¿atu ma cuhva tucu ra tandihí ca cha chíñuhú chí yo ñin ri chihin Sehe ra? Cuhva ra. ³³ ¿Yóo cha cuví tyaa cuatyí siquí ñu cha nacachí Nyoo? Yori. Vatyí Nyoo ican ra cuví ra sahá ra tuhun tyí vaha ñu nuu ra. ³⁴ ¿Yóo cha cuví catyí tyí cunhú yo anyaya? Yori. Vatyí ra Cristo cuví ra chíñi cha cuenda cuatyí yo, ta nandotó ra ta vityin nyaá ra chiyo vaha ndaha Nyoo, ta chicán tahvi ra nuu Nyoo cha cuenda yo. ³⁵ Ñahri cha cuví sacuachiyo chí yo chihin cuhva cuñí xaan ra Cristo chí yo. Vatyí vasi nyehé xaan yo tindoho, vasi iyó tisihi, vasi cahán ñáyivi chí yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chíñi yo, soco ma cuví sacuachiyo tandihí tindoho cuan chí yo chihin cuhva cuñí ra chí yo. ³⁶ Vatyí tyehe caa cahán chí nuu tutu Nyoo tuhun tindoho cha cunyehe yo:

Cha cuendon, Sutu Mañi yuhu, ta cuñí cahñi ñáyivi chí ndi tandihí quívi.

Ta tari noo mbee cha cua cahñi ñu, tyicuan caa sacuví ñu chí ndi, catyí chí.

³⁷ Soco vasi yahá yo tandihí tindoho cuan, soco cucuvi vaha ca chasaha yo cha cuenda ra cha cuñí xaan chí yo. ³⁸ Yucuan chaha chitó vahi vatyí ñahri maa cha cuví sacuachiyo chí yo chihin cuhva cuñí xaan Nyoo chí yo. Ni tuhun chíñi, ni ñáyivi iyó

yo, ni ángel, ni tatyi ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusiin chi chi yo chihin Nyoo. ³⁹Ni cha iyó nu sucun, ni cha iyó nu cono xaan, ni nonga cha savahā Nyoo, ma cuví sacusiin chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

9

Nyoo nacachi ra chi ñu ñuu Israel

¹Cahín cha ndicha, tari tuhvá cahán noo ra chinó iñi chi ra Cristo. Ña sandaví ñahi, vatyi Tatyi li Nyoo ican saquehén ityi cha chiñi tuñi xiñi. Yucuan chaha chitó vahi vatyi cha ndicha cahín nu catyí tyi ²cuihya xaan cuñí ta tyicuan ri uhvi cuñí añime ³cha cuenda ñu ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa. ⁴Ta maa ñu, tata ra Israel vachi ñu. Ta Nyoo naquehén cuenda ra chi ñu tari cha sehe ra. Ta sañahā ra cuhva caá ra chi ñu, tyi cahnu xaan ra cuví ra, vatyi chinyaa ra chihin ñu. Ta natyihí tahan ra tuhun chihin ñu, ta chahā ra ley ra chi ra Moisés vatyi cuhva ra chi ñu. Ta sañahā ra cuhva cuñí ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi. ⁵Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihi cha iyó. ¡Na sacahnu yo chi ra tyicuan ri maal! ¡Ta na cuví chi tyicuan caa!

⁶¿Atu catyí vatyi ña sacuví Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyi ña tandihi ñáyivi Israel cuví ñu ñu Israel cha ndicha. ⁷Ña tandihi ñu tata ra Abraham ta cuví ñu sehe ra cha ndicha. Vatyi tuhun cha cahán maa Nyoo chihin ra, cahán chi cha cuenda noo ri sehe ra. Vatyi catyí Nyoo chi ra tyehe caa: “Cha cuenda ra Isaac sehun cucoo ñáyivi chuun.” ⁸Ihya sañahá chi yo vatyi ñima cha cuenda tata cha vachi ñáyivi ta cuví ñu ñáyivi cuenda Nyoo. Soco tandihi ñáyivi chinó iñi tuhun catyí Nyoo tyi cusacuvi ra, ican ñu cuví ñu sehe ra cha ndicha. ⁹Vatyi cha catyí Nyoo tyi cuhva ra chi ra Abraham, ican cuví ihya: “Quivi cha tahán chi, cuquichi nu nyicú ndo ta cu Sara cucoo noo sehe ña”, catyi Nyoo chi ra.

¹⁰Ta ñima yucuan ri. Vatyi ni nduvi sehe cu Rebeca, iin ri sutu ra, sutu chahnu yo, ra Isaac. ¹¹⁻¹²Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyí Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuví Nyoo tyicuan caa vatyi cachí ra chi ñáyivi cha cuñí maa ra, ta ñima cha cuenda cha sacuvi ñu. ¹³Tari catyí ra nu tutu ra tyehe caa: “Cuñí que chi ra Jacob, ta chi ra Esaú ña cuñí.”

¹⁴¿Tu tyicuan caa ñáá cha cucatyi yo? ¿Atu cuví catyi yo tyi ña vaha cha sacuví Nyoo? ¡Ma cuví! ¹⁵Vatyi catyí ra chi ra Moisés tyehe caa: “Cu cundahvi cuñi yóo ñáyivi cuñí mai cundahvi cuñí.” ¹⁶Ta tyicuan caa chitó yo vatyi ma cundahvi cuñi Nyoo nyehe ra chi ñáyivi cha cuenda cuhva cuñí maa ñu, o cha cuenda cha sacuví ñu. Soco cuhva cuñí maa Nyoo cucuvi. Vatyi maa ra cuví ra cundahvi iñi yóo chi cuñí maa ra. ¹⁷Vatyi nu tutu ra, catyí ra chi rey Egipto tyehe caa: “Sacuví rey chuun tacuhva sañahí tunyee iñi cha iyó chii chi ndo, ta tandihi ñáyivi cucoto ñu yóo ra cuví yuhu”, catyí Nyoo. ¹⁸Ta tyicuan caa Nyoo cundahvi cuñí ra yóo ñáyivi cuñí maa ra. Ta suri sandundavá tucu ra añima ñu cuñí maa ra sandundava ra.

¹⁹Ta cu catyun chii: “Tatu tyicuan caa, ¿ñáá tuhun cha tyaa Nyoo cuatyi siqui ñáyivi? Vatyi ¿yóo cha cuví nacahnu cuhva cuñí ra? ¡Yori!” ²⁰Soco ña vaha cuhva chicá iñun cha tyicuan caa. Vatyi yori cuví catyi tyi ña vaha cha sacuví Nyoo. ¿Yóo ra cuví yoho vatyi nacahun nu cahán Nyoo? ¿Atu cuví catyi quisi ñuhú cuan chi ñu cha savahā chi chi vatyi ña tahán iñi chi cuhva cha savahā ñu chi chi? Ma cuvi. ²¹Vatyi ñu cha savahá ndaha tyiño iyó ityi chi ñu savahá maa ñu ñáá cha cuñí ñu chihin nyahyu cuan. Chihin nyahyu cuan cuví savaha ñu noo quisi finu xaan. Ta cuví savaha tucu ñu noo cha ndahvi ri.

²²Tyicuan caa tucu Nyoo, iyó ityi chi ra cha tachi tuñi ra chi ñáyivi quiñi iyó cha cuenda cha sacuví ñu cha ña vaha. Ta cuví sañaha ra chi ñu tyi iyó xaan tunyee iñi chi ra. Soco sanyee xaan ra iñi ra chihin ñáyivi cuan. Ta chi maa ñu tahán chi tachi tuñi ra. Ta tahán chi sanaa ra chi ñu. ²³Ta iyó tucu ityi chi ra cha saha ra tucahnu iñi chi ñu savahā maa ra vatyi sañahá ra tyi cahnu

ra cuví ra. Maa ñu cuví ñu ñu cachí ra vatyi cuñihi ñu tandihi cha vaha, ta cucoo ñu gloria chihin ra. ²⁴ Ta suri maa yo cuví ñu cuan. Vatyi Nyoo cana ra chi yo. Yihí yo cuví yo ñu Israel, ta yihí yo cha ñima ñu Israel cuví yo. ²⁵ Tari catyí Nyoo nu tutu cha tyaa ra Oseas tyehe caa:

Ñu cha ñima ñu ñui cucatyi yuhu tyi ñáyivi chii cuví chi ñu.

Ñu cha ña cuñi, cunacuñi chi ñu, catyí Nyoo.

²⁶ Ta suri nu catyí Nyoo chi ñu tyehe caa: “Nyoho ñima ñáyivi chii cuví ndo.” Ta suri yucuan cunacatyi tucu ra chi ñu: “Sehe yuhu, ra cuví Nyoo nyito, cuacuvi ndo.”

²⁷ Soco cha cuenda ñu Israel catyí ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu. ²⁸ Vatyi Sutu Mañi yo numi ri cusacuvi ra tandihi cha catyí ra tyi cusacuvi ra siqui ñuhu ñáyivi chihin cha cachi.” ²⁹ Tari catyí tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihi cha iyó andívi, ta ma sacacu ra chi suhva yo, cunaa tandihi yo,

Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuhva ñu nuu Nyoo soco ña ñihí ñu cuhva

³⁰ ¿Tatu tyicuan caa, ñáa cha catyí yo? Ñáyivi cha ñima ñu Israel cuví, ña nanducu ñu cuhva cuhva ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chi ra. ³¹ Ta ñu Israel nyicón xaan ñu ley, tyi cuñí maa ñu tyi cuhva ñu nuu Nyoo chihin cuan, soco ña cuví. ³² ¿Ñáa tuhun? Vatyi cuñí ñu cuhva ñu nuu Nyoo chihin cha sacuví ñu ley cuan, ta ña cuñí ñu cuhva ñu nuu ra chihin cha chinó iñi ñu chi ra. Yucuan chaha vatyi tari cha catyihí chaha ñu chihin noo yuu cuví chi cuan. ³³ Yuu cuan चाहं Nyoo tuhun nu tutu ra tyehe caa:

Ñuu Sión, yucuan tyai chi noo rayi cha cuví tari noo yuu.

Noo yuu cha sanduvá chi ñáyivi cuví ra.

Soco ñu chinó iñi chi ra ma cucahan nuu ñu, catyí Nyoo nu tutu ra.

10

¹ Yañi, cuñí xain chihin cha tandihi añime cha cacu ñu Israel. Ta cha chican tahvi xain cha cuenda ñu. ² Cha ndicha cuví vatyi cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví ñu. ³ Vatyi ña chitó ñu yoso caa sacuvahá Nyoo chi ñáyivi nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu. ⁴ Vatyi ra Cristo cha quichí ra ta sacuví ra tandihi cha catyí ley, ta sacuví ra vatyi tandihi ñu chinó iñi chi ra, cuhva ñu nuu Nyoo.

⁵ Catyí ra Moisés vatyi cuví cuhva ñáyivi, soco tatu quichahá ñu cha catyí ley, vatyi catyí ra tyehe caa: “Ñu cha quichahá tandihi cha catyí ley, coo ñu noo ñáyivi cha ma naa ca maa.” ⁶ Soco cha cuhva yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyi cuñí chi cha cundaa noo ra andívi ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyi cha yaha quichi ra Cristo. ⁷ Ni ma caca xiñun vatyi cuñí chi cha cunoo noo ra chichi ñuhú vatyi sanandoto ra chi ra Cristo, vatyi cha yaha nandoto ra.

⁸ Ma caca xiñun tyicuan caa vatyi tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichí ra Cristo ta nandoto ra. Ican cuví tuhun cha tahán chi chinó iñi yo. ⁹ Tatu chihin yuhun catyún vatyi ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha yaha chihí ra, cucacu añimon.

¹⁰ Vatyi chihin añima yo cuñí chi chino iñi yo chi ra Cristo tacuhva cuví cuhva yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo. ¹¹ Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.” ¹² Vatyi Nyoo ñn ri cuhva nyehé ra chi ñu Israel ta chi ñu inga ñuu. Vatyi suri maa ra cuví ra ra nyacá ñaha chi tandihi yo. Ta nasocó xaan ra chi tandihi yo cha chican tahvi yo chi ra. ¹³ Vatyi tyehe caa catyí tuhun Nyoo: “Tandihí ñu cha chican tahvi chi ra Jesús cucacu añima ñu.” ¹⁴ Soco ¿yoso caa cucacan tahvi ñu chi ra tatu ta chino ca iñi ñu chi ra? Ta ¿yoso caa cuchino

iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cahán tuhun ra chihin ñu? ¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaqui nu chaa ñu cahán tuhun vaha nuu ñáyivi.” ¹⁶ Soco ña tandihi ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuiñi chino iñi tuhun cahán ndi”, catyí ra. ¹⁷ Yucuan chaha cha chiñi xihna yo tuhun ra Cristo, tyicuan ta chino iñi yo chi ra.

¹⁸ Soco ndacá tuhin ihya: ¿Atu ña chiñi ñu Israel tuhun Nyoo? ¿Chiñi ñu! Vatyí nu tutu Nyoo catyí chi tyehe caa:

Sutu Mañi yuhu, cha sacotó ñáyivi tuhun maun nicahnu siquí ñuhu ñáyivi, catyí chi nu tutu Nyoo.

¹⁹ Soco ndacá tuhin inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¿Chitó ñu! Vatyí cha xihna ri ra Moisés tyaq ra tuhun cahán Nyoo chihin ñu Israel tyehe caa:

Nyoho, cucuquiñi cuiñi ndo vatyí cucuhve cha vaha chi noo ityi ñáyivi cha ñima ri tuhun, ñáyivi cha ña cutuñi iñi.

Ta cunaquiqui tisihi ndo nyehé ndo chi ñu, catyí Nyoo.

²⁰ Ta ra Isaías caña iñi ra catyí ra tyi ñu cha ña nanducú chi Nyoo, nañihí ñu chi ra. Ta sañahá ra chi ra chi ñu cha ña ndacá tuhun tuhun ra. ²¹ Ta tyaq tucu ra Isaías tuhun cahán Nyoo chihin ñu Israel tyehe caa: “Ndiyaca cañe chi ñáyivi chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyí Nyoo.

11

Yihí ñu Israel cha ñihí ñu cuhva cacu añima ñu

¹ ¿Atu ña cuiñi ca Nyoo chi ñu Israel? Ñima cha ña cuiñi ca ra chi ñu, vatyí suri ra Israel cuví tucu yuhu. Vatyí tata ra Abraham ta tata ra Benjamín cuví. ² Nyata cha naha cachí Nyoo chí ñu Israel tacuhva cuví ñu ñáyivi chi ra. Ta vityin ñima cha sacuachiyó ndihi ra chi ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe

caa: ³ “Sutu Mañi yuhu, chahñi ñu chi ra cuví profeta maun, ta satani ñu arta vehe ñuhu maun. Noo tuhun ri ca mai ndoo, ta cuiñi ñu cahñi ndihi ñu chii”, catyí ra. ⁴ Soco nacahan Nyoo ta catyí ra chi ra Elías: “Ñima maa ri maun ndoo. Ucha ca mil ñáyivi naquehen vahi cha ña chicuiñi chiti ñu nuu xitohyo nyoo Baal”, catyí Nyoo chí ra. ⁵ Ta suri tyicuan caa vityin, ndoo suhva ñu sacahnú chi Nyoo. Ican ñu nacachí Nyoo chii tyi cusaha ra tucahnu iñi chi ñu. ⁶ Vatyí cha cuenda cha vaha ñáyivi cuví Nyoo ta sahá ra ticahnu iñi chi yo. Tyehe ta chihin cha vaha ñáyivi cuví maa yo ta sahá Nyoo tucahnu iñi chi yo, cuiñi chi catyí tyi ñima ca chihin cha vaha maa ra ta sacacú ra chi yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachí maa Nyoo chii, ñihí ñu cuan cuhva. Ta inga ñu Israel cuan ndundavá xaan añima ñu. ⁸ Tari catyí nu tutu Nyoo tyehe caa: “Nyoo chahá ra noo cuhva chi ñu cha ma cutuñi iñi ñu. Ta chahá ra chiti nuu cha ña cutuñi iñi ñu cha nyehe ñu. Ta chahá ra soho ñu soco ña cutuñi iñi ñu cha chiñi ñu, ta nyacua nya vityin ta tyicuan caa ñu.” ⁹ Ta suri catyí tucu ra David tyehe caa:

Sii xaan cuiñi ñu chihin vico cha iyó ñu, soco yucuan cuví trampa cha sanacava chí ñu. Ta cha cuenda cuan ta cutachi tuñi Nyoo chí ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhin ihya: ¿Atu cha cuenda cha ña quichahá ñu Israel cuan nu cahán Nyoo, ta ndoo ri maa ñu cha ma cacu ca añima ñu? Ñima. Vatyí cha cuenda cha ña quichahá ñu chí ra cha saquichí Nyoo, yucuan chaha sacacú Nyoo chí inga ñu cha ñima ñu Israel cuví. Ta tyicuan caa ta cuquiñi cuiñi ñu Israel vatyí nachino iñi inga ñáyivi. Ta cha tyicuan caa ta cuquichi cuví tucu iñi ñu cha cacu añima ñu. ¹² Tatu cha cuenda cha ña quichahá ñáyivi Israel cuhva cha chahá Nyoo chí ñu, cuví chí cha vaha cha cuenda tandihi ca

ñáyivi, vatyí chahá chi cuhva, ta cuaha xaan ñu nachino iñi ñu chi ra Cristo, nyaca cuví quívi cundihvi tucu ñu Israel cuenda Nyoo inga chaha. Yucuan quívi, vaha xaan ta tyaquí xaan cucuvi.

¹³ Ta iyó suhva cha cuñí catyí chi nyoho cha ñima ñu Israel cuví ndo, vatyí ra Jesús tyatyíño ra chii cha cuhin nu iyó ñáyivi cha ñima ñu Israel cuví. Ta chité vatyí niñi xaan cuví tyíño cha chahá maa Nyoo chii. ¹⁴ Ta cuñí tiquí vatyí cunyehe ñáyivi Israel ñu ñui cuhva chinó iñi ndo chi Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu aña ñu. ¹⁵ Vatyí cha cuenda cha ña natiñ cuenda Nyoo chi ñu Israel cuví cuvaha inga ñáyivi nuu ra. Vaha xaan cha tyicuan caa ta nyaca cuví quívi cunatiñ cuenda tucu ra inga chaha chi ñu Israel, cucuvi tari cha cunandoto ñu nu chihí ñu. ¹⁶ Tatu vaha noo pan cha savahá yo cha xihna ri chihin yuchan pan cuan, vaha tandihí ca yuchan cuan. Ta tatu vaha yoho noo yutun, tandihí ca soco tun, ta vaha. Ta tyicuan caa tucu ñu Israel, cuñí Nyoo chi ñu cha cuenda cha vaha ra cha vachí ñu tata.

¹⁷ Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chi suhva ñu vatyí ña chinó iñi ñu chi ra. Ta chaha tu olivo cuan natyaa tahan ra soco noo tu olivo cuhu. Ta maa ndo cuví tari tu olivo cuhu cuan. Ta tari cha natyaa tahan ra chi ndo chaha tu olivo cha xihna ri cuan. Ta tyicuan caa ndu iñi ri ndo chihin tu olivo Nyoo ta naquehén ndo tandihí cha vaha cha iyó chi ra. ¹⁸ Soco ma saha ndo tyi vaha ca ndo ican saha inga ñu cha cuví soco tu olivo cha chahnya Nyoo. Vatyí tatu cuñí maa ndo tyi vaha ca ndo, cuñí chi nicohon iñi ndo vatyí ñima maa ndo nyisó ndo chi yoho yutun cuan, soco maa yoho yutun cuan nyisó chi ndo.

¹⁹ O catyí ndo: "Ican, soco chahnya Nyoo soco yutun cuan tacuhva nicunyya maa ndi chaha tun." ²⁰ Vaha. Soco chahnya Nyoo soco cuan cha cuenda tyi ña chinó iñi ñu chi ra. Ta nyoho nicunyya ndo yucuan, soco cha cuenda cha chinó ri iñi ndo chi ra. Yucuan chaha ma sacahnu ndo chi ndo, soco saha ndo cuenda chi ndo. ²¹ Vatyí tatu ña saha Nyoo ticahnu iñi chi ñu cha cuví soco vaha cuan, ni chi nyoho ta ma saha ra ticahnu iñi tatu ña chinó vaha iñi ndo chi

ra. ²² Nyehe yoso cha vaha Nyoo, soco tyicuan tucu xaan ra chihin ñu cha ña natiñ cuenda tumañi iñi chahá ra. Soco chihin nyoho, vaha xaan ñáyivi cuví ra. Soco cuñí chi cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnya tucu ra chi nyoho. ²³ Soco tatu nachino tucu iñi ñu Israel inga chaha, cu nicunyya tucu ñu nu coyo ñu. Vatyí Nyoo iyó tunyee iñi chi ra cha natyatahan tucu ra chi ñu cuan inga chaha. ²⁴ Vatyí tatu nyoho cha ñima ñu Israel cuví ndo, ta quehén Nyoo chi ndo cha cuví ndo tari soco noo yutun olivo cuhu, ta natyaa tahan ra chi ndo chihin tu olivo vaha cha cumí ra, ¡ta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chi ñu inga chaha chaha tu olivo nu coyo ñu!

Nu ndihí ta cucacu tucu ñu Israel

²⁵ Vatyí yañi, cuñí cha coto ndo noo tuhun xehe cha sacuví Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava aña ñu suhva quívi, nyacua nya cha cuví nachino iñi inga ñáyivi chi Nyoo. ²⁶ Ta cha yahá quihvi inga ñu cuenda Nyoo, tyicuan ta tandihí ñu Israel cucacu aña ñu, vatyí nu tutu Nyoo catyí chi tyehe caa:

Ra cha cusacacu chi ñáyivi, ityi Sión cuquichi ra.

Ta cusacanyaha ra cuatyí cha iyó chi ñáyivi chí ra Jacob.

²⁷ Ta ihya cuví tuhun cha cunatyíhi tahin chihin ñu, quívi na sacuachiye cuatyí ñu, catyí Nyoo nu tutu ra.

²⁸ Cuxaán xaan ñu Israel chihin Nyoo cha cuenda tuhun vaha ra Cristo cha cacu aña yo. Ta tyicuan ta cuví chino iñi maa ndo. Soco Nyoo tacuhva cuñí ri maa ra chí ñu Israel tata ra Abraham, ta ra Isaac, ta ra Jacob vatyí cachine iñi ra chí ra quívi cachiyo ra, ta yucuan chaha cachí ra chí ra.

²⁹ Vatyí noo cha cha yahá chaha Nyoo ña natinyaa ra. Ni ña ndu uvi iñi ra cha yaha nacana ra chí yo. ³⁰ Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahvi cuñí ra nyehé ra chí ndo cha cuenda vatyí ñu Israel nacahnú ñu nu cahán ra. ³¹ Nacahnú ñu nu cahán Nyoo vityin tari nacahnú maa ndo quívi cuan. Ta tari cundahví cuñí Nyoo nyehé ra chí ndo vityin, tyicuan caa tucu cucundahvi cuñi ra nyehe ra chí ñu Israel ñandihí. ³² Vatyí Nyoo

chahā ra ityi chi tandihī ñáyivi cha nacahnú ñu nu cahán ra, tacuhva vatyí cundahvi cuñi ra nyehé ra inuu ri chi tandihī yo.

³³ ¡Ñana cha cahnu cuví cha tyayii Nyoo! ¡Ñana cha vaha cha chitó xaan ra, ta cha chihī tuñi ra! Ma cuví nacatyí yo cuhva chicá iñi ra, ni ma chaa yo cutuñi iñi yo cuhva sacuví ra. ³⁴ Vatyí ¿yóó cha cutuñi iñi cuhva chicá xiñi Sutu Mañi yo? ¿O yóó cha sañahá chi ra? Yori. ³⁵ Vatyí yori cha cuví cuhva xihna ca noo cha vaha chi Nyoo ta cha cuenda cuan ta quihī iñi ñu vatyí na cuhva tucu Nyoo chi ñu. ³⁶ Vatyí tandihī maa cha iyó, maa Nyoo savahā, ta chingó chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuví chi tyicuan caa.

12

Na coo yo noo ñayiví cha sacuvi yo cuhva cuñí Nyoo

¹ Yucuan chaha yañi, chacú ndahvi nuu ndo cha cuenda cha ndahvi cuñí Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyí yucuan cuví cuhva tiin cuenda ra cha sacahnú yo chi ra. ² Ta ma coo ca yo cuhva iyó ñáyivi iyó siqui ñuhu ñayiví ihya. Soco na nasama yo cuhva iyó yo chihin cha nduchaa cuhva chicá xiñi yo. Ta tyicuan caa ta coto yo yoso cuhva cuñí Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndihī cha tahán chi sacuvi yo.

³ Nyoo, cha catyí cha vaha ñáyivi cuví ra, ta tyatyíño ra chii vatyí cuví apóstol chi ra, yucuan chaha catyí chi tandihī nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso cuhva iyó ndo chihin yoso cuhva cha vaha chahā Nyoo chi ndo iin ri chihin cha chinó iñi ndo chi ra. ⁴ Vatyí cha noo coño ñuhu, cuaha xaan cuhva iyó chi, ta ña iin ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi. ⁵ Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha iin ri cuví yo chihin ra, ta iin ri cuví yo chihin tahan yo. Tari cha noo ri coño ñuhu cuví tandihī ri yo.

⁶ Siin siin tyiño chahā Nyoo chi yo, yoso cuhva cha cuñí maa ra cuhva ra chi noo

noo yo. Ta cuñí chi cotyiño vaha yo cha vaha cuan. Tatu chahā Nyoo cha vaha cha sahá yo profetizar, na chino iñi yo tyi ican cuan chahā ra chi yo, ta na naquehen yo tuhun sacoto ra chi yo ta nacatyí yo chi ñáyivi. ⁷ Tatu chahā ra cha vaha cha sacuví yo tyiño nuu inga ñu, cuñí chi sacuví vaha yo. Tatu chahā ra cha cuví sañaha yo chi inga ñu, cuñí chi cunyaa yo tyiño cuan. ⁸ Tatu chahā ra cha cuví cuhva yo tuhun chi ñáyivi na ndu nii iñi ñu, cuñí chi cunyaa yo tyiño cuan. Ta ñu cha chahā Nyoo xuhun chi, cuñí chi cuhva ñu chihin cha nii iñi ñu. Tatu chahā Nyoo cha saquehen ityun chi ñu yihí cuenda ra, chihin cha nii iñun sacuvun. Tatu chahā Nyoo cha tyinyee yo chi ñu chiñuhú cha chiñuhú chii, cuñí chi sacuví yo chihin cha sii cuñí yo.

Nu catyí ra Pablo yoso caa sacuvi yo cha yihí yo cuenda ra Cristo

⁹ Cuñi ndo chihin cha ndicha chi tahan ndo. Ta cutasi cuñi ndo chi cha ña vaha. Ta cunyicon ndo cha vaha. ¹⁰ Cuñí chi cha cuñí ndo chi tahan ndo cuenda Nyoo tari cha tahan ndo cha iin ri sihi iin ri sutu ndo. Ta quichaha ndo chi ñu ta saha ndo ñáyivi chi ñu.

¹¹ Sañihi ndo iñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha nii añima ndo.

¹² Sii cuñi ndo coo ndo ñayiví, vatyí chitó ndo vatyí cucoo ndo chihin Nyoo nu cuahan ca chi. Sanyee ndo iñi ndo tatu nyehé ndo tindoho. Ta ma sandihī maa ndo cha cacán tahvi ndo chi Nyoo nyita ri.

¹³ Tyinyee ndo chi ñu yihí cuenda Nyoo chihin ñáá cha chiñuhú chi ñu. Vaha tyiñuhu ndo chi ñu chaa vehe ndo.

¹⁴ Vaha cahan ndo siqui ñu cha cahán chi ndo. Ta ma soco ndo chi ñu. Cacán tahvi ndo cha cuenda ñu nuu Nyoo tacuhva na nasoco ra chi ñu.

¹⁵ Cusi cuñi ndo chihin ñu sii cuñí, ta cuacu ndo chihin ñu chacú chaa cha cuihya cuñí ñu.

¹⁶ Iin ri cuví ndo chihin tahan ndo. Ta ma cahnu saha ndo chi ndo. Inuu ri saha ndo chi ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuví cha ña vaha chihin ndo. Soco sañiñi ndo sacuvi ndo cha vaha nuu tandihī

ñáyivi. ¹⁸Saníñi ndo cha coo taxi ri ndo chihin tandihí ñáyivi. ¹⁹Yañi luhli, tatu yóo cha satasi iñi chi ndo, ma tachi tuñi ri maa ndo chi ñu, soco saña ndo ta natyaa ndo ndaha Nyoo na tachi tuñi maa ra chi ñu. Vatyí nu tutu Nyoo catyí chi tyehe caa: “Yuhu tahán chi tachi tuñi, yuhu cutiyahvi chi ñu”, catyí Sutu Mañi yo. ²⁰Ta suri catyí tucu ra: “Tatu ra xaan iñi chuun ta chisocó ra, cūhva cha cachi ra, ta tatu ityi ra ndutya, cūhva coho ra. Vatyí cha sacuvún tyehe caa, sacuvún cha nyacua nducuaaha soho ra chihin ticahan nuu.” ²¹Ma cūhvon cha cunyaca ñaha cha ña vaha chuun, soco saníñun ta cuvi chasahun chi cha ña vaha chihin cha sacuvún cha vaha.

13

¹Tandihí ñáyivi cuñí chi cha quichaha ñu chi ra cacuví tyiño cuenda gobiernu. Vatyí yori ra cuví tyiño cha ñima Nyoo tyaa tyiño chi ra. Ta ra cuví tyiño cha iyó, maa Nyoo tyiso chi ra. ²Yucuan chaha, ñu cha ña quichahá chi ra cacuví tyiño, cuñí chi catyi vatyí ña quichahá ñu cūhva catyi Nyoo. Ta ñu cha sacuví tyicuan caa, chicoo cuatyí ñu cha cuenda cuan, ta cucutuñi chi ñu. ³Vatyí ra cacuví gobiernu, ña nyaá ra cha cuenda cha sayuhví ra chi ñu cha sacuví cha vaha, soco nyaá ra vatyí tachi tuñi ra chi ñu sacuví cha ña vaha. ¿Atu cuñún coun chihin cha ña yuhvun chi ra cacuví tyiño? Cachi coun, ta cunyehe ra tyi vaha ñáyivi cuñún. ⁴Vatyí nyaá ra tyiño vatyí sacuví ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñí chi cuyuhvun chi ra. Vatyí ña nyaá ri maa ra, soco nyaá ra vatyí tachí tuñi ra chi ñáyivi cha sacuví cha ña vaha, vatyí tyiño cuan tyaa Nyoo chi ra. ⁵Yucuan chaha ñiñi cuñí chi cha quichaha ndo chi ra cacuví tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyí chitó ndo tyi tyicuan caa tahán chi sacuví ndo. ⁶Ta siin ri cha cuenda cuan tyiyahví ndo xuhun cha tava ra cuví tyiño cha cuenda cha sanduvahá ra ñuu ndo. Vatyí yucuan cuví tyiño tahán chi cunyaa ra, ta cha tyicuan caa tyiño nuu Nyoo sacuví ra.

⁷Cūhva ndo cha tahán chi chi minoo minoo ñáyivi. Tyiyahvi ndo cha cuenda ñáá cha tahán chi tyiyahvi ndo cha cuenda

cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi. ⁸Ma coso yica ndo chi ni noo ñáyivi. Soco cuñi ndo chi tahan ndo, vatyí tatu cuñí ndo chi tahan ndo sacuví ndo tandihí cha catyí ley Nyoo cha tyaa ra Moisés vatyí sacuví yo. ⁹Catyí ley Nyoo tyehe caa: “Ma coo inga ñusihi o rayi chuun tatu ñima ñasihun o yün cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuvi iñun cha chíi ñáyivi.” Tatu ndicha cha cuñún chi tahanan, tari cha cuñún chi maun, sacuví tucun tandihí ihya ta tandihí ca inga ca ley. ¹⁰Tatu cuñún chi tahanan, ñahri cha ña vaha cua sacuvun chi ñu. Chihin cha cuñí yo chi tahan yo, sacuví yo tandihí cha catyí ley Nyoo cha tyaa ra Moisés.

¹¹Chihin tahanan ihya saha yo cuenda quivi iyó yo. Vatyí cha chaá chi cūhva cha ndoyo yo ta ma cundihñi yo. Vatyí quivi nachino iñi yo chi ra Cristo, naha xaan ca nyaá quichi quivi cucacu ndihí añima yo, soco vityin cha cuyatyin. ¹²Cha cua yaha cha cha cuua. Ta cha cua cundichin. Yucuan chaha cuñí chi sandihí yo cha sacuví yo cha sacuví ñu iyó nu ñaa iñi. Ta tahán chi sacuví yo cūhva sacuví ñáyivi iyó nu ndichin. ¹³Cachi cuñí chi coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihí xaan ñu ndixi. Ta ni ma coo yo chihin savaha ri ñusihi o rayi. Ni ma coo viciu chi yo. Ta ma cutasi cuñi yo nyehe yo chi tahan yo. Ta ma nyiyo iñi yo nyehe yo chi ñu. ¹⁴Soco coo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihvi noo yo. Ta ma quihí iñi ndo cha sacuví ndo cūhva cuñí coño ñuhu ndo.

14

Ma cahan nyaun chi tahanan

¹Tatu noo ñáyivi yihí cuenda Nyoo ta chihin ri chinó iñi ñu chi ra, ña vaha cha ma tiin cuenda ndo chi ñu. Vaha natin cuenda ndo chi ñu soco ma cuvi yuhu ndo chihin ñu siqui tahanan cha chicá uvi iñi ñu. ²Vatyí yihí ñáyivi cuñí maa ñu vatyí cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu. ³Soco ñu chachí tandihí cuan, tahán chi cha tiin cuenda ñu chi ñu cha chachí yucu ri. Ta

ñu chachí yucu ri, ma cahan nyaa ñu chi inga ñu cuan. Vatyí Nyoo tñin cuenda ra chi ñu cuan. ⁴ Vatyí yóó ñu cuví yoho vatyí cahan nyaun chi ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chi ñu chihin ñu. Ta vaha cuquita ñu vatyí Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñí maa ñu vatyí inuu ri tandihí quivi. Tahan tahan yo cuñí chi coto vaha yo yoso cuhva chicá xiñi yo. ⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyí chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo. ⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehén cuenda ra aña maa yo. Yucuan chaha tatu iyó yo, o chihí yo soco chi Sutu Mañi yo cuví chi yo. ⁹ Vatyí ra Cristo chihí ra ta nandoto tucu ra vatyí tacuhva cunyaca ñaha ra chi ñu nyitó ta chi ñu chihí.

¹⁰ Soco yoho, ¿ñáá tuhun cha nyehé nyaun chi yañun? ¿O ñáá tuhun cha ña natiñ cuendon chi ra? Vatyí tandihí yo cutahan chi cucuhva cuenda yo chi yo nuu Nyoo vatyí cutuñi chi yo nuu ra. ¹¹ Vatyí nuu tutu Nyoo catyí chi tyehe caa:

Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuñi chiti ñu nui.

Ta tandihí ñu cunacoto nuu ñu chii cha cuví Nyoo.

Ta cusacahnú ñu chii chihin nuu tandihí ñáyivi, catyí Nyoo.

¹² Yucuan chaha noo noo maa yo ta cucuhva yo cuenda cha sacuví yo chi Nyoo.

Ma sanacavon nu cuatyí chi yañun

¹³ Yucuan chaha, ña tahan ca chi cahan nyaa yo chi tahan yo. Soco nducu yo cuhva cha ma sanacava yo chi ñu nu cuatyí coto sandihí ñu tuhun cha chino iñi ñu. ¹⁴ Yuhu chité vatyí ñahri cha ma cuví cachi, vatyí chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha. ¹⁵ Soco tatu cha cuenda cha chachún ta quiñi cuñi yañun, ña ndicha cha cuñún chi ra, ñima ca cuhva cuñi Nyoo sacuvún. Ma cuhvon cha tivi noo ñu chihin cha chachún vatyí ra Cristo chihí ra cha cuenda ñu. ¹⁶ Ma cuhva ndo cha cahan ña vaha ñu siquí noo cha chaha Nyoo ityi chuun tyi cachun. ¹⁷ Vatyí cha nyacá ñaha Nyoo chi yo cuví chi noo cha cachi coo yo nuu ra. Cusiñ cuñi yo ta taxi ri cuñi aña maa yo cha cuenda Tatyí li Nyoo cha nyaá aña maa yo. Ta ña niñi tuhun cha chachi yo o cha chihí yo. ¹⁸ Ñu sacuví tyiño nuu ra Cristo tyehe caa, siñ cuñi Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñi chi cha sañihí ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo. ²⁰ Ma sativun tyiño sahá Nyoo aña maa inga ñáyivi cha cuenda noo cha chachí run. Ndicha vatyí tandihí cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu.

²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuví yo nu chinó iñi ñu chi Nyoo. ²² Tatu chinó iñun vatyí cuví cachun tandihí, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Siñ xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo. ²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihí cha sacuví yo chihin cha ña chiño iñi yo tyi chaha Nyoo ityi chi yo tyi sacuví yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹Yoó cha ñihi nyaá yo chihin Nyoo, cuñi chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahán iñi ri maa yo. ²Tahan tahan yo cuñi chi cha sacuvi yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo. ³Vatyí ni ri ra Cristo ña sacuvi ra cuhva tahán iñi maa ra, soco cuví chi ra tari catyí nu tutu Nyoo tyehe caa: “Tandihi cha cahán ñáyivi chi Nyoo, chi ra Cristo cahán ñu”, catyí chi. ⁴Vatyí tandihi cha chicunyaá nu tutu Nyoo ta ityi chata ca, chicunyaá chi cha cuenda cha cutuhva yo, tacuhva cuví cuatu yo cha cuñihi yo chihin cha cama iñi yo. Ta vaha cuñi aña yo cha cuenda cha sacuahá yo nu tutu Nyoo. ⁵Ta Nyoo ican ra chahá cha cama iñi yo, ta chahá ra cha vaha cuñi aña yo. Na tyinyee ca ra chi yo cha coo yo chihin cha iñi ri cuví yo chihin tahan yo tari cuhva iyó ra Cristo Jesús. ⁶Vatyí tacuhva tandihi yo iñi ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

Ñáyivi ñima ñu Israel cuví, cucuiñi ñu tuhun Nyoo

⁷Yucuan chaha tñin cuenda vaha yo chi tahan yo tacuhva vatyí sacahnu yo chi Nyoo tari tñin cuenda vaha ra Cristo chi maa yo cha cuenda vatyí sacahnú ra chi Nyoo. ⁸Vatyí catyí yuhu chi ndo vatyí ra Cristo quichi tyinyee ra chi yo cha cuví yo ñu Israel, tacuhva sacuvi ra cha catyí Nyoo chi sutu chahnu yo tyi cusacuvi ra. Ta tyicuan caa ta sañahá ra Cristo vatyí Nyoo sacuví ra cha catyí ra tyi sacuvi ra. ⁹Ta quichi tucu ra Cristo tacuhva vatyí ñu cha ñima ñu Israel cuví sacahnu tucu ñu cuan chi Nyoo, vatyí Nyoo ndahvi cuñi ra nyehe ra chi ñu, tari catyí nu tutu Nyoo tyehe caa:

Yucuan chaha cusahni chuun chihin nuu ñu cha ñima ñu Israel cuví, tandihi ityi ñu iyó siqui ñuhu ñáyivi.

Ta cucate yaa cha cuenda cha sacahni chuun nuu ñu, catyí chi.

¹⁰Ta inga tucu nu catyí chi nu tutu Nyoo tyehe caa:

Cusií cuñi nyoho ñu cha ñima ñu Israel cuví.

Cusií cuñi ndo chihin ñu Israel cha cuví ñu ñáyivi cuenda Nyoo.

¹¹Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañi yo, nyoho ñu cha ñima ñu Israel cuví.

Tandihi ñáyivi sacahnú ñu chi ra cha cuenda cha cahnu xaan cuví maa ra.

¹²Tyaa tucu ra Isaías nu tutu Nyoo tyehe caa: Cucacu minoo ra vachi tata ra Isaí.

Cuquichi ra vatyí cunyaca ñaha ra chi ñu cha ñima ñu Israel cuví.

Ta maa ñu cuquihí iñi ñu chi ra vatyí cusacacu ra chi ñu.

¹³Nyoo ican ra chahá tunyee iñi chi yo ta chitó yo tyi cuhva ra cha cuhva ra chi yo. ¡Na sacutu ra chi ndo chihin tusi iñi! Ta coo cha taxi ri cuñi aña ndo cha cuenda cha chinó iñi ndo chi ra, tacuhva vatyí chihin tunyee iñi Tatyí li ra ta quihí vaha iñi ndo cha cucuhva ra chi ndo.

¹⁴Yañi luhli, chitó vahi vatyí nyoho vaha xaan ñáyivi cuví ndo ta chitó ndo tandihi, ta chitó vaha ndo cuhva ndo tuhun chi tahan ndo. ¹⁵Soco nu carta ihya ñihi xaan cahín siqui tandihi tuhun cha tyai, tacuhva cha ma naa iñi ndo. Tyehe caa sacuvi cha cuenda tyi Nyoo chahá ra tumañi iñi chii ¹⁶cha sacuvi tyiño nuu ra Jesucristo nu nyicu ñu cha ñima ñu Israel cuví. Ta tyiño cha sacuví, ican cuví cha cahín tuhun Nyoo yoso caa sacacú ra aña ñáyivi. Tyehe caa sacuví tacuhva vatyí ñu cha ñima ñu Israel cuví, cuví nacuhva cuende chi ñu chi Nyoo tari noo ofrenda cha tahan iñi ra, vatyí cha ndundi ñu nuu ra cha cuenda Tatyí li ra.

¹⁷Cha cuenda cha nacuhva cuende chii chi ra Cristo Jesús, yucuan cuenda cuví cusí cuñi ta chité tyi vaha quitá tyiño sacuví nuu Nyoo. ¹⁸Vatyí ña cañá iñi cahin cha ña nyehi. Soco nacatyí cha sacuvi ra Cristo nu chica nó cahín tuhun Nyoo tacuhva vatyí ñu cha ñima ñu Israel cuví quichaha ñu chi Nyoo. Ta ihya ndicha cha cahín. ¹⁹Vatyí chihin seña ta milagru ta chihin tunyee iñi Tatyí li ra sacuvi ra. Ta tyicuan caa cahín tuhun cha cacu aña ñu sahá ra. Quichahí nya Jerusalén ta tandihi ityi ta nyacua nya Ilríco. ²⁰Ta tyicuan caa saniñi cahin tuhun cha cacu aña yo maa maa ri nu ta cuñi ca maa ñáyivi tuhun ra Cristo, tacuhva vatyí ma saha tyiñe nu quichahá saha tyiño inga ra. ²¹Tari catyí nu tutu Nyoo tyehe caa:

Cucoto ñáyivi cha ta coto ca maa tuhun ra. Ta cucutuñi iñi ñu cha ta ñaha ca maa cuiñi tuhun ra, cattyí chi.

Nu tyaá ra Pablo cuhva cha cuhun ra ñuu Roma

²² Yucuan chaha ña cuvi maa tuhun cha cuhin cunyehe nu nyicú ndo, vasi cuaha xaan chaha cuñí cuhin. ²³ Soco vityin cha ndihi tyiño sahí ityi ñuu ihya. Ta cha cuaha xaan cuiya cuñí cuhin cunyehe nu nyicú ndo ta cunyai suhva quívi chihin ndo. ²⁴ Nyehí tatu cuhin cunyehe nu nyicú ndo quívi cuhin España. Ta cha yaha cha cunyehe chi ndo, nyehi tatu cuvi tyinyee ndo chii ta cuchaa ndihi nu cuahin. ²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan. ²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén. ²⁷ Tyehe caa quichí cuvi iñi ñu sacuví ñu. Ta ndicha vatyí tahán chi sacuví ñu. Vatyí tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuví, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu. ²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo. ²⁹ Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu iñ ri ndo chihin, chihin tindoho cha nyehí, ta cacan tahvi ndo chi Nyoo cha cuende vatyí cuñí ndo chi Sutu Mañi yo Jesucristo, ta vatyí chahá Tatyí li Nyoo cha cuñí ndo chii. ³¹ Cacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta cacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natiin cuenda vaha ñu. ³² Vatyí tatu Nyoo ta cuñí ra, chihin cha sii cuñi quichi nyehi chi ndo ta cuví nyitati iñ ri chihin ndo. ³³ Ta Nyoo ra chahá cha taxi ri coo añima yo, na cunyaa ra chihin tandihi ndo. Ta nacuvi tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyí tyinyée xaan ña chi ñu yihi cuenda Nyoo ñuu Cencrea. ² Tiñ cuenda vaha ndo chi ña tari tiñ cuenda Sutu Mañi yo, tari tahán chi sacuvi ñu yihi cuenda Nyoo. Ta tyinyee ndo chi ña chihin tandihi cha chiñuhu chi ña, vatyí cuaha xaan ñu tyinyee ña chi, ta chi yuhu ñandihí.

³ Cuhva ndo nocumi chi cu Priscila ta chi ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús. ⁴ Chahnya iñi ñu ñáyivi ñu quívi cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandihi tucu ñu cha ñima ñu Israel cuvi, ta yihi tucu ñu cuenda Nyoo. ⁵ Cuhva tucu ndo nocumi chi ñu yihi cuenda Nyoo cha candú iñ ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chi ra Cristo ityi Acaya. ⁶ Cuhva ndo nocumi chi cu María. Sahá tyiño xaan ña nu nyicú ndo. ⁷ Cuhva ndo nocumi chi ñu ñui, ra Andrónico ta ra Junias, ra tahin cha ñoho chihin vehe caa. Cahnú tyiño casahá ra cuenda Sutu Mañi yo chihin tandihi ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahin cuenda Sutu Mañi yo. ⁹ Cuhva ndo nocumi chi ra Urbano, ra tahan yo cuenda tyiño ra Cristo Jesús, ta chi ra Estaquis ra tahin ñandihí. ¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí. ¹¹ Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo. ¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo. ¹³ Cuhva ndo nocumi chi ra Rufo, noo ra cahnú cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi. ¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra. ¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpás ta chi tandihi ñu cuenda Nyoo cha nyicú chihin ñu.

¹⁶ Nacuhva ndo noo cumi chi noo noo tahan ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chí ñu cuñí sasiin chí ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan. ¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu aña ñáyivi ndahvi chihin tuhun vita cahán ñu. ¹⁹ Tandihí ñáyivi chitó yoso caa quichahá vaha ndo chí Nyoo. Yucuan chaha cusii xaan cuñí chihin ndo, ta cuñí vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha. ²⁰ Nyoo ra iyó tandihí cha taxi ri aña, numi ri cuhva ra cha saha ganaa ndo chí ra ña vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chí ndo.

²¹ Ra Timoteo ra cuví ra tahin nuu tyiño sacuví ndi nuu Nyoo, saquichí ra nocumi chí ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chí ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chí ndo tyi iin ri yihí yo cuenda Sutu Mañi yo.

²³ Saquichí ra Gayo nocumi chí ndo ñandihí. Vehe ra nyaí suri ihya ndú iin ri ndi tandihí ñu yihí cuenda Nyoo. Ra Erasto ra cuví tesoreru ñuu ihya, saquichí ra nocumi chí ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chí tandihí ndo. Ta na cuvi chí tyicuan caa.

Nu ndihí cahán ra Pablo ta sacahnú ra chí Nyoo

²⁵ Ta vityin na sacahnu yo chí Nyoo, vatyí maa ra cuví ra cucuhva cha cunii iñi ndo, ta ma sandihí ndo cha chinó iñi ndo tuhun ra cha sacacú ra aña yo. Ican cuví tuhun cahín ta tuhun cha sañahí cha cuenda ra Jesucristo. Iin ri cuví chí chihin tuhun cha ñoho xehe ta cha naha nyata ni cumañi chingo ñuhu ñayivi. ²⁶ Soco vityin sañahá Nyoo chí yo cha cuenda tutu cha casandoq ra profeta, ra cachahá cuenda tuhun ra ta cha naha. Catyí Nyoo, ra iyó tyicuan ri

maa, tyi vityin tahán chí coto tandihí ñáyivi tacuhva chino iñi ñu chí ra ta quichaha ñu tuhun cahán ra. ²⁷ Nyoo noo tuhun maa ra, ta chiñi tuñi xaan ra. Na sacahnu yo chí ra cha cuenda ra Jesucristo tyicuan ri maa. Ta na cuvi chí tyicuan caa.

Carta Cha Xihna Ri Sacuhun Ra Apóstol Pablo Chi Ñáyivi

Ñuu Corinto Cha Yihí Cuenda Nyoo

Nu tyaá ra Pablo noo tutu chi ñáyivi ñuu Corinto cha yihí cuenda Nyoo

¹ Yuhu ra Pablo, nacana Nyoo chii vatyi cuñí ra cha cuvi noo apóstol ra Jesucristo, o cuñí chi catyí vatyi tachi ra chii nacaque tyiño ra. Yuhu chihin ra Sóstenes yañi yo ² saquichí ndi noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyivi chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyi nanduvi ndo noo ñáyivi vaha cuenda ra, chihin tandihí ñáyivi cha sacahnú chi Sutu Mañi yo Jesucristo tandihí ri ityi. Vatyi cuví ra Nyoo cuenda ñu ta cuenda maa yo ñandihí. ³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo añaima ndo.

Yoso caa nasocó Nyoo chi ñu yihí cuenda ra

⁴ Tyicuan ri nacuhvé tyahvi nyoo chi Nyoo cha catyi maa ndo, vatyi chahá ra cha vaha chi ndo cuenda ra Cristo Jesús. ⁵ Ta cha ñin ri cuví ndo chihin ra Cristo, Nyoo chahá ra tunyee ñi ri chi ndo tacuhva cuvi cahán ndo tuhun ra. Ta chahá ra cha chiñi tuñi vaha chi ndo. ⁶ Ta tandihí cha catyi chi ndo, tuhun ra Cristo, cuahán chino cava ñáyivi ndo vityin. ⁷ Yucuan chaha ñahri cha cumañi chi ndo. Chahá Nyoo tandihí cha vaha chi ndo cha ñi ri ca cha nyatú ndo quívi quichi Sutu Mañi yo Jesucristo. ⁸ Nyoo cusaha cuenda ra chi ndo nyacua nya naa ñáyivi tacuhva yori cuví catyi ñáa cha catyi chi ndo quívi quichi Sutu Mañi yo Jesucristo. ⁹ Nyoo tyicuan ri sacuví ra tari cuhva catyi ra. Ta maa ra cuví ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

Tatu yihí yo cuenda Sutu Mañi yo, ña vaha cha cusin yo

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuvi ndo ta ma cusin ndo. Ta ñin ri cuhva çaça xiñi

ndo. Ta ñin ri tuhun quíhi ñi ndo. ¹¹ Catyi chi ndo tyehe caa, yañi, tyi catyi ñáyivi chi ra Cloé chii, vatyi iyó tisihi nu nyicú ndo. ¹² Vatyi nyoho sin sin cuhva cahán ndo. Noo ndo catyi ndo: “Yuhu, cuenda ra Pablo yihí.” Inga ndo catyi ndo: “Yuhu, cuenda ra Apolos yihí.” Inga ndo catyi ndo: “Yuhu, cuenda ra Pedro yihí.” Inga ndo catyi ndo: “Yuhu cuenda ra Cristo yihí.” ¹³ ¿Atu tahvi sava ra Cristo? ¿Atu chihí yuhu ra Pablo nu cruzi cha catyi ndo? ¿Atu condutya ndo chihin sivi yuhu? Ñima. ¹⁴ Tyahvi nyoo chi Nyoo vatyi yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri. ¹⁵ Tyicuan caa ta ni noo ndo ta ma cuvi catyi ndo vatyi condutya ndo chihin sivi. ¹⁶ Aan, ta suri sacondutya tiqui chi ñáyivi chi ra Estéfanos. Soco ña nichón ñi cha sacondutyé chi inga ndo. ¹⁷ Vatyi ra Cristo ña tachí ra chii tyi sacondutyé. Soco tachí ra tyiño chii vatyi chihin tuhun ra yoso caa sacacú ra chi yo. Soco ña cahín chihin cha chiñi tuñi ñáyivi ihya, coto catyi ñáyivi chii tyi ñahri yahvi nyaá cha chihí ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñáyivi ihya

¹⁸ Tuhun cha chihí ra Cristo nu cruzi cha catyi cuatyí yo, ñima ri tuhun cuví cuan cha cuenda chi ñáyivi cha cunaa nu cuví anyaya. Soco cha cuenda chi maa yo cha cuví yo ñáyivi cacú añaima, tunyee ñi cha chahá Nyoo chi yo cuvi cuan. ¹⁹ Vatyi tyicuan caa tucu catyi maa tuhun Nyoo:

Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave ñin chiyó xiin, catyi Nyoo.

²⁰ Ñahri tuhun cha chitó xaan ra chiñi tuñi, ta ra sacuahá, ta ra chitó xaan nacahan ñáa ndihí tuhun iyó siqui ñuhu ñáyivi ihya. Vatyi cha chiñi tuñi cha iyó siqui ñuhu ñáyivi ihya, cha ñima ri tuhun nasahá Nyoo chi cuan. ²¹ Nyoo chihin cha chiñi tuñi ra tyaá ra cuhva vatyi ma cuvi cohon nuu ñáyivi chi ra chihin cha chiñi tuñi cha iyó siqui ñuhu ñáyivi ihya, soco tyaá ra cuhva vatyi sacacú ra chi ñu chinó ñi tuhun cha cahan noo ñáyivi nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chi Nyoo.

²² Vatyí ñáyiví Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñayiví ihya nanducú ñu. ²³ Soco yoó sacotó yo tuhun ra Cristo, ra chihí nu cruzi. Ta ñáyiví Israel cahán nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya. ²⁴ Soco cha cuenda chi ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo. ²⁵ Vatyí cuñí maa ñáyiví vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñáyiví iyó siqui ñuhu ñayiví ihya. Ta cuñí maa ñayiví tyi ña ñihí fuerza Nyoo. Soco ican cuan cuví fuerza cha ñihí ca cha nuu fuerza tandihí ñáyiví. ²⁶ Yañi, cuñí chi coto ndo vatyí Nyoo nacana ra chi ndo vasi maa ri ñáyiví soho cuví ndo, ta mañi ndo cuví ndo ñáyiví tyayii o ñáyiví chitó xaan cha chiñi tuñi ñayiví ihya. ²⁷ Soco Nyoo nacachí vaha ra chi ñáyiví soho. Vatyí cuhvá ñu ticahan nuu chi ñu cuñí maa tyi chiñi tuñi xaan. Ta nacachí vaha ra chi ñáyiví ñahri fuerza vatyí cuhva ñu ticahan nuu chi ñu cuñí maa tyi iyó xaan fuerza. ²⁸ Nyoo nacachí vaha ra chi ñáyiví ndahvi cha cuñí maa ñáyiví tyi ña chiñuhú ñu. Nacachí ra chi ñáyiví cha ña cuñí nyehe ñáyiví chii, vatyí sanocuee ra chi ra cuví tyiño nahnu. ²⁹ Tyicuan caa sacuví Nyoo tacuhva tyi yori sacahnú chii nuu ra. ³⁰ Soco maa maa Nyoo sacu iñi ri ra chi yo chihin ra Cristo Jesús. Ta sacuví ra tyi ra Cristo cuhva ra cha chiñi tuñi chi yo, ta sacuvahá ra chi yo ta sandundií ra chi yo nuu Nyoo vatyí tyiyahví ra chihin niñi ra cha catyi cuatyí yo, tacuhva cuvi cacu yo. ³¹ Yucuan chaha sacuví yo tari cuhva catyí nu tutu Nyoo tyehe caa: “Tatu yóo cha cuñí cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

¹ Soco yañi, quiví chahin chichahin tuhun Nyoo chihin ndo, ña cahin tuhun cha chiñi tuñi ñuhu ñayiví ihya. ² Soco maa ri maa tuhun ra Jesucristo, yoso caa chihí ra nu cruzi cha catyi cuatyí yo tyai xiñi ta nacatyí chi ndo. ³ Ta chají nu nyicu ndo tari cha ñahri fuerze. Ta nihí chihin cha yuhvi. ⁴ Ta

cuhva cha cahin nuu ndo, ña cahin chihin tuhun tyaquí tuhun cha chiñi tuñi tari cahán noo ra chitó xaan. Ñima. Soco chihin fuerza maa Tatyí li Nyoo cahin chihin ndo. ⁵ Tacuhva vatyí nachino iñi ndo chi Nyoo soco cha cuenda fuerza maa Nyoo. Ta ñima cha cuenda cha chiñi tuñi ñayiví ihya.

Nyoo chahá ra cha cohon nuu yo chi ra chihin Tatyí li ra

⁶ Soco suvita ri tyi cahán ndi tuhun cha chiñi tuñi chihin ñu cha ñihí ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñayiví ihya, ni ri cha chiñi tuñi ra nyacá ñaha siqui ñuhu ñayiví. Vatyí maa ra cucunaa ra. ⁷ Soco tuhun xehe cha chiñi tuñi maa Nyoo cahán ndi. Vatyí Nyoo chicumí xehe ra minoo tuhun vaha nya ta ni cumañi chino ñuhu ñayiví ihya. Vatyí tyaá ra cuhva tyi cucacu aña yó ta cunyaa yo noo nu vaha chihin ra tyicuan ri maa. ⁸ Ta tuhun ihya ta cutuñi ca iñi ni noo ra nyacá ñaha ñuhu ñayiví ihya. Vatyí tyehe ta cutuñi iñi ra, ma catyaa ra chi Sutu Mañi yo, ra nyacá ñaha gloria, nu cruzi. ⁹ Soco tari cuhva catyí maa tuhun Nyoo:

Nyoo sanduvahá ra noo cha vaha xaan tyi cuhva ra chi ñáyiví cha cuñí chi ra.

Ta ni noo ñáyiví ta nyehe ca ñu, ta ta cuñi ca ñu, ta ta ndichí ca xiñi ñu yoso cuhva cha vaha cha chahá Nyoo chi yo, catyí tuhun Nyoo.

¹⁰ Soco Nyoo chahá ra Tatyí li ra vatyí cutuñi iñi yo tuhun ihya. Vatyí Tatyí li ra sañahá chi tandihí chi yo nyacua nya tuhun cha xehe ca cha cumí maa Nyoo.

¹¹ Ma cuvi coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí li Nyoo chitó cha yihí iñi maa Nyoo. ¹² Yoó ñima cha chiñi tuñi ñuhu ñayiví naquehen yo, soco maa Nyoo chahá ra Tatyí li ra chi yo vatyí sacoto chi chi yo yoso caa cha tyaquí cha chahá Nyoo chi yo. ¹³ Tuhun cha cahán ndi chihin ndo ihya, tuhun cha sañahá maa Tatyí li Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí li Nyoo chi ndi chi ñu cha yihí Tatyí li Nyoo chi.

¹⁴ Soco ñu cha ña yihí Tatyí li Nyoo chi, ña cutuñi iñi ñu ta ña cuñí ñu cuñí ñu cha

sañaha Tatyi li Nyoo chi ñu, vatyi cuñí maa ñu tyi tuhun cha ñima ri tuhun cuví cuan. Vatyi iin ri maa ñu cha yihí Tatyi li Nyoo cuví cutuñí iñi ñu tuhun cuan. ¹⁵ Soco ñu yihí Tatyi li Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuvi catyi inga ñáyivi tatu vaha o ña vaha cha caá añima maa ñu. ¹⁶ Vatyi tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yó cha yihí yo Tatyi li Nyoo, chitó yo cha chicá xiñi ra Cristo.

3

Ña tahán chi cunyicon yo chi noo ra yañi yo, chi Nyoo na cunyicon yo

¹ Soco yañi, quívi cuan ña cuví cahin chihin ndo tari cahin chihin ñu saquehén ityi Tatyi li Nyoo chi, soco cahin chihin ndo tari cahin chihin ñu ni nachino iñi chi Nyoo, tari cha vatyi ni nyihi ndo chihin tuhun ra Cristo cuví cuan. ² Cahin chihin ndo chihin tuhun cha ña yí ri cutuñi iñi ndo. Tari chahá yo sicuí coho cha lee cha ta cuvi ca cachí nyayu, tyicuan caa sacuví chihin ndo. Vatyi nyoho, quívi cuan ta cuvi ca chi ndo. ¡Ta ni vityin ta ta cuvi ca chi ndo! ³ Vatyi ni chicá ca xiñi ndo cuhva chicá xiñi ñáyivi iyó síqui ñuhu ñáyivi ihya. Nyiyó iñi ndo. Iyó tisihi nu nyicú ndo. Cacusiin ndo. Ni chicá ca xiñi ndo tuhun ñuhu ñáyivi ihya. Ta nyacuví ndo tari nyacuví ñáyivi cha ña ñohó nuu Nyoo. ⁴ Vatyi yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñí chi catyí tyi nyacuví ndo tari nyacuví ñáyivi ña ñohó nuu chi Nyoo.

⁵ Vatyi ¿yó ra cuví yuhu, ra Pablo? Ta ¿yó ra cuví ra Apolos? vatyi cañí tahan ndo cha catyi ndi. Vatyi noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyi maa Nyoo tyi sacuví ndi. ⁶ Yuhu tachí chiti tuhun Nyoo añima ndo. Ta ra Apolos chosó ra. Soco Nyoo sacuahnu ra tuhun ra añima ndo. ⁷ Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihi. Vatyi maa ra sacuahnu ra tuhun ra añima ndo. ⁸ Ra cha tachí ta ra cha chosó, iin ri ra cuví ra. Ta cuñihi ra nu vaha sahá Nyoo yoso cuhva

tyiño sahá noo noo ra. ⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo. ¹⁰ Catyi Nyoo tyi yuhu cuví tari noo ra cuví nuu cha sama vehe. Vatyi chaquín cuhva vehe cuan ta tyihí chaha chí ñuhú. Ta inga ra samá ityi síqui. Soco cuñí chi sahá ra cuenda yoso cuhva samá ra síqui cuan. ¹¹ Ta yori cuví cacun inga cuhva vatyi cha caá cuhva cuan. Vatyi suri maa ra Jesucristo cuví cuhva cuan. ¹² Ta síqui cuhva cuan cuví sama yo chihin xuhun cuan, chihin xuhun cuichin, chihin yuu tyaquí, o chihin vitu, o chihin tuñama o chihin ndaha numa. ¹³ Soco quívi cutuñi chí ñáyivi, cunyehe ra Cristo tyiño sahá noo noo yo. Vatyi cuquichi ra chihin ñuhu. Ta ñuhu cuan cucahmi chí nya cha ña vaha. ¹⁴ Ta tatu yihí ñu sacuví ñu tyiño vaha, ma cayu chí. Cuñihi ñu cha cuhva Nyoo chí ñu. ¹⁵ Soco tatu tyiño sahá ñu ta ndí cayu, cunaa tandihi tyiño sahá ñu. Cacú maa ñu soco tari noo ra cha cuyatyí ca quita nu ñuhu. Vatyi chiin cuii ri ca ta cayu ra.

¹⁶ ¿Atu ña chitó ndo vatyi vehe ñuhu Nyoo cuví chí ndo, ta Tatyi li Nyoo iyó ra añima ndo? ¹⁷ Tatyi nua noo ñu sativí vehe ñuhu Nyoo, Nyoo cusanaa ra chí ñu, vatyi vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸ Ni noo ndo ta ma sandavi ñaha ndo chí ndo. Tatu nya nyoho cuñí maa ndo tyi chitó xaan ndo cha chíni tuñi ñáyivi ihya, ndahvi sahá ndo chí ndo tari noo ra cha ña chitó maa. Tyicuan ta Nyoo cuhva ca ra cha chíni tuñi vaha chí ndo. ¹⁹ Vatyi cha chíni tuñi ñáyivi ihya cuví chí noo cha ñima ri tuhun nuu Nyoo. Vatyi tuhun Nyoo catyí chí: “Nyoo sanacavá ra chí ra chitó, suri maa nu trampa cha savahá ra.” ²⁰ Ta catyí tucu chí: “Sutu Mañi yo chitó ra vatyi cha chicá xiñi noo ra chitó, cha ñima ri tuhun cuví.” ²¹ Yucuan chaha ni noo ndo ña tahán chi sacahnú ndo chí ndo tatu nyicón ndo chí noo rayíi. Vatyi tandihi cha iyó ta chí maa ndo cuví, tyi maa Nyoo chahá ra chí ndo. ²² Yuhu ra Pablo, ra Apolos, ra Pedro, maa Nyoo chahá ra chí ndi chí ndo tyi nacatyí ndi tuhun ra chí ndo. Ta ñuhu ñáyivi ihya, ñáyivi iyó yo, tuhun chihi, cha cuví vityin, cha cuví nu cuahan ca chí, tandihi ta chí

maa ndo cuví. ²³ Ta siin ri, maa ndo, chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

¹ Cuñí chi vatyi nyehé ndo chi ndi tari noo ra sahá tyiño chihin ra Cristo. Vatyi tyaa Nyoo tyiño chi ndi vatyi sañaha ndi tuhun xehe ra cha ña chitó ñáyivi nu quichi chi. ² Ta cuñí chi vatyi nyuhu cha cuví ndi musu Nyoo nyita ri quichahá ndi tandihi cha catyí ra chi ndi. ³ Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyí tyi vahi. ⁴ Vasi tuví iñi mai tyi ñahri ca cuatyí, soco ña cuñí chi catyí vatyi ñahri cuatyí nuu Nyoo. Vatyi nuu maa Sutu Mañi yo cucutuñí chi yo. ⁵ Ican tuhun, nyoho ma cahan ndo chi ndi. Cuatu ndo quivi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyi cusanatuví ra cha caá añima noo noo yo. Tyicuan ta Nyoo cutiyiahvi ra yoso cuhva sacuví noo noo yo.

⁶ Yañi, cahín tuhun ihya chihin ndo cuenda cha vaha chi maa ndo. Vatyi nyehé ndo cuhva iyé, ta cuhva iyó ra Apolos. Vatyi ña cahnu sahá ndi chi ndi. Ta tyicuan caa tucu maa ndo, cutuhva ndo sacuví ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihi ñáyivi. ⁷ Ni noo ndo ta ña cahnu ca ra cuví ndo ican saha inga ndo. Vatyi cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyi ñima maa ndo ñihí.

⁸ Cha cuhva cha cuñí maa ndo vatyi tandihi tuhun Nyoo chitó ndo, ta ñahri ca cha cumañí chi ndo. Ta cuñí maa ndo tyi Rey cuví ndo. Ta ña chiñuhú ca nyuhu chi ndo, cuñí maa ndo. Vaha tyehe ta tyicuan caa, tacuhva vatyi cuví tucu nyuhu rey chihin ndo. ⁹ Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vatyi nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policía chihin ndi ityi cahnu vatyi tacuhva tyi nyehé ñáyivi ta ángel chi ndi. ¹⁰ Sahá ñáyivi tyi ra tondo cuví ndi cha cuenda ra Cristo. Ta nyoho cuñí maa ndo tyi chitó xaan ndo tuhun ra Cristo. Nyuhu

cuví ndi tari noo ra cha ñahri fuerza, cha ni ri ca cha nyoho cuñí maa ndo tyi cuaha xaan fuerza ndo iyó. Tasi cuñí nyehé ñáyivi chi ndi, ta chi nyoho sahá ñu ñáyivi. ¹¹ Nya vityin, nyehé ndi tindoho. Chisocó ndi. Ityi ndi ndutya. Cumañí sahna ndi. Ñahrí vehe ndi iyó. Ta ñáyivi, tasi iñi ñu chi ndi. ¹² Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi. ¹³ Cahán ña vaha ñu siqui ndi. Soco ña yatýin iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴ Sacuhín tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi sehi tyi cuñí chi ndo. ¹⁵ Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyi sañahí chi ndo yoso caa cacú añima ndo. ¹⁶ Ta tyicuan caa catyí chi ndo na cunyicon ndo cuhva iyé.

¹⁷ Yucuan chaha tachí chi ra Timoteo, sehi cuenda Sutu Mañi yo, nu nyicu ndo. Nii xaan iñi ra nyicón ra chi Nyoo. Ta cuñí xain chi ra. Maa ra cuasanicohon ra iñi ndo yoso cuhva iyé, vatyi chinó iñi chi ra Cristo. Cusañaha ra chi ndo yoso cuhva sañahí tandihi ri vehe ñuhu. ¹⁸ Yihí nyoho cahnu sahá ndo chi ndo. Cuñí maa ndo vatyi ma cuhun que nu nyicú ndo. ¹⁹ Soco tyafí cuhva tyi cunyehe nu nyicu ndo cha numi ri, tatu Sutu Mañi yo ta cuñí ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra. ²⁰ Vatyi tatu ndicha cha chahá ra cha cunyacá ñaha Nyoo chi ra, ma cahan ri ra. Soco cuatuvi iñi yo vatyi nyaá fuerza Nyoo chihin ra. ²¹ ¿Ñáa cha cuñí nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita iñi?

5

Nu cutuñi chi noo ra chiyo chihin sihi queen

¹ Catyí ñu chii vatyi iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyi ni ñu ña ñohó nuu chi Nyoo ta ña nyacuví ñu tari nyoho.

²¡Ta tyicuan caa ta cahnu sahá ndo chi ndo cha nuu cha cucuihyá iñi ndo! Cuñí chi vatyi catyi ndo chi ra cha nyacuví cha quiñi caa cuan vatyi ma cutahan ca ra chihin ndo. ³⁻⁴Vasí ña nyaí chihin ndo chihin coño ñuhi, soco cõhon iñi ndo vatyi ñohó iñi tuhun ndo, tari cha nyaá mai chihin ndo cuví cuan. Ta cha sandaí tyiño ra cha sacuví cuatyí cuan chihin sivi maa Sutu Mañi yo Jesucristo. Cuñí chi tyi ndu iin ri ndo. Ta sãha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihí. ⁵Tyicuan ta cuñí chi vatyi nacuhva cuenda ndo chi ra cuan chi cuihna, tacuhva nativí ndihí coño ñuhu ra. Ta cuhva cuví cacu añima ra quiví quichi Sutu Mañi yo Jesucristo.

⁶Ña tahán chi sacahnu ndo chi ndo chihin cha sacuví ndo. Vatyi nyehé ndí ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyi chihin chiin ri yuchan iya ta nandaa naní yuchan pan? ⁷Tava ñehe ndo yuchan iya chahnu cha cuví cha ña vaha cha sativí chi ndo. Tyicuan ta cuvi ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyi ra Cristo cuví mbee cha chihi cha catyi cuatyí yo. ⁸Yucuan chaha tahán chi cachi coo yo cuenda cha chihi maa ra Cristo cha catyi yo. Ta sandoó yo cha quiñi caa cha sacuví yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha ñi iñi yo. Vatyi cuví chi tari pan cha ñahri yuchan iya yihí.

⁹Nuu inga carta cha yaha saquichi chi ndo, catyi chi ndo vatyi nyoho ma cohon naha ndo tuhun chihin ñu cha sacuví cha iyó ri maa chihin ñusihi o rayii. ¹⁰Ta cha catyi chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayii o ñusihi, ta ñima yí ñu o ñasihi ra cuví, o ñu nyiyó iñi, o ñu suhú, o ñu sacahnú xitohyo. Vatyi tatu tyicuan caa, cuñí chi cha quita ndo ingaña ri ñuhu ñayiví. ¹¹Soco cha cuñí catyí chi ndo vatyi ma cohon naha ndo tuhun chihin noo ñu cha catyí vatyi hermano cuví ñu, ta iyó ri maa ñu chihin rayii o chihin ñusihi ta ñima yí ñu o ñasihi ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa,

ni cha ma cunyaa ndo cachi ndo chihin ñu. ¹²⁻¹³Vatyi yoó ña tahán chi sahá yo cuenda chi ra ña ñohó nuu chi Nyoo. Nyoo cuvi ra sahá cuenda chi ñu cuan. Soco nyoho cuñí chi sahá ndo cuenda chi ñu yihí cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹¿Yoso caa quichi cuvi iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chi ra yihí cuenda Nyoo, tacuhva canyehé ra nya ra iyó cuatyí? ²¿Atu ña chitó ndo vatyi suri maa ndo cusandaa ndo cuatyí ñáyiví iyó siquí ñuhu ñayiví ihya nu cuahan ca chí? Ta tatu maa ndo cusandaa ndo cuatyí cuan, ¿atu ma cuvi sandaa ndo noo tyiño cha ñima ri tuhun ihya? ³¿Atu ña chitó ndo vatyi nyacua nya ángel ta cutuñi chi ra nuu yo? ¡Ta nyaca cuví noo tuhun luhlu ñayiví ihya! ⁴Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo. ⁵Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuvi noo ra cuví sandaa noo tyiño yañi yo nu canyicú nyoho chiña? ⁶Vatyi cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chí Nyoo.

⁷Cha iyó tisihi nu nyicú ndo, ña vaha. Vaha taxin ca cunyeerí ndo tatu sacuví ñu cha ña vaha chihin ndo. Sãña ndo, na suhu maa ñu cha chii ndo. ⁸¡Soco nyoho suri maa ndo sataí ndihí ca iñi ndo chi ñáyiví, ta nyacua nya cha chii yañi ndo ta suhú ndo!

⁹⁻¹⁰¿Atu ña chitó ndo vatyi ñu quiñi iyó ma quíhvi ñu nu nyacá ñaha Nyoo? Ma sandavi ñaha ndo chi ndo. Ma quíhvi tandihí ñu iyó ri maa chihin ñusihi o chihin rayii cha tyicuan ri caa. Ta ni ri ñu cha sacahnú xitohyo, ni ri ñáyiví cha iyó ñasihi o yí, ta cavá noo ñu chihin inga ñaha o chihin inga rayii, ni ra iyó chihin tahan yí, ni ra suhú, ni ra nyiyó iñi cha tyayí, ni ra chiñí, ni ri ñu cuendu, ni ri ñu chitó yoso caa sacuví

cha quiñi caa, ma ñiñi ñu cha vaha nu nyacá ñaha Nyoo. ¹¹ Vatyí tyicuan caa cuví suhva nyoho. Soco Nyoo cha sandundiñ ra añima ndo chihin Tatyí li ra. Cha sacuvahá Sutu Mañi yo Jesucristo chi ndo nuu Nyoo.

Coño ñuhu yo cuví vehe ñuhu Nyoo

¹² Catyí chi tuhun vatyí libre iyó yo cha sacuví yo tandiñi cha cuñí yo. Cha ndicha cuví. Soco ña tandiñi ta cuví chi cha vaha chi yo. Ndicha libre iyó yo cha sacuví yo tandiñi, soco sáha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chi chi yo. ¹³ Catyí ñáyivi vatyí chahá Nyoo nyayu cha cuenda chichi yo. Ta chahá ra chichi yo cha cuenda cha cachi yo nyayu. Cha ndicha cuví. Soco ninduvi cuan cusanaa Nyoo quiví naa ñáyivi. Ta ña ndicha cha coño ñuhu yo cuví cha cuenda cha sacuví yo cha ña vaha chihin ñusihi o chihin rayii. Vatyí coño ñuhu yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo. ¹⁴ Tari sanandoto Nyoo chi ra Cristo Jesús, tyicuan caa cusandoto ra chi yo chihin tunyee iñi ra.

¹⁵ ¿Atu ña chitó ndo vatyí tandiñi yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativí chihin noo ñaha cata iñi? Ña tahán chi cunyacuví yuhu tyicuan caa. ¹⁶ ¿Atu ña chitó ndo vatyí tatu noo rayii ndu iñi ri ra chihin noo ñaha cata iñi, noo ri coño ñuhu nanduví ra chihin ña? Vatyí nu tutu Nyoo catyí chi tyehe caa: “Cha ninduvi ñu, noo ri nanduvi ñu.” Ta ña tahán chi cu iñi ri ra yihí cuenda Nyoo chihin ñaha cata iñi. ¹⁷ Soco tatu noo ñáyivi nacuhvá cuenda ñu añima ñu chi ra Cristo, yucuan cuví nu quihví Tatyí li ra añima ñu ta noo ri nanduví ñu chihin ra.

¹⁸ Sanaa ndo iñi ndo tatu quichi cuví iñi ndo chi ñusihi o rayii tatu ñima ñasihi ndo o ñima yii ndo cuví. Vatyí tandiñi inga nu cuatyí cha nyacuví ñáyivi ña sativí chi coño ñuhu ñu. Soco ñu nyacuví cuatyí chihin cha iyó ñu chihin ñusihi o rayii cha tyicuan ri caa, sativí ñu coño ñuhu ñu. ¹⁹ ¿Atu ña chitó ndo vatyí coño ñuhu yo cuví vehe Tatyí li cha chahá Nyoo chi yo, vatyí cunyaa ra chihin yo? Yoó ñima maa yo nyacá ñaha

yo chi yo, Nyoo cuví ra nyacá ñaha chi yo. ²⁰ Vatyí Nyoo satá ra chi yo ta yahvi xaan chahá ra chi yo. Yucuan chaha cuñí chi vatyí sacahnú yo chi Nyoo chihin coño ñuhu yo, ta chihin cha chiñi tuñi yo vatyí ninduvi cuan, chi maa Nyoo cuví.

7

Chahá ra Pablo tuhun yoso caa coo ñu tandahá noo ñáyivi vaha

¹ Ta vityin cuacatyí tuhun cha ndaca tuhun ndo chii nu tutu cha sacuhun ndo chii. Ndicha vatyí vaha cha ma tandaha yo. ² Soco vatyí iyó xaan tuhun cha quichí cuví iñi ñáyivi cha coo ñu chihin ñáyivi cha tyicuan ri caa. Yucuan chaha cuñí chi vatyí tahan tahan rayii coo noo ñasihi ra, ta tahan tahan ñusihi coo noo yii ñu. ³ Na sacuví rayii cuhva tahán chi chihin ñasihi ra. Ta tyicuan caa tucu maa ñusihi, na sacuví ñu cuhva tahán chi chihin yii ñu. ⁴ Ñaha sihi cuan ma cuví cunyaca ñaha ri maa ña coño ñuhu ña. Vatyí chi yii ña cuví coño ñuhu ña. Tyicuan caa tucu maa yii ña, ma cuví cunyaca ñaha ri maa ra coño ñuhu ra vatyí chi ñasihi ra cuví coño ñuhu ra. ⁵ Coto ñaha ma cuhva ndo chi ndo chi tahan ndo. Tatu cuñí ndo nanducu ndo chi Nyoo chihin oración, iñi ri cuhva caca xiñi ninduvi ndo. Ta ma cuhva ndo chi ndo chi tahan ndo suhva quiví. Yaha cuan tyicuan ta cuhva tucu ndo chi ndo chi tahan ndo coto ma cunye ndo. Ta coto nducu nyehe ra ña vaha chi ndo ta cuhun ndo cunducu ndo inga ñusihi o inga rayii. Ta ña vaha cha tyicuan caa.

⁶ Cha catyí chi ndo tyehe caa ñima cha catyí tyi tandaha ndo. Ña saniñí chi ndo cha tandaha ndo. Soco cuví tandaha ndo tatu cuñí ndo. ⁷ Cha cuenda chi yuhu, vaha ca coo maa ri maa ndo tari mai. Soco Nyoo siin siin fuerza chahá ra chi noo noo yo. Yihí yo chahá ra fuerza chi yo vatyí cuví coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chi ñu tyivaa ta chi ñu chihí yii, chahí tuhun chi ñu. Vaha ca cha ma coo yii ñu tari mai. ⁹ Soco tatu ma cunye ñu cha ma coo yii ñu, vaha ca cha tandaha ñu ta ñima ca cha quichi ri cuví iñi ñu tandaha ñu, ta ña tandaha ñu.

¹⁰ Soco ñu cha yaha tandaha, catyí chi ñu vatyí ma sanandoo ñu chi yii ñu. Cha

ndicha cuví vatyi mandamiento ihya ñima cha ndichí xiñi ri cuví soco maa Sutu Mañi yo catyí. ¹¹ Soco tatu noo ñaha sihi ta sanandoo ña yii ña, cuñi chi vatyi ndoo ña cunyaa ña cha ma tandaha ca ña. O naquehen ña chi yii ña. Ta suri tyicuan caa, ña tahán chi sanandoo rayii chi ñasihi ra.

¹² Ta cha cuenda chi yuhu catyí chi inga ndo tuhun ihya. Vatyi tatu ñasihi noo hermano ta ña chinó iñi ña chi Nyoo, soco ndoo ña vaha cha cunyaa ña chihin ra, ñahri ityi iyó chi ra cha sanandoo ra chi ña. ¹³ O tatu yii noo hermana, ta ña chinó iñi ra chi Nyoo, soco ndoo ra vaha cha cunyaa ra chihin ña, ñahri ityi iyó chi ña cha sanandoo ña chi ra. ¹⁴ Vatyi cha yaha nasocq Nyoo chi rayii cha ña chinó iñi cuan cha cuenda cha iin ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha iin ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyin tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasocq Nyoo chi sehe ndo. ¹⁵ O tatu rayii o ñusihi cha ña chinó iñi chi Nyoo, ta cuñi ñu sanandoo ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoo ñu libre. Vatyi maa Nyoo cuñi ra vatyi coo vaha yo chihin cha ñahri tisihi. ¹⁶ Vatyi ña chitó minoo ñaha sihi tatu cacu añima yii ña saha ña. Ta ni ri noo rayii ña chitó ra tatu cacu añima ñasihi ra saha ra.

¹⁷ Ta tyicuan caa catyí chi ndo vatyi coo ndo yoso cuhva catyí Sutu Mañi yo chi ndo. Ta yoso cuhva iyó ndo quivi nacana Nyoo chi ndo. Ta tyicuan caa catyí chi tandihi ñu yihí cuenda Nyoo noo noo vehe ñuhu. ¹⁸ Tatu Nyoo ta nacana ra chi noo nyoho ta cha yaha sacuví ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuví ñu costumbre cuan chihin ndo, ña tahán ca chi sacuvi ndo vityin. ¹⁹ Ña niñi xaan cha sacuví yo, o cha ma sacuvi yo costumbre circuncisión cuan. Soco cha niñi ca cha quichahá yo tuhun cahán Nyoo. ²⁰ Tahan tahan ndo cuñi chi ndoo ndo yoso cuhva cha iyó ndo quivi cha nacana Nyoo chi ndo. ²¹ Vatyi tatu iyó chitoho ndo cha nyacá ñaha chi ndo quivi cha nacana Nyoo chi ndo, ma caca iñi ndo,

soco tatu chahá chi cuhva cha ndoo ndo libre, cuñi chi nducu ndo cuhva ta ndoo ndo libre. ²² Vatyi quivi nacana Nyoo chi noo ra cha iyó chitoho, nduvi ra tari noo ra cha libre iyó, vatyi sacuví ra tyiño nuu Sutu Mañi yo. Ta suri tyicuan caa tucu ra cha iyó libre quivi cha nacana Nyoo chi ra. Vityin ra Cristo nyacá ñaha chi ra. ²³ Satq Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha rayii chi ndo. Ta ma sacuvi ndo tyiño nuu ra. ²⁴ Ta tyicuan caa catyí chi ndo yañi, coo ndo tari cuhva chiyo ndo quivi nacana Nyoo chi ndo.

²⁵ Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyi cha ndahvi cuñi Nyoo nyehe ra chii ta chaha ra tyiño ihya chii. ²⁶ Cha cuenda chi yuhu, vaha taxin ca ma tandaha ndo. Vatyi cuaha xaan tindoho ñayivi cha iyó yo vityin. ²⁷ Soco tatu cha iyó ñasihi noo hermano, ma nducu ra cuhva cha sanandoo ra chi ña. O tatu ta coo ca ñasihi ra, ma nducu ra chi ña. ²⁸ Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayivi ihya. Ta yucuan chaha catyí chi ndo vatyi vaha ca cha ma tandaha ndo. Vatyi ña cuñi cha nyehé ndo tindoho ta tisihi cuan.

²⁹ Yañi, cha vityin ta ityi nuu ña cuaha ca quivi nyaá. Cuñi chi vatyi ra cha iyó ñasihi cuví ra tari noo ra cha yori ñasihi. Vatyi nyita ri tahán chi caca xiñi ra tuhun Nyoo. ³⁰ Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusii iñi, soco ma quichaha xaan ndo tusii iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihi cuan chi Nyoo. ³¹ Ta ra iyó xaan cha chii ñayivi ihya, ma quichaha xaan ra chi cuan, soco cotyiño ra tyiño Nyoo. Vatyi ñayivi cha nyehé yo ihya cha cuahán sandihi xaan chi.

³² Cuñi vatyi nyoho ma caca xaan xiñi ndo tuhun cha iyó ñayivi ihya. Iin ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñi maa Sutu Mañi yo. ³³ Soco tatu cha tandaha ra, chicá xiñi ra yoso caa coo

vaha ra ñayiví cuhva tahan iñi ñasihi ra.
³⁴Ta siin cuhva iyó noo ñusihi cha cha yaha tandaha, ta siin cuhva iyó tucu noo ñusihi cha cumañi ca tandaha. Ñaha cha cumañi ca tandaha chícá xiñi ña iin ri maa tuhun Sutu Mañi yo. Ta chícá xiñi ña yoso caa sacahnú ña chi Nyoo chihin coño ñuhu ña ta chihin cha nii añima ña. Soco ñaha cha cha yahá tandaha chícá xiñi ña yoso caa coo vaha ña ñayiví ihya cuhva tahan iñi yíi ña.

³⁵Catý tuhun ihya chi ndo cuenda cha vaha chi maa ndo. Nima cha saniñi chi ndo. Soco vatyi coo vaha ndo noo ñayiví chihin cha ñahri sayangá chi ndo. Ta iin ri tyiño Nyoo sacuvi ndo.

³⁶Soco nya nyoho chícá xiñi ndo vatyi vaha cha tandaha ndo vatyi cha cuayaha quiví ndo; vaha, tandaha ndo tatu cuñi ndo. Nima cuatyí cuví cuan. ³⁷Soco tatu inga ndo cha nacuañ vaha iñi ndo vatyi cuandoo ndo cha ma tandaha ndo, vaha tucu. ³⁸Tu tandaha ndo, vaha. Tu ma tandaha ndo, vaha ca.

³⁹Soco catý nu ley Nyoo chi yo vatyi tahan chi cunyacá ñaha rayii chi ñasihi ra cha ni ri ca cha iyó ra. Soco tatu chihí ra, iyó ityi chi ña cha tandaha ña yóó chihin cuñi maa ña. Soco tatu ra yihí cuenda Nyoo cuví ra. ⁴⁰Soco vaha ca coo ña ñayiví tatu ma tandaha ña inga chaha. Ihya cuví cha chícá xiñi yuhu. Ta chahí tuhun ihya chi ndo chihin Tatyí li maa Nyoo, cahvi iñi.

8

Nu sañahá ra Pablo vatyi ma sacoo yo cuatyí inga ñáyiví

¹Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativí cuan chi yo. Soco cha cuñi yo chi tahan yo sandunyeé cuan chi yo. ²Tatu yihí ndo cha cuñi maa ndo tyi chitó ndo, cha cuenda vatyi ta coto ca ndo yoso cuhva cuñi chi cuví cuan. ³Soco Nyoo ñohó nuu ra chi ñu nii vaha iñi cuñi chi ra.

⁴Ta vityin cha cuenda cha cachi yo nyayu cha iyó vico xitohyo: cha chitó vaha yo vatyi noo xitohyo ñahri maa vale chi, vatyi noo ri maa Nyoo iyó. ⁵Vasi cuñi maa ñáyiví

vatyi cuaha xaan Nyoo iyó nu ñuhu ñayiví ihya ta andiví, ⁶soco cha cuenda chi maa yo noo ri Nyoo Sutu yo iyó. Ta maa ra savaha ra tandihí cuíi maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savaha tandihí maa cha iyó, nyacua nya chi maa yo.

⁷Soco ña tandihí yo chitó yo tuhun ihya. Vatyi suhva ñu tahan yo cuenda Nyoo, ta ni cumañi ca quihvi ñu cuenda Nyoo, sacahnú ñu xitohyo. Ta cha cañ ñu sacahnú ñu chi cuan ta cuñi maa ñu tyi nyitó xitohyo cuan. Vatyi ña nii vaha iñi ñu nyicón ñu chi Nyoo. Ta tatu chachí ñu nyayu cha chahá ñáyiví chi xitohyo cuan, cuñi maa ñu vatyi chicoó cuatyí ñu cuenda xitohyo cuan nuu Nyoo. ⁸Soco Nyoo ñahri cuenda ra tatu chachí yo, o ña chachí yo. Nima vatyi chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo. ⁹Soco saha ndo cuenda nya ndo chachi nyayu cuan ta chitó ndo vatyi ñahri cuatyí ndo chicoo. Cuví sanacava ndo nuu cuatyí chi ñu ni quihvi ri cuenda Nyoo, vatyi ñu cuan cuñi maa ñu tyi chicoo cuatyí ñu tatu chachí ñu nyayu cuan. ¹⁰Vatyi tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun. ¹¹Ta ra yañi yo cutiví añima ra vatyi cuñi maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñi maa ra. Ta yoho cha chitón, sícun cuhun cuatyí cuan. ¹²Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoó cuatyí yo nuu ra Cristo. ¹³Yucuan chaha tatu sanacavé chi noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

9

Cha tahan chi sacuví ra apóstol Nyoo

¹Yuhu cuví noo ra apóstol Nyoo. Ta yori ñáyiví nyacá ñaha chii. Vatyi nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyi chinó iñi ndo tuhun Nyoo cha sacoté chi ndo. ²Vasi ña cuñi ñáyiví chinó iñi ñu cha apóstol Nyoo cuví,

soco cha cuenda nyoho ican cuví. Vatyí cha cuenda cha chinó ñií ndo chí Sutu Mañi yo, cuví ndo cha ndaa vatyí ndicha cha apóstol cuví.

³Ihya cuví tuhun cuacahin cuenda ñu cha cahán nyaa chii. ⁴Iyó chí ityi chii cha quehín tandihí cha chahá ñu cachi ta cha chahá ñu cohi. ⁵Ta siín ri cha coo noo ñasihi cha chinó ñií chí Nyoo, tari yañi ra Jesús, ta ra Pedro ta tandihí ca ra apóstol. ⁶O chicá xiíi ndo vatyí yuhu ri ta ra Bernabé tahán chí saha tyiño ndi chihin ndaha ndi ta sata ndi cha chiñuhú chí ndi. ¿Atu ña tahán chí chí nyuhu sandoo ndi tyiño cuan ta cahan ndi tuhun Nyoo? ⁷Ra cha cuví sindaro tyiyahví gobiernu chí ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chíhi ra sicui tí. ⁸Ta ma cuñi ndo vatyí tuhun ihya cha ndichi xiíi ri mai cuví. Vatyí nu ley cha tyaa ra Moisés catyí chí tyehe caa: ⁹“Ma tyihi ndo yoho yuhu quití cha sandundií trigo, vatyí tahán maa chí cachi tí suhva trigu nu sahá tyiño tí.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quití. ¹⁰Soco na cutuñi ca ñií yo vatyí tari ra tahví ñuhu ta ra cha tachí, tahán chí vatyí cuita ñií ra vatyí cunaquehen ra cha quita nu saha tyiño ra. ¹¹Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chíti cuvi cuan. Ta tahán chí tyi tyinyeé ndo chí ndi cha cuenda cha sacotó ndi tuhun Nyoo chí ndo. ¹²Tatu tyinyeé ndo chí inga ra cha ña quichi tyihi tuhun Nyoo nu nyicú ndo, tahán ca chí cha tyinyee ndo chí nyuhu, vatyí nyuhu tyihi ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihí. Ta ña sayangá ndi chí ndo chihin cha chiñuhú chí ndi. Tacuhva cha ma sandihí ndo tuhun ra Cristo. ¹³Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chí tavá siín ra suhva coño quití vatyí cachi ra. Ta tandihí ca coño cuan cuahmi ra tari cuhva catyí maa Nyoo chí ra. ¹⁴Ta suri tyicuan caa catyí Sutu Mañi yo, vatyí tahán chí tyinyeé ñu yihí cuenda Nyoo chí ra cahán tuhun Nyoo chihin ñu. ¹⁵Soco yuhu ni noo chaha ña chiquen cha tahán chí chii. Ta ni ña tyái tuhun ihya vatyí cuñi

cha cuhva ndo cha cuhva ndo chii. Vatyí tatu chiquén cha tahán chí chii, ña sií cuñi cahín tuhun Nyoo. Vaha taxin ca cuñi cha cúvi ta ñima ca cha caquen xuhun chí ndo.

¹⁶Cha cuenda chí yuhu ñima cha cahnu sahí chí cha cahín tuhun Nyoo. Soco vatyí nyaá siqui cha sacuví. Soco ndahvi cuví yuhu ra ndahvi tatu ma cahin tuhun Nyoo ihya. ¹⁷Yucuan chaha tatu sacuví chihin cha iyó ñií, cuñihi yahvi. Soco tatu sacuví chihin fuerza, suri cuví chí, vatyí noo tyiño cha tachí maa Nyoo chí tyi sacuví, tahán chí cha sacuví. ¹⁸Ta tyicuan caa, yahvi cha ñihi, ican cuví cha sií cuñi cahín tuhun ra Cristo. Ta ña chiquén cha tahán chí chí cha cuenda cha cahín tuhun ra.

¹⁹Vasí ñima musu cuví yuhu. Soco nanduví musu tandihí ñáyivi. Vatyí tyicuan caa saha ganai cuaha ca ñáyivi cuenda ra Cristo.

²⁰Tatu ñohí nu nyicú ra Israel, nanduví tari maa ra tacuhva vatyí tyasoho ra tuhun cahin. Vatyí cuñi saha ganai chí ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chii. ²¹Soco tatu cuñi saha ganai chí ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chí ñu. Soco ley maa Nyoo nyacá ñaha chí vatyí chihin ley ra Cristo chicá noi ta ña cuví cunyacuví cha quiñi caa tari nyacuví maa ñu. ²²Tatu nyaí chihin noo ra cha ta coo vaha ca fuerza Nyoo chí, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca ñií ra chihin tunyee ñií Nyoo. Nanduví yuhu tari cuhva caa noo noo ñáyivi, vatyí tacuhva tyasoho ñu tuhun Nyoo cha cahín ta cacú aña ñu. ²³Tyicuan caa sacuví tacuhva cuví sacoté tuhun Nyoo chí ñáyivi. Vatyí tacuhva ñihi tumañi ñií cha chahá maa Nyoo chí yo.

²⁴Chitó ndo vatyí noo sihva cha chinó ñu, tandihí ñu chinó, soco noo ri ñu sahá ganaa. Tyicuan caa tucu maa yo, cuñi chí cha ñihi cunyicon yo chí Nyoo tacuhva sahá ganaa yo nu vaha cha chahá ra chí yo. ²⁵Tandihí ñu cuahan sihva, sandoo ñu tandihí cha satyoño chí ñu vatyí cuñi ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tivi ca maa. ²⁶Cha cuenda yuhu

ña chinó tondo ri mai, ni ña cañí tahan tondo ri mai. ²⁷ Soco ñihi nyacá ñahi chi coño ñuhi. Ta saniñi quichahí chi Nyoo. Coto suri mai cha yaha sañahí chi inga ra ta ndofí.

10

Nu sañahá ra Pablo vatyi ma tyaa xiin yo Nyoo

¹⁻² Yañi, ña cuñí cha naa iñi ndo cha cuví chi sutu chahnu yo ta cha naha. Nyoo tyinyee ra chi ñu, ta tachí ra noo vico vatyi cahun ityi nuu ñu coto cunaa ñu. Iin ri nanduví ñu chihin ra Moisés, ra cuví nuu chi ñu, ta yaha sava ñu tyañuhu. Ta cha tyicuan caa, tari cha condutya ñu chihin vico cuan ta chihin tyañuhu cuví cuan. ³ Ta tandihí ñu chachí ñu iin ri nyayu cha chaha maa Nyoo. ⁴ Ta tandihí ñu chihí ñu iin ri ndutya cha chaha maa Nyoo. Vatyi ndutya cuan tava ra chata noo yuu cha cuahan chihin ñu. Ta yuu cuan ra Cristo cuví. ⁵ Soco vasi nyehe ñu cuaha milagru cha sacuví Nyoo, cuaha ñu ña quichaha ñu tuhun cahan ra chihin ñu. Ta chihí ñu chiqui ndii cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyi tacuhva ma cuñi yo sacuví yo cha ña vaha tari sacuví ñu cuan. ⁷ Yucuan chaha ma sacahnu nyoho chí xitohyo, tari chinyacuví suhva ñu cuan ta cha naha, tari catyí nu tutu Nyoo tyehé caa: “Ta cachiyo ñu vico, ta cachachí ñu, ta cachihi ñu.” ⁸ Ta ma coo ri maa yo chihin inga ñusihi o chihin inga rayii tatu ñima ñasihi yo cuví, o yíi ñu cuví, tari chinyacuví suhva ñu cuan. Ta noo ri quiví chihí oco uñi mil ñu cha cuenda cha chinyacuví ñu cha quiñi caa cuan. ⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuví suhva ñu cuan. Ta cachihi ñu cha tyaa coo chi ñu, cha cuenda cha cuñi ñu nducú nyehe ñu chi ra. ¹⁰ Ta ni ma cahan ña vaha ndo siqui Nyoo, tari cahan ña vaha suhva ñu cuan siqui ra. Ta saquichí ra ángel cuenda ra ta chahñi ra chi ñu.

¹¹ Tandihí ihya cuví chi sutu chahnu yo cha chiyó ta cha naha. Ta chicunyaa chi nu libru Nyoo tari noo cuhva vatyi sacotó ra chí yo cha iyó yo ñayiví ihya vityin, nu cuahán sandihí chi. ¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava

ndo saha ra ña vaha. ¹³ Tindoho cha nyehé ndo, cuñí maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chi ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chí xitohyo. ¹⁵ Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chi ndo. Ta nyehe ndo tatu ndicha o ña ndicha tuhun cahín chihin ndo. ¹⁶ Quiví cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñí chí catyi vatyi iin ri cuví yo chihin ra Cristo cuenda niñi ra. Ta chachi yo pan ta cuñí chí catyi vatyi iin ri cuví yo chihin ra cuenda coño ñuhu ra. ¹⁷ Vatyi vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quiti cha chahá ñu chí Nyoo, ta cha cuenda cha nyacuví ñu cha tyicuan caa, iin ri cuví ñu chihin cuan. ¹⁹ Ñima cha catyí chí ndo tyi vale xitohyo cha sacahnú ñu ña ñohó nuu chí Nyoo. Ña vale, ni ri coño cha chahá ñu chí xitohyo cuan ta ña vale. ²⁰ Soco catyí chí ndo vatyi ñu ña ñohó nuu chí Nyoo chahá ñu cha chahá ñu, soco chí ra ña vaha. Ta ñima chí Nyoo. Ta ña tahán chí cha ndu iin ri ndo chihin ra ña vaha. ²¹ Vatyi ma cuví coho yo copa Nyoo ta suri cuhva cuan ta coho tucu yo copa ra ña vaha. Ta ma cuví cachi yo nu mesa Nyoo. Ta suri cuhva cuan cachi yo nu mesa ra ña vaha. ²² Ma cuhva yo tisihi chí Nyoo vatyi maa ra iyó ca fuerza chí ra ta ñima ca maa yo.

Sacuví yo ñáá cha sacuví yo, soco cha cuenda cha vaha chí tahan yo

²³ Catyí chí tuhun: “Cuví sacuví yo ñáá cha cuñí yo. Soco ña tandihí ta cuví chí cha vaha chí yo.” Ta ndicha cuví sacuví yo cha cuñí yo. Soco ña tandihí ta tyinyee chí chí yo cha cuahnu yo chihin tuhun Nyoo. ²⁴ Ma nanducu yo cha vaha chí maa ri maa yo, soco na nducu tucu yo cha vaha chí inga ñu.

²⁵ Cachi ndo ñáá coño cha xicó ñu nuyahví. Ta ma ndaca tuhun ndo ta ma

ndichi xiñi ndo yóo chi cuenda cuví. ²⁶ Vatyí ñuhu ñayiví ta tandihí cha iyó nuu chi, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñi ndo cuhun ndo, cuhun ndo ta cachi ndo tandihí cha chahá ñu cachi ndo. Ta ma ndaca tuhun ndo ñáá cuenda cuví. ²⁸ Soco tatu nya noo ñu catyí ñu chi ndo: “Nyayu ihya nyayu cha chahá cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyí chi ndo tyicuan caa. ²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyí inga ñáyivi? ³⁰ Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo. ³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo. ³² Ta ma cuhva ndo cuhva cha canacavá noo tahan ndo, ni ra Israel, ni ñáyivi cha ñima ñu Israel cuví, ni ñu yihí cuenda Nyoo. ³³ Tari yuhu, nanduquí cha vaha cuví chi ñáyivi. Ña nanduquí cha vaha chi mai, soco cha vaha chi inga ñáyivi nanduquí. Vatyí tacuhva cacu añima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihi nu ndu iñ ri yo

² Yañi, sii xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo. ³ Soco cuñí tyi coto ndo vatyí ra Cristo cuví xiñi noo noo rayii, ta rayii cuví xiñi ñasihi ra, tari Nyoo cuví ra xiñi ra Cristo. ⁴ Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra. ⁵ Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satyá ndii xiñi ña cuví cuan. Ta ticahan nuu chahá ña chi ra cuví xiñi ña. ⁶ Tatu noo ñaha sihi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satyá ndii ixi xiñi ña, nacasi ña xiñi ña. ⁷ Na tahan

chi casi rayii xiñi ra. Vatyí cuhva caá Nyoo caa ra, vatyí nyacá ñaha ra chi ñasihi ra, tari nyacá ñaha Nyoo chi ra. Soco noo ñaha sihi chahá ña cha cunyaca ñaha yii ña chi ña. ⁸ Vatyí quiví savahá Nyoo chi rayii, ña savahá ra chi ra chihin yiquí naha ñaha sihi. Soco chihin yiquí naha rayii savahá Nyoo chi ñaha sihi. ⁹ Ta cha catyí rayii, ta chinqo ñaha sihi. ¹⁰ Yucuan chaha ñusihi cuñí chi cunyasi xiñi ñu. Vatyí ican cuan cuví noo seña vatyí nyacá ñaha yii ñu chi ñu. Ta cha cuenda cha vaha chi ángel cuví. ¹¹ Soco tyaa maa Nyoo cuhva vatyí chiñuhú rayii chi ñusihi. Ta chiñuhú ñusihi chi rayii. ¹² Vatyí ndicha ñaha sihi chinqo ña chihin yiquí naha rayii, tari quiví cha sacacu ra chi ña cuví cuan. Soco nya cua nya quiví cuan ta maa ña quichaha sacacu ña chi rayii. Ta nya cua nya vityin ñusihi ta rayii maa Nyoo chahá cha coo ni nduvi tahan ñu.

¹³ Nyehe maa ndo. ¿Atu vaha quetuví cha ña nyasí xiñi ñusihi ta chicán tahvi ñu chichi vehe ñuhu? ¹⁴ Vatyí cha chitó ndo vatyí ticahan nuu cuví chi rayii tatu nañí xiñi ra. ¹⁵ Soco ñusihi, vaha cha cunañí xiñi ñu vatyí Nyoo chahá ra ixi nañí chi ñu vatyí casi chi xiñi ñu. ¹⁶ Soco tatu yóo cha cuñí cuví yuhu cha catyí tuhun ihya, cuñí chi coto ndo vatyí ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

¹⁷ Yañi, nonga tuhun cuacatyí chi ndo. Vatyí ña sii cuñí chihin ndo, vatyí ndu iñ ri ndo, soco ña chahá chi cha vaha chi ndo. Ta sativí chi chi ndo. ¹⁸ Ta cuaha xaan ñáyivi nacatyí chii vatyí cuhva cha ndu iñ ri ndo cha cuacoo culto, iyó ndo cha tavá siin ndo chi ndo. Ta suhva ri chinó iñi, ta suhva ña chinó tucu iñi. Soco vasi ndicha. ¹⁹ Vasi cuñí chi coo tisihi nu nyicú ndo tacuhva coto yo nya ndo ndicha cha yihí cuenda Nyoo. ²⁰ Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan. ²¹ Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu iñ ri tahan ndo. Ta yihí ndo cuaha chachí ndo. Ta chihí ndo chihin vinu. Ta yihí ndo ña ñihí ndihí ndo cha cachi ndo. ²² ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan.

Ta chahá ndo ticahán nuu chi ñu ñahri maa iyó chi. ¿Atu tahanan chi catyí chi ndo vatyi vaha cuhva nyacuví ndo, cuñi maa ndo? Ña tahanan chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³ Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehén ra noo pan. ²⁴ Ta cha yaha nacuhva ra tyahvi nyoo chi Nyoo ta tahvi sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyi nicohon iñi ndo chii”, catyí ra Jesús. ²⁵ Ta cha yaha cha cacuxiñi ra ta quehén ra Jesús copa ta catyí ra: “Chihin copa vinu ihya natyihí tahanan Nyoo tuhun chaa chihin ndo vityin. Vatyí vinu cha yihí chichi copa ihya, niñi cuvi. Tahan ri cuacoho ndo, coho ndo cha cuenda cha nicohón iñi ndo chii”, catyí ra Jesús cha cuaa cuan. ²⁶ Ta tahanan ri cha ndu iñi ri yo ta chachí yo pan ta chihí yo vinu sacotó yo chi ñáyivi vatyi cha catyí cuatyí yo chihí Sutu Mañi yo. Ta tyicuan caa sacotó yo chi ñáyivi nyacua nya quívi quichi tucu ra.

Ra Pablo chahá ra tuhun chi yo yoso caa sacotó yo Santa Cena

²⁷ Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta niñi ra Cristo. ²⁸ Yucuan chaha cuñi chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu. ²⁹ Vatyí tatu chachí yo ta chihí yo chihin cha ña sahá yo cuenda ñáá tuhun chihi ra Cristo, Nyoo cutachi tuñi ra chi yo. ³⁰ Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo. ³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo. ³² Soco tatu Sutu Mañi yo ta tachi tuñi ra chi yo tyicuan caa, vatyi tacuhva ma cunaa yo chihin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuandu iñi ri ndo cha cuacoo Santa Cena, cuatu ndo chi noo noo tahanan ndo ta cachi ndo ta coho ndo iñi ri. ³⁴ Soco tatu nya noo nyoho chisocó ndo, cachi ndo nya vehé ndo tacuhva cha ma tachi tuñi Nyoo chi ndo.

Ta inga tuhun cusandaa mai quívi cha quichi nyehi nu nyicu ndo.

12

Cha vaha cha chahá Tatyí li Nyoo chi yo

¹ Yañi, cuñi vatyi coto ndo ñáá ndihí cha vaha cha chahá Tatyí li Nyoo chi noo noo yo.

² Chitó ndo vatyi quívi cha ña ñohó nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan. ³ Yucuan chaha cuñi tyi coto ndo vatyi tatu noo ra catyí tyi ña vaha ra Jesús, ñima Tatyí li Nyoo yihí chi ra. Soco tatu noo ra cha catyí tyi ra Cristo cuví Sutu Mañi yo, Tatyí li Nyoo yihí chi ra.

⁴ Siin siin cha vaha naquehén noo noo yo, soco maa Tatyí li Nyoo ican chahá. ⁵ Siin siin cuhva sahá tyiño yo soco tyiño nuu noo ri maa Sutu Mañi yo sacuví yo. ⁶ Siin siin tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihí yo. ⁷ Chi noo noo yo chahá ra tunyee iñi Tatyí li ra, tacuhva tyi tyinyee yo chi tandihí ñu yihí cuenda ra. ⁸ Chi suhva ñu chahá Tatyí li Nyoo vatyi cahan ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu. ⁹ Ta chi inga ñu chahá ra cha chinó vavaha iñi ñu chi ra. Ta suri maa Tatyí li ra chahá ra tunyee iñi chi inga ñu vatyi cuví sanduvaha ñu chi ñu cuhví. ¹⁰ Ta chi inga ñu chahá ra tunyee iñi vatyi cuví sacuví ñu milagru. Ta inga ñu chahá cuenda ñu tuhun cahan Nyoo. Ta chi inga ñu chahá ra vatyi cuví cohon nuu ñu Tatyí li Nyoo ta tatyí ña vaha. Ta chi inga ñu chahá ra tunyee iñi ra vatyi cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyi cuví nacoto ñu ta nacatyí ñu inga sahan cha cahan tahanan ñu. ¹¹ Soco tandihí tuhun ihya, noo ri maa Tatyí li Nyoo chahá. Soco siin siin cuhva chahá ra chi noo noo yo, yoso cuhva cuñi maa ra.

Chichi cha tandihí yo ta nduví yo noo ri coño ñuhu ra Cristo

¹² Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihí cuan nanduví chi noo ri coño ñuhu. ¹³ Ta tyicuan caa tucu tandihí yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutyá yo vatyí cuví yo noo ri coño ñuhu cuenda ra Cristo. Vatyí noo ri maa Tatyí li ra chahá ra tyi quihí chi tandihí yo.

¹⁴ Noo coño ñuhu cuaha xaan cuenda yihí tahan. Ñima minoo ri cuenda. ¹⁵ Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi. ¹⁶ O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandihí chi cha cuví chi coño ñuhu. ¹⁷ Tyehe ta tandihí coño ñuhu yo cuví chiti nuu yo, yoso caa cuví cuiñi yo. O tyehe ta tandihí coño ñuhu yo cuví soho yo, yoso caa cuví tahñi yo. ¹⁸ Soco Nyoo tyaa ra noo noo cuan nu cuiñi maa ra. ¹⁹ Tatu ñin cahnú ri caa coño ñuhu yo, ñima coño ñuhu cuví. Ta ña vaha quetuví. ²⁰ Soco vasi cuaha cha nyaá chi yo, vaha quetuví vatyí nyaá tandihí cha cuví coño ñuhu chi yo.

²¹ Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.” ²² Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuiñi maa yo tyi ña chiñuhú chi yo, ican cuan cuví cha chiñuhú ca chi yo. ²³ Ta nu cuiñi vaha yo, ican cuan sacuihnó vaha ca yo. Ta nu cuiñi maa yo tyi ña tyaquí, ican cuan sacuví ca yo. ²⁴ Ta nu tyaquí ca, ña cuiñi chi sacuví yo. Soco maa Nyoo sandu ñin ri ra coño ñuhu yo, tacuhva vatyí nu cuiñi maa yo tyi ña tyaquí, sacahnú ca yo. ²⁵ Tacuhva cha ma cusiiñ coño ñuhu, tahan tahan chi cuiñi chi quihí ñiñi chi cha catyí inga tahan chi. ²⁶ Tatu suhva coño ñuhu yo nyehé chi tindoho, tandihí ri chi nyehé, ñima noo ri chi. Ta tatu suhva chi cusii cuiñi chi, tandihí ri chi ta cusii cuiñi chi, ñima noo ri chi.

²⁷ Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo

yo. ²⁸ Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahan Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra. ²⁹ Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru. ³⁰ Ña tandihí yo chahá Nyoo vatyí sanduvahá yo ñu cuhví. Ña tandihí yo cahan yo inga sahan cha ña chitó yo. Ña tandihí yo cuví nacoto yo ta nacatyí yo ñáa cha cuiñi chi catyí noo cha cahan yo chihin inga sahan. ³¹ Ta ndücu ndo cuhva naquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuiñi yo chi ñáyivi

¹ Tatu yuhu ta cuví cahn cuaha ri nuu sahan iyó siquí ñuhu ñáyivi ihya, ta cuví cahan tiqui sahan ángel ñandihí, soco tatu ñahri cha cuiñi chi Nyoo ta chi ñáyivi, cuví tari noo tambu cha nañi ri maa o noo caa cha chacú ndaxin ri maa. ² Tatu cuví cuhva cuende tuhun cahan Nyoo, o tatu cutuñi ñiñi tandihí tuhun xehe ca, ta chité tandihí, ta ña cuiñi chi Nyoo ta chi ñáyivi, ñahri maa tuhun. Tatu chinó vavaha ñiñi chi Nyoo nyacua cuví catyí chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuiñi chi Nyoo ta chi ñáyivi, ñahri ra cuví. ³ O tatu cuhve tandihí cha iyó chii chi ñu ndahvi, ta nyacua cuhva cuende ñáyivi tyi cayu coño ñuhi, soco tatu ña cuiñi chi Nyoo ta chi ñáyivi, ñahri maa tuhun.

⁴ Tatu cuiñi yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Na nyiyó ñiñi yo cha chahá Nyoo chi inga ñu, ña cahnú sahá yo chi yo, ta ña yaá yo. ⁵ Tatu cuiñi yo chi Nyoo ta chi ñáyivi, ña quini iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo. ⁶ Tatu cuiñi yo chi Nyoo ta chi ñáyivi, ña cusii cuiñi yo ñáa ndihí cha ña vaha sacuví

ñáyivi. Soco cusii cuñi yo cuenda cha vaha ta cha ndicha. ⁷Tatu cuñi yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuvi ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihi.

⁸Cha cuñi yo chi Nyoo ta chi ñáyivi ma ndihi maa, soco coo quívi cha ma coo ca tuhun cha sahá yo profetizar. Ta ma cahán ca yo inga sahan cha ña chitó yo, ta tandihi tuhun cha chitó xaan yo cundihi. ⁹Vityin chihin ri chitó yo ta chihin ri sahá yo profetizar. ¹⁰Soco quívi quichi ra Cristo, cunduvaha tandihi ta cucoto yo tandihi, ta cundihi tuhun cha chitó yo chihin ri.

¹¹Quívi cu luhli cahín ta chiga xiñi tari ra cuatyaa. Soco quívi chahñi sandoi cha nyacuví tari ra cuatyaa. ¹²Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quívi quichi ra Cristo ta cunyehe vaha yo chihin nuu yo chi ra. Chihin ri chitó yo cha vityin. Soco quívi cuan tandihi cuii ta cucoto yo, tari ñohó nuu Nyoo chi yo. ¹³Iyó uñi tahan cha ma ndihi maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñi yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñi yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹Na sañihi yo cuñi yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí li Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan. ²Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí li Nyoo. ³Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi. ⁴Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihi ñu yihí cuenda Nyoo.

⁵Yuhu cuñi vatyí tandihi ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuví tyinyee chi chi tandihi ndo. ⁶Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehé Nyoo chii, o noo cha sacotó ra chii, o noo profesia, o noo cha sañahi chi ndo, tyinyeé chi chi tandihi cuii maa ndo.

⁷Tatu tiví yo noo cutu, o sacuacu yo noo guitarra ta ña quita vaha ndusu cuan sahá yo, ma coto yo ñáá yaa cuví. ⁸Ta tatu nu iyó cuatyí ta ña tyacú vaha trompeta, yori coto ñáá cuhva tahán chi cañi tahan ra. ⁹Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan. ¹⁰Cuaha xaan nuu sahan iyó ñáyivi ihyá. Ta noo noo nuu sahan ta iyó iyó ri cha cuñi chi catyí. ¹¹Soco tatu ña cutuñí iñi sahan cha cahán inga ñáyivi chihin, ma cuví ndatuhin chihin ñu. Ta ni ri maa ñu ma cuví ndatuhun ñu chihin yuhu. Cuví ñu tari ñu inga ñuu cha cuende. ¹²Yucuan chaha nyoho cha cuñi xaan ndo naquehén ndo tunyee iñi cha chahá Tatyí li Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³Yucuan chaha nyoho cha cahán ndo inga sahan, çacan ndo chi Nyoo vatyí cuví nacoto ndo ta nacatyí ndo chi tahan ndo.

¹⁴Vatyí tatu nacuatí chi Nyoo chihin noo sahan cha ña cutuñi iñi, espíritu mai cha yihí chichi coño ñuhi ican nacuatú soco cha chihí tuñi xiñi ña cutuñí iñi chi. ¹⁵Yucuan chaha cuñí chi çacan tahvi chi Nyoo chihin inga sahan. Soco cuñi tucu chi cha çacan tahvi chi ra chihin sahan cha cutuñí iñi. Ta cuñi tucu chi cha cate chihin sahan cha ña cutuñí iñi, Soco cuñi tucu chi cha cate chihin sahan cha cutuñí iñi yo ñandihí.

¹⁶Vatyí tatu maa maa ri chihin sahan cha chahá Tatyí li Nyoo chuun, sacahnún chi ra, ma cutuñi iñi ñáyivi cha ña chitó ñáá cha cuví cuan. Ta ma cuví sacahnu ñu Nyoo chuhun. ¹⁷Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeé chi chi inga

ñáyivi vatyí ña cutuñí iñi ñu tuhun cahún.
¹⁸ Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho. ¹⁹ Soco chichi vehe ñuhu tahan ca iñi cahín vasi ohon tahan tuhun cha cutuñí iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

²⁰ Chahnu cuhva caca xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuví ndo. Vatyí cha lee ña nyacuví chi cha quiñi caa. ²¹ Catyí Nyoo nu libru ley ra tyehé caa: “Cucahin chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñí iñi ñu. Soco ni ri tyicuan caa ta ma quichaha ñu chii”, catyí Sutu Mañi yo. ²² Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chi ra. ²³ Vatyí tatu ndu iñi ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñí xiñi ndo. ²⁴ Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyi iyó cuatyí ñu cha cuenda tyi cutuñí iñi ñu cha cahán ndo. ²⁵ Ta tandihí cha caa chichi aña ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyí ñu vatyí ndicha ndicha cuii cha nyaá Nyoo chihin ndo.

Yoso caa sacoo yo culto minoo cha cachi minoo cha ndaa

²⁶ Yucuan chaha yañi, tatu cuandu iñi ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuví chi noo cha chahá tunyee iñi maa Nyoo chi tandihí yo cha yihí yo cuenda ra. ²⁷ Tatu cuacahan yo inga sahan nu ndu iñi ri yo, cuñí chi cahan uvi yo o uñi ri yo, soco noo noo ri yo cahan. Ma cahan yo iñi ri. Ta siñi ri cuñí chi cha nacatyí noo yo tuhun cahán tahan yo. ²⁸ Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu iñi ri yo. Cahan yo inga sahan soco xehe ri chihin Nyoo tacuhva cuiñi ri

maa yo. ²⁹ Tyicuan caa tucu tatu sahá yo profetizar, cahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo. ³⁰ Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí chi sandihí ñu cha cahán ñu tacuhva cuví cahan inga ñu cuan. ³¹ Ta tyicuan caa tandihí ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyí tacuhva cutuhva tandihí ca ndo ta cunii ca iñi ndo. ³² Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chi noo noo yo. ³³ Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu iñi ri ra. ³⁴ Ñusihi taxi ri na coo ñu. Cuñí chi quichaha ñu chi yii ñu tari catyí ley Nyoo. ³⁵ Tatu ñáá cha cuñí ñu coto ñu, na ndaca tuhun ñu chi yii ñu nya vehe ñu. Vatyí ña vaha quetuví cha cahán ñusihi nu ndu iñi ri yo.

³⁶ Tatu siñi cuhva chicá xiñi ndo, cuñí chi nicohón iñi ndo vatyí ñima chihin ndo quichaha tuhun Nyoo. Ta ñima nyoho ri naquehén tuhun Nyoo. ³⁷ Tatu nya noo ndo cuñí maa ndo vatyí profeta cuví ndo, o tatu cuñí maa ndo tyi Tatyí li saquehén ityi ra chi ndo, cunacoto ndo vatyí cha catyí chi ndo ihya, mandamiento Sutu Mañi yo cuví. ³⁸ Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹ Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan. ⁴⁰ Soco sacuvi ndo tandihí chihin cha ndaa ta chihin cha cachi.

15

Yoso caa nandoto ra Cristo

¹ Vityin yañi, cuñí vatyí nicohon iñi ndo tuhun ra Cristo, cha sacacú chi yo, cha cahin nuu ndo quivi cuan. Ta ican naquehen ndo ta nii iñi ndo chinó iñi ndo. ² Ta suri cha cuenda tuhun ra Cristo cacú aña ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha ching iñi ndo chi Nyoo.

³ Cha xihna ri sacote tuhun cha cutuhve chi ndo. Ta sañahí chi ndo vatyí ra Cristo

chihí ra cha catyi cuatyí yo, tari catyí nu libru Nyoo vatyi cucuvi. ⁴Tyicuan ta chicuchi ñu chi ra. Soco nu ndu uñi quivi nandoto ra tari catyí tucu nu libru Nyoo. ⁵Tyicuan ta tuví ra Cristo nuu ra Pedro ta yaha cuan ta nuu ndi uchi uvi tahan ra chicá tyiño ra. ⁶Yahá cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yaha chihí ñu. ⁷Yahá cuan ta tuví ra nuu ra Jacobo. Yahá cuan ta nuu tandihí ra apóstol.

⁸Ta nu ndihí tuví tucu ra nuu yuhu, cha cuví tari noo ra cuatyaa cha cacu ta ta chaa ca yoo cacu. (Vatyí ta cutuñi ca iñi tuhun Nyoo cuví cuan.) ⁹Vatyí cha nuu tandihí ca ra apóstol cuví yuhu noo cha ñima ri tuhun. Ta ni ña nañé cha cuví apóstol vatyi chica nyicon xain chi ñu ñohó cuenda Nyoo. ¹⁰Soco Nyoo vaha xaan ñáyivi cuví ra chihin. Ta ñima cha caha ri sahá ra tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyi maa Nyoo nyaá chihin. Ta ican ra sacuví tandihí cuan. ¹¹Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuvi tuhun cha chinó iñi ndo.

Nu sañahá ra Pablo vatyi cha ndicha cuví vatyi cunandoto ñu ndiyi

¹²Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyí ndo vatyi ma nandoto ñu ndiyi? ¹³Vatyí tatu ma nandoto ñu ndiyi, ni ri ra Cristo ta ña nandoto ra cuví cuan. ¹⁴Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun. ¹⁵Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyi sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo. ¹⁶Vatyí tyehe ta ma nandoto ñu ndiyi, ni ri ra Cristo ta ña nandoto ra. ¹⁷Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo. ¹⁸Ta ñu yihí cuenda ra ta cachihí ñu, cuanaa ri maa ñu cuví cuan. ¹⁹O tyehe ta ihya ri ñáyivi tyinyeé ra Cristo chi yo, ta ma nandoto yo

quivi quichi ra, cuví yo noo ñu tondo cha nuu tandihí ca ñáyivi.

²⁰Soco chitó vaha yo vatyi cha ndicha cuví cha nandoto ra Cristo. Ta ican ra cuví cha nandoto xihna ca mahñu ñu ndiyi.

²¹Vatyí cha catyi cuatyí ra Adán ta chicoó tuhun chihí. Yucuan chaha tahán chi cúvi yo. Soco cha catyi cha nandoto ra Cristo tahán chi nandoto tucu ñu yihí cuenda ra.

²²Ta tari tandihí ñáyivi chihí cha cuenda ra Adán, tyicuan caa tucu cunandoto tandihí ñu cuenda ra Cristo. ²³Soco noo noo yo cunandoto yo quivi tahan chi chi yo. Xihna ca ra Cristo nandoto. Yaha cuan ta quivi quichi tucu ra inga chaha cunandoto tucu ñu yihí cuenda ra.

²⁴Yaha cuan ta cundihí tuhun ñuhu ñáyivi ihya ta ma cunyaca ñaha ca ra cuví tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra. ²⁵Vatyí ra Cristo cunyaca ñaha ra nyacua nya quivi cuhva Nyoo cha cuvi chasaha ra chi tandihí ra xaan iñi chi ra.

²⁶Ta nya nu ndihí, cusanaa ra tuhun chihí. ²⁷Vatyí cha yahá nacuhva cuenda Nyoo tandihí chi ra Cristo vatyi cunyaca ñaha ra.

Soco nu catyí chi vatyi tandihí natyaa Nyoo ndaha ra, cuñi chi catyí vatyi ma cunyaca ñaha ra chi maa Nyoo vatyi ican maa Nyoo natyaa tandihí cuan ndaha ra. ²⁸Soco quivi saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

²⁹Tatu tyehe ta ña nandoto ñu chihí, ¿ñáá tuhun yihí ñu condutyá ñu tyiño nuu ñu chihí?

³⁰Ta tyicuan caa tucu mai, tatu ma nandote, ¿ñáá tuhun ndoí vaha cha ndi quivi nyatí tuhun chihí? ³¹Tandihí quivi nyatí tuhun chihí. Soco ñahri caa vatyi síi cuñi chihin ndo. Vatyí chinó iñi ndo chi Sutu Mañi yo Jesucristo. ³²Ñáá ri tuhun nyehi tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyivi: “Na cachi yo, na coho yo vatyi tyaan isa cúvi yo”, catyí maa ñáyivi cha ña chitó.

³³Ma cuhva ndo cha sandavi ñaha ñu chi ndo. Vatyí iyó tucu tuhun cha catyí: “Tatu ñu tahan yo quini iyó ñu, cuví sativi ñu

cuhva vaha cuahan yo.” ³⁴Saha ndo cuenda cuhva iyó ndo. Ta ma sacuvi ca ndo cha quinií caa. Vatyí chihin cuhva iyó suhva ndo chité tyi ña ñohó nuu ndo chí Nyoo. Catyí chí ndo tyehe caa vatyí nacoo ticahan nuu nuu ndo.

Nu sañahá ra Pablo yoso caa cusanandoto Nyoo chí yo quivi quichi ra Cristo

³⁵Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?” ³⁶¿Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñí chi cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayivi.) ³⁷Vatyí cha tachí yo ñima maa tun tachí yo. Soco chiti tun, an cuví ri nuñi, o trigu, o ñáá ndihí ca chiti. ³⁸Ta cha cañá cuan Nyoo sacuví ra yoso cuhva cuñí maa ra chí noo noo cha cañá cuan. Vatyí siin siin cuhva caa noo noo nuu chiti. ³⁹Ta tyicuan caa tucu tandihí coño ñuhu, ña iin ri caá chí. Siin caa coño ñuhu ñayivi. Siin caa coño ñuhu cuiñi. Siin caa coño ñuhu saa. Siin caa coño ñuhu tiyaca. ⁴⁰Ta tyicuan caa tucu cha iyó andívi. Siin caa cha iyó yucuan. Ta siin caa tucu cha iyó ñuhu ñayivi ihyá. Ta cha iyó nya andívi tyaquí xaan, ta cha iyó siquí ñuhu ñayivi tyaquí tucu cuan soco siin caa. ⁴¹Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño. ⁴²Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa. ⁴³Chicuchi yo noo cha numi ri tyahyu. Soco cunandoto noo cha tyaquí. Tyihí yo noo coño ñuhu pehe chichi ñuhú. Ta cunandoto noo cha nyee. ⁴⁴Vatyí chicuchí yo coño ñuhu yo cuenda ñayivi ihyá chichi ñuhu. Ta cunandoto noo cha ñima ca cuenda ñayivi ihyá cuví, soco cuenda Nyoo andívi. Tatu iyó coño ñuhu yo ñayivi ihyá. Suri coo tucu noo cha ñima ca cuenda ñuhu ñayivi, soco cuenda andívi.

⁴⁵Catyí tuhun Nyoo vatyí ra Adán ra cha chiyo cha xihna ri, chahá Nyoo ñayivi coo ra. Soco ra Adán cu uvi, ra cuví Cristo, cuví ra Tatyí lí ta chahá ra noo ñayivi cha ma naa ca maa chí yo. ⁴⁶Yucuan chaha, cha xihna ri tahán chí coo yo chihin coño ñuhu cuatyí

yo. Ta yaha cuan ta coo yo cuenda Tatyí lí Nyoo. ⁴⁷Rayii cha chingo cha xihna ri, chihin ñuhú chingo ra. Ra cuenda ñuhu ñayivi cuví ra. Ta rayii cu uvi cha cuví Sutu Mañi yo, ra cuenda andívi cuví ra. ⁴⁸Tandihí yo nyisó yo coño ñuhu cha chingo chihin ñuhú, tari coño ñuhu ra Adán. Ta cha cucuiso yo andívi cuví chí tari nyisó ra Cristo ra quichi nya andívi. ⁴⁹Tari ndacú yo chí rayii, ra cha chingo chihin ñuhú, tyicuan caa tucu cundacu yo chí ra Cristo ra quichi nya andívi.

⁵⁰Ta cuñí catyí chí ndo yañi, vatyí coño ñuhu yo ma cuví quihvi chí andívi nu nyacá ñaha Nyoo. Noo cha tañi tyehe ri tiví ma cuví quihvi noo nu ña tiví. ⁵¹Soco cuñí tyi coto ndo noo tuhun xehe cha yori maa chitó. Vatyí ña tandihí yo cucúvi yo. Soco tandihí yo ta cunasama cuhva caa yo. ⁵²Ta iin yaha cuii ri, tari noo cha ndahvá nuu ri yo, nu ndihí tiví ángel trompeta. Vatyí cutiví ángel trompeta ta ñu ndiyi cunandoto ñu cha ma cúvi ca maa ñu. Ta Nyoo cunasama cuhva caá ñu. ⁵³Vatyí cuñí chí tyi nasama Nyoo coño ñuhu yo chihin noo cha ma naa ca maa. ⁵⁴Ta quivi cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa: “Nyoo cuví chasaha ra chí tuhun chihí.”

⁵⁵Yoho, Tuhun Chihí, ¿nya nyaa tunyee iñi chuun vityin vatyí cahñun chí ndi?

¿Nya nyaa cha cua saha ganaun vityin, yoho Tuhun Chihí?

⁵⁶Vatyí cuatyí yo ican chahá cha cahñi tuhun chihí chí yo. Ta ley chahnu, ican cuví cha chahá fuerza chí chí. ⁵⁷Soco tyahví nyoo chí Nyoo, yañi. Vatyí sahá ganaa yo siquí cuan cha catyí Sutu Mañi yo Jesucristo.

⁵⁸Yucuan chaha yañi, na cuinanyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chí ñu Corinto yoso caa tyinyee ñu chí tahan ñu cuenda Nyoo

¹Ta tuhun cha tyinyee ndo xuhun chí ñu ndahvi, ñu yihí cuenda Nyoo. Cunyaquvi ndo tari catyí chí ñu nyicú tandihí vehe ñuhu ityí Galacia. ²Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihí siin ndo cha tahán

chi cuhva ndo chi ñu, yoso cuhva cha chahá Nyoo chi ndo. ³Ta quivi cha quichi, cutachi nya ra cha cuñí maa ndo vatyí cunyaca ra xuhun cuan chihin carta chi tahan yo cha canyicú nya Jerusalén. ⁴Ta tatu tahan tucu chi cuhin, cuhun coyo ra chihin.

Yihí iñi ra Pablo nya ndihi nu cucahan ra tuhun ra Cristo

⁵Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi. ⁶Ta tatu chahá chi cuhva cundoi chihin ndo nyacua nya yahá yoo vichin. Tyicuan ta cuví tyinyeé ndo chiin chii ta cuhin inga ñuu. ⁷Ña cuñí cha iin yaha ri yahi nu nyicu ndo. Vatyí cuñí ndoi suhva quivi chihin ndo tatu Sutu Mañi yo ta cuñí ra. ⁸Soco cunyai ñuu Éfeso ihya, nyacua nya yaha quivi cha sanducahnú ñu Israel vico Pentecostés. Tyicuan ta quichi nu nyicu ndo. ⁹Cundoi suhva ihya vatyí vasi cuaha xaan ñáyivi ña cuñí nyehe ñu tuhun Nyoo, soco chahá xaan chi cuhva चाहिन tuhun Nyoo chihin ñáyivi ñuu ihya.

¹⁰Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra. Vatyí sahá tyiño tucu maa ra cuenda Sutu Mañi yo tari mai. ¹¹Ta vaha coo iñi ndo nyehé ndo chi ra. Ta tyinyee ndo chiin chi ra tyi quichi ra nu nyaí. Vatyí nyatí chi ra chihin inga yañi yo.

¹²Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñí ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihi ñu yihí cuenda Nyoo ñuu Corinto

¹³Sañihi ndo chinó ca iñi ndo chi Nyoo. Ta cuní iñi ndo ta naco vaha fuerza Nyoo chi ndo. ¹⁴Tandihí cha sacuví ndo, sacuvi ndo cha cuenda cha cuñí ndo chi Nyoo ta chi tahan ndo.

¹⁵Chitó ndo yañi vatyí ñáyivi chi ra Estéfanas xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano. ¹⁶Ta catyí chi ndo vatyí saha ndo ñáyivi chi ñu cha iyó tari iyó ñu chiña, ta chi tandihí ñu cha tyinyeé ta sahá tyiño cuenda Nyoo. ¹⁷Ta cusí xaan cuñi cha quichí coyo ra Estéfanas ta ra Fortunato ta ra Acaico. Vatyí maa ra catyinyeé ra chi ndi. Vatyí tandihí ndo ña cuví quichi

ndo vatyí cañi xaan ñuu ndo. ¹⁸Soco maa ra quichí coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha coo iñi ndo nyehé ndo tyiño casacuví ra. Vatyí maa ra iin ri chi Nyoo canyicón ra.

¹⁹Ta vachí nocumi chi ndo sahá tandihí yañi yo ta tahan yo cha ndu iin ri ityi Asia ihya. Ta vachi tucu nocumi chi ndo sahá ra Aquila ta cu Priscila, ta ñu yihí cuenda Nyoo cha ndu iin ri vehe ñuhu nu cuví vehe ñu. ²⁰Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu nyicú ndo chiña.

²¹Nocumi cha vachí chi ndo ihya, yuhu ra Pablo tyai chihin ndahi.

²²Tatu nya ñáyivi ña cuñí chi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

²³Ta nasoco Sutu Mañi yo Jesucristo chi tandihí ndo. ²⁴Ta catyí chi ndo vatyí yuhu cuñí chi tandihí ndo cha cuenda ra Cristo Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi

Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto cha yihí cuenda Nyoo

¹Yuhu ra Pablo, cuví noo ra apóstol ra Jesucristo vatyí Nyoo nacachí vaha ra chíi. Ta yuhu ta ra Timoteo yañi yo tyaá ndi noo tutu ihya chí ndo cha cuví ndo ñáyivi ñuu Corinto cha yihí cuenda Nyoo, ta chí tandihí ñu yihí cuenda Nyoo nicacahnu ityí Acaya chiña. ²Nyoo Sutu yo ta Sutu Mañi yo Jesucristo na nasoco ra chí ndo ta nacuhva ra cha taxi ri coo aña ndo.

Nu chicá noo ra Pablo sacotó ra tuhun ra Cristo nyehé xaan ra tindoho

³Na sacahnu yo chí Nyoo Sutu Sutu Mañi yo Jesucristo. Vatyí ican ra cuví Nyoo Sutu yo. Ta cundahvi xaan cuñi ra nyehé ra chí yo. Ta maa ra tyicuan ri naquehén ndahvi ra chí yo. ⁴Ta cuhva cha nyehé yo tindoho maa ra naquehén ndahvi ra chí yo. Vatyí tyicuan caa ta cuví naquehen ndahvi tucu maa yo chí ñu nyehé tindoho tari naquehén ndahvi tucu maa ra chí yo. ⁵Vatyí cha cuenda ra Cristo, nyehé xaan ndi tindoho ta suri cha cuenda ra Cristo naquehén ndahvi xaan Nyoo chí ndi. ⁶Tatu nyehé ndi tindoho cha cuenda cha sacotó ndi tuhun ra Cristo chí ndo, soco cha cuenda cha vaha chí ndo cuví vatyí tyicuan ta Nyoo naquehen ndahvi tucu ra chí ndo, ta sacacu ra chí ndo. Ta tatu Nyoo ta sandunyeé ra iñi ndi, cuví tucu chí cha cuenda cha sandunyeé tucu ra iñi maa ndo ta cacu ndo, ta siin ri tacuhva cha cunyeé ndo tindoho cha nyehé ndo. Vatyí iin ri tindoho nyehé yo. ⁷Vatyí chitó vaha ndi tatu nyehé ndo tindoho cha cuenda ra Cristo tari cha nyehé nyuhu, maa ra cunaquehen ndahvi ra chí ndo, tari naquehén ndahvi tucu ra chí nyuhu.

⁸Yañi, cuñí ndi tyi coto ndo vatyí cuaha xaan tindoho nyehé ndi ta chinaa ndi ityí Asia. Ñihí xaan chiyo tindoho nyacua cha ñahri ca fuerza ndi cahví iñi ndi. Ta tyaá ndi cuhva vatyí cha yahá chihí ndi ta quita ndi yucuan. ⁹Cuñí maa ndi vatyí cha cha cuacúvi ndi. Ta ña cuví sacacu ndi chí ndi. Soco yucuan sañaha chí chí ndi na

nachinó ca iñi ndi chí Nyoo ra sanandotó ndiyi. ¹⁰Nyoo sacacu ra chí ndi ndaha tuhun chíhi quívi cuan, ta sacacú ca ra chí ndi nya vityin. Ta chitó ndi vatyí tyicuan ri cusacacu maa ra chí ndi. ¹¹Tatu tyinyeé ndo chí ndi chíhin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chí Nyoo cha cuenda tyi ñihí ñu tuhun tyi Nyoo chahá ra cha vaha chí ndi, vatyí chicán tahvi ñu chaha ndi.

Nu nacatyí ra Pablo ñáa tuhun ña chaq ñaha ra ñuu Corinto

¹²Iyó noo tuhun cha cusii xaan cuñí ndi, vatyí yoso ri sandaví ñaha ndi. Vatyí cachi cuhva iyó ndi. Ta ndaa cuhva iyó ndi xihna ca chíhin tandihí ri ndo, ta chíhin inga ñáyivi ñandihí. Ta ñima chíhin cha chíni tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chí ndi. ¹³⁻¹⁴Ta nu tutu cha sacuhún ndi chí ndo, maa maa ri tuhun cha cuví sacuahá ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihí tuhun cuan. Tacuhva cusii cuñi ndo chíhin ndi quívi quichi Sutu Mañi yo. Ta cusii cuñi tucu maa ndi chíhin ndo.

¹⁵⁻¹⁶Ta cha cuenda cha cusii iñi yo tyehe caa, tyají cuhva quívi cuan cha cuhin xihne nu nyicú ndo. Yihí iñi cha cuhin nu nyicú ndo, quívi cha yahí cha cuahín nya Macedonia ihya. Ta quívi cha nayaha tiqui cha chahín Macedonia, cuhin inga chaha nu nyicú ndo. Tyicuan caa ta cuví cusii iñi ndo chíhin yuhu uvi chaha, tyají cuhva. Ta tyicuan caa ta cuví tyinyee ca ndo chíi ta cuhin ityí Judea. ¹⁷O cuñí maa ndo vatyí ña tyají cuhva cha cuhin nu nyicu ndo. Ta vasi cuñí maa ndo vatyí sacuví tari ñáyivi iyó siquí ñuhu ñáyivi ihya. Vatyí catyí ñu tyi cuhun ñu, ta ña sacuví ñu. ¹⁸Maa Nyoo chitó ra vatyí ndicha cha cahín. Ta ña tuhvé sandaví ñahi. ¹⁹Vatyí yuhu ta ra Silvano ta ra Timoteo cahán ndi chíhin ndo. Vatyí tuhun maa ra Cristo maa maa ri tuhun ndicha cuví. ²⁰Tyi cha cuenda maa ra ñihí yo tandihí cha vaha cha catyí Nyoo tyi cucuhva ra chí yo. Yucuan chaha cuhva cha sacahnú yo chí Nyoo, o chicán tahvi yo chí ra, catyí yo: "Amén". Vatyí chitó yo tyi cuacuhva ra cha vaha chí yo cha cuenda ra

Cristo. ²¹ Ta Nyoo sandunií ca ra iñi yo nu sandu iñi ri ra chi yo chihin ra Cristo. Ta nacachi ra chi yo. ²² Ta tari cha tyaa ra tuñi ra chi yo cuví cuan. Vatyí chahā ra Vatyí li ra quihí añima yo cha cuenda cha cuñihi ca yo ñáa ca cha cucuhva ra chi yo.

²³ Na naquehen Nyoo chii vityin ri tatu ña ndicha tuhun cua catyí chi ndo. Ta cuhun que nu nyicú ndo Corinto chiña vatyí tatu cuhin tyai cuhva cha cahin chiin chi ndo. Yucuan chaha ña cuñí ñahi cuhin vatyí nacuaan iñi nyehí chi ndo. Ta Nyoo chiñí ra vatyí ndicha cha cahín. ²⁴ Ñima cha cuñí ndi cunyaca ñaha ndi chi ndo yoso cuhva chinó iñi ndo chi Nyoo. Vatyí chinó vaha iñi ndo. Soco cha cuñí ndi tyinyee ca ndi chi ndo na coo ca tusii iñi maa Nyoo añima ndo.

2

¹ Yucuan chaha ña cuñí quichi tiqui nu nyicu ndo coto cuhva que tucuihya iñi chi ndo. ² Vatyí tatu yuhu ta sanducuihyé iñi ndo, yori ca cuví sandusii iñi mai. Vatyí ma cuví ca sandusii ndo iñi tatu cha yahā sanducuihye iñi ndo. ³ Yucuan chaha sacuhin tuhun cuan chi ndo. Vatyí tatu cuhin soco ma sanducuihya ndo iñi chihin cuhva iyó ndo. Vatyí tahán chi sandusii ndo iñi. Ta tatu sii cuñí yuhu, chité tyi tandihi yo ta cusii iñi yo. ⁴ Quivi cha tyai carta cuan chi ndo, chica xaan xiñi. Ta nducuihya xaan iñi nyacua chaqui. Soco ñima cha sacuhin carta cuan chi ndo vatyí cuñí cha nducuihya iñi ndo. Soco vatyí coto ndo vatyí yaha xaan cuñí chi ndo.

Nu chahá ra Pablo tuhun chi ñu yoso caa saha ñu ticahnu iñi

⁵ Tucuihya iñi cha chahā ra chiña, ñima iñi ri chi yuhu chahā ra. Chahā tucu ra chiin chi tandihi nyoho ñandihí. Catyí tyee caa tacuhva cha ma yaha xaan cahín. ⁶ Vaha ri, cha iyó vaha. Ma cahan ca ndo chi ra. Ma tachi tuñi ca ndo chi ra. ⁷ Ta vityin tahán chi vatyí saha ndo ticahnu iñi chi ra. Ta naquehén ndahvi ndo chi ra, coto yaha xaan nducuihyá iñi ra. ⁸ Yucuan chaha catyí chi ndo sañaha ndo cha cuñí ndo chi ra. ⁹ Sacuhin carta cuan chi ndo quivi cuan vatyí cuñí cote tatu sacuví ndo cuhva chahí chi ndo. ¹⁰ Ta vityin tatu sahá ndo ticahnu iñi, sahá tucu yuhu ticahnu iñi yóo cha chahá tisihi chi yo. Tatu ndicha cha chahá

ra tisihi chii. Soco sahí ticahnu iñi chi ra cha cuenda cha vaha chi nyoho. Vatyí yucuan cuhva cuñí maa ra Cristo. ¹¹ Vatyí chitó yo vatyí tatu ma saha yo ticahnu iñi chi tahan yo, cuihna cutiyihí ra cha quiñi caa añima yo. Vatyí maña xaan ra. Ta cuví sacañi tahan ra chi yo.

Ña ndog ra Pablo ñuu Troas vatyí ña nañihí ra chi ra Tito

¹² Quivi chaj ñuu Troas cha cuacahin tuhun ra Cristo, chahá chi cuhva cha sahá tyiñe tyiño nuu Sutu Mañi yo yucuan. ¹³ Soco ña sii maa cuñí añime. Vatyí ña nañihí chi yañi yo, ra Tito. Yucuan chaha ña ndog que ñuu cuan cahin chihin ñu. Ta vachi itiyí Macedonia ihya.

Cahán ra Pablo tuhun ra Cristo chihin cha nii iñi ra

¹⁴ Soco tyahvi nyoo chi Nyoo vatyí tyicuan ri sahá ganaa yo chihin fuerza ra Cristo Jesús. Vatyí sacotó yo tuhun ra chi ñáyivi. Ta tuhun ra cha cahán yo, cuví chi tari noo xico vixi chahan cha caña tandihí ri itiyí nu cuahán yo. ¹⁵ Ta yóo cuví yo tari noo xico vixi cha chahá cuenda ra Cristo chi Nyoo. Ta caña xico cuan mahñu ñu cha cucacu añima, ta mahñu ñu cha ma cacu añima ñandihí. ¹⁶ Soco cha cuenda ñu cha ma cacu añima cuan, quiñi chahán, tari noo xico ndiyi cuví tuhun cha sacotó yo chi ñu, cuñí maa ñu. Vatyí sacotó yo yoso caa cucuvi ñu vatyí ña chinó iñi ñu chi ra Cristo. Soco cha cuenda ñu cha cacu añima, vixi xaan chahán, Vatyí sacotó yo yoso caa coo ñu ñáyivi cha ma naa ca maa. Soco yóo cha cuví sacuvi tyiño ihya? ¹⁷ Nyuhu ña sacuví ndi tari sacuví cuaha ra cachicá noo. Ra cuan cuñí ra xuhun. Tuhun ra Cristo ñima noo cha xicó yo cuví. Soco cahán ndi chihin cha nii iñi ndi tuhun ra vatyí iñi ri cuví ndi chihin ra, ta Nyoo ta ra Cristo tachí ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñí ndi sayaa ndi chi ndi, cuñí maa ndo? Ñima tyicuan caa. Ta yóo ¿atu chiñuhú cha cuiso yo tutu cha catyí chi vatyí vaha ñáyivi cuví yo, tari tuhva inga ra canyiso? Ñima. ² Vatyí nyoho cuví ndo carta ndi cha tyaa Nyoo añima ndi. Vatyí cuví nyehe ñáyivi yoso caa nasamā Nyoo cuhva iyó ndo. Ta

coto ñu tyi maa maa ri cha vaha sañahá ndi chi ndo. ³Ta cachi nyehé ñu tyi cuví ndo carta cha tyaa ra Cristo vaty nyehé ñu, ta nyuhu nacuhvá cuenda ndi carta cuan chi ñu. Ta ñima chihin tinta tyaa Tatyí li Nyoo nyitó aña ndo. Ta ni ñima nu yuu chicunyaa.

⁴Cahán ndi tyehe caa vatyí chitó ndi vatyí Nyoo cuacuhva ra cha quita vaha tyiño sahá ndi. Vatyí tyinyeé ra Cristo chi ndi. ⁵Ma caña iñi ndi caca xiñi ndi tyi iyó tunyee iñi maa ndi cha sacuví ndi ñáa cha sacuví ndi. Soco tandihí cha sacuví ndi maa Nyoo sacuví. ⁶Maa Nyoo chahá ra tunyee iñi ra chi ndi, ta sacotó ndi tuhun chaa cha natyihí tahan ra tuhun chihin yo. Vatyí Tatyí li ra chahá ñayiví chaa coo yo. Ta ley chahnu cuan cha chahá Nyoo chi ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷Ley chahnu cuan, chicunyaa chihin le-tra chata yuu ta cha naha. Ta cuhva cha chaá ra Moisés chihin cuan, tyaquí xaan xiño nuu ra nyacua nayuhví ñu Israel nanyehé ñu nuu ra. Soco svita ri tyi cha tyaquí cuan numi ri ndihí. Soco tatu tyaquí cuví cuan, ⁸tyaquí ca cuví tuhun chaa cha quichí nyaca Tatyí li Nyoo chi yo. Tyaquí xaan ca cuan. ⁹Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan. ¹⁰Vatyí ley chahnu tyaquí xaan cuví quiví cuan, cuñi maa ñayiví. Soco vityin chitó yo tyi ña tyaquí xaan cuví. Vatyí tyaquí xaan ca maa tuhun ra Cristo cha sacacú chi yo nuu Nyoo. ¹¹Vatyí tatu tyaquí xaan cuví cha iin yaha ri chiyo, nyaca cuví noo cha ma ndihí ca maa.

¹²Chitó ndi tyi ma naa cuan. Yucuan chaha cahán ndi chihin cha ñi iñi ndi. Ña cahán nuu ndi ta ña yuhví ndi. ¹³Ña sacuví ndi tari sacuví ra Moisés. Vatyí chasí ra nuu ra chihin noo sahma, tacuhva cha ma nyehé ñu Israel nu cunaa cha xiño cuan. ¹⁴Soco quiví cuan ña cutuñí iñi ñu. Ta nyacua nya vityin ta ña cutuñí iñi ñu. Vatyí tatu sacuahá ñu ley cuan tari quiví cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuñá ra nuu yo. ¹⁵Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu. ¹⁶Soco tatu

nacuhvá ñu aña maa ñu chi Sutu Mañi yo, maa ra cunuña ra nuu ñu. ¹⁷Vatyí Sutu Mañi yo, Tatyí li cuví ra. Ta tatu nyaá Tatyí li Sutu Mañi yo aña maa yo, sacotó ra chi yo tyi ña nyacá ñaha ca ley chahnu chi yo. ¹⁸Yucuan chaha tandihí yo ña nyasí ca nuu yo. Ta vityin cuví yo tari noo ino, tacuhva cuví nyehé ñayiví cha vaha Sutu Mañi yo. Ta cuahán nduvaha ca yo yoso cuhva sacuví Tatyí li Sutu Mañi yo chi yo.

4

¹Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaa tyiño ra chi ndi tyi cahan ndi tuhun ra chihin ñayiví. ²Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chi ñayiví. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandihí ñayiví, na saha vaha ñu cuenda vatyí maa maa ri cha ndicha sañahá ndi. ³Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe. ⁴Cuihna, ra nyacá ñaha cha quini caa ñuhu ñayiví ihya, ican ra chasí cha chiñi tuñi xiñi ñu cha ña chinó iñi chi Nyoo. Vatyí coto nyehé ñu cha ndichin Nyoo. Ta coto cutuñi iñi ñu yoso caa sacacú ra Cristo chi yo. Vatyí ra Cristo nyitó ra ta cuví ra xiñahñu Nyoo. ⁵Cuhva cha cahán ndi chihin ñayiví, ña cahán ndi tuhun maa ndi. Soco sacotó ndi tyi ra Jesucristo cuví ra Sutu Mañi yo. Ta nyuhu cuví ndi noo musu ndo cha catyí cha cuñí ndi chi ra. ⁶Vatyí suri maa Nyoo catyí vatyí na ndundichin nu ñaa iñi quiví chingo ñuhu ñayiví. Ican ra chahá ra cha ndichin coo aña maa yo, tacuhva vatyí chihin cha ndichin cha chahá ra Cristo chi yo, cuví cutuñi ca iñi yo tyi cahnú xaan ca cuví maa Nyoo.

Chihin cha chinó ri iñi yo chi Nyoo coo yo noo ñayiví chaa

⁷Coño ñuhu yo cuví tari noo quisi ñuhú, vatyí noo cha ñima ri tuhun cuví. Vatyí tyicuan caa ta cuví nyehé ñayiví tunyee iñi cha cahnú xaan cha iyó chi yo, maa Nyoo chahá, ta ñima tunyee iñi maa yo cuví. ⁸Yucuan chaha vasi iyó tisihi tandihí ri ityi nu cuahán ndi, soco ña ndu uvi iñi ndi. Vasi ña cutuñí iñi ndi tandihí cha cuví chi ndi,

soco chitó ndi tyi quitá vaha ndi. ⁹ Vasi chicí nyicon ñu chi ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chi ndi soco ña chihí ndi. ¹⁰ Tandihí ri ityi nu cuahán ndi ta nyatú ndi tuhun chihí cha catyi tuhun ra Jesús. Vatyí yucuan cuhva nyehé ñu tyi iyó ndi ñayiví chaa cha chahá ra chi yo. ¹¹ Vatyí nyuhu tandihí quiví, cha yatyin cúvi ndi cha cuenda ra Cristo tacuhva cuví nyehe ñáyiví vatyí yihí ñayiví ra Cristo aña ndi. ¹² Nyatú ndi tuhun chihí cha cuenda cha cahán ndi tuhun Nyoo. Soco cha tyehe caa, nañihí ndo ñayiví chaa.

¹³ Chinó iñi ndi chi Nyoo tari chinq iñi ra David. Ta tyaa ra nu libru Salmos: “Chinó iñi chi Nyoo, yucuan chaha cahán tuhun ra”, catyi ra David. Ta tyicuan caa tucu nyuhu. Chinó iñi ndi chi Nyoo. Ta yucuan chaha cahán ndi tuhun ra. ¹⁴ Vatyí chitó ndi vatyí Nyoo ra sanandoto chi Sutu Mañi yo Jesucristo, cusanandoto tucu ra chi yo. Ta iin ri chihin nyoho, cunyaca ra chi yo nya gloria nu nyaá ra. ¹⁵ Tandihí ihya cuví cha vaha chi maa ndo ta chi inga ñáyiví. Vatyí cuaha cha vaha Nyoo cuñihí ndo. Ta cuaha ndo nacuhvá ndo tyahvi nyoo chi ra, ta sacahnú ndo chi ra.

¹⁶ Yucuan chaha ña ndu uví maa iñi ndi. Vasi coño ñuhu ndi cha cuahán sandihí xaan chi. Soco ñayiví chaa cha iyó ndi cuahán nduchaa chi tahan tahan quiví. ¹⁷ Tindoho cha nyehé ndi ñayiví ihya, tindoho iin yaha ri cuví. Vatyí chahá chi cha cunañihí ndi noo nu vaha ca cha ma ndihí maa nu nyaá Nyoo. ¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñayiví ihya, ña naha maa chiyó. Soco cha ña cuví nyehé yo, yucuan cuví cha ma ndihí ca maa.

5

¹ Ta chitó ndi vatyí quiví cúvi yo, coño ñuhu yo cunaa chi. Vatyí cuví chi tari noo vehe cha ña naha maa chiyó. Soco Nyoo cumí ra noo nu cunyaa aña yo, noo cha ma naa ca maa nya andiví. Ta ñima cha cacú chihin ndaha rayí ñayiví ihya cuví. ² Ndicha, cha ní ri ca cha iyó yo chichi coño ñuhu yo, nducuihyá xaan cuñí yo, vatyí nyatú tuhva yo nicoo yo chichi cha chahá Nyoo chi yo nya andiví. ³ Vatyí cohon aña

yo chichi cha chahá Nyoo tacuhva cha ma cuvityiyaá yo. ⁴ Cha ní ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyí ña cuñí yo quita ri maa aña yo chichi coño ñuhu cuan ta cuvityiyaá chi. Soco cuñí yo cha coo aña yo chichi cha ma naa ca maa nya andiví ta tyicuan ri maa cuacoo yo. ⁵ Ta Nyoo tyaa ra cuhva vatyí tyehe caa cucuvi chi yo. Ta chahá quiví ri ra Tatyí li ra chi yo. Vatyí tacuhva coto yo tyi cuví naquehen ca yo tandihí ca cha cuacuhva ra chi yo.

⁶ Ta yucuan chaha ma yuhvi yo cha cúvi yo. Vatyí chitó yo tyi cha ní ri ca cha iyó yo chichi coño ñuhu ihya ñayiví, ña yatyin nyaá yo chihin Sutu Mañi yo andiví. ⁷ Vityin ña cuví nyehe yo chi ra, soco chihin cha chihí ri iñi yo chi ra, iyó yo ñayiví ihya. ⁸ Soco yihí vaha iñi yo chi ra ta cha cuñí yo quita yo chichi coño ñuhu ihya vatyí cuhun yo cucunyaa yo chihin Sutu Mañi yo. ⁹ Yucuan chaha sañihí ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñayiví ihya. O cuví ri cha yori ca ndi, vatyí cha nyaá ndi chihin Sutu Mañi yo nya andiví. ¹⁰ Vatyí tahan tahan yo ta cuhun yo nuu ra Cristo cucuhva yo cuenda nu nyaá cutuñi chi yo nuu ra. Ta cuñihí yo cha tahan chi chí yo, yoso cuhva cha vaha o cha ña vaha cha sacuví noo noo yo quiví chiyó yo chihin coño ñuhu yo ñayiví ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyí chitó ndi vatyí Sutu Mañi yo cutachi tuñi ra chi ndi tatu ma sacuví ndi tuhun cahán ra. Yucuan chaha nducú ndi cuhva cahán ndi chihin ñáyiví na nacuhva cuenda ñu chi ñu chi Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí. ¹² Ñima cha cuñí ndi cuyaa ndi chihin cha cahán ndi tyehe caa, soco cha cuñí ndi vatyí nichón iñi ndo vatyí tuhun ndicha sacotó ndi, ta cuví cusii iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyi ra tyi vaha iyó ra, soco ñima cha ndicha caa aña ra. ¹³ Tatu ña vaha cuñí xiñi ndi, cuñí maa ñáyiví tyi cahín tuhín tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyi cuñí ndi

tyinyeé ndi chi ndo. ¹⁴ Soco saniñí ndi chi ndi cha sacotó ndi tuhun ra Cristo chi ñáyivi. Vatyí chitó ndi tyi cuñí xaan ra chi ñu. Ta chitó ndi tyi chihí ra cha catyí cuatyí tandihí cuií maa ñáyivi. Ta yucuan chaha chihí tucu yo cha ma sacuví ca yo cha ña vaha cha chinyacuví yo nu quichí chi. ¹⁵ Ra Cristo chihí ra cha catyí tandihí yo vatyí tacuhva cha ma coo ca yo cuhva cuñí maa yo. Coo yo soco cuhva cuñí maa ra. Vatyí chihí ra ta nandotó ra cha cuenda yo. ¹⁶ Cha cuhva cha vityin, tatu nyehé yo chi noo ñáyivi, ma caca xiñi yo nyehé yo chi ñu tari chicá xiñi ñáyivi cha ña ñohó nuu chi Nyoo. Noo quívi tyicuan caa chicá xiñi vatyí ra Cristo cuví ra noo ra ñuhu ñáyivi ri. Vityin ña chicá ca xiñi tyicuan caa. ¹⁷ Vatyí quívi nacuhva cuenda yo chi yo chi ra Cristo, maa ra sanduchaa ra ña ña yo. Ta tandihí tuhun cha chicá xiñi yo nu quichí chi, ña chicá ca xiñi yo vityin. Vatyí maa ra nacuhva ra nonga cha chihí tuñi chaa chi yo.

¹⁸ Ta tandihí ihya maa Nyoo sacuví, vatyí sanícoo vaha ra chi yo chihin ra cha cuenda maa ra Cristo Jesús. Ta catyí ra chi yo vatyí na sacoto yo chi ñáyivi vatyí Nyoo cuñí ra cha nicoo vaha ñu chihin ra. ¹⁹ Vatyí chihin cha chihí ra Cristo cha catyí cuatyí yo, ñáyivi nicoó vaha ñu chihin Nyoo. Ta Nyoo sahá ra tuhun tyi ñahri ca cuatyí ñu. Ta chi nyuhu, catyí ra vatyí sacotó ndi tuhun ihya chi ñu. ²⁰ Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyí tyiño maa ra chicá ndi. Ta yucuan chaha chacú ndahvi ndi nuu ndo chihin sivi ra Cristo, na nicoo vaha ndo chihin ra. ²¹ Ra Cristo ña sacuví ra ni minoo cuatyí. Soco Nyoo tachí ra chi ra síqui ñuhu ñáyivi ihya, quichí cúvi ra tari noo ra iyó cuatyí cahnu. Tacuhva vatyí cuví sacacu ra chi yo. Ta cha cuenda maa ra Cristo saha Nyoo tuhun tyi vaha yo nuu ra.

6

¹ Yañi, ñin ri tyiño Nyoo sacuví yo. Yucuan chaha chacú ndahvi xaan ndi nuu ndo vatyí ma coo ndo tari cha ña ñohó nuu ndo Nyoo. Cotyíño ndo tandihí cha vaha cha chahá ra chi noo noo ndo. ² Vatyí catyí Nyoo nu tutu tyehé caa:

Quívi tahán chi tyi sacaqui chuun, yuhu chihí nu cahun ta tyinyeí chuun, catyí Nyoo.

Saha ndo cuenda tyi vityin cuví quívi tahán chi. Vityin cuví quívi sacacú Nyoo chi yo.

³ Nducú xaan ndi cuhva cha ma nyehé nyaa ñáyivi tyiño Nyoo cha sacuví ndi, coto ma chino ñi ñu chi Nyoo. ⁴ Soco cuñí ndi vatyí nyehé ñu vatyí ndicha cha cuví ndi musu Nyoo vatyí cunyeé ndi ñáá ndihí cha cuví chi ndi, tandihí tindoho, tandihí tisihi. ⁵ Vasi cañí ñáyivi chi ndi, vasi tyihí ñu chi ndi vehe caa, vasi canachaa ityi ñu síqui ndi, soco cunyeé xaan ndi. Ta ñihi xaan sahá tyiño ndi nyacua ña quixi ndi. Ta yahá ndi soco. ⁶ Ta tandihí maa ihya cunyeé ndi vatyí ndicha ndicha cuií cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandihí cha cuví chi ndi. Ta vaha ñáyivi cuví ndi. Ta cuñí ndi chi ñáyivi. Ta nyaá maa Tatyí li Nyoo chihin ndi. ⁷ Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihí cha vaha cha chahá maa ra chi ndi, tacuhva cuví chasaha ndi chi ra ña vaha. ⁸ Iyó quívi cuñí nyehé ñáyivi chi ndi. Ta iyó quívi ña cuñí nyehé ñu chi ndi. Iyó quívi vaha cahán ñu síqui ndi. Ta iyó quívi quíni cahán ñu síqui ndi. Iyó chaha catyí ñu vatyí ra cuendu cuví ndi. Soco maa ma ri cha ndicha cahán ndi. ⁹ Sahá ñu chi ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chi ndi. Iyó quívi cha yatyin ri cúvi ndi, soco iyó ca ndi. Ta iyó quívi tachí tuñi ñu chi ndi, soco ña chihí ndi. ¹⁰ Vasi iyó quívi cha nducuihyá ñi ndi, soco tyicuan ri síi cuñí ndi. Vatyí tyiño Nyoo sacuví ndi. Vasi ndahvi ndi, soco cuaha ñáyivi ñihi ñu cha vaha chihin tuhun cha chahá Nyoo chi ndi. Vasi ñahri maa iyó chi ndi, soco iyó tandihí cha vaha Nyoo chi ndi.

¹¹ Cahán ndi chihin ndo yañi, cha cuví ndo ñáyivi ñuu Corinto chihá. Catyí cachi ndi chí ndo chihin cha ñi ña ña ndi vatyí ndicha cha cuñí ndi chi ndo. ¹² Nyuhu, ña quíni cuñí ndi nyehé ndi chí ndo. Maa ndo cuví ñu ña vaha cuñí nyehé chi ndi. ¹³ Chacú ndahvi ndi nuu ndo tari chacú ndahvi noo rayii nuu sehe ra, nuña ndo ña ña ndo, ta ma quíni cuñí ndo nyehé ndo chi ndi, vatyí maa ndi ña quíni cuñí ndi nyehé ndi chí ndo.

Cuví yo vehe Nyoo vatyí ñohó ra ña ña yo

¹⁴Ma ndu iin ri ndo chihin ñu ña chinó iñi chi Nyoo. Vatyí ña nacachí tahan añima ndo chihin ñu cuan. Vatyí cha vaha ma cuvi ndu iin ri chihin cha ña vaha. Ta cha ndichin ma cuvi ndu iin ri chihin cha ñaa iñi. ¹⁵Vatyí ra Cristo ña ndu iin ri ra chihin ra cuví cuihna. Ta tyicuan caa tucu ñu chinó iñi chi ra Cristo, ña nacachí tahan chi tatu ndu iin ri ñu chihin ñu ña chinó iñi chi ra. ¹⁶Ña chahá chi cha sacahnú yo Nyoo ta sacahnú tucu yo chi cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha naha: Coi ta caca noi chihin ñu. Ta yuhu cucuvi Nyoo ñu, ta maa ñu cucuvi ñu ñáyivi chii, catyí Nyoo. ¹⁷Yucuan chaha catyí tucu ra quívi cuan: Quíta ndo mahñu ñu ña chinó iñi chii. Ta ma cutahan ndo chihin ñu. Ta ma sacuvi ndo cha ña vaha. Tyicuan ta cunaquehin chi ndo. ¹⁸Ta sutu ndo cucuvi chii. Ta maa ndo cucuvi ndo sehi, catyí Sutu Mañi yo, ra iyó tandihí tunyee iñi chii.

7

¹Ican ihya cuví cha chahá Nyoo chi yo. Yucuan chaha yañi, cuñí chi nducu yo cuhva cuvaha yo nuu Nyoo. Ma sacuvi yo cha quíñi caa ni ri ma caca xiñi yo cha ña vaha. Na ndu cuíti coo yo vatyí sahá yo ñáyivi chi Nyoo.

Nu nacatyí ra Pablo yoso caa nasamq ñu cuhva iyó ñu

²Yañi, chacú ndahvi ndi nuu ndo, na cuvaha coo iñi ndo nyehé ndo chi ndi vatyí ñahri cha sacuví ndi chi ni noo ndo. Ta ni ña sativí ndi chi ndo. Ni noo ndo ta ña sandaví ñaha ndi chi ndo. ³Cha catyí chi ndo tyehe caa ñima cha cahín chi ndo. Vatyí cha yaha catyí tiquí chi ndo ta ityi chata ca, vatyí ndicha cha cuñí chi ndo. Vatyí iin ri ñu cuví yo chihin Nyoo. Tatu iyó yo soco iin ri cuví yo. O tatu cúvi yo soco iin ri cuví tucu yo. ⁴Ñahri maa cha chica iñi chihin nyoho. Sii xaan cuñí nyehi chi ndo. Ta yucuan chaha vasi nyehé ndi tindoho ihya, cuní ca iñi ndi. Ta cusii xaan ca cuñí ndi.

⁵Nya quívi chaq ndi Macedonia ihya, ta ta nyitatu ca maa ndi. Vatyí cuaha xaan tisihi ta tindoho nyehe ndi tandihí ri ityi chahan ndi. Ta cañí tahan ñu chihin ndi. Ta yuhví ndi. ⁶Soco Nyoo, tyicuan ri sanduní ca ra

iñi yo tatu cuihyá cuñi yo. Ta sanduní ra iñi ndi cuhva cha chaq ra Tito. ⁷Ta ñima cha cuenda cha chaq ri ra. Soco cha cuenda cha nduní iñi ra saha nyoho. Nacatyí ra chi ndi vatyí cuñí xaan ndo nyehe ndo chi ndi. Ta chacu xaan ndo cha cuihya iñi ndo. Ta cuñí ca ndo chii, na. Ta cha cuenda cuan ndusii xaan ca cuñí vityin.

⁸Soco quívi cuan chica xaan xiñi vatyí chahí tucuihya iñi chi ndo chihin tutu cha sacuhin chi ndo. Ta ndu uvi iñi cha sacuhin tutu cuan chi ndo. Soco suhva ri quívi, nducuihya iñi ndo. Ta vityin ña chicá ca xiñi cha cuenda tucuihya iñi cha chahí chi ndo. ⁹Ta vityin cusii xaan cuñí, ñima cha cuenda tucuihya iñi cha chiyo ndo, soco cha cuenda vatyí tucuihya iñi cuan sanandichí chi ndo ndaha Nyoo. Nyoho cunyeé ndo tucuihya iñi cuan yoso cuhva tahán iñi Nyoo, yucuan chaha cha vaha sacuví ndi chihin ndo chihin tucuihya iñi cuan. ¹⁰Iyó tucuihya iñi cha maa Nyoo chahá, tacuhva ndu uvi iñi yo cuatyí yo ta nañihi yo ityi vaha cuhun yo nu nyaa ra. Ta ña tahán chí cha cuxaán yo chí Nyoo cha cuenda cuan. Soco tucuihya iñi cha iyó chí ñu cha ña ñohó nuu chí Nyoo, ñima tucuihya iñi chí Nyoo cuví cuan. Vatyí ña tyinyee chí chí ñu tacuhva cha ma cuhun ñu anyaya. ¹¹Nyoho cunyeé ndo tucuihya iñi yoso cuhva tahán iñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya iñi ndo. Ta sandaa vaha ndo tyiño ra cuan. Cuxaan ndo chí ra. Ta nyacua cuñí ndo tachí tuñi ndo chí ra. Tandihí cuan, ta nayuhví ndo chí Nyoo. Ta nacatyí vaha ndo yoso caa cuahan. Yaha cuan ta nyacua quichí cuvi iñi ndo nyehe ndo chii. Ta cha cuenda cha sacuví ndo tari cuhva cuñí Nyoo, cuñí chí catyí vatyí ñahri cuatyí ndo cha cuenda cuan. ¹²Yucuan chaha quívi sacuhin carta cuan chí ndo ñima cha cuenda cha chicá xaan xiñi cuenda ra cha sacuví cuatyí cuan. Ta ni ñima cuenda ra cha nyehe tisihi cuan. Soco cha cuenda maa ndo, vatyí cuñí tyi coto ndo yoso cuhva chicá xiñi ndo tuhun ndi nuu Nyoo vatyí cuñí ndo tyinyee ndo chí ndi. ¹³Yucuan chaha nduvaha cuñí añima ndi. Ta sii xaan cuñí ndi vatyí chitó ndi tyi cuñí ndo chí ndi.

Ta sii ca cuñí ndi cha nyehé ndi vatyí chahá xaan ndo tunyee iñi añima ra Tito. Vatyí vaha xaan tyiñuhú ndo chí ra. ¹⁴Catyí

chi ra Tito cha cumañi ca cuhun ra nu nyicú ndo vatyi vaha cutyasoho ndo tuhun cha sacuhjñ chihin ra. Ta vityin sii cuñí vatyi chinó cava tuhun cahín chihin ra. Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chi ra Tito. ¹⁵Ta cuñí xaan ra chi ndo vatyi nicohón iñi ra vatyi nyoho sacuví ndo tandihí cuii cha catyí ra chi ndo. Ta cuhva cha chaá ra, ndahvi sahá ndo chi ndo nuu ra. Ta vaha xaan cahán ndo chihin ra. Ta vaha xaan quichahá ndo chi ra. ¹⁶Ta sii xaan cuñí vatyi chité tyi tyicuan ri sacuví ndo cha vaha.

8

Tahán chi tyinyee yo chi ñu yihí cuenda Nyoo chihin cha iyó vaha iñi yo

¹Ta vityin yañi, cuñí ndi nacatyi ndi chi ndo vatyi cuaha xaan tyinyee Nyoo chi ñu yihí cuenda ra, ityi Macedonia ihya. ²Vasi cuaha xaan tindoho nyehé ñu, soco sii xaan ca cuñí ñu chihin Nyoo. Ta vasi ndahvi ñu soco cuaha cha iyó chi ñu chahá ñu, tari maa cha tyayii ñu. ³Ta yuhu cuví noo cha ndaa vatyi nyehí tyi chihin cha iyó vaha iñi ñu chahá ñu yoso cuhva cha iyó chi ñu. Ta nyacua yaha ca chahá ñu. ⁴Chacú ndahvi xaan ñu nuu ndi tyi nacuhvá ndi cha tyinyee tucu maa ñu chi ñu tahan yo nya Jerusalén. ⁵Cuaha ca sacuví ñu cha nuu cha yihí iñi ndi. Vatyi cha xihna ca cha sacuví ñu, nacuhvá cuenda ñu chi ñu chi Nyoo chihin cha ñi vaha iñi ñu. Ta quichahá vaha ñu tuhun Nyoo cha sacote chi ñu, vatyi yucuan cuhva cuñí maa Nyoo. ⁶Ta cha nyehí tyi tyehé caa chinyacuví ñu Macedonia ihya, yucuan chaha catyí chi ra Tito vatyi na sandihí ndihí ra tyiño vaha cha quichahá ra cha nacaya ra xuhun nu nyicú ndo. ⁷Nyoho vaha xaan sacuví ndo tandihí ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñí iñi ndo. Ta ñi xaan iñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan caa tucu tahán chi cha tyinyee ndo chi ñu ndahvi ñu yihí cuenda Nyoo noo cuhva vaha xaan.

⁸Ñima tyi catyí chi ndo tyehé caa ta cuñí ndo tyi cha saniñí chi ndo. Soco cha cuñí vatyi nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi

ndicha vaha ñáyivi cuví ndo chihin tahan ndo. ⁹Vatyi cha chitó maa ndo yoso cha cuñí Sutu Mañi yo Jesucristo chi yo. Vatyi maa ra tyayii xaan ra. Soco sandundahvi ra chi ra cha catyí yo tacuhva vatyi cuví sandutyayii ra chi yo.

¹⁰Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahá ndo quiyava. Ñima tacuhva sacuví ri ndo, soco sacuví ndo chihin cha iyó vaha iñi ndo. ¹¹Ta tari chahá ndo chihin cha iyó vaha iñi ndo, tyicuan caa sacuví tucu ndo vityin. Ta cuhva ndo yoso ri cuhva cha iyó chi ndo. ¹²Vatyi tatu noo ñáyivi ñi vaha iñi ñu, cuñí ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyi Nyoo ña chicán ra cha ñahri iyó chi yo.

¹³Ñima cha cuñí vatyi nyehe ndo tindoho cha cuenda cha tyinyee ndo chi inga ñu tacuhva ma nyehe ca ñu cuan tindoho. ¹⁴Soco vityin cha iyó chiin chi ndo, tahan chi cha tyinyee ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehé caa tahán chi tyinyee chi tahan ri yo tacuhva tyi ninoo yo ta ni inga yo ma nyehe yo tindoho. ¹⁵Vatyi tyehé caa catyí chi tuhun Nyoo: “Ra cha cuaha xaan cumí, ña ndoo ca chi ra. Ta ra cha chiin ri cumí, ña cumañí chi ra”, catyí tuhun Nyoo.

Ra Tito chihin ra tahan ra tyaa ra cuhva cuhun ra ñuu Corinto

¹⁶Soco tyahvi nyoo chi Nyoo vatyi chahá ra cha vaha coo añaima ra Tito tyi chicá xiñi ra tuhun ndo tari chicá xiñi yuhu. ¹⁷Ta quehén ra tuhun cha catyí chi ra cha cuhun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha iñi maa ra.

¹⁸Ñin ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihí ñáyivi yihí cuenda Nyoo. ¹⁹Ta siñ ri nacachí vaha maa ñu yihí cuenda Nyoo chi ra yañi yo ihya vatyi cuhun ra chihin ndi cunyaca ndi xuhun chi ñu ndahvi nya Jerusalén. Ta cuñí ndi sacahnú ndi chi Sutu Mañi yo cha sacuví ndi tyiño ihya. Ta suri sañahá ndi vatyi cuñi xaan ndi tyinyee ndi chi tandihí ñu yihí cuenda Nyoo. ²⁰Ta cuñí ndi sacuví

ndi tyehe caa tacuhva cha ma quihi yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi. ²¹Ta nducú xaan ndi cuhva sacuví ndi noo cuhva cachi. Tatu ñáá noo cha cuasacuvi ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²²Ta chihin ra Tito ta inga yañi yo cuan, vachí inga tucu ra yañi yo, vatyi nyehé ndi vatyi ñii xaan iñi ra. Ta vityin yaha ca cuhva, vatyi vaha cuñí ra nyehé ra chi ndo cha cuenda cha chinó xaan iñi ra tyi cuñí ndo sacuví ndo cha vaha nuu Nyoo. ²³Tatu yóó cha ndaca tuhun tuhun ra Tito, catyi ndo chi ñu tyi ra tahirin cuví chi ra. Ta sahá tyiño ra chihin, ta tyinyee ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyi ndo chi ñu vatyi maa ñu yihí cuenda Nyoo saquichi chi ra. Ta vaha xaan sacuvi ra tyiño nuu ra Cristo. ²⁴Yucuan chaha sañaha ndo chi ra ihya vatyi ndicha ndo cha cuñí ndo chi ra. Tyicuan ta coto tandihí ñu yihí cuenda Nyoo vatyi tahnán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo. ²Vatyi cha chité cha vaha caá aña ndo. Yucuan chaha chihin cha sii cuñí nacatyí chi ñu ityi Macedonia ihya, vatyi nyoho ñu ityi Acaya, nya ta quiyava quichaha cuñí ndo tyinyee ndo. Ta cuaha xaan ñu Macedonia cunii ca iñi ñu cha tyinyee tucu maa ñu. ³Soco suvita ri yuhu cutachi chi yañi yo ihya nu nyicú ndo. Vatyi sanumi ndo ta sacaya ndo xuhun, tari cuhva catyi vatyi yihí iñi ndo sacuví ndo. Vatyi tacuhva cha ma catyi ñu Macedonia ihya vatyi ña ndicha cha cahín siqui ndo cha cuenda cuan. ⁴Vatyi coto cuhun nya noo ra Macedonia chihin, ta nyehe ra vatyi ñahri maa nacayá ndo. Ta cuquehin ticanan nuu cha cuenda cha ñahri cumi ndo. Ta vihi ca maa ndo. Vatyi cha yaha catyi vatyi cuatyinyee ndo. ⁵Yucuan chaha cuñí mai vatyi vaha cha cuhun xihna ca ra yañi yo ihya nu nyicú

ndo tacuhva tyinyee ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quivi quichi soco tandihí ta cha iyó vaha. Vatyi cha iyó vaha iñi maa ndo cuví, ta ñima noo cha saniñi ndi chi ndo.

⁶Ta ñicohon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó. ⁷Ta tahan tahan yo cuñí chi cuhva yo yoso cuhva quichi cuví aña maa yo. Ñima chihin cha ña ñii iñi yo o chihin fuerza. Vatyi Nyoo cuñí ra chi ñu cha chahá chihin cha sii cuñí. ⁸Nyoo cuví cuhva ra cuaha, ndihí ndoo ndihí cuiti nuu cha vaha chi ndo. Vatyi tyicuan ta coo tandihí ri cha chiñuhú chi ndo. Ta ndoo ca ta cuví tyinyee ndo chi ñáyivi chihin tandihí ri nuu chiñuhú chi ñu. ⁹Tuhun Nyoo catyi chi tyehe caa:

Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyi chi.

¹⁰Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra cuvaha chi. Ta chihin cha chahá ndo, cusacuvi ra tyi cuaha cha vaha cucunyaa aña ñáyivi. ¹¹Tyicuan caa ta coo tandihí ri nuu cha tyayii chi ndo, tacuhva cuví tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyee yo chi ñu. ¹²Vatyi cha tyinyee yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo. ¹³Maa ñu cusacahnú ñu chi Nyoo. Vatyi chihin cha tyinyee ndo chi ñu, nyehé ñu vatyi ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyee xaan ndo chi ñu ta chi tandihí ñáyivi. ¹⁴Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo. ¹⁵Tyahvi nyoo chi Nyoo vatyi chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi

ñu cha sacotō ra tuhun Nyoo chii

¹Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyí yihí ndo catyí ndo vatyí tatu ñáá tuhun sacoté chi ndo chihin tutu, ñihi xaan cahín chihin ndo. Soco tatu nyaí chihin ndo, vita xaan cahín, catyí ndo.

²Vaha. Soco quiví cuhin nu nyicú ndo, ma saniñi ndo chii cha cahín chi ndo. Soco chité tyi cuñí chi cha sañahí chi suhva ndo yoso cuhva cha ñihi cahín. Vatyí yihí ndo catyí ndo vatyí sacuví tari sacuví noo ra ña yihí cuenda Nyoo. ³Ndicha vatyí ñáyivi cuví ndi. Soco ña cañí tahan ndi tari cañí tahan ra ñáyivi ihyá. ⁴Vatyí cha xaan cha cañí tahan ndi chihin, ñima cha xaan ñáyivi ihyá cuví. Soco maa tunyee iñi Nyoo cuví, vatyí cuví chasaha ndi tandihí maa fuerza nyacua nya fuerza tatyí ña vaha. ⁵Ta tyicuan caa cuví chasaha ndi chi tandihí tuhun cha cahán ñáyivi siqui tuhun Nyoo, ta tandihí cha cahnú sahá chii cha chasí nu quichahá yo tuhun Nyoo. Tandihí cuhva chicá xiñi yo siqui ñuhu ñáyivi ihyá, chahá yo na cunyaca ñaha ra Cristo vatyí quichahá yo chi maa ra. ⁶Ta quiví cuquichaha vaha tandihí ndo chi ra Cristo, tatu nya nonga ndo ña cuñí ndo quichahá ndo, tyáá ndi cuhva cha tachi tuñi ndi chi ndo.

⁷Soco nyoho sahá ndo cuenda cuhva caá ri noo ñáyivi. Ta ña sahá ndo cuenda cuhva caá añima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coto tucu ndo vatyí yihí tucu nyuhu cuenda ra. ⁸Vatyí vasi yaha cuhva cahín, ña tahán chi cha cucahan nui. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee iñi Nyoo. Ta ñima cha sativí chi ndo. ⁹Ña cuñí vatyí catyí ndo vatyí sayuhví chi ndo chihin cha cahín nu tutu cha sacuhín chi ndo. ¹⁰Vatyí yihí ndo catyí ndo vatyí nu tutu cha saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihí tuhun cahan, catyí ndo. Ta tuhun cha cahín, maa maa ri tuhun cha ña chiñuhú cuví, catyí ndo. ¹¹Soco ñu cha catyí tyehé caa cuñí chi cha coto ñu vatyí tari cuhva cahín nu tutu, tyicuan caa cusacuví tiqui nachai nu nyicú ndo.

¹²Ndicha ña cañá iñi ndi sandu inuu ri

ndi chi ndi chihin ra casayaá chi tyi cahán ra tuhun maa ra. Vatyí casacuví ra cha ña tahán chi. Vatyí nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí iñi ra tyi tahán chi nanducú ra cuhva cuñí Nyoo. ¹³Nyuhu ma sacahnu ndi chi ndi chihin cha ña tahán chi chi ndi. Nyoo cuví ra sañahá ñáá cuví tyiño cha tahán chi cha sacuví ndi. Ta maa ra chahá cha quichi ndi nya nu nyicú ndo Corinto chiña. ¹⁴Tyehé ta ñima xihna ca ndi sacotō tuhun Nyoo chi ndo, ña tahán chi sahá ndi cuenda chi ndo. Soco tahán maa chi vatyí xihna ca maa ndi chaá ndi nu nyicú ndo chihin tuhun ra Cristo. ¹⁵Soco nyuhu ña sayaá ndi chi ndi chihin tyiño sahá inga ra. Na catyí ndi tyi tyiño maa ndi cuví. Soco yihí iñi ndi vatyí cunachino vaha ca iñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahán chi chi ndi. ¹⁶Ta yihí iñi ndi cha cahan ndi tuhun ra Cristo chihin ñáyivi nya ndihí ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyí ñáyivi vatyí cuyaa ndi chihin tyiño sahá inga ra.

¹⁷Soco tatu nya noo yoo cuñí yo cuyaa yo, na cuyaa yo soco chihin Sutu Mañi yo.

¹⁸Vatyí nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹Vaha tyehé ta cunyeé ndo chiin cha ñima ri tuhun cha cuacatyí chi ndo. (Vasi ña tahán chi cha sacoté tuhun mai, soco cuñí chi cha nacotó ndo yoso caa cuñí ra cuan sandaví ñaha ra chi ndo.) Ta yucuan chaha vasi yoso ca caa soco cunyeé ndo cha cuacatyí chi ndo. ²Vatyí cuiñó xain chi ndo. Ta maa Nyoo chahá cha cuiñe chi ndo, vatyí mai ican tyihí chi ndo ityi ra Cristo. Ta cuñí tyi cuñí ndo chi ra tari noo ñaha tyivaa cha cuñí xaan ña chi noo ri maa ra cha cuatandaha ña chihin. ³Soco chicá xiñi cha cuenda ndo, coto cuví chi ndo tari cuví chi cu Eva. Vatyí sandaví ñaha coo chihin maña

ti chi ña. Ta coto casandaví ñaha ra cuan chi ndo. Ta coto ndusiin caa cuhva nacacá xiñi ndo tuhun ra Cristo. Ta sandíhi ndo tuhun cha sacahnú ndo chi noo tuhun ri maa ra. ⁴Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyí ñima tuhun ra Jesús cha sacotó ndi chi ndo cuví. Ta vaha xaan cuñí ndo nacacá xiñi ndo siin ca tuhun cha ña chachí tahan chihin tuhun Tatyí li Nyoo cha naquehen ndo quívi xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra. ⁵Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra. ⁶Vasí ña ñihí vahi cuhva cahín, cuñí maa ndo. Soco cutuñí vaha iñi tuhun Nyoo. Ta yucuan sañahá ndi chi ndo chihin tandíhi cuhva sacuví ndi.

⁷O cuñí maa ndo vatyí ña vaha cuhva sacuví quívi cha cahín tuhun ra Cristo chihin ndo. Vatyí ña quehín yahvi chi ndo. Ta sandundahví chii cha cuenda cha cuñí cha cacu ndo. ⁸Ñáyivi inga vehe ñuhu tyinyee ñu chii. Vatyí maa ñu chahá xuhun chii. Ta yuhu quehín xuhun cuan ta sacuví tyiño nuu ndo. ⁹Ta quívi cha chinyai chihin ndo ña chahí tindoho chi ni noo ndo vasí iyó cha chiñuhú chii. Vatyí ra hermano cha quichi coyo nya ityi Macedonia, ican ra chaha tandíhi cha chiñuhú chii. Ta saha vavahi cuenda chii vatyí ña cuñí cuhve tindoho chi ndo. Ta tyicuan ri sacuví que. ¹⁰Vatyí chitó vahi tyi maa maa ri tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chiña, cha vaha cuñí cha ña chiquén cha coo yahvi chi ndo. ¹¹¿Ñáá tuhun cha cahín tyehe caa? ¿Atu cha cuenda cha ña cuñí chi ndo? Ñima. Nyoo chitó ra yoso cha cuñí chi ndo.

¹²Ta cuasacuví que tari cuhva sacuví mai. Vatyí ña cuñí cuhve ityi chi ra cachicá noo yanga vatyí cacatyí ra tyi sacuví ra tari cuhva sacuví ndi soco ña ndicha. ¹³Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chi ra tari noo ra apóstol ra Cristo. ¹⁴Ta ihyá ñima cha iyo cuñí yo cuví. Vatyí cuihna cuví nasaha ra chi ra tari noo ángel cha xiño tuví chihin cha ndichin Nyoo. ¹⁵Yucuan chaha ra cha nyicón chi ra ña vaha, nasahá tucu maa ra chi ra tari

noo ra cha sacuví cha vaha. Soco coo quívi cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahin chihin ndo tari noo ra loco. Vatyí tyicuan caa ta cuví sacahnu tucu yuhu chiin chii. ¹⁷Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco. ¹⁸Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chi ra. Yucuan chaha cusacahnu tucu yuhu chii ñandíhi. ¹⁹Nyoho, chitó xaan ndo, cuñí maa ndo. Ta quívi ri tyasohó ndo nu cahán ra cuan. Ta tondo xaan cacuví ra. ²⁰Soco nyoho ñahri cuenda ndo cha saniñi ra chi ndo cha sacuví ndo tyiño nuu ra. Suhú ra chi ndo ta ña tuví iñi ndo. Sandaví ñaha ra chi ndo. Ta ña cuñí nyehe ra chi ndo. Ta nyacua cañí chihin ndaha ra chi ndo. Ta maa ndo cunyeé xaan ndo cha sacuví ra chi ndo. ²¹Vasí cahán nuu ndi soco cua catyí ndi, nyuhu vita xaan cuñí ndi yucuan chaha ña cañá iñi ndi sacuví ndi chi ndo tyicuan caa.

Soco inga ra cuan cañá ndicha cuii iñi ra sacotó ra tuhun maa ra. Ta yuhu tucu cañá iñi vasí cahín tari noo ra loco. ²²Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ican cuví tucu yuhu. Ta tatu vachí ra tata ra Abraham, suri vachí tucu yuhu. ²³Ta tatu ra sacuví tyiño nuu ra Cristo cuví ra, vihi ca yuhu. Vatyí yaha ca cuhva sacuví tyiño nuu ra Cristo. Vasí cahín tari noo ra loco vatyí catyí tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohí chihin ñii ican saha ra cuan. Ta cuaha ca chaha ñohí vehe caa ican saha ra cuan. Ta cuaha chaha cha cha yatyin cúvi, soco ña chihí. ²⁴Ta ohon tahan chaha cacañi ra Israel chii chihin ñii. Cha noo chaha cañi ra chii, oco chahun cumi tahan chaha sahvi ra ñii chate. ²⁵Ta uñi chaha cañi ra chii chihin yutun. Ta noo chaha cacañi ra chii chihin yuu. Ta uñi tahan chaha nyee barcu cha yihí. Ta chichi cha uñi tahan chaha cuan, noo chaha ndoj nu tyañuhu noo ñuu ta noo quívi. ²⁶Cha cuaha xaan cha cuví chii nu

chica noi. Ta cha cuaha chaha cuñi tyañi chihin yuvi ndutya. Ta cuaha cha cuvi chii. Quita ra suhu nu cuahin. Nyacua nya ra ñui, ra Israel, ta sataśi iñi ra chii. Ta ra inga ñuu ñandihí. Ta cuaha cha cuvi chii ityi chichi ñuu, ityi nu chiqui, ityi nu tyañuhu. Ta cuaha cha cuvi chii mahñu ra cha catyi vatyí hermano cuvi ta ñima hermano cuvi ra. ²⁷Ta ñihí sahá tyiñe ta chitati. Ta cuaha xaan chaha ña quixi. Yahí soco: soco xita ta soco ndutya. Cuaha chaha sahí ayunar, o ña chachí ta nanduqui chi Nyoo cuvi cuan. Cuaha chaha yahí cha vichin. Ta ni sahme ta ñahri.

²⁸Ta siin ri nyaá siqui vatyí sanií que iñi tandihí ndo: nyoho ta ñu inga ñuu cha yihí cuenda Nyoo. ²⁹Vatyí tatu noo ndo vita cuñí ndo, yuhu tari cha vita cuñí cha cuenda ndo. O tatu sacoo ñu cuatyí nya noo ndo, yuhu quehín tisihi ta ticahan nuu. ³⁰Tatu cuñí chi cha sacote tuhin tacuhva nacoto ndo tyi ndicha cuvi yuhu noo musu Nyoo, cusacote soco cha cuvi chii. Vatyí sañahá chi tyi ñahri maa fuerza mai iyó chii. ³¹Nyoo sutu Sutu Mañi yo Jesucristo, tahán chi cha sacahnú yo chi ra tyicuan ri maa. Ta chitó maa ra vatyí ndicha cha cahín, ñima cuendu cahín. ³²Quivi chinyai Damasco (ñuu nu nicachico yihí barda) ra cha cuvi gobernador cha sacuví tyiño nuu rey Aretas ñuu Damasco cuan, cuatyaá ra chí sindaro yuvehe cahnu ñuu cuan, tyi casahá cuenda ra. Vatyí tatu quite yuvehe ñuu cuan catiín ra chii ta cunyaca ra chii vehe caa. ³³Soco ñáyivi iyó chaha barda cuan iyó ventana ñu. Ta ityi ventana sanog ñu chii. Yihí chichi noo tica cahnu. Ta tyicuan caa sacacu Nyoo chii ndaha gobernador cuan.

12

Noo cha chaha Nyoo vatyí nyehe ra Pablo

¹Ñahri maa ñihí chihin cha cahín tuhun mai, soco cuanacatyí cha sañahá Sutu Mañi yo chii. ²Ñohó nui chi noo ra cha yihí cuenda ra Cristo. Ta cha iyó uchi cumi cuiya quehen Nyoo chi ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra. ³⁻⁴Soco chité vatyí ra cuan chinyaca Nyoo chi ra nya nu iyó ñáyivi vaha, ñu cha chihí. Ña chité tatu chahan

ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu chahan ra cuan chiñi ra tuhun xehe. Ta ñahri ityi iyó chi ñáyivi cha nacatyí ñu tuhun xehe cuan. ⁵Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii. ⁶Tatu cuñí tiqui cahín tuhun mai, ñima noo tuhun tondo ri cuvi. Vatyí maa maa ri cha ndicha cuacatyí. Soco ma catyi vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuvi.

⁷Ña cuñí Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuihna tindoho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuvi cuyai chihin cha sañahá Nyoo chii. ⁸Ta cha uñi chaha chiquen chi Sutu Mañi yo na tinyaa ra tindoho cuan siqui. ⁹Soco maa Sutu Mañi yo catyi ra chii tyehe caa: “Chahí tandihí cha vaha cha iyó chii chuun. Vatyí yucuan cuvi cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuvi cunyaa maa maa ri tunyee iñi mai chihin ñu”, catyi ra. Yucuan chaha si xaan cuñí cha ñahri fuerza mai iyó chii. Vatyí tyicuan caa ta cuvi cunyaa tunyee iñi ra Cristo chihin. ¹⁰Yucuan chaha si xaan cuñí cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuvi chii, soco si xaan cuñí cha nyehí tindoho cha cuenda maa ra Cristo. Vatyí tatu ñahri fuerza mai iyo chii, soco ñihí ca cuñí chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹Cahín tari noo ra loco. Soco maa ndo cuñí ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin. Vasi noo ra cha ñima ri tuhun cuvi yuhu, soco nyaca cuvi ra cha catyi tyi apóstol cuvi ra, ta ña ndicha ra. Cuñí maa ra tyi vaha xaan ca ra cha nuu inga ra chicá tyiño Nyoo. ¹²Nyehe ndo yoso caa tyiño Nyoo cha sacuví mahñu ndo. Ta chihin cha cama iñi ta cunyei tandihí tindoho cha nyehí. Ta cuaha xaan

milagru sañahá Nyoo chi ndo tacuhva coto ndo vatyi ndicha cha cuví yuhu noo ra chicá tyiño maa ra. ¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihí ndo. Noo ri cha ña sacuví chihin nyoho cha ña cuñí cuhve tindoho chi ndo. Saha ndo ticahnu iñi chii tatu ña vaha cuhva sacuví.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindoho tyá síqui ndo. Vatyi ñima cha iyó chi ndo vachí nanduquí. Chi maa ndo cuví cha cuñí yuhu. Vatyi sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu. ¹⁵ Yucuan chaha yuhu nyacua sii cuñí cusanaí cha iyó chii cha cuenda cha vaha chi ndo. Ta nyacua sii cuñí cuhve ñayivi cha cuenda ndo. Soco ta caa ri vatyi tatu cuñí que chi ndo, maa ndo ña cuñí vaha ndo chii.

¹⁶ Ta vasi chitó cachi ndo vatyi ña चाहि tindoho chi ndo, soco yihí ndo catyí ndo vatyi sandaví ñahi chi ndo ta ña tuví iñi ndo. ¹⁷ ¿Atu sandaví ñahi chi ndo chihin nya noo ra cha tachí nu nyicu ndo quívi cuan? ¹⁸ ¿Atu sandaví ñaha ra Tito chi ndo quívi tachí chi ra chihin inga yañi yo cuan nu nyicu ndo? Ña sandaví ñaha ra chi ndo. Vatyi nyuhu ña tuhvá ndi sandaví ñaha. Vatyi iin ri cuhva iyó ndi. Ta iin ri cuhva sacuví ndi.

¹⁹ Vasi chicá xiñi ndo vatyi cuahan ndi tumañi iñi chi ndi cha cuenda tuhun cha cahán ndi ihya, soco ñima tyicuan caa. Vatyi tandihí tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyi ndicha cha cuñí ndi chi ndo. Ta cahán ndi soco chihin nuu Nyoo ta cha cuenda maa ra Cristo.

²⁰ Chicá xiñi coto iñi ndaa iñi noo nyicú ndo ta चाहि. Ta ma cutahan iñi cuhva nyicú ndo. Ta maa ndo ma cutahan iñi ndo cuhva cucahin chi ndo. Yuhví coto coo tisihi, coto nya ndo quichí cuvi iñi ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha vaha chi maa ndo, coto nya ndo ñii ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicú ndo. ²¹ Ta yuhví coto cha cuhin inga chaha nu nyicú ndo, Nyoi cuhva ra cha cucahan nui cha cuenda nyoho. Ta chicá xiñi coto

quita ndutya nui cha cuenda cha nyacuví ndo. Vatyi yihí ndo sacuví ndo cuatyi nu quichí quívi. Ta nya vityin ta ña ndu uví iñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayii ta ñima yii ndo cuví. Ta ña sandihí ndo tuhun cha sacuví ndo ñáá ndihí cha ña vaha.

13

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

¹ Quívi cha cuquichi inga chaha nu nyicu ndo cuví chi chaha cu uñi. Yucuan ta cuvi cundaa tyiño ñu cha sacuví cuatyi. Soco cuñí chi uvi o uñi cha ndaa. ² Vatyi quívi चाहि nu nyicú ndo cha cu uvi chaha, catyí chi ra sacuví cuatyi cuan, na sandihí ra tuhun. Ta vityin catyí tiqui inga chaha chi ra, ta chi tandihí ndo. Vatyi tatu cha quichi inga chaha, ta sacuví ca ndo cuatyi cuan, ma cundahví cuñi nyehi chi ndo. ³ Tyicuan ta coto ndo cha cuñí xaan ndo coto ndo. Vatyi ndicha ndicha cha chihin fuerza maa ra Cristo चाहि. Vatyi ra Cristo ñima noo ra ñima ri tuhun cuví ra. Yucuan chaha sañahá ra tunyee iñi ra chi ndo. ⁴ Ndicha vatyi चाहि ra nu cruzi tari noo ra cha ñahri tunyee iñi iyó chii. Soco nandotó ra ta iyó ra chihin tunyee iñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco iin ri cuví ndi chihin ra Cristo. Ta iyó ndi chihin tunyee iñi maa Nyoo vatyi tyicuan caa ta cuvi tyinyee tucu nyuhu chi nyoho.

⁵ Saha ndo cuenda chi ndo tatu ñii vaha iñi ndo cuahán ndo chihin Nyoo. Saha ndo cuenda vatyi ra Cristo ñohó ra añima ndo tatu chinó vaha iñi ndo chi ra. Soco tatu ñima chihin cha ñii iñi ndo cuahán ndo chata Nyoo, ra Cristo ña nyaá ra chihin ndo. ⁶ Soco chitó vahi tyi coo quívi cunacoto ndo tyi vaha cuhva tyinyee ndi chi ndo tacuhva cuví cuhun vaha ndo chihin ra Cristo. ⁷ Ta chicán tahvi xaan ndi chi Nyoo chaha ndo, tacuhva vatyi ma sacuvi ndo cha ña vaha. Ñima cha cuñí ndi tyi catyi ñáyivi tyi vaha ndi. Soco cha cuñí ndi vatyi nyoho sacuví ndo maa maa ri cha vaha. Ñahri saha vasi catyí ñáyivi, an vaha, an ña vaha cuhva cha sacuví ndi. ⁸ Vatyi nyaá síqui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuvi ndi,

cha sañahá ndi tuhun ndicha. ⁹ Yucuan chaha cusii xaan cuñí ndi cha ñahri fuerza maa ndi iyó chi ndi, ta cuhva tyi nyee cuñí ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cuhun ndo chihin Nyoo nyacua nya cha ñahri ca cumañi chi ndo. ¹⁰ Sacuhín carta ihya chi ndo cha ni ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo quivi chai nu nyicu ndo. Vatyí ndicha cha chahá Nyoo ityi chii cha sahí cuenda chi ndo. Soco chahá ra tyiño ihya chii vatyí sandunyeé que iñi ndo. Ta ñima cha sanducuihyá ndihi que iñi ndo.

¹¹ Ta nu ndihi cahín, yañi, catyí chi ndo, na nducu ndo cuhva nicoo vaha ndo ta sii cuñi ndo. Nanducu ndo cuhva coo cuiti ndo nuu Nyoo cha ñahri cumañi chi ndo. Na cunii iñi ndo, na coo vaha ndo chihin tahan ndo. Ta Nyoo ra cuñí xaan chi ndo, ta ra chahá cha taxi coo añima ndo na cunyaa ra chihin ndo. ¹² Ta nacuhva maa ndo nocumi chi noo noo tahan ndo chihin cha sii cuñí ndo nyehé ndo chi ñu. ¹³ Ta vachí nocumi chi ndo sahá tandihi ñu yihí cuenda Nyoo ñuu ihya.

¹⁴ Nacuhva Sutu Mañi yo Jesucristo cha vaha coo añima ndo. Ta nacoto ndo tyi Nyoo cuñí xaan ra chi ndo. Ta na cunyaa Tatyí li ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi

Galacia Cha Yihí Cuenda Nyoo

*Ra Pablo tyaá ra noo carta chi ñu ityi
Galacia cha yihí cuenda Nyoo*

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayii catyi vatyí ñihí yuhu tyiño ihyá. Soco maa ra Jesucristo ta maa Nyoo Sutu yo chahá ra tyiño ihyá chii. Vatyí ican Nyoo sanandoto chi ra Cristo mahñu ñu chihí. ² Yuhu ta tandihí yañi yo cha nyicú chihin, tyaá ndi carta ihyá chi nyoho ñu yihí cuenda Nyoo tandihí vehe ñuhu Galacia. ³ Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo añima ndo. ⁴ Vatyí maa ra Jesucristo chahá ra ñáyivi ra tyiño nuu yo cha catyi cuatyí yo. Vatyí tacuhva sacacú ra chi yo mahñu ñu quiñi iyo cha iyó siqui ñuhu ñáyivi ihyá vityin. Vatyí tyicuan caa tyaa maa Nyoo Sutu yo cuhva tyi sacuvi ra Cristo. ⁵ Yucuan chaha na sacahnu yo chi maa Nyoo tyicuan ri maa. Ta na cuvi chi tyicuan caa.

Ñahri ca inga cuhva cuví cacu añima yo

⁶ Iyo xaan cuñí vatyí nyoho numi xaan cuahan sandoó ndo chi Nyoo, ra nacana chi ndo tyi nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin siin caa ityi natyihí ndo cuahan ndo. Ta cuñi maa ndo tyi cucacu ndo chihin cuan. ⁷ Soco ñahri ca inga cuhva cuví cacu añima yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chi yo. ⁸ Ñahri saha, an cuví ri nyuhu, an cuví ri noo ángel cha quichi nya andiví, soco tatu tyehe ta cahán noo ndi tuhun ra Cristo nuu ndo, ta siin caa, ta ñima tari cuhva sañaha ndi chi ndo quivi cuan, Nyoo cutachi tuñi ra chi ndi. ⁹ Cha catyi tuhun ihyá chi ndo quivi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú añima yo chihin ndo ta siin caa, ta ñima cuhva cha chiñi ndo quivi xihna ri, Nyoo cutachi tuñi ra chi ra cahán tyicuan caa.

¹⁰ Cha catyi tuhun ihyá chi ndo, ñima cha nduquí cuhva savahi chii nuu ñáyivi. Soco

nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduví ra Pablo noo ra chicá tyiño Nyoo

¹¹ Soco coto ndo tuhun ihyá yañi, vatyí tuhun ra Cristo cha cahán yuhu, ñima tuhun cha ndichí xiñi ñáyivi cuví. ¹² Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³ Vatyí nyoho chiñi ndo yoso caa chinyacuvi quivi cuan, quivi ñohí cuenda ñu Israel. Ta chitó ndo yoso caa cha xaan chicá nyiquen chi ñu yihí cuenda Nyoo. Ta nduquí cuhva sativi cuhva chinó iñi ñu. ¹⁴ Ta ñohí cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha iin ri cuiya ndi. Vatyí cuñi xaan que sacuvi yoso cuhva chinyacuvi maa sutu chahni ta ityi chata ca. ¹⁵ Soco nya ta ni cumañi caqui ta tyaa Nyoo cuhva tyi cusaha ra tumañi iñi chii. Ta nya cha chaa maa chi quivi cha tyaa ra cuhva, yucuan ta nacana ra chii. Vatyí cuñi xaan ra chii. ¹⁶ Ta tyicuan caa sacuvi ra vatyí cohon nui chi Sehe ra. Tacuhva vatyí cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu añima ñu. Ta quivi cha cuví tyehe caa, ña nduquí cuhva cha catyi ñáyivi chii ñaa cha tahán chi sacuvi. ¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyí maa ra cha naha cana Nyoo chi ra ta ñima ca yuhu. Soco chahin nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoj chihin ra chahun quivi. ¹⁹ Soco ña nyehí chi inga apóstol. Noo ri ra Jacobo yañi Sutu Mañi yo nyehí. ²⁰ Ta chihin nuu Nyoo ta catyi chi ndo vatyí tuhun cha catyi chi ndo nu tutu ihyá, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia. ²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii. ²³ Tacuhva cha cachiñi ri ra chahan ñu tuhun, vatyí catyi ñu: “Ra cha chicá nyicon chi yo quivi cuan, vityin cahán noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyi ñu. ²⁴ Ta ra canyicu vehe ñuhu ra

Cristo casacahnu ra chi Nyoo cha cuenda cha sacuví Nyoo chihin tyicuan caa.

2

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yahá cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi. ² Chahin nyicuan vatyí maa Nyoo sañahá chii vatyí tahná chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quitá siin chihin ra cha canyiso tyiño vehe ñuhu, ta chahí cuenda chi ra yoso caa tuhvé cahin chihin ñu. Coto ma candoo ra vaha ta cacatyí ra vatyí yuhu sahá tyiño caha ri mai. ³ Soco candoo ra vaha. Vatyí ni ri chi ra Tito ta ña saniñi ra cha sacuví ra costumbre circuncisión. Ta ra Tito ñima ra Israel cuví ra. ⁴ Ndicha vatyí quihví xehe suhva ra cha catyí vatyí yañi yo cuví chi ra, soco ñima. Vatyí cuñí ra nyehe nyaa ra cuhva iyó yo. Vatyí libre iyó yo cha cuenda ra Cristo Jesús. Soco cuñí ra cuan tyi cunyaca ñaha tucu ley chahnu chi yo. ⁵ Soco ni noo cuhva ta ña chahá ndi cha cunyaca ñaha ra cuan chi ndi. Vatyí cuñí ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chahá ra chii. Ta vasi chahnu tyiño canyisó ra cuan, soco cha cuenda chi yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda. ⁷ Cha nuu cha catyí ra canyiso tyiño vehe ñuhu cuan chii ñáá ndihi tuhun, maa ra canacoto ra vatyí maa Nyoo tachí chii vatyí cahín tuhun ra Cristo chihin ñu cha ñima ñu Israel cuví. Tari tachí ra chi ra Pedro vatyí cucahan ra suri tuhun ra Cristo cuan chihin ñu Israel. ⁸ Vatyí suri maa Nyoo tachí chi ra Pedro tyi cuví ra apóstol cuenda ñu Israel. Ta tachí tucu ra chi yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuví nuu yucuan, nicohón nuu ra vatyí Nyoo chahá ra tunyee iñi chii cha cahín tuhun ra Cristo chihin ñáyivi. Ta chahá ra ndaha ra chii, ta chi ra Bernabé vatyí candoo ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel. ¹⁰ Noo ri

vatyí catyí ra chi ndi vatyí na nicohon iñi ndi ta natyinyee ndi chi ñu ndahvi. Ta ican cuví cha nanducú xain cuhva sacuví tandihí quivi.

Ra Pablo cahán ra chi ra Pedro vatyí ña vaha cha nyacuví ra

¹¹ Soco quivi chahan ra Pedro ñuu Antioquía, cahan vavahi chi ra chihin nuu ra vatyí ña vaha cha nyacuví ra. ¹² Vatyí cha xihna ri vaha sacuví ra vatyí chachí ra chihin ñu cha ñima ñu Israel cuví, nyacua nya cha chaá suhva ñáyivi Israel cha tachí ra Jacobo. Tyicuan ta quichaha ña chachí ca ra chihin ñu. Tyicuan caa sacuví ra vatyí yuhví ra coto cahan ra itá iñi costumbre circuncisión cha chaá coyo cuan chi ra.

¹³ Tyicuan ta inga ra Israel cha yihí cuenda ra Cristo ndu iñi ri ra chihin ra Pedro. Ta sacuví ra cha ña vaha cuan. Vatyí ndu uví yuhu ra tari ndu uví yuhu ra Pedro. Ta nyacua nya ra Bernabé ta ndutahan ra chihin ra. ¹⁴ Soco nyehí vatyí ña vaha cuahán nyacuví ra. Ñima tari cuhva catyí tuhun ra Cristo. Yucuan chaha catyí chi ra Pedro chihin nuu tandihí ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha cuñún saniñun chi ñu tyi sacuví ñu costumbre cha sacuví ñu Israel? Ta ni maun ta ña sacuví con”, catyí yuhu chi ra.

¹⁵ Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví. ¹⁶ Soco chitó yo vatyí ma cuví saváha yo chi yo nuu Nyoo chihin cha nanducú yo cuhva sacuví yo ley chahnu cha tyaa ra Moisés. Soco nduvahá yo nuu Nyoo cha cuenda cha chinó ri iñi yo chi ra Jesucristo. Yucuan chaha chinó tucu iñi maa yo chi ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuví yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuví yo cuhva catyí ley chahnu.

¹⁷ Soco vityin tatu nducú yo cuhva ndu-vaha yo nuu Nyoo cha cuenda ra Cristo, cuñí chi catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chi catyí vatyí ra Cristo sacuví ra tyi iyó cuatyí yo vatyí sandoq yo ley ta nachino iñi yo chi ra? Ñima. ¹⁸ Soco tyehe ta

naquehen tucu yo ley cha cha yaha sandoo yo, yucuan ndicha coo cuatyí yo. ¹⁹ Vatyí ley cuan sañahá chi chíi vatyí tahán chi cúvi, ta yucuan chaha sandihí tuhun cha nduqui cuhva caqui chihin ley cuan, ta chihí cha cuenda chi cúvi cuan, tacuhva cuvi coi cha cuenda Nyoo. ²⁰ Yuhu, tari cha chihí nuu cruzi ñin ri chihin ra Cristo. Ta ñima ca ñayiví mai iyé soco ra Cristo iyó ra añime. Ta ñayiví ra cha iyé vityin, iyé soco chihin cha chinó ñini chi ra cha cuví ra Sehe Nyoo. Ican ra cuñí ra chíi, ta chihí ra cha catyí cuatyí yuhu. ²¹ Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

3

Naquehén yo Tatyí li Nyoo cha cuenda cha chinó ñini yo chí ra Cristo

¹ Ñana cha tondo iyó nyoho ñu canyicu Galacia chiñal! ¿Yóó cha sativí chi ndo vatyí ña cuñí ca ndo quichaha ndo tuhun cha ndicha? Cachi xaan chaha ndi cuenda tuhun ra Jesucristo chi ndo. Ta cutuñi vaha ñini ndo ñáá cuenda chihí ra nu cruzi. ² Noo ri cuñí ndaca tuhun chi ndo. ¿Atu naquehen ndo Tatyí li Nyoo cha cuenda cha sacuví ndo cha catyí ley ra Moisés, o cha cuenda cha chinó ñini ndo tuhun ra Cristo cha chiñi ndo? ³ ¿Yoso caa cha tondo xaan iyó ndo vityin? Ta quiví xihna ri vaha xaan quichaha ndo chi Nyoo chihin tunyee ñini Tatyí li ra. Soco vityin, ¿yoso caa cuñí ndo coo ndo ñayiví chaa chihin fuerza maa ndo? ⁴ ¿Atu cha caha ri nyehé ndo cha sacuví Tatyí li Nyoo chihin ndo? Ñima cha caha ri cuví, cahví ñini. ⁵ ¿Ñáá tuhun chahá Nyoo Tatyí li ra chí ndo, ta sacuví ra milagru mahñu ndo? Ñima cha cuenda vatyí nducu ndo cuhva sacuvi ndo cha catyí ley, soco cha cuenda vatyí chinó ñini ndo tuhun ra Cristo cha chiñi ndo.

⁶ Ra Abraham, chingo ñini ra tuhun cahán Nyoo chihin ra, yucuan chaha cuví ra noo ra vaha nuu Nyoo. ⁷ Yucuan chaha tahán chi coto ndo vatyí ñu cha ndicha cuví ñáyiví chi ra Abraham, ican ñu cuan chinó ñini ñu chi Nyoo. ⁸ Ta cha naha ndoq tuhun Nyoo nu tutu. Ta catyí chi vatyí nu cuahán ca chi quiví, cusacuví Nyoo tyí nduvaha ñáyiví cha ñima ñu Israel cuví nuu ra cha cuenda cha chinó ñini ñu chi ra. Yucuan chaha catyí

Nyoo chi ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chi ra. ⁹ Yucuan chaha ñu cha chinó ñini chi ra Cristo, Nyoo nasocó ra chi ñu ñin ri chihin ra Abraham, vatyí chinó ñini tucu maa ra.

¹⁰ Ñu cha itá ñini ley cha tyaa ra Moisés, cutachi tuñi Nyoo chi ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chi ñu.” ¹¹ Ta ndicha vatyí yori yo nduvaha yo nuu Nyoo cha cuenda cha itá ñini yo ley cuan. Vatyí tuhun Nyoo catyí chi: “Ra nduvahá nuu Nyoo cha cuenda cha chinó ñini ra, coo ra ñayiví”, catyí tuhun Nyoo. ¹² Ta ley ra Moisés ña cu ñin ri chí chihin cha chinó ñini yo chí ra Cristo. Vatyí catyí ley cuan: “Yóó ñu cha sacuví tandihí cuii ley ihya, coo ñu ñayiví cha cuenda cuan”, catyí chi.

¹³ Ra Cristo natava ra chí yo ndaha ley cha catyí tyi tahán chi cutuñi chí yo cha cuenda cuatyí yo. Vatyí maa ra nanduvi ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu yutun.” ¹⁴ Tyicuan caa cuví tacuhva vatyí cha cuenda ra Cristo Jesús ta nasocó Nyoo chi ñáyiví cha ñima ñu Israel cuví, tari catyí ra chí ra Abraham tyi cunasoco ra chí ra. Ta chihin cha chinó ñini yo chí Nyoo, naquehén tandihí yo Tatyí li cha catyí Nyoo tyi cuhva ra chí yo.

Ley chahnu sañahá chi chí yo vatyí iyó cuatyí yo, soco ña sacacú chi chí yo

¹⁵ Yañi, cuacuhve noo cuhva chí ndo, cuhva iyó yo siqui ñuhu ñayiví ihya. Tatu noo ra catyí ra vatyí cucuhva ra cha cucuhva ra chí inga ra. Ta tatu cha yaha tyihí ra firma, yori cuví satani. Ta yori cuví natyiso suhva ca siqui. ¹⁶ Ta vityin, Nyoo catyí ra tyi cucuhva ra cha cucuhva ra chí ra Abraham ta chí nonga ra cha vachi tata ra. Ña catyí nu tutu Nyoo vatyí cuhva ra chí cuaha ra vachi tata ra, soco chí nonga ri ra. Ta ican ra cuan cuví ra Cristo. ¹⁷ Cha catyí yuhu, ican cuví ihya: Nyoo natyihí tahan ra tuhun chihin ra Abraham. Ta ñin ri tuhun cahán ra. Tyicuan ta yaha cumi ciento oco uchí cuiya ta chaq ley cha tyaa ra Moisés. Soco ma cuvi casi ley cuan nu natyihí tahan Nyoo tuhun chihin ra Abraham. Ta ma cuvi casi chí nu naquehen yo cha catyí Nyoo tyi

cuhva ra chi yo. ¹⁸Tyehe ta naquehén yo cha tahán chi chi yo cha cuenda ley ra Moisés, cha caha ri cuvi tuhun natyihi tahan Nyoo chihin yo. Soco vatyi Nyoo catyi ra chi maa ra Abraham vatyi cuhva maa ra chi ra.

¹⁹Tatu tyicuan caa, ¿ñáá cuenda vaha ley ra Moisés? Chaha Nyoo ley cuan soco cha yaha catyi ra tyi cuhva ra cha cucuhva ra chi yo. Vatyi ley cuan sanatuví chi cuatyí yo. Ta ndoo chi nyacua nya quívi quichí ra Cristo ra cuví tata ra Abraham. Ta chi maa ra Cristo catyi Nyoo tyi cuhva ra cha cucuhva ra. Ta ángel Nyoo chaha cuenda ley cuan chi ra Moisés. Ta ra Moisés chaha ra chi ñáyivi. ²⁰Soco Nyoo noo tuhun ri maa ra cahan ra chihin ra Abraham quívi cuan. Ta ña chíñuhú cha nducu ra noo ra nacatyi tuhun cuan chi ra Abraham.

²¹¿Atu cuñí chi catyi vatyi ley cha tyaa ra Moisés ña chachí tahan chihin cha catyi Nyoo tyi cuhva ra chi yo? Ñima. Soco tyehe ta cuví coo yo ñáyivi chaa cha cuenda ley cuan, yucuan ndicha nduvaha yo nuu Nyoo cha cuenda chi. Soco ma cuví. ²²Vatyi catyi nu tutu Nyoo tyi iyó cuatyí tandihí cuí ñáyivi. Vatyi tyicuan caa ta ñu chinó ñíni chi ra Jesucristo cuví ñíni ñu ñáyivi chaa cha catyi Nyoo tyi cuhva ra chi yo.

²³Ta ni cumañi ca quíchi tuhun cha chinó ñíni yo chi ra Cristo, ley cuan chicumí chi chi yo tari cha ñohó yo vehe caa. Vatyi nyatu yo nyacua nya sañaha Nyoo chi yo yoso caa chino ñíni yo chi ra. ²⁴Ta ley cuan cuví tari noo ñu cha sahá cumi chi ra cuatyaa. Vatyi ley saha cumi chi yo tari ra cuatyaa nyacua nya quívi quichí ra Cristo. Ta cuví chinó ñíni yo chi ra ta nduvaha yo nuu Nyoo. ²⁵Ta vityin cha chaa quívi cha chinó ñíni yo chi ra Cristo, ña sahá cumi ca ley cuan chi yo tari noo ra cuatyaa.

²⁶Vatyi tandihí yo cuví yo sehe Nyoo vatyi chinó ñíni yo chi ra Cristo Jesús. ²⁷Ta tandihí yo condutya yo ta ndu ñin yo chihin ra Cristo. Vatyi nyaá ra ñima yo. ²⁸Na ñíni xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayíi, an cuví yo ñusihi, soco ña chíñuhu ca cuan. Vatyi cha ñin ri cuví yo chihin ra Cristo, noo ri cuví yo chihin ra. ²⁹Ta tatu cuenda ra Cristo yihí ndo, ndicha cha ñáyivi vachi tata ra

Abraham cuví ndo. Ta ñíhi ndo cha catyi Nyoo chi ra Abraham tyi cuhva ra chi ra.

4

¹Cuacuhve minoo cuhva chi ndo. Noo ra cuehe tatu chihí sutu cue, ta sandoo sutu cue tandihí cha tyayíi ra chi cue, ra cuehe ihya ma cuví cotyiño ñaha cue cha tyayíi sutu cue. Nyacua nya quívi cuahnu cue ta cuví cotyiño cue. Ta cha ñi ri ca cha ta cuahnu ca cue, cuví cue tari noo musu ri. Vasi chi maa cue cuví tandihí cha tyayíi sutu cue. ²Iyó ra cumí chi cue nyacua nya chaa cuiya cue cha catyi sutu cue, tyi naquehen cue cha tyayíi cuan. ³Ta tyicuan caa cuví maa yo. Cha ñi ri ca cha ta quichí ca ra Cristo, cuví yo tari noo musu ri chi cha nyacá ñaha síqui ñuhu ñáyivi. ⁴Soco quívi tahan chi, Nyoo tachí ra chi Sehe ra, sacacú noo ñaha síhi chi ra. ⁵Tachí Nyoo chi ra tacuhva sacacú ra chi yo ndaha ley cuan. Vatyi tyicuan caa ta Nyoo naquehén cuenda ra chi yo tari sehe ra.

⁶Ta vatyi sehe ra nanduví yo, Nyoo tachí ra Tatyí li ra Cristo cunyaa ñima yo. Ta cha cuenda Tatyí li ra caná chaa yo chi Nyoo ta catyi yo: “Sutu Mañi yuhu.” ⁷Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahán chi chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸Quívi ta cohon nuu ca ndo chi Nyoo, cuví ndo musu noo cha ñima Nyoo cuví. ⁹Soco vityin ñohó nuu ndo Nyoo, o maa Nyoo ñohó nuu ra chi ndo. ¿Yoso caa cha cuñí ndo natiin tucu ndo noo tuhun ndahvi cha ñima ri tuhun, ta nanduví tucu ndo musu inga chaha? ¹⁰Nyoho sanducahnú ndo quívi vico, quívi natyacú yoo, ta vico cuiya. ¹¹Yuhví xain coto vaha ñahri maa tuhun sahá tyiñe chihin ndo.

¹²Yañi, chacú ndahvi nuu ndo na nanduví ndo tari mai (cha ña nyacá ñaha ca ley chii). Vatyi yuhu cha nanduví tari maa ndo, soco ñima cha sativi ndo chii. ¹³Vatyi cha chitó ndo quívi chahan nui ñuu ndo yihí noo cuehe chii. Ta chaha chi cuhva cahní tuhun ra Cristo chihin ndo. ¹⁴Ta cuehe cuan cuví tari noo prueba cha cuenda vatyi ña tyaa xiin ndo chii. Soco vaha naquehen

cuenda ndo chii, tari noo ángel Nyoo, ta tari cha vatyi suri maa ra Cristo cuví. ¹⁵ ¿Nya nyaa cha sii xaan cuví chi ndo chihin vityin? Vatyi yuhu cuví cha ndaa vatyi quivi cuan, nyacua caña iñi ndo catava ndo chiti nuu ndo ta cuhva ndo chii, tyehe ta cuví nduvahi chihin cuan. ¹⁶ Ta vityin, ¿atu cuñí maa ndo tyi nanduví yuhu noo ra cha xaan cahnu iñi ndo cha cuenda vatyi catyí cha ndicha chi ndo?

¹⁷ Ñáyivi cuan, cuñí xaan ñu chi ndo, catyí ñu. Soco ñima chihin cha vaha. Vatyi cha cuñí ñu cuan, cha sacanyaha ñu chi ndo chi ndi. Ta cunyicon ndo chi maa ñu. ¹⁸ Soco vaha cha cuñí yo chi ñáyivi, soco chihin cha vaha, ta tyicuan ri maa. Ta ñima iin yaha ri cuhva cha nyaa ri yuhu chihin ndo. ¹⁹ Sehe luhli, inga chaha nyehí tindoho ta cha uhvi cha catyí ndo. Tari noo sihi cha yihí cha uhvi chi ña tatu cuacacu sehe ña. Ta cunyehe que tindoho nyacua nya ndunyehe vaha ndo chihin fuerza maa ra Cristo. ²⁰ Vaha tyehe ta nyaí chihin ndo vityin vityin. Tacuhva cuví cahan vii chihin ndo inga cuhva. Vatyi ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñí ndo cha cunyaca ñaha ley ra Moisés chi ndo, catyí ndo chii. ¿Atu ta cuñí ca ndo cha catyí ley cuan? ²² Catyí chi vatyi ra Abraham chiyo uvi tahan sehe ra. Noo sehe ra chiyo chihin ñaha cha cuví musu ñasihi ra. (Chinañi ña Agar.) Ta nonga sehe ra chiyo chihin cu Sara cha cuví ñasihi vaha ra. ²³ Cacu sehe ñaha cha cuví musu cuan tari cacú tandihi ra cuatyaa. Soco sehe ñasihi vaha ra Abraham cacú cue tacuhva chino cava cha catyí Nyoo chi ra Abraham vatyi cuhva ra noo sehe chi ñasihi ra. ²⁴ Ta chihin ihya iyó noo cha cuñi chi catyí chi chi yo. Ninduvi ñusihi cuan cuví ñu tari uvi tahan tuhun cha natyihí tahan Nyoo chihin yo. Noo tuhun cuan cuenda yucu Sinaí. Ta ñáyivi yihí cuenda ley cuan cuví ñu tari cu Agar, vatyi noo musu ri cuví tucu maa ña chihin sehe ña. ²⁵ Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quivi vityin. Vatyi ñáyivi ñuu cuan nyaá ñu ndaha ley chahnu. Tari noo musu ley cuan cuví ñu. ²⁶ Soco nya andivi iyó inga Jerusalén, cha cuví ñuu yo.

Ta yori nyacá naha chi chi. Ta cuví chi tari sihi yo. ²⁷ Ta catyí tuhun Nyoo:

Cusii iñi yoho, ñaha sihi cha ña cuví coo sehe.

Yoho yori sehun.

Cana chaa chihin cha sii cuñun, yoho cha ña ñohó nuu cha uhvi cha cacu sehe.

Vatyi ñaha sihi cha sanandoq yii chi, coo ca sehe ña ta ñima ca ñusihi cha iyó yii, catyí tuhun Nyoo.

²⁸ Yañi, yoó cuví yo tari ra Isaac, ra cuví sehe cu Sara. Cuví yo sehe ra Abraham cuenda tuhun cha natyihí tahan Nyoo chihin ra. ²⁹ Ta ra cha cuví sehe ñaha cha cuví musu cuan xaan iñi ra chi ra Isaac cha cuví sehe ñasihi vaha ra Abraham. Tyicuan caa cuví tucu vityin. Ra cha cuñí vatyi sacuví yo cha catyí ley, xaan iñi ra ta chicán nyicon ra chi yo cha cuví yo ñáyivi nacacú chaa chihin Tatyi li Nyoo. ³⁰ Soco ¿ñáa cha catyí tuhun Nyoo? Catyí chi: “Tava ñehe chi ñaha cha cuví musu cuan chihin sehe ña. Vatyi sehe ña ma cuví naquehen cue cha tahan chi chi sehe ñasihi vaha ra Abraham”, catyí tuhun Nyoo. ³¹ Yucuan chaha, yañi, ñima tari sehe ñaha cha cuví musu cuan cuví yo. Soco cuví yo tari sehe ñasihi vaha ra Abraham.

5

Ñihi cuinanyaa yo chihin cha ña nyacá ñaha ca ley chi yo

¹ Ra Cristo sacacú ra chi yo ndaha ley chahnu cuan. Yucuan chaha sáha ndo cuenda coto nanduvi ndo musu inga chaha cuenda ley.

² Tyasoho ndo, yuhu ra Pablo catyí chi ndo. Tatu cuhva ndo cha saha ñu circuncidar chi ndo, ta cuñí maa ndo tyi cucacu ndo chihin cuan, ma cuví tyinyee ra Cristo chi ndo. ³ Cuñí catyí inga chaha chi ndo vatyi tandihi ra cha cuñí cacu chihin cha saha ñu circuncidar chi ra, cuñí chi vatyi sacuví ra tandihi cuíi cha catyí ley ra Moisés ñandihí. ⁴ Tandihí nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuví cuan. Ta sañá ndaha ndo tumañi iñi cha chahá Nyoo chi ndo. ⁵ Soco yoó chihin cha tyinyee Tatyi li Nyoo chi yo ta chinó iñi yo chi ra Cristo. Ta itá iñi yo nduvahá yo nuu Nyoo. ⁶ Vatyi tatu iin ri cuví yo chihin ra Cristo Jesús, ñahri tuhun cha sacuví yo costumbre

circuncisión, o cha ña sacuví yo. Cha vale ca tatu chinó ñiñi yo chi ra Cristo. Ta chihin cha chinó ñiñi yo coo yo, chihin cha cuñí yo chi noo noo tahan yo.

⁷ Nyoho vaha cuahán ndo quivi cuan. ¿Yóó cha sativí chi ndo? Ta ña tyasohó ca ndo cha ndicha. ⁸ Tuhun cha sañahá ñu cuan, ñima tuhun Nyoo ra nacana chi yo cuví. ⁹ Vatyí tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuví sativí ñu chi cuaha ñáyivi. ¹⁰ Nyoo cutachi tuñi ra chi ñáyivi cha sativí chi ndo. Ñahri cuenda ra yóó ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyí nyoho ma caca xiñi ndo inga cuhva cha ña sañahí chi ndo.

¹¹ Ta cha cuenda chi yuhu, yañi, tyehe ta catyí vatyí ñu chinó ini chi ra Cristo cuñí chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyí cuatyí yo. ¹² Soco ra sayangá chi ndo chiña, vaha cha quita ra nu nyicu ndo, tacuhva cha ma sayanga ca ra chi ndo.

¹³ Vatyí nyoho, yañi, nacana Nyoo chi ndo vatyí coo ndo libre. Soco ñima cha cuenda cha iyó ndo libre ta cuví sacuvi ndo ñáá ndihí cha cuñí coño ñuhu ndo. Soco sacuvi ndo tyiño nuu tahan ndo chihin cha cuñí ndo chi ñu. ¹⁴ Vatyí iyó noo tuhun Nyoo cha catyí chi: “Cuñi ndo chi tahan ndo tari cuñí ndo chi maa ndo”, catyí chi. Ta tatu ndicha ndicha cha cuñí yo chi tahan yo, ña yíi sacuví yo tandihí cha catyí ley chahnu. ¹⁵ Saha ndo cuenda vatyí tatu cahán ndo ta sataśi ñiñi ndo chi tahan ndo, cutiví nu nyicu ndo.

Cuhva cuñí coño ñuhu yo ta cuhva iyó yo chihin Tatyí li Nyoo

¹⁶ Cha cuñí catyí chi ndo ican cuvi ihya: Coo ndo chihin tunyee ñiñi Tatyí li Nyoo. Tyicuan caa ta ma cuvi ca sacuví ndo cuhva ña vaha cuñí ndo. ¹⁷ Vatyí cha sacuví yo cha ña vaha cha cuñí yo, ñima cuhva cuñí Tatyí li Nyoo cuví. Vatyí Tatyí li Nyoo ña cuñí chi cha sacuví yo cha ña vaha. Ta coño ñuhu yo ña cuñí chi sacuví chi cuhva cuñí Tatyí li Nyoo. Ña nacachí tahan cha cuñí Tatyí li Nyoo chihin cha cuñí coño ñuhu yo. Ta yucuan chaha ma cuvi sacuvi yo cha cuñí

yo. ¹⁸ Soco tatu sacuví yo cha catyí Tatyí li Nyoo chi yo, ma cuvi ca cunyaca ñaha ley chi yo.

¹⁹ Ña xehe caa ñu sacuví cuhva ña vaha cha cuñí coño ñuhu. Yihí ra, iyó ñasihi ra ta iyó inga ñu chi ra. Ta yihí ñu iyó yíi ñu ta iyó inga ra chi ñu. Ta yihí ñu sacuví ñu cha ña vaha chihin coño ñuhu ñu ta iyó viciu chi ñu. ²⁰ Yihí ñu sacahnú ñu xitohyo. Yihí ñu sataśi ñu. Yihí ñu tasi cuñí nyehe ñu chi tahan ñu. Yihí ñu cañí tahan ñu. Yihí ñu cuñó ñu. Ta yihí ñu yatyin ñiñi ñu. Yihí ñu chicá xiñi ñu maa maa ri cha vaha chi maa ñu. Ta yihí ñu iyó división nu nyicu ñu. Vatyí cacañí tahan ñu. Ta tyicuan caa ta cusín ñu. ²¹ Ta yihí ñu nyiyó ñiñi ñu cha tyayíi. Ta yihí ñu cachahñí chi tahan ñu. Ta yihí ñu tuhva ñu chiñi. Ta yihí ñu chachí cuahyi ñu. Ta sacuví ñu cuaha ca cha sacuví ñu. Ta catyí chi ndo tari catyí chi ndo quivi cuan. Vatyí tandihí ñu cha sacuví tyehe caa ma cuvi naquehen cuenda ñu nu nyacá ñaha Nyoo.

²² Soco cha chahá Tatyí li Nyoo, ican cuvi ihya: cha cuñí yo chi Nyoo ta chi tahan yo, cha sii cuñí yo, cha taxi cuñí añima yo, cha cama iyó yo chihin ñáyivi, cha masu ñiñi yo, cha vaha ñáyivi cuvi yo, cha ña cundihñi yo sacuví yo cha vaha chihin ñáyivi, cha chinó ñiñi yo chi ra Cristo. ²³ Ta inga cha chahá Tatyí li Nyoo chi yo, ican cuvi ihya: cha ndahvi sahá yo chi yo, cha ña sacuví yo cuhva cuñí coño ñuhu yo. Tatu sacuví yo tandihí cha vaha ihya, ni noo ley ta ma cuvi catyí chi tyi iyó cuatyí yo. ²⁴ Ta yóó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñí coño ñuhu yo. ²⁵ Ta tari cha iyó yo ñáyivi chaa cha cuenda Tatyí li Nyoo, tyicuan caa cuñí tucu chi cha quichahá yo cha saquehen ityi ra chi yo.

²⁶ Ma cahnú saha yo chi yo. Ta ma sacañi tahan yo chi tahan yo. Ma quichi cuvi ñiñi yo cha chii inga tahan yo.

6

Tahán chi tyinyee yo chi tahan yo

¹ Yañi, tatu nanyehé yo sacuví noo tahan yo cuatyí. Nya yo cha ñiñi nyaá yo chihin Tatyí li Nyoo tyinyee yo chi ñu na ndunyee ñu inga chaha. Soco cuñí chi cahán víi yo

chihin ñu chihin cha vita iñi yo. Ta cuñí chi sahá yo cuenda chi yo coto nducu nyehe tucu cuilhna chi maa yo. ² Na tyinyee yo chi tahan yo ñáá cha cuví chi ñu. Tatu tyicuan caa sacuví yo, quichahá vaha yo chi ra Cristo cuví cuan.

³ Tatu nya noo yo cuñí maa yo vatyi cahnu ñu cuví yo, ta ñahri ñu cuví yo, suri chi maa yo sandaví ñaha yo. ⁴ Ma saha yo tuhun tyi vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusii cuñi yo. ⁵ Vatyi tahán chi cunyee noo noo yo ñáá ndihi cha tyisó Nyoo siqui yo.

⁶ Ta cuñí chi tyinyee ndo chihin cha chihuhú chi ra cha sañahá tuhun Nyoo chi ndo.

⁷ Ta ma sandavi ñaha ndo chi ndo. Nyoo yori cuví cuacu nyaa chi ra. Vatyi tandihi cha tachí ñáyivi, ican cuan cunaquehén ñu. Vatyi tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihi ñu. ⁸ Tatu noo ñáyivi nyacuví ñu cuhva ña vaha cha cuñí coño ñuhu ñu, suri maa cha sacuví ñu cusativí chi chi ñu. Soco tatu nyacuví ñu cuhva cuñí Tatyí li Nyoo, Tatyí li Nyoo cucuhva noo ñáyivi chaa cha ma naa ca maa tyi coo ñu. ⁹ Yucuan chaha ma cutatu yo cha sacuví yo cha vaha. Vatyi tatu ma ndu uvi iñi yo, coo quiví ta naquehen yo cha vaha. ¹⁰ Yucuan chaha tahan ri chaha cha chahá chi cuhva, na sacuví yo cha vaha chihin tandihi ri ñáyivi. Ta cha xihna cuii ri sacuvi yo cha vaha chihin ñu yihí cuenda Nyoo.

Cusii xaan cuñí ra Pablo vatyi nyehé ra tindoho cha cuenda ra Cristo

¹¹ Nyehe ndo ñana cha nahnu letra tyaf chihin ndahi nu tutu ihya vityin. ¹² Ñu cha cuñí saniñí chi ndo vatyi sacuvi ndo costumbre circuncisión, saniñí ra chi ndo vatyi cuñí ra cuvaha ra nuu ñáyivi. Na cuñí ra nyehe ra tindoho cha cuenda ra Cristo, ra chihí nu cruzi. ¹³ Vatyi ni maa ra cha sacuví ra costumbre circuncisión cuan ta ña quichahá ra tandihi cha catyí ley. Soco cuñí ra cha sacuvi nyoho costumbre cuan. Vatyi tyicuan caa ta cuví sacahnu ra chi ra vatyi sacuví ndo cuhva catyí ra. ¹⁴ Soco yuhu ña cuñí sacahni chii cha cuenda ñáá ndihi tuhun. Soco sii xaan cuñí cha chihí Sutu

Mañi yo Jesucristo nu cruzi cha cuenda yuhu. Vatyi cha cuenda cha chihí ra nu cruzi, tari quiví cha yahá chihí cha quíñi caa cha iyó ñáyivi ihya. Ta cha yahá chihí tucu mai cha cuenda cuan. ¹⁵ Vatyi tatu nyicón yo chi ra Cristo Jesús, ña niñi xaan cha sacuví yo costumbre circuncisión o cha ña sacuví yo. Noo cha niñi ca, cha nanduví yo noo ñáyivi chaa. ¹⁶ Tandihí ndo cha iyó ndo tyehe caa, naquehen ndo cha taxi ri coo aña ndo. Ta na cundahvi cuñi ra nyehe ra chi tandihi ndo, ñu cha ndicha cuví ndo ñáyivi cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihi chii. Vatyi tandihi pehla cha nyaá coño ñuhi, cuñí chi catyi vatyi ndicha cha cuví yuhu noo ra chicá tyiño Sutu Mañi yo Jesús.

¹⁸ Yañi, Sutu Mañi yo Jesucristo na nasoco chi tandihi ndo. Ta tyicuan caa na cuví chi.

Carta Cha Sacuhun Ra Apóstol Pablo Chi ñáyivi ñuu

Éfeso Cha Yihí Cuenda Nyoo

*Nu sacuhún ra Pablo noo tutu chi ñu ñuu
Éfeso cha yihí cuenda Nyoo*

¹Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyaí noo carta ihya chi tandihí ndo cha yihí ndo cuenda Nyoo ñuu Éfeso chiña, ta níi iñi ndo chinó iñi ndo chi ra Cristo Jesús. Ta iin ri cuví ndo chihin ra. ²Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo aña ndo.

Cha iin ri cuví yo chihin ra Cristo, Nyoo nasocó xaan ra chi yo

³Na sacahnú yo chi Nyoo, ra cuví Sutu Sutu Mañi yo Jesucristo. Vatyí nasocó xaan ra chi yo chihin tandihí nuu cha vaha cha iyó andiví cha cuenda cha iin ri cuví yo chihin ra Cristo. ⁴Vatyí nyata ni cumañi ca savaha ra ñuhu ñáyivi ta nacachí vaha ra chi yo tyi cu iin ri yo chihin ra Cristo. Vatyí tyicuan caa cundundí yo nuu ra chihin cha ñahri ca cuatyí yo. Cha cuenda cha cuñí ra chi yo, ⁵ta nyata cha naha ta tyaá ra cuhva chi yo vatyí nanduví sehe ra chi yo cha cuenda ra Jesucristo. Tyicuan caa sacuví ra vatyí yucuan cuhva cuñí maa ra. ⁶Yucuan chaha tyicuan ri sacahnú yo chi ra. Vatyí vaha xaan ñáyivi cuví ra. Ta cahnu xaan tumañi iñi chahá ra chi yo. Vatyí sacu iin ri ra chi yo chihin Sehe ra, ra cha cuñí xaan ra chi. ⁷Ta cha cuenda cha cuñí xaan Nyoo chi yo, natavá ra chi yo ndaha ra ña vaha, tacuhva cha ma cutuñi chi yo. Vatyí chihin cha chatí niñi Sehe ra, sandachí ra cuatyí yo. Ta tyicuan caa sahá Nyoo ticahnú iñi chi yo. ⁸Ta vatyí cahnu xaan tumañi iñi sahá ra chi yo, chahá xaan ra cha chiñi tuñi ra chi yo. ⁹Ta chahá ra cha cutuñi iñi yo tuhun ra cha ña chito ñáyivi. Vatyí sacotó ra chi yo yoso cuhva tyaá ra cuhva tyi sacuví ra chihin tandihí cha iyó cha cuenda ra Cristo. ¹⁰Vatyí coo quívi cuchino cava cha tyaá ra cuhva tyi sacuví ra. Vatyí cusandu iin ri ra tandihí cha iyó ihya ñáyivi ta cha iyó andiví, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹Cha cuenda ra Cristo ñihí tucu maa yo cha tahán chi chi yo. Vatyí Nyoo nyata cha naha nacachí ra chi yo tyi cu iin ri yo chihin ra Cristo. Tyicuan caa tyaá Nyoo cuhva tyi cusacuví ra. Ta maa ra sacuví tandihí yoso cuhva nyehé maa ra tyi vaha. ¹²Ta tyehe caa sacuví ra tacuhva vatyí nyuhu cha nachino iñi ndi chi ra Cristo cha xihna ri, coo ndi soco cha sacahnú ndi chi Nyoo cha cuenda cha cahnu cuví maa ra. ¹³Ta tyicuan caa tucu nyoho. Vatyí quívi chiñi ndo tuhun Nyoo cha ndicha vaha, catyí ñu chi ndo tuhun ra Cristo yoso caa sacacú ra chi yo. Ta chingo iñi ndo chi ra. Ta ndu iin ri ndo chihin ra. Ta tari cha tyaá Nyoo tuñi ra chi ndo cuví cuan, vatyí chahá ra Tatyí li ra cohon aña ndo, tari cuhva catyí ra tyi sacuví ra. ¹⁴Ta ican maa Tatyí li cuví cha chahá quívi ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí li ra chi yo nyacua nya quívi ndihí sacacu ra chi yo, cha cuví yo ñáyivi chi ra. Ta tandihí ihya sacuví ra chihin yo tacuhva sacahnú yo chi ra. Vatyí maa ra cahnu ca ra cuví ra.

¹⁵⁻¹⁶Yucuan chaha, cuhva cha chicán tahví chi Nyoo, ña sandihí tuhun cha nacuhvé tyahví nyoo chi ra cha cuenda ndo. Vatyí ñihí tuhun tyi chinó vaha iñi ndo chi Sutu Mañi yo Jesucristo. Ta cuñí xaan ndo chi tandihí ñu tahan yo ñu yihí cuenda Nyoo. ¹⁷Chiquén chi Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chi ra nacuhva ra cha chiñi tuñi Tatyí li ra chi ndo, tacuhva cutuñi iñi ndo cha sañahá ra chi ndo. Vatyí cohon nuu vaha ca ndo chi ra. ¹⁸Ta chiquén chi ra, na nuña ra cha chiñi tuñi xiñi ndo, na coto ndo ñáá cha cuñí ra cha naquehen ndo cha cuenda cha caná ra chi ndo. Ta na coto ndo ñana cha tyaquí ta tyayí cha chahá Nyoo chi yo ñu yihí cuenda ra. ¹⁹Ta chiquén chi Nyoo tyi cuhva ra cha coto ndo ñana cha cahnu tunyee iñi iyó chi ra, nyacua ña cuví tyicuhva yo. Ta ican cuan tyinyeé chi yo cha chino iñi yo chi ra. Ta suri maa chihin tunyee iñi ihya ²⁰Nyoo sanandotó ra chi ra Cristo. Ta cuatyaa ra chi ra chiyo vaha ra nya andiví. ²¹Ta yucuan cuví nu sacahnú xaan ca Nyoo chi ra Cristo cha nuu tandihí ca cha nyacá ñaha siquí ñuhu ñáyivi ihya ta andiví ñandihí. Cuví ri tandihí rey, o cuví ri ra cuví tyiño nahnu, o cuvi ri ángel andiví.

Soco yori yóó ca ra cahnu ñayiví ihya ta niri ñayiví cha cua coo. Vatyí noo tuhun ri maa ra Cristo cuví ra cahnu cuví. ²² Ta tandihí cuíi maa chahá Nyoo tyi cunyaca ñaha ra Cristo. Ta suri chi maa ra chahá Nyoo vatyí cuví ra xiñi o nuu chi ñu yihí cuenda ra. ²³ Vatyí yóó, cha yihí yo cuenda ra, cuví yo coño ñuhu ra. Ta maa yo ta maa ra cuví chi noo coño ñuhu naní ra. Ta maa ra cuví ra sandunaní tandihí.

2

Sacacú Nyoo chi yo cha cuenda cha cuñí ra chi yo

¹ Nyoo chahá ra noo ñayiví chaa chi ndo tyi coo ndo quívi ndu ñin ri ndo chihin ra Cristo, vasi nicaa ni ñi ndo cuatyí quívi cuan. Ta tari maa cha chihí aña ndo tyi ñahri maa ñayiví Nyoo chinyaa aña ndo. ² Ta chinyacuví ndo cuhva nyacuví ñayiví ña ñohó nuu Nyoo. Ta chinyicon ndo chi cuihna ra cuví nuu. Ta ican ra cuví tatyí ña vaha cha tyiyuhú chi ñu ña quichahá nu cahán Nyoo. ³ Ta suri tyicuan caa chiyo tucu yóó quívi cuan. Vatyí chinyacuví yo cha ña vaha cha quichi cuví ñi yo cha cuñí coño ñuhu yo. Ta sacuví yo yoso cuhva chica xiñi yo. Ta cha cuenda tuhun cha chinyacuví yo tahán chi tachi tuñi Nyoo chi yo inuu ri chihin tandihí ca ñu sacuví cha ña vaha. ⁴ Soco Nyoo cundahví xaan cuñi ra nyehe ra chi yo. Vatyí cuñí xaan ra chi yo. ⁵ Ta vasi cuaha xaan cuatyí yo quívi cuan, tari quívi cha chihí aña yo chihin cuatyí cuan, soco Nyoo chahá ra cha conyito aña yo noo ñayiví chaa, vatyí sacú ñin ri ra chi yo chihin ra Cristo. Ta cha cuenda tumañi ñi cha saha Nyoo chi ndo ta cacú ndo. ⁶ Ta tari quívi cha sanandotó Nyoo aña yo quívi nandotó ra Cristo Jesús. Vatyí iyó yo noo ñayiví chaa cha chahá maa Nyoo tyi coo yo. Ta tari quívi cha cuatyaá ra chi yo andívi. ⁷ Ta sacuví Nyoo tyehe caa tacuhva vatyí nu cuahán ca chi quívi cusañaha ra chi tandihí ñayiví yoso cuhva cha cahnu tumañi ñi chahá ra chi yo cha cuenda ra Cristo Jesús. Vatyí vaha xaan ñayiví cuví ra chihin yo tyi sacú ñin ri ra chi yo chihin ra Cristo. ⁸ Vatyí cha sacacú Nyoo chi yo cuví chi noo cha chahá ra chi yo. Ta naquehén yo tumañi ñi cuan chihin cha chinó ñi yo chi ra. Ta cha sacacú Nyoo chi yo ñima noo cha cuví

sacuví maa yo cuví. Vatyí yucuan cuví noo tumañi ñi cha sacuví ra chihin yo. ⁹ Ñima cha cuenda cha sacuví yo cha vaha ta cuita ñi yo cha sacacú cuan chi yo. Tyehe ta cuví chi tyicuan caa, cahnu cusaha yo chi yo. ¹⁰ Nyoo sacuví ra vatyí nduvahá aña yo chihin cha ndu ñin ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa ra cuhva nu quichi quívi vatyí tyicuan ri sacuví yo cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo ñin ri ñayiví chi Nyoo cuví tandihí yo

¹¹ Yucuan chaha ñicohon ñi ndo cuhva chiyo ndo nu quichí quívi, tyi cuví ndo ñayiví cha ñima ñu Israel cuví. Ta catyí ñayiví Israel tyi ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñí maa ra Israel tyi vaha ra nuu Nyoo ta nyoho ña vaha ndo. ¹² Ñicohon ñi ndo vatyí nu quichi chi, yori ra Cristo chinyaa aña ndo. Ta ña ñin ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun cha catyí Nyoo tyi cuhva ra cha nicoo vaha yo chihin ra. Chiyo maa ndo ñuhu ñayiví ihya chihin cha yori Nyoo nyaá chihin ndo, ta ña yihí ñi ndo cha cuñihí ndo. ¹³ Ta quívi cuan cañi xaan chinyaa ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chihí ra. Ta chati ñiñi ra cha catyí ndo. Ta yucuan chaha cuví cuyatyin ndo nuu Nyoo. ¹⁴ Vatyí ra Cristo sanicoo vaha ra chi yo chihin Nyoo. Ta sandu ñin ri ra chi ninduvi yo. Sandu ñin ri ra chi nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvahá ra cuhva iyó yo. Vatyí tari noo cha sanduvá ra noo nama vehe cha nanyaa mahñu, cha chasí nu cu ñin ri yo. ¹⁵ Maa ra Cristo sandihí ra tuhun ley chahnu chihin cha chahá cuenda ra coño ñuhu ra tyi cúvi ra nu cruzi. Vatyí tandihí ley cuan sasíñ chi chi yo. Tyi nyuhu sacuví ndi costumbre cha catyí ley cuan. Ta nyoho ña sacuví ndo. Soco ra Cristo sandu ñin ri ra chi yo quívi chahá ra noo cuhva chaa tyi coo yo. Ta tyicuan caa sanicoo vaha ra chi yo. ¹⁶ Vatyí chihí ra nu cruzi cha catyí cuatyí yo. Ta sacuví ra vatyí nanduvaha coo yo chihin

Nyoo. Ta tyicuan caa sanaa ra cha ña cuñi nyehe yo chi tahan yo.

¹⁷ Ra Cristo quichi ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chitó tuhun Nyoo. Catyi ra chi yo vatyi na nicoo vaha yo chihin Nyoo. ¹⁸ Vatyi chaha cha catyi cha chihí ra Cristo cha cuenda yo cuví natuhva ninduvi yo chi Nyoo Sutu yo. Vatyi noo ri Tatyí li ra nyaá aña yo: an cuví ri yo ñu Israel, an cuví ri yo ñu cha ñima ñu Israel cuví. ¹⁹ Yucuan chaha nyoho ña cuví ca ndo ñu inga ñuu. Soco nanduví ndo ñáyivi ñuu Nyoo ñin ri chihin tandihí ñu yihí cuenda ra. Nanduví ndo ñáyivi chi ra. ²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyi suri maa ra Cristo cuví yuu cha niñi ca cha yihí chaha vehe cuan. ²¹ Ta cha cuenda maa ra Cristo cuahan ndaa vehe cuan ta vehe cuan ican cuví maa yo ñin ri chihin ra. Ta cuahán sandu ñin ri ra chi tandihí yo ta nanduví yo tari noo vehe ii nu nyaá maa Sutu Mañi yo. ²² Ta tyicuan caa tucu nyoho chihin tandihí ñu yihí cuenda Nyoo, nanduví ndo tari noo nu iyó Nyoo. Vatyi nyaá Tatyí li ra aña tandihí yo.

3

Nyoo tachi ra tyiño chi ra Pablo vatyi cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyi sacoté tuhun ra Cristo Jesús chi nyoho cha ñima ñu Israel cuví ndo. ² Tahán chi natyihí tuñi ñi ndo tyi cahnun xaan tumañi ñi chahá ra chii cha cuenda cha vaha chi ndo, tyi sacoté chi ndo. ³ Vatyi cha yaha catyi suhva chi ndo yoso caa sañahá Nyoo chii noo tuhun xehe. ⁴ Ta cuhva cha sacuaa ndo tuhun cha yahá catyi chi ndo, cuví coto ndo yoso caa chahá Nyoo tyi cutuñi ñi tuhun ra Cristo cha ña chitó ñáyivi. ⁵ Vatyi nu quichi chi, ña sañahá Nyoo chi ñáyivi, tari sañahá ra chi apóstol ta ra cacuví profeta cha vityin. Vatyi Nyoo chihin Tatyí li ra sañahá ra chi yo cha vityin. ⁶ Ta tuhun xehe cuan, ican cuví ihya: vatyi nyoho cha ña cuví ndo ñu Israel, ñin ri cha cutahan chi chi ndo chihin nyuhu cha cuví ndi ñu Israel. Vatyi noo ri coño ñuhu ra

Cristo cuví yo. Ta cuñihí yo cha catyi Nyoo tyi cuhva ra chi yo cha cuenda maa ra Cristo Jesús.

⁷ Sahá Nyoo tumañi ñi chi yuhu vatyi chahá ra tunyee ñi ra chii tyi sacoté tuhun vaha ihya chi ñáyivi. ⁸ Soco cha cuenda chi yuhu cuví noo ra luhlu, noo ra ndahvi ca cha nuu tandihí ca ñu yihí cuenda Nyoo. Soco sahá Nyoo tumañi ñi ihya chii. Vatyi tacuhva cahn tuhun ra Cristo chihin ñu cha ñima ñu Israel cuví. Ta sacoté chi ñu ñana cha tyayii cha cuñihí ñu cha cuenda ra Cristo. ⁹ Tyatyíño Nyoo chii tyi sacoté chi tandihí ñáyivi yoso caa tyaa ra cuhva nyata ni cumañi ca savaha ra tandihí cha iyó. Ta cha naha ña chahá Nyoo cha coto ñáyivi tuhun ihya. ¹⁰ Tyicuan caa cuví tacuhva vatyi vityin tandihí ra nyacá ñaha andívi cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chiñi tuñi xaan Nyoo. ¹¹ Tandihí ihya chachí tahan chihin cha tyaa Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chi yo. ¹² Ta cha cuenda maa ra Cristo iyó chi ityi chi yo cha chaá yo nuu Nyoo chihin cha ña yuhví yo. Vatyi chinó ñi yo chi ra Cristo. ¹³ Yucuan chaha chacú ndahvi nuu ndo tyi ma ndu uvi ñi ndo chi Nyoo cha nyehi tindoho cha cuenda ndo. Vatyi cuví chi cha cuenda cha vaha chi maa ndo. Ta cusiñ cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴ Yihí ñi yoso cuhva cha vaha cha tyaa Nyoo Sutu yo cuhva tyi cuhva ra chi yo. Ta yucuan chaha chicuñi chiti nuu ra. ¹⁵ Maa ra cuví ra Sutu tandihí ñáyivi cuenda ra: ñu cha cuahan coyo andívi, ta ñu cha iyó ca siqui ñuhu ñáyivi. Tandihí yo cuví yo ñáyivi chi ra. ¹⁶ Ta chiquén chi ra na sandunyeer ra ñi ndo chihin Tatyí li ra cha nyaá aña ndo. Vatyi maa ra cahnun xaan ca cha tyayii ra chahá ra chi yo. ¹⁷ Ta na coo ra Cristo aña ndo vatyi chinó ñi ndo chi ra. Ta coo ndo chihin cha cuñi Nyoo chi ndo. Vatyi tari yihí vaha yoho noo yutun chichi ñuhú, tyicuan caa cunyya vaha aña ndo chihin Nyoo. ¹⁸ Tyicuan ta cuacoo tunyee ñi ra chi ndo tacuhva cuví cutuñi vaha ñi ndo chihin tandihí ñu yihí cuenda ra vatyi cuñi xaan ra Cristo chi yo. Nyacua ña ñihí ca yo

cuhva catyi yo yoso cuhva cha cuñí ra chi yo. ¹⁹ Vatyí yaha xaan cahnu cuan. Nyacua ma cuví cohon nuu yo yoso cha cuñí ra chi yo. Soco cuñí cha nacoto ndo yoso cha cuñí ra chi yo. Tyicuan ta ñahri ca cumañi chi ndo. Vatyí Nyoo nyaá maa ra chihin ndo.

²⁰ Ta vityin na sacahnu yo chi Nyoo, ra cha iyó xaan ca tunyee iñi chii. Vatyí cuaha vavaha ca cha cuví sacuvi ra cha nuu cuhva cha chicán maa yo chi ra o cha nuu cuhva cha chicá xiñi yo. Vatyí suri chihin tunyee iñi ra cha iyó chi yo, sacuvi ra tandihí. ²¹ Yoó ñu chino iñi chi Nyoo, na sacahnu yo chi ra tyicuan ri maa, ta tandihí tyembu cha cuenda cha sacuvi ra Cristo Jesús. Ta na cuví chi tyicuan caa.

4

Cha cuenda Tatyí li Nyoo iin ri cuví tandihí yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachi coo ndo tari cuhva tahán chi coo ñu cha nacanā Nyoo chii. Vatyí chi nyoho nacanā Nyoo tyi cuví ndo ñáyivi chi ra. ² Ndahvi saha ndo chi ndo. Ta vaha cahan ndo chihin ñáyivi. Cama cuví iñi ndo. Ta cunyee ndo ñáá cha sahá noo noo tahan ndo chi ndo chihin cha cuñí ndo chi ñu. ³ Nducu ndo cuhva cha tyicuan ri cu iin ri ndo chihin tahan yo. Vatyí maa Tatyí li Nyoo tyinyee chi yo, na coo vaha yo chihin tahan yo. ⁴ Vatyí iyó noo ri coño ñuhu ra Cristo. Ta ican cuan cuví tandihí yo. Ta tari cha noo ri Tatyí li Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacanā ra chi yo. ⁵ Ta iyó noo ri Sutu Mañi yo nyacá ñaha chi yo. Ta noo ri chi maa ra chinó iñi tandihí yo. Ta noo ri cha cuenda maa ra condutya yo. ⁶ Ta noo ri Nyoo iyó ta maa ra cuví ra Sutu tandihí yo. Ta maa ra nyacá ñaha chi tandihí yo. Ta chotyíño ra chi tandihí yo yoso cuhva cuñí maa ra. Ta nyaá ra añaima tandihí yo.

⁷ Chahā ra Cristo noo cuhva chi noo noo yo, vatyí sacuvi yo tyiño nuu ra yoso cuhva cuñí maa ra cuhva ra. ⁸ Yucuan chaha cahan Nyoo tuhun ra Cristo nu catyí chi:

Cuví chasaha ra chi ra xaan iñi chi ra, ta nandaā xica ra andivi chihin ñu tava ra ndaha ra ña vaha.

Ta chahā ra cuhva yoso cuhva cusaha tyiño ñu tyiño nuu ra, catyí chi.

⁹ ¿Ta ñáá cha cuñí chi catyi cha nandaā xica ra cuan? Cuñí chi catyi vatyí noq xihna ra nya yuvi ca nu ñuhu ñáyivi. ¹⁰ Ra cha noq cuan, nandaā tucu ra nya nu sucun ca andivi. Vatyí tyicuan caa ta cuví sacutu ra tandihí maa ta cunyaa ra chihin yo tandihí ityi. ¹¹ Ta suri maa ra Cristo chahā ra cha vaha chi yo. Chi suhva yo chahā ra tyi cuví yo apóstol ra. Ta chi inga yo chahā ra cha cuhva cuenda yo tuhun cha chahā ra chi yo, o saha yo profetizar cuví cuan. Ta chi inga yo chahā ra tyi sacoto yo chi ñáyivi yoso caa sacacú ra añaima yo. Ta chi inga yo chahā ra cha quihí ndaha yo chi ñu yihí cuenda ra, ta chi inga yo chahā ra cha cuví sañaha yo tuhun ra chi ñu. ¹² Tyicuan caa chahā Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra. ¹³ Nyacua nya cu iin vaha tandihí yo cha cuenda cha chinó vaha iñi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chihin tandihí cha vaha cha chahā ra Cristo chi yo. ¹⁴ Yucuan ta ma cuví ca yo tari ra cuatyaa. Vatyí totyehe ri chino iñi ndotyin ñáá noo tuhun cha ñima ri tuhun sandaví ñaha ñu chi ndotyin. Ta coto cutondo xiñi yo tyicuan caa chihin tuhun cha ña ndicha cha sañahá ñu sandaví ñaha. ¹⁵ Soco cha nuu cha cuví yo tari ra cuatyaa, cuñí chi cha cahan yo cha ndicha chihin cha cuñí yo chi Nyoo ta chi ñáyivi. Ta ndunyeé ca añaima yo chihin ndii cha vaha cha iyó chi Nyoo. Ta cuahnu yo chihin ra Cristo, cha cuví ra nuu chi yo. ¹⁶ Ta cha cuenda ra Cristo tandihí yo cha cuví yo coño ñuhu ra, iin ri cuví yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha tahán chi chi, ta tyicuan caa tyinyee chi chi coño ñuhu, na coo vaha chi ta cuahnu chi, ta tyicuan caa yoó, cuñí yo chi tahan yo ta tyinyee yo chi ñu.

Ñáyivi chaa cha tahán chi coo yo cha cuenda ra Cristo

¹⁷ Ican ihya cuví cha chahí cuenda chi ndo, catyí Sutu Mañi yo. Ta cuñí chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyí maa ri maa cha chiñi tuñi tondo chicá xiñi ñu. ¹⁸ Ta ña

cutuñí iñi ñu, tyi ñima ñayivi Nyoo iyó ñu. Vatyí ña chitó ñu, cha cuenda cha ndava añima ñu. ¹⁹ Ña cahán ca nuu ñu cha sacuví ñu cha ña vaha. Ta nacuhva cuenda ñu chi ñu chi cha quiñi caa. Cuaha xaan cha ña vaha quichi cuvi iñi ñu. ²⁰ Soco ñima tyicuan caa cutuhva yo. Vatyí ñima tyicuan caa cuhva iyó ra Cristo. ²¹ Tatu ndicha tyi chiñi yo cha cahan ra chihin yo, ta cutuhva yo cha ndicha cha sañahá ra chi yo, ²² ma coo ca yo cuhva chiyo yo quivi cuan. Vatyí chiyo yo ñayivi chahnu quiñi caa. Vatyí cha quichi cuvi iñi yo sandavi ñaha chi chi yo. ²³ Nacuhva cuenda yo chi yo chi Nyoo na nasama ra cuhva chicá xiñi yo. ²⁴ Ta nacoo yo noo ñayivi chaa chihin noo añima chaa cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

²⁵ Yucuan chaha ma cahan ca yo cuendu. Cahan yo maa maa ri cha ndicha chihin tahan yo. Vatyí iñi ri ñayivi cuvi yo.

²⁶ Tatu cuxaan yo, sáha yo cuenda coto sacuví yo cha ña vaha. Ta suhva ri cuhva cuxaan yo. Ma cuxaan yo ndiyaca. ²⁷ Ta ma cuhva yo cuhva chi ra ña vaha.

²⁸ Ra cha tuhva suhu quivi cuan, ma suhu ca ra vityin. Soco sáha tyiño vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chinuhú chii.

²⁹ Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahán yo. ³⁰ Ta ma cuhva yo tucuihya iñi chi Tatyí li Nyoo. Vatyí chahá Nyoo Tatyí li ra chi yo tari noo tuñi ra tyaa ra añima yo nyacua nya quivi ndihi sacacú ra chi yo.

³¹ Ta ma xaan cuñi yo. Ta ma cuxaan yo. Ta ma quihí tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo. ³² Soco vaha ñayivi cuvi yo chihin tahan yo. Ta cundahvi cuñi yo nyehe yo chi ñu. Ta sáha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

5

Yoso caa tahán chi coo ñayivi yihí cuenda Nyoo

¹ Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñi xaan ra chi yo. ² Vita cuvi iñi

yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachahá ra chi Nyoo ta cha naha, tyicuan caa chahá cuenda ra Cristo chi ra cha cuenda yo. Ta si xaan cuñi Nyoo cha cuenda cha chahá cuenda ra chi ra.

³ Soco vityin cha cuví yo ñayivi yihí cuenda Nyoo, ña tahán chi sacuví yo cha quiñi caa chihin coño ñuhu yo. Ni ña tahán chi cha cahán yo cha quiñi caa. Ta ni ma nyiyo iñi yo. ⁴ Ma cahan yo tuhun cha chahá ticahan nuu. Ni ri ma cahan yo noo tuhun cha ñima ri tuhun. Vatyí ña tahán chi cahan yo cha tyicuan caa. Soco cha nuu cha cahán yo cha ña tahán chi, na nacuhva yo tyahvi nyoo chi Nyoo. ⁵ Vatyí cha chitó yo vatyí tandihí ñu cha sacuví cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihi ta ñima ñasihi ra cuví, o ñu iyó chihin rayi ta ñima yí ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo. ⁶ Ma cuhva yo cha sandavi ñaha ñayivi chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra. ⁷ Ta ni ma cutahan yo chihin ñu cuan.

⁸ Vatyí chiyo yo nu ñaa iñi quivi cuan. Soco vityin iyó yo nu ndichin chihin Nyoo. Cachi cgo yo tari tahán chi coo ñu chitó tuhun Nyoo. ⁹ Vatyí Nyoo sacundichín ra añima yo tacuhva cuvaha añima yo ta sacuví yo cha vaha ta cha ndicha. ¹⁰ Saniñi yo cutuhva yo cuhva tahán iñi Sutu Mañi yo. ¹¹ Ma sacuví yo cha nyacuví ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñayivi tyi ña vaha cuan. ¹² Vatyí cahán nuu yo cha cahán yo tuhun cha nyacuví ñu cuan cha xehe ri. ¹³ Soco quivi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihí cha ñohó xehe. ¹⁴ Yucuan chaha iyó nu catyí chi:

Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chi.

¹⁵ Yucuan chaha sáha yo cuenda cuhva iyó yo. Ta ma coo yo tari noo ra soho. Cgo yo tari noo ra chitó. ¹⁶ Ma sacunaa yo

quíví yo. Na cahan yo tuhun Nyoo chihin ñáyiví. Vatyí vityín quíñi xaan caa ñáyiví iyó yo, ta ña naha ca iyó yo. ¹⁷Yucuan chaha ma tondo xaan cohon iñi yo. Soco nandichi xiñi yo cuhva cuñí maa Sutu Mañi yo tyi sacuví yo. ¹⁸Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí li Nyoo añima yo. ¹⁹Cahan yo chihin tahan yo soco chihin cha sacahnú yo chi Nyoo. Cāta yo salmo cuenda ra. Cāta yo yaa cha chahá Tatyí li chi yo. Sacahnú yo chi Sutu Mañi yo chihin cha tandihí añima yo. ²⁰Tyicuan ri nacuhva yo tyahví nyoo chi Nyoo Sutu yo cha cuenda tandihí maa, vasi sñi cuñí yo, vasi nyehé yo tindoho. Nacuhva yo tyahví nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

²¹Quíchaha yo nu cahán inga tahan yo cuenda ra Cristo. Vatyí sahá yo ñáyiví chi ra Cristo.

²²Nyoho ñu iyó yñ quíchaha ndo cha cahán Sutu Mañi yo. Ta tyicuan caa tucu quíchaha ndo nu cahán yñ ndo. ²³Vatyí rayii ican ra cuví nuu chi ñasihi ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chi yo cha cuví yo coño ñuhu ra. ²⁴Soco tari tahán chi cha quichahá ñu yihí cuenda ra Cristo chi ra, tyicuan caa cuñí tucu chi cha quichahá ñusihi tandihí cha catyí yñ ñu.

²⁵Ta rayii cuñí chi cha cuñí ra chi ñasihi ra, tari cuñí ra Cristo chi yo cha yihí yo cuenda ra. Ta chahá ra ñáyiví ra cha catyí yo. ²⁶Tacuhva vatyí sandundií ra añima yo. Ndií añima yo vatyí nacatya ra quíví cha nachino iñi yo tuhun cahán ra ta condutya yo. ²⁷Ndoq añima yo tari ndoq noo sahma, ña yacua ca chi, ña tiyi ca chi. Vatyí ra Cristo sandundií ra chi yo cha cuví yo ñu yihí cuenda ra. Tacuhva cuví nacuhva cuenda ra chi yo chi Nyoo, soco vaha yo, ñahri ca cuatyí yo. ²⁸Ta tyicuan caa tucu cuñí chi cha cuñí rayii chi ñasihi ra, tari cha cuñí ra chi coño ñuhu ra. Vatyí tatu cuñí ra chi ñasihi ra, tari cha cuñí ra chi maa ra cuví cuan. ²⁹Vatyí yori noo yo cha ña cuñí nyehe yo chi coño ñuhu yo. Soco sacachí yo ta sacuihnó yo chi coño ñuhu yo. Ta ra Cristo suri tyicuan caa sacuví ra chihin ñu

yihí cuenda ra. ³⁰Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiquí ra. ³¹Catyí tuhun Nyoo: “Rayii sandoó ra chi sutu ra ta chi sihi ra. Ta ndu iñi ri ra chihin ñasihi ra. Ta noo ri nanduví ñu.” ³²Ta yuhu catyí vatyí ihya cuví noo tuhun xehe cha cahnu xaan. Ta cuñí chj catyí tyi ra Cristo ndu iñi ri ra chihin ñu yihí cuenda ra. ³³Ta siñi ri cuñí tucu chi catyí vatyí tahan tahan ndo cuñí ndo chi ñasihi ndo, tari cuñí ndo chi maa ndo. Ta nyoho cha cuví ndo ñusihi, saha ndo ñáyiví chi yñ ndo.

6

¹Nyoho cha cuví ndo sehe, tahán chi cha tyasoho ndo nu cahán sutu ndo ta sihi ndo. Vatyí cuñí ndo chi Nyoo. ²⁻³Nu tutu Nyoo nyaá cha xihna ri sacuví yo ta nañihi yo cha cucuhva Nyoo chi yo. Catyí chi: “Saha ndo ñáyiví chi sutu ndo, chi sihi ndo. Tyicuan caa ta sñi xaan cuacoo ndo. Ta naha xaan cuacoo ndo ñáyiví ihya”, catyí Nyoo.

⁴Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

⁵Ta nyoho cha cuví ndo musu, quíchaha ndo chi chitoho ndo siqui ñuhu ñáyiví ihya. Saha ndo ñáyiví chi ñu. Quíchaha ndo chi chitoho ndo chihin cha ñi iñi ndo. Tatu sacuví ndo tyicuan caa, chi ra Cristo quichahá ndo cuví cuan.

⁶Ma saha tyiño ndo cuhva cha nyehe ri chitoho ndo tacuhva vatyí catyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñí Nyoo chihin cha ñi añima ndo. ⁷Chihin cha iyó vaha iñi ndo sacuví ndo. Tari cha sahá tyiño ndo nuu Sutu Mañi yo ta ñima nuu ñáyiví. ⁸Vatyí cha chitó yo tyi tahan tahan yo, an cuví ri yo musu, an ñima, soco cutiyahví Sutu Mañi yo chi yo yoso cuhva cha vaha cha chinyacuví yo.

⁹Ta nyoho cha iyó musu ndo, suri vaha coo ndo chihin musu ndo. Ta ma sayuhvi ndo chi ñu. Vatyí chitó ndo tyi ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andiví. Vatyí maa ra ña cachi ra chi yo.

Tunyee iñi cha chahá Nyoo chi yo cha yihí yo cuenda ra

¹⁰ Ta vityin sandunyeeyo yo iñi yo chihin cha iin ri cuví yo chihin Sutu Mañi yo. Vatyí iyó xaan tunyee iñi chi ra. ¹¹ Ta tari noo sindaro sahá cuenda ra chi ra, tyicuan caa tucu yoó, nasaha cuenda vaha yo chi yo chihin tandihi cha cuvi tyinyee Nyoo chi yo. Tyicuan caa ta cuvi chasaha yo chi cuihna. Vatyí nducú xaan ra cuhva sandavi ñaha ra chi yo. ¹² Tyicuan caa coo yo chihin tunyee iñi Nyoo. Vatyí ñima chihin ñáyivi cañí tahan yo. Soco cañí tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chi ñáyivi cha nyacuví cha quiñi caa. ¹³ Yucuan chaha saha cuenda vaha yo chi yo chihin tandihi cha cuví tyinyee Nyoo chi yo, tacuhva cuvi chasaha yo chi ra ña vaha ñáá quívi nducu tiin ra chi yo. Coto cana cava yo saha ra. ¹⁴ Tari noo sindaro ñihi nanyaá ra chihin noo sincho yihí chichi ra, tyicuan caa ñihi cuñanyaa yo chihin tuhun cha ndicha vaha. Tari cacú noo sindaro vatyí tyaa ra noo caa pecho ra, tyicuan caa Nyoo cusacacu ra chi yo ndaha ra ña vaha, tatu maa ri cha vaha sacuvi yo. ¹⁵ Ta tari natyíhi sindaro bota chaha ra ta nyatú tuhva ra cha cuhun ra cuatyí, tyicuan caa cuatu tuhva yo chihin tuhun Nyoo. Na sacoto yo chi ñáyivi yoso caa nicoo vaha ñu chihin ra. ¹⁶ Ta tari sindaro chasí ra chi ra chihin noo caa tacuhva ma nañi nduva chi ra, tyicuan caa cuñí chi nachino vaha iñi yo chi Nyoo tacuhva cha cuvi chasaha yo tandihi cha sacuvi ra ña vaha chi yo. ¹⁷ Ta tari sahá cuenda sindaro xiñi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha chahá ra chi yo. Vatyí tari noo mityí Tatyí li ra cuví tuhun cuan. Vatyí chihin tuhun ra sahá ganaa yo chi cuihna. ¹⁸ Ta nyita ri cahan yo chihin Nyoo. Ta Tatyí li ra cuatyinyee chi yo tacuhva cacan tahvi yo chi ra. Ta cuacu ndahvi yo nuu ra. Ta tyicuan caa cuatu tuhva ri yo. Ta ma ndu uvi iñi yo. Tyicuan ri cacan tahvi yo cha cuenda tandihi ñu yihí cuenda Nyoo. ¹⁹ Ta nacuatú tucu ndo chahi, tacuhva vatyí ñihi que tuhun cahn. Ta ma yuhvi sacote tuhun ra Cristo chi ñáyivi. Vatyí ta cha naha ña chito ñáyivi tuhun ra. ²⁰ Ta cha cuenda cha sacoté tuhun ra Cristo ñohí vehe caa ihya vityin. Soco Nyoo tachí chii vatyí cahn tuhun ra chihin ra nyicú vehe caa ihya.

Cacan tahvi ndo cha cuende, tacuhva cuvi cahn chihin cha ña yuhví, tari cuhva tahn chi cahn.

Tachí ra Pablo chi ra Tíquico tyi cuhun ra nu nyicu ñu

²¹ Ta ra Tíquico yañi yo, cunacatyí ra tandihi tuhun chi ndo. Maa ra ñi iñi ra sahá tyiño ra cuenda Sutu Mañi yo. Ta cuñi xaan yo chi ra. ²² Tachí chi ra nu nyicú ndo tacuhva sacoto ra chi ndo yoso caa iyó ndi ihya, tacuhva nduni ca iñi ndo chino iñi ndo chi Nyoo. ²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añima tandihi ra yañi yo. Ta na cuhva Nyoo cha chinó vaha iñi ra chi ra. Ta vityin suri Nyoo nacuhva ra cha cuñí ca ra chi ra ta chi ñáyivi. ²⁴ Ta na nasoco ra chi tandihi yo cha nyita ri cuñí yo chi Sutu Mañi yo Jesucristo chihin cha ñi iñi yo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

*Ñohó ra Pablo vehe caa, ta tyaá ra noo carta
chi ñu yihí cuenda Nyoo ñuu Filipos*

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo. ² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo ánima ndo.

*Nu chicán tahvi ra Pablo chaha ñu yihí
cuenda Nyoo ñuu Filipos*

³ Tahan ri cha nichón iní chi ndo, nacuhvá xain tyahvi nyoo chi Nyoo cha cuenda ndo. ⁴ Ta chicán tahvi chi Nyoo cha cuenda ndo chihin cha sñi cuñí ánime. ⁵ Vatyí nyata quívi xihna ri cha chiñi ndo tuhun ra Cristo ta nya vityin ta ña sandihí ndo tuhun cha tyinyeé ndo chii. Vatyí in ri tuhun ra Jesucristo sacotó yo chi ñáyivi. ⁶ Quívi naquehen cuenda Nyoo ánima ndo, maa ra chahá tunyee iní chi ndo, na sacuvi ndo tyiño nuu ra. Ta chité tyi tyicuan ri cuacuhva ra chi ndo nyacua nya quívi quichi ra Cristo inga chaha. ⁷ Tahán chi cha caca xiñi tyehé caa cha cuenda ndo, vatyí cuñí xain chi ndo. Vatyí in ri nasocó Nyoo chi yo. Vasi ñohí vehe caa, o vasi nanyai nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo. ⁸ Nyoo chitó ra vatyí cuñí xain chi tandihí nyoho tari cuñí ra Jesucristo chi ndo. ⁹ Ta chicán tahvi xain chi Nyoo na cuvita ca iní ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo, ¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quívi quichi ra Cristo. ¹¹ Maa ra cutyinyee ra chi ndo. Ta tyicuan ri cusacuvi ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnú

xaan ca cuví maa ra ta sacuví ra tyicuan caa chihin ndo.

*Maa maa ri tyiño Nyoo sacuví ra Pablo
vatyí ñohó ra Cristo ánima ra*

¹² Ta cuñí tyi coto ndo yañi vatyí tandihí cha cuví chii tyinyeé xaan chi chii nu cahnú tuhun Nyoo chihin ñáyivi. ¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo. ¹⁴ Ta cuaha xaan ra yañi yo cuenda Sutu Mañi yo cunií ca iní ra cha cuenda cha ñohí vehe caa. Ta naá cha yuhvi ra vatyí cachtó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahnú ra tuhun ra Cristo soco cha cuenda cha tasi cuñí ra nyehé ra chii, o cuñí ra na cunyicon ñáyivi chi ra. Soco yihí ra cahnú ra tuhun ra Cristo chihin ñáyivi, soco chihin cha vaha chicá xiñi ra. ¹⁶ Yihí ra cacahán ra tuhun ra Cristo cha cuenda cha cuñí ra chi ra. Vatyí chitó ra vatyí maa Sutu Mañi yo quichi nyaca ra chii ihya. Vatyí cotyíño ra chii, ta sacoté chi ñáyivi tyi ndicha cha sacacú ra ánima yo. ¹⁷ Soco inga ra cuan ñima cha ñi iní ra cahnú ra tuhun ra Cristo, soco cuñí ra cuhva ra tisihi chii nu ñohí vehe caa ihya. ¹⁸ Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sñi xaan cuñí cha cuenda cuan.

¹⁹ Ta cusñi ca iní vatyí chité vatyí chichi cha tandihí cha cuví chii, Nyoo cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí li ra Cristo chii. ²⁰ Chitó vahi vatyí Nyoo cutyinyee ra chii cha ma cucahan nui, ta ma yuhvi cahnú chihin cha ñi iní tuhun ra Cristo. Ñahri cuende, an coo que ñáyivi, an cúvi, soco cuñí vatyí vityin ta ityí nuu ca saha ñáyivi cuenda cuhva iyé ta coto ñu tyi ra Cristo cahnú ca cuví ra. ²¹ Vatyí cha cuenda yuhu tatu iyé, sacuvi tyiño nuu ra Cristo ihya siquí ñuhu ñáyivi. Soco tatu cúvi, cuñihi cha tyaquí cha iyó andívi. ²² Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityí cuhin, an cuhin ityí andívi, an cuhin cucahan que tuhun Nyoo chihin ñáyivi, ña chité. ²³ Yihí xaan cote nya cha

cuñí, vatyí iyó quívi cuñí cha coo que. Soco iyó quívi ña cuñí. Vatyí cha cuñí cunuhi cucunyaí chihin ra Cristo. Vatyí vaha ca cuan. ²⁴Soco cha cuenda cha vaha chi nyoho, vaha ca cha ndofí chihin ndo. ²⁵Yucuan chaha chité vatyí cundoí suhva ca ñáyiví ihya. Vatyí cuñí chi cha tyinyéé que chi ndo tacuhva cuví cuhun ca ndo ityi nuu ca ta cu sîi cuñí ndo chihin cha chinó ñi ndo chi Nyoo. ²⁶Ta quívi cunyehe nu nyicu ndo, tyicuan caa ta cuví cusîi ca ñi yo cha ñi ri cuví yo chihin ra Cristo.

²⁷Cuñí chi cha coo yo yoso cuhva tahán chi coo noo ñu yihí cuenda Nyoo. Vasi nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta ñi ri sahá tyiño ndo tacuhva nachino ñi ñáyiví tuhun ra Cristo. ²⁸Ta ma yuhvi ndo ñáá cha sacuví ñu xaan ñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa ñu. Ta sañahá tucu chi chi yo vatyí cha cacú añaíma yo sahá maa Nyoo. ²⁹Vatyí tari chahá ra Cristo ityi chi yo cha chinó ñi yo chi ra, tyicuan caa tucu chahá ra cha nyehé yo tindoho cha cuenda ra. ³⁰Ñi ri cuhva nyehé yo tindoho ta sacotó yo tuhun ra Cristo, ta cha chitó ndo yoso caa nyehí tindoho, ta vityin suri chitó ndo vatyí ña sañé cha sahá tyiñe tuhun Nyoo.

2

Tyayîi xaan ra Cristo, soco quichí cúvi ra tari noo ra ndahvi

¹Ndicha vatyí ra Cristo saníi xaan ra ñi yo cha ñi ri cuví yo chihin ra. Ta vaha cuñí yo cha cuenda cha cuñí ra chi yo. Ta ndicha tucu vatyí nyaá Tatyí li Nyoo chihin yo. Ta ndicha tucu cha ndahvi cuñí yo nyehé yo chi tahan yo. ²Tatu ndicha tandihí ihya, cuhva ndo cha cusîi cuñí chihin cha ñi ri cuví ndo. Ta cuñi ndo chi tahan ndo tari cuñí ra Cristo chi ndo. Ta ñi ri cuhva caca xiñi ndo. Ta ñi ri cuhva sacuví ndo. ³Ma sacuví ndo cha vaha chi maa ri maa ndo, soco sacuví ndo cha vaha chi ñáyiví ñandihí. Ta ma cahnú saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñáyiví ta ñima ca maa yo. ⁴Ta tahan tahan yo caca xiñi yo cha cuenda cha vaha chi inga ñáyiví, ta ñima cha vaha chi maa ri maa yo.

⁵Caca xiñi ndo tari chicá xiñi ra Jesucristo.

⁶Vasí cuví ra Nyoo,

soco ña cahnú saha ra chi ra ta ña quichí cuví ñi ra cha sacahnú ñáyiví chi ra, tari sacahnú ñu chi Nyoo Sutu ra.

⁷Soco sandoq ra tandihí tunyee ñi ra ta tandihí cha tyayîi ra ñi chiyo xiin.

Ta quichí nanduví ra noo ñáyiví ndahvi quívi cacú ra síqui ñuhu ñáyiví.

⁸Ta ndahvi saha ra chi ra, vatyí nanduví ra noo rayîi ri.

Ta chihin cha iyó vaha ñi ra ta quichahá vaha ra chi Nyoo nyacua chahá ra cha cahní ñáyiví chi ra.

Tari noo ra quiñi iyó saha ñu chi ra, vatyí nu cruzi chihí ra.

⁹Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnú xaan ca cuví nuu tandihí maa sivi.

¹⁰Vatyí tacuhva tatu cuiñi yo sivi ra Jesucristo, tandihí yo ta cuiñi chiti yo. tandihí cha iyó andiví.

Ta tandihí cha iyó síqui ñuhu ñáyiví, ta chichi ñuhú, cucuiñi chiti ta sacahnú chi ra.

¹¹Vatyí tandihí cha iyó ta nacoto nuu vatyí ra Jesucristo cuví ra nyacá ñaha chi tandihí maa cha iyó.

Tyicuan caa cunyehe chi tyi cahnú xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin síqui ñuhu ñáyiví ihya

¹²Yañi, cuñí xain chi ndo. Ta tari cha quichahá ndo chii quívi chinyaí chihin ndo, quichaha tucu ndo chii vityin cha cañi nyaí. Ndycu xaan ndo cuhva na nyehé ñáyiví tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra. ¹³Vatyí maa Nyoo sacacú cha vaha añaíma ndo. Ta tyinyéé ra chi ndo tacuhva vatyí quichi cuví ñi ndo quichaha ndo nu cahnú ra, ta sacuví ndo cuhva cuñí ra.

¹⁴Tatu cuasacuví ndo ñáá cha cuasacuví ndo, ndycu ndo cuhva cha ma coo tisihi, ta ma cañi tahan ndo. ¹⁵Tyicuan ta ma coo ni noo cuatyí ndo. Cuví ndo noo ñáyiví cachi iyó, cuví ndo ñáyiví ñahri cuatyí, tari tahán chi coo ñáyiví cuenda Nyoo mahñu ñáyiví quiñi iyó ihya. Cuñí chi cha cuví ndo tari noo ñuhu cha sandichín nu ñaa ñi síqui

ñuhu ñayiví ihyá. ¹⁶ Cahan yo tuhun Nyoo chihin ñáyiví vatyi ican cuan chahá ñayiví chaa cha iyó yo. Sacuvi ndo tyicuan caa, tyicuan ta quívi ququichi ra Cristo, yuhu vaha coo iñi cha cuenda nyoho, vatyi ña sacoto cahi tuhun Nyoo chí ndo. ¹⁷ Ta vasi cahñi ñáyiví chi yuhu, cha catyi tuhun Nyoo, soco sñi xaan cuñí ta cuñí cusñi cuñi ndo chihin vatyi tyicuan caa sacañá tahin cha cucuhva cuenda yo chi Nyoo, cha cuenda cha chinó iñi ndo chi ra. ¹⁸ Ta tahán chi cha cusñi iñi tucu nyoho chihin yuhu ñandíhi.

Nu tachí ra Pablo chí ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

¹⁹ Tatu Sutu Mañi yo ta cuñí ra cutachi chí ra Timoteo quichi nyehe ra nu nyicú ndo. Ta quívi ndichi ra nu nyaí cucusñi xaan cuñi. Vatyi cunacatyí ra chii yoso caa nyicú ndo. ²⁰ Vatyi noo tuhun ri maa ra chícá xiñi ra cha cuenda cha vaha chí maa ndo tari chícá xiñi yuhu. Ta yori yóo ca ra chícá xiñi tyicuan caa. ²¹ Vatyi tandíhi ca ra, maa maa ri cha cuenda chí maa ra nanducú ra. Ta ña nanducú ra yoso caa cuhva cuñí ra Jesucristo. ²² Chitó ndo vatyi ra Timoteo, vaha cuahan ra chihin Nyoo, ta cha cuenda chí yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyiví. ²³ Ta nyaá sacuhin chí ra nu nyicú ndo. Soco nya coto xihne ñáá catyi ra cuví tyiño, tatu ña naha ca ñohí. ²⁴ Vatyi chitó vahi tyi Sutu Mañi yo numi ri cuhva ra cha cuhin cunyehe nu nyicú ndo.

²⁵ Ta vaha cha cunuhu ra Epafrodito yañi yo nu nyicu ndo. Tachí ndo chí ra vatyi quichi tyinyee ra chii nu tyiño sahí. Ta tiín tahan xaan ndi chihin ra ña vaha cha cuví ndi sindaro ra Cristo. ²⁶ Ta cuñí xaan ra Epafrodito cunuhu ra nu nyicú ndo, vatyi chícá xaan xiñi ra cha chitó ndo tyi cuhví ra. ²⁷ Vatyi ndicha cuhví xaan ra ta cha yatyin maa cha cuví ra. Soco Nyoo cundahvi cuñi ra nyehe chí ra, ta chí yuhu ñandíhi. Ta ña chahá ra cha cuví ra. Ña cuñí ra cha coo ca tucuihya iñi chii. ²⁸ Yucuan chaha yuhu cuñí xain cha ndichi ra nu nyicú ndo. Vatyi chité tyi nyoho condusñi xaan cuñi ndo cha nanyehé ndo chí ra. Tyicuan ta ma caca ca xiñi tuhun ndo. Vatyi cha nanyehé ndo chí ra tyi iyó vaha ra. ²⁹ Yucuan chaha vaha ñaquehen ndo chí ra chihin cha sñi

cuñí ndo, vatyi yañi yo cha cuenda maa Sutu Mañi yo cuví chí ra. Ta tyicuan ri saha ndo ñáyiví chí yañi yo cha iyó tari caa cuhva iyó ra. ³⁰ Vatyi cha yatyin maa cha cuví ra cha cuenda cha sacuví ra tyiño ra Cristo. Soco ña yuhví ra vasi cuví ra cha cuenda cha tyinyeé ra chii. Vatyi maa ndo ña cuví quichi tyinyee ndo chii vatyi cañi xaan nyicu ndo.

3

Nu sañahá ra Pablo yoso caa ndu ndii yo nuu Nyoo

¹ Ta vityin yañi, cusñi iñi ndo chihin Sutu Mañi yo. Cha cuenda chí yuhu ñahri sahá cha cha yaha tyai tuhun ihyá chí ndo, cutyaa tiqui inga chaha. Vatyi cha vaha chí maa ndo cuví. ² Saha ndo cuenda chí ndo chihin ra cha quíñi iyó chiña. Nyacuví ra cuhva cuñí ra ña vaha. Vatyi catyí ra tyi cuñí chí sacuvi yo costumbre circuncisión ta cacu yo. ³ Soco yóo noo circuncisión cha ndicha savahá Nyoo chí yo. Vatyi maa yo sacahnú yo chí ra chihin Tatyí li ra cha ñohó añima yo. Ta cusñi cuñi yo vatyi cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre. ⁴ Tyehe ta cuví cacu yo chihin cha sacuví yo, yuhu vihi ca caquí cha nuu tandíhi ñu sacuví tyicuan caa. ⁵ Vatyi uña quivi ta saha ñu circuncidar chii. Vatyi tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siñ ri quichahá xain ley chahnu quívi cuan, vatyi fariseo cuví. ⁶ Ta cha cuenda cha cuñi quichahí ley, ta chican nyicon xain chí ñu yihí cuenda ra Cristo. Ta ña cuñi nyehi chí ñu. Ta quichahí tandíhi maa ley chahnu, vatyi nducu xain cuhva quichahí nu cahán ley cuan. ⁷ Soco tandíhi cha cuñi mai vatyi vale xaan quívi cuan, vityin ña vale ca cuan. Vatyi maa ra Cristo cuví ra itá iñi. ⁸ Ta siñ ri tandíhi cha sacuví, chitó mai vatyi ña vale cha cuenda cha chicohón nui chí ra Cristo Jesús, Sutu Mañi yuhu. Vatyi yucuan cuví cha tyayii xaan ca. Ta cha cuenda ra Cristo tandíhi cha sacuví ta ityi chata ca cuví chí noo cha ñima ri tuhun vityin. Yucuan chaha sandoi iñi chiyo xiin tandíhi cuan. Vatyi cuñí cohon nuu que chí ra Cristo. ⁹ Ta cha cuñí yuhu nacu iñi ri que

chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyi chinó iñi tuhun cahán ra, vatyi sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo. ¹⁰Cha cohon nuu que chi ra Cristo yucuan cuví cha cuñí. Nyoo sanandotó ra chi ra Cristo chihin tunyee iñi ra. Ta cuñí tyi coo ca tunyee iñi cuan chii. Ta cuñí cunyeyí tindoho cha tahán chi nyehí. Ta cuñí cha cuví tandihí cha ña vaha cha cuñí coño ñuhi, tari chihí ra Cristo cha catyi cuatyí yo. ¹¹Vatyi nanducú xain cuhva cha cunandote noo ñayiví chaa chihin Nyoo nya andiví.

Cuhun ca yo ityi nuu ca chihin Nyoo

¹²Ñima tyi catyí chi ndo tyi ñahri ca cha cumañí chii, ta vaha xain. Soco cuahin ityi nuu ca. Vatyi cuñí naquehin cha chahá ra Cristo chii. Vatyi xihna ca maa ra naxita ra chii ityi ra. ¹³Yañi, ña catyí chi ndo tyi cha ñihí tandihí cha vaha cuan. Soco sanaf iñi cha quichi ityi chata. Ta sañihí cuhin ityi nuu ca. ¹⁴Tacuhva tyi chaí nu nyaá cha tahán chi chii. Vatyi caná Nyoo chi yo nya andiví. Vatyi cunaquehen yo cha catyí ra chi yo vatyi cuhva ra cha cuenda cha iñi ri cuví yo chihin ra Cristo Jesús.

¹⁵Tyehe caa tahán chi caca xiñi tandihí yo cha ñihi nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñí iñi ndo. ¹⁶Soco noo ri tyi cuñí chi cha quichahá vaha yo tuhun cha cha yaha sacotó Nyoo chi yo.

¹⁷Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo. ¹⁸Vatyi ticuítí chaha catyí chi ndo, saha ndo cuenda chi ra cuendu. Ta vityin catyí tiquí chi ndo inga chaha chihin cha chaquí cha cuihya iñi, vatyi cuaha xaan ra xaan iñi chi ra Cristo. Vatyi catyí ra tyi noo cha ña ñiñi xaan cuví cha chihí ra Cristo nu cruzi. ¹⁹Soco quiví quichi tucu ra Cristo, cuhun coyo ra cuan anyaya. Vatyi sacuví ra cuhva cuñí coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayiví ri. ²⁰Soco yoo nya andiví nyaá ñuu yo. Ta suri ityi cuan nyatú yo chi Sutu Mañi yo Jesucristo, ra sacacú chi yo. ²¹Ta cuquehen ra coño ñuhu pehe yo. Ta cusananduvi ra chi yo

tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihí, cusacuvi ra tyicuan caa.

4

Tyicuan ri na cusii cuñi yo chihin Sutu Mañi yo

¹Yañi, cuñí chi ndo. Ta cuñí xain nyehi chi ndo. Ta sii xaan cuñí chihin ndo. Ta chité tyi ña cahán cahi tuhun Nyoo chihin ndo. Vatyi ní xaan iñi ndo nyicón ndo chi ra. Na cuinyaña ca ndo chi Nyoo chihin cha ní iñi ndo.

²Ta vityin chiquén chi cu Evodia, ta chi cu Síntique, nanduvaha coo ñu chihin tahan ñu. Ta na coo ñu tari cha cuhu ñu cuenda Sutu Mañi yo. ³Yoho, yañi, ní iñun sahá tyiñon chihin, ta chiquén chuun na tyinyeun chi ñu tahan yo ihya. Vatyi tyinyee xaan ñu chii chihin cha sacotó ñu tuhun Nyoo cha cacu añaime yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andiví.

⁴Ta tyicuan ri maa cusii iñi ndo chihin Sutu Mañi yo. Ta catyí tiquí chi ndo inga chaha, na cusii iñi ndo chihin ra. ⁵Ta tandihí ñáyiví na nyehe ñu chi nyoho vatyi ndicha noo ñáyiví vaha cuví ndo. Ta ñicohon iñi ndo vatyi cha nyaña yatyin quiví quichi Sutu Mañi yo.

⁶Ta ma ndahvi xaan cuñi ndo ñáá ndihí cha cuví chi ndo. Nyita ri ñacatyí ndo chi Nyoo ñáá ndihí cha cuví chi ndo. Ta cacan tahvi ndo chi ra ñáá ndihí cha chihuhú chi ndo. Ta yaha cuan ta nacuhva ndo tyahvi nyoo chi ra. ⁷Ta cha sacuví ndo tyehe caa, Nyoo cuhva ra cha taxi ri coo añaime ndo. Ta cahnu xaan ca cha vaha cuví cuan. Ta ni noo ñáyiví ta ña cuví cutuñi iñi ñu yoso cuhva cha cahnu cuan. Ta cha taxi maa Nyoo cusaha cumi añaime ndo ta cha chiñi tuñi xiñi ndo. Vatyi iñi ri cuví ndo chihin ra Cristo Jesús.

Na caca xiñi yo maa maa ri cha vaha

⁸Yañi, nu ndihí tuhun caca xiñi ndo maa ri cha ndicha vaha, cha cachi iyó, cha ndoo iyó, cha ndii, cha ñahri cha quíñi caa, cha tyaquí, cha vaha. Caca xiñi ndo maa maa ri maa cha vaha tacuhva cuví sacahnu yo chi Nyoo.

⁹ Sacuvi ndo cha sañahĩ chi ndo. Tuhun cha chiñĩ ndo cahĩn, cha nyehe ndo chinyacuvi, sacuvi ndo. Ta Nyoo ra chahá cha taxi coo añima yo, cucunyaa ra chihin ndo.

Tyinyeé ñu Filipos chi ra Pablo chihin cha iyó chí ñu

¹⁰ Sii xaan cuñí. Ta sacahní chi Sutu Mañi yo cha cuenda cha tyinyeé ndo chii inga chaha. Ta chité vatyí tyicuan ri cuñí ndo tyinyeé ndo chii. Soco ña chahá chi cuhva chi ndo. ¹¹ Ñima tyi catyí chi ndo tyehe caa ta cuñí ndo tyi iyó cha chiñuhú chii, vatyí yuhu cha cutuhve cha cusii cuñí chihin ñáá ri cha iyó chi. ¹² Vatyí yuhu chité yoso caa coo ndahvi ta chité yoso caa coo tyayii. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha. ¹³ Tandihĩ ta cuví chasahí vatyí maa ra Cristo cuví ra tyineé chii. ¹⁴ Soco nyoho yañi vaha xaan cha tyinyeé ndo chii chihin tindoho cha nyehé xain.

¹⁵ Cha chitó nyoho ñu Filipos yoso caa cuvĩ quivĩ quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyeé ndo chii chihin xuhun, vatyí vaha xaan cuñí ndo cha cahín tuhun Nyoo chihin ndo. ¹⁶ Ta siin ri cha ni ri ca cha chinyai Tesalónica, cuaha ri chaha tyinyeé ndo chii. ¹⁷ Ñima cha chicí xiñi cha cuenda cha cuhva ca ndo chii, soco cha cuñí vatyí nyoho coo ca cha vaha chi ndo nuu Nyoo. ¹⁸ Ta vityin cuhva, ñahri cha cumañí chii. Nyacua ndoo ca cha sacuhun ndo chii chihin ra Epafrodito. Ta cha chahá ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra. ¹⁹ Ta Nyoo cuhva ra tandihĩ cha chiñuhú chi ndo. Cha cuenda ra Cristo cucuhva ra tandihĩ cha vaha cha tyayii cha cumí ra nya andiví. ²⁰ Chi Nyoo Sutu yo na sacahnu yo tyicuan ri maa. Ta na cuví chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihĩ ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya. ²² Ta ñáyiví cha nyicú vehe ra nyacá ñaha ñuu Roma ihya, ta tandihĩ ca ñu yihí cuenda Nyoo ñuu ihya chahá ñu nocumí chi ndo.

²³ Ta na nasoco maa Sutu Mañi yo Jesusucristo chi tandihĩ ndo. Ta na cuvi chi tyicuan caa.

Carta Cha Sacuhun Ra Apóstol Pablo Chi ñáyivi ñuu

Colosas Cha Yihí Cuenda Nyoo

*Nu sacuhún ra Pablo noo tutu chi ñáyivi
ñuu Colosas cha yihí cuenda Nyoo*

^{1,2} Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo aña ndo.

*Nu chicán tahvi ra Pablo chaha ñu yihí
cuenda Nyoo ñuu Colosas*

³ Tyicuan ri cha chicán tahvi ndi chaha ndo. Ta nacuhvá ndi tyahví nyoo chi Nyoo Sutu Sutu Mañi yo Jesucristo cha cuenda ndo. ⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra. ⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andiví. Nya quívi chihí ndo tuhun Nyoo cha ndicha vaha, quihí iñi ndo vatyí sacacú ra Cristo aña ndo. ⁶ Ta suri maa tuhun ra Cristo cha chahan ra Epafra chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chi ñu chi Nyoo, tari nacuhva cuenda nyoho chi ndo ñandihí. Ta cuhva cha chihí ndo tuhun ra Cristo, ta chitó ndo vatyí ndicha vaha cha cuñí Nyoo chi yo. ⁷ Ican ihya sañahá yañi yo ra Epafra chi ndo. Vatyí iin ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo. ⁸ Maa ra sacotó tuhun ndo chi ndi, vatyí cuñí xaan ndo chi tahan ndo. Vatyí maa Tatyí li Nyoo chahá cha vaha coo aña ndo.

⁹ Yucuan chaha nyacua nya quívi chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chi Nyoo nacuhva ra cha chihí tuñi ra chi ndo cha cuenda Tatyí li ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo. ¹⁰ Tyicuan caa ta cuví coo ndo tari cuhva tahanan chi coo ñu yihí cuenda Nyoo. Ta na sacuvi ndo tari

cuhva cuñí maa ra. Tacuhva sacuvi ndo tandihí nuu cha vaha ta cohon nuu vaha ca ndo chi ra. ¹¹ Ta chicán tucu ndi vatyí na sandunee ca ra chi ndo chihin tunyee iñi cahnu ra vatyí cuví cunye ndo tandihí cuí chihin cha cama iñi ndo. ¹² Ta chihin cha sií cuñí ndo, ta nacuhvá ndo tyahví nyoo chi Nyoo Sutu yo, vatyí chahá ra cha coo ndo noo ñáyivi chaa. Vatyí natavá ra chi ndo nu quíni caa, ta nanyitá ndo nu ndichin nu nyacá ñaha ra chi tandihí ñu yihí cuenda ra. Ta cuhva ra tandihí cha vaha cha tahanan chi chi ñu yihí cuenda ra. ¹³ Nyoo tavá ra chi yo nu ñaa iñi ta nacuhvá cuenda ra chi yo chi ra Cristo vatyí cunyaca ñaha ra chi yo. Vatyí ican ra Cristo cuví Sehe Nyoo. Ta cuñí xaan Nyoo chi ra. ¹⁴ Nasatá Nyoo chi yo chihin ñihí ra Cristo ta sahá ra tucahnu iñi cuatyí yo.

*Nduvahá iyó yo chihin Nyoo cha cuenda
cha chihí ra Cristo cha catyi cuatyí yo*

¹⁵ Nyoo, ña nyehé yo chi ra. Soco nanduví ra ñáyivi tacuhva cuví cohon nuu yo chi ra. Ta ican ra cuví Cristo Sehe Nyoo. Nya ta ni cumañi ca chingo ñáyivi ta cha iyó maa ra Cristo. ¹⁶ Ta Nyoo chahá ra tyi savahá maa ra Cristo tandihí cha iyo andiví ta siquí ñuhu ñáyivi. Ta savahá ra cha cuví nyehe yo ta cha ña cuví nyehe yo. Savahá ra ángel. Ta savahá ra chi ra ña vaha ta chi tatyí ña vaha ñandihí. Ta tandihí cha nyacá ñaha siquí ñuhu ñáyivi ihya, maa ra savahá. Ta tandihí ihya chingo chi tacuhva cotyiño ra yoso cuhva cuñí maa ra. ¹⁷ Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savahá ra. ¹⁸ Ta maa yo cha yihí yo cuenda ra Cristo, iin ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chi yo. Ta ican ra cuví cha nandotó cha xihna ca. Yucuan chaha cuví ra nuu chi tandihí cha iyó. ¹⁹ Vatyí maa Nyoo cuñí ra tyi coo tandihí tunyee iñi ra chi ra Cristo. ²⁰ Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chati ñihí ra nu cruzi. Vatyí cuñí ra cha nicoó vaha tandihí cha iyó siquí ñuhu ñáyivi ta andiví chihin ra.

²¹ Ta nu quichí chi, xaan cuví iñi ndo chi Nyoo cuhva cha chihá xiñi ndo cha cuenda

cha ña vaha cha chinyacuví ndo. ²² Soco Nyoo sanicoq vaha ra chi ndo chihin ra vatyi tachí ra chi Sehe ra, ra Cristo vatyi quichí cuví ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyi cuhva cuenda ra chi ndo chi Nyoo, soco ñahri ca cuatyí ndo. ²³ Yucuan chaha cuñí chi vatyi sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chiñí ndo tyi cusacacu ra añima ndo. Ican tuhun ihya, cuví cha cacahán ra nicacahnu ñayiví. Ta sacuví Nyoo vatyi yuhu ra Pablo tyinyeí cahín tuhun ihya chihin ñayiví.

Nu catyí ra Pablo vatyi nyaá siquí ra cha sañahá ra tuhun ra Cristo tandihí ri vehe ñuhu

²⁴ Vityin cusí cuñí cha cuenda cha nyehi tindoho chihin coño ñuhi cha catyí ndo. Vatyi cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra. ²⁵ Yuhu cuví noo ra cahán tuhun ra Cristo vatyi tyicuan caa tyinyeí chi tandihí ñu yihí cuenda ra. Vatyi maa Nyoo catyí ra vatyi cahin tandihí tuhun ra cha cuenda cha vaha chi ndo. ²⁶ Sañahí tuhun cha ñohó xehe nya ta tyembu chahnu, nya ta ni cumañi ca chino ñayiví. Nyoo chicumi xehe ra. Soco vityin cuñí ra cha coto tandihí cuii maa ñu yihí cuenda ra. ²⁷ Ta chi ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyi ra Cristo ñohó ra añima ndo cha yihí ndo cuenda ra. Ta cha cuenda maa ra cuñihí ndo gloria nu cunyaa yo chihin Nyoo.

²⁸ Tuhun maa ra Cristo cahán ndi. Ta chahá ndi tuhun chi tandihí ñayiví. Ta sañahá ndi chi ñu tandihí cha chiñi tuñi, tacuhva cuahnu ñu ta nyacua nya cha ñahri ca cumañi chi ñu cha iñi ri cuví ñu chihin ra Cristo. ²⁹ Yucuan chaha tyi ní iñi sahá tyiñe chihin tunyee iñi ra Cristo ta ñihi xaan chotyíñó tunyee iñi cuan chii.

2

¹ Vatyi cuñí cha coto ndo vatyi chicá xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu Laodicea, ta tandihí inga ñu cha ta nyehe ca chii. ² Chiquén chi Nyoo na cuní ca iñi ndo, ta cu iñi ri ndo chihin cha cuñí ndo

chi tahan ndo. Ta cutuñi vaha ca iñi ndo yoso caa cohon nuu ca ndo chi ra Cristo. Vatyi ican ra cuví tuhun cumí xehe Nyoo ta cha naha. Soco vityin sacotó ra chi yo tuhun ihya. ³ Maa ra Cristo chahá ra tandihí cha vaha ta cha chiñi tuñi chi yo. Tatu ñohó nuu yo chi ra Cristo, ñohó nuu yo chi Nyoo. ⁴ Catyí chi ndo tyehe caa tacuhva cha ma sandavi ñaha ñáyiví chi ndo chihin tuhun tyaquí. ⁵ Vasi ña nyaí chihin ndo, soco cohon iñi ndo vatyi ñohó iñi tuhun ndo. Ta sii cuñí nyehi chi ndo. Vatyi vaha xaan cuhva cuahán iyó ndo. Ta níi xaan iñi ndo cuahan ndo chata ra Cristo.

⁶ Yucuan chaha tari chinó iñi ndo chi noo tuhun ri maa ra Cristo quiví nañihí ndo chi ra, tyicuan caa cuñí tucu chi coo ndo ta iñi ri cuví ndo chihin ra. ⁷ Ta cuinyañaa ca ndo chi ra. Ta quihí vaha yoho ndo chihin ra. Ta sani ca ndo iñi ndo chihin cha chino iñi ndo, tari cuhva sañaha ñu chi ndo. Ta nyita ri nacuhvá ndo tyahvi nyoo chi Nyoo.

Ñayiví chaa cha chahá ra Cristo chi yo

⁸ Saha ndo cuenda vatyi iyó ñáyiví cuñí ñu sandavi ñaha ñu chi ndo chihin tuhun cha ndichí ri maa xiñi ñáyiví, tuhun cha ña ndicha. Vatyi ñima chi ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chi cha nyacá ñaha siquí ñuhu ñayiví ihya.

⁹ Soco cha sañahá ñu cuan, ñima cha ndicha cuví. Vatyi Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyi maa ra Cristo cuví Nyoo.

¹⁰ Ta cha nyaá ra Cristo chihin ndo, tyitú añima ndo chihin Nyoo. Ta ra Cristo ican ra cuví ra nuu chi tandihí ángel ta tatyí cuihna cha nyacá ñaha. ¹¹ Quiví nañihí ndo chi ra Cristo, quihví ra añima ndo. Ña nduvahá ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyo tandihí cha ña vaha cha tuhva ndo sacuví. Saha ra circuncidar añima ndo cuví cuan soco ñima chihin ndaha ra. ¹² Quiví condutya ndo chichi ndutya, tari quiví chihí ndo chihin ra Cristo cuví cuan. Tyicuan ta quitá ndo chichi ndutya, tari quiví nandotó ndo chihin ra Cristo, vatyi chinó iñi ndo tyi Nyoo chihin tunyee iñi ra sanandotó ra chi ra Jesús. ¹³ Nu quichí chi ña ñohó nuu ndo chi Nyoo. Vatyi sacuví xaan ndo cuatyí. Ta cuví ndo tari noo ñáyiví chihí chihin cuatyí cuan. Ta ña

sahá ñu circuncidar chi ndo. Soco vityin Nyoo sahá ra ticahnu iñi tandihí cuatyí ndo. Ta chahá ra cha coo ndo noo ñayiví chaa chihin cha iñ ri cuví ndo chihin ra Cristo. ¹⁴Sanatuví ley chahnu cuan cuatyí yo. Ta catyí chi tyi tahán chi cuhun yo anyaya vatyí ña quichahá yo chi chí. Soco ley cuan Nyoo sacuachiyo ra quívi chihí ra Cristo nu cruzi. ¹⁵Quívi cha chihí ra nu cruzi cuví chasaha ra chí cuihna ta chí tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyí cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶Yucuan chaha ña tahán chi quihí yuhu ñáyiví chi yo cha cuenda cha chachí yo o cha chihí yo, o cha cuenda cha ña naquehén vaha yo noo quívi vico. Cuví ri quívi cha natyacu yoo, o cuví ri quívi nyitatu yo. ¹⁷Tandihí cuan cuví chí tari noo xiñahñu ri cha cuquichi ityi nuu. Ta vityin cha quichi ra Cristo ta ican ra cuví ra cha ndicha vaha sacacu chí yo. ¹⁸Ma cuhva ndo cha casi ñáyiví nu naquehen ndo noo cha cuacuhva Nyoo chí ndo. Maa ñu ndahvi sahá ñu chí ñu soco ña ndicha ñu, ta sacahnú ñu chí ángel. Ta sahá ñu tyi ñyehe ñu cha sañaha Nyoo chí ñu. Ta cahnu sahá ñu chí ñu chihin cha chicá xiñi ñu tuhun ñáyiví ihyá. ¹⁹Ñu cuan ñima chí ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chí ra, maa ra cuví nuu chí yo. Ta sandu iñ ri ra chí yo chihin ra. Ta sacahnú ca ra chí yo chihin tunyee iñi ra tari cuhva cuñi maa Nyoo.

²⁰Tari quívi chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñáyiví ihyá chí ndo. ¿Ñáá tuhun cha iyó ca ndo tari caa iyó ñáyiví cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan. ²¹Vatyí catyí ñu chí ndo tyehe caa: “Ma tiun ihyá chihin ndahun, ma cachun ihyá. Coto ma cacun”, catyí ñu. ²²¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñáyiví cuví. Vatyí nyayu noo cha iñ yaha ri cuví. Ma tiví ndo nuu Nyoo cha cuenda cha cachi ndo. ²³Ndicha vatyí costumbre ihyá tari maa cha vaha cuví, cuñi maa ñáyiví.

Vatyí sanyehé ñu tindoho coño ñuhu ñu. Ta cuñi ñu tyi vaha sacahnú ñu chí Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quíni caa cha cuñi coño ñuhu ñu.

3

¹Chahá Nyoo noo ñáyiví chaa chí yo vatyí nandotó ra Cristo. Ta vityin nyaá ra chíyo vaha Nyoo andiví. Yucuan chaha na nducu yo cha vaha cha chahá Nyoo chí yo nya andiví. ²Caca xiñi ndo cha vaha cha chahá Nyoo chí yo nya andiví. Ta ma caca xaan xiñi ndo tuhun cha iyó siquí ñuhu ñáyiví ihyá. ³Vatyí nyoho cha yaha chihí ndo in caa ri chihin ra Cristo. Ta vityin iyó ndo iñ ri chihin ra chihin Nyoo. ⁴Ta quívi quichi tucu ra Cristo, ra chahá ñáyiví chaa cha iyó ndo, tyicuan ta cunyehe ñáyiví tyi cahnu xaan ca ra cuví maa ra. Ta cunanyehe tucu ñu chí nyoho in caa ri chihin ra. Ta cutahan tucu maa ndo quichi ndo nu tyaquí cuan chihin ra.

Yoso caa chíyo yo costumbre nu quichi chí ta yoso caa cuñi chí coo yo chihin Nyoo vityin

⁵Yucuan chaha cuñi chí cha nanducú yo cuhva na cúvi tandihí cha quíni caa cha quichí cuví iñi coño ñuhu yo. Ta ni noo yo ta ma coo ri maa yo chihin ñusihi o chihin rayii. Ta ma sacuví yo cha ña vaha cha cuñi coño ñuhu yo, o inga cha ña vaha. Ta ma nyiyo iñi yo cha tyayii. Vatyí tari cha sacahnú yo xitohyo, o tavá xiin yo chí Nyoo cuví cuan. ⁶Cha cuenda tandihí cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chí ñu vatyí sacuví ñu cha ña vaha cuan. ⁷Ta suri tyehe caa chinyacuví tucu maa ndo quívi ña ñohó nuu ndo chí Nyoo. ⁸Soco vityin ma sacuví ca yo tandihí cha ña vaha cuan. Ma cuxaan ca yo. Ma cahan uhvi ca yo chí tahan yo. Ta ma cahan cuehe yo chí tahan yo. Ta ma cahan ca yo cha quíni caa. Ma quita tuhun quíni caa yuhu yo. ⁹Ma ñii ca yo cuendu. Vatyí quívi ta ityi chata ca, quívi ña ñohó nuu yo chí Nyoo, tyicuan caa chinyacuví yo. Soco vityin ña nyacá ñaha ca tandihí cuan chí yo. ¹⁰Vatyí ñáyiví cha iyó yo vityin, ñáyiví chaa cuví. Noo ñáyiví chaa nanduví yo. Ta nduchaá ca yo tari cuhva caá Nyoo, ra savahá chí yo, nyacua nya cohon nuu vaha yo chí ra.

¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuví yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña niñi xaan ca tuhun cuan. Niñi ca cha iin ri cuví tandihi yo chihin ra Cristo, vatyi maa ra cuví tandihi.

¹² Nyoo cuñí ra chi yo ta nacachi vaha ra chi yo vatyi cuví yo ñáyivi chi ra. Yucuan chaha na coo yo ñáyivi chaa tari tahán chi coo ñu yihí cuenda ra. Na cundahvi cuñi yo nyehé yo chi tahan yo. Na cuví yo ñáyivi vaha. Ndahvi saha yo chi yo. Na cumasu iñi yo. Cunyee yo tandihi tisihi tindoho chihin cha sií cuñí yo. ¹³ Na cucama iñi yo chihin noo noo tahan yo. Ta saha yo ticahnu iñi chi tahan yo tatu ñáa cha sacuví ñu chi yo. Tari sahá ra Cristo ticahnu iñi chi yo, tyicuan caa cuñí chi cha sacuví tucu maa yo. ¹⁴ Ta siin ri cuñi yo chi tahan yo. Ta nducu yo cuhva coo vaha yo chihin ñu. Vatyi ican cuan cuví cha sacuví iin ri chi yo. Ta ican cuan cuví cha niñi ca. ¹⁵ Ta cha taxi maa Nyoo na coo añima yo. Vatyi ra Cristo nyacá ñaha chi yo. Nyoo nacana ra chi yo vatyi tacuhva iin ri cuví yo cuenda ra Cristo. Ta tyicuan ri nacuhva yo tyahvi nyoo chi ra cha cuenda ihya.

¹⁶ Ta tuhun ra Cristo na sacutu añima yo. Sañaha ca yo tuhun ra chi tahan yo. Ta sañi ca yo iñi tahan yo chihin cha chiñi tuñi Nyoo. Sacahnu yo chi Nyoo chihin cha cata yo yaa, o salmo. Ta cata yo yaa cha chahá maa Tatyí li Nyoo chi yo chihin cha ñi añima yo. Ta tyicuan ri nacuhva yo tyahvi nyoo chi Nyoo. ¹⁷ Tatu ñáa tyiño sahá yo, o ñáa tuhun cahán yo, sacuví yo soco tari cha tyi tyiño maa Sutu Mañi yo Jesús sacuví yo. Ta nacuhva yo tyahvi nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyivi

¹⁸ Nyoho cha iyó yii ndo, cuhva ndo cha cunyaca ñaha yii ndo chi ndo. Vatyi yucuan cuhva tahán chi coo ndo, vatyi yihí ndo cuenda Sutu Mañi yo. ¹⁹ Ta nyoho rayii, cuñi ndo chi ñasihi ndo. Ta ma nduxaan ndo chi ña. ²⁰ Nyoho cha cuví ndo sehe quichaha ndo chi sutu ndo ta chi sihi ndo. Vatyi yucuan cuhva cuñí maa Sutu Mañi yo. ²¹ Nyoho cha cuví ndo sutu ta sihi, ma

cahan xaan ndo chi sehe ndo, vatyi coto nducuihya iñi chi. ²² Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyi vaha cuñí ra nyehé ra chi ndo. Soco sacuví ndo chihin cha tandihi añima ndo. Vasi ña nyehé ra. Vatyi Nyoo nyehé ra chi ndo. ²³ Tandihí ri tyiño sacuví yo, sacuví yo chihin cha ñi iñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi. ²⁴ Vatyi chitó yo vatyi maa Sutu Mañi yo cucuhva ra noo cha tahán chi chi yo vatyi sacuví yo tyiño nuu ra Cristo. Vatyi ican maa ra cuví chitoho yo cha ndicha vaha. ²⁵ Soco tatu sacuví yo cha ña vaha, Nyoo cutachi tuñi ra chi yo cha cuenda cha ña vaha cha sacuví yo. Ta tandihí yo iin ri ñáyivi cuví yo nuu ra. Vatyi Nyoo ña cachi ra ñáyivi cuñí ra.

4

¹ Nyoho cha iyó musu ndo, cuñí chi tyi vaha ñáyivi cuví ndo chihin musu ndo. Nícohon iñi ndo vatyi iyó tucu noo chitoho maa ndo nya andivi. Ta maa ra nyehé ra chi ndo.

² Ta tyicuan ri cacan tahvi ndo chihin cha ñi iñi ndo. Ta nacuhva yo tyahvi nyoo chi Nyoo cha cuenda tandihí maa. ³ Cacan tahvi ndo chaha ndi, vatyi nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyi tari noo tuhun xehe cuví tuhun ra Cristo chi ñu, vatyi ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa. ⁴ Cacan tahvi ndo chahi tacuhva cuví sañahí chi ñu yoso cuhva cuví cutuñi vaha iñi ñu tuhun ra Cristo, tari cuhva tahán chi tyi sacuví.

⁵ Cachi coo ndo chihin ñu ña ñohó nuu chi Nyoo. Vatyi tyicuan caa ta cuví cahan ndo tuhun Nyoo chihin ñu. ⁶ Cuñí chi vatyi ndatuhún yo maa maa ri cha vaha, ta cha cachi, (ta cha tahán iñi ñáyivi) tari tahán chi cunyacuví yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáa noo tuhun ndacá tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

⁷ Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra

chi ndo yoso caa cuahán nyaí. ⁸ Yucuan chaha tachí chi ra nu nyicu ndo vatyí nacatyí ra chi ndo yoso caa nyicú ndi. Ta sanduní ca ra íñi ndo. ⁹ Ta chihin ra Tíquico vachi tucu ra Onésimo, yañi yo. Ta nñi íñi ra. Ta cuñí yo chi ra. Cuví ra noo ra ñuu ndo. Maa ra cunanacatyí ra chi ndo tandihí cha cuví nu nyai.

¹⁰ Ra Aristarco, ra tahin cha ñohó ndi vehe caa, saquichí ra nocumi chi ndo. Ta saquichí tucu ra Marcos, yañi cunducuatyi ra Bernabé, nocumi chi ndo. Ta cha sacote chi ndo tuhun ra Marcos. Tatu chaa ra nu nyicu ndo, vaha cahan ndo chihin ra.

¹¹ Vachi tucu nocumi chi ndo sahá ra Jesús, ra cha nañi tucu Justo. Ta chichi cha tandihí ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduní xaan ca íñi sahá ra. ¹² Vachi tucu nocumi chi ndo sahá ra Epafras, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuvi sacuvi ndo cuhva cuñí ra. ¹³ Ta yuhu cuví cha ndaa vatyí ra Epafras chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis. ¹⁴ Vachi tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandihí.

¹⁵ Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfás ta chi tandihí ñu yihí cuenda Nyoo cha ndu íñi ri vehe ña. ¹⁶ Tatu yaha sacuahá ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuahá tucu maa ñu. Ta sacuahá tucu maa ndo carta cha sacuhin chi ñu Laodicea. ¹⁷ Catyi ndo chi ra Arquipo vatyí na sacuvi vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumi ihya chi ndo. Ta ma naa íñi ndo cha ñohí vehe caa. Ta Nyoo na nasoco ra chi ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi ñáyivi

Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu yihí cuenda Nyoo

¹Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí iin ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó iñi ñu Tesalónica cuan chi Nyoo

²Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo. ³Tyicuan ri yihí iñi ndi tuhun ndo nuu Nyoo Sutu yo ta nicohón iñi ndi vatyí nñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha nñi iñi ndo yihí iñi ndo cha cuañihi ndo cha cuenda ra Jesucristo. ⁴Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chi ndo. ⁵Vatyí quívi cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí li chi ndi, ta cuaha xaan sacuvi ra chihin tunyee iñi ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quívi chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natñi cuenda ndo tuhun Nyoo, vasi cuaha tindoho nyehe ndo cha cuenda cuan. Soco sií xaan cuñí ndo vatyí maa Tatyí li chahá tusi iñi cuan chi ndo. ⁷Ta cha tyicuan caa, tyinyee xaan ndo chi tandihí ñu yihí cuenda Nyoo nicahnu ityi Macedonia chiña ta nicahnu ityi Acaya ihya ñandihí, vatyí nyehé ñu cuhva iyó ndo chihin Nyoo. ⁸Ñima ityi Macedonia ta Acaya ri, soco tandihí ri ityi nu chihí ñu tuhun ndo chitó

ñu tuhun Sutu Mañi yo ta chitó ñu vatyí chinó xaan iñi ndo chi Nyoo. Ta yucuan chaha nyacua ña ñiñi ca cha cahan ndi tuhun Nyoo chihin ñu. ⁹Vatyí suri maa ñu nacatyí ñu chi ndi yoso caa cha vaha xaan tiin cuenda ndo chi ndi quívi cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha. ¹⁰Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andivi. Ican ra cuví ra cha sanandotó Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quívi sacutuñi ra chi ñáyivi.

2

Tyiño sahá ra Pablo ñuu Tesalónica

¹Nyoho yañi, chitó ndo vatyí ñima cha caha ri cahan ndi chicahan ndi tuhun Nyoo ñuu ndo. ²Vatyí chitó ndo yoso caa nyehe ndi tindoho sahá ñáyivi ñuu Filipo cha ni cumañi ca chaá ndi ñuu ndo. Ta vasi nyehe xaan ndi tindoho ñuu cuan soco quívi chaá ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chi ndi ta sacotó ndi chi ndo yoso caa sacacú ra añima yo. ³Vatyí tuhun cha chahá ndi chi ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chi ndo. ⁴Ñahri cha ña vaha cahan ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahan ndi tari cuhva tyatyíño ra chi ndi. Vatyí ña cuñí ndi cuvaha ndi nuu ñáyivi, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo. ⁵Ta nyoho chitó ndo vatyí ni noo chaha ña cahan ndi chihin tuhun tyaquí cha cuñí ndi sandavi ñaha ndi chi ndo. Ta ni ñima cha cuñí ndi saha ganaa ndi xuhun ta cahan ndi tuhun ihya chihin ndo. Nyoo cuví ra cha ndaa tyi ndicha cha cahín ihya. ⁶Ta ni noo chaha ña nanducu ndi cuhva cha sacahnu ñáyivi chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyi maa ra Cristo tachí ra chi ndi, soco ña cuñí ndi coso ndi siquí ndo cha tyicuan caa. ⁷Soco

cuñí ndi tyinyee ndi chi ndo. Tari noo sihi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo. ⁸Cuñí xaan ndi chi nyoho, ta cahvi iñi ndi vatyí ñima tuhun Nyoo ri cuhva ndi chi ndo, soco nyacua nya ñayivi ndi ñandihi, cha cuenda cha cuñí ndi chi ndo. ⁹Nyoho yañi, nicohón iñi ndo yoso caa sahá tyiño ndi quivi chinyicu ndi chihin ndo. Sahá tyiño ndi ñicahñu ta cha cuaa vatyí ña cuñí ndi coso ndi siqui ni noo ndo cha ni ri ca cha cahán ndi tuhun Nyoo chihin ndo.

¹⁰Ta nyoho cuví ndo cha ndaa, ta Nyoo ñandihi, vatyí maa ri cha vaha ta cha ndaa chinyacuví ndi quivi chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuví ndi, ta ña chahá ndi cuhva vatyí cahan ña vaha ndo siqui ndi. ¹¹Ta chitó tucu ndo yoso caa sanduní ndi iñi noo noo ndo chihin tuhun chahá ndi chi ndo. Sandunye ndi iñi ndo tari noo ra chihin sehe ra. ¹²Ta catyí ndi chi ndo nacachi coo ndo tari tahán chi coo ñu yihí cuenda Nyoo. Vatyí maa ra nacana chi ndo vatyí coo ndo nu nyacá ñaha ra, ta nyehe ndo cha tyaquí gloria ra.

¹³Yucuan chaha tyicuan ri nacuhvá ndi tyahví nyoo chí Nyoo, vatyí quivi chiñi ndo tuhun ra cha cahan ndi chihin ndo, natijn cuenda ndo vatyí nacoto ndo tyi tuhun Nyoo cuví ta ñima tuhun ñáyivi ri. Ta ndicha cha tuhun Nyoo cuví, vatyí sacuví chi vatyí chino iñi ndo chí Nyoo ta nasama ndo cuhva iyó ndo. ¹⁴Yaha cuan ta nyehe tucu maa ndo tindoho saha ñáyivi ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehé tucu ñu Israel ityi Judea cuan tindoho chí ñáyivi tahan yo cuenda ra Cristo cuan. ¹⁵Ta ícan ñu Israel cuan cachahñi chí Sutu Mañi yo Jesús tari cachahñi tucu ñu chí ra profeta, ra chahá cuenda tuhun cahán Nyoo ta ityi chata ca. Ñu Israel cuan tava ñehe ñu chí ndi. Ñima cuhva cuñí Nyoo iyó ñu. Ta tasi cuñí ñu nyehe ñu chí tandihi ñáyivi. ¹⁶Tatu cuñí ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndihi tuhun cutachi tuñi xaan Nyoo chí ñu.

Nu catyí ra Pablo vatyí cuñi ra cunyehe ra nu nyicú ñu Tesalónica inga chaha

¹⁷Yañi, cha yaha cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñi ndi cunyehe ndi nu nyicú ndo inga chaha. ¹⁸Ta nducu ndi cuhva cuhun ndi soco ña cuví. Ta yuhu ra Pablo ñandihi, cuaha xaan chaha nduquí cuhva cuhun ndi, soco tahan ri chaha cha cuñi ndi cuhun ndi ta ña chahá ra ña vaha. ¹⁹Soco tyóó chí ita iñi ndi? Ta tyóó chí cuenda cusí cuñí ndi, ta vaha cuñí ndi? ²⁰Atu ñima cha cuenda maa ndo cusí xaan cuñí ndi nuu Sutu Mañi yo Jesucristo quivi quichi ra inga chaha? ²⁰Vatyí cha cuenda cha vaha cuahan ndo chihin Nyoo ta nyehe yo tyi ña caha ri sahá tyiño ndi. Ta síi xaan cuñí ndi cha cuenda cuan.

3

¹Ta yucuan chaha ña cunyehe que cha ma cote yoso caa cuahan ndo chihin Nyoo. Ta natyaji iñi tyi ndoi ñuu Atenas. ²Ta tachi chí yañi yo ra Timoteo na cuhun ra cunyehe ra chí ndo. Maa ra sacuví ra tyiño nuu Nyoo vatyí iñi ri chihin ndi cahán ra tuhun yoso caa cacú aña yo sahá ra Cristo. Tachi ndi chí ra nu nyicú ndo na sanduní ca ra iñi ndo ta sandunye ca ra iñi ndo tacuhva vatyí chinó ca iñi ndo chí Nyoo. ³Tyicuan caa ta ni noo ndo ta ma ndu uvi iñi ndo cha cuenda cha nyehe ndo tindoho. Vatyí nyoho chitó ndo vatyí nyaá yo cha nyehe yo tindoho tyehé caa. ⁴Vatyí ta ninyaá ca ndi chihin ndo, catyí ndi chí ndo vatyí cha cuñi quichi quivi cha nyehe yo tindoho. Ta chitó vaha maa ndo tyi tyicuan caa cuví. ⁵Yucuan chaha ña cunyehe que cha cuñi cote tuhun ndo. Ta tachi tyiño chihin ra Timoteo na nyehe ra yoso caa cuhva cuahan chinó iñi ndo chí Nyoo. Vatyí yuhví coto sandavi ñaha cuihna chí ndo ta nandihvi tucu ndo nu quiñi caa inga chaha. Vatyí tu tyicuan caa, cucunaa tandihi tyiño saha ndi nu nyicú ndo.

⁶Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chí ndi vatyí ñi iñi ndo chinó iñi ndo chí Nyoo. Ta cuñi xaan ndo chí tahan ndo. Ta catyí ra tyi tyicuan ri nicohón iñi ndo chí ndi ta cuñi xaan ndo nyehe ndo chí ndi, tari nyuhu, cuñi tucu

maa ndi nyehe ndi chi ndo. ⁷Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñí ndi cha chitó ndi vatyi nyoho vaha chinó iñi ndo chi Nyoo ta ña sañá ndo chi ra. ⁸Tari quivi cha nduchaa ñáyivi ndi, cuñí maa ndi cuhva cha nacoto ndi vatyi nyoho ñihi cuahan ndo chihin Nyoo. ⁹Nyacua ña ñihí ndi cuhva nacuhva ndi tyahvi nyoo chi Nyoo cha cuenda ndo. Vatyi sií xaan cuñí ndi nuu Nyoo cha cuenda vatyi vaha cuahan ndo chihin ra. ¹⁰Chicán tahvi xaan ndi chi Nyoo ñicahñu ta cha cuaa, vatyi cuñí ndi cuhun ndi cunyehe maa ndi chi ndo. Tyicuan ta cuvi sandunanií ndi cha chinó iñi ndo.

¹¹Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cuhun ndi nu nyicú ndo. ¹²Ta na tyinyee ca Sutu Mañi yo Jesucristo chi ndo tacuhva cuñí ca ndo chi noo noo tahan ndo ta chi tandihi ñáyivi tari cuñí nyuhu chi nyoho. ¹³Tacuhva vatyi cuñí ca iñi ndo ta cunduvii ndihi añima ndo. Ta ma coo ca cuatyí ndo nuu Nyoo Sutu yo quiví quichi tucu Sutu Mañi yo Jesucristo chihin tandihi ca ñu yihí cuenda ra.

4

Cuhva cha tahán iñi Nyoo cha coo yo

¹Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quiví.

²Nyoho cha chitó ndo yoso caa chahá ndi cuhva chi ndo tari chahá tucu maa Sutu Mañi yo Jesús cuhva chi ndi. ³Cha cuñí Nyoo, ican cuví ihya: Cha nacuhva ndihi ndo chi ndo chi ra tacuhva sanduvii ndihi ra añima ndo. Ta ni noo ndo ta ma coo ndo chihin noo ñaha sihi o rayii tatu ñima ñasihi o yí ndo cuví. ⁴Ta tahan tahan ndo cuñí chi coto ndo yoso caa coo ndo chihin ñasihi ndo. Coo vii ndo chihin ña chihin cha cuñí ndo chi ña. ⁵Ñima chihin cha quichi cuvi iñi ndo cha quiñi caa tari nyacuví ñáyivi cha ña ñohó nuu chi Nyoo. ⁶Ta ni noo ndo ta ma sandavi ñaha ndo chi yañi ndo ta coo ndo chihin ñasihi ra. Vatyi Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyi ndi chi ndo. ⁷Vatyi Nyoo nacang ra chi yo

vatyi tacuhva sacuvi yo cuhva cuñí maa ra, ta ñima noo cuhva quiñi caa. ⁸Ta yucuan chaha yóó ñu cha ña cuñí tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyi suri maa Nyoo chahá ra Tatyí li ra chi ndo. ⁹Soco tuhun cha cuñí yo chi tahan yo, ña chihñuhú cha tyai nu tutu ihya tuhun cuan. Vatyi suri maa Nyoo cha sañaha ra chi ndo vatyi cuñi yo chi tahan yo cuenda Nyoo. ¹⁰Ta tyicuan caa cuñí ndo chi tandihi tahan yo nicahnu Macedonia chihña. Soco chacú ndahvi nuu ndo yañi, vatyi na cuñi ca ndo chi ñu noo noo quiví. ¹¹Nducu ndo cuhva coo vii ndo. Ta ma tyihi ndo chi ndo nu ña tahán chi, soco iin ri tyiño maa ndo caca xiñi ndo. Ta saha tyiño ndo chihin ndaha ndo tari cuhva catyi ndi chi ndo quiví cuan. ¹²Tyicuan caa sacuvi ndo tacuhva vatyi ñáyivi ña ñohó nuu Nyoo cuasaha ñu ñáyivi chi ndo. Ta ñahri cuacumañi chi ndo.

Yoso caa cucuvi quiví quichi Sutu Mañi yo Jesús inga chaha

¹³Yañi, ña cuñí ndi cha ma coto ndo ñáá cha cuví chi ñáyivi chihí, vatyi coto nducuihya iñi ndo tari nducuihyá iñi ñáyivi cha ma tahan chi nyehe chi Nyoo. ¹⁴Ta tari cha chinó iñi yo vatyi chihí ra Jesús ta nandoto ra, tyicuan caa chinó tucu iñi yo vatyi Nyoo cusanandoto ra chi ñu ndiyi cha chinó iñi chi ra.

¹⁵Yucuan chaha catyi ndi chi ndo tari sañaha Sutu Mañi yo chi ndi. Vatyi yóó cha nyitó yo nyacua nya quiví quichi ra, ñima xihna ca yo cuhun ican saha ñu cha yaha chihí. ¹⁶Vatyi suri maa Sutu Mañi yo cunoo xica ra andiví, ta cucana chaa ra vatyi maa ra cuví ra nyacá ñaha. Ta cucana chaa noo ra cuví nuu chi ángel. Ta cunativí trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto. ¹⁷Yaha cuan ta yóó cha nyitó ca yo cundaa xica yo iin ri chihin ñu nu vico, nu cunañilhi tahan yo chihin Sutu Mañi yo ityi andiví. Ta yucuan ta cucunyya yo chihin ra tyicuan ri maa. ¹⁸Yucuan chaha sanduní ndo iñi tahan ndo chihin tuhun ihya.

5

¹Soco ama o ñáá quiví cucuvi tuhun ihya, ña ñiñi cha cahin tuhun cuan chihin ndo yañi. ²Vatyi cha chitó vaha maa ndo vatyi

ma tuvi ri iñi yo ta cuchaa quivi quichi tucu Sutu Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi. ³ Vatyí quivi cha catyí ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacacu sehe, sana iñi ña ta quihvi cha uhvi chi ña. Ta tyicuan caa cucuvi chi ñáyivi quivi quichi Sutu Mañi yo, vatyí ma cuví cono ñu. ⁴ Soco nyoho yañi, ñima ca nu ñaa iñi nyicú ndo ta catyí ndo vatyí sana iñi ndo ta cuchaa chi quivi Sutu Mañi yo, tari sana iñi ñáyivi tatu quihvi ra suhu vehe ñu. ⁵ Vatyí tandihí yo chitó yo yoso caa tahán chi coo yo vatyí Nyoo sandundichin ra añaima yo, ta ña iyó ca yo nu ñaa iñi tari ñu ña ñohó nuu Nyoo. ⁶ Yucuan chaha ma cuví yo tari inga ñu cuan. Tari quivi cha quixí ñu vatyí ña quichahá ñu cha ndichi Sutu Mañi yo. Soco yoó cuatu tuhva yo ta cachi coo yo. ⁷ Vatyí ñu quixí, quixí ñu cha cha cuaa, ta ñu chihi xaan ndixi, chiñí ñu cha cha cuaa. ⁸ Soco yoó cha cuví yo ñu cuenda cha ñicahñu, nacachí coo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñi iñi yo chinó iñi yo chi Nyoo, ta chihin cha cuñí yo chi tandihí ñáyivi. Ta tari sindaro sahá cuenda ra xiñi ra chihin noo caa, tyicuan caa cuñí chi cha sahá yo cuenda chi yo chihin cha yihí iñi yo tyi cacu yo. ⁹ Vatyí Nyoo ña tyaa ra cuhva chi yo vatyí tachi tuñi ra chi yo, soco nacachí ra chi yo vatyí cacu yo cha cuenda Sutu Mañi yo Jesucristo. ¹⁰ Vatyí ra Jesucristo chihí ra cha cuenda yo vatyí tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihí yo coo yo ñin ri chihin ra. ¹¹ Yucuan chaha sandunñi ca ndo iñi tahan ndo ta sandunyeec ca ndo iñi ñu, tari cuhva cuahan nyacuví ndo vityin.

Nu chahá ra Pablo tuhun chi ñu

¹² Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo. ¹³ Cuñí chí cha saha xaan ndo ñáyivi chi ra chihin cha cuñí ndo chi ra. Vatyí sacuví ra tyiño Sutu Mañi yo. Ta vaha coo ndo chihin tahan ndo cuenda Nyoo.

¹⁴ Ta tyatyiné ndi chi ndo yañi, vatyí cuhva ndo tuhun chi ñu cha ña cuñí saha tyiño. Ta sandunñi ndo iñi ñu cha ña ñi ca iñi. Ta tyínyee ndo chi ñu vita cuñí vatyí ta chino vaha ca iñi ñu. Ta cucama iñi ndo chihin tandihí ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyivi.

¹⁶ Tyicuan ri cusii cuñi ndo. ¹⁷ Ta cacan tahvi ndo tyicuan ri maa. ¹⁸ Nacuhva ndo tyahvi nyoo chi Nyoo cha cuenda tandihí cha cuví. Vatyí ican ihya cuví cha cuñí Nyoo cha sacuví yo cha cuví yo ñu chinó iñi chí ra Cristo Jesús.

¹⁹ Ma ndahva ndo ñuhu Vatyí li cha nyaá añaima ndo. ²⁰ Ma cuacu nyaá ndo tuhun Nyoo cha cahán noo ra cahán tuhun chahá Nyoo. ²¹ Tñin cuenda ndo tandihí cha cahán ra. Ta naquehen ndo cha vaha. ²² Cuachiyo ndo nuu tandihí cha quíñi caa.

²³ Ta maa Nyoo ra iyó cha taxi ri chii, na sanduvii ca ra añaima ndo tacuhva vatyí ñin ri chí maa ra nacuhva cuenda ndo chí ndo. Ta na cocumi ra añaima ndo ta cha chiñi tuñi ndo ta coño ñuhu ndo tacuhva vatyí ma coo ca cuatyí ndo quivi quichi tucu Sutu Mañi yo Jesucristo. ²⁴ Ra cha nacachí chí ndo, cuví cunyeec iñi yo chí ra, vatyí maa ra cusacuvi ra tandihí maa ihya.

Nu ndihí cahan ra Pablo ta chahá ra nocumi chí ñu

²⁵ Yañi, cacan tahvi ndo cha cuenda ndi.

²⁶ Ta nacuhva ndo nocumi chí tandihí yañi yo cuenda Nyoo.

²⁷ Tyatyiné chí ndo chihin ndusu yuhu Sutu Mañi yo vatyí sacuahá ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chí ndo. Ta na cuví chí tyicuan caa.

Carta Cha Cu Uvi Cha Sacuhun Ra Apóstol Pablo Chi Náyivi Nuu Tesalónica Cha Yihí Cuenda Nyoo

*Nu tyaq ra Pablo ta ra tahan ra noo tutu chi
ñu ñuu Tesalónica cha yihí cuenda Nyoo*

¹Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. ²Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

*Nu catyi ra Pablo yoso caa cusacutuñi Nyoo
chi ñu iyó cuatyí quiví quichi ra Cristo*

³Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó ñi ndo chi Nyoo noo noo quiví, ta siin ri cuñí xaan ca ndo chi tahan ndo. ⁴Yucuan chaha sii cuñí ndi, cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan ñi ndo ta vaha xaan chinó ñi ndo chi Nyoo cha ni ri ca yahá ndo tandihí tindoho sanyehé ñáyivi chi ndo. ⁵Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quihvi ndo nu nyacá ñaha ra. Vatyí cha cuenda tuhun ra, nyehe xaan ndo tindoho vityin.

⁶Ta cha cuenda chi Nyoo, vaha cha cutyiyahvi ra chihin tindoho chi ñu sanyehé tindoho chi ndo. ⁷⁻⁸Ta chi nyoho cha nyehé ndo tindoho sahá ñu, cuhva ra cha nyitatu ndo tari cuhva tucu ra chi nyuhu, quiví cuquichi tucu Sutu Mañi yo Jesucristo nya andiví chihin ángel cha iyó xaan tunyee ñi ra chi, quichi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quichi sacacu chi yo. ⁹Nu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnú

cuví ra chihin tunyee ñi ra ¹⁰quiví cuquichi ra. Vatyí quiví cuan ñu yihí cuenda ra cusacahnú ñu chi ra, tandihí ri ñu chinó ñi chi ra. Ta mahñu ñu, ñohó tucu nyoho vatyí chinó ñi ndo cha ndaa cha chahá ndi chi ndo.

¹¹Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuví sacuví ndo cha vaha chihin tunyee ñi ra. Ta tandihí tyiño sahá ndo nuu ra cuacacu vaha, suri cha cuenda tunyee ñi chahá ra chi ndo vatyí chinó ñi ndo chi ra. ¹²Tacuhva sacahnú ñáyivi sivi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnú ra chi ndo nuu ñáyivi cha cuenda tumañi ñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹Ta cha cuenda quiví cuquichi Sutu Mañi yo Jesucristo nu cusandu ñin ri ra chi yo, cuñí cahin vityin, nyoho yañi. Vatyí chacú ndahvi nuu ndo, ²ma vatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chí ndo vatyí cha chaa quiví Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaa quiví cuan, ta cutyaa ra nu carta ta cucatyí ra tyi yuhu sacuhin carta cuan chi ndo. ³Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca chaa quiví cuan cuaha xaan ñu cusandihí ñu cha chino ñi ñu chi Nyoo ta cundicuita rayi chahri ley Nyoo iyó chi, ra cacu vatyí cunaa cuví ra cuan. ⁴Ican ra cuví ra xaan ñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyivi chi Nyoo cunducuita ra siqui. Ta nyacua nya chichi vehe ñuhu cahnú Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵¿Atu ña nicohón ñi ndo vatyí ta ni nyaa que chihin ndo cahin tuhun ihya chihin ndo? ⁶Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quiví tahán maa chi. ⁷Cha iyó tuhun cha ña quichahá ñáyivi chi Nyoo siqui ñuhu ñáyivi, soco

iyó xehe chi, vatyi iyó noo cha chasí, ta ña chahá cuan cha nducuaha chi. Soco quívi canyaha cuan, cunduñihi cha quiñi caa cuan. ⁸Tyicuan ta cundicuita ra quiñi caa cuan ta Sutu Mañi yo cucahñi ra chi ra chihin tatyi yuhu ra ta cusanaa ra chi ra chihin cha xiño ra quívi cuquichi ra. ⁹Ra quiñi caa cuan, cuenda cuihna cuquichi ra. Ta tandihi tunyee iñi cuihna cucoo chi ra, ta cusandavi ñaha ra chi ñáyivi chihin seña ta milagru ta cha iyo. ¹⁰Tandihí ri nuu cha ña vaha cucotyíño ra tacuhva cuvi sandavi ñaha ra chi ñáyivi cha cucunaa. Vatyi ñu cuan ña cuñí ñu quichaha ñu cha ndicha tacuhva cuvi cacu ñu. ¹¹Ta yucuan chaha cucuhva Nyoo vatyi cusandavi ñaha cha ña vaha cuan chi ñu. Ta cuchino iñi ñu cha ña ndicha. ¹²Tacuhva vatyi cutachi tuñi ra chi tandihí ñu vatyi ña cuñí ñu chino iñi ñu cha ndicha. Ta tahanan ca iñi ñu sacuví ñu cha ña vaha.

Nu cahan ra Pablo tuhun ñu cha nacachi Nyoo vatyi cacu ñu

¹³Soco tyicuan ri cuñí chi cha nacuhva ndi tyahvi nyoo chi Nyoo cha cuenda nyoho yañi. Vatyi cuñí xaan Sutu Mañi yo chi ndo. Vatyi Nyoo nacachi ra chi ndo nyata quívi xihna ri vatyi cuacacu ndo cha cuenda cha sanduvaha Tatyi li ra aña ndo ta cha cuenda cha chinó iñi ndo cha ndicha. ¹⁴Yucuan cuenda nacana Nyoo chi ndo quívi cahan ndi tuhun ra chihin ndo tacuhva vatyi cuñihi ndo chiin cha cahanu cuví Sutu Mañi yo Jesucristo.

¹⁵Yucuan chaha sanñi ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyaa ndi nu tutu cha sacuhun ndi chi ndo. ¹⁶⁻¹⁷Sutu Mañi yo Jesucristo ta Nyoo Sutu yo cuví ra cha cuñí chi yo. Ta cha cuenda tumañi iñi cha chahá ra chi yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha si cuñi aña ndo. Ta na sandunaní ra iñi ndo, tacuhva cuvi cahan ndo ta sacuvi ndo tandihí nuu cha vaha.

3

Nu chicán ra Pablo na cacan tahvi ñu chaha ra

¹Nu ndihí tuhun, nyoho yañi, cacan tahvi ndo chaha ndi tacuhva vatyi numi ri chaa

tuhun Sutu Mañi yo tandihí ri ityi. Ta na quichaha ñáyivi ta natiin cuenda ñu tari natiin cuenda nyoho. ²Cacan tahvi tucu ndo tacuhva vatyi na cacu ndi ndaha ñáyivi ña vaha, ñu quiñi iyó. Vatyi ña tandihí ñáyivi chinó iñi ñu chi Sutu Mañi yo. ³Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tiin ra ña vaha chi ndo. ⁴Ta cunyeé xaan iñi ndi chi Sutu Mañi yo vatyi nyoho sacuví ndo tari cuhva catyí ndi chi ndo, ta cusacuvi ca ndo. ⁵Ta vityin na tyinyee ca Sutu Mañi yo chi ndo tacuhva cuñi ca ndo chi ñáyivi tari maa ra cuñí ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeé xaan iñi ra nu nyehe ra tindoho.

Tahan chi cha saha tyiño yo

⁶Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñí saha tyiño, ta ña iyó ra cuhva sañaha ndi chi ndo. ⁷Vatyi nyoho chitó ndo yoso caa tahanan chi coo ndo tari cuhva sañaha ndi chi ndo. Vatyi nyuhu ña chinyicu ndi chihin ndo cha ña sahá tyiño ndi. ⁸Ta ni ña chachi ndi cha chii ndo cha ña tyiyahvi ndi. Soco saha tyiño ndi ñicahñu ta cha cuaa vatyi ña cuñí ndi coso ndi siqui ni noo ndo. ⁹Vasi iyó chi ityi chi ndi cha cacan ndi cha tyinyee ndo chi ndi, soco nyuhu saha tyiño ndi vatyi cuñí ndi sañaha ndi noo cuhva vaha cunyicon ndo. ¹⁰Vatyi quívi chinyaa ndi chihin ndo, catyí ndi chi ndo vatyi ñu cha ña cuñí saha tyiño, ma cachi ñu. ¹¹Cahan ndi siqui ihya vatyi ñihí ndi tuhun vatyi yihí ndo chicá noo yanga ri ndo ta ñahri maa tyiño sahá ndo. ¹²Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quívi.

¹³Yañi, ma cutatu ndo sacuvi ndo cha vaha. ¹⁴Tatu iyó noo ra ña cuñí quichaha tuhun cahan ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra. ¹⁵Soco ma cuxaan iñi ndo chi ra, soco cuhva ndo tuhun chi ra vatyi yañi yo cuví ra.

Nu ndihí cahan ra Pablo

¹⁶Sutu Mañi yo taxi ri iyó aña ra, ta suri maa ra na cuhva ra cha taxi ri coo

añima ndo tandihi ri cuhva tandihi ri quivi.
Ta nacuhva ndo cha cunyaa vaha ra chihin
tandihi ndo. ¹⁷Yuhu ra Pablo tyai nocumi
ihya chi ndo chihin ndahi, ta chihin letre.
Ta tyehe caa tyihí firme nu tandihi carte.
Ta tyehe caa tuhvé tyai. ¹⁸Ta Sutu Mañi yo
Jesucristo na nasoco ra chi tandihi ri ndo.
Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

¹Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ican ra catyí tyi sacuví tyiño ihyá, ta Sutu Mañi yo Jesucristo ñandíhi. Vatyí maa ra cuví ra cha yihí iñi yo. ²Tyaí tutu ihyá chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñí vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

Nu sañahq ra Pablo chi yo yoso caa saha yo cuenda tuhun cha ña ndicha

³Quiví quite ñuu Éfeso chiña cha cuaquichi ityí Macedonia ihyá, catyí chuun na ndqun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuví con tari cuhva catyí chuun quivi cuan. ⁴Catyun chi ñu cuan vatyí ma tyaa ñu xiñi ñu tuhun tyisu, ni tuhun cha cuví chi noo noo sutu chahnu ñu. Vatyí cha nuu cha tyinyee chi chi yo, satondó chi xiñi yo. Maa maa ri cha ñima ri tuhun cuví yuhu yo. Ña tyinyee chi chi yo cha chinó iñi yo cha sacuví ca yo cha catyí Nyoo.

⁵Soco tuhun cha catyí maa yo chi ñáyivi, cha cuñi yo chi tahan yo chihin cha cacú añima yo cha sanduvahq Nyoo. Cuñi yo chi ñu chihin cha vaha chicá xiñi yo ta chihin cha ndicha chinó iñi yo chi Nyoo. ⁶Soco yihí ñu saña ñu tuhun ihyá ta quita caxiin ñu chihin tuhun cha ñima ri tuhun. ⁷Cuñí ñu cuví ñu ñu sacuahá cuenda ley chahnu Nyoo soco ni maa ñu ta ña cutuñí iñi ñu tuhun cahán ñu.

⁸Chitó yo tyi ley cuan, vaha chi, soco cotyíño yo tari cuhva tahán chi. ⁹Cuñí chi coto yo vatyí ni noo ley ña chicunyaá chi cha cuenda ñu vaha. Soco nyaá chi cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chi Nyoo. Nyaá tucu chi cha cuenda ñu chahñí

chi sutu, chi sihi, ta cha cuenda tandíhi ñu chahñí. ¹⁰Nyaá ley cuan cha cuenda ñu iyó chihin rayí o ñusihi ta ñima yí ña o ñasihi ra cuví. Nyaá chi cha cuenda ra ca iyó chihin tahan yí, ta cha cuenda ñu suhu cha chii ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo. ¹¹Ta tuhun tyaquí xaan cha sacoto Nyoo chi yo cha cuenda ra Cristo, ican cuví tuhun cha nacuhva cuenda Nyoo chii vatyí sacote chi ñáyivi. Maa ra cuví ra cha sacahnú yo.

Chahá ra Pablo tyahvi nyoo chi Nyoo vatyí nyehé ndahvi ra chi ra

¹²Nacuhvé tyahvi nyoo chi Sutu Mañi yo Jesucristo cha cuenda tunyee iñi cha chaha ra chii ta nyehe ra chi tari noo ra chinó vaha iñi, ta natyaa tyiño ra chii vatyí sacuví tyiño nuu ra. ¹³Tyehe caa sacuví ra chihin vasi ta ityí chata ca yuhu cahan ña vahi siquí ra. Chicá nyiquen chi ra ta cahan cuehi chi ra. Soco Nyoo cundahví cuñí ra nyehe ra chii, vatyí yuhu ta chino ca iñi chi ra, ta ña chite cha chinyacuví. ¹⁴Ta tyinyee xaan Sutu Mañi yo chii. Ta chahá ra cha chino xaan iñi yo chi ra, ta cha cuñí xaan yo chi ñáyivi vatyí iin ri cuví yo chihin ra.

¹⁵Ta ndicha, cha ndicha vaha cuví tuhun ihyá. Ta tahán chi cha chino iñi yo, vatyí ra Cristo Jesús quichi ra siquí ñuhu ñáyivi ihyá vatyí sacacú ra chi ñu iyó cuatyí. Ta yuhu cuví noo ra quiñi caa ca cha nuu tandíhi ñu cuan. ¹⁶Yucuan chaha xihna que tava Nyoo chii nu quiñi caa vatyí tacuhva sañaha ra Jesucristo chi ñáyivi tyi cuñí xaan ra chi ñu. Tacuhva vatyí nachino iñi ñu ta cucoo ñu noo ñáyivi chaa cha ma naa ca maa. ¹⁷Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihí iyó chi, ra cha ña cuví nyehe yo chi, ra cha noo ri maa ra cuví Nyoo ta chitó ra tandíhi cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuvi chi tyicuan caa.

¹⁸Ihya tuhun chahí chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñí añimon tyi chitón tyi vaha sacavun noo cha sacuvún vatyí suri tuhun ihyá cachahq ra hermano chuun chihin

ndusu Nyoo. ¹⁹ Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihí ra tuhun ihya, yucuan chaha caquitá xiin ra. ²⁰ Tyicuan caa sacuví tucu ra Himeneo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahán chi sacuví ra ta ma cahan ña vaha ca ra chi Nyoo.

2

Nu sañahq ra Pablo yoso caa cacán tahvi yo

¹ Catyí chi ndo vatyí cha nuu tandihí ca, tahán chi cha cacán tahvi ndo chi Nyoo cha cuenda tandihí ñáyivi. Ta nacuhva ndo tyahvi nyoo chi Nyoo cha cuenda ñu. ² Cacán tahvi ndo cha cuenda ra cacuví tyiño. Cacán tahvi ndo cha cuenda ra tacuhva cuvi coo vaha yo, coo taxi yo, coo yo noo ñáyivi cachi nuu Nyoo ta nuu ñáyivi. Ta cusaha ñu ñáyivi chi yo. ³ Vatyí ihya cuví cuhva tahán iñi Nyoo ra cha sacacú chi yo. ⁴ Ta maa ra cuñí ra vatyí cacu tandihí ñáyivi. Ta cuñí ra cha nacoto ñu cha ndicha. ⁵ Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo. ⁶ Ta maa ra Jesucristo chahq ra ñáyivi ra tyiño nuu tandihí ñáyivi. Tyiyahvi ra cuatyí yo tacuhva cuvi cacu tandihí yo. Ta chinq cava cuan quiví tyaq maa Nyoo cuhva. ⁷ Cha cuenda ihya, tyatyíño Nyoo chii, vatyí cahn tuhun ra, ta cuví apóstol ra, tachí ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahn cuendu vatyí cuenda ra Cristo yihí.

⁸ Yucuan chaha cuñí vatyí cacán tahvi rayii tandihí ri ityi. Ta na coo ra noo ñáyivi ndii. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caca xiñi ra. Ta ma coo ra tisihi chihin ñáyivi. Ta ni ma xaan ra. ⁹ Tyicuan caa tucu ñusihi. Cachi cuhva cuihno ñu, tari cuhva tahán chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaquí, o chihin sahna yahvi xaan sanduvii ñu chi ñu. ¹⁰ Soco chihin cha cachi coo ñu ta chihin cha sacuví ñu cha vaha na sanduvii ñu chi ñu, tari tahán chi sacuví ñu nacuhva cuenda chi chi Nyoo. ¹¹ Ta taxi ri

cunyaa ñusihi ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu. ¹² Vatyí ña chahí cha sañaha ñusihi. Ni ña chahí cha cunyaca ñaha ñu chi rayii. Soco taxi ri na cunyaa ñu. ¹³ Vatyí xihna ca chi ra Adán savahq Nyoo ta yaha cuan ta chi cu Eva. ¹⁴ Ta ñima chi maa ra Adán sandaví ñaha ra ña vaha, soco chi ñasihi ra cuví sandaví ñaha ra ta chicoq cuatyí ña. ¹⁵ Soco ñusihi cucacu añima ñu cha cuenda cha sacacú ñu sehe ñu, ta sacuahnú vaha ñu chi chí. Soco tatu chinó vaha iñi ñu chi Nyoo ta cuñí ñu chi ra ta chi ñáyivi, ta cachi coo ñu nuu Nyoo ta nuu ñáyivi ñandihí.

3

Yoso caa tahán chi coo ra yihí ndaha chi ñu yihí cuenda ra Cristo

¹ Ndicha tuhun ihya: Tatu minoo ndo cuñí ndo quindaha ndo chi ñáyivi yihí cuenda ra Cristo, vaha xaan tyiño quichí cuvi iñi ndo saçuvi ndo. ² Soco niñi cuñí chi vatyí ra yihí ndaha vehe ñuhu cuvi ra noo ra ñahri cuatyí iyó. Ta cuñí chi cha coo noo ri ñasihi ra. Ta cuñí chi cha cuvi ra noo ra tyihí tuñi vaha iñi yoso caa cunyacuví, noo ra vaha nuu ñáyivi. Ta cuñí chi vatyí vaha cuví ra chihin ñáyivi chaa vehe ra. Ta coto ra yoso caa sañahá ra. ³ Ma cuvi ra noo ra tuhva chihi ndixi, ni ma cuvi ra noo ra nanducú tisihi. Ta ma cuvi ra noo ra nducu xuhun noo cuhva ña vaha. Soco cuñí chi cha vaha ñáyivi cuví ra, ta cuví ra noo ra ña tuhva cañi tahan. Ta ma cuvi ra noo ra cuñí xaan xuhun. ⁴ Ta cuví ra noo ra yihí ndaha vaha ñasihi ta sehe: Noo ra nyacá ñaha chi sehe tacuhva vatyí quichaha ñu chi ra, ta saha ñu ñáyivi chí ra. ⁵ Vatyí tatu ña chitó ra cunyaca ñaha ra vehe ra, yoso caa cusaha cumi ra vehe ñuhu Nyoo? ⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyí coto sacahnu ra chí ra ta tachí tuñi Nyoo chí ra, tari tachí tuñi ra chí cuihna vatyí cahn sahá ra chí ra. ⁷ Ta siin ri cuñí chi vatyí cuví ra noo ñáyivi vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ra tyinyee chihin tyiño vehe ñuhu. Na cachi coo ra. Ma cuvi ra noo ra cuendu, ta ma cuvi ra noo ra tuhva chihi ndixi ñandihí. Ta ni ma nyiyo iñi ra

saha canaa ra xuhun chihin noo cuhva ña vaha. ⁹ Cuñí chi vatyí cutuñí vaha ñi ra yoso caa tahán chi chino ñi ra yo chi Nyoo ta coto vaha ra tyi vaha cuahan ra chihin Nyoo. ¹⁰ Ta cuñí tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu. ¹¹ Ta tyicuan caa tucu ñusihi, cuñí chi vatyí cuví ñu ñáyivi vaha. Ma ñi ñu cuendu. Ta cachi coo ñu. Ta ñiñi cuñí ñu chihin tandihi ri tyiño. ¹² Noo ra tyinyeé chihin tyiño vehe ñuhu na coo noo ri ñasihi ra. Ta cuñí chi vatyí coto vaha ra cunyaca ñaha ra chi sehe ra ta ñáyivi nyicú vehe ra. ¹³ Vatyí ra tyinyeé, tatu vaha sacuvi ra tyiño cha tahán chi sacuvi ra, cuahan ca ra ityi nuu chihin Nyoo. Ta cunii ca ñi ra cahan ra tuhun cha chinó ñi ra chi ra Cristo.

Noo tuhun xehe cuenda cuhva chino ñi ra yo

¹⁴⁻¹⁵ Yihí ñi ra cuhin cha numi ri cunyehe ni nyaún. Soco tatu cucuei, yucuan chaha tyai ihya chuun tacuhva coton yoso caa tahán chi coo ñáyivi cuenda Nyoo. Vatyí maa yo cuví yo vehe ñuhu Nyoo nyitó. Ta cuñí chi vatyí sañihi ca yo sañaha yo cha ndicha cha cumí yo chi inga ñáyivi. ¹⁶ Cha ndicha cuví vatyí yaha xaan cuhva cahnu tuhun xehe cha sanatuvi Nyoo, vatyí coo yo tari iyó maa ra:

Nyoo nanduví ra rayii ta chicoo ra chichi noo coño ñuhu tari maa yo.

Ta catyí Tatyí li vatyí vaha ra.

Ta nyehe ángel chi ra.

Nicahnu ñuhu ñáyivi cahán ñu tuhun ra.

Ta chinó ñi ra ñáyivi chi ra nicacahnu ñuhu ñáyivi.

Ta cuanuhu ra nya gloria.

4

Nu catyí ra Pablo vatyí yihí ñu ma chino ca ñi ñu nu cuahan chi tyembu

¹ Soco cahán cachi Tatyí li ta catyí chi vatyí nu cuandihi tyembu yihí ñu ma chino ca ñi ñu chi ra Cristo vatyí cutyasoho ñu tuhun cahán tatyí ña vaha cha sandavi ñaha chi ñu. Ta cunyicon ñu ndusu ñuhu cuihna. ² Cutyasoho ñu tuhun cahán ñu cuendu. Ta ñu cuendu cuan ña tuví ca ñi ñu cuhva nyacuví ñu vatyí cha ndundava xaan aña ñu. Tari cha cayú aña ñu chihin noo caa ihñi ta ndundava chi cuví cuan. ³ Cucasi ñu cuan nu tandaha ñáyivi. Ta cucatyí ñu vatyí

ña vaha cha cachi yo suhva nuu nyayu. Vasi chitó yo tyi tandihi nuu cha cachi yo, Nyoo savaha. Ta tandihi yo cha chinó ñi ra yo chi Nyoo ta chitó yo cha ndicha, cuví cachi yo ta nacuhva yo tyahvi nyoo chi ra. ⁴ Vatyí tandihi cha savaha Nyoo ta vaha. Ta ña tahán chi catyí yo tyi ña vaha. Cuví cachi yo tatu nacuhva yo tyahvi nyoo chi Nyoo. ⁵ Vatyí ndundií chi cha cuenda tuhun Nyoo ta cha cuenda cha chicán tahvi yo chi Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahun tuhun ihya chi tandihi yañi yo, cua cuvun noo ra vaha cahán tuhun ra Cristo Jesús. Ta tuhun cha chinó ñi ra yo ta tandihi tuhun ra Cristo cha nyicón, cua tyinyee chi chuun. ⁷ Soco ma quichahun tuhun cuendu, tuhun tondo cha iyó ñáyivi ihya. Vaha ca sañahun chuun sacuvun maa maa ri cuhva cuñí Nyoo. ⁸ Cha sañiñi yo ndunye coño ñuhu yo tyinyeé chi suhva chi yo. Soco cha sañiñi yo sacuví yo cuhva cuñí Nyoo, tyinyeé chi chi yo tandihi ri cuhva, vatyí tyinyeé chi chi yo ñáyivi ihya. Ta tyinyeé tucu chi chi yo cha coo vaha yo nu cuchaa yo andivi. ⁹ Ta ndicha, cha ndicha vaha cuví tuhun ihya ta tandihi yo tahán chi cha chinó ñi ra yo. ¹⁰ Ta suri cha cuenda ihya sahá tyiño yo ta nyehé yo tindoho vatyí nyatú yo naquehen yo cha vaha cha chaha Nyoo nyito chi yo. Vatyí maa ra cuví ra sacacú chi tandihi ñáyivi, ta xihna ca chi yoó cha chinó ñi ra yo chi ra.

¹¹ Ihya tuhun cua sañahun chi ñáyivi, ta cusaniñun chi ñu na cutuhva ñu. ¹² Cachi sañahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chi ñu chihin cuhva iyón, chihin cuhva cahun. Sañahun chi ñu, chihin cuhva cha cuñún chi Nyoo ta chi ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha. ¹³ Cha ñi ri ca cha cumañi chai nu nyicú ndo, sacuah con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityi Nyoo. ¹⁴ Sañun cuenda nyatu cha chaha Nyoo chuun quivi cha tyiso ra yindaha vehe ñuhu ndaha ra sicun ta cahan ra yoso cuhva chahá Tatyí li Nyoo chi ra. ¹⁵ Tyaa vaha xiñun tuhun ihya ta sacuvun. Tacuhva vatyí nyehe ñáyivi

yoso caa cuahun ityi nuu ca chihin Nyoo.
¹⁶Saha cuenda chuun chihin cuhva iyón. Ta saha cuenda cuhva sañahún chi ñáyivi ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñi tuhun sañahun ñandihí.

5

Nu chahá ra Pablo tuhun chi ra Timoteo yoso caa cuhva ra tuhun chi ñu yihí cuenda ra Cristo

¹Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra. ²Ta chi ñu chahnu tari cha sihun cuví chi ñu. Ta chi ñu tyivaa, tari cha cuhvón cuví chi ñu. Ta sacuvun chihin cha vaha chicá xiñun.

³Tyinyee chi ñu ndahvi ñu chihí yíi tatu yori ñáyivi chi ñu cha tyinyee chi ñu. ⁴Soco tatu iyó noo ñaha chihí yíi ta iyó sehe ña, o sehe ñani ña, cuñí chi cha cutuhva xihna maa ñu cha tyinyee ñu chi ña. Na nicohon iñi ñu yoso caa saha cuenda sihi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vatyí cha tyehe caa vaha xaan, ta cha tahán iñi Nyoo cuví. ⁵Soco ñu chihí yíi cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahvi ñu chi ra ñicahñu ta cha cuaa. ⁶Soco noo ñaha chihí yíi cha nducú tusii iñi cha iyó ñáyivi ihya, tari quívi cha chihí ña cha cuenda tuhun Nyoo cuví cuan, vasi iyó ña. ⁷Sacoto tuhun ihya chi tahan yo tacuhva cha ma ñihí ñáyivi cuhva cahan ñu chi ñu. ⁸Soco tatu yihí yo cha iyó ñáyivi chi yo cha chihí yíi ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quívi cha ña chinó iñi yo chi Nyoo cuví cuan. Ta cahnú ca cuatyí yo ta ñima ca ñu cha ña chinó iñi chi Nyoo.

⁹Nu tutu cha nyaá sivi ñu chihí yíi, na cunyaa sivi ñu, soco ñu cha yahá ca uñi xico cuiya. Ta cuví cunyaa sivi ñu tatu noo ri yíi ñu chiyo. ¹⁰Ta cuñí chi tatu ñohó nuu vaha ñáyivi chi ñu cha cuenda cha vaha cha sacuví ñu: tatu sacuahñu vaha ñu sehe ñu, tatu chahá ñu cha cachí ñu chaq vehe ñu, tatu sacuví ñu tyiño nuu yañi yo chihin cha tandihí añima ñu chihin cha ndahví sahá ñu chi ñu, tatu tyinyee ñu chi ñu nyehé tindoho, tatu tyehe caa sacuví ñu tandihí nuu cha vaha, cuví cunyaa sivi ñu.

¹¹Soco ma tyihí ndo sivi ñu cha ta chaa ca uñi xico cuiya coto coo quívi ta quichi cuví iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo. ¹²Ta tyicuan caa cucoo cuatyí ñu vatyí ña sacuví ca ñu cuhva catyí ñu. ¹³Ta siñ ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahan ñu cha ña tahán chi. ¹⁴Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta ma cuhva ñu ityi chi ñu xaan iñi chi yo vatyí cahan nyaa ñu chi yo. ¹⁵Tyehe caa catyí chuun vatyí yihí ñu cha saña ñu chi Nyoo ta na nyicon ñu chi ra ña vaha. ¹⁶Tatu noo ñu yihí cuenda Nyoo ta iyó noo ñáyivi chi ñu cha chihí yíi, cuñí chi cha tyinyee ñu chi ñu, tacuhva cha ma cuví ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yíi cha ndicha ndicha chiñuhú chi.

¹⁷Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahan tuhun Nyoo ta ra sañahá chi ñu. ¹⁸Vatyí tuhun Nyoo catyí chi: “Ma tyihun yoho yuhu sindiquí nu saha tyiño ti tacuhva vatyí cuví cachi ti chiin.” Ta catyí tucu chi: “Iyó ityi chi ra cha sahá tyiño cha ñihí ra yahvi ra.”

¹⁹Tatu tyaa ñu cuatyí siquí noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaa cuatyí cuan. ²⁰Soco ñu sañihí ca sacuví cuatyí cuñí chi cha catyí ndo chi ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuví ñu cha ña vaha. ²¹Tyatyíñe chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyí chuun vatyí quichahun cha catyí ihya ta ma cahun tumañi iñi chi noo ra ta ni chi inga ra. ²²Ma numi xaan ri tyaa tyiño chi noo ra cha cuví ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvún ta ma cuhvón ityi chi cha ña vaha.

²³Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴ Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu. ²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chi.

6

¹ Ñu cha cuvi musu cuñí chi cha saha vaha ñu ñáyivi chi chitoho ñu. Tyicuan ta ma ñihi ñáyivi cuhva cahan ña vaha ñu siquí Nyoo ní siquí tuhun ra, cha sañahá yo. ² Ta tatu noo musu iyó chitoho ra cha yihí cuenda Nyoo, ña tahán chi cha ma saha ra ñáyivi chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cūhva tuhun chi ñu na sacuví ñu.

Cuhva iyó yo ta cusii cuñi yo

³ Tatu iyó noo ra cha sañahá inga tuhun cha ña chachí tahan chi chihin tuhun vaha cha sañahá Sutu Mañi yo Jesucristo, ta ní ri chihin tuhun vaha cha cuahan sacuahá yo, ⁴ cuví ra noo ra cahnu sahá chi. Ta tahán xaan iñi ra cuvi yuhu ra siquí noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñí nyehe chi tahan. ⁵ Ta tyicuan ri cañí tahan ñu vatyí quíñi chica xiñi ñu, vatyí ña chitó ñu cha ndicha. Nyacua cuñí maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan. ⁶ Ndicha vatyí cha sacuví yo cuhva catyí Nyoo ta ndoó yo vaha chihin cha cha chahá ra chi yo cuví chi tari noo cha tyayii iyó chi yo. ⁷ Vatyí ñahri nyiso yo vachi yo ihya ñáyivi. Ta ñahri cuiso yo cunuho yo quívi cuví yo. ⁸ Soco tatu iyó cha cachi yo ta sahma ñihnoó yo, na cusii iñi yo, ta na ndoo yo vaha chihin yucuan ri. ⁹ Soco ñu cuñí cutyayii, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu chihin cha cuaha xaan cha quichi cuví iñi ñu. Ta sativí chi chi ñu ta nu ndihi tuhun cutiví ndihi ñu ta cunaa ñu. ¹⁰ Vatyí cha cuñí xaan yo xuhun, yucuan cuví nu caña tandihi ca nuu cha ña vaha. Ta yihí ñu cha tyehe caa cuñí xaan ñu xuhun, ta cha cuenda cuan sandihí ñu tuhun cha

chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayii cuenda Nyoo. Caca cono chi tandihi cha quíñi caa cuan. Ta cūhun chata cha cuiti. Vaha cūun nuu Nyoo. Cūñi iñun chihin ra. Cūñun chi ñáyivi. Coo cha cama iñun chihin tandihi cha cuví chuun. Ta masu cuvi iñun. ¹² Ñihi sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñáyivi chaa cha ma naa ca maa cha chahá Nyoo chi yo. Vatyí ican cuenda cuan nacana Nyoo chuun, quívi catyí cachun tyi chinó iñun nuu cuaha xaan ra cuví cha ndaa. ¹³ Ta chihin nuu Nyoo, ra cha chahá ñáyivi coo tandihi cha iyó, ta chihin nuu ra Cristo Jesús ra cha chahá vaha cuenda nuu ra Poncio Pilato, catyí chuun vityin, ¹⁴ na sacuvun tandihi cha catyí chuun tacuhva ma cuhvon cuhva cha cahan ñáyivi chuun nyacua nya quívi quichi Sutu Mañi yo Jesucristo. ¹⁵ Na chaa maa quívi, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihi ca ra cuví rey. Ta nyacá ñaha ra chi tandihi ca ra cha nyacá ñaha. ¹⁶ Noo ri maa ra cuví ra ra ñahri tuhun chihí iyó chii. Ta iyó ra nu ndichin nu yori maa tuhva. Ta ní noo ñáyivi ta nyehe ca ñu chi ra. Ta ní ña cuví nyehe ñu chi ra. Chi maa ra na sacahnu yo. Ta na cunyaca ñaha ra tyicuan ri maa. Ta na cuvi chi tyicuan caa.

¹⁷ Ta ñu cha iyó cha tyayii chi ñáyivi ihya, catyí chi ñu vatyí ma cahnu xaan saha ñu chi ñu. Ta ma cuita iñi ñu chi cha tyayii cha iyó chi ñu. Vatyí coto coo quívi ta ndihi cha tyayii cuan. Soco na cuita iñi ñu chi Nyoo nyitó, vatyí maa ra cuví ra chahá tandihi. Ta cuaha chaha ra chi yo tacuhva cusii cuñi yo. ¹⁸ Catyun chi ñu tyayii na sacuvi ñu cha vaha ta ñii iñi ñu cūhva ñu cha iyó chi ñu chihin cha ma uhvi cuñí ñu. ¹⁹ Tyicuan ta coo cha tyayii ñu andiví ta cutyinyee chi chi ñu nu cuahan ca chi quívi. Ta tyehe caa cuví coo ñu ñáyivi cha ma naa ca maa.

Nu ndihi chahá ra Pablo tuhun chi ra Timoteo

²⁰ Yoho Timoteo saha cumi vahun tyiño cha chaha Nyoo chuun. Ma tyasohun tuhun cha siin caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha. ²¹ Vatyí cha cuenda cuan yihí ñu cha quita caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaa ra Pablo noo tutu chi ra Timoteo

¹Yuhu ra Pablo cuví noo apóstol ra Jesucristo vatyí tachí ra chíi na caque tyíño ra. Vatyí tyicuan caa cuñí maa Nyoo, tyí cuñí ra cha sacote chí ñáyiví vatyí chahá ra noo ñáyiví chaa chí tandihí ñu cha ndu iin ri chíhin ra Cristo Jesús vatyí nacuhva cuenda ñu chí ñu chí ra. ²Tyaí tutu ihya chí yoho Timoteo. Ta cuñí xain chuun tyí tari cha sehí cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahví ra chuun. Ta na coo ca cha taxi rí cuñí añimon saha ra.

Nu catyí ra Pablo chí ra Timoteo tyí nacatyí ra chí ñáyiví tyí cuenda ra Cristo yihí ra

³Tyicuan rí nicohón iñi tuhun yoho cuhva cha chicán tahví chí Nyoo ñicahñu ta cha cuaa. Ta nacuhvé tyahví nyoo chí ra cha cuendon. Nu maa ra sacuví yuhu tyíño chíhin cha vaha chicá xiñi, tari sacuví tucu ñáyiví chíi ta cha naha. ⁴Tyicuan rí nicohón xaan iñi chuun ta nicohón xaan iñi tuhun yoso caa chacun quívi cuachiye chíña. Ta cuñí xain nyehi chuun inga chaha ta cusii iñi chuun. ⁵Vatyí nicohón iñi yoso caa chingo xaan iñi cu Loida chiton chí Nyoo, ta cu Eunice sihun ñandihí. Tyicuan caa tucu yoho chinó xaan iñun vityin.

⁶Yucuan chaha chahí tuhun chuun vatyí na saniun iñun ta cotyíño nyatu cha cahun tuhun Nyoo cha chahá ra chuun quívi tyisé ndahi sicun. ⁷Nyoo ña chahá ra cha yuhví yo. Soco chahá ra noo tunyee iñi cahnú chí yo. Ta chahá ra vatyí cuñí yo chí tahan yo. Ta chahá ra cha cunyaca ñaha vaha yo chí yo. ⁸Yucuan chaha ma cahan nuun cahan tuhun Sutu Mañi yo. Ta ní rí cha ma cahan nuu cha cuenda cha ñohí vehe caa cha cuenda ra. Soco chíhin tunyee iñi chahá Nyoo chuun ta chíhin cha iyó vaha iñun cunyeun tindoho cha vachí síqui yo cha cuenda tuhun Nyoo. ⁹Vatyí ícan ra sacacú chí yo. Ta nacana ra chí yo vatyí coo yo noo ñáyiví ii. Ñima cha cuenda cha vaha cha sacuví yo ta nacana ra chí yo, soco

vatyí tyicuan caa tyaa ra cuhva nyata ní cumañi ca chingo ñuhu ñáyiví. Vatyí nya quívi cuan cuñí ra chí yo cha iin rí cuví yo chíhin, ra Cristo Jesús. ¹⁰Ta vityin cha quichí ra Jesucristo sacacú ra chí yo, nacoto yo vatyí tyicuan caa cuñí ra chí yo. Ta nu quichí ra, sataní ra tandihí tunyee iñi cha iyó chí tuhun chíhi. Ta chíhin tuhun vaha cahan ra, tava ra nu ndichin tuhun cha coo yo noo ñáyiví chaa cha yorí cuví satívi.

¹¹Nyoo tyaa ra tyíño chíi vatyí cahan tuhun ihya chíhin ñáyiví. Tachí ra chíi vatyí cuví noo apóstol chí ra, ta sañahí chí ñu cha ñima ñu Israel cuví. ¹²Yucuan chaha nyehí tandihí tindoho ihya. Soco ña cucahán nui vatyí chitó mai yóo chí chinó iñi. Vatyí nacuhva cuende chíi chí ra, ta chitó vahí vatyí cuví saha cuenda ra chíi nyacua nya quívi quichí tucu ra.

¹³Cunyicon tuhun vaha cha chahí chuun. Ta coun chíhin cha chinó vaha iñun chí Nyoo. Tyicuan rí cunñun chí ñáyiví tahan yo. Vatyí yucuan cuví cha chahá Nyoo chí yo tyí iin rí cuví yo chíhin ra Cristo Jesús. ¹⁴Ta maa Tatyí lí cha iyó ñima yo na tyinyee chuun ta saha cumun tuhun vaha cha chahá Nyoo chuun.

¹⁵Cha chitón vatyí tandihí ra ityí Asia chíña casandoq ra chíi, tari ra Figelo ta ra Hermógenes. ¹⁶Soco ra Onesíforo na nyehe ndahví Sutu Mañi yo chí ñáyiví chí ra vatyí cuaha xaan chaha quichí sandunyeer ra iñi. Ta ña cucahan nuu ra cha cuenda cha ñohí vehe caa. ¹⁷Soco quívi chinyaq ra ñuu Roma ihya, ña sandihí ra tuhun cha nanducu ra chíi nyacua nya cha nañihí ra chíi. ¹⁸Sutu Mañi yo nacuhva ra cha ñihi ra tumañi iñi quívi cha cutuñi chí yo nuu ra. Chitó vahun yoso cuhva tyinyeer ra Onesíforo chí yo nya ñuu Éfeso chíña.

2

Noo sindaro vaha ra Jesucristo

¹Ta yoho sehe luhli, sandunyeer iñun chíhin tunyee iñi cha chahá ra Cristo Jesús chuun cha cuenda cha iin rí cuví yo chíhin ra. ²Tuhun cha chíñun cha cahan nuu cuaha ñáyiví, nacatyí chí ra cha ní iñi chinó iñi chí Nyoo, ra cha cacuví sañaha chí inga ñu.

³Ta cunyeun tindoho tari noo sindaro vaha ra Jesucristo. ⁴Ni noo ra cuví sindaro ta ma cuví tyihí ra chí ra chíhin inga tyíño. Vatyí cuñí chí sacuví ra maa maa rí cha

catyí ra cuví nuu chi ra. ⁵Ta tyicuan caa tucu ra canyasiquí, ma saha canaa ra cha tahán chi saha canaa ra tatu ma cunyasiqui ra tari cuhva tahán chi. ⁶Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra. ⁷Caca xiñun tuhun cha catyí chuun ihya, ta maa Sutu Mañi yo cucuhva ra cha cutuñi iñun tandihi.

⁸Nicohon iñi tuhun ra Jesucristo, ra cha nandoto cha yahá nyehe ra tindoho ta chihí ra. Cuví ra tata rey David. Ta ican ihya cuví tuhun Nyoo cha cacu añima yo cha chahá ra vatyi cahin tuhun. ⁹Ta cha cuenda tuhun ihya cunyei tandihi tindoho nyacua nuhñi chihin cadena tari noo ra quiñi iyó. Soco tuhun Nyoo ña nuhñi chi. ¹⁰Yucuan chaha cunyei tandihi tindoho cha cuenda cha vaha chi tandihi ca ñu nacachi Nyoo chi, tacuhva vatyi cuvi cacu tucu tandihi ñu. Chihin cha ndu iñ ri yo chihin ra Cristo cuacacu yo ta cuñihi yo noo nu tyaquí xaan cha ma ndihi ca maa. ¹¹Ihya cuví cha ndicha xaan:

Tatu cúvi yo cha cuenda ra, coo tucu yo chihin ra.

¹²Tatu cunyeé yo tindoho, cucunyaca ñaha yo chihin ra.

Tatu catyí yo tyi ña yihí yo cuenda ra, maa ra cucatyí ra tyi ñima ñáyivi cuenda ra cuví chi yo.

¹³Tatu sandoq yo chi ra, soco maa ra tyicuan ri sacuví ra cuhva catyí ra.

Vatyi maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihi ñu cha cuví yuhu ñu cha ñima ri tuhun. Vatyi cha cuví yuhu ñu tyehe caa, ñahri maa tuhun. Tyi sativí ñu chi ñu tyasohó tuhun cahán ñu. ¹⁵Sanñun ta cuhva cuendon chuun nuu Nyoo tari noo ra sahá tyiño vaha. Vatyi ñahri cha cucahan nuun tatu chotyíño vahun tuhun ndicha yoso cuhva tahán chi. ¹⁶Ñaha tyasohun tuhun cha ñima ri tuhun ñáyivi ihya. Vatyi ñahri maa tyinyeé chi chi yo. Soco sativí ca chi chi yo nuu Nyoo ¹⁷vatyi tari quihvi xico ndiyi noo nu cahvi, tyicuan caa cuví tuhun cuan vatyi sativí chi chi yo. Ta cuaha ñu cuativí

cha cuenda cuan. Ican cuví cha cuví chi ra Himeneo ta ra Fileto. ¹⁸Vatyi caquita caxiñ ra ityi vaha ta catyí ra vatyi tari quivi cha yahá nandoto yo ta ma nandoto ca coño ñuhu yo. Ta tyicuan caa satondq ra cuhva chinó iñi suhva ñu. ¹⁹Ta vasi yihí ñu nducaxiñ ñu, soco Nyoo chacun ra cha ndicha, ta yucuan cuví cha ma nasama maa. Ta nyisó chi noo seña cha catyí: “Sutu Mañi yo ñohó nuu ra chi ñu cuenda ra.” Ta catyí tucu chi: “Tandhi ñu nyisó sivi ra Cristo na quita ñu nu quiñi caa.” ²⁰Chichi noo vehe cahnu, ñima maa maa ri ndaha tyiño ching chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun. ²¹Tyicuan caa tucu maa yo tatu ña tiñ cuenda yo tuhun cha ñima ri tuhun ñáyivi ihya, cuví yo noo ñáyivi cha chotyíño Nyoo chi, tari noo vaso xuhun cuaan. Ta cuñi chi vatyi cundi vasu cuan, tyicuan ta cuví cotyíño ra chi yo cha cuenda tandihi nuu vaha.

²²Ma caca xiñun tari chicá xiñi ra tyivaa ñáyivi ihya. Vatyi maa maa ri cha quiñi caa chicá xiñi ra. Cqo noo ñáyivi cuiti. Chino vaha iñun chi Nyoo. Cuñun chi Nyoo ta chi ñáyivi. Cqo taxi run chihin tandihi ñu yihí cuenda Nyoo, ñu cha chihin cha vaha añima chicán tahvi chi Sutu Mañi yo. ²³Ta ma quichahun tuhun cha ñima ri tuhun cha cuví yuhu ñáyivi. Vatyi chitón tyi chihin cuan cacú tisihi. ²⁴Ta noo ra sacuví tyiño nuu Sutu Mañi yo, ña tahán chi cañi tahan ra. Soco tahán chi cha vaha ñáyivi cuvi ra chihin tandihi ñáyivi. Ta cuñi chi cha ñihi vaha ra cuhva sañaha ra tuhun Nyoo. Ta cuñi tucu chi cha cama cuvi iñi ra chihin ñáyivi. ²⁵Ta chihin cha masu iñi ra cuñi chi cha sandundoo ra chi ñáyivi ndava iñi. Ta cuatu ra nasama Nyoo cuhva iyó ñu ta nacoto ñu cha ndicha. ²⁶Ta tyicuan caa ta cunducachi iñi ñu ta cuaquita ñu chichi ndaha ra cuví cuhna vatyi cha vityin nyacuví maa ra yoso cuhva cuñi ra chihin ñu.

3

Yoso caa cucoo ñáyivi nu cuandhi ca quivi

¹Ta cuñi tucu chi cōton vatyi nu cuandihí tyembu cuquichi quivi cha yíi xaan coo yo. ²Vatyi cucoo ñáyivi ñu cuñi xaan suri chi maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chi ñu. Cucahan ña vaha ñu siquí Nyoo. Ta ma quichaha ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo. ³Ma cuñi ñu chi tahan ñu. Ma coo ticahnu iñi chi ñu chihin ñáyivi. Cuñi ñu cuendu. Ma cuvi cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha. ⁴Cunaxico tuhun ñu chi tahan ñu. Ta ndava xaan cucuvi iñi ñu. Ta cukaña iñi ñu sacuvi ñu ñáá ndihí cha cuñi ñu. Ta maa maa ri cha quichi cuvi iñi ñu cunanducu ñu, ta ma nanducu ñu chi Nyoo. ⁵Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyi chasí ñu cha sañahá Nyoo tunyee iñi ra. Ma cutahun chihin ñu caa tyicuan caa. ⁶Vatyi mahñu ñu ihya iyó ra cha quihvi ra chichi vehe ta sandavi ñaha ra chi ñusihi cha ñahri cha chiñi tuñi xiñi. Ta nyisó ñusihi cuan cuatyí, vatyi nyicón ñu tandihí cha quichi cuvi iñi ñu. ⁷Tyicuan ri cuñi ñu coto ñu tandihí tuhun chaa soco ña cuví cutuñi iñi ñu ñáá cha cuvi cha ndicha. ⁸Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyo ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha. ⁹Soco cuhva cunyacuvi ñu ma cuvi cutya chi vatyi ña xehe caa tyi cha ñima ri tuhun cuví cha cusacuvi ñu, tari cha chinyacuví ra Janes ta ra Jambres.

Nu ndihí tyatyíño ra Pablo chi ra Timoteo

¹⁰Soco yoho chitó vahun tyi yuhu ñima tyicuan caa iyé. Vatyi chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyivi chii. Ta chitón yoso cha cuñi chi ñu. ¹¹Ta chitón yoso caa cunyeé tindoho nu chicán nyicon ñáyivi chii. Chitón cha cuví chii, tandihí tindoho cha nyehí cha catyi tuhun Nyoo ñuu Antioquia, ta ñuu Iconio, ta ñuu Listra. Soco Sutu Mañi yo sacacü ra chii chichi tandihí cuan. ¹²Cha

ndicha cuví vatyi tandihí yo cha cuñi yo coo yo cuhva cuñi ra Cristo Jesús cunyehe yo tindoho saha ñáyivi. ¹³Soco ñu quiñi iyó ta ñu sandaví ñaha, quiñi xaan ca cunanduvi ñu. Vatyi cusandavi ñaha ñu chi ñáyivi ta cusandavi ñaha ñáyivi chi ñu.

¹⁴Soco yoho sañihun coun chihin cha cutuhvón. Vatyi chitón yóo cha sañahá chuun ta chitó vahun tyi cha ndicha cuví. ¹⁵Nya ta ni luhlun ta chitón cha nyaá nu tutu tuhun Nyoo. Ta yucuan cuví cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús. ¹⁶Tandihí tuhun cha nyaá nu tutu Nyoo, ta maa Nyoo chahá. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyivi vaha nuu Nyoo. ¹⁷Tyehe caa tyinyeé tuhun Nyoo chi yo tacuhva vatyi cuví yo noo ra cuiti cuenda Nyoo. Ta cuatu tuhva yo sacuvi yo tandihí cha vaha.

4

¹Tyatyíñe chuun nuu Nyoo ta nuu Sutu Mañi yo Jesucristo, vatyi maa ra cusandaa ra cuatyí ñu nyitó ta ñu chihí quivi quichi ra cunyaca ñaha ra chihin tunyee iñi ra. ²Cahan tuhun Nyoo chihin ñáyivi. Tyicuan ri sañihun sacuvun. Cahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, catyi cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahán chi coo ñu. ³Vatyi coo quivi ma cunyeé ca iñi ñáyivi tyasoho ñu tuhun vaha. Soco cunducu ñu cuaha xaan ra sacuahá cha sañahá maa maa ri cha tahan iñi maa ñu cuñi ñu. ⁴Ta cusacuachiyó xiin ñu cha ndicha. Ta cucuñi ñu cuñi ñu noo tuhun cha ña ndicha. ⁵Soco yoho saha cuenda chuun chihin cha vaha chica xiñun. Cunyeun tindoho. Cahan tuhun Nyoo chihin ñáyivi. Sacuvi vahun tyiño chahá Nyoo chuun.

⁶Yuhu cha cuñi cuvi ri nacuhva cuende ñáyivi cha cuenda tuhun Nyoo, vatyi cha nyaña yatyin tuhun chihi chii. ⁷Cha cañi tahan tari cuhva tahán maa chi ta cha sandihí tyiño cha chahá Nyoo chii. Ta ña sandihí tuhun cha chinó iñi chi ra. ⁸Ta vityin nu cuahan ca chi quivi, nyatú tuhva

noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihi ca ñu cha nyatú chi ra. Vatyí noo ri maa ra cuví ra vaha sacutuñí.

Nonga tyiño tyag ra Pablo chi ra Timoteo

⁹ Saniñi ta quichun cha numi ri, quichi nyehun nu nyai. ¹⁰ Vatyí ra Demas sandoq ra chii vatyí cuñí ca ra cha iyó ñayivi ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia. ¹¹ Noo ri maa ra Lucas nyaá chihin. Nanducu chi ra Marcos ta na quichi ra chuhun quivi quichun. Vatyí chihuhú xaan ra chii nu tyiño Nyoo. ¹² Tachi chi ra Tíquico ñuu Éfeso. ¹³ Quivi quichun cuison sahma cocon cha sandoj ñuu Troas vehe ra Carpo. Tyicuan caa tucu libri, quíhi ndahun quichi. Ta cha niñi ca tuti.

¹⁴ Ra Alejandro ra cañi mityi cuan, cuaha xaan cha ña vaha chinyacuví ra chihin. Ta maa Sutu Mañi yo cutiyahvi chi ra cha cuenda cha chinyacuví ra chihin. ¹⁵ Saha cuenda chuun chihin ra. Vatyí xaan xaan cuñí ra síqui tuhun Nyoo cha cahán yo.

¹⁶ Cha xihna ri quivi sacaquí chii nuu ra cuví tyiño, yori maa tyinyee chii. Casandoq noo tuhun maa ra chii. Na saha Nyoo ticahnu iñi chi ra cha cuenda cuan. ¹⁷ Soco Sutu Mañi yo tyinyee xaan ra chii. Ta chahá ra tunyee iñi chii tacuhva cuví cahan cachi tuhun ra nuu ñu, ta chihí tandihi ñu cha ñima ñu Israel cuví. Ta sacacu Nyoo chii cha cachi ndicaha chii. ¹⁸ Ta cuasacacu ca ra chii ndaha tandihi cha ña vaha. Ta cuasaha cuenda ra chii nyacua nya nachaa quivi cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuví chi tyicuan caa.

Nu ndihi cahan ra Pablo ta chahá ra nocumi chi ñu

¹⁹ Ihya vachi nocumi chi cu Prisca ta chi ra Aquila ta chi ñáyivi chi ra Onesíforo. ²⁰ Ndoq ra Erasto ñuu Corinto. Ta ndoq ra Tróximo ñuu Mileto vatyí cuhví ra. ²¹ Saniñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihi ca ñáyivi tahan yo cuenda Nyoo ihya.

²² Na cunyaa Sutu Mañi yo chuhun. Ta Nyoo na nasoco ra chi tandihi ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

¹Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyi tyatyíño maa ra chíi vatyi tyinyei chí ñu nacachi maa Nyoo, na nachino iñi ñu chí ra, ta cohon nuu ñu cha ndicha, ta coo ñu cuhva cuñí Nyoo. ²Ta cuatu tuhva ñu coo ñu ñáyivi chaa cha ma naa ca maa andivi. Vatyí ta ní cumañi ca chino ñuhu ñáyivi ta catyi Nyoo vatyi cucuhva ra noo ñáyivi chaa chí yo. Ta maa ra ña cuendu ra. ³Ta vityin chaa quívi cha tyaa Nyoo cuhva tyi nacoto yo tuhun ra. Maa ra cuví ra sacacú chí yo, ta chahá ra tyiño chí yuhu cha cahin tuhun ra chihin ñáyivi. ⁴Sacuhín tutu ihya chuun, Tito, vatyi tari noo sehe vahi cuví chuun cha cuenda tuhun Nyoo, vatyi iin ri chinó iñi yo chí ra Jesucristo. Cuñí vatyi Nyoo Sutu yo ta Sutu Mañi yo Jesucristo, ra sacacú chí yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chahá ra Pablo chí ra Tito tyi sacuvi ra ñuhu Creta

⁵Sandoi chuun ñuhu Creta vatyi sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun. ⁶Vatyi ra nyisó tyiño ihya cuñí chí coo ra noo cuhva cha ma cahan ñáyivi chí ra. Noo ri ñasihi ra coo. Ta tandihí sehe ra cuñí chí cha chinó iñi ñu chí Nyoo, ta cachi coo ñu ta ma ndava iñi ñu tacuhva cha ma tyaa ñáyivi cuatyí síqui ñu. ⁷Vatyi ra yindahá chí ñu yihí cuenda Nyoo, Nyoo tyatyíño cuan chí ra. Yucuan chaha ñiñi cuñí chí vatyi cuví ra noo ra vaha. Ñima noo ra cahnu sahá chíi, ní ñima noo ra tyityi iñi, ní ñima noo ra tuhvá chíi. Ñima noo ra quixin cuatyí, ní ñima noo ra cuñí xuhun cha ña saha ganaa vaha ra. ⁸Soco tyicuan ri síi cuví chí ra tatu chaa ñáyivi vehe ra. Ta tahan chí cuhva ra nu coo ñu. Cuñí chí cuví ra noo ra cha sacuví cha vaha. Noo ra chitó yoso caa nyaca ñaha ra chí maa ra. Na cuví ra noo ra ndaa iyó, noo ra sacahnú vaha chí Nyoo.

Ta chitó vaha ra cuhva tahán chí sacuvi ra ta ñaniñi ra sacuvi ra. ⁹Ta cunyicon vaha ra tuhun ndicha cha sañahá yo chí ra. Tyicuan ta coto ra sanduní ra iñi inga ñu chihin tuhun vaha ihya. Ta chí ñu catyi tyi ña ndicha tuhun cahan yo, coto ra yoso caa sañaha ra chí ñu tyi ña vaha cahán ñu síqui tuhun Nyoo. ¹⁰Vatyi cuaha xaan ra ndava iñi iyó. Cuaha ra cahán cha ñima ri tuhun, cuaha ra sandaví ñaha. Ta cuaha xaan ca ñáyivi Israel sacuví tyicuan caa. ¹¹Cuñí chí cha casi yo yuhu ra cuan, vatyi cuaha xaan ñáyivi satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahán chí.

¹²Ta suri maa noo ra Creta, noo ra chíiñi tuñi, ra cahán nuu ñu catyi ra tyehe caa: “Ñu Creta, cuendu xaan ñu. Tari quiti cuví ñu. Cuahyi ñu ta suchan ñu”, catyi ra cuan. ¹³Ta cha ndicha catyi ra cuan. Yucuan chaha cuñí chí cha cahan ñihun chihin ñu na saña ñu tuhun cuan, tacuhva vatyi vaha na chino iñi ñu chí ra Cristo. ¹⁴Tacuhva cha ma tyasoho ca ñu tyisu cha ñima ri tuhun cha canasavahá ri maa ñu Israel. Ta ní ma tyasoho ca ñu tuhun cahán ñáyivi cha ña cuñí coto cha ndicha.

¹⁵Cha cuenda ñáyivi cha vaha chicá xiñi, tandihí ta vaha chí ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chí ñu vatyi nyacua nya cuhva chicá xiñi ñu ta cuhva tuví iñi ñu ta ña vaha ta quíñi caa. ¹⁶Catyi ñu vatyi ñohó nuu ñu chí Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quíñi yihí iñi ñu ta ndava iñi ñu. Ta ma cuví sacuvi ñu noo cha vaha.

2

Tuhun vaha cha chahá Nyoo tyi sañaha yo

¹Soco yoho, sañaha tuhun vaha tari cuhva sañahá tuhun Nyoo chí yo. ²Sañahun vatyi ra chahnu, cachi coo ra, tacuhva vatyi na saha ñáyivi ñáyivi chí ra. Ta tyicuan ri cachi caca xiñi ra. Vii cahun ra chihin cha chino iñi ra. Cuñí chí cha cuñí ra chí Nyoo ta chí ñáyivi. Ta cunye iñi ra tandihí. ³Ta tyicuan caa tucu ñu chahnu. Catyi chí ñu na coo ñu noo cuhva cha tahán iñi Nyoo. Ta ma ñiñi ñu cuendu. Ma coho ñu ndixi. Ta na sañaha ñu cha vaha iyó ñu, ⁴na nyehe ñu nicaa tandaha. Tacuhva vatyi cuñí ñu chí yíi ñu ta chí sehe ñu. ⁵Na caca vaha xiñi

ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuvi ñu. Na cuhva ñu cha cunyaca ñaha yí ñu chi ñu tacuhva vatyí yori cuvi cahan ña vaha síqui tuhun Nyoo.

⁶ Ta tyicuan caa tucu ra tyíva. Cuhva tuhun chi ra na cacachi coo ra. ⁷ Ta maun cuñí chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa. ⁸ Maa ri tuhun vaha cahun tacuhva vatyí yori cuvi tyaa cuatyí sicun. Tyicuan ta ra xaan iñi chi ndo cucahan nuu ra vatyí ma ñihi ra cuhva cahan ña vaha ra síqui ndo.

⁹ Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandihi cha catyí ra. Ta ma na cahan ra nu cahan ra. ¹⁰ Ta ma tiin ri maa ra cha chii chitoho ra. Soco na saha vaha ra ñáyivi chi ra, tacuhva vatyí cunyehe ñáyivi vatyí vaha xaan tuhun Nyoo ra sacacú chi yo.

¹¹ Vatyí Nyoo sañahá ra vatyí vaha xaan ñáyivi cuví ra. Ta cuñí ra sacacu ra chi tandihi ñáyivi. ¹² Chihin cuan sañahá Nyoo chi yo vatyí na saña yo cha quiñi caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi coo yo síqui ñuhu ñáyivi ihya, tari cuhva cuñí Nyoo. ¹³ Ta sañahá tucu ra chi yo yoso caa cuatu tuhva yo cha vaha cha cuñihi yo quívi quichi tucu ra Jesucristo. Vatyí cucusií xaan cuñi yo cuhva cha cunyehe yo cha tyaquí quívi quichi ra cuví Nyoo yo ra cahnú ca, ra cha sacacú chi yo. ¹⁴ Chahá ra ñáyivi ra tyiño nuu yo tacuhva sacacu ra chi yo ndaha tandihi cha quiñi caa. Ta sandundií ra chi yo tacuhva na cuvi yo ñáyivi cuenda ra, ta cha yaha tuhun cuan cuñí ra vatyí sacuvi yo maa maa ri cha vaha. ¹⁵ Ican ihya cuñí chi sañahun chi ñáyivi. Sanduniun iñi ñu. Ta cahun nuu ñi chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaá ñu chuun.

3

Cuhva cha tahán chi sacuvi ñu yíhi cuenda Nyoo

¹ Sanicohun iñi ñu tahan yo cuenda Nyoo na quichaha ñu chi gobiernu ta chí ra sacuví tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví

tyiño tyi sacuvi ñu. ² Ta ma cahan ña vaha ñu síqui ni noo ñáyivi. Na taxi ri coo ñu. Vaha ñáyivi na cuvi ñu. Na masu cuvi añima ñu chihin tandihi ñáyivi.

³ Vatyí nyacua nya maa yo ta tyicuan caa cuví yo ta ityi chata ca. Tondo xaan chiyo yo. Ta ndava xaan cuví iñi yo. Ñahri noo ityi vaha chica noo yo vatyí ra cuví cuhna sandahví ñaha ra chi yo. Chinyaca ñaha cuhva ña vaha cha cuñí coño ñuhu yo chi yo. Ta chinyacuví yo tandihi maa cuhva cuñí chi. Tandihi cha iyó chi inga ñáyivi ta cuñi yo coo chi yo. Tasi cuñi yo nyehe yo chi tahan yo. Ta ñáyivi ña cuñi nyehe ñu chi yo. ⁴ Soco Nyoo vaha ñáyivi cuví ra ta sacacú ra chi yo. Yucuan cuvi nu sañahá ra vatyí cuñi ra chi tandihi ñáyivi. ⁵ Ñima cha cuenda cha cachi iyó yo ta sacacú ra chi yo, soco cha cuenda cha ndahvi cuñi ra nyehe ra chi yo. Ta chihin ñihi ra Jesús nacatya yo cuatyí yo ta nacacú chaa yo, ta chahá Tatyí li ra noo ñáyivi chaa coo yo. ⁶ Ta chahá xaan Nyoo cha coo Tatyí li ra añima yo cha cuenda maa ra Jesucristo ra sacacú chi yo. ⁷ Chihin tumañi iñi cha chahá ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chahá ra chi yo, noo ñáyivi cha ma naa ca maa. ⁸ Tandihí tuhun ihya ndicha xaan. Ta cuñi vatyí cahun tuhun ihya nuu ñu chinó iñi chi Nyoo chihin cha ñi iñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandihí ñáyivi tatu quichahá ñu. ⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahnán ñu vatyí ñu cuan ñañí xaan cuñí ñu coto ñu yoso caa vachi tata yo. Ma quichahun chi ñu cañi tahan cha cuenda ley cha tyaa ra Moisés ta cha naha. Ñahri maa tyinyee cuan. Cha ñima ri tuhun cuví.

¹⁰ Tatu iyó ñu cuñí ñu sacusiin ñu chi ñu nyicú vehe ñuhu, caha chi ñu noo chaha o uvi chaha ta catyí chi ñu tyi ña vaha sacuví ñu. Ta tatu ña quichahá ñu, casi nu quichi ñu. ¹¹ Vatyí ma chihin yucuan ri chitón vatyí ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyiño tyaa ra Pablo chi ra Tito

¹² Cutachi chi ra Artemas, o chi ra Tíquico nu nyaún. Quívi chaa ra, nducu cuhva ta

cuhun ñuu Nicópolis vatyí cuñihi tahan yo yucuan. Vatyí tyafí cuhva cuyahi yoo vichin yucuan. ¹³ Ndücu cuhva tyinyeun chi ra Zenas ra chitó xaan ley, ta chi ra Apolos ta cuhva cha chiñuhú chi ra nu cachicá noo ra tuhun Nyoo. ¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndihi cahan ra Pablo

¹⁵ Tandihí ra nyicu chihin, chahá ra nocumi chuun, Tito. Ta na cuhva nocumi chi tandihí ñu cuñí chi ndi cha cuenda cha ñin ri cuví yo cuenda Nyoo. Na nasoco Nyoo chi tandihí ndo.

Carta Cha Sacuhun Ra Apóstol Pablo Chi Ra Filemón

Nu tyaa ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaa ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihí ñu ndu ñin ri vehun. ³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan ñi ra ta chino vaha ñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nicohón ñi tuhun, nu chicán tahvi chi ra. ⁵ Vatyí ñihí tuhun tyi chinó vaha ñiun chi Sutu Mañi yo Jesucristo, ta cuñí xauñ chi ra ta chi ñu yihí cuenda ra. ⁶ Ñáyivi cha sacotón yoso caa cuhva chinó ñiun chi Nyoo, nachingo ñi tucu maa ñu chi ra ta vityin chicán tahvi cha cuenda ñu, na coto vaha ñu tandihí cha vaha cha chahá Nyoo chi yo cha cuenda ra Cristo Jesús. ⁷ Si xaan cuñí, ta vaha xaan cuñí añime vatyí cuñí xauñ chi ñu tahan yo, ta sandunyeún ñi ñu.

Nu chicán ra Pablo noo tumañi ñi chi ra Filemón cha cuenda ra Onésimo

⁸ Vasi iyó chi ityi chíi cha catyi chuun ñáá cha tahán chi sacuvun vatyí apóstol cuví, soco ña cuñí saniñi chuun. ⁹ Vaha ca cha caquen noo tumañi ñi chuun cha cuenda cha cuñí yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús. ¹⁰ Chiquén noo tumañi ñi chuun cha cuenda ra Onésimo vatyí nanduví ra sehi cha cuenda Sutu Mañi yo nu ñohí vehe caa ihya.

¹¹ Quiví cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuví vaha ra tyiño nuu maun. ¹² Ta vityin sacunuhí chi ra chuun. Ta cuñí vatyí naquehen cuenda vahun chi ra tari cha mai cuví. ¹³ Vasi cuñí cha ndoo

ra ihya chihin, ta tyinyee ra chíi tyiño nuu maun cha niri ca cha ñohí vehe caa cha cuenda tuhun Nyoo, ¹⁴ soco ña cuñí cha ndoo ra tyiño nuun tatu ña ndoun vaha, vatyí tacuhva sacuvun tumañi ñi chíi soco chihin cha iyó vaha ñiun ta ñima ca chihin cha saniñi chuun. ¹⁵ Ra Onésimo chaha xaan ra tisihi chuun quiví cuan, soco vaha xaan nanduví ra vityin, vasi yucuan cuenda canyahá ra chuun ta vityin nachaa ra nu nyaún vatyí cuacunyaa ra chuhun tyicuan ri maa ¹⁶ soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñí xain chi ra, ta vihi ca yoho, tahán chi cha cuñí con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahan cuví chíi, cuñí vatyí naquehun chi ra Onésimo tari cha chíi yuhu naquehún. ¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai. ¹⁹ Yuhu ra Pablo tyai tuhun ihya vatyí cutiyahvi cha yosoyicá ra chuun, cha nuu cha tahán chi catyí chuun vatyí yosoyicón nyacua nya ñayivun chíi. ²⁰ Chiquén chuun, yañi, na sandusiun ñi ta naquehun chíi ra Onésimo chihin cha vaha. Sanduchaa añime chihin cha ñin ri cuví yo cha cuenda ra Cristo.

²¹ Tyai tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun. ²² Ta nonga cha chiquén chuun tatu ma sanduvahun chiin noo nu cuví cunyai chihin ndo. Ta cuñí vatyí cacan tahvun cha cuende, na cuhva Nyoo cha cuhin nu nyaá ndo.

Nu ndihí cahan ra Pablo ta chahá ra nocumi chíi ñu

²³ Vachi nocumi chuun sahá ra Epafras, ra ñoho chihin vehe caa cha cuenda ra Cristo Jesús. ²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chíi chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuví chíi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyo ta cha naha. Cahán ra chihin yuhu ra cacuvi profeta, ra cha cachahá cuenda tuhun cahán ra. ² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaa ra ndaha Sehe ra. ñin ri cuví ra chihin Sehe ra ta savahá ra ñuhu ñayivi. ³ Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee iñi tuhun cahán ra, nyisó cuenda ra tandihi cha iyó. Ta cha yahá sandachi ra cuatyí yo, ta chicunyaá ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo ta ñima ca ángel

⁴ Ta tyicuan caa cahnu xaan ca nanduví Sehe Nyoo ta ñima ca tandihi ángel. Ta cahnu ca sivi chahá Nyoo chi ra ta ñima ca ángel cuenda ra. ⁵ Vatyí Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu चाहि ñayivi coun vityín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quivi saquichi Nyoo chi Sehe nuu ra siqui ñuhu ñayivi, catyí ra:

Na sacahnu tandihi ángel cuende chi ra.

⁷ Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende, ta tari yaa ñuhu cuví ra sacuví tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusii iñi चाहि chuun, ta ñima ca chi ra tahun.

¹⁰ Ta catyí tucu Nyoo chi Sehe ra tyehe caa: Yoho, ra nyacá ñaha cuvún. Ta quivi xihna ri savahún ñuhu ñayivi ta chihin ndahun savahún andivi.

¹¹ Maa ñuhu ñayivi ta andivi cundihi chi, soco yoho, cundoun tyicuan ri maa.

Tandihí maa cuan cu cuchahnu tari sahma.

¹² Ta cunicava tahnu chi tari noo vestido.

Ta cunasama chi tari nasamá ñayivi sahma ñu.

Soco yoho suri maa ra cuvún tyicuan ri maa.

Ta ma ndihi maa ñayivún, catyí Nyoo chi Sehe ra.

¹³ Nyoo ni noo chaha ña catyí ra chi ni noo ángel tari catyí ra chi Sehe ra tyehe caa:

Cunyaun chiyo vahi nyacua nya cha caquin chi ra xaan iñi chuun chahun.

¹⁴ Soco tandihí ángel, tatyí cacuví ra ta tyaa Nyoo tyiño chi ra cha caca ra ta tyinyee ra chi ñu cucacu añima.

2

Cahnu xaan cuví tuhun cha sacacú Nyoo añima chi yo

¹ Yucuan chaha vatyí cuñí chi cha quichahá xaan ca yo tuhun ndicha cha chiñi yo, coto cunuho yo ityi quini caa. ² Ta cha naha catyí Nyoo chi ángel, na cuhva ra ley ra chi ra Moisés. Nyoo catyí ra tyi tahán chi quichaha ñayivi. Ta ñu casacuví cuatyí ta ña quichahá ñu ley ra, tachi tuñi ra chi ñu tari cuhva catyí maa ley cuan. ³ Cahnu xaan cuhva sacacú Nyoo añima yo. ¿Yoso caa cucacu añima yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahán ra tuhun yoso caa cuví cacu añima yo. Ta yahá cuan ta ñu cha cachiñi tuhun cahán ra, chitó ñu tyi ndicha ta canacatyí tucu ñu chi maa yo. ⁴ Ta siin ri, Nyoo sañahá cachi ra chi yo chihin cuaha milagru ta cha iyo, vatyí ndicha cha sacacú ra chi yo. Ta chahá ra Tatyí li ra chi yo siin cuhva, yoso cuhva cha cuñí maa ra. Ta chihin tandihí cuan sañaha ra chi yo vatyí ndicha cha sacacu ra añima yo.

Ra Jesucristo cuví ra cha cua sacacu añima yo

⁵ Nyoo, ña chahá ra cha cunyaca ñaha ángel chi ñuhu ñayivi chaa cha cahán yo tuhun vityin. ⁶ Vatyí iyó noo nuu cahán chi nu tutu Nyoo tyehe caa:

Nyoo Suti ζyóo ra cuví rayii vatyi nicohon iñun tuhun ra?

ζYóo ra cuví Sehe ra vatyi tiín cuendon chi ra?

⁷ Vatyi suhva quívi, ndahvi ca sacuvun chi ra, ican saha ángel.

Soco yahā cuan sacahnū xaun chi ra. Ta sahā xaun ñáyivi chi ra.

Ta chahun cha cunyaca ñaha ra siqui tandihi cha savahun.

⁸ Tandihí cuan natyaun ndaha ra.

Tandihí maa, Nyoo chahā cha cunyaca ñaha ra, cuví chi cuan. Soco nyehé yo vatyi cumañi ca quichaha tandihí cuan chi ra.

⁹ Soco nyehé yo chi ra Jesús vatyi suhva ri quívi, sanocuee Nyoo chi ra ican saha chi ángel. Soco cha cuenda cha cuñi xaan Nyoo chi yo, chahā cuenda ra chi ra Jesús cha cúvi ra cha cuenda tandihí yo. Ta vityin sahā xaan Nyoo ñáyivi chi ra ta sacahnū xaan ra chi ra cha cuenda tindoho cha nyehe ra quívi chihí ra.

¹⁰ Tandihí maa cha iyó, cha cuenda maa Nyoo cuví. Ta maa ra savahā. Ta cuñi ra vatyi tandihí sehe ra ta chi maa ñu cucuvi tandihí cha tyaquí cha iyó gloria. Ta chihin tindoho cha sanyehē ra chi ra Jesucristo Sehe ra, sacuvahā ra chi ra. Vaha xaan quita ra. ¹¹ Sehe Nyoo cuví chi ra Cristo, ra sacacú añima ñáyivi. Ta suri sehe Nyoo nanduví chi ñáyivi ñu chinó iñi chi ra. Yucuan chaha vatyi ña cucahan nuu ra Cristo catyí ra yañi ra chi ñu, vatyi iñi ri sutu ra chihin ñu. ¹² Vatyi catyí ra Cristo nu tutu Nyoo tyehe caa:

Cucahin tuhun maun chihin yañi.

Ta cucate yaa cuendon nu ndú iñi ri ñu.

¹³ Catyí tucu ra tyehe caa:

Yuhu cuita iñi chi Nyoo.

Ta catyí tucu ra:

Ihya nyaí chihin sehi, cha chahā Nyoo chi, catyí ra.

¹⁴ Ta tandihí yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandihí, suri coño ñuhu ta niñi ñáyivi nyiso ra suhva quívi, tacuhva cuví chaa tuhun chihi chi ra, ta tyicuan caa ta satani ra chi cuihna, ra cha chiyo tunyee iñi chi cha cahñi chi ñáyivi. ¹⁵ Ta tyicuan caa sacacu ra chi ñu cha yuhvi chi tuhun chihi. Chiyo ñu tari noo musu ra ña vaha vatyi yuhvi ñu cha cúvi ñu. ¹⁶ Cha ndicha vatyi ña quichí tyinyee ra chi ángel, soco

chi ñáyivi tata ra Abraham quichí tyinyee ra. ¹⁷ Yucuan chaha cuñi chi cha nduvi ra tari ñáyivi, tacuhva cuví ra noo ra ndicha cundahvi cuñi chi yo. Ta tyicuan caa cuví ra tata sutu cahnū cha cuenda yo nuu Nyoo. Ta tyicuan caa ta sacuachiyō ra cuatyi ñáyivi cha cuenda tindoho cha nyehe ra. ¹⁸ Vatyi maa maa ra nyehe tindoho quívi nducu nyehe ra ña vaha chi ra, yucuan chaha, vityin cuví tyinyee tucu ra chi maa yo tatu nducú nyehe ra ña vaha chi yo.

3

Cahnu ca cuví ra Jesús ta ñima ca ra Moisés

¹ Yañi, nyoho chahā cuenda ndo chi ndo chi Nyoo. Ta cuví tucu ndo ñu cha nacana Nyoo chii vatyi coo ndo chihin ra andivi. Ta cha cuenda cha nyehe ra Cristo Jesús tindoho tyiño nuu ndo, yucuan chaha, nyehe vaha ndo cuhva vaha iyó ra. Vatyi ican ra cuví ra cha saquichí Nyoo chi vatyi cuví ra tata sutu cahnū cuenda yo cha chinó iñi yo tuhun Nyoo. ² Ta maa ra quichahā ra tandihí cha catyi Nyoo cha sacuvi ra, tari quichahā tucu ra Moisés ta cha naha, ta sacuvi ra tyiño cha tahañ chi sacuvi ra nuu ñáyivi sehe Nyoo. ³ Ta ra Jesucristo cahnū ca ra cuví ra, ta ñima ca ra Moisés. Vatyi noo ra cha savahā vehe, cahnū ca cuví ra ta ñima ca maa vehe cuan. ⁴ Tahan tahan vehe, iyó ra savahā chi chi, soco Nyoo cuví ra cha savahā tandihí maa cha iyó. ⁵ Ra Moisés, quichahā vaha ra chi Nyoo ta sacuvi ra tyiño nuu ra cha cuenda ñáyivi Israel ta cahan ra tuhun cha cusacoto Nyoo nu cuahan ca chi ityi nuu. ⁶ Soco ra Cristo ra cuví Sehe Nyoo, suri quichahā vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu sanií ca yo iñi yo cuhun yo ityi nuu chihin Nyoo ta itá iñi yo chi ra nyacua nya nu ndihi, ta tyicuan ri cusii cuñi yo nyatú yo cha cuñihi yo.

Ñu chinó iñi chi Nyoo, nyitatú ñu chihin Nyoo

⁷ Yucuan chaha cuñi chi saha cuenda yo chi yo, tari catyí Tatyí li Nyoo nuu tutu Nyoo tyehe caa:

Tatu chiní ndo tuhun cahan Nyoo chihin ndo vityin,

⁸ ma sandava ndo añima ndo, tari sacuvi ñu ña quichahā chi Nyoo quívi canducú

nyehe ñu chi ra nu chica noo ñu chiqui ndii cuan.

⁹Tyehe caa catyí Nyoo: Ñáyivi cuan nducu nyehe ñu chii,

vasi chichi cha uvi xico cuiya nyehe ñu cha sacuvi.

¹⁰Yucuan chaha cuxajin chi ñu, ta catyí tyehe caa: “Tyicuan ri chicá uvi iñi ñu,

ta ña cuñí ñu coto ñu ityi mai.”

¹¹Yucuan chaha cuxajin chi ñu, ta catyí cachi chi ñu,

vatyí ma quihvi ñu nyitatu ñu chihin, catyí Nyoo.

¹²Yañi, saha ndo cuenda chi ndo coto cu ña vaha añima ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra. ¹³Soco sanií ndo iñi tahan ndo tahan tahan quívi, cha ni ri ca cha chahá ca chi cuhva vityin, tacuhva vatyí ni noo ndo ta ma sandavi ñaha cha quiñi caa chi ndo, ta ndundava añima ndo. ¹⁴Vatyí tatu sanií yo iñi yo chihin Nyoo nyacua nya nu ndihi ñayiví, yucuan ta iñi ri cuñihi yo cha vaha chihin ra Cristo.

¹⁵Catyí chi nu tutu Nyoo vatyí saha yo cuenda chi yo tyehe caa:

Vityin tatu nyoho ta chiñí ndo cha catyí Nyoo.

Ma sandava xaan ndo añima ndo, tari sacuvi ñu ña quichahá chii, catyí Nyoo.

¹⁶¿Yóó ñu cha cachiñi tuhun cañan Nyoo ta ña tyasohó ñu? Tandihí ñu Israel cha tava ra Moisés Egipto ta cha naha, ican ñu cuan. ¹⁷Ta ¿yóó chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachihi ñu nu chiqui ndii nu chica noo ñu. ¹⁸¿Ta yóó chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasohó nu cañan ra. ¹⁹Nyehé yo vatyí ña cuví quihvi ñu cuan vatyí ña chinqo iñi ñu chi ra.

4

¹Yucuan chaha, cha ni ri ca cha iyó ca quívi cuví quihvi yo cunyitatu yo chihin Nyoo, cuñí chi saha yo cuenda coto ma cuví quihvi nya noo nyoho nu cunyitatu yo chihin Nyoo. ²Vatyí chiñi tucu yóó tuhun Nyoo cha sacacú ra añima yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndii ri maa ñu, ta ña

chinqo iñi ñu. ³Soco yóó cha chinó iñi yo, ican yo cuví ñu quihvi nyitatu chihin Nyoo. Ta cha cuenda ñu ña chinó iñi cuví chi tari catyí Nyoo tyehe caa:

Yucuan chaha cuxajin chi ñu ta catyí cachi chi ñu vatyí ma quihvi ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savaha ra ñuhu ñayiví. ⁴Vatyí yihí nu catyí chi nu tutu Nyoo cha cuenda quívi cu ucha nu ndihi vitya. Tyehe caa catyí chi:

Nyoo nyitatu ra nu cu ucha quívi, vatyí ndihí tyiño sahá ra.

⁵Ta inga tucu chaha catyí chi nu tutu Nyoo tyehe caa:

Ni noo quívi ma quihvi ñu nu cunyitatu ñu chihin, catyí Nyoo.

⁶Ñu cuan, ñu cha xihna ri cachiñi tuhun cha sacacú Nyoo añima yo, ña quihvi ñu cha cuenda vatyí nacahnú ñu nu cañan Nyoo. Soco nyaá cha quihvi inga ñu. ⁷Vatyí cha yahá nacahnú ñu Israel cuan nu cañan Nyoo, natyaa tucu ra cuhva vatyí nya inga quívi cuví quihvi yo cunyitatu yo chihin ra, ta ican cuví quívi vityin. Ta cañan Nyoo tuhun quívi vityin chihin cha catyí ra David. Nyaá chi nu tutu Nyoo tyehe caa: Vityin tatu nyoho ta chiñi ndo cha catyí, Ma sandava xaan ndo añima ndo, catyí Nyoo.

⁸Tyehe ta chinyaca ra Josué chi ñu Israel cuan nu cunyitatu ñu chihin Nyoo, ma cañan ca Nyoo inga chaha tuhun cha cuenda inga quívi. ⁹Soco nyaá ca nu cuví nyitatu ñu yihí cuenda Nyoo chihin ra. ¹⁰Vatyí ñu quihvi nyitatu chihin Nyoo, ña chicá ca iñi ñu soco nyitatu añima ñu tari nyitatu Nyoo quívi ndihí tyiño saha ra. ¹¹Cuñí chi saniñi yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñí ñu chino iñi ñu chi ra.

¹²Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan ninduvi chiyo yuhu, ta nyee chi nyacua nya chichi añima yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá añima yo. Ta sañahá cachi Nyoo ñáá cha chicá iñi yo ta ñáá cha caá añima yo tatu vaha o ña vaha.

¹³Ñahri maa cha savahā Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuví yo.

Ra Jesús cuví ra tata sutu cahnu cha cahán chaha yo nuu Nyoo

¹⁴Ra Jesús Sehe Nyoo, cuví ra tata sutu cahnu cha cuenda yo, vatyi quihví ra nuu Nyoo ta cahán ra chaha yo. Yucuan chaha cuñí chi cha ma sandihí yo cha chinó iñi yo chi ra. ¹⁵Vatyi ra cuví tata sutu cha cuenda yo cuví naquehen ndahvi ra chi yo tatu cuihya cuñí yo chihin Nyoo, vatyi chitó tucu maa ra cha cuví tindoho cha nyehe yo vatyi nyehe tucu maa ra tandihí nuu tindoho, sahā ra ña vaha cha nducū nyehe ra chi ra, soco maa ra Jesús, ñahri cuatyi ra chicog. ¹⁶Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vatyi cuñí xaan ra chi yo, ta ndahvi cuñí ra nyehe ra chi yo. Ta cha cuenda cha vaha ñáyivi cuví ra, tyinyeé ra chi yo nu nyehe yo tindoho.

5

¹Tandihí ra cuví tata sutu cahnu ca cuenda ñu Israel, ñáyivi cuví ra. Ta na cachi Nyoo chi ra vatyi cahan ra chaha tandihí ñu nuu Nyoo, ta cuhva cuenda ra cha chahá ñu chi Nyoo, ta cahñi ra quití cha cuenda cuatyi ñu. ²Ta suri vachi quívi ndahvi cuñí ra cacuví sutu cha nducú nyehe ra ña vaha chi ra, yucuan chaha cuví cundahvi cuñi ra nyehé ra chi ñáyivi ña chitó maa, ta tyinyeé ra chi ñu quitā caxiin ityi vaha Nyoo, na ndu uvi iñi ñu cuatyi ñu. ³Ta cha cuenda cuatyi maa ra ta cha cuenda cuatyi ñáyivi, cachahñí ra quití ta chahá cuenda ra chi Nyoo na cahnya ra cuatyi ñu.

⁴Yori sacuví ri maa sutu chi. Maa Nyoo cuví ra canā chi ra, ta chahā ra cha cuví ra tata sutu, tari sacuví ra chihin ra Aarón ta cha naha. ⁵Ta tyicuan caa tucu ra Cristo, ñima maa ra sacuví ra sutu chi ra, soco maa Nyoo chahā cha cuví ra, tari catyí maa ra tyehe caa:

Yoho cuví Sehi.

Yuhu chahí ñáyivi coun vityin, catyí Nyoo chi ra Cristo.

⁶Tari catyí tucu ra chi ra nu inga nu cahán chi tyehe caa:

Yoho cuvún tata sutu tyicuan ri maa.

Cuvún tari ra Melquisedec.

⁷Ta quívi chiyo ra Cristo ihya siqui ñuhu ñáyivi, chican tahvi ra chi Nyoo, ta chacu chaa ra ta cahan ra chihin Nyoo vatyi ican ra cuví ra iyó tunyee iñi chii cha sacacu chi ra ndaha tuhun chihi. Ta Nyoo chihí ra tuhun cahan ra vatyi sacuví ra tandihí cha catyí Nyoo. ⁸Yucuan chaha vasi Sehe Nyoo cuví chi ra Cristo, soco cutuhvā ra cha quichaha ra chi Nyoo chihin cha nyehe ra tindoho. ⁹Ta cha yahā cha sacuvahā Nyoo chi ra, tyicuan ta cuví ra ra sacacú añima ñáyivi tacuhva coo ñu chihin Nyoo tyicuan ri maa, tandihí ñu cha quichahā tuhun cahán ra. ¹⁰Vatyi Nyoo tyaa tyiño chi ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

¹¹Cuaha xaan nyaá cahan yo siqui tuhun ihya, soco yíi xaan nacatyí yoso caa cuahan, vatyi nyoho ña cuñí ndo cutuñi iñi ndo.

¹²Cha naha xaan chinó iñi ndo chi Nyoo, cuñí chi cha cuví ndo ra sacuahā ta sañaha ndo chi inga ñu. Soco nyoho ni cuñí chi cha nacatyí tucu ndi inga chaha chi ndo tuhun cha xihna ri chihí ndo tuhun Nyoo. Tari cha lee cuví ndo chihin tuhun Nyoo, vatyi tari cha chaxin ca ndo cha nuu cha cachi ndo nyayu. ¹³Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo. ¹⁴Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñí vaha iñi tuhun ra, nacotó ñu nya cha vaha ta nya cha ña vaha.

6

¹Yucuan chaha ma ndoo ri yo chihin cha xihna ri cutuhvā yo tuhun ra Cristo, cahun yo ityi nuu ca tacuhva cuví yo ñáyivi chahnu chihin tuhun Nyoo. Ma ndoo ri yo chihin tuhun cha yahā cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino iñi yo vatyi sacacú Nyoo chi yo. ²Ma ndoo yo chihin tuhun cha yahā sacuvi yo, tari cha condutya yo, tari cha tyisó yo ndaha yo siqui ñu chinó iñi chi Nyoo na nasoco ra chi ñu, tari tuhun cha cunandoto tandihí ñáyivi cha yahā chihí, ta tari tuhun cha cucutuñi chi tandihí ñáyivi nuu Nyoo ta yihí ñu cahun

ñu anyaya tyicuan ri maa. Ma ndoo ri yo chihin tandihí cuan. ³Soco tatu Nyoo ta chaha ra, sacuví yo ihyá: cuhun yo ityi nuu ca.

⁴⁻⁶Vatyí ñu cha yahá naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí li Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihí ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhú ñáyiví chaa. Tatu cha yahá naquehen cuenda ñu tandihí cha vaha cuan noo chaha, ta yahá cuan ta sandihí ñu cha chinó iñi ñu chi Nyoo, ma cuví ca cha ndu uvi iñi ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nyaa ñáyiví chi ra. ⁷Añima ñáyiví cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chi ñuhú cuan. ⁸Soco tatu cañá iñu ta cañá nyava nuu chi, ñahri maa tuhun. Ta cusoco Nyoo chi ñuhú ña vaha cuan ta cucayu chí. Ta tyicuan caa tucu cucuví chi ñu cha sandihí cha chinó iñi chi Nyoo.

⁹Yañi, vasi cahán ndi tyicuan caa, soco chitó vaha ndi vatyí nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan. ¹⁰Vatyí Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyí cuñí xaan ndo chi ñu yihí cuenda Nyoo, vatyí tyinyee ndo chi ñu, ta tyinyee ca ndo chi ñu nya vityin. ¹¹Cuñí ndi vatyí na cuní ca iñi ndo nyacua nya quichi Sutu Mañi yo, tyicuan caa ta cuñihí ndo tandihí cha nyatú ndo. ¹²Ña cuñí ndi cha cusuchan ndo, soco saha ndo cuenda chi ñu cha chinó vaha iñi chi Nyoo ta sacuví ndo tari sacuví ñu. Vatyí ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyaá ra cuhva cha cuhva ra, ta noo ri tuhun cahán ra vatyí maa ra, Nyoo cuví ra. ¹⁴Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham. ¹⁵Ta ra Abraham chihin cha

cama iñi ra, nyatu ra tuhun cahán Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra. ¹⁶Tatu noo ñáyiví cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri. ¹⁷Ta yucuan chaha vatyí Nyoo minoo ri tuhun cahán ra, vatyí cuñí ra cha coto ñáyiví vatyí ndicha tuhun cahán ra, ta ña nasamá ra tuhun cahán ra. ¹⁸Yucuan chaha iyó uvi tahan cha ma cuví nasama chí. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahán ra vatyí maa ra, Nyoo cuví ra. Ta Nyoo ña cahán ra cuendu. Yucuan chaha tandihí yo cha nyañaá yo chi ra, ñi iñi yo cunyeé iñi yo chí ra, ta nyatú yo cha tyaá ra cuhva cha cuhva ra chí yo. ¹⁹Tari noo barcu cha nuñí noo caa vee, coto cuhun chí chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chí ra, nuñí yo chihin Nyoo ra nyaá inga chiyo cortina, o nya gloria cuví Cuan. ²⁰Vatyí ra Jesús cha quihví ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quiví cha cuandichi ra Abraham cha cahán ra chicañi tahan ra chihin suhva ra cacuví rey, ta cuví chasaha ra chí ra, tyicuan ta quita ra Melquisedec ityi nuu ra ta nasoco ra chí ra. ²Ta ra Abraham uchi uchi tinyaa ra siquí cha saha ganaa ra nu chicañi tahan ra, ta chahá ra chí ra Melquisedec. Ta sivi ra Melquisedec cuan cuñí chí catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyiví.” ³Ña catyí tuhun Nyoo yóo cha cuví sutu ra ta sihi ra, ni ña cahán chí tuhun yóo ñáyiví chí ra. Ni ri ña cahán chí tuhun ama cacú ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴Soco, vityin nyehe ndo yoso cha cahnu cuví ra Melquisedec, vatyí ra Abraham tinyaa ra uchi uchi siquí cha saha ganaa

ra chi ra cacuví rey cuan nu chicaní tahanan ra, ta chahá ra chi ra Melquisedec. ⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chi ityí nuu ta suri maa ley Nyoo saniñi chi ñáyivi tata ra Abraham nacuhva ñu uchi uchi cha saha ganaa ñu chi ra cacuví sutu tata ra Leví, vasi tata ra Abraham cacuví chi ra tari maa ñu. ⁶ Ta ra Melquisedec, ñima tata ra Leví cuví chi ra, ta ni ñima tata ra Abraham, soco vita ri tyi quehen ra uchi uchi siqui tandihi cha ñihí ra Abraham. Ta nasoco ra Melquisedec chi ra Abraham, ra cha chahá Nyoo promesa chii. ⁷ Ta chitó cachi yo vatyí cahnu ca cuví ra cha nasoco cuan, ta ñima ca ra cha nasoco ra chi. ⁸ Nyehe yo vatyí cahnu ca ra cuví ra Melquisedec cha nuu inga ra caquehén cuenda uchi uchi siqui cha iyó chi ñáyivi, vatyí rayii ri cacuví ra cuan, ta tuhva chaa tuhun chihi chi ra. Soco tuhun ra Melquisedec cahán chi nu tutu Nyoo ta catyí chi tyi ñahri tuhun chihi iyó chi ra. ⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chi caquehén cha uchi uchi siqui cha iyó chi ñáyivi. Soco tari quívi tyiyahví tucu ra Leví cuan uchi uchi cha saha ganaa ra chi ra Melquisedec cuví cuan, vatyí ra Abraham tyiyahví ra. ¹⁰ Vatyí ra Leví, tata ra Abraham cucuví chi ra, vasi ta cacu ca ra quívi chisatahan ra Melquisedec chi ra Abraham.

¹¹ Ta ra cacuví tata ra Leví suri tata ra Aarón cacuví chi ra, ican ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña niñi ca cha quichí ra Cristo ra cuví tata sutu tari ra Melquisedec, ta ñima tari ra Aarón. ¹² Vatyí tatu Nyoo ta nasama ra chi ra cuví sutu, cuñi tucu chi cha nasama ley ñandihí. ¹³ Ta Sutu Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chi ra. Ta ni noo ra vachi tata cuan ta ña tuhva ra cuví sutu. ¹⁴ Vatyí chitó vaha yo vatyí Sutu Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahán ra quívi cahán ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec.

¹⁶ Ñima tari catyí ley quichí ra, vatyí ley catyí chi yóo chi tata cua quichí noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chihí nyisó ra. ¹⁷ Vatyí ican ihya cuví cha cahán Nyoo tuhun ra: Yoho cuvún tata sutu tyicuan ri maa, Tari ra Melquisedec.

¹⁸ Yucuan chaha sacuachiyo Nyoo ley chahnu cuan vatyí ña cuví maa tyinyee chi chi ñáyivi, ta ña chiñuhú. ¹⁹ Vatyí ley cha chahá Nyoo chi ra Moisés, ña sanduvaha maa chi añima yo. Ta vityin, tyiño nuu ley chahnu cuan, iyó inga tuhun vaha ca cha yihi iñi yo. Ta chihin ihya tuhva yo chi Nyoo vatyí sanduvaha ra Cristo cuhva coo yo chihin Nyoo.

²⁰⁻²¹ Nyoo tyaa ra cuhva ta tyanahá ra vatyí cuhva ra noo sutu cha cahnu ca chi yo. Soco sutu cha iyó vityin ña tyanahá Nyoo quívi tyisó ra chi ra. Vatyí nu tutu Nyoo catyí chi tyehe caa:

Sutu Mañi yo, iin ri tuhun cahan ra, ta ma nasama ra cuhva catyí ra tyehe caa: “Yoho cuvún Sutu tyicuan ri maa, tari cuví ra Melquisedec”, catyí Nyoo.

²² Yucuan chaha ra Jesús chahá ra noo tuhun vaha ca chi yo, ta ñima ca tuhun cha xihna ri cuan. ²³ Vatyí cha cuaha xaan ra cacuví sutu, soco chaa chaa ri tuhun chihí chi ra. ²⁴ Soco ra Jesús ñahri tuhun chihi iyó chi ra, ta ña ndihi tuhun cha cuví ra sutu. ²⁵ Yucuan chaha tyicuan ri maa cuví sacacu ra añima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacán tahvi ra chi Nyoo cha cuenda ñu.

²⁶ Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quíñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andiví. ²⁷ Ñima tari inga ra cacuví tata sutu cuan, vatyí cuñi chi cha cacahñi ra chi quiti ta cuhva cuenda ra chi Nyoo ndi quívi. Ta cha xihna ri, na naa cuatyí maa ra, ta yaha cuan ta naa cuatyí ñáyivi. Soco ra Jesús noo ri chaha, chahá cuenda ra chi ra chi Nyoo na naa cuatyí tandihi yo. ²⁸ Ley Nyoo cha quehen cuenda ra Moisés, tyisó chi chi ra cacuví nuu chi tata sutu, soco ra iyó cuatyí cacuví ra. Soco yaha cuan ta chahá Nyoo noo tuhun chaa, ta iin ri tuhun cahan ra. Ta tyisó ra chi Sehe ra cha cuví ra Sutu cahnu

ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quívi chihí ra Jesús cha cuenda yo

¹Ta chichi cha tandihí cha cahín nu tutu ihya, ican ihya cuví cha niñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo.

²Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savahá vehe cuan, ta ñima rayii.

³Tandihí ra cacuví tata sutu tyiso Nyoo chi ra, vatyí cuhva cuenda ra ofrenda chi Nyoo ta cahñi ra quití na naa cuatyí ñáyivi chihin niñi ti. Ta yucuan chahá niñi cuñí chi cuhva cuenda tucu ra Jesucristo niñi ra chi Nyoo.

⁴Tyehe ta siquí ñuhu ñáyivi nyaá ra cuví ra sutu, ni ñima sutu cuví ra tatu tyicuan caa. Vatyí siquí ñuhu ñáyivi, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaa ra Moisés.

⁵Soco ra cacuví sutu siquí ñuhu ñáyivi, sacuví ra tyiño nuu Nyoo soco tari cuhva cuví andivi. Cuví chi noo xiñahñu tyiño sahá ra Cristo. Ta chitó yo vatyí tyicuan caa, vatyí quívi cha cua savahá ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahí chuun quívi chinyagn nu yucu cuan”, catyí Nyoo chi ra. “Soco ra Cristo ra cuví sutu cahnu chi yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chi yo.

⁷Vatyí tyehe ta cuví cacu añima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha.

⁸Soco Nyoo nyehe ra vatyí ña vaha maa sacuví ñáyivi cuan, ta cahán ra tuhun ñu nu tutu ra tyehe caa:

Cuchaa chi quívi vatyí cunatyihí tahin tuhun chaa chihin ñáyivi Israel ta ñu Judá, catyí Sutu Mañi yo.

⁹Ñima tari natyihí tahin tuhun chihin ñáyivi chahnu ñu, quívi tijn ndaha ñu ta tavé chi ñu ñuu Egipto.

Vatyí ña sacuví ñu tuhun cha natyihí tahin chihin ñu,

ta yucuan chaha sañe chi ñu, catyí Sutu yo Nyoo.

¹⁰Tuhun cha cunatyihí tahin chihin ñu ñuu Israel nu cuahan ca chi, tyehe caa cucuví, catyí Sutu Mañi yo:

Chichi cha chíni tuñi xiñi ñu, cutyai ley mai, ta chichi añima ñu cutyai.

Tyicuan ta mai cucuvi Nyoo ñu, ta maa ñu cucuvi ñu ñáyivi chii.

¹¹Tyicuan ta ña niñi ca cha sañahá ñu chi tahan ñu, ni chi yañi ñu, tacuhva vatyí cohon nuu ñu chi yuhu cha cuví Nyoo ñu.

Vatyí tandihí ñu, cucohon nuu ñu chii, nyacua nya ñu luhlu ca ta nyacua nya ñu chahnu ca.

¹²Ta cusahi ticahnu iñi cha quiñi caa cha sacuví ñu.

Ta ma nicohon ca maa iñi cuatyí ñu, catyí Sutu Mañi yo.

¹³Quívi cha cahán Nyoo tuhun cha natyihí chaa ra tuhun chihin yo, cuñí chi catyí vatyí cha sacuchahnu ra cha xihna ri cuan. Ta numi ri cundihi tuhun cha cuví cha chahnu cuan.

9

Nu sañahá chi yoso caa vehe ñuhu cha iyó siquí ñuhu ñáyivi ta vehe ñuhu nu cuví andivi

¹Quívi natyihí tahan Nyoo tuhun cha xihna ri chihin ñáyivi, chahá ra cuhva chi ñu yoso caa sacahnu ñu chi ra, soco chichi noo vehe ñuhu cha nyaá siquí ñuhu ñáyivi ihya. ²Tyehe caa chino vehe ñuhu cuan: Chata noo cortina nyaá cuarto cha xihna ri nu tayucú cañileru, ta nanyaá mesa nu catuvi pan ii. Ta chicunañi cuarto cuan Nu li. ³Chata cortina cu uvi, yucuan cuví nu chicunañi Nu li Xaan Ca. ⁴Ta yucuan nanyaá noo arta xuhun cuan nu chahmi ra cutu. Ta nanyaá caja, cha natyihí tahan Nyoo tuhun chihin yo, ta iñi xuhun cuan nicacahnu. Ta chichi cuan ñoho casitu xuhun cuan cha ñoho maná. Ta ñoho yutun cha natyacu cha chindahá ra Aarón. Ta ñoho tucu yuu cha nyaá ndi uchi mandamientu. ⁵Ta siquí caja cuan nyicú cha tari caa ángel, ta cuñí chi catyí vatyí nyaá Nyoo yucuan. Ta chihin ndichin ángel cuan cachasí ra nu cuví nu tuhva Nyoo sahá ra ticahnu iñi cuatyí ñáyivi. Cha vityin ña cuví nacatyí ca ndi siquí tuhun ihya.

⁶Ta tyicuan caa cuvī vehe ñuhu cuan. Ta ndiquivī ri caquihvī ra cacuvī sutu chichi cuarta cha xihna ri nu nañi Nu li, tacuhva sacahnu ra chi Nyoo. ⁷Soco cuarta cu uvi Nu li Xaan Ca cuan iyó maa minoo ra cuvī nuu chi sutu, ta yucuan ra cuvī quihvi yucuan, noo chaha cha noo cuiya. Ta cuhva cha quihvī ra, cuñi chi cuiso ra niñi quitī vatyi cuhva cuenda ra chi Nyoo cha cuenda cuatyī maa ra ta cuatyī ñáyivi. ⁸Ta cha tyicuan caa sañahá Tatyī li Nyoo chi yo vatyi, ta cuvī ca chaa yo nuu Nyoo vatyi ni nyaá ca cuarta cha xihna ri cuan. ⁹Tandihi maa ihya cuvī chi tari noo xiñahñu ri cha cuenda tuhun chaa cha chacun Nyoo vityin: vatyi noo cha chahā cuenda ñu chi Nyoo ña tyiñyee chi chi ñu na caca vaha iñi ñu. ¹⁰Vatyi tandihi cuhva sacuvī ra cacuvī sutu cuan cahán chi maa ri cuenda ñáa cha cuvī cachi ñáyivi, ta ñáa cha cuvī coho ñu, ta yoso caa cundundi coño ñuhu ri ñu. Ta catuvī cuhva cuan, nyatu chi nya quivi cacun Nyoo inga cuhva vaha ca.

¹¹Soco vityin cha yahā quichi ra Cristo ta maa ra cuvī tata sutu cahnu cha cuenda tuhun vaha ca cha chacun Nyoo. Quihvī ra chichi vehe ñuhu vaha ca, ta ndi ca, vatyi maa ra cuvī sutu. Ta ñima rayi savahā vehe ñuhu cuan o cuñi chi catyī, ñima vehe ñuhu ñuhu ñáyivi ihya cuvī. ¹²Ra Cristo quihvī ra vehe ñuhu nu cuvī gloria Nu li Xaan Ca. Soco ñima ca cha cuhva cuenda ra niñi mbee luhlu, o becerro, soco niñi maa ra chahā cuenda ra. Ta tyicuan caa quihvī ra noo ri chaha nu ndihi tuhun, ta tyicuan caa ta cuvī sacacu ra chi yo tyicuan ri maa. ¹³Niñi toro, ta niñi ndixihyu, ta ñiyaa becerro cha cachahmī ra nu arta, tuhva ra catyicu ra chata ñu ca iyó cuatyī, ta coño ñuhu ri ñu sandundi chi cuan nuu Nyoo. ¹⁴Ta tatu tyicuan caa, ¡Nana cha cahnu ca tunyee iñi iyó chi niñi ra Cristo! Vatyi tyinyee Tatyī li chi ra ta chahā cuenda ra chi ra chi Nyoo chihin cha ñahri cuatyī ra. Ta niñi ra sandachí chi cha ña vaha cha caá añima yo tacuhva ma cuita ca iñi yo ley cha chahā tuhun chihī chi yo, ta tyicuan caa ta cuvī sacuvi yo tyiño nuu ra cuvī Nyoo nyitó.

¹⁵Yucuan chaha ra Jesucristo cuvī ra cha cahán chaha yo cha cuenda tuhun chaa cha natyihī tahanan Nyoo chihin yo. Ta cha cuenda cha chihī ra, iyó ticahnu iñi cuatyī

cha sacuvī yo quivi chinyacā ñaha tuhun cha xihna ri cuan chi yo. Ta yoó, ñu nacana Nyoo chi cuvī yo, cuvī naquehen cuenda yo noo cha ma ndihi ca maa, cha catyī maa ra tyi cuhva ra chi yo. ¹⁶Vatyi tatu iyó noo tutu cha sandoq noo ra chihī, ta catyī tutu cuan ñáa ndihi cha cuñihi ñáyivi chi ra tatu chihī ra; cuñi chi cha coto vaha ra cuvī tyiño tatu ndicha cha chihī ra cha sandoq tutu cuan; tyicuan ta cuvī sacaca ra tyiño cuan ta nasacha ra cha tahán chi chi ñu cuan. ¹⁷Vatyi cha niri ca cha iyó ra cha sandoq tutu cuan, ma cuvī cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuvī quehen cuenda ñu. ¹⁸Yucuan chaha chihī quitī ta chati niñi ti quivi natyihī tahanan Nyoo tuhun cha xihna ri cuan chihin yo. ¹⁹Quivi cuan, ra Moisés sacoto ra tandihi ley Nyoo chi tandihi ñáyivi. Yahā cuan ta quehen ra noo sahna cuaha cha chinqo chihin ixi mbee ta chihin noo soco yutun cha nañi hisopo, satyī ra nu niñi becerro ta nu niñi ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandihi ñáyivi ñandihi. ²⁰Tyicuan ta quichaha catyī ra chi ñu: “Ican ihya cuvī niñi cha cuvī cha ndaa vatyi natyihī tahanan Nyoo tuhun chihin ndo”, catyī ra. ²¹Ta suri tyicu tucu ra Moisés niñi nu cuvī vehe ñuhu cuan, ta siqui tandihi cha cachotyño ra yucuan nu casacahnú ra chi Nyoo. ²²Tyicuan caa sacuvī ra vatyi catyī ley Nyoo tyi tandihi ta chihin niñi, cuñi chi ndundi nuu Nyoo. Ta catyī tucu chi vatyi ma saha Nyoo ticahnu iñi cuatyī tatu ma cati niñi.

Niñi ra Cristo, ican cuan tinyaa cuatyī yo

²³Ta yucuan chaha cuñi chi cha sacuvī tata sutu tyicuan caa, vatyi ndundi tandihi cuan, vatyi cuvī chi noo xiñahñu cha iyó ityi andivi. Soco tandihi cha cuenda ityi andivi, cuñi chi noo niñi vaha ca cha cuhva cuenda yo, ta ñima ca tari niñi quitī cuan. Cuñi chi niñi ra Cristo. ²⁴Vatyi ra Cristo ña quihvī ra chichi noo vehe ñuhu cha savahā ñáyivi cha cuvī xiñahñu ri. Soco quihvī ra chichi vehe ñuhu cha ndicha vaha cha cuvī gloria. Ta vityin cahán ra chaha yo nuu Nyoo. ²⁵Ra cuvī nuu chi sutu cuenda ñu Israel quihvī ra Nu li Xaan Ca cuan tahanan cuiya vatyi cuhva cuenda ra niñi cha ñima niñi ra cuvī. Soco ra Cristo, ña cuaha chaha

cuñí chi cuhva cuenda ra chi ra. ²⁶ Vatyí tyehe ta tyicuan caa, cuaha chaha cuñí chi cha nyehe ra tindoho ta cúvi ra nyata ching ñuhu ñayiví ta nya vityin. Soco vityin cha cua cuyatyin cundihi tuhun ñayiví, noo ri chaha quichí ra Cristo, ta chahá cuenda ra chi maa ra tacuhva vatyí cuví tinyaa ra cuatyí yo. ²⁷ Noo ri chaha, cúvi yo ta yaha cuan ta cucutuñi chi yo. ²⁸ Ta tyicuan caa tucu ra Cristo, noo ri chaha, chahá cuenda ra chi ra tacuhva tinyaa ra cuatyí cuaha xaan ñáyiví. Yahá cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chi chi ñu nanducú chi Nyoo. Vatyí tahan cuiya ri chahá cuenda ra cuví nuu chi tata sutu cuenda ley chahnu niñi quiti. Soco ma cuví cacu añima yo chihin cuan. ² Vatyí tyehe ta cuví sanduvaha ley cuan chi ñu, cundihi tuhun cha chahá cuenda ra niñi ndicuiya ri. Vatyí tatu cha ndundiñi ñu noo chaha cha cuenda tandihi maa, ma caca ca xiñi ñu vatyí iyó cuatyí ñu ta ña chihuhú ca cha cuhva cuenda ra inga chaha. ³ Soco tahan cuiya ri chahá cuenda ra niñi, ta ican cuan sanicohón chi iñi ñu vatyí iyó cuatyí ñu. ⁴ Vatyí niñi toro ta niñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quiví cuaquichi ra siqui ñuhu ñayiví ihya, catyí ra chi Nyoo tyehe caa:

Na cuñún cha cahñi ñáyiví quiti ta cuhva cuenda ñu chuun,
yucuan chaha savahun noo coño ñuhu chii.
(Vatyí tyicuan caa ta cuví cuhva cuende chii chuun.)

⁶ Ta vatyí ña tahán iñun cha cahmi ñu quiti ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyí sacuvi cuhva cuñún, Nyoo Suti, tari cuhva cahán chi tuhun nu libro ley maun”, catyí ra Jesucristo.

⁸ Cha xihna ri, catyí ra Jesucristo vatyí Nyoo, ña cuñí ra cha cuhva cuenda ñu chi quiti chi ra. Ni cha cahmi ñu quiti cha cuenda cha tinyaa cuatyí ñu, ña cuñí Nyoo, catyí

ra. Vasi maa ri tuhun cha catyí ley chahnu vatyí sacuví yo cuví, soco ña tahán iñi Nyoo, catyí ra. ⁹ Ta yahá cuan ta catyí tucu ra: “Ma yuhu vachi ihya, vatyí sacuvi cuhva cuñún, Nyoo Suti.” O cuñí chi catyí, sacuachiyó Nyoo cuhva chahnu cuan, ta nacuví chi inga cuhva chaa ihya. ¹⁰ Nyoo sandundiñi ra chi yo vatyí ra Jesucristo sacuví ra cuhva cuñi Sutu ra, ta chahá cuenda ra coño ñuhu ra. Noo ri chaha chihí ra ta ndihí tyiño sahá ra.

¹¹ Tandihí ra cacuví tata sutu ñuu Israel, ndi quiví sacuví ra tyiño nuu Nyoo, ta tyicuan ri chahá cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyí yo. ¹² Soco ra Jesucristo, noo ri chaha chahá cuenda ra chi ra chi Nyoo cha cuenda cuatyí yo. Tyicuan ta chicunyaá ra tyayu gloria chiyo ndaha vaha Nyoo. ¹³ Ta yucuan nyatú ra nyacua nya cacun Nyoo chi ra xaan iñi chi ra chaha ra. ¹⁴ Vatyí chihin noo ri chaha cha chihí ra Cristo ta cuví sanduvaha ra añima ñáyiví cuenda Nyoo, tyicuan ri maa. ¹⁵ Ta suri tyicuan caa catyí tucu Tatyí li Nyoo chi yo. Vatyí cha xihna ri catyí ra chi yo nu tutu tuhun Nyoo tyehe caa:

¹⁶ Tuhun cha cunatyíhi tahir chihin ñu quiví cuan, tyehe caa cucuví, catyí Sutu Mañi yo:

Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

¹⁷ Ta yahá cuan ta catyí tucu ra:

Ma nicohon ca maa iñi cuatyí ñu, niri cha quiñi caa cha chinyacuví ñu, catyí Sutu Mañi yo.

¹⁸ Ta cha yahá sahá Nyoo ticahnu iñi cuatyí, ña cuñí ca chi cha cahñi ñáyiví chi quiti, ta cuhva cuenda ñu chi Nyoo cha cuenda cuatyí ñu.

Cuñí chi nanducu yo chi Nyoo

¹⁹ Yucuan chaha yañi, cuví quihvi maa yo Nu li Xaan Ca cuan nu nyaá Nyoo, cha cuenda vatyí cha chatiñi ra Jesucristo ta tinyaa ra cuatyí yo. ²⁰ Cha nuña ra Cristo noo ityi chaa, ityi cuhun yo nu conyito añima yo. Vatyí maa maa cuhva cha chihí ra ta ndata cortina cha chasi nu chinyaá Nyoo. Cha tahnya cortina, ican cuví cha chihí ra, tacuhva nuña ityi quihvi yo ta chaa yo nu nyaá Nyoo. ²¹ Ra Jesús cuví sutu cha nyacá ñaha nu cuví vehe Nyoo andiví. ²² Yucuan

chaha cuñí chi nanducu yo chi Nyoo chihin noo cha ndicha ta chihin cha ñi ñi yo chinó ñi yo chi ra, vatyí maa ra sandundi ra añima yo, tacuhva ma quihí ca ñi yo vatyí iyó cuatyí yo, vatyí tari cha nacatya ra coño ñuhu yo chihin ndutya cuii, na ndu ndi yo nu Nyoo. ²³ Na cuní ca ñi yo chino ñi yo chi Nyoo ta ma ndu uvi ñi yo vatyí Nyoo cuhva ra cha catyí ra vatyí cuhva ra chí yo. ²⁴ Ta cuñí chi nanducu yo cuhva tyinyee yo chi tahan yo, na cuñí ca ñu chi tahan ñu ta sacuví ca ñu cha vaha. ²⁵ Ña tahán chi quehen yo cuhva caá ñu cha sandihí cha quichi nu ndu ñi ri yo, soco cuñí chi cha sanduní yo ñi noo noo tahan yo. Ta yaha ca cuhva cuñí chi tyinyee yo chi tahan yo vityin cha nyehé yo vatyí Sutu Mañi yo cha cuñí chaa quívi quichi ra ta cucutuñi chi tandihí ñáyivi.

²⁶ Vatyí tatu cha yaha chicohon nuu yo cha ndicha, ta ña quichahá yo ta tyicuan ri sacuví ca yo cuatyí, ñahri ca cuhva coo ticahnu ñi cuatyí yo. ²⁷ Ta cutachi tuñi Nyoo chí yo. Ta cutyihí ra chí yo nu cucayu ñáyivi cha xaan ñi chí ra, ta cundihí tuhun ñu. ²⁸ Tatu noo ñáyivi Israel ña quichahá ñu cuhva catyí ley ra Moisés, ta chiyo uvi o uñi testigu, cúvi ñu cuan cha cuenda cuatyí ñu, ta yori cundahvi cuñi nyehe chí ñu. ²⁹ Ta nyaca cuví ñu cha ña quichaha ca chí Sehe Nyoo ta sahá ñu tyi ñiñi ra cha sanduvaha añima ñu cha ñima ri tuhun cuví. Ta chihin ñiñi cuan natyihí tahan Nyoo tuhun chihin yo. Soco cahán ña vaha ñu síqui Tatyí li Nyoo cha chahá tumañi ñi chí yo. Yaha ca cuhva cutachi tuñi Nyoo chí ñu cuan. ³⁰ Vatyí chitó yo vatyí Sutu Mañi yo, ican ra catyí ra tyehe caa: “Yuhu tahán chi tachi tuñi chí ñáyivi, yuhu catyí cha cuví chí ñu.” Ta catyí tucu ra vatyí cutuñi chí ñu nuu ra. ³¹ Ndicha cha iyó Nyoo, ta yucuan chaha tahán chi cuyuhvi yo chí ra, coto tachi tuñi ra chí yo cha cuenda cuatyí yo.

³² Soco ma naa ñi ndo quívi natiñ cuenda ndo cha ndichin Nyoo chichi añima ndo, vatyí quívi cuan cunyeé xaan ñi ndo cha nyehé ndo tindoho cha cuenda ra. ³³ Yihí nyoho cahán ñáyivi chí ndo, ta sanyehé ñu tindoho chí ndo nu tuvi. Ta yihí nyoho uhvi xaan cuví chí ndo cha nyehé ndo cha cuví chí tahan ndo cha tyicuan caa, ta cunyeé xaan ndo. ³⁴ Ta cundahvi ñi ndo chí ñu

ñohó vehe caa, ta chihin cha sií cuñí ndo cunyeé ndo quívi tinyaa ñu cha iyó chí ndo, vatyí chitó ndo vatyí andivi iyó ca cha vaha ca cha cuenda ndo, ta ña ndihí maa cuan. ³⁵ Yucuan chaha ma sandihí ndo cha quihí ñi ndo chí ra Cristo, vatyí nu cuahan ca chí ta cuñihí ndo cha vaha ca vatyí chinó ñi ndo. ³⁶ Cuñí chí cha coo cha cama ñi ndo tacuhva cuví sacuvi ndo cuhva cuñí Nyoo, ta tyicuan caa ta naquehen ndo cha catyí ra tyí cuhva ra. ³⁷ Vatyí nu tutu Nyoo catyí chí tyehe caa:

Ña naha ca ta cuquichi ra cha tahán chí quichi, ta ma cucuee ca ra.

³⁸ Ta catyí Sutu Mañi yo tyehe caa: “Ñu cha sanduvahí añima, chihin cha chinó ri ñi ñu chí yuhu, ta conyito añima ñu.

Soco tatu cunuhu chata ñu, ma cusí cuñi yuhu chihin ñu”, catyí Nyoo.

³⁹ Soco maa yo ña sacuví yo tarí sacuví ñu cuanaá añima, vatyí ñu chinó ñi chí chí Nyoo cuví yo, ta tyicuan caa cucacu añima yo.

11

Cuhva cuñí chí cha chinó ñi chí chí Nyoo

¹ Cha chinó ñi chí chí Nyoo ican cuví cha chitó vaha yo tyi cuñihí yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñihí yo vatyí chinó ñi chí chí Nyoo. ² Ñáyivi chiyo ta cha naha, chingo ñi chí chí Nyoo, ta yucuan chaha quitá vaha ñu nuu ra.

³ Cha cuenda cha chinó ñi chí chí Nyoo, ta chitó yo vatyí savahá ra ñuhu ñáyivi chihin tuhun cahán ra. Ta chitó yo vatyí tandihí cha nyehé yo vityin, chingo chí ta cha naha chihin cha ña tuhva yo nyehé.

⁴ Cha cuenda cha chingo ñi chí chí Abel chí Nyoo, ta chahá cuenda ra noo cha chahá ra chí Nyoo. Ta vaha ca cha chahá ra ta ñima ca cha chahá ra Caín, yañi ra. Ta yucuan chaha natiñ cuenda Nyoo chí ra tari noo ra vaha, ta natiñ cuenda ra cha chahá ra. Yucuan chaha vasi cha chihí ra Abel, soco tarí quívi cahán ca ra tuhun chihin yo vityin, yoso caa tahán chí chino ñi chí chí Nyoo.

⁵ Cha cuenda cha chingo xaan ñi chí chí Enoc chí Nyoo, ta cuanuhu ra chihin Nyoo chihin cha ña chihí ra. Ta ña nañihí ca ñu chí ra, vatyí naquehen Nyoo chí ra. Ta nu tutu Nyoo, catyí chí vatyí cha ni cumañi ca

naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra. ⁶Soco ma cuvi sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

⁷Cha cuenda cha chinqo iñi ra Noé chi Nyoo, ta quichahá ra tuhun cahan Nyoo, cha catyí Nyoo chi ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savahá ra barcu cuan ta sacacu ra chi ñáyivi chi ra. Ta cha cuenda cha chinqo iñi ra chi Nyoo, sandoq ra cuatyí ñu siquí ñu cha ña quichahá chi Nyoo, na tachi tuñi ra chi ñu. Ta cha cuenda cha chinqo iñi ra Noé chi Nyoo cuvahá ra nuu ra.

⁸Ta cha cuenda cha chinqo iñi ra Abraham chi Nyoo, ta quichahá ra chi ra quívi cana ra chi ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chi ra. Quita ra ñuu ra chihin cha ña chitó ra nya cuahan ra. ⁹Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chi ra. Chiyo ra noo vehe sahna ri, ta suri tyícuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chi ninduvi ra cuan tyi cucuhva ra ñuhú cuan chi ra. ¹⁰Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacún cuhva ñuu cuan ta maa ra savahá ra, ta chicha cimientu tyihi ra chaha.

¹¹Ta suri chinqo iñi tucu cu Sara cha catyí Nyoo chi ña cha cucoo sehe ña. Ta vasi cha chahnu xaan ña, soco chahá Nyoo fuerza ra chi ña, ta chicoq sehe ña. Tyícuan caa cuvi vatyí chinqo iñi cu Sara cha catyí Nyoo chi ña. ¹²Yucuan chaha vasi cha nyaña quívi cha cúvi ra Abraham, soco chicoq sehe ra. Ta yahá cuan cuaha xaan ñáyivi cacú cha cuví ñu tata ra. Tari cha cuaha tiñoq andívi, ta tari cha cuaha niyiti yuhu tyañuhu, vatyí ña cuví nacahvi yo.

¹³Tandíhi ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chi ñu. Soco vasi ta naquehen cuenda ca ñu ta chihí ñu soco nyehe cachi vaha ñu chihin cha chinó iñi ñu. Ta sii xaan cuñí ñu. Ta chihin cuan

cutuñí iñi ñu ta cahan ñu tuhun vatyí noo ñu yahá ri siquí ñuhu ñayiví ihya cuví ñu.

¹⁴Vatyí ñu cacahán tyehe caa, cuñí chi catyí vatyí ni nanducú ñu noo nu coo ñu. ¹⁵Tyehe ta chicá ca xiñi ñu ñuu nu quita ñu, totyehe cuví cunuhu ñu nyicuan. ¹⁶Soco vatyí cuñí ñu noo ñuu vaha ca, o cuñí chi catyí nya gloria, yucuan chaha Nyoo ña cucahan nuu ra cha cuví ra Nyoo ñu. Vatyí cumí ra noo ñuu nu cuví coo ñu.

¹⁷Ta cha cuenda cha chinqo iñi ra Abraham chi Nyoo, yucuan cuenda quichahá ra nu cahan Nyoo ta tyaá ra cuhva cha cahñi ra chi sehe mañi ra ra Isaac, quívi nducu nyehe Nyoo chi ra tu ndicha cha chinó iñi ra, vasi suri maa Nyoo catyí ra ¹⁸vatyí cuaha xaan ñáyivi cucuvi tata ra chihin ra Isaac cuan. ¹⁹Soco ña yuhví ra Abraham cuacuhva cuenda ra sehe ra chi Nyoo, vatyí chitó ra vatyí Nyoo, iyó tunyee iñi chi ra nyacua nya cha sanandotó ra ndiyi. Ta tari quívi sanandotó Nyoo chi sehe ra, vatyí cha nyaá cha cua cahñi ra chi ra, ta nacuhva Nyoo chi sehe ra chi ra inga chaha.

²⁰Ta ra Isaac chinqo tucu iñi ra chi Nyoo. Ta yucuan chaha catyí ra vatyí sehe ra, ra Jacob ta ra Esaú, cuñihi ra cha vaha nu cuahan ca chi. ²¹Ta ra Jacob chinqo iñi ra chi Nyoo, cuhva cha cua cúvi ra. Ta catyí ra vatyí tahan tahan sehe ñañi ra, sehe ra José, cuñihi ra cha vaha. Ta sacahnú ra chi Nyoo nu nanyaá ra chihin yutun cha tuví ra. ²²Ta ra José ñandíhi, chinqo iñi ra chi Nyoo, ta catyí ra, cuhva cha cua cúvi ra, vatyí ñu Israel, ñáyivi chi ra, cu quita coyo ñu ñuu Egipto cuan nu cuahan ca chi. Ta sandoq ra tyiño chi ñu, vatyí na naquehen ñu yíqui ra quívi quita ñu ñuu cuan.

²³Cha cuenda cha chinqo iñi sutu ra Moisés ta sihi ra chi Nyoo, yucuan chaha quívi cacú ra, nyehe ñu tyi noo cha lee tyaquí xaan cuví ra. Ta yihí iñi ñu cha cusacacu Nyoo chi ra ta ma cúvi ra, vasi catyí rey cuan vatyí cúvi ndíi ra cuatya. Ta ña yuhví ñu ta tixehé ñu chi cue uñi yoo. ²⁴Ta ra Moisés tucu, chinqo iñi ra chi Nyoo. Ta quívi cha chahnú ra, ña cuñí ca ra cha cuvi sihi ra chi ñaha sehe rey ñuu Egipto cuan. ²⁵Ta ni ña cuñí ra ndoo ra ñuu Egipto cuan vatyí cusii iñi ra o cunyacuví ra cha quíñi caa. Vatyí chitó ra tyi tuhun iin yaha ri cuví cuan. Soco vaha taxin ca cuñí ra nyehe ra tindoho chihin ñáyivi cuenda Nyoo. ²⁶Ra Moisés,

vaha ca cuñí ra cha nyehe ra ticahan nuu cuenda ra Cristo vatyi cahnú ca cha tyayii cuví cuan chi maa ra ta ñima ca tandihí cha tyayii cha iyó ñuu Egipto. Vatyi chitó ra tyi cua cuhva Nyoo cha vaha chi ra. ²⁷ Ta cha cuenda cha chingo iñi ra Moisés chi Nyoo, ta quitá ra ñuu Egipto, ta ña yuhví ra cha cuxaán rey cuan. Ta sanyee xaan ra iñi ra. Tari cha vatyi nyehe ra chi Nyoo cha ña nyehé yo.

²⁸ Cha cuenda cha chingo iñi ra Moisés chi Nyoo ta sanducahnú ra vico cha cahñi ñu noo mbee luhlu, ta tachí ra nacahyu ñu niñi ti yuvehe ñu, tacuhva vatyi ma cahñi ángel Nyoo chi ni noo sehe nuu ñu Israel. ²⁹ Ta cha cuenda cha chingo iñi ñu Israel chi Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuví yaha ra vatyi nacasi Nyoo tyañuhu cuan siquí ra ta cachihí ra chichi ndutya cuan.

³⁰ Ta cha cuenda cha chingo iñi ñu Israel chi Nyoo, ta chico ñu ucha tahan chaha chata ñuu Jericó, ta tandihí cuí maa nu sama chata ñuu cuan canacoyo. ³¹ Ta cha cuenda cha chingo iñi cu Rahab, ñaha cata iñi cuan, chi Nyoo, ta ña chihí ña iin ri chihin ñu ñuu ña, ñu ña quichahá chi Nyoo, vatyi maa ña, tyinyee vaha ña chi ra Israel, ra chahan coyo chinyehe tatu cuví chasaha ra tinyaa ra ñuu ña chi ra nyacá ñaha ñuu cuan.

³² ¿Ñáa ca cha cuví catyi vityin? Cuaha xaan cuhva cucuñi chi chii tatu cahín tuhun ra Gedeón, ra Barac, tuhun ra Sansón, ra Jefte, ta tuhun ra David, ta ra Samuel ta tuhun ra cacuví profeta Nyoo ta cha naha.

³³ Cha cuenda cha chachingo iñi ra chi Nyoo, ta yihí ra saha ganaa ra chi inga ñuu nahnu. Ta yihí ra vaha xaan chinyacá ñaha ra ñáyivi cuenda Nyoo. Yihí ra ñihí ra cha catyi Nyoo tyi cuhva ra chi ra. Yihí ra chasi ra yuhu ndicaha. ³⁴ Yihí ra ña cayu ra chihin ñuhú chichi horno nu catyihí ra chi ra. Yihí ra cacú ra cha cahñi ñáyivi chi ra chihin mityi. Yihí ra cha ñahri fuerza chi ra, soco candunyeé ra, ta chiyo xaan fuerza chi ra chichi cuatyí cuan, ta cuví chasaha ra chi sindaro cuenda ñu xaan iñi chi ra. ³⁵ Ta chicoo suhva ñusihi, nandoto ñáyivi chi ñu.

Ta inga ñáyivi chihí ñu chihin cha cuaha xaan tindoho sanyehe ñáyivi chi ñu, soco

ña sandoq ñu chi Nyoo vasi chihí ñu cha catyi ra, vatyi chitó ñu, vatyi tatu ma sandihí ñu cha chinó iñi ñu chi Nyoo, cunandoto ñu ta cucoo ñu noo ñáyivi vaha xaan ca. ³⁶ Ta inga ñu nyehe ñu tindoho cha cahán nyaa ñáyivi chi ñu ta cañi ñu chi ñu. Ta inga ñu chinuhñi ñu chihin cadena ta cuahan ñu vehe caa. ³⁷ Yihí ñu chihin yuu chahñi ñáyivi chi ñu. Yihí ñu chahnya ra chihin cierra chi ñu. Yihí ñu nducu nyehe ñáyivi chi ñu. Yihí ñu chihí ñu cha chahñi ñáyivi chi ñu chihin mityi. Yihí ñu chica noo ñu ta ñahri sahma ñu. Chihin ñi mbee ri ta ñi ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehe ñáyivi cha ña ñohó nuu Nyoo tindoho chí ñu. ³⁸ Ta ñáyivi ña ñohó nuu Nyoo ña nañá ñu cha cu iin ri ñu chihin ñáyivi ndahvi cuan vatyi vaha ñu nuu Nyoo. Chica noo ndahvi ñu ityi chiqui ndi, ityi yucu. Chiyo ñu chichi yavi yuu ta yavi ñuhú. ³⁹ Tandihí maa ñu vasi cahan vaha Nyoo siquí ñu cha cuenda cha chinó iñi ñu chi ra, soco ña ñihí ñu cha catyi Nyoo cha cuhva ra chi ñu. ⁴⁰ Vatyi natyaa ra cuhva, cha cuhva ra nonga cha vaha ca chi ñu vatyi natyihí ra cuenda chi yo ta iin ri cutahan chi chi yo chihin ñu cuan.

12

iin ri chi ra Jesús tahán chi cuita iñi yo

¹ Tandihí ñáyivi cuan quitá vaha ñu vatyi chingo iñi ñu chi Nyoo. Ta vityin chihin cuan sanduniñi ñu iñi yo ta nyatú ñu nyehe ñu tatu quita vaha yo. Yucuan chaha cuñi chi cha sacuachiyó xiin yo tandihí cha sayangá chi yo, tandihí cuatyí cha nyicón chi yo. Ta chihin cha cama iñi yo ta cuhun yo ityi nuu ca chihin Nyoo. ² Iin ri chi ra Jesús quihí nuu yo, vatyi maa ra chahá ra cha chinó xaan iñi yo chi Nyoo, ta chahá ra tandihí cuhva tahán chi chino iñi yo. Ta cha ni cumañi ca cúvi ra, chitó ra vatyi sií xaan cucuvi chí ra cha yaha cúvi ra. Yucuan chaha, chahá ra cha cahñi ñáyivi chí ra. Ña quichahá ra ticahan nuu cha cúvi ra tari chihi noo ra iyó cuatyí, ta vityin nyaá ra chiyo vaha Nyoo gloria.

³ Saha ndo cuenda cuhva chiyo ra Jesús, vatyi nyehe xaan ra tindoho saha ñu iyó cuatyí. Yucuan chaha ma cutatu ndo, ta

ma ndu uvi iñi ndo cha nyicón ndo chi ra. ⁴ Vatyí nyoho ta chaa ca ndo nyehe ndo tindoho cha cuenda cha cañí tahan ndo chihin cha quíñi caa, tari nyehe ra Cristo tindoho ta chihí ra. ⁵ ¿Atu cha naa iñi ndo tuhun chahá Nyoo chí ndo tari cha sehe ra chi ndo? Catyí ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyí ra saquehén ityi yuhu chi, chaha cha cuñí chi ra, vatyí sehi cuví chi ra, catyí Nyoo.

⁷ Cunyee ndo ta cutuhva ndo tatu saquehen ityi ra chi ndo, vatyí Nyoo, sehe vaha ra sahá ra chi ndo. Vatyí tandihí ra iyó sehe, saquehén ityi ra chi sehe ra. ⁸ Vatyí tatu ña saquehén ityi Nyoo chí ndo, ñima sehe vaha ra cuví chi ndo, soco tatu saquehén ityi ra chi ndo, sehe vaha ra cuví chi ndo.

⁹ Ta siin ri, ta nyihi yo, sutu yo ihya ñáyiví saquehen ityi ra chi yo, ta sahá yo ñáyiví chi ra. Ta nyaca cuví Nyoo, tahán tucu chi saha yo ñáyiví chí Sutu yo Nyoo, tyicuan ta coo añima yo tyicuan ri maa. ¹⁰ Sutu yo cuenda coño ñuhu yo, saquehen ityi ra chí yo suhva ri quiví, yoso cuhva cha cuñí chí. Soco Nyoo saquehén ityi ra chí yo cha cuenda noo cha vaha ca chí yo, vatyí sa ii ra chí yo tari maa ra, cha ii ra. ¹¹ Ndicha vatyí ña tahán iñi yo cha ndohó yo vatyí uhvi chí yo. Soco chihin cha ndoho yo, cutuhva yo coo yo noo ñáyiví vaha.

Yíca xaan tatu ma quichaha yo cha catyí Nyoo chí yo

¹² Yucuan chaha sandunye ndo iñi ndo, ta ma quíñi iñi ndo cha ma cuví cunyicon ndo chí ra Cristo. ¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chí ndo ta nduvaha ndo nuu Nyoo ta ma cucuihya ca cuñí ndo.

¹⁴ Saniñi ndo coo vaha ndo chihin tandihí ñáyiví. Ta coo ndo noo ñáyiví cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chí ra. ¹⁵ Saha ndo cuenda chí ndo coto yihí ndo, ma ñihi ndo tumañi iñi cha iyó chí ra. Ta saha ndo cuenda chí ndo, coto cuví ndo tari noo yutun cha chahá chíti uva, ta coto quehen ñáyiví cha caá ndo ta tiví ñu nuu Nyoo. ¹⁶ Ta ni noo ndo ta maa coo ndo chihin ñáyiví

tatu ñima ñasihi ndo o yíi ndo cuví. Ni ma cuñi ndo vatyí tuhun Nyoo noo cha ñima ri tuhun cuví, vatyí tyicuan caa sacuví ra Esaú, vatyí chihin noo nyayu ri, xicó ra tandihí cha tahán chí chí ra cha cuví ra sehe nuu sutu ra. ¹⁷ Ta chitó ndo vatyí cha yaha cuan ta cuñí ra Esaú cha nasoco sutu ra chí ra, soco ña cuví ca. Ta vasi chacu vavaha ra, soco ña ñihi ca ra cuhva nasamá ra cuhva cha chinyacuví ra.

¹⁸ Ta maa ndo chaa ndo nuu nyaá Nyoo soco ñima tari chaa ñu Israel cuan quiví chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduñaa iñi, ta ñihi xaan tatyí. ¹⁹ Ta chihí ñu nativí cutu cuihya ta cahan Nyoo chihin ñu. Ta ñu cha chihí tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu ²⁰ cha cuenda vatyí ña cunyeé iñi ñu tuhun cha chahá ra chí ñu. Vatyí catyí ra tyehe caa: “Tatu quihvi noo ñáyiví, cahní ndo chí ñu chihin yuu o chihin lanza, cuví ri ñu ñáyiví o quiti”, catyí Nyoo chí ñu.

²¹ Yuhvi xaan ñu cha nyehé ñu yucuan, vatyí nyacua nya ra Moisés ta catyí ra: “Ñihi xain chihin cha yuhví”, catyí ra.

²² Soco yóó ña nyehe yo cha yuhvi cuan vatyí noo yucu cha nañí Sión nu cuví ñuu Nyoo nyitó chaa yo. O cuñi chí catyí ñuu Jerusalén cha nyaá andiví, nu nyicú cuaha mil ángel. ²³ Candú iin ri yo vatyí sacahnu yo chí Nyoo vatyí ndú iin ri tandihí ñu cha cuví sehe Nyoo cha nyicú sivi nu tutu nya andiví. Ta chaa yo nuu Nyoo cha cuví juee chí tandihí ñáyiví. Iin ri nyicú yo chihin añima ñu vaha cha sanduvahá maa Nyoo.

²⁴ Ta natuhva ndo chí ra Jesús ra cuví ra cahan chaha yo vityin cha natyihí tahan Nyoo tuhun chaa chihin yo. Ta chatí ñiñi ra. Ta ican chí chahá noo cha vaha ca ta ñima ca cha chahá ñiñi ra Abel. (Vatyí ra Abel chihí ra ta tachí tuñi Nyoo chí yañi ra. Soco chihí ra Jesús, ta iyó tucahnu iñi cuatyí yo.)

²⁵ Yucuan chaha saha yo cuenda coto ma quichaha yo chí ra cha cahan chihin yo. Vatyí ñu Israel cuan, ña cacu ñu cha ña cuñí quichaha nu cahan Nyoo quiví cahan ra nu cuví yucu Sinaí ihya síqui ñuhu ñáyiví. Ta nyaca cuví yóó, ma cuví maa cacu yo tatu nacuhva yo chata yo chí ra cha cahan chihin yo nya andiví vityin. ²⁶ Quiví cuan ndusu Nyoo sacandá chí ñuhu ñáyiví.

Soco vityin catyí chi tyehe caa: “Noo ri ca chaha cusacande ta ñima ñuhu ñayivi ri, soco andivi ñandihi.” ²⁷ Ta cha catyí ra vatyí cusacanda ra nonga chaha, cutuñi ñiñi yo vatyí cucuachiyo tandihi cha nyaá ii ri cha savahá Nyoo. Ta cundoo cha ma cuvi nacanda. ²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha ñiñi yo, ta chihin cha saha yo ñayivi chi ra, vatyí tyicuan caa tahán ñiñi ra. ²⁹ Vatyí Nyoo cuenda yo, cuví ra tari noo ñuhú cha chahmí tandihi, ta tyicuan caa cusanaa ra tandihi cha ña vaha.

13

Na coo yo kuhva tahán ñiñi Nyoo

¹ Ma sandihi ndo cha cuñí ndo chi tandihi ñu yíhi cuenda Nyoo tari cha tahan ndo chi ñu. ² Ta ma naa ñiñi ndo cha cuvaha ñayivi cuví ndo chihin ñayivi cha chaá vehe ndo. Vatyí iyó chaha cha cuenda cha vaha ñayivi cuví ndo, ta chahá ndo nu coo ñayivi; chi ángel, chahá ndo nu coo, ta ña tuví ñiñi ndo.

³ Ma naa ñiñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñayivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñayivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandahá ndo tahán chi saha ndo ñayivi chi yíi ndo o chi ñasihi ndo. Vii coo ndo chihin tahan ndo, vatyí Nyoo cutachi tuñi ra chi ñu iyó yíi ta iyó inga ra chi ñu, o ra iyó ñasihi ta iyó inga ñusihi chi ra.

⁵ Ma cuñi xaan ndo xuhun. Ndogo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra. ⁶ Yucuan chaha cuví catyí yo chihin cha ñiñi yo:

Sutu Mañi yo cuví ra tyinyee chíi,
Ma yuhvi ñáá cha sacuvi ñayivi chíi.

⁷ Nijochon ñiñi ndo chi ra cayihí ndaha vehe ñuhu, ra cacahán tuhun Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo kuhva cha vaha xaan chinó ñiñi maa ra chi Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví

ra vityin. Ta ican ra cuví ra nuu cuahan ca chi tyicuan ri maa. ⁹ Ma cuhva ndo cha sandavi ñaha ñayivi chi ndo chihin tuhun siin caa cha sañahá ñu. Vaha ca cha cu ñiñi ñiñi ndo chihin cha cuñí Nyoo chi yo, ta ñima ca tuhun cha sañahá ñu cuan: cha yíca cha cachi yo. Ña tyinyee maa cuan chi ñu nyacuví tyicuan caa.

¹⁰ Iyó noo arta cha cuenda yo. Nu chati ñiñi ra Cristo nu cruzi, ican cuan cuví. Ta ñu cuñí cacu chihin cha quichahá ñu ley chahnu cha quichahá ra cacuví sutu ta cha naha, ma cuvi tyinyee ra Cristo chi ñu. ¹¹ Ra cuví sutu cahnu cuenda ñu Israel chinyaca ra ñiñi quiti Nu Ii Xaan Ca cuan cha cuenda cuatyí ñayivi, soco coño ti chinyaca ra ityi chata ñuu vatyí cayu chi. ¹² Ta tyicuan caa tucu ra Jesús, tyaa Nyoo tyiño chi ra cha nyehe ra tindoho ta cúvi ra ityi chata ñuu Jerusalén, tacuhva vatyí sandundi ra chi yo chihin ñiñi ra. ¹³ Ma cahan nuu yo nyehe yo tindoho ticahan nuu cha cuenda ra Cristo, tari nyehe tucu maa ra cha cuenda yo quivi chahán ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahan nuu yo nyehe yo tindoho cha cuenda tuhun ra. ¹⁴ Vatyí ihya siquí ñuhu ñayivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihi tuhun ñuhu ñayivi ihya. ¹⁵ Yucuan chaha vityin cha ñohó ra Cristo añaima yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra. ¹⁶ Ta ma naa ñiñi ndo cha sacuví ndo cha vaha. Ta tyinyee ndo chi tahan ndo chihin cha iyó chi ndo, vatyí ican ihya cuví cha tahán ñiñi Nyoo.

¹⁷ Quichaha ndo tuhun cahan ra casaquehén ityi chi ndo, ta cuhva ndo chi ndo cunyaca ñaha ra vatyí nyicú ra tyiño casahá cumi ra añaima ndo. Ta coo quivi cutahan chi cunacuhva ra cuenda tyiño casahá ra chi Nyoo. Nducu ndo cuhva sacuvi ndo cha vaha, tacuhva vatyí chihin cha sií cuñi ra cuhva ra cuenda ndo nuu Nyoo, vatyí tatu ña sacuví ndo cha vaha, chihin cha cuihya ñiñi ra cuhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñí añaima ndi chihin Nyoo, ta cuñí ndi cha cacán tahvi ndo chaha ndi vatyí cuñí ndi sacuví ca ndi cha vaha. ¹⁹ Ta

chiquén noo tumañi iñi chi ndo cha ca-
can tahvi ndo chiin chahi tacuhva vatyí
nacuhva Nyoo cuhin cucunyai cha numi ri
chihin ndo inga chaha.

Nu ndihí cahan ra ta nacuhva ra nocumi
chi ñu

²⁰Nyoo ican ra iyó cha taxi chi ra, ican ra
sanandoto ra chi Sutu Mañi yo Jesucristo,
ra cuví ra sahá vaha cuenda chi yo tari
cha cuví yo mbee sana ra. Ra Cristo chatí
niñi ra, ta chihin cuan natyihí tahan Nyoo
tuhun chaa cha ma ndihí ca maa chihin yo.

²¹Na cuhva Nyoo cha vaha chi ndo tacuhva
cuví sacuvi ndo cuhva cuñí ra. Ta na
sacuvi maa ra cha cuñí maa ra cha cuenda
ra Jesucristo chihin tandihí maa yo. ¡Na
sacahnú yo chi ra Cristo tyicuan ri maa! ¡Na
cuví chi tyicuan caa!

²²Yañi, chacú ndahvi nuu ndo, na cunye
xaan iñi ndo chihin tuhun cha chahí ihya
chi ndo, vatyí ña cuaha xaan tyai nu tutu
ihya chi ndo. ²³Coto ndo vatyí ra yañi yo,
ra Timoteo, cha quitá ra vehe caa. Ta tatu
nachaa ra cha numi ri, cuhun ra chihin, na
cuhin cunyehe nu nyicú ndo.

²⁴Cuhva ndo nocumi chi tandihí ra
sañahá chi ndo, ta chi tandihí ra yañi yo
cuenda ra Cristo. Nu Italia ihya, tachí ñu
nocumi chi ndo.

²⁵Ta Nyoo na nasoco ra chi tandihí maa
ndo. Ta na cuví chi tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyivi Israel ñu yihí cuenda ra Cristo. Ta quití cuatyi ndo siin siin ñuu.

Cha chiñi tuñi cha chahá maa Nyoo

²Yañi, cuñí chi vatyi sií cuví chi ndo tatu cuaha nuu tindoho nyehé ndo. ³Vatyi chitó ndo tatu nyehé ndo tindoho tari cha vatyi Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo. ⁴Saña ndo na quichi maa tindoho síqui ndo, vatyi ican cuví cha sacóo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyivi chicha chihin tuhun Nyoo, ta cuacunye ndo tandihí cuí maa tindoho cha vachí ca síqui ndo.

⁵Tatu nya noo nyoho cumañí cha chiñi tuñi chi ndo, cācan ndo chi Nyoo. Ta Nyoo cuhva ra. Ta ñima chiin ri chahá ra chi ñu chican chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo. ⁶Soco cuñí chi cācan yo chi ra chihin cha chinó vaha iñi yo. Ta ma quihí iñi yo vatyi ma cuhva ra chi yo. Vatyi ñu cha ña chinó vaha iñi, cuví ñu tari ndutya yuhu tyañuhu cha tyandahá tatyi chíi siin siin ityi. ⁷⁻⁸Ta tyicuan caa maa ñu cuan, siin siin cuhva chícá xiñi ñu, vatyi siin cha chican ñu vityin ta siin cha chican ñu tyaan, ta ña nñi iñi ñu sacuví ñu noo cha sacuví ñu. Ña tahán chi quihí iñi ñu vatyi cuñihí ñu cha cuacuhva Sutu Mañi yo chi ñu. ⁹Tatu iyó noo ra yañi yo, ndahvi ra, cuñí chi cusii cuñí ra vatyi Nyoo nacoñehé ra chi ra. ¹⁰Soco tatu noo ra yañi yo, tyayii ra, cuñí tucu chí cha cusii cuñí ra tatu ndundahvi ra, vatyi ra tyayii cuví ra tari noo ita cha nyaá nu cuhu, vatyi ña naha maa chiyó chí. ¹¹Vatyi tatu cañá ñanyii ta ihñi vavaha cuhu cuan, na ityi chí. Ta ita cuan canacavá ri ta ndihí cha tyaquí chí. Ta tyicuan caa tucu ra

tyayii, cuquichi tuhun chihi chi ra ta ndoó maa tyiño sahá ra.

Yoso caa cunyeé yo tindoho

¹²Ñana cha sií cuví chi ndo cha cunyeé ndo chihin cha cama iñi ndo ñáá tindoho cha vachí chí ndo. Vatyi tatu cunyeé ndo, cuñihí ndo tari noo corona. Vatyi Nyoo cucuhva ra chí ñu cuñí chí ra, cha coo ñu ñáyivi chaa chihin ra. ¹³Tatu nya noo nyoho quichí cuví iñi ndo cha sacuví ndo cha ña vaha, ma cuñi ndo vatyi Nyoo sacuví cha caca xiñi ndo tyicuan caa. Vatyi Nyoo ña quichí cuví iñi ra sacuví ra cha ña vaha. Ta ni ña tyiyuhú ra chí yo cha sacuví yo cha ña vaha. ¹⁴Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chícá xiñi maa ndo cha ña vaha, yucuan chaha canacava ndo nu cuatyi. ¹⁵Tatu cuhva xaan yo cuhva cha quihí tuhun ña vaha iñi yo, cuacoo noo quivi ta cuasacuví yo cuhva ña vaha cuan, ta tyicuan caa cacu cuatyi yo nuu Nyoo. Ta Nyoo tachi tuñi ra cuatyi cuan ta cuchaa tuhun chihi chí yo. ¹⁶Yañi yuhu, cuñí xain chí ndo. Ma sandavi ñaha ndo chí ndo. ¹⁷Tandihí cha vaha ta cha vii cha ñihí yo, quichi chí nya ityi síqui vatyi maa Nyoo chahá ra. Ta maa ra savahá ra ñuhu cha iyó andivi: tiño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra. ¹⁸Ta chahá ra ñáyivi chaa cha iyó yo cha cuenda tuhun ndicha cha cahán ra. Vatyi xihna ca yo cuví cha nduchaá cha nuu tandihí ca cha savahá ra. Vatyi tyicuan caa cuñi maa ra.

Noo ityi cha ndicha cha tahán chi cuhun yo

¹⁹Yucuan chaha yañi, noo noo yo ta cuñí chí cha vatyi cohon iñi yo cha tyasoho yo, soco cuñí chí cha ma vatyi xaan nacahán yo ta ma vatyi xaan cuxaan yo. ²⁰Vatyi ñáyivi cha cuxaán, ña nyacuví ñu cha tahán iñi Nyoo. ²¹Yucuan chaha saña ndo cha ña vaha ta cha quihí caa cha cuaha xaan iyó síqui ñuhu ñáyivi. Ta natiin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyi tuhun Nyoo cuan iyó tunyee iñi chí chí vatyi sacacú chí añima yo. ²²Soco sacuví yo yoso cuhva sañahá tuhun Nyoo. Ta ma cuñi ri maa yo vatyi tatu tacuhva chiñí ri maa yo, suri chí maa yo sandavi ñahá yo. ²³Vatyi ñu cha chiñí ri maa tuhun Nyoo ta ña sacuví ñu, cuví ñu

tari noo ñu cha nyehé chi nu ino. ²⁴Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu. ²⁵Soco inga ñu cha nyita ri tyasohó tuhun Nyoo, vatyí sacuví vaha ñu cha chiniñ ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa sii xaan cucuvi chi ñu. ²⁶Tatu nya noo ñáyivi cuñí maa ñu vatyí ityi Nyoo cuahan ñu, soco ña nyatú yuhu ñu cahan ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví. ²⁷Vatyí ityi ndicha, ityi vaha nuu Nyoo Sutu yo ican cuví ihya: Cha tyinyeé yo chi ñu nyehe tindoho, ñu yori sutu ta sihi, ta ñu chihij yíi. Ta inga, cha sahá vaha yo cuenda chi yo coto sacuvi yo cha quiñi caa cha sacuví ñu ña ñohó nuu Nyoo.

2

Ña tahan chi cuñí yo chi noo ñáyivi ta chi inga ñu ma cuñí yo. Inuu ri tahan chi cuñí yo chi ñu

¹Yañi yuhu, nyoho chinó iñi ndo chi Sutu Mañi yo Jesucristo ra cha cahnu ca cuví, ta ña tahan chi cha vaha ca cahán ndo chihin noo ri ñáyivi, ta chihin inga ñu ma cahan ndo. ²Vatyí tatu quihví noo ra tyayii nu nyicu ndo, yihí xehe xuhun cuan ndaha ra, ta ñinu sahma ra, ta quihví tucu nonga ra cha ñihno sahma chahnu ri. ³Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunyaa ihya noo nu vaha.” Ta chi ra ndahvi cuan catyí ndo chi ra: “Yoho cunanyaa yucuan o cunyaa ihya nu ñuhú”, catyí ndo chi ra. ⁴Ña vaha tatu sacuví ndo tyicuan caa, vatyí ña inuu ri sahá ndo ñáyivi chi ñu, ta cha tyicuan caa, ña vaha cha chicá xiñi ndo.

⁵Yañi, tyasoho ndo tuhun ihya. Nyoo nacachí vaha ra chi ñu ndahvi ihya ñáyivi, vatyí ta cuhva cuví ñu ñu tyayii chihin cha chinó xaan iñi ñu chi Nyoo, ta cuñihi ñu nu vaha nu nyacá ñaha ra. Vatyí ican ihya cuví cha catyí ra tyi cuhva ra chi ñu cuñí chi ra. ⁶Soco nyoho chahá ndo ticahan nuu chi ñu ndahvi. Ta ¿atu ña chitó ndo vatyí ñu tyayii, ican ñu cuví ñu cha chahñí ndahvi chi ndo? Ta chinyacá ñu chi ndo nuu ra cuví tyiño. ⁷Ta ¿atu ña chitó ndo vatyí ican ñu cuví ñu

cahán ña vaha siqui ra Cristo? Ta cuenda ra Cristo yihí ndo.

⁸Tatu ndicha cha sacuví ndo tandihi cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chi tahan ndo tari cuñí ndo chi maa ndo.” ⁹Soco tatu chi noo ri ñu cuñí ndo. Ta chi inga ñu ña cuñí ndo, chicoó cuatyí ndo. Ta iyó cuatyí ndo nu ley Nyoo. ¹⁰Vatyí tatu noo ñáyivi sacuví ñu tandihi cha catyí ley, ta cumañí ñu noo ri cha catyí chi, cuví chi tari cha tandihi ley ña sacuví ñu. ¹¹Vatyí Nyoo catyí ra vatyí ma coo inga ñusihi o inga rayii chi ñu, tatu iyó yii ñu o iyó ñasihi ra. Ta suri maa ra catyí vatyí ma cahñi yo. Yucuan chaha tatu noo ñu ña sacuvi ñu cuatyí cha ña iyó inga rayii o inga ñusihi chi ñu soco chahñí ñu, suri ña quichahá ñu cha catyí ley. ¹²Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo. ¹³Vatyí ñu cha ña cundahvi cuñí nyehe chi inga ñu, Nyoo cusacutuñi ra chi ñu, soco ma cundahvi cuñí ra nyehé ra chi ñu. Soco ñu cha ndahvi cuñí nyehé chi inga ñu, cuquita vaha ñu cuhva cha cutuñi chi ñu.

¿Ñáa cha sacacú chi yo, cha chinó iñi yo o cha sacuví yo cha vaha?

¹⁴Yañi, ñáa ri tuhun tatu catyí ndo vatyí chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo? ¹⁵Vatyí tatu noo ñu tahan yo cumañí sahma ñu, cumañí cha cachi ñu, ¹⁶ta minoo nyoho catyí ndo chi ñu: “Cuñan ta Nyoo na cociu ra chuun. Na coo ca sahmon ta cha cachun”, catyí ndo. Soco ña chahá ndo cha chihuhú chi ñu. ¿Ñáa ri tuhun cuan? ¹⁷Ñahri yahvi nyaa cha catyí yo vatyí chinó iñi yo chi Nyoo, ta ña tyinyeé yo chi tahan yo.

¹⁸Vasí yihí ndo cua catyí ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeé chi tahan yo.” Vaha. Soco yuhu catyí chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvún ta ña tyinyeún chi tahan? Ma cuví. Soco yuhu chihin cha tyinyeé chi tahan yo sañahí chuun vatyí chinó vaha iñi chi Nyoo. ¹⁹Ta yoho chinó vavaha iñun tyi iyó noo ri Nyoo.

Vaha cha chinó iñun. Soco cuihna chinó tucu iñi ra cuan tyi iyó noo ri Nyoo. Ta nihí ra chihin cha yuhví ra vatyí ma cacu ra. ²⁰Ma tondo xaan caca xiñun. Na cutuñi iñun vatyí tatu chinó iñi yo ta ña sacuví yo cha vaha, ñahri yahví nyaa cha chinó iñi yo. ²¹Ra Abraham sutu chahnu yo, cuví ra noo ra vaha nuu Nyoo cha cuenda cha sacuví ra cha catyí Nyoo. Vatyí chahá ra chi sehe ra, ra Isaac chi Nyoo tari cuhva catyí Nyoo chi ra. ²²Nyehún vatyí chinó iñi ra Abraham chi Nyoo ta chaha cha chinó iñi ra ta sacuví ra tuhun cha catyí Nyoo chi ra tyi sacuvi ra. Ta nu sacuví ra cuhva catyí Nyoo chi ra, yucuan cuví nu natuvi vaha cha chinó iñi ra chi Nyoo. ²³Ta tyicuan caa ching cava tari cuhva catyí nu tutu Nyoo tyehe caa: “Ra Abraham ching iñi ra chi Nyoo ta yucuan chaha Nyoo sahá ra tuhun tyi vaha ra nuu ra.” Ta iyó inga nu catyí chi: “Ra Abraham, nanduví ra amigo Nyoo.”

²⁴Ta tyicuan caa nyehe yo vatyí vaha yo nuu Nyoo cha cuenda cha nyacuví yo cha vaha, ta ñima cha cuenda cha chinó ri iñi yo chi ra. ²⁵Ta tyicuan caa tucu cu Rahab ñaha cata iñi cha chiyo ta cha naha. Yahá cha sacuví ña cuatyí, sacuví ña cha vaha quívi chahá ña nu cacohon xehe ra cha tachí ra Josué. Ta tyinyee ña chi ra cha cuhun ra inga ityi. Ta cha cuenda cuan Nyoo sahá ra tuhun tyi vaha ña. ²⁶Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yihí chichi coño ñuhu cuan, ñahri ca vale chi. Ta tyicuan caa yoó, tatu ña sacuví yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹Nyoho yañi, ma vatyí xaan quichi cuví iñi ndo cuví ndo noo ra sañahá tuhun Nyoo. Vatyí nyuhu cha sañahá ndi tuhun Nyoo, tatu ña vaha sañahá ndi, cahnu ca cuatyí cuví, ta cuaha ca cutachi tuñi Nyoo chi ndi. ²Vatyí ni noo yo ta ña sacuví yo maa maa ri maa cha vaha. Soco tandihí yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahán yo, cuñí chi catyí vatyí ñahri cuatyí yo vatyí cuví tucu cunyaca ñaha yo tandihí coño ñuhu yo. ³Vatyí tatu tyihí yo yoho

yuhu caballo cuví cunyaca ñaha yo chi ti, vasi cahnu ti. ⁴Ta tyicuan caa tucu noo barcu cahnu, vasi cahnu chi soco chihin noo vitu luhlu ri cha nyaá chata chi, cuví sacuhun ra chi chi nya ityi nu cuñí maa ra, vasi ñihí tatyí. ⁵Ta tyicuan caa tucu yaa yo. Cuví chi noo cha luhlu ri. Soco cahnu xaan cahnu xaan nanduví noo tuhun luhlu ri cahan yaa yo. Tari nahnu cuví cayu chihin ñuhu lee cha tyaa yo chichi cuhu ta ndii maa yutun cayu. ⁶Vatyí tyicuan caa yaa yo tari noo ñuhu luhlu cuví chi. Ta cuví chi tari noo cha quíni caa cahnu cha ñohó chichi coño ñuhu yo, ta sativí chi chi coño ñuhu yo ta tandihí cuhva iyó yo ñáyivi, vatyí suri maa cuihna, ican tyiyuhú chi chi. ⁷Ñáyivi cuví samasu ñu tandihí ri nuu quiti: saa, coo, ta quiti cha iyó chichi tyañuhu, ta samasú ñu chi ti. ⁸Soco yori cuví samasu yaa yo. Vatyí cuví chi noo cha ña vaha cha ña chahá chi cha cunyaca ñaha yo chi chi. Tari noo coo, tyaá ti chi ñáyivi, tyihí ti venenu ti ta chihí ñáyivi. Ta tyicuan caa yaa yo. ⁹Vatyí suri chihin yaa yo sacahnú yo chi Nyoo Sutu yo. Ta suri chihin cuan cahán ña vaha yo chi ñáyivi cha savahá Nyoo tari cuhva caá maa ra. ¹⁰Suri maa chihin yuhu yo sacahnú yo chi Nyoo. Ta suri chihin cuan cahán yo cha quíni caa. Soco yañi, ña tahán chi cha sacuví yo tyicuan caa. ¹¹Vatyí, ¿atu cuví quita ndutya vixi ta ndutya uva noo ndohyo? Ma cuví. ¹²Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta tyicuan caa ma cuví quita ndutya uhva ta ndutya vixi noo ndohyo.

Cha chiñi tuñi cha vaha ca

¹³Tatu yihí ndo cha chitó ndo ta iyó cha chiñi tuñi chi ndo, sañaha ndo chihin cha cachi iyó ndo. Ta sacuví ndo cha vaha chihin cha ma cahnu saha ndo chi ndo, vatyí iyó cha chiñi tuñi Nyoo chi ndo. ¹⁴Soco tatu iyó tuhun nyiyo iñi ña vaha chichi añima ndo, sacuví ndo cha sacuví ndo soco cha cuenda cha cuñí ndo cuvaha ndo nuu ñáyivi, ta cha tyicuan caa nyacuví ndo, ña tahán chi cuyaa ndo tyi iyó cha chiñi tuñi chi ndo, vatyí cha cuyaa ndo, sandaví ñaha ndo cuví cuan, ta tixehe ndo cha ndicha. ¹⁵Vatyí tatu chicá xiñi ndo tyicuan caa ñima cha chiñi tuñi Nyoo cuví cuan, soco cuhva chicá xiñi ñu ña ñohó nuu Nyoo

cuví. Cuenda cuihna cuví. ¹⁶ Vatyí tatu nyiyo iñi ndo ta cuñí ndo cuvaha ndo nuu ñáyiví, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo. ¹⁷ Soco tatu iyó cha chiñi tuñi Nyoo chi ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñáyiví chihin cha vita iñi ndo. Ta vaha ñáyiví cuví ndo. Ta cachi vaha chicá xiñi ndo. Ta cundahví cuñi ndo chi ñáyiví. Ta nducú ndo cha vaha chi tandihí ñáyiví chihin cha ñi iñi ndo. ¹⁸ Tatu nanducú yo cha coo vaha yo chihin ñáyiví, ta sañihi yo coo taxi ri yo chihin ñu, cuacoo yo noo ñáyiví cha cuíti.

4

Ma sacuvi yo cuhva cuñí coño ñuhu yo

¹ ¿Ñáá tuhun iyó tisihi nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñí coño ñuhu ndo. Vatyí tyicuan ri iyó cha cuñi ndo ta yucuan sacaíñi tahan chi ndo. ² Nyoho cuñi ndo coo ñáá ndihí cha coo chi ndo. Ta ñahri iyó chi ndo. Tyicuan ta sataí iñi ndo ta chahñi ndo tacuhva ñihi ndo. Iyo tahan ndo chihin cha nyiyo iñi ndo ñáá cha nyehé ndo soco ña cuví ñihi ndo. Tyicuan ta cañi tahan ndo. Iyó cuatyí nu nyicú ndo soco ña ñihí ndo cha cuñi ndo. Vatyí ña chicán tahvi ndo chi Nyoo. ³ Ta tatu chicán tahvi ndo chi Nyoo, ni ri ña ñihí ndo cha cuenda vatyí ña vaha chicán ndo. Vatyí cuñi ndo soco cha sanaa ndo cha caca noo ri maa ndo cuhva cuñí ñáyiví. ⁴ Na ndicha cha chinó iñi ndo chi Nyoo. ¿Atu ña chitó ndo vatyí tatu nyacuví ndo cuhva cuñí ñáyiví, ñu xaan iñi chi Nyoo cuví ndo vatyí ña nyacuví ndo cuhva cuñí Nyoo? Yucuan chaha tatu yihi ndo nyacuví ndo cuhva cuñí ñáyiví, ñu xaan iñi chi Nyoo cuví ndo. ⁵ ¿Atu cha caha ri catyí nu tutu Nyoo vatyí Tatyí li cha chahá Nyoo coo añaíma yo, cuñí xaan chi chi yo, ta cuiño xaan chi chi yo? Cuñí Nyoo cha ñi ri chi maa ra cua cuñi xaan yo. ⁶ Soco tyinyee ca ra chi yo tacuhva vatyí cuvi nacuhva ndihí yo chi yo chi ra. Yucuan chaha catyí tucu tuhun Nyoo vatyí Nyoo ña tahán iñi ra chi ñu cahnu saha chii. Soco tyinyee ca ra chi ñu nacotó tyi chiñuhu ra chi ñu. ⁷ Ican tuhun nacuhva vaha ndo chi ndo chi Nyoo. Ma quichaha ndo nu cahán cuihna chihin

ndo. Ta maa ra cucacacono ra nyehé ra chi ndo. ⁸ Tuhva yatyin ndo chi Nyoo ta maa ra tuhva yatyin ra chi ndo. Nyoho ñu iyó cuatyí, sandundií ndo chi ndo. Ta nyoho cha uvi nyaa xiñi ndo sandunií ndo iñi ndo ta cuhva ndo na sacutu Nyoo añaíma ndo chihin cha vaha, tyicuan ta cundundií ndo nuu ra. ⁹ Cuciuhya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chihin cha sií cuñi ndo cuacu ndo chihin cha cuihya iñi ndo. Ta cha sií cuñi ndo na nanduvi chi tucuihya iñi. ¹⁰ Ndahvi saha ndo chi ndo nuu Sutu Mañi yo, ta maa ra cusanducahnu ca ra chi ndo.

Ma nyehé nyaa yo chi tahan yo

¹¹ Yañi, ma cahan ña vaha ndo siquí noo tahan ndo. Vatyí ñu cha cahán ña vaha siquí noo tahan, o nyehé nyaa ñu chi ñu, siquí ley Nyoo cahán ña vaha ñu ta nyehé nyaa ñu. Vatyí tatu nyehé nyaun, juez nasahún chuun cha nuu cha quichahún nu cahán ley cuan. ¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco ¿yóó ñu cuví yoho vatyí nyehé nyaun chi inga ñu, ta sacutuñun chi ñu tari cha juez cuvún?

Ña chitó yo ñáá cha cucuvi chi yo tyaan, ta yucuan chaha ña tahán chi cahnu saha yo chi yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cuhun yo ñuu cuan, o inga ñuu cuan. Ta yucuan cunyaan yo noo cuiya vatyí sahatyíño yo ta saha ganaa yo xuhun”, catyí ndo. ¹⁴ Ta ni ña chitó ndo cha cucuvi tyaan. Vatyí ñáyiví cha iyó yo cuví chi tari noo vico nuhu vatyí noo ri cuhva yihi chi, ta tañi ri ta cha naa tucu chi. ¹⁵ Soco tahán chi catyí ndo tyehe caa: “Tatu Sutu Mañi yo ta cuñi ra, coo yo ta sacuvi yo ihya o yucuan.” ¹⁶ Soco nyoho nyee xaan ndo cuñi maa ndo ta cahnu sahá ndo chi ndo. Ta ña vaha tyicuan caa. ¹⁷ Vatyí tandihí yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

5

Nu catyí ra Santiago ñáá cha cucuvi chi ñu tyayí

¹ Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo,

canachaa ndo cha cuenda tindoho cha cunyehe ndo. ²Vatyi cha tyayii cha sacayá ndo, cha cuñí tíví. Ta sahma finu ndo, ndii maa cha cuñí cachi tiquixin. ³Xuhun cuaan ndo ta xuhun cuichin ndo cuxi vavaha chi. Ta yucuan chahá chi noo seña cha chinyacuví ndo. Ta tari quívi cha cucahmi chi chi ndo tari cayu ñuhu vatyi cucunaa ndo. Tyi sacayá xaan ndo cha tyayii ndo tyi cotyiño ndo tyaan. ⁴Ta ña tyiyahví ndo yahví cha tahán chi chi ñu ndahvi cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chiñí ra tuhun cahán ñu ndahvi cuan. ⁵Ihya siquí ñuhu ñayiví tyaquí iyó ndo, tyayíí iyó ndo. Ta sacuví ndo yoso cuhva cuñí maa ndo. Tari nduxahan quini cha cucúvi, tyicuan caa nyoho, vatyi cucunaa ndo. ⁶Ta nyoho tyaa ndo cuatyí chaha ñáyiví vaha. Ta chahñí ndo chi ñu. Ta ñu ndahvi cuan ña cuví sacacu ñu chi ñu.

Cuatu yo chi ra Cristo chihin cha cama iñi yo

⁷Yucuan chaha, yañi, nyatú yo chihin cha cama iñi yo nyacua nya quívi quichi Sutu Mañi yo. Tari noo ra cha sahá tyiño chi huhu nyatú ra nyacua nya cha coon savi cha xihna ri ta cha yaha savi nu ndihi, tyicuan ta naquehen ra ñáá cha tachí ra. ⁸Ican tuhun cuatu ndo chi Nyoo chihin cha cama iñi ndo. Ta cuní ca iñi ndo vatyi cha cuyatyin cha quichi Sutu Mañi yo.

⁹Yañi, ma tyaa ndo cuatyí chaha tahan ndo, coto tachi tuñi Nyoo chi ndo. Vatyi Nyoo, juez cuví ra. Ta cha cuñi quichi ra. ¹⁰Yañi, saha ndo cuenda cuhva chiyo ra profeta cha chaha cuenda tuhun Sutu Mañi yo ta cha naha, vatyi cuhva cha canyehé ra tindoho, cacunyeé xaan ra. ¹¹Chitó yo vatyi sii xaan cuñí ra cha cunyeé tandihi nuu tindoho. Tari ra Job. Chiñí ndo tuhun yoso caa cunyeé ra tindoho cha nyehe ra. Ta chitó ndo vatyi nu ndihi tuhun, cuaha xaan cha vaha chahá Sutu Mañi yo chi ra. Vatyi Sutu Mañi yo iyó xaan ticahnu iñi chi ra. Ta cundahvi cuñi ra nyehe ra chi yo. ¹²Soco yañi, ma tyanaha ndo tacuhva chino iñi ñáyiví vatyi ndicha cha sacuví ndo. Ma tyanaha ndo ni tuhun andiví, ni tuhun ñuhu ñayiví, ni ma catyi ndo: “Chitó vaha maa Nyoo.” Tatu ndicha tuhun cahán

ndo, ndicha catyi ndo. Soco tatu chitó ndo tyi ña ndicha, catyi ndo tyi ña ndicha, vatyi coto tachi tuñi Nyoo chi ndo.

¹³Tatu nya noo nyoho nyehé ndo tindoho, cacan tahvi ndo chi Nyoo. Ta tatu nya noo ndo sii cuñí ndo, cata ndo yaa Nyoo. ¹⁴Tatu nya noo ndo cuhví ndo, cuñí chi cana ndo chi ra nyisó tyiño vehe ñuhu vatyi cacan tahvi ra chaha ñu cuhví cuan ta tyihi ra acetye chi ñu chihin sivi ra Cristo. ¹⁵Ta tatu chinó vavaha iñi ra chi Nyoo cuhva cha chicán tahvi ra, ñu cuhvi cuan cucacu ñu. Ta Sutu Mañi yo cusanducuita ra chi ñu. Ta tatu sacuví ñu cuatyí, Nyoo cusaha ra ticahnu iñi cuatyí ñu. ¹⁶Yucuan chaha nahma ndo cuatyí ndo nuu tahan ndo. Ta cacan tahvi ndo chaha tahan ndo vatyi na nduvaha ndo. Vatyi nu chicán tahvi noo ra vaha chicá chihin Nyoo iyó xaan tunyee iñi Nyoo. ¹⁷Tari ra Elías ra profeta Nyoo ta cha naha. Cuví ra noo rayii tari maa yo. Ta chicán tahvi ra chi Nyoo vatyi ma coon savi. Ta ña coon savi uñi cuiya sisava. ¹⁸Yahá cuan ta nacacan tahvi tucu ra chi Nyoo inga chaha. Ta nacoon savi inga chaha. Ta cuvaha chiti cha tachi ñáyiví nu ñuhú. ¹⁹Yañi, tatu noo tahan ndo sandoo ñu tuhun ndicha Sutu Mañi yo, ta cuanuhu ñu ñayiví inga chaha, ta tatu tyinyee ndo chi ñu na ndichi ñu ityi Nyoo inga chaha, ²⁰coto ndo vatyi cha tyinyee ndo chi ñu sacuví cuatyí cuan na ndihvi ñu ityi Nyoo inga chaha, sacacú ndo añima ñu ndahvi cuan coto huhun ñu anyaya. Ta sacuví ndo vatyi saha Nyoo ticahnu iñi tandihi cuatyí ñu.

Carta Cha Xihna Ri Cha Sacuhun Ra Apóstol Pedro Chi Náyivi Yihí Cuenda Nyoo

Nu tyaa ra Pedro noo carta chi náyivi yihí cuenda Nyoo

¹Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyai noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityí Ponto, ta Galacia, ta Capadocia, ta Asia ta Bitinia. ²Chi nyoho nacachí vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí li tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundií ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñayiví chaa cha ma naa ca maa. Ta yucuan cuví cha chahá cha cuita iñi yo cha cuñihi yo vatyí cha nandoto ra Jesucristo. ⁴Ta Nyoo cuacuhva ra tandihí cha tahán chi chi yo cha cumí vaha ra nya andiví. Ta cuví chi noo cha ma naa ta ni ma tiví, ta ni ma ndahva chi tari ndahva ita. ⁵Ta vatyí chinó iñi yo chi Nyoo maa ra sahá cumí chi yo chihin tunyee iñi ra nyacua nya cacu ndihi añima yo. Ta cusañaha ra chi yo ñáa cha cuñi chi catyí cha cacú yo nu cuandihí tyembu. Vatyí cha nyatú tuhva cuan chi yo.

⁶Ta yucuan chaha sñi xaan cuñí ndo, vasi tahán chi cha nyehé ndo ndihi nuu tindoho suhva quivi. ⁷Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihi. Soco cuví nyehe yo chihin ñuhu tatu vaha chi, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo

tindoho vityin. Soco tatu ña ndu uví iñi ndo cha chinó iñi ndo chi ra, cutuvi ndo nuu ra ta cusacahnu ñayiví chi maa ra ta chi maa ndo quiví quichi Sutu Mañi yo Jesucristo inga chaha.

⁸Nyoho cuñí ndo chi ra Jesucristo vasi ta nyehe ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sñi xaan sñi xaan cuñí ndo nyacua ña ñihí ca ndo cuhva catyí ndo yoso cuhva cha sñi cuñí ndo. ⁹Vatyí cucacu ndihi añima ndo ta yucuan cuví cha cuñihi ndo vatyí chinó iñi ndo chi Nyoo.

¹⁰Siquí cuan canducú tuhun ra profeta Nyoo ta cha naha. Ta canducú xaan ra cuhva coto ra ñáa cha cuví cuan. Ta catyaa ra nu tutu cuenda tumañi iñi cha cucuhva Nyoo chi yo. ¹¹Ta Tatyí li ra Cristo sacoto chi chi ra ñáa ndihi tindoho cunyehe ra Cristo, ta yaha cuan yoso caa cusanducahnu Nyoo chi ra. Ta profeta cuan canducú xaan ra cuhva cacoto ra yóo ra cucuvi ra Cristo cha cucuvi chi tyicuan caa, ta ama cucuvi tuhun cha catyí Tatyí li chi ra. ¹²Soco sacoto Nyoo chi ra vatyí tyiño cha casacuví ra, ñima cha vaha chi maa ra cuví, soco cha vaha chi maa yo cuví. Ta ican cuví cha sacoto ndi chi ndo vityin. Vatyí chihin tunyee iñi maa Tatyí li cha saquichí Nyoo, cañan ndi tuhun ra Cristo nuu ndo yoso caa sacacú ra chi yo. Ta ángel cacuñí xaan ra cacoto ra tuhun ihya.

Nacana Nyoo chi yo vatyí coo yo noo ñayiví cachi

¹³Yucuan chaha saha vaha ndo cuenda cha cua sacuvi ndo, ta cachi coo ndo. Quíhi vaha iñi ndo cha cuacuhva Nyoo chi yo cha cuenda cha cuñí ra chi yo. Cuaha cuacuhva ra chi yo quiví quichi ra Jesucristo inga chaha. ¹⁴Ta coo ndo tari noo sehe cha quichahá chi nu cañan sutu chi. Ma coo ndo tari chiyo ndo quiví ta ni cumañi ca cohon nuu ndo chi Nyoo. Vatyí cha ña vaha cha cuñí coño ñuhu ndo chinyaca ñaha chi chi ndo. ¹⁵Soco coo ndo noo ñayiví ndii, vatyí maa Nyoo, ra cha nacana chi ndo, ndii ra. ¹⁶Vatyí tyicuan caa catyí Nyoo nu tutu ra. “Cundií ndo vatyí mai ndii”, catyí Nyoo.

¹⁷Tatu tuhva ndo chicán tahví ndo chi Nyoo ta catyí ndo “Sutu Mañi yuhu” chi ra, saha ndo cuenda chi ndo ta saha ndo ñayiví chi ra cha ni ri ca cha iyó ndo siqui ñuhu ñayiví. Vatyí Nyoo ña sahá ra cuenda cuhva cañan yo. Soco sahá ra cuenda cuhva

iyó noo noo yo, an cuví ri yo ñu tyayii, an cuví ri yo ñu ndahvi. ¹⁸ Nyoo nasama ra cuhva chiyo ndo, vatyi cuhva cuan ña vaha, Cuhva cha sanandoq Sutu chahnu ndo chi ndo cuví. Ta chitó ndo tyi Nyoo tyiyahvi ra tacuhva cuvi cacu añima yo. Soco ñima chihin xuhun cuan o xuhun cuichin. Noo cha cundihi noo quivi cuví cuan. ¹⁹ Soco cha tyiyahvi maa Nyoo chihin ñiñi ra Cristo. Ta yucuan cuvi noo cha vaha xaan ca. Ta ra Cristo cuví ra tari noo mbee luhlu quiti vaha, ñahri nu pehe ti, tyicuan caa ra Cristo, ñahri cuatyí ra soco chihí ra. ²⁰ Ta nyata ni cumañi ca chino ñuhu ñayivi chicunyaa cuhva cha cucuvi chi ra Cristo tyehé caa. Soco ña cuví cha numi ri. Nyacua nya vityin nu cuandihi quivi, chingo cava tandihi cuan cha cuenda cha vaha chi maa yo. ²¹ Cha cuenda ra Cristo ta chinó iñi ndo chi Nyoo. Vatyi ican ra sanandoto chi ra Cristo cha yaha chihí ra. Ta sacahnú Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²² Maa Tatyí li Nyoo tyinyee chi ndo ta cuví quichahá ndo tuhun cha ndicha. Yucuan ta cuví cuñi ndo chi tahan ndo cuenda Nyoo chihin cha ñi iñi ndo. Tyicuan caa cuñi chi cha cuñi ndo chi tahan ndo chihin cha vaha yihí añima ndo ta chihin tandihi fuerza ndo. ²³ Vatyi tari quivi cha nacacu chaa ndo, ñima tari cacu ndo chihin sutu ndo ihya ñuhu ñayivi, vatyi ra cuan numi ri chihí ra, soco nacacu chaa ndo chihin tuhun Nyoo cha ña tuhva chihí vatyi tuhun Nyoo tyicuan ri maa iyó. ²⁴ Vatyi tyehé caa catyí tuhun Nyoo:

Tandihi ñáyivi iyó siqui ñuhu ñayivi ihya cuví ñu tari cuhu.

Ta cha chahnu cha sacuví ñu cuví chi tari ita. Vatyi cuhu cuan na ityi, ta coyo ita cuan. (Ta tyicuan caa ñáyivi, chihí ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahán ndi chihin ndo: tuhun vaha cha sacacú Nyoo añima yo.

2

¹ Yucuan chaha na sandoo yo tandihi nuu cha quini caa. Ma sandavi ñaha yo chi ñáyivi. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chi inga ñáyivi. Ñahri cuendu cahan yo. ² Soco tari cha lee cha ni cacu, nanducú

vavaha chi cha caxin chi, tyicuan caa nducú ndo tuhun Nyoo tacuhva vatyi chihin cuan cuahnu ndo ta cohon nuu ca ndo chi Nyoo, nyacua nya cacu ndihi añima ndo, ³ tatu ndicha cha nacotó ndo vatyi Sutu Mañi yo, vaha xaan ñáyivi cuví ra chihin yo.

Tari yuu nyitó, tyicuan caa cuví ra Cristo

⁴ Sayatyn ca ndo chi ndo chi Sutu Mañi yo. Vatyi cuví ra tari noo yuu nyitó. Ñáyivi ña cuñi ñu cotyiño ñu yuu cuan. Soco Sutu Mañi yo cuví ra tari noo yuu tyaquí cha nacachi Nyoo. ⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu iñi ri ra chi ndo tacuhva cuvi ndo tari noo vehe nu coo ra. Na cu iñi ri ndo ta cuhva ndo cha sandu ii Nyoo chi ndo tacuhva cuvi sacuvi ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyi yucuan cuví cha tahán iñi Nyoo sacuvi yo chihin tunyee iñi maa ra Jesucristo. ⁶ Vatyi catyí tucu nuu tutu Nyoo tyehé caa:

Nyehe xihna, yuhu nacachi noo yuu cha chiñuhú ca ta tyaquí xaan ca, ta chaquín yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó iñi yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó iñi chi ra, cuví ra tari noo yuu cha cahán Nyoo tuhun nu tutu ra ta catyí chi tyehé caa:

Yuu cha ña cacuñi ra casavahá vehe cotyiño ra, ican cuví yuu cha chiñuhú ca, catyí chi.

⁸ Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyi chihí ñu tuhun Nyoo, ta ña quichahá ñu. Vatyi tyicuan caa nyaá vatyi cusacuvi ñu cuan.

Ñáyivi cha yihí cuenda Nyoo

⁹ Soco nyoho cuví ndo ñáyivi nacachi vaha Nyoo. Ta tari tata sutu cuví ndo tyi sacuvi ndo tyiño nuu Nyoo, ra nyacá ñaha.

Ta cuví tucu ndo noo ñáyivi ii nuu Nyoo. Vatyí cuví ndo ñáyivi chí maa ra, tacuhva vatyí cahan ndo tuhun cha vaha cha sacuví ra. Vatyí maa ra natavá ra chí ndo nu ñaa iñi ta vityin cuahan ndo nu ndichin nu tyaquí.¹⁰ Ta quívi ca cuan, cuví ndo ñáyivi cha ñima ri tuhun. Soco vityin ñáyivi chí Nyoo cuví ndo. Ta quívi cuan yori cundahvi cuñi nyehe chí ndo, soco vityin Nyoo cundahvi cuñi ra nyehé ra chí ndo.

Nu catyí ra Pedro vatyí coo yo, soco sacuvi yo tyiño nuu Nyoo

¹¹ Yañi, cuñi xain chí ndo. Chicá noo siquí ñuhu ñáyivi ihya, soco ñima ca ra ñuhu ñáyivi ihya cuví ndo. Soco andivi cuví ñuu ndo. Yucuan chaha catyí chí ndo ma cuhva ndo ityi chí coño ñuhu ndo vatyí sacuvi ndo cha ña vaha cha cuñi chí. Vatyí tari quívi cañi tahan cuan chihin aña yori cuví cuan. ¹² Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahan ña vaha ñu siquí ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chí Nyoo nachaa chí quívi cha cuquichi nyehe ra cha sacuví yo.

¹³ Ta cha cuenda cha cuñi ndo chí Nyoo, quíchaha ndo chí ra cuví tyiño ñuu nu iyó ndo. Quíchaha ndo chí ra cuví tyiño, cuví ri ra rey cahnu ca, ¹⁴ o cuví ri noo ra tachi rey chí vatyí tachi tuñi ra chí ra iyó cuatyí o tatu ñahri cuatyí yo ma tachi tuñi ra chí yo, soco cuatyí ra tyi vaha yo. ¹⁵ Vatyí Nyoo cuñi ra vatyí chihin cha vaha nyacuví ndo ta sandihi ñu tondo cha cuví yuhu ñu, ñu cahan cha ña ndicha vatyí ña chitó ñu tuhun cahan ñu.

¹⁶ Coo ndo tari cha yori nyacá ñaha chí ndo, soco ñima cha cuenda cuan ta cusacuvi tucu ndo cha ña vaha. Soco sacuvi ndo tyiño nuu Nyoo. ¹⁷ Saha ndo ñáyivi chí tandihi ñáyivi. Cuñi ndo chí ñu yihí cuenda Nyoo. Saha ndo cuenda vatyí Nyoo nyehé ra tandihi cha sacuví ndo. Saha ndo ñáyivi chí ra nyacá ñaha.

Uvi tahan cuhva nyehé yo tindoho

¹⁸ Nyoho cha cuví ndo musu, cuhva ndo cha cunyaca ñaha chitoho ndo chí ndo, ta quíchaha ndo chí ra, vasi xaan ra o vasi vaha ra. ¹⁹ Vatyí tatu cunyeé yo tindoho cha sanyehé ñáyivi chí yo cha cuenda cha sacuví yo cha vaha nuu Nyoo, yucuan cuví

cha chaá nuu Nyoo. ²⁰ Soco tatu sacuví ndo noo cha ña vaha ta tachi tuñi ñu chí ndo, ñahri maa tuhun cha cunyeé ndo tindoho cha nyehé ndo cha cuenda cuan. Soco tatu nyehé ndo tindoho cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo. ²¹ Vatyí nacana Nyoo chí yo vatyí coo yo tyehe caa. Vatyí tyicuan caa tucu nyehe ra Cristo tindoho cha cuenda maa yo, na cutuhva yo ta quehen yo cha caá ra. ²² Maa ra ni noo cuatyí ña sacuví ra. Ni noo chaha ña sandavi ñaha ra chí ninoo ñáyivi. ²³ Cuhva cha cahan ñu chí ra, ña nacahan xaan ra. Cuhva cha nyehé ra tindoho, ña tyanahá ra chí ñu. Soco natyaa ra chí ra ndaha Nyoo, vatyí Nyoo tuhvá ra sacutuñi ra chí ñáyivi chihin cha ndaa ta chihin cha ndicha. ²⁴ Vatyí chata maa ra Cristo nicoso ndii maa cuatyí tandihi yo cuhva cha tacaá ra nu cruzi cuan. Tyicuan caa cuví tacuhva vatyí ma sacuví ca yo cuatyí, ta coo yo noo ñáyivi vaha. Vatyí cha cuenda cha ñicuehe maa ra, yoó nduvahá yo. ²⁵ Vatyí quívi cuan chica noo ndo tari mbee cha cuanaa. Soco vityin nacuhva cuenda ndo chí ndo chí ra Cristo, ra cuví pastor cha sahá cuenda aña yo.

3

Yoso caa tahan chí coo ñu tandaha

¹ Tyicuan caa tucu nyoho, ñu iyó yii. Quíchaha ndo chí yii ndo. Vatyí tatu ña quíchaha ra tuhun Nyoo soco cunachino iñi ra cha cuenda cha nyehé ra cuhva iyó ndo. Ta ña chiñuhú ri cha cuví yuhu xaan ndo chihin ra. ² Vatyí nyehé ra tyi cachi iyó ndo ta sahá ndo ñáyivi chí ra. ³ Ta ma caca iñi ndo tuhun cha sandutyakuí ndo chí ndo cuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyakuí ndo chí ndo chihin cha tyaa ndo xuhun cuan chí ndo, o cuví ri cha cuihno ndo sahma vaha xaan. Ma nducu ndo tandihi cuan. ⁴ Soco nducu ndo cuhva ndutyakuí ndo chihin cuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi aña yo. Ta yucuan ña tuhvá cuan tivi. Vatyí ñahri nonga cha tyaquí ca nuu Nyoo tari cuan. ⁵ Vatyí tyicuan caa cuhva chiyo ñusihi cha yihí iñi chí Nyoo ta cha naha. Tyicuan caa sandutyakuí ñu chí ñu, ta quichahá ñu chí

yii ñu. ⁶Tari cu Sara, quichaha ña chi ra Abraham yii ña. Ta catyí ña: “Tata”, chi ra. Ta nyoho tari sehe ña cuví chi ndo tatu sacuví ndo cha vaha tari maa ña. Ta ñahri cha yuhví ndo.

⁷Ta tyicuan caa tucu nyoho ra iyó ñasihi. Cutuñi iñi ndo cuhva coo ndo chihin ñasihi ndo. Ta saha ndo ñáyivi chi ña, ñima vatyi yica ca ña cha nuu nyoho. Soco vatyi iin ri naquehen ndo tumañi iñi cha chahá Nyoo chi ndo. Ta yucuan cuví ñáyivi iyó ndo. Vaha cgo ndo tyehe caa, tacuhva vatyi tiin cuenda Nyoo tuhun chicán tahvi ndo chi ra.

Nu catyí ra Pedro yoso caa tahán chi coo yo

⁸Nu ndihi tuhun, cuñí chi cha iin ri cuhva caca xiñi tandihi ndo. Ta cundahvi cuñi ndo nyehe ndo chi tahan ndo. Cuñi ndo chi tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnu saha ndo chi ndo. Vaha ñáyivi cuví ndo. ⁹Ma sacuvi ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuvi ndo chihin ñu. Vatyi Nyoo nacana ra chi ndo vatyi cunaquehen ndo cha vaha cha iyó chi ra. ¹⁰Vatyi catyí tuhun Nyoo tyehe caa:

Ñu cha cuñí coo noo ñáyivi chihin tusii iñi, cuñí chi saha ñu cuenda cuhva cahán ñu. Ta ma cahan ñu cha ña vaha, ta ni ma cahan ñu cuendu.

¹¹Ta cuñí chi cha sandoo ñu cha ña vaha ta sacuvi ñu cha vaha.

Nanducu ñu cuhva coo taxi ri ñu.

Ta ma saña ñu.

¹²Vatyi Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra.

Soco ñu sacuví cha ña vaha, xaan cuñí ra nyehé ra chi ñu.

¹³¿Yóo cha cuví sacuvi cha ña vaha chihin ndo tatu nyoho tyicuan ri nducú ndo cuhva sacuvi ndo cha vaha? ¹⁴Soco vasi nyehé ndo tindoho cha cuenda cha sacuví ndo cha vaha, soco cucusi cuñi ndo. Ta ni ma nayuhvi ndo tatu tyanaha ñáyivi chi ndo.

¹⁵Soco chichi añima ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caca iñi ndo tuhun Nyoo tacuhva vatyi tatu ndaca tuhun noo ñu chi ndo ñáá tuhun chinó iñi ndo chi ra, soco cuví nacuhva ndo cuenda chi ñu chihin cha ña cahnu saha ndo chi ndo ta chihin cha ndicha sahá ndo ñáyivi chi ra. ¹⁶Cachi

cgo ndo tacuhva cha ma yuhvi añima ndo nuu Nyoo, vatyi tatu cahán ña vaha ñáyivi siqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahan ñu siqui ndo. ¹⁷Tatu maa Nyoo cuñí ra cha nyehe yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha. ¹⁸Vatyi suri ra Cristo nyehe ra tindoho ta chihí ra iin chaha cuiri cha cuenda cuatyi yo. Ra vaha cuví ra ta chihí ra cha cuenda yo ñu iyó cuatyi. Vatyi tyicuan caa nuña ra ityi nachaa yo ityi nuu Nyoo. Chihí coño ñuhu ra, soco nandotó tucu ra chihin Tatyi li ra. ¹⁹Tyicuan ta chihin Tatyi li ra chahan ra chicahan ra chihin añima cha ñohó vehe caa. ²⁰Ta ican ñu cuan cuví ñu ña quichaha chi Nyoo quívi chiyo ra Noé ta tyembu chahnu. Ta nyatú Nyoo chi ñu nandu uvi iñi ñu cuatyi ñu cha ni ri ca cha cuahan chino barcu cha savaha ra Noé. Soco ña cuaha ñu cacu quívi sahvi ndutya ñuhu ñáyivi. Uña tahan ri ñu cacu chihin ndutya vatyi nandaq barcu nu ñohó ñu nu ndutya cuan. ²¹Ta tyicuan caa tucu maa yo tari quívi cacu yo chihin ndutya nu condutya yo. Cacu yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra añima yo ta sacacu ra chi yo cha cuenda cha nandotó ra Cristo. ²²Ta nandaa xica ra andivi, ta nyaá ra chiyo vaha Nyoo. Nyacá ñaha ra chí ángel ta tandihi cha nyacá ñaha chí ñáyivi.

4

Na sacuvi yo tyiño nuu tahan yo yoso cuhva chaha Nyoo chí yo

¹Yucuan chaha tari nyehe ra Cristo tindoho chihin coño ñuhu ra, sandunye ndo iñi ndo tacuhva cuví cunye ndo nyehé tucu nyoho tindoho. Vatyi ñu nyehé tindoho chihin coño ñuhu, ña sacuví ca ñu cha quiñi caa cha cuñí coño ñuhu ñu. ²Tacuhva vatyi cuvi coo ñu cuhva cuñí Nyoo. Ta ma sacuvi ca ñu cuhva cuñí coño ñuhu ñu. ³Vityin cha yaha chinyacuví xaan ndo cha quiñi caa nu quichi chí. Sacuvi ndo cuhva tahán iñi ñu ña ñohó nuu Nyoo. Ta chiyo ndo yoso cuhva cuñi ndo, cuaha viciu sacuví ndo, cuaha cha quichi cuvi iñi coño ñuhu ndo cha quiñi caa chinyacuví ndo. Chihí ndo chihin ndixi. Maa maa ri

vico chiyo ndo. Ta quiñi xaan sacahnú ndo xitohyo cha ña tahán chi sacahnú ndo. ⁴Ta vityin iyo cuñí ñu ña ñohó nuu Nyoo vatyi ña cutahán ca ndo chihin ñu ta ña sacuví ca ndo cha quiñi caa cuan. Ta yucuan chaha cahán ña vaha ñu siqui ndo. ⁵Soco nyaá nacuhva ñu cuenda chi ra cha nyatú tuhva quivi sacutuñi ra chi ñu nyitó ta chi ñu chihí. ⁶Yucuan chaha sacoto ra Cristo tuhun vaha chi ñu ndiyi ñandihí. Vatyí tacuhva cuví coo añima ñu tari iyó Nyoo, vasi cha cutuñi chi ñu tari cutuñi chi tandihí ñáyivi iyó siqui ñuhu ñáyivi quivi chihí coño ñuhu ñu.

⁷Soco cha cuyatyin cha cundihi tandihí maa. Yucuan chaha cachi coo ndo ta cun-yaa vaha ndo tyiño cha chicán tahvi ndo. ⁸Ta cha xihna ri tahán chi cha cuñi xaan ndo chi tahan ndo. Vatyí tatu cuñí yo chi tahan yo, cuaha xaan chaha cusaha yo ticahnu iñi chi ñu, tyi maa Nyoo cuñí ra chi yo ta cuaha xaan chaha sahá ra ticahnu iñi chi yo. ⁹Tatu chaá noo ñáyivi vehe ndo, vaha tyiñuhu ndo chi ñu ta ma cuñi ndo tyi sayangá ñu chi ndo. ¹⁰Ta tahan tahan yo na sacuví yo tyiño nuu inga yo, yoso cuhva cha chahá Nyoo chi yo. Vatyí cuñí chi cha cotyiño yo siin siin cha vaha cha chahá ra chi noo noo yo cha cuenda cha vaha chi inga tahan yo. ¹¹Tatu chahá Nyoo vatyi ñihi vahun tuhun cahun chihin ñáyivi, cahán soco maa maa ri tuhun cha chahá Nyoo. Tatu chahá ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuví ndo, sacuví ndo tacuhva vatyi chihin tandihí cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahán chi sacahnu yo. Ta na cunyaca ñaha ra chihin tunyee iñi ra tyicuan ri maa. Ta na cuví chi tyicuan caa.

Cuví cusii cuñi yo tatu nyehé yo tindoho cha cuenda ra Cristo

¹²Yañi, cuñí xain chi ndo. Ma iyo xaan cuñi ndo tatu vachi tindoho ñihi siqui ndo. Ma cuñi ndo vatyi ña tahán chi nyehe ndo tindoho. ¹³Soco cusii cuñi ndo vatyi cuví nyehe ndo tindoho tari nyehe ra Cristo tindoho. Vatyí tyicuan caa ta cuví cusii tucu cuñi ndo na nyehe ndo cha cahnu cuví ra quivi quichi ra. ¹⁴Tatu cahán ña vaha ñu siqui ndo vatyi nyicón ndo chi ra Cristo, cusii cuñi ndo, vatyi tyaquí xaan nyaá Tatyí li chihin ndo. Maa ñu cuan cahán ña vaha

ñu siqui ra Cristo, soco nyoho sacahnú ndo chi ra. ¹⁵Soco tatu nyehé ndo tindoho cha tyicuan caa, vaha, ta ñima ca cha nyehé ndo tindoho cha cuenda cha chahñi ndo, o cha suhu ndo, o cha sacuví ndo cha ña vaha, o cha tyihí ndo chi ndo nu ña tahán chi. ¹⁶Soco tatu nyehé ndo tindoho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyi chahá chi cuhva nyehe ndo chiin tindoho cha cuenda maa ra Cristo.

¹⁷Vatyí cha chaá quivi cha quichahá sacutuñi Nyoo chi tandihí ñáyivi. Ta xihna ca chi yoó cha cuví yo ñu yihí cuenda ra. Soco tatu tyehe caa tachí tuñi Nyoo chiin ri chi maa yo, ¿yoso caa cucuví chi ñu cha ña quichahá tuhun Nyoo? ¹⁸Tatu yii cacú añima ñu vaha, ¿yoso caa cucuví chi ñu quiñi iyó, ñu iyó cuatyí? ¹⁹Yucuan chaha tatu nyehé ndo tindoho cuhva cuñí Nyoo, cuñí chi cha sañihi ca ndo sacuví ndo cha vaha. Ta tyaa ndo añima ndo ndaha Nyoo. Maa ra savahá chi yo, ta maa ra ndicha tuhun cahán ra ta cusacuví ra tari cuhva catyí ra.

5

Nu chahá ra Pedro tuhun chi yo

¹Yucuan chaha chahí tuhun chi ra chahnu nu nyicú ndo. Vatyí ra chahnu cuví tucu yuhu. Ta cuví cha ndaa vatyi nyehí tandihí tindoho cha cuví chi ra Cristo. Ta cucutahin chihin tandihí ca ra quivi cunyicu yo chihin ra Cristo na quichi ra inga chaha chihin cha cahnu cuví ra. ²Tari noo ra sahá cumi mbee, tyicuan caa saha cumi ndo chi ñu yihí cuenda Nyoo ñu yihí ndaha ndo. Ta sacuví ndo chihin cha iyo vaha iñi ndo tari cuhva cuñí Nyoo, ta ñima chihin fuerza. Ta ni ñima cha cuenda cha cuñí ndo xuhun. Soco sacuví ndo tyiño chihin cha ñii iñi ndo. ³Ta ñima tari cha maa ndo nyacá ñaha ndo chi ñu sahá cumi ndo. Soco chihin cuhva vaha iyó ndo chihin Nyoo, sañaha ndo chi ñu cuví mbee sana Nyoo yoso caa tahán chi coo ñu. ⁴Ta quivi quichi ra cuví nuu chi ra sahá cumi mbee, cunaquehen ndo noo cha vaha, noo cha tyaquí cha cucuhva Nyoo chi ndo. Noo cha ma tvi ca maa.

⁵Tyicuan caa tucu nyoho ñu tyivaa, quichaha ndo chi ñu chahnu. Ta ñima iin ri maa ñu tyivaa soco tandihí ri ndo quichaha

ndo chi tahan ndo. Ta ndahvi saha ndo añima ndo. Vatyí:

Nyoo ña cuñi nyehe ra chi ñu cahnu sahá chi.

Soco tyinyeé ra chi ñu ndahvi sahá chii.

⁶Ndahvi saha ndo añima ndo nuu Nyoo. Ta cuhva ndo chi ndo na cunyaca ñaha ra chi ndo tacuhva cuvi sacahnu ra chi ndo quivi cha tahan chi. Tyi maa ra iyó xaan fuerza chi ra. ⁷Cuhva ndo tandihi tindoho cha chicá xiñi ndo chi Nyoo. Vatyí maa ra ñiñi cuñi ra chihin ndo.

⁸Cachi cõhon iñi ndo ta saha vaha ndo cuenda nya cha vaha ta nya cha ña vaha, vatyí cuhna, ra xaan iñi chi ndo, chicá noo ra tari noo ndicaha xaan nanducú ti yóó chi cachi ti, tyicuan caa chicá noo ra ña vaha, nducú xaan ra cuhva saha ganaa ra chi ndo.

⁹Soco ñihi cuñanyaa ndo chihin cha ñi iñi ndo chinó iñi ndo chi Nyoo tacuhva cuvi chasaha ndo chi ra ña vaha. Ta nacoto ndo vatyí tandihi ñu ñohó cuenda ra Cristo nicañnu ñuhu ñayivi, nyehé tucu ñu cuan tindoho tari maa ndo. ¹⁰Soco Nyoo tyinyeé ra chi yo, ta cha yahá nyehe ndo tindoho suhva ri quivi, Nyoo cusanducuiti ca ra chi ndo, ñihi ca cunicunyaa ndo chihin ra ta cunacuhva ca ra fuerza chi ndo. Ta ican Nyoo cuví ra chahá tandihi cha vaha chi yo ta maa ra cana chi yo tyi cu iin ri yo chihin ra Cristo tacuhva coo yo nu tyaqui chihin ra tyicuan ri maa. ¹¹Na sacahnu yo chi ra ta na cunyaca ñaha maa ra tyicuan ri maa. Ta na cuvi chi tyicuan caa.

Nu ndihi chahá ra Pedro nocumi chi ñu

¹²Sacuhín carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra ñi xaan iñi nyicón chi ra Cristo. Tyai suhva nu tutu ihya chi ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñi ra chi yo. Ma saña ndo ihya.

¹³Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴Cuhva ndo nocumi chi noo noo tahan yo chihin cha cuñi ndo chi ñu.

Na coo cha taxi ri cuñi añima tandihi ri ndo cha iin ri cuví ndo chihin ra Jesucristo. Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pedro Chi Náyivi Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

¹Yuhu ra Simón Pedro sacuví tyiño nuu ra Jesucristo. Ta cuví noo apóstol chi ra. Cuñí chi catyí tyi tachí ra chíi vatyí caque tyiño ra. Tyafí tutu ihya chi nyoho cha chinó iñi ndo chi Nyoo tari cuhva cha tyaquí chinó iñi nyuhu. Vatyí yucuan cuví cha chino iñi yo vatyí vaha ra Jesucristo, ra cuví Nyoo, ra sacacú chi yo. ²Na naquehen ca ndo cha vaha cha chahá Nyoo chi yo. Ta na coo ca cha taxi ri aña ndo cha cuenda cha ñohó nuu ndo chi Nyoo ta chí Sutu Mañi yo Jesús.

Yoso caa coo ñu yihí cuenda Nyoo

³Nyoo chihin tunyee iñi ra, chahá ra tandihí cha chiñuhú chi yo tacuhva cuvi coo cachi yo nuu ra ta saha yo ñáyivi chi ra. Tandihí ihya ñihí yo cha cuenda cha chicohon nuu yo chi ra cha caná chi yo. Vatyí chicohon nuu yo tyi cahnu cuví ra ta tyaquí xaan cha sacuví ra. ⁴Ta chihin tandihí ihya, chahá ra cha catyí ra tyi cuhva ra chi yo. Ta cahnu xaan ta yahvi xaan nyaá cuan. Vatyí cha cuenda ihya nanduví yo tari maa ra. Vatyí sacanyaha ra cha quiñi caa cha quichí cuvi iñi yo, ta ma tiví yo tari tiví ñáyivi iyó siquí ñuhu ñáyivi ihya. ⁵Ta yucuan chaha cuñí chi cha chinó ca iñi yo chi Nyoo ta nducu yo cuhva cha coo cachi yo. Yaha cuan cuñí chi cha nducu yo cuhva ta cutuñi vaha iñi yo cuhva cuñi Nyoo chihin yo. ⁶Ta yaha cuan cuñí chi cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama iñi yo. Yaha cuan ta nducu yo cuhva cha cuiti ca coo yo nuu Nyoo. ⁷Yaha cuan ta nducu yo cuhva cha cuñi yo chí tahan yo. Yaha cuan nducu yo cuhva cha cuvita xaan aña yo chihin tandihí ñáyivi.

⁸Tatu tyehe caa iyó ndo ta tyicuan ri nducú ndo cuhva cha coo tandihí ihya chi ndo, Nyoo cucotyíño xaan ra chí ndo. Ta

tatu sacuvi ndo tyehe caa, ña caha xaan ri chicohon nuu ndo chí Sutu Mañi yo Jesucristo. ⁹Soco ñu cha ñahri ihya iyó chí, cuví ñu tari noo ra cuaa. Ña cutuñi iñi ñu cha tahán chi coto ñu. Ta naá iñi ñu tyi sandachí Nyoo cuatyí ñu ta ityi chata ca. ¹⁰Yucuan chaha yañi, saniñi ndo coo ndo tyehe caa. Tyicuan ta cundicha vaha tyi caná Nyoo chí ndo ta nacachí ra chí ndo. Vatyí tatu sacuví ndo tyehe caa, ma canacava maa ndo. ¹¹Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuvi ra sacacú chí yo.

¹²Yucuan chaha cuasanicohon que iñi ndo tuhun ihya, vasi cha chitó ndo, ta ñi iñi ndo sacuví ndo tuhun ndicha cha cutuhva ndo. ¹³Ta cuhva cha cuñí mai, vatyí cha ní ri ca cha iyé, vaha sanicohin iñi ndo coto naa iñi ndo tuhun ihya. ¹⁴Vatyí chité tyi ña naha ca ta cusandoi ñáyivi ihya. Vatyí tyicuan caa sacotó Sutu Mañi yo Jesucristo chíi. ¹⁵Soco cuasaniñi tacuhva vatyí tatu yahá chihí soco nicohón iñi ndo tuhun ihya.

Nu nacatyí ra Pedro yoso caa nyehe ra cha cahnu cuvi ra Cristo

¹⁶Ñima tyisu ri canatava ndi quivi sacoto ndi tuhun ra Jesucristo chí ndo. Vatyí cha nyehe vaha ndi chihin chiti nuu ndi cuví. Vatyí nyehe ndi cha cahnu xaan cuví Sutu Mañi yo Jesucristo. Ta sacotó ndi chí ndo tyi iyó xaan tunyee iñi chí ra ta cuquichi ra inga chaha. ¹⁷Vatyí nyehe ndi nu sachahnu xaan Nyoo Sutu yo chí ra. Ta tyaquí xaan tyaquí xaan cuví nu cahan Nyoo ta catyí ra: “Ican ihya Sehi. Ta cuñí xain chí ra. Ta sii cuñí chihin ra”, catyí Nyoo tuhun ra Jesús quivi cuan. ¹⁸Ta nyuhu chiñi ndi ndusu Nyoo cha quichí ityi andivi quivi cha nyicú ndi chihin Sutu Mañi yo nu yucu ii cuan.

¹⁹Ta siin ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahan chí tuhun ra Cristo. Ta vaha sacuví ndo tatu quichahá vaha ndo tuhun ihya. Vatyí cuví chí tari noo ñuhu ndichin cha cayú nu ñaa iñi nyacua nya cundichin ta caña ra Cristo tari caña tiño cahnu cha ñaa ca, vatyí sandichín ra aña yo. ²⁰Soco coto vaha ndo vatyí cha minoo tuhun ri yo, ma cuvi catyí yo ñáa cha cuñí chí catyí noo tuhun cha nyaá nu tutu Nyoo. ²¹Vatyí ra cacuvi profeta ta cha naha, ña cahan ra cuhva cuñí ri maa ra. Soco cuhva

cuñí Nyoo cahan ra. Ta Tatyí li saquehen ityi chi ra.

2

*Ra casañahá cha ña ndicha
(Judas 4-13)*

¹Soco cachiyo tucu ra profeta cuendu nu nyicu ñu Israel ta cha naha, cacatyí ra tyi cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví sativi chi ndo. Ta cuacatyí ra tyi ña ndicha Sutu Mañi yo ra sacacu chi ra. Yucuan chaha numi ri cucunaa ra cuan. ²Ta cuaha xaan ñu cucunyicon ñu chi ra chihin cha quiñi caa cha sacuví ra. Ta cuaha xaan ñu cucahan ña vaha ñu siquí tuhun cha ndicha vaha ra Cristo. ³Ta chaha cha iyo cuñi ra xuhun, ta cusandavi ñaha ra chi ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chi ra vatyí cha naha iyó maa tuhun cha cunaa ra.

⁴Vatyí ni ri chi ángel cha chicoo cuatyí quivi cuan ta ña sahá Nyoo ticahnu iñi. Soco tuchi ra chi ra anyaya. Ta sandoq ra chi ra nu ñaa iñi, nuñi ra chihin cadena nyacua nya quivi cutuñi chi ra nuu Nyoo. ⁵Ta ni ña sahá Nyoo ticahnu iñi chi ñu chiyo ta cha naha. Yucuan chaha tachi ra savi xaan siquí ñáyivi quiñi iyó cuan. Ta sacacu ra chi noo tuhun ri maa ra Noé, ra cha cahan tuhun vatyí coo yo noo ñáyivi cachi. Ta cacu tucu ucha ca ñáyivi ñandihí. ⁶Ta tyicuan caa tucu sacunaa Nyoo ñuu Sodoma ta ñuu Gomorra. Vatyí chahmí ra nyacua nya cha ndihí maa nduví ñiyaa. Tacuhva vatyí cunyehe ñáyivi quiñi iyó cha cucoo nu cuahan ca chi. ⁷Soco sacacu ra chi ra Lot vatyí cuví ra noo ra vaha nuu ra. Ta cuihya cuñi ra Lot nyehé ra cuhva iyó ñu quiñi iyó cuan. ⁸Ta ndi quivi cuihya cuñi añima ra Lot quivi chiyo ra ñuu cuan, cha cuenda cha nyehé ra ta chiñi ra cha quiñi caa nyacuví ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuví ñu. ⁹Ta tyicuan caa cuví sacacu Nyoo chi yo tatu iyó yo cuhva cuñi ra. Ta ñu quiñi iyó naquehen vaha Nyoo chi ñu vatyí cutachi tuñi ra chi ñu quivi cutuñi chi ñu nuu ra.

¹⁰Ta yaha ca cutachi tuñi Nyoo chi ñu nyicón cha ña vaha cha cuñi coño ñuhu, ñu ña cuñi cha cunyaca ñaha Sutu Mañi yo chi.

Ta cahnú sahá ñu chi ñu ta sacuví ñu maa ri cuhva cuñi maa ñu. Ta ñu cuan ña yuhví ñu cahan ña vaha ñu siquí ra nahnu ca ican saha maa ñu cuví ri siquí ángel, cuví ri siquí tatyí ña vaha, cuví ri siquí Nyoo. ¹¹Soco ángel, cahnú ca cuví ra cha nuu ñáyivi, soco ña cacañá iñi ra cahan ña vaha ra siquí ra nahnu ca cuan chihin nuu Sutu Mañi yo.

¹²Soco ra cahan cuendu nu nyicú ndo cuví ra tari quiti cha ña cutuñi iñi ta sacuví ti cuhva cuñi maa ti. Vatyí quiti, ¿ñáa cuenda iyó ti? Iyó ti vatyí tiin rayi chi ti, ta cahni ra chi ti. Tyicuan caa maa ra cuan. Cacahan ña vaha ra siquí cha ña cutuñi iñi ra. Ta cucúvi ra tari chihí quiti. ¹³Cunyehe ra tindoho tari sanyehé maa ra tindoho chi inga ñáyivi. Ta sii xaan cacuñi ra chihin cha quiñi caa nyacuví ra nu tuvi. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusii iñi. Soco ña ndicha cuhva sañahá ra.

¹⁴Ta tandihí ri ñusihi cha nyehe ra ta quichi cuvi iñi ra. Ña chitatú ra cha casacuví ra cha quiñi caa. Casandaví ñaha ra chi ñu ña ñihi nyaá chihin Nyoo. Vatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihí ra minoo quivi. ¹⁵Casandoq ra cuan ityi vaha ta naquehen ra ityi nu cucunaa ra. Casacuví ra tari sacuví ra Balaam sehe ra Beor. Vatyí cuñi ra Balaam saha ganaa ra xuhun chihin cha ña vaha cha nyacuví ra. ¹⁶Tyicuan ta noo burra nacahan ti chihin ra, tari cahan ñáyivi, ta ña chahá ti cha cahun ca ra Balaam chihin cuhva loco chicá xiñi ra.

¹⁷Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa iñi cahnú tyicuan ri maa cha cuenda cha nyacuví ra tyicuan caa. ¹⁸Yaa vavaha cahan ra soco tandihí tuhun cahan ra cha ñima ri tuhun cuví. Ta chihin vicio ta chihin cha quichi cuví iñi coño ñuhu yo casandaví ñaha ra chi ñu cha yaha quita mahñu cha quiñi caa. ¹⁹Ta tyiyuhú ndihí ra chi ñu na cunyacuví ca ñu cha quiñi caa vatyí yori nyacá ñaha chi ñu, catyí ra. Soco suri maa ra chahá ra cha cunyaca ñaha cha quiñi caa chi ra. Vatyí tatu chahá yo cha cunyaca ñaha noo cha cunyaca ñaha chi yo, musu cuan cuví chi yo. ²⁰Vatyí ñu cha

chicohon nuu chi Sutu Mañi yo Jesucristo, ra sacacú chi yo, cha yahá sandoq ñu cha quiñi caa ñayivi ihya. Soco tatu natiin tucu ñu tuhun ñayivi ihya inga chaha, quiñi ca nanduvi ñu ta ñima ca ta cuvi maa. ²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yahá chicohon nuu ñu ta nacuhva ñu chata ñu tuhun cha chahá Nyoo chi ñu. ²² Soco cuvi chi ñu tari cuhva catyí noo tuhun cha iyó ñayivi: “Ina nduchan ti, ta nacachi tucu ti cha nduchan ti. Ta quini chityi ti, ta ndihvi tucu ti nu nyahyu inga chaha.”

3

Quivi cuquichi tucu Sutu Mañi yo

¹ Yañi, cuñi xain chi ndo. Ta ihya cuví carta cha cu uvi sacuhín chi ndo. Ta nu ninduvi tahan carta चाहिं tuhun chi ndo tacuhva vatyí caca vaha xiñi ndo. ² Ta ñichon iní ndo tuhun cha चाहन ra cacuví profeta Nyoo, ta cha naha. Ta ñichon tucu iní ndo tuhun cha sañahá nyuhu chi ndo. Vatyí cuví ndi apóstol cuenda Sutu Mañi yo Jesucristo ra sacacú chi yo.

³ Coto xihna ndo vatyí nu cundihi ca chi quivi cuquichi ñayivi cucuacu nyaa ñu tuhun Sutu Mañi yo. Cucoo ñu yoso cuhva cha quiñi caa cha cuñi coño ñuhu ñu. ⁴ Ta cucatyí ñu: “Ra Jesucristo catyí ra vatyí cuquichi ra inga chaha. ¿Ta nya nyaá ra vityin? Vatyí nyata cachihi sutu chahnu yo ta nyata chinqo ñuhu ñayivi ta nya vityin ta cuhva caa ri maa”, cucatyí ñu chi ndo. ⁵ Vatyí maa ñu ña cuñi ñu coto ñu vatyí ta tyembu chahnu चाहन Nyoo ta savahá ra andivi ta ñuhu ñayivi. Quitá ñuhu ñayivi chichi ndutya ta chihin ndutya chinqo chi. ⁶ Soco cha yahá savahá Nyoo ñuhu ñayivi ta suri chihin ndutya cuanaq ñayivi cuan quivi coon savi xaan. ⁷ Soco andivi ta ñuhu ñayivi cha iyó vityin sahá cumi vaha Nyoo vatyí suri chihin ñuhu cucayu chi quivi cutuñi chi ñayivi nuu ra. Tyicuan ta ñuhu cha cayu cuan cusanaa chi chi ñu ña quichahá chi Nyoo.

⁸ Soco yañi, cuñi xain chi ndo. Ta cuñi vatyí ma naa iní ndo vatyí cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chi ra. ⁹ Ñima cha ña cuñi ñaha Sutu Mañi yo quichi ra. Vasi yihí ñu

chicá xiñi ñu cha tyicuan caa. Soco Sutu Mañi yo nyatú ra chi yo vatyí ña cuñi ra cha cunaa ni noo yo. Cuñi ra vatyí tandihi yo ndu uvi iní yo cuatyí yo ta nasama yo cuhva iyó yo.

¹⁰ Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyí sana iní yo ta cuquichi ra. Tyicuan ta cucunaa andivi. Iyo xaan cucachan cuhva cuan. Ta cucayu tandihi cha iyó andivi. Cundutya ndi cuii chihin cha ihñi xaan. Ta tyicuan caa cucayu tucu ñuhu ñayivi ta tandihi cha iyó nuu chi.

¹¹ Ta tyicuan caa cutani tandihi. Yucuan chaha cuñi chi vatyí cachi coo yo tari cuhva cuñi Nyoo. ¹² Cuatu tuhva yo na chaa quivi quichi Nyoo. Nducu yo cuhva cha sanumi ra quichi ra. Quivi cuan cunaa andivi chihin ñuhu. Tandihi cha iyó cundutya chihin cha ihñi. ¹³ Soco yoó nyatú yo noo andivi chaa ta noo ñuhu ñayivi chaa cha catyí Nyoo tyi cucuhva ra. Ta maa maa ri cha vaha chi Nyoo cucoo yucuan.

¹⁴ Yucuan chaha yañi, cha ni ri ca cha nyatú ndo na quichi Sutu Mañi yo, saniñi ndo tacuhva vatyí quivi quichi ra, vii iyó ndo chihin ra ta ñahri cha iní ndo ta ñahri cuatyí ndo. ¹⁵ Ta tñin vaha ndo cuenda, vatyí Sutu Mañi yo nyatú ra chi yo vatyí cuñi ra vatyí cuaha ca ñayivi cacu. Ta tyicuan caa tucu catyí ra Pablo yañi yo nu tutu cha sacuhun ra chi ndo. Vatyí chihin cha chiniñi tuñi cha chaha Nyoo chi ra tyaa ra. ¹⁶ Ta tandihi ri nu carta ra ta चाहन ra tuhun ihya chihin ndo. Vasi yihí tuhun cha yii vavaha cutuñi iní yo. Ta ñu cha ña cutuñi iní, ñu cha ña ñihi nyaá chihin Nyoo, siin caa cuhva natyihí tuñi iní ñu tuhun cuan. Ta suri tyicuan caa sacuví tucu ñu chihin tuhun cha tyaa inga ra nu tutu tuhun Nyoo. Siin caa cuhva natyihí tuñi iní ñu. Ta cha tyicuan caa, sacunaa ñu suri chi maa ñu.

¹⁷ Yucuan chaha yañi, vityin cha chitó ndo tuhun ihya cha ni cumañi ca cuvi, sáha ndo cuenda chi ndo, coto cunyicon ndo cuhva sandaví ñaha ra quiñi caa cuan, ta coto sandoo ndo cuhva vaha cha cuahan ndo. ¹⁸ Soco cohon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iní cha chahá ra chi ndo. Na sacahnu yo chi ra vityin ta tyicuan ri maa. Ta na cuvi chi tyicuan caa.

2

Carta Cha Xihna Ri Cha Tyaa Ra Apóstol Juan

Ñayivi chaa coo yo

¹ Ihya tyaa ndi tuhun cha cha iyó maa quivi cha quichaha tandihi. Ta cuví chi tuhun cha chiñi ndi ta cha nyehe ndi chihin nuu ndi; vatyí nyehe ndi ta tiñi ndi chihin ndaha ndi. Ta ican tuhun ihya cuví tuhun cha chahá ñayivi chaa coo yo. ² Ñayivi chaa ihya quetuví quivi quichi ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayivi chaa cha ma naa ca maa ihya chi ndo. Vatyí ñayivi ihya, nyaá chi chihin Sutu yo Nyoo, ta vityin tuví chi nu nyicú yo. ³ Nacatyí ndi chi ndo cha nyehe ndi ta cha chiñi ndi tacuhva na cu iñi ri ndo chihin ndi, tari maa ndi, ndicha cuii vatyí iñi ri cuví ndi chihin Sutu yo Nyoo ta chihin Sehe ra, ra Jesucristo. ⁴ Ta tyaa ndi tuhun ihya chi ndo tacuhva na coo tandihi tusi iñi cha chahá Nyoo chi ndo.

Nyoo, ñuhu ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhu ndichin iyó nu nyaá ra. Ta ñahri cha ñaa iñi, (ñahri cha ña vaha yihí iñi ra cuví cuan). ⁶ Tatu catyí yo vatyí iñi ri cuví yo chihin ra, soco sacuví yo cha ña vaha, nu ñaa iñi chichá noo yo cuví cuan. Sandaví ñaha yo. Ta ñahri tuhun ndicha cahán yo. ⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta iñi ri cuví yo chihin tahan yo, ta niñi ra Jesucristo Sehe Nyoo, nacatyá chi ndi cuii maa cuatyí yo.

⁸ Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá aña yo. ⁹ Soco tatu nahmá yo cuatyí yo nuu Nyoo, yihí iñi yo chi ra vatyí vaha ra ta ña sandaví ñaha ra, soco sacuví ra cuhva catyí ra, ta cusaha ra ticahnu iñi cuatyí yo ta cusandachi ra ndi cuii maa cha quini caa yo. ¹⁰ (Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá aña yo.

Ra Cristo cuví ra cahán chaha yo

¹ Sehe nyihi, sacoté tuhun ihya chi ndo, tacuhva ma sacuvi ndo cuatyí. Soco tatu chicoo cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha. ² Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñima cha cuenda maa ri maa yo, soco cha cuenda tandihi ñayivi.

³ Tatu quichahá yo tuhun cahán Nyoo, ñohó nuu yo chi ra. ⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá aña maa ra. ⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñi aña maa ñu. Ta cha tyicuan caa chitó yo tyi iñi ri cuví yo chihin ra. ⁶ Yóo cha catyí vatyí iñi ri cuví chihin Nyoo, tahan chi coo ra tari cuhva chiyo maa ra Jesucristo quivi chichá noo ra siqui ñuhu ñayivi.

Tuhun chaa cha cuñí yo chi tahan yo

⁷ Yañi yo, ñima noo tuhun chaa sacoté chi ndo, soco cuví chi noo tuhun chahnu cha chitó ndo nyata quivi xihna ri. Ta ican tuhun chahnu ihya cuví tuhun chiñi ndo.

⁸ Soco tari noo tuhun chaa cuví chi. Ta sacuví ra Cristo, ta chahá ra cha sacuví tucu maa ndo ñandihí. Ta cha tyicuan caa, cha ñaa iñi cuahan nocuee chi. Ta cha ndichin Nyoo cha sandundichín chi.

⁹ Ñu cha catyí vatyí nyaá ñu nu ndichin, ta ña cuñí nyehe ñu chi tahan ñu, ni nyaá ca ñu nu ñaa iñi. ¹⁰ Ta ñu cuñí chi tahan, nu ndichin nyaá ñu. Ta ñahri maa cha cuví sanacava chi ñu nu cuatyí. ¹¹ Soco ñu cha ña cuñí nyehe chi tahan, nu ñaa iñi nyaá ñu. Ta ña chitó ñu nya ityi cuahan ñu vatyí ña cuví nyehe ñu vatyí tari cha cuaa ñu.

¹² Sacuhín tuhun ihya chi nyoho, ra cuatyaa sehi. Vatyí cha yahá saha saha Nyoo ticahnu iñi cuatyí ndo cha cuenda cha chihí ra Jesucristo tyiño nuu ndo. ¹³ Ta chi nyoho, cha cuví ndo sutu, sacuhín tuhun ihya chi ndo, vatyí ñohó nuu ndo chi ra iyó nyata cumañi cacu ñuhu ñayivi. Ta chi nyoho, ra tyivaa, sacuhín tuhun ihya vatyí cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyí ñohó nuu

ndo chi Sutu yo Nyoo. ¹⁴ Sacuhín tuhun ihya chi nyoho cha cuví ndo sutu, vatyi ñohó nuu ndo chi ra cha iyó nyata cacu ñuhu ñayiví. Ta sacuhín tuhun ihya chi nyoho ra tyivaa vatyi nyaá xaan fuerza chi ndo. Ta tuhun Nyoo caá añima ndo. Ta cuví chasaha ndo chi ra ña vaha.

¹⁵ Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui ñuhu ñayiví. Vatyi ñu cuñí tandihí ihya, ña cuñí ñu chi Nyoo. ¹⁶ Vatyi tandihí cha iyó ñayiví ihya, cha ña vaha cha quichi cuvi iñi coño ñuhu yo, ta cha nyehe yo ta quichi cuvi iñi yo coo chi yo, ta cha cuñi yo cuyaa yo chihin cha iyó chi yo, tandihí ihya ñima cuhva chahá Sutu yo Nyoo chi yo cuví, soco maa maa ri cha chahá ñayiví ihya cuví. ¹⁷ Ta ñayiví ihya cuahan sandihí chi, chihin tandihí cha quiñi caa cha quichi cuvi iñi ñayiví. Soco ñu cha sacuví cuhva cuñí Nyoo, tyicuan ri maa cuacoo ñu chihin ra.

Ra xaan iñi chi ra Cristo

¹⁸ Sehe nyihi, cha nyaá yo nu cuandihí quiví. Ta nyoho chiñi soho ndo vatyi vachi noo ra cha ña cuñí nyehe chi ra Cristo, ta vityin cha cuaha xaan ra ña cuñí nyehe chi ra Cristo iyó vityin. Yucuan chaha nacoto yo vatyi cha nyaá yo nu cuandihí quiví. ¹⁹ Maa ra nu nyicú yo quita coyo ra, vatyi ñima ra cuenda yo cuví chi ra. Vatyi tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva quetuví vatyi ña tandihí ñayiví ta cuenda yo cuví ñu.

²⁰ Soco chi nyoho chahá ra Cristo Tatyí li Nyoo cunyaa añima ndo. Ta chitó ndo tandihí. ²¹ Sacuhín tuhun ihya chi ndo ñima cha cuenda vatyi ña chitó ndo cha ndicha, soco vatyi chitó ndo. Ta ni noo cuendu ma quita cahan ñu sacuví cha ndicha.

²² ¿Yóó cha cuví ñu cuendu? Ñu catyí vatyi ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyi ña chinó iñi ñu chi Sutu yo Nyoo, ta ni ri chi ra Jesucristo Sehe Nyoo. ²³ Tandihí cuvi ñu ña chinó iñi chi Sehe Nyoo, yori Sutu yo Nyoo nyaá chihin ñu. Soco ñu catyí vaha chi ñayiví vatyi ra Jesucristo cuví Sehe Nyoo, iin ri cuví ñu chihin Nyoo ñandihí.

²⁴ Yucuan chaha nyoho, tuhun cha chiñi ndo nya quiví xihna ri, naquehen vaha ndo

chichi añima ndo. Tatu ndoó chi chichi añima ndo, iin ri cuví ndo chihin Sehe Nyoo ta chihin Sutu yo Nyoo ñandihí. ²⁵ Ta ra Jesucristo catyí ra vatyi cuhva ra noo ñayiví chaa cha ma maa ca maa coo yo.

²⁶ Sacuhín tuhun ihya chi ndo cha cuenda vatyi cuaha xaan ra sandaví ñaha chi ndo iyó. ²⁷ Soco ra Jesucristo chahá ra Tatyí li Nyoo cha cunyaa añima ndo, ta ña chiñuhú ca cha sañaha ni noo ñayiví chi ndo. Vatyi suri maa Tatyí li Nyoo sañahá chi ndo ndii cuvi maa tuhun. Ta cha ndicha cuví, ñima cuendu cuví. Yucuan chaha sañihi ca ndo cu iin ri ndo chihin ra Cristo tari cuhva sañahá Tatyí li Nyoo chi ndo.

²⁸ Ta vityin nyoho, ra cuatyaa sehi, cuñyañaa yo chi ra Cristo tacuhva vatyi nachaa chi quiví quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta siin ri tacuhva cha ma tahan yo ticahan nuu nuu ra quiví quichi ra. ²⁹ Cha chitó ndo vatyi ra Cristo vaha ra. Chitó tucu ndo vatyi tandihí ñu cha nyacuví cha vaha, sehe Nyoo cuví chi ñu.

3

Ñu cha cuví sehe Nyoo

¹ Nyehe ndo, yoso cha cuñí Sutu yo Nyoo chi yo, vatyi nasaha ra sehe ra chi yo. Ta catyí ra: “Nyoho, sehi cuví chi ndo.” Yucuan chaha ñayiví, ña cuñí nyehe ñu chi yo vatyi tyicuan caa tucu, ña cuñí nyehe ñu chi maa ra. ² Yañi, vityin cha cuví yo sehe ra. Soco ta coto ca yo yoso caa cucuvi yo. Soco chitó yo vatyi nachaa chi quiví quichi ra Jesucristo, cucuvi yo tari maa ra, vatyi cunyehe vaha yo chi ra tari cuhva caá ra. ³ Ta tandihí yo cha nyatú yo cha cucuvi tyehe caa, nducú yo cuhva ta sandundií ca yo añima yo, tari ndii maa Sutu Mañi yo Jesucristo.

⁴ Tandihí ñu sacuví cuatyí, ña quichahá ñu ley Nyoo. Vatyi cha sacuví yo cuatyí, ña quichahá yo ley Nyoo cuví chi cuan. ⁵ Cha chitó ndo vatyi ra Cristo quichi ra ñayiví tacuhva tinyaa ra cuatyí yo, ta maa ra ñahri cuatyí ra. ⁶ Tandihí yo cha iin ri cuví yo chihin ra, ña sacuví yo cuatyí. Soco ñayiví cha sacuví cuatyí, ta quehen cuenda ca ñu chi ra, ni ta cohon ca ra añima ñu. ⁷ Sehe luhli, ñaha sandaví ñaha ñayiví chi ndo, vatyi ñu cha sacuví cha vaha, vaha ñu, tari

maa ra Cristo vaha ra. ⁸Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quívi xihna ri. Soco yucuan chaha quichí ra Jesucristo, ra cha cuví Sehe Nyoo, tacuhva vatyí satani ra ndíi cuií cha sacuví ra ña vaha.

⁹Tandihi yo cha cha yahá nacacu chaa yo, nanduví yo sehe Nyoo, ta ña sacuví ca yo cuatyí, vatyí ñayiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chi yo. ¹⁰Ta tyehe caa cuví nicohon nuu yo chi ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña vaha o ña cuñí nyehe ñu chi tahan ñu, ñima ñáyiví cuenda Nyoo cuví ñu.

Na cuñí yo chi noo noo tahan yo

¹¹Vatyí ican ihya cuví tuhun cha chiñí ndo quívi xihna ri: Cha cuñí yo chi noo noo tahan yo. ¹²Ña tahan chi sacuví yo tari cuhva sacuví ra Caín. Cuví ra noo ra cuenda ra ña vaha. Ta chahñí ra chi yañi ra. ¿Ñáa tuhun chahñí ra chi ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³Yañi yo, ma iyo cuñí ndo tatu ña cuñí nyehe ñáyiví chi ndo. ¹⁴Yóo chitó yo vatyí tari minoo ra chihí ta nandoto cuví yo vatyí iyó yo noo ñayiví chaa vatyí cuñí yo chi tahan yo. Ñu cha ña cuñí chi tahan, tari quívi ni cuví ca ñu tari noo ra chihí, ta ta nandoto ca ñu. ¹⁵Yóo ñu cha xaan iñi chi tahan, tari noo ñu chahñí ñáyiví cuví ñu. Ta chitó ndo vatyí ni noo ñu chahñí, ma cuhva Nyoo ñayiví chaa cha ma naa ca maa coo aña ñu. ¹⁶Nicohón nuu yo ñáa cha cuví cha cuñí yo chi tahan yo vatyí ra Jesucristo sañahá ra chi yo. Vatyí maa ra cuñí ra chi yo, ta chahá ra ñayiví ra cha catyí yo. Ta tyicuan caa tucu maa yo, cuñí yo chi tahan yo ta cuhva yo ñayiví yo cha cuenda ñu.

¹⁷Ta tatu yihí yo iyó chin chi yo síqui ñuhu ñayiví ihya, ta nyehé yo cumañí cha cumañí chi tahan yo, ta sahá ri yo cha ña nyehé yo, ¿atu cuñí yo chi Nyoo cha sacuví yo cha tyicuan caa? Ña cuñí yo chi ra cuví chi cuan. ¹⁸Ra cuatyaa sehi, ñima chihin tuhun yuhu ri yo, cuñí yo chi tahan yo, soco na cuñí yo chi ñu chihin cha sacuví yo tumañi iñi, ta chihin cha ñi iñi yo.

Yoso caa sacuví yo ta coo vaha yo chihin Nyoo

¹⁹Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chihin Nyoo. ²⁰Tatu chichi aña ñima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá aña ñima yo. ²¹Yañi, tatu tuví iñi yo tyi ñahri cuatyí yo, ma yuhvi cuñi yo nyehe yo chi Nyoo. ²²Ta ñáa ri cha cacán tahvi yo cuacuhva ra chi yo, vatyí quichahá yo tuhun cañan ra, ta sacuví yo cuhva tahan iñi ra. ²³Ta ican ihya cuví tuhun chahá ra chi yo: Cha chino iñi yo vatyí ra Jesucristo cuví Sehe ra. Ta cha cuñí yo chi noo noo tahan yo vatyí tyicuan caa tuhun cha chahá ra chi yo. ²⁴Ta ñu cha quichahá tuhun chahá ra chi yo, iyó ñu cha iñi ri cuví ñu chihin ra, ta maa ra iyó ra chichi aña ñima ñu. Ta cha cuenda Tatyí li ra cha chahá ra chi yo, chitó yo vatyí nyaá ra chihin yo.

4

Tatyí li Nyoo ta tatyí ña vaha

¹Cuñí xain chi ndo, yañi. Ma chino iñi ndo tandihí ñáyiví cha catyí tyi cuenda Nyoo cañan ñu. Nyehe xihna ndo tatu nacachí tahan cha cañan ñu chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha. ²Soco tyehe caa cuví nicohon nuu ndo tatu Tatyí li Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacu ra chihin coño ñuhu ñayiví ihya, ican ra cuan, sacahán Tatyí li Nyoo chi ra. ³Soco ndíi cuií maa ñáyiví cha catyí vatyí ra Cristo ña chicá noo ra chihin coño ñuhu ñayiví ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñí ndo vatyí nyaá quichi cuan. Ta vityin cha chicá noo chi síqui ñuhu ñayiví.

⁴Ra cuatyaa sehi, ñáyiví chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyí cahnú ca ra Cristo, ra nyaá aña ñima ndo ta ñima ca ra ña vaha, ra cha chicá noo síqui ñuhu ñayiví ihya. ⁵Maa ñu cuan, ñu cuenda ñayiví ri ihya cuví ñu. Yucuan chaha cañan ñu tuhun ñayiví ihya. Ta ñu cuenda ñayiví ihya tyasohó ñu tuhun cañan ñu. ⁶Soco yóo cuví yo ñu cuenda Nyoo. Ta ñu cuenda Nyoo tyasohó ñu tuhun cañan yo, soco ñu yihí tatyí ña vaha aña ñima, ña cuñí ñu tyasohó ñu. Ta

tyicuan caa cuví nichon nuu yo chi ñu yihí
Tatyí li Nyoo ta ñu yihí tatyí ña vaha.

Nyoo cuñí xaan ra chi tandihí ñáyiví

⁷ Yañi yo, na cuñí yo chi tahan yo, vatyí Nyoo sañahá ra chi yo yoso caa cha tahán chi cuñí yo chi ñu. Tandihí yo cha cuñí yo chi tahan yo sehe Nyoo cuví chi yo, ta ñohó nuu yo chi Nyoo. ⁸ Soco ñu cha ña cuñí chi tahan, ta cohon nuu ca ñu chi Nyoo, vatyí Nyoo cuñí xaan ra chi yo ta chi tandihí ñáyiví. ⁹ Ta sañahá Nyoo vatyí cuñí ra chi yo chihin cha chahá ra noo Sehe mañi ra tyi quichí ra siquí ñuhu ñáyiví ihya, vatyí cuhva ra noo ñáyiví chaa coo yo. ¹⁰ Nyehe xihna, yoso cha cuñí Nyoo chi yo. Nima vatyí xihna ca yo cuñí yo chi ra, soco xihna ca maa ra cuñí ra chi yo. Ta tachi ra chi Sehe ra vatyí tacuhva cúvi ra tyiño nuu yo ta cahnya ra cuatyí yo.

¹¹ Nyoho yañi, tatu cuñí Nyoo chi yo cha tyicuan caa, tahán tucu chí cuñí maa yo chi tahan yo. ¹² Vasi ni nonga ñáyiví, ta nyehe ca ñu chi Nyoo, soco tatu cuñí yo chi noo noo tahan yo, Nyoo nyaá ra añima yo. Ta tyicuan caa nii vaha iñi yo cuñí yo chi ra. ¹³ Ta chitó yo vatyí nyaá yo chichi ndaha ra, ta maa ra nyaá añima yo vatyí chahá ra Tatyí li ra cunyaa añima yo. ¹⁴ Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyiví iyó siquí ñuhu ñáyiví. ¹⁵ Tandihí ñu nachinó iñi chihin cha nii iñi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

¹⁶ Ta yoo cha nacoto yo ta nachino iñi yo tyi Nyoo cuñí ra chi yo, ta chi tandihí ñáyiví. Ta ñu cha cuñí chi tahan, chichi ndaha Nyoo nyaá ñu. Ta Nyoo nyaá ra chichi añima ñu. ¹⁷ Vatyí tatu cuñí yo chi Nyoo chihin cha nii iñi yo ma yuhví cuñí yo nyehe yo chi ra, nachaa chi quivi cutuñi chi tandihí ñáyiví nuu ra. Vatyí tari cuhva iyó maa ra Jesucristo, tyicuan caa iyó yo siquí ñuhu ñáyiví ihya. ¹⁸ Nyoo cuñí ra chi yo, ta tatu cuñí yo chi ra, ñahri maa cha yuhví yo. Tatu nii iñi yo cuñí yo chi Nyoo ña nuña ca nu quihí tuhun yuhví añima yo, vatyí Nyoo tava ñehe ra tandihí maa cuan. Vatyí tatu yihí cha yuhví cuñí yo, yihí cha cuenda

vatyí iyó cuatyí yo. Ta yuhví yo cha cutachi tuñi Nyoo chi yo. Vatyí tatu yuhví cuñí yo, yuhví yo vatyí ña cuñí vaha yo chi Nyoo.

¹⁹ Yoo cuñí yo chi Nyoo vatyí xihna ca maa ra cuñí ra chi yo. ²⁰ Tatu yoo cha catyí: “Yuhu cuñí chi Nyoo”, catyí ñu, soco ña cuñí nyehe ñu chi tahan ñu, noo ñu cuendu cuví ñu. Vatyí tatu ña cuñí nyehe ñu chi tahan ñu cha nyehé ñu, ¿atu cuví cuñí ñu chi Nyoo cha ña nyehé ñu? Ma cuvi. ²¹ Ta Nyoo chahá ra tuhun ihya chi yo: Ñu cha cuñí chi Nyoo, tahán chi cha cuñí tucu ñu chi noo noo tahan ñu ñandihí.

5

Cha nii iñi yo chinó iñi yo chi Nyoo sahá ganaa yo chi cha ña vaha

¹ Tandihí ñu chinó iñi tyi ra Jesús cuví Cristo cha saquichí Nyoo, sehe Nyoo cuví chi ñu; ta tatu cuñí yo chi noo sutu, cuñí tucu yo chi tandihí sehe ra. ² Tatu cuñí yo chi Nyoo ta sacuví yo cha catyí ra, chitó yo vatyí cuñí tucu yo chi ñu sehe Nyoo. ³ Vatyí cha cuñí yo chi Nyoo ican cuví cha quichahá yo tuhun chahá ra chi yo. Ta tandihí tuhun cha chahá ra chi yo ña yihí sacuvi yo. ⁴ Vatyí tandihí yo cha cuví yo sehe Nyoo, cuví chasaha yo chi cha ña vaha cha iyó ñáyiví ihya chihin cha chinó iñi yo chi Nyoo. ⁵ Ñu cha chinó iñi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñáyiví ihya.

Tatyí li Nyoo cuví cha ndaa cuenda ra Jesús ra cuví Sehe Nyoo

⁶ Ra Jesucristo quichí ra siquí ñuhu ñáyiví ihya. Ta chitó yo tyi ndicha cha Sehe Nyoo cuví chi ra nu condutya ra, ta nu chatí niñi ra ñandihí. Nima noo ri nu condutya ra. Soco nu chatí niñi ra ñandihí. Ta Tatyí li Nyoo cuví cha ndaa tyi tyicuan caa cuví. Ta maa ri cha ndicha cahán Tatyí li Nyoo. ⁷ Iyó uñi tahan testigu cha nyaá andivi: Sutu yo Nyoo ta ra Cristo ra cuví Tuhun Cahán Nyoo, ta Tatyí li Nyoo. Ta nduñi tahan ihya cuví noo ri, ta ñin ri cuhva cahán nduñi tahan. ⁸ Ta iyó uñi tahan testigu siquí ñuhu ñáyiví ihya: Tatyí li Nyoo cha nyaá añima yo catyí vatyí ican ra Jesús cuví Sehe Nyoo. Yucuan cuví noo. Ta nu condutya ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chatí niñi ra Jesús, yucuan cuví cha cu uñi cha sañahá

chi vatyi ra Jesucristo cuví ra Sehe Nyoo. Ta tyicuan caa nduñi tahan cuan iin ri cuhva cahán. ⁹Yoó tuhvá yo naquehen yo tuhun cahán ra cuví testigu siqui ñuhu ñayiví ihya. Soco Nyoo cahnu ca cuví ra ta ñima ca ra ñuhu ñayiví ihya. Ta ican ra catyi ra vatyi ra Jesús cuví Sehe ra. ¹⁰Ñu cha chinó iñi tyi Sehe Nyoo cuví chi ra Jesús, chitó ñu chichi añima ñu tyi ndicha. Ñu cha ña chinó iñi chi ra, tari quiví cha sahá ñu tuhun tyi Nyoo ra cuendu cuví ra, vatyi ña cuñí ñu chino iñi ñu cha cahán Nyoo tumañi iñi cuenda Sehe ra, ra Jesús. ¹¹Ta ican ihya cuví tuhun cahán Nyoo chihin yo: Catyí ra tyi chahá ra noo ñayiví chaa coo yo tatu chinó iñi yo vatyi ra Jesucristo cuví Sehe ra. ¹²Ñu cha nyaá Sehe Nyoo añima, iyó ñu ñayiví chaa ihya. Ta ñu cha yori Sehe Nyoo nyaá añima, ñahri ñayiví chaa cuan iyó ñu.

Nu ndihí cahan ra Juan ta chahá ra tuhun chi ñu

¹³Sacuhín tuhun ihya chi nyoho cha chinó iñi chi ra Jesús Sehe Nyoo, tacuhva coto ndo tyi cha iyó ndo ñayiví chaa cha ma naa ca maa.

¹⁴Cunyeé xaan iñi yo chi Nyoo vatyi chitó yo vatyi tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo. ¹⁵Ta tatu chitó yo tyi chiñí ra tuhun cahán yo, chitó tucu yo tyi cha ñihí yo cha chicán yo chi ra.

¹⁶Tatu nyehé yo noo ñu tahan yo sacuví ñu noo cuatyí, soco noo cuatyí cha ña sacunaá chi chi ñu nuu Nyoo, cuví cacán tahvi yo chi ra cha cuenda ñu. Ta cusaha ra ticahnu iñi cuatyí ñu tacuhva coo ca ñu nuu ra. Soco iyó noo cuatyí cha sativí chi ñáyiví nuu Nyoo. Ña tahan chi cacán tahvi yo cha cuenda ñu cha sacuví cuatyí cuan.

¹⁷Tandihí cha ña vaha cha sacuví ñáyiví, cuatyí cuví. Soco iyó cuatyí cha ña sativí ndihí chi chi yo nuu Nyoo.

¹⁸Chitó yo vatyi ñu cha nacacú chaa saha Nyoo, ña sañihí ñu sacuví ñu cuatyí. Vatyi Sehe Nyoo sahá cuenda chi ñu ta ña chahá ra cha tñin ra ña vaha chí ñu.

¹⁹Ta yoó chitó yo tyi cuenda Nyoo yihí yo. Tandihí ca ñáyiví, cuenda ra ña vaha yihí ñu, vatyi nyacá ñaha ra chí ñu.

²⁰Chitó tucu yo vatyi cha quichí Sehe Nyoo. Ta chahá ra cha chiñi tuñi vatyi

cohon nuu yo chi Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñayiví chaa cha ma naa ca maa. ²¹Nyoho ra cuatyaa sehi, saha ndo cuenda chí ndo chihin cha sacahnú ñáyiví, ta ni ñima Nyoo cuví.

Ta na cuví chí tyicuan caa.

Carta Cha Cu Uvi Cha Tyaa Ra Apóstol Juan

Nu catyí ra Juan vatyi cuñí xaan ra chi ñu yihí cuenda Nyoo

¹Nyoo nacachi ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chí tandihi sehun. Ta cuñí xain chí ndo chihin cha ñi ñi. Ta ñima yuhu ri cuñí chí ndo soco tandihi ca ñu cha nacotó cha ndicha ñandihí. ²Cuñí chí ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo. ³Sutu yo Nyoo ta Sutú Mañi yo Jesucristo Sehe Nyoo na nasoco ra chí ndo ta na nyehe ndahvi ra chí ndo. Ta na coo cha taxi ri añima ndo, chihin cha ndicha, vatyi cuñí xaan ra chí ndo.

⁴Sii xaan cuñí cha chité tuhun suhva sehun ta nyehí vatyi iyó ñu tari cuhva catyí cha ndicha, tari cuhva catyi Sutú yo Nyoo tyi sacuvi yo. ⁵Ta vityin, Hermana, chacú ndahvi nuun, na cuñi yo chí noo noo tahan yo. Ican ihya cuví cha tyái nu tutu ihya. Ta ñima noo tuhun chaa cha chahá Nyoo chí yo cha vityin ri cuví cha cuñí yo chí noo noo tahan yo. Soco ican ihya cuví tuhun cha catyí Nyoo chí yo nyata quivi xihna ri. ⁶Ta cha cuñí yo chí ra, ican cuví cha sacuví yo tandihi cha catyí ra chí yo. Ican ihya cuví cha catyi Nyoo tyi sacuvi yo. Ta nyoho, chihí ndo tuhun ihya nya quivi xihna ri. Na coo ndo chihin cha cuñí ndo chí Nyoo ta chí ñáyivi.

Nu catyí ra Juan vatyi saha cuenda yo chí yo chihin ñu chícá noo sandavi ñaha

⁷Catyí chuun tyehe caa vatyi cuaha xaan ra casandaví ñaha cachicá noo ra ñicahnu siqui ñuhu ñáyivi. Cacatyí ra vatyi ña ndicha cha quichi cacu ra Jesucristo chihin coño ñuhu ñáyivi ihya. Ra cacatyí tyicuan caa, sandaví ñaha ra chí ñáyivi. Ta cuví ra noo ra xaan ñi chí ra Cristo. ⁸Yucuan chaha, saha ndo cuenda chí ndo chihin tuhun cha sañahá ra coto sacunaa ndo cha vaha cha sacuví ndo, ta coto ma ñihi ca ndo tandihi cha cuacuhva Nyoo chí ndo.

⁹Yóó ñu cha ña ndoó vaha chihin cha sañahá ra Cristo chí yo ta sañahá ñu inga tuhun, yori Nyoo nyaá chihin ñu cuan.

Soco ñu ndoó vaha ta quichahá tuhun cha sañahá ra Cristo, nyaá Sutú yo Nyoo ta ra Jesucristo Sehe ra chihin ñu cuan. ¹⁰Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañahá ra Jesucristo, ma cuhva ndo vehe ndo cunyaa ra, ni ma tyinyee ndo chí ra. ¹¹Vatyi tari quivi cha ñin ri cha ña vaha sacuví yo chihin ra tatu naquehén cuenda vaha yo chí ra cuan.

Nu ndihi cahan ra Juan

¹²Cuaha xaan ca tuhun tyái cuhva sacote chí ndo, soco ña cuñí sacote chí ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusii ca cuñi yo.

¹³Ihya vachi nocumi chuun sahá sehe cuhun. Nacachi tucu Nyoo chí maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyi ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chi yoho, Gayo, vatyi yoho cuvún noo ra tahin cha cuñí xain chihin cha ñi ñi.

² Yañi, chicán tahvi chi Nyoo cha cuendon vatyi na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tiin cuehe chuun. ³ Vatyi cusii xaan cuñi quivi quichi coyo suhva ra yañi yo. Ta canacatyí ra vatyi cha ndicha vaha iyón cuhva cha sañahá ra Cristo. Ta ican cuví cha ndicha vaha. ⁴ Nahri ca cha sii cuñí tari cha chité vatyi sehi sacuví vaha ñu cuhva catyí tuhun ndicha.

⁵ Cuñí xain chuun, yañi. Vaha xaan sacuvún, vatyi tyiñuhún chi ra yañi yo, ta cha vaha xaan ca cha sacuvún vatyi tyiñuhún chi ra yañi yo inga ñuu cha chaa vehun. ⁶ Chihin nuu tandihí ñu vehe ñuhu canacatyí ra vatyi cuñí xaan chi ra. Ta sáha tumañi ñi, yoho Gayo, tyinyee con chihin cha chiñuhú chi ra yañi yo vatyi sañihí ca ra cuhun coyo ra nu cuahan ra. Vatyi tyicuan caa tahán ñi Nyoo cha sacuvi yo. ⁷ Vatyi tyiño nuu Jesucristo cachicá noo ra. Ta ña cacuñí ra cha tyinyee ñáyivi cha ña ñohó nuu Nyoo chi ra. ⁸ Yucuan chaha vatyi maa yo tahán chi nyehe yo ñáá ndihi cha chiñuhú chi ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyi ra Diótfrefes, ña vaha sacuví ra

⁹ Yuhu sacuhin noo carta chi ñu nyicú vehe ñuhu, soco ra Diótfrefes sacuví ri maa ra nuu chi ra, ta ña tyasohó ra tuhun cahín.

¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyi cahán ña vaha ra siqui yo. Ta siin ri tatu yóó hermano chaa, ña naquehén cuenda ra chi ra. Ta tatu ñu nyicú vehe ñuhu naquehén cuenda ñu chi ra, chasí ri ra, ta tavá ñehe ra chi ñu vehe ñuhu.

¹¹ Cuñí xain chuun, yoho yañi. Ma sacuvun cuhva ña vaha tari cha sacuví ra, soco

sacuvun cha vaha. Vatyi ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chi Nyoo.

Nu catyí ra Juan vatyi vaha xaan cuhva chinó ñi ra Demetrio

¹² Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chi tyi ra vaha cuví ra. Ta siin ri nyuhu tucu cuví ndi cha ndaa cha cuenda ra, ta nyoho chitó ndo vatyi tuhun ndicha cahán ndi.

Nu ndihi cahan ra Juan

¹³ Cuaha xaan tuhun tyai cuhva sacote chuun, soco ña cuñí sacote chuun chihin tutu. ¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo. ¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sahun tumañi ñi cuhvon nocumi chi noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

Nu tyag ra Judas noo tutu chi ñu nacang Nyoo chí

¹Yuhu ra Judas cuví noo ra sacuví tyiño nuu ra Jesucristo. Ta yañi ra Jacobo cuví chii. Tyafí noo carta ihya chi ndo cha cuví ndo ñáyivi cha nacang Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha iin ri cuví ndo chihin ra Jesucristo. ²Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñí ra chi yo. Ta na coo cuaha ca cha taxi ri cuñi añima ndo, saha ra.

*Nu cahán ra Judas siquí ñáyivi cha sañahá cha ña ndicha
(2 Pedro 2.1-17)*

³Cha naha xaan yihí iñi tyai noo carta chi nyoho yañi, vatyí cuñí cahin chiin siquí yoso caa sacacü Nyoo añima yo. Soco vityin cuñí chi cha tyafí tutu ihya chi ndo vatyí saniñi chi ndo cunñi iñi ndo chihin tandihí fuerza ndo ta cuhun ndo ityi nuu ca chihin cha chinó iñi ndo tuhun vaha cha chahá Nyoo chí yo. Vatyí noo ri chaha chahá ra ta iin caña ri chahá ra tandihí cha tahán chi chí yo vatyí chinó iñi yo cha cuví yo ñu yihí cuenda ra. ⁴Vatyí yihí ra quihví xehe ra nu nyicu ndo. Ta cuñí ra sandavi ñaha ra chi ndo. Catyí ra vatyí cha yahá saha Nyoo ticahnu iñi chi yo ta yucuan chaha cuvi sacuvi yo yoso cuhva quichi cuvi iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chi sacuvi ra. Vatyí ña caquichahá ra chi Nyoo ta ña chinó iñi ra cha Nyoo cuví noo ra cahnu ca, ra nyacá ñaha chí yo. Ta ni ri ra Jesucristo Sutu Mañi yo, ña cahnu xaan cuví ra, cacatyí ra.

⁵Vasí cha chitó ndo cha sacuvi Nyoo ta cha naha, soco cuñí sanicohín iñi ndo vatyí Sutu yo Nyoo tava ra chi sutu chahnu yo ñu Israel ñuu Egipto, sacacü ra chi ñu ndaha ñáyivi ñuu Egipto cuan. Soco yahá cuan sanaa ra tandihí maa ñu cha ña chinó iñi

chi ra. ⁶Ta tyicuan caa tucu ángel. Ii ra. Ñahri cuatyí ra. Soco suhva ra caquitá ra nu cuatyaa Nyoo chí ra cha cuenda cha ña quichahá ra chí ra. Yucuan chaha Nyoo cumí ra chí ángel cuan, nuññí ra chihin cadena nu ñaa iñi. Nyatú ra cha sacutuñi Nyoo chí ra na chaa chí quivi cahnu. ⁷Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaa cha chiyo nicachico ñuu cuan. Sanaa Nyoo chí ñu cha cuenda cha quiñi caa cha chinyacuví ñu. Ca chiyo ri maa ra chihin ñusihi. Ta ñusihi ca chiyo ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayii ca chiyo ra chihin tahan yii ra ñandihí. Soco cha cuenda cuan, nyehe ñu tindoho nu cayü ñu, quivi chahmí Nyoo ñuu ñu. Ta yucuan sañahá chí chí yo vatyí ñu sacuví cha quiñi caa, cucayu ñu chihin ñuhu cha ma ndahva ca maa.

⁸Ta tyicuan caa tucu ra cacuñí sativí chí ndo. Vasí cha chitó vaha ra cha sacuvi Nyoo ta ityi chata ca, soco maa ra chicá iñi ra vatyí tyaquí xaan cuacoo ra nu cuahan ca chí chihin cha nyacuví ra tyicuan caa. Soco ndahvi ra vatyí tari quivi cha tahán ra noo ñumahna tyaquí cuví cuan. Sativí ra coño ñuhu ra ta ña cuñí ra cha cunyaca ñaha Sutu Mañi yo chí ra. Ta cahán ña vaha ra siquí ra nahnu ca cha nuu maa ra, cuví ri siquí ángel, cuví ri siquí vatyí ña vaha, cuví ri siquí Nyoo. ⁹Soco ángel Miguel cha cuví ra noo ra cahnu nuu Nyoo, ta ña caña iñi ra sacuvi ra tyicuan caa. Vatyí quivi cañi tahan ra chihin ra ña vaha cha cuenda coño ñuhu ra Moisés, ña caña iñi ra cahán ña vaha ra siquí ra ña vaha. Noo ri cha catyí ra chí ra: “Maa Sutu Mañi yo na tachi tuñi ra chuun cuenda cha ña vaha cha nyacuvín”, catyí ángel Miguel cuan chí ra. ¹⁰Soco ra cha sayangá chí ndo cuan, cahán cuehe ra vatyí ña chitó ra. Ta sacuví ra tari sacuví quiti. Vatyí quiti ña cutuñi iñi ti. Nyacuví ri maa ti cha cuñí coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chí ra.

¹¹¡Ndahvi ra ndahvi cuan! Vatyí quehen ra cha caa ra Caín. Ta cha cuenda cha cuñí ra saha ganaa ra xuhun, quitá caxiin ra tari quitá caxiin ra Balaam. Ta cucunaa ra tari cuanaa ra Coré, vatyí chihí ra cuan cha cuenda cha nacahnü ra nu cahán ra

cuví nuu chi ra. ¹²Ra cha sayangá chi ndo chahá ra ticahan nuu chi ndo nu ndu iín ri ndo. Vatyí chachí ra ta chihí ra, chihin cha sîi cuñí ra. Ta ña cahán nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chi, ta cuñí maa yo tyi cua coon savi, ta ña coón ra. Cuví ra tari noo yutun cha ña chaha chiti. Vatyí noo yutun cha ña chahá chiti cuví tun tari noo yutun chihí vasi nyitó tun. Ta siin maa cha cucúvi vaha tun vatyí cucahnya ñáyivi chi tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vatyí chitó ra tuhun vaha ta ña cuñí ra sacuvi. ¹³Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco iin yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa añima ñáyivi. Ta cuví ra tari tiño andivi cha cuanaq. Soco cha nyaá maa cha cundoo ra nu ñaa iñi cahnu tyicuan ri maa.

¹⁴Tuhun maa ra cuan cañan ra Enoc ta cha naha. Ra Enoc tata cu ucha ra Adán cuví ra. Ta cañan ra tuhun cha chaha maa Nyoo chi ra, ta catyí ra: “Nyehe chi Sutu Mañi yo cha vachí ra chihin cuaha mil ángel cuenda ra ¹⁵vatyí nyehe ra cha sacuvi tandihí ñáyivi. Ta tachí tuñi ra chi tandihí ñu quiñi iyó cha cuenda tandihí cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyí ra Enoc ta cha naha. ¹⁶Ra cha sayangá chi ndo, ña ndoo ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahan vaha ra chihin noo ñáyivi soco cha cuenda cha cuñí ra cuvaha ra nuu ñu.

Nu chahá ra Judas tuhun chi ñu yihi cuenda Nyoo

¹⁷Soco nyoho yañi, ma quichaha ndo chi ra cuan. Soco nicohon iñi ndo tuhun cha cañan ra apóstol cuenda Sutu Mañi yo Jesucristo. ¹⁸Cacatyí ra chi ndo vatyí nu cuasandihí ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuvi iñi maa ra chihin cha quiñi caa ra. ¹⁹Ta ican ra ihya cacuví ra cuñí sacusiin chi yo. Vatyí quichahá ra cuhva cuñí coño ñuhu ra ta ñahri Tatyí li Nyoo nyaá chihin ra.

²⁰Soco nyoho yañi, cunii ca iñi ndo chihin cha chinó iñi ndo chi ra Cristo. Ta cañan tahvi ndo chi ra chihin tunyee iñi Tatyí li maa ra. ²¹Ta tyicuan ri ñihi cuninyaana ndo chi Nyoo, ta coto ndo vatyí cuñí xaan ra chi ndo. Ta cuatu tuhva ndo quivi chaa yo nu coo yo ñáyivi chaa cha ma naa ca maa. Vatyí ican cuví cha cuacuhva Sutu Mañi yo Jesucristo chi yo cha cuenda cha ndahvi cuñí ra nyehé ra chi yo.

²²Ta ndahvi cuñi nyehe ndo chi ñu cha ña nii vaha iñi. ²³Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhu. Ta chi inga ñu cundahvi cuñi ndo nyehe ndo chi ñu, soco saha ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahma ñilhnó ñu ta ña vaha cha cuenda cha sacuví ñu cha quiñi caa.

Nu ndihí cañan ra Judas ta sacahnu ra chi Nyoo

²⁴⁻²⁵Noo ri Nyoo iyó, ta chihí tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduvií ra chi yo cha ñahri cuatyí yo coo quivi cunyaca ra chi yo nu nyaá ra chihin cha cahnu cuví ra. Ta sîi xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyí cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihí. Nyacá ñaha ra ta ityi chata ca, vityin. Ta tyicuan ri maa cunyaca ñaha ra. Ta na cuvi chi tyicuan caa.

Cha Sañaha Ra Jesucristo Chi Ra Apóstol Juan

Cha nyehę ra Juan

¹Ican ihya cuví noo cha catyí Nyoo chi ra Jesucristo vatyí na sacoto ra chí ra casacuví tyiño nuu ra. Sañaha ra ñáá ndihi cha cucuvi cha numi ri. Noo ángel tachí ra Jesucristo vatyí sañaha ra chí yuhu ra Juan. ²Ta cahín cha ndaa ta cha ndicha cuenda tandihi cha nyehí. Ta cuví cha ndaa cuenda tuhun Nyoo ta cuenda tandihi cha sacoto ra Jesucristo.

³Sii xaan cuñí ñu sacuaaha tuhun cha nyaá nu tutu tuhun Nyoo ihya. Ta sii xaan cuñí ñu chinií tuhun cha cahán chí ta quichahá ñu, vatyí tandihi tuhun cha nyaá nuu tutu Nyoo, cha nyañaa yatyin quivi cha cunyehe yo.

Nu sacuhun ra Juan tutu chí ndi ucha tahan vehe ñuhu

⁴Yuhu ra Juan sacuhín tutu ihya chí ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí li ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chí ndo. Ta na coo cha taxi ri aña nido sahá ra. Nyoo ican ra cuví ra iyó vityin, ta iyó maa ra quivi quichahá tandihi, ta ican ra cuquichi. ⁵Ta naquehen tucu ndo cha vaha cuan sahá ra Jesucristo ñandihí. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chí ra ta nyacá ñaha ra chí ra cacuví rey cha iyó siquí ñuhu ñayiví ihya. Ican ra cuví ra cha cuñí xaan chí yo. Ta sandachí ra cuatyí yo chihin niñi ra. ⁶Ta sacuví ra rey chí yo. Ta sacuví ra tata sutu chí yo tacuhva vatyí sacuvi yo tyiño nuu Nyoo Sutu ra. ¡Na sacahnu yo chí ra. Ta na cunyaca ñaha ra tyicuan ri maa! Ta tyicuan caa na cuví.

⁷¡Nyehe ndo! ¡Cha vachi ra Cristo nu vico andiví! Tandihí ñáyivi cunyehe ñu chí ra. Nyacua nya ñu cha sañicuehe chí ra ta cunyehe ñu chí ra. Ta tandihí ñu cucuacu chaa ñu chihin cha yuhví ñu na nanyehe ñu chí ra inga chaha vatyí suri maa ra cuví. Cha ndicha, tyicuan caa cucuvi.

⁸Catyí Nyoo:

—Yuhu cuví ra xihna cuiiri, ta yuhu cuví ra cundoo nu ndihí tuhun —catyí Sutu yo Nyoo, ra iyó tandihí tunyee iñi chí. Ican ra cuví ra iyó vityin. Ta iyó maa ra nu quichahá tandihi, ta ican ra cuquichi.

Noo cuhva tyaquí cha sañaha Nyoo chí ra Juan cuenda ra Cristo

⁹Yuhu ra Juan cuví yañi nyoho. Ta iin ri nyehé yo tindoho. Ta iin ri nyacá ñaha Nyoo chí yo. Ta iin ri cunyehe xaan yo ñáá ndihí cha cuví chí yo vatyí tyinyee ra Jesucristo chí yo. Noho yuhu vehe caa noo ñuhú cha nañí Patmos cha nyaá mahñu tyañuhu. Nohí vehe caa cha cuenda vatyí cahín tuhun Nyoo cha quichí sañaha ra Jesucristo. ¹⁰Ta cuví chí noo quiví cha sacahnú yo chí Sutu mañí yo. Ta ñihí xaan chinyaa Tatyí li Nyoo chihin. Ta chinií noo ndusu ñihí xaan ityi chate, tari noo ndusu cha ñihí xaan tari ndusu trompeta. ¹¹Ta catyí chí chii tyehe caa:

—Yuhu cuví ra xihna cuiiri, ta yuhu cundoi nu ndihí tuhun. Tyaá nuu noo libru tuhun cha nyehun, yoho Juan. Ta sacuhun chí ndi ucha vehe ñuhu cha nyicú ityi Asia. Sacuhun chí ñu nyicú vehe ñuhu ñuu Éfeso, chí ñu vehe ñuhu ñuu Esmirna, chí ñu vehe ñuhu ñuu Pérgamo, ta chí ñu vehe ñuhu ñuu Tiatira, ta chí ñu vehe ñuhu ñuu Sardis, ta chí ñu vehe ñuhu ñuu Filadelfia, ta chí ñu vehe ñuhu ñuu Laodicea —catyí ndusu cuan.

¹²Tyicuan ta nanyocave vatyí cuñí nyehí yóo chí ndusu cha cahán chihin cuan. Ta nanyehí ucha tahan cañileru xuhun cuan.

¹³Ta mahñu ucha tahan cañileru cuan, nyehí chí noo ra cha caá tari caá noo rayí ñuhu ñayiví ihya. Nihno ra noo sahna cañi nya nu chaha ra. Ta yihí ra noo sinchu xuhun cuan, ta nya nu nyaá pechu ra chitahan sinchu cuan. ¹⁴Ta cuichin ixi xiñi ra, tari ixi mbee cuichin, tari cha cuichin catyí. Ta tari cha cayú ñuhú chiti nuu ra. ¹⁵Ta xiñó chaha ra tari xiñó noo caa cha nañí bronce cha tuhva nducuaha nu cayú ñuhú chichi noo horno. Ta ñihí xaan ndusu ra tari ndusu cha cuaha vavaha yuvi nahnu. ¹⁶Ta yihí ndaha ra ucha tahan tiño andiví chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihí xaan

nyehé ñanyii cha xiñó vavaha, tyicuan caá nuu ra.

¹⁷Cuhva cha nanyehi chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyí ra chii:

—Ma yuhvun. Yuhu cuví ra xihna cuiri, ta yuhu cundoí nu ndihi tuhun. ¹⁸Iquen cuví ra cha nyitó. Ta vasi chihí soco vityin cuacoi tyicuan ri maa. Ta iyó ityi chii cha catyí ama tahan chi tuhun chihí chi noo noo ñáyivi, ta iyó ityi chii cha catyí tatu cuhun ñu anyaya. ¹⁹Tyaa nu libru tandihi cha nyehún, cha iyó vityin, ta cha cucoo nu cuahan ca chi. ²⁰Ican ihya cuví tuhun xehe cuenda ndi ucha tiño andívi cha nyehún yihí ndaha chiyo vahi, ta cha cuenda ndi ucha cañileru xuhun cuan cuan: Ndi ucha tiño andívi cuan cuñí chi catyí: ra cha cahán tuhin ucha tahan vehe ñuhu cuan. Ta ndi ucha cañileru cuan cuñí chi catyí ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹Sacuhun tutu chi ra cahán tuhin chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyí ra cha yihí ndaha ucha tiño chihin ndaha chiyo vaha ra. Ta chicá noo ra mahñu ndi ucha cañileru xuhun cuan: ²Yuhu chité tandihi cha sacuví ndo. Chité vatyi ñihi xaan tyiño sacuví ndo. Ta cunye xaan ñi ndo. Ta chité vatyi ña cunyeé ñi ndo nyehé ndo chi ñu quiñi iyó. Ta chité vatyi tuhva ndo nducu nyehe ndo chi ra cha catyí vatyi tyiño Nyoo chica noo ra soco ña ndicha ra. ³Cunyeé xaan ñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi ñi ndo. ⁴Soco iyó noo cha caá ndo nui. Vatyi ña cuñí vaha ca ndo chii tari quívi xihna ri. ⁵Yucuan chaha ñicohon ñi ndo nya maa maa cuví nu ña vaha sacuví ndo. Ta nasama ndo cuhva iyó ndo. Ta sacuví ndo tari cuhva chiyo ndo quívi natiin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi ñi ndo cuatyí ndo, ma tinyai. ⁶Soco iyó tucu cha vaha nyacuví ndo. Vatyi ña cuñí nyehé ndo cha quiñi caa cha sacuví

ñu yihí cuenda ra Nicolás. Tyicuan tucu yuhu ña cuñí nyehí yucuan. ⁷Ta nyoho cha cutuñi ñi ndo, tyasoho ndo ñáá cha catyí Tatyí li Nyoo chi nyoho ñu nyicú vehe ñuhu. Catyí ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito aña ndo. Ta yutun cuan nanyaá tun nya nu iyó Nyoo andívi, ta cuñihi ndo tandihi cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

⁸Sacuhun tucu tutu chi ra cahán tuhin chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyí ra cuví cha xihna cuiri, ra cundoo nu ndihi tuhun, ra cha chihí ta nandotó: ⁹Yuhu chité tandihi cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin tuhun Nyoo, tyayii ndo. Ta chité yoso caa ñu cha catyí vatyi ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyi noo ityi ñu yihí cuenda ra ña vaha, ra nañi Satanás, cuví ñu. ¹⁰Soco ma yuhvi ndo cha cunyehe ndo tindoho. Vatyi ra ña vaha cutyihi ra vehe caa chi suhva nyoho, vatyi cunducu nyehe ra chi ndo tatu cusaña ndo chi Nyoo. Ta uchi quívi cunyehe ndo tindoho. Soco cunyicon vaha ndo chi Nyoo nyacua nya quívi cuví ndo. Ta yuhu cuhve ñáyivi coo ndo chihin Nyoo. ¹¹Ta nyoho cha cutuñi ñi ndo tyasoho ndo ñáá cha catyí Tatyí li Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chi cuhun ndo anyaya, nu cutachi tuñi Nyoo chi aña ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

¹²Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndanduvi chiyo yuhu: ¹³Yuhu chité tandihi cha sacuví ndo. Ta chité vatyi iyó ndo nu nyacá ñaha cuhna, ra nañi Satanás. Soco tyicuan ri chinó ñi ndo chii. Ta vasi nu canyicú ndo chiña chahñi ñu chi ra Antipas, ra cha cuví noo cha ndoo cuende, vatyi chiña chicá noo ra cha nañi Satanás cuan. Soco ni ri maa chahñi ñu chi ra, nyoho ña sandihi maa ndo

tuhun cha chinó iñi ndo chii. ¹⁴Soco catuví suhva cha caá ndo nui: Vatyí nu nyicú ndo nya Pérgamo chiña, yihí ra cha ña cacuñí ra saña ra cuhva cha sacuví ra Balaam. Ta maa ra Balaam tyiyuhú ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhú ra chi ra nacatyí ra chi ñu vatyí ñahri caa cha coo ñu chihin tahan ñu vasi ñima yíi ñu cuví, o vasi ñima ñasihi ra cuví. ¹⁵Ta suri iyó suhva ñáyivi mahñu ndo cha ña cacuñí ñu saña ñu cuhva sañahá ra cuenda ra Nicolás. Ta yuhu ña cuñí nyehi cuhva sañahá ra cuan. ¹⁶Yucuan chaha numi ri nasama ndo cuhva iyó ndo. Vatyí tatu ma nasama ndo cuhva iyó ndo, cuquichi siquí ndo cha numi ri ta cucañi tahin chihin ñu cuan chihin cha tari mityi cha quitá yuhi. ¹⁷Ta nyoho cha cutuñí iñi ndo, tyasoho ndo ñáá cha catyí Tatyí li Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucunya noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chí ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañí bronce cha xiño xaan, tyicuan caa chaha ra: ¹⁹Yuhu chité tandihí cha sacuví ndo. Ta chité yoso cuhva cha cuñí ndo chi ñáyivi. Ta chité cuhva cha chinó xaan iñi ndo chii. Ta tyinyee ndo chi tahan ndo. Ta cunye xaan iñi ndo. Ta chité vatyí cuaha ca cha vaha sacuví ndo vityin ta ñima ca ta nu quichaha. ²⁰Soco iyó noo cha caá ndo: Vatyí chahá ndo ityi chi ñaha cha nañí Jezabel na sañaha ña chi ndo. Catyí ña vatyí cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyí sañahá ña cha coo ñu chihin inga rayii o ñusihi ta ñima yíi ñu o ñasihi ra cuví. Ta sañahá ña cha cachi ñu nyayu cha chiyo nu sacahnú ñu chi xitohyo. ²¹Yuhu cha nyatu xain cha nasama ña cuhva iyó ña, soco ña cuñí ña nasama ña. Vatyí ta sandoo ca ña cha iyó ña chihin rayii ta ñima yíi ña cuví.

²²Ta vityin cua quehen noo cuehe chi ña. Ta cua cuhvi ña. Ta ma cuví nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu. ²³Ta cucahñi chi sehe ña. Ta tyicuan caa, coto tandihí ñu nyicú vehe ñuhu, vatyí yuhu chité tandihí cha chicá xiñi ñu, ta tandihí cha caá aña ñu. Ta chi tahan tahan nyoho cucuhve cha tahan chi chi ndo yoso cuhva cha sacuví ndo. ²⁴Soco chi tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyai inga tuhun cha yíi siquí ndo. ²⁵Soco ma saña ndo cuhva cha vaha nyacuví ndo nyacua nya quichi. ²⁶Ta nyoho tatu cuví chasaha ndo chi ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chi ndo cha cunyaca ñaha ndo chi ñu ñuhu ñáyivi. ²⁷Tari chahá Suti ityi chíi cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisi ñuhú, tyicuan caa cusacuví ndo chihin ñu. ²⁸Ta cuhve tiño cahnú andivi cunyaa chihin ndo. Ta ican yuhu cuví cuan. ²⁹Ta nyoho cha cutuñí iñi ndo tyasoho ndo ñáá cha catyí Tatyí li Nyoo chi nyoho, ñu nyicú vehe ñuhu.”

3

Tuhun cha sacuhun ra Jesucristo chi ñu nyicú vehe ñuhu ñuu Sardis

¹Sacuhun tucu tutu chi ra cahán tuhin chihin ñu nyicú vehe ñuhu ñuu Sardis. Ta catyun chí ra tyehe caa: “Tyehe caa catyí ra cha yihí ndaha ndi ucha Tatyí li Nyoo ta ndi ucha tiño andivi: Yuhu chité tandihí cha sacuví ndo. Ta vasi catyí ñáyivi tyi nyitó ndo soco cha cuenda chi yuhu, chihí ndo. ²Saha cumi vaha ndo chiin ri ca cha vaha cha iyó chi ndo. Vatyí cha cuñí ndihí tuhin nu nyicú ndo. Vatyí nyehí vatyí cha sacuví ndo, ña vaha maa nuu Nyoo. ³Ñicohon iñi ndo tuhun vaha cha cutuhva ndo. Cunyicon ndo cuhva cuan, ta nasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi siquí ndo, tari tuhva ra suhu quichi. ⁴Soco iyó suhva nyoho ñu Sardis chiña cha ña sacuví ndo cha quiñi caá. Na sacanyahyu ndo sahna ndo cuví cuan. Ta maa ndo

cucuihno ndo sahma cuichin chihin. Ta cucaca noo ndo chihin, vatyí tyicuan caa tahán chi chi ndo. ⁵Ta nyoho tatu cuví chasaha ndo chi ra ña vaha, cucuihno ndo sahma cuichin chihin. Ta ma sanai sivi ndo nu libru ñu cuaconyito chihin Nyoo. Ta cunacoto nui chi ndo, chihin nuu Suti, ta chihin nuu ángel. ⁶Ta nyoho cha cutuñí iñi ndo, tyasoho ndo ñáá cha catyí Tatyí li Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷Sacuhun tucu tutu chi ra cahán tuhin chihin ñu nyicú vehe ñuhu ñuu Filadelfia. Ta catyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuñá yuvehe ta ni noo ñu ta ma cuvi nacasi ñu. Ta tatu nacasi ra, ni noo ñu ta ma cuvi nuña ñu. Tyehe caa catyí ra: ⁸Yuhu chité tandihi cha sacuví ndo. Ta nuu ndo nuñe noo yuvehe. Ta yori cuví nacasi, (vatyí चाहि cha cahan ndo tuhun Nyoo chihin ñáyivi, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyí ña ñohó nuu ndo chii. ⁹Ta ñu cuenda ra ña vaha, ñu cuendu, ñu catyí vatyí ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñí chi ndo. ¹⁰Ta sacuví ndo cha catyí, vatyí cunyehe iñi ndo. Ta yucuan cuenda cusaha cuende chi ndo chihin tindoho cahnu cha cusaquichi siqui tandihi ñáyivi, vatyí cunducu cote chihin tandihi ñu iyó siqui ñuhu ñáyivi tatu cuñí ñu chii. ¹¹Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo. ¹²Nyoho tatu cuví chasaha ndo chi ra ña vaha, cahnu ca tyiño cucuví ndo nuu Nyoi. Ta ma canyaha ca ndo nu nyaá Nyoo. Ta cutyai sivi Nyoi chi ndo, ta sivi ñuu Nyoi, ñuu Jerusalén chaa cha cusaquichi Nyoi nya andivi, ta suri cutyaa tiqui sivi chai chi ndo ñandihí. ¹³Ta nyoho cha cutuñí iñi ndo, tyasoho ndo ñáá cha catyí Tatyí li Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

¹⁴Sacuhun tucu tutu chi ra cahán tuhin chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha

cha cahán cha ndicha, ra cha savahá tandihí cha iyó chihin Nyoo. ¹⁵Yuhu chité tandihí cha sacuví ndo. Ta chité vatyí ni ña cuñí vaha ndo chii. Ta ni ña cuñí tucu ndo saña ndihí ndo chii. Vaha tyehe ta saña ndihí ndo chii, o sañihi ndo quichaha ndo tuhun cahin, vaha. ¹⁶Soco vatyí chiin ri cuñí ndo chii, ta ni ña saña ndihí ndo chii, ta ni ña cuñí ndo sacuví ndo tuhun cahin, yucuan chaha cusanaa ndihí iñi tuhun ndo. ¹⁷Vatyí nyoho catyí ndo tyehe caa: Yuhu tyayii, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyí cuví ndo noo ra ña sii cuñí, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo. ¹⁸Yucuan chaha चाहि tuhun chi ndo vatyí chi mai sata ndo xuhun cuaan vaha cha yahá nu ñuhu ta ña cayú, tacuhva na cutyayii ndo. Ta chi mai sata ndo sahma cuichin vatyí cuihno ndo, tacuhva cha ma cucahan nuu ndo vatyí vityiyaa ndo. Ta tyiñi ndo colirio chiti nuu ndo tacuhva na nanyehe ndo. ¹⁹Yuhu चाहि tuhun chi ñu cha cuñí xain chi. Ta tachí tuñi chi ñu ñandihí. Yucuan chaha catyí chi ndo, ñasama ndo cuhva iyó ndo ta sacuví ndo cha vaha. ²⁰Yuhu nanyaí yuvehe añima ñáyivi ta sacachén. Tatu nya noo ñu chiiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai. ²¹Cucuhve cha cunyaa ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñaha ra. ²²Ta nyoho cha cuví cutuñi iñi ndo, tyasoho ndo cha catyí Tatyí li Nyoo chi nyoho ñu nyicú vehe ñuhu” —catyí ra Jesucristo.

4

Noo cuhva cha sacahnú ñu chi Nyoo nya gloria

¹Cha yahá tuhun cuan, ta nyehi noo yuvehe tacoho nya andivi. Ta noo ndusu cha tari caa ndusu trompeta chiiñi cha cahán chihin cha xihna ri ta catyí chi chii:

—Ndáa ihya ta cusañahi chuun cha cuacuví nu cuahan ca chi —catyí ndusu cuan chii.

²Ta caa cuhva ri cuan ta tuvi iñi vatyí ñihi vavaha nyaá Tatyí li Nyoo chihin. Ta nanyehi noo tyayu nanyaá nya andivi. Ta nyaá noo ra nuu tyayu cuan. ³Ta ra nyaá

cuan, xiño nuu ra tari xiño noo yuu vaha cha nañ jaspe ta cornalina. Ta nicachico yuhu tyayu cuan nyaá noo coo yahnyi, ta xiño ti tari yuu cha nañ esmeralda. ⁴Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihno ra sahma cuichin. Ta yihí corona xuhun cuaan xiñi ra. ⁵Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihí xaan cahán savi. Ityi nuu tyayu cuan cayú ucha tahan ñuhú. Ta ucha tahan Tatyí li Nyoo cuví cuan. ⁶Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quiti ta tari caa ñáyivi caa. Ta cuaha xaan chiti nuu cuan nyicú, tari ityi nuu ta tari ityi chata. ⁷Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiqui caá. Ta cha cu uñi, tari caá nuu rayii caá nuu. Ta cha cucumi tari caá noo tasu cha cuahan ndava, tyicuan caá. ⁸Ta ndi cumi tahan cha nyitó ihya, tahan tahan chi ta nyaá iñu tahan ndichin chi. Ta nicahnu maa chi nyaá chiti nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuti chi catyí chi tyehe caa:

Ra ii xaan cuvún, ra ndii xaan cuvún, ra ñahri cuatyí cuvún,

Sutu Mañi yuhu, Nyoo, iyó tandihí tunyee iñi chuun.

Ra cha iyó nu quichaha tandihí cuvún, Ta ra iyó vityin. Ta ra cha nyaá cha cuquichi.

⁹Ta cachahá ndi cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahvi nyoo chi ra nyaá nu tyayu cahnu cuan, ra cha iyó tandihí tyembu. Ta tahan ri chaha cha casacuví chi tyicuan caa, ¹⁰ta ndi oco cumi ra cha vaha chahnu cuan chicutiñi chiti ra ta casacahnu ra chi ra iyó tandihí tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹Sutu Mañi nyuhu, Nyoo cuvún chi ndi.

Chi yoho tahán chi cha cuhva ndi gloria, ta sacahnú ndi chuun.

Ta tahán chi cha cunyaca ñahun.

Vatyí maun savahá tandihí cha iyó.

Ta cha cuenda cha iyó iñi maun ta chicoo tandihí, cacatyí ra.

5

Nu nyehé ra Juan noo libru ta noo Mbee Luhlu cha cuví ra Jesucristo

¹Tyicuan ta chiyo vaha ra cha nyaá nu tyayu cahnu cuan, nyehi yihí ndaha ra noo libru tari caá noo tutu cha natuvi yo. Ta nyaá letra ityi nuu ta ityi chata. Ta nyasí chi chihin ucha tahan sellu. ²Ta nyehi noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³Soco ni ityi andivi ta ni ityi nu ñuhu ñáyivi, ta ni ityi chichi ñuhú, ta yori maa cha cuví nuña libru cuan. Ta ni cha nyehé ñu nuu, ta ma cuví. ⁴Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuaha, ta yori cuví nyehé nuu chi. ⁵Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñí chi catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndi ucha sellu cuan —catyí ra.

⁶Tyicuan ta mahñu tyayu cuan ta mahñu ndi cumi cha nyitó cuan, ta mahñu ra cha vaha chahnu cuan, nyehi chi noo Mbee Luhlu. Nanyaá ti ta caa ti cha chahñi ñáyivi chi ti. Ucha tahan ndiqui ti ta ucha tahan chiti nuu ti nyaá. Ta chiti nuu cuan ican cuví ndi ucha tahan Tatyí li Nyoo cha tachí ra nicahnu siqui ñuhu ñáyivi. ⁷Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan. ⁸Cuhva cha quehen ra libru cuan, ndi cumi cha nyitó cuan ta ndi oco cumi ra cha vaha chahnu cuan cacticuñi chiti ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuaan tyitu yihí cutu. Ta cutu cuan cuví chi tandihí cha chican tahvi ñu cuenda Nyoo. ⁹Ta cachita ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñáyivi. Ta chihin niñun saton chi ndi vatyí coo vaha ndi chihin Nyoo.

Ta cuví ndi ñáyivi ñuu nyihi ta ñuu nahnu nicacahnu ñuhu ñáyivi, ñáyivi siin siin sahan cahán, ñáyivi siin siin tata.

¹⁰Chahun ityi chi ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñáyivi iyó siquí ñuhu ñáyivi, cacatyí ra, chitá ra.

¹¹Yaha cuan ta nanyehi, ta chiñi ndusu cha cahán cuaha xaan ángel, tayucú ra nicachico yuhu tyayu cahnú cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehi. ¹²Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñáyivi, tahán chi cha cunyaca ñaha ra, ta naquehen cuenda ra cha tyayii.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihi tunyee iñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnú xaan ca ra cuví maa ra, cacatyí ángel cuan.

¹³Ta chiñi tiquí cha cahán tandihi cha savaha Nyoo, tandihi cha iyó andivi, ta siquí ñuhu ñáyivi, tandihi cha iyó chichi ñuhú, ta chichi tyañuhu, tandihi cha savaha Nyoo catyí chi tyehe caa:

Cahnú xaan ca cuví ra cha nyaá nu tyayu.

Cahnú xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihi maa tyembu, catyí tandihi cha savaha Nyoo.

¹⁴Ta ndi cumi cha nyitó cuan catyí chi:

—¡Tyicuan caa na cuví! —catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnú ra chi ra iyó tandihi tyembu.

6

Nu chahnya ra Jesucristo ndi ucha tahan sellu

¹Tyicuan ta nyehi nu chahnya ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin

noo ndusu cha tari caá cha cahán savi ta catyí chi:

—¡Ñaha, ta nyehun! —catyí chi chii.

²Tyicuan ta nanyehi ta nyehi noo caballu cuichin, ta ra yosó chi ti cuan ndaha ra noo arco. Ta ñihi ra noo corona quihí xiñi ra vatyí saha ganaa ra, ta cuasaha ganaa ca ra.

³Ta cuhva cha chahnya ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—¡Ñaha ta nyehun! —catyí cuan chii.

⁴Ta quita inga caballu, tyacu cuaha. Ta ra cha yosó chi ti chicoo ityi chi ra vatyí tinyaa ra cha taxi ri iyó ñáyivi, tacuhva cahñi ñu chi tahan ñu. Ta ñihi ra noo mityi cahnú quindaha ra. ⁵Ta cuhva cha chahnya ra cuví Mbee Luhlu cuan sellu cu uñi, ta chiñi cha catyí cha nyitó cu uñi cuan tyehe caa:

—¡Ñaha ta nyehun! —catyí cuan chii.

Ta nanyehi, ta nyehi noo caballu toon.

Ta ra yosó chi ti, yihí ndaha ra noo ticatya.

⁶Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

⁷Ta cuhva cha chahnya ra cuví Mbee Luhlu cuan sellu cu cumi, chiñi cha cahán cha nyitó cucumi cuan, ta catyí chi, tyehe caa:

—¡Ñaha ta nyehun! —catyí chi.

⁸Ta nanyehi ta nyehi noo caballu cuan.

Ta ra yosó chi ti nañi ra Tuhun Chihí. Ta chata ra vachi inga ra cha nañi Ra Nyacá Ñaha Nu Nyicú Ndiyi. Ta cañihí ra tunyee iñi cha cahñi ra chi cuaha xaan ñáyivi iyó siquí ñuhu ñáyivi. Vatyí chichi cha sava ñáyivi iyó siquí ñuhu ñáyivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quití xaan iyó siquí ñuhu ñáyivi.

⁹Cuhva cha chahnya ra cuví Mbee Luhlu cuan sellu cu ohon, nyehi xiu arta. Yucuan ñohó aña ñu cha chihí cha cuenda tuhun Nyoo tyi sacotó ñu tuhun ra chi ñáyivi. ¹⁰Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñáyivi cha chahñi chi ndi cha catyi tuhun maun? —catyí ñu.

¹¹ Tyicuan ta cañihĩ noo noo ñu cuan sahma cuichin cuihno ñu. Ta catyĩ ra chi ñu na canyitatu ñu suhva ca quivĩ, nyacua nya cha caña tahan tandihĩ ca tahan ñu, ñu sacuvĩ tyiño nuu ra Cristo, ñu cha tahán chi cucúvi tari cuhva chihĩ maa ñu.

¹² Cuhva cha chahnya ra cuvĩ Mbee Luhlu cuan sellu cu iñu, nanyehĩ ta quichi noo cha taán cahnu. Ta nduñaa ñayivĩ, tari sahma ñu nyaá tucuihya iñi, toon xaan nduvĩ. Ta yoo andivĩ cuan nanduvĩ tari ñiñi. ¹³ Ta tiño andivĩ canacoyo ti nya nu ñuhu ñayivĩ. Tari sanacoyo tu higo chiti yutya tun tatu yahá noo tatyĩ ñihĩ. ¹⁴ Tari natuvĩ yo noo tutu tyicuan caa cuanaa ri andivĩ. Ta tandihĩ yucu ta tandihĩ ñuhú cha nyicú mahñu tyañuhu nacanda chi ta nasama chi nu nyaá chi. ¹⁵ Ta tandihĩ rey cha iyó siqui ñuhu ñayivĩ iñi ri chihin ra nahnu, ta ra tyayĩ, ta ra cacuvĩ nuu chi sindaro, ta ra iyó xaan fuerza chi, ta tandihĩ ñu cacuvĩ musu, ta ñu cha ña cuvĩ musu, tandihĩ ri ñu cuan caquihvĩ xehe ñu chichi yavi yuu cha iyó yucu nahnu, ta chichi yavi ñuhú.

¹⁶ Ta catyĩ ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivĩ, coto tachi tuñi ra cuvĩ Mbee Luhlu cuan chi ndi.

¹⁷ Vatyĩ cha chaq quivĩ cahnu cha cutachi tuñi ra chi ndi. ¿Ta yóo cuvĩ cha cuvĩ cunye cuan? —catyĩ ñu.

7

Nu ñihĩ ñu Israel sellu cunyaq tyaan ñu

¹ Cha yaha tuhun ihya ta nyehĩ cumi tahan ángel catayucú ra ndi cumi chiyo nu quichi tatyĩ siqui ñuhu ñayivĩ. Ta ña chahã ra yaha tatyĩ cuan vatyĩ cava chi siqui ñuhu ñayivĩ. Ni ña chahã ra cha cava chi nuu tyañuhu, ni siqui yutun catayucú nuu ñuhú. ² Ta nyehẽ tiqui inga ángel, vachi ra ityi nu caña ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihĩ ndusu ra chi inga cumi ca ángel cuan, ra cha ca iyó ityi chi vatyĩ casativĩ ra nuu ñuhu ñayivĩ ta nuu tyañuhu. Ta catyĩ ra chi ra:

³ —Ma sativĩ ñaha ndo nuu ñuhu ñayivĩ, ni nuu tyañuhu, ta ni nuu yutun cha niri ca cha ta sañaha ca ndi yóo ñu cuvĩ musu Nyoo, vatyĩ cutyaa ndi noo sellu tyaan ñu —catyĩ ángel cuan.

⁴ Ta chihĩ nacatyĩ ra yoso tahan ñáyivĩ tyaa ra sellu cuan: cientu uvi xico cumi mil tahan ñu Israel. ⁵ Uchi uvi mil ñu tata ra Judá chicunyaq sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad, ⁶ uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés, ⁷ ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar, ⁸ uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihĩ ñu cuan ta chicunyaq sellu Nyoo chi ñu.

Nu nyehẽ ra Juan chi ñu ñihnó sahma cuichin

⁹ Cha yaha tuhun cuan ta nanyehĩ ta nyehĩ cuaha xaan ñáyivĩ nyicú. Ta yori cuvĩ nacahvi chi ñu, vatyĩ nyicú ñáyivĩ tandihĩ ri ñuu nyihĩ ta ñuu nahnu iyó siqui ñuhu ñayivĩ. Ta nyicú ñáyivĩ siin siin sahan cahan. Ta nyicú ñáyivĩ tandihĩ ri tata. Ta catayucú ñu nuu ra nyaá nu tyayu, ta nuu ra cuvĩ Mbee Luhlu. Ta cañihnó ñu sahma cuichin. Ta cayihĩ ndaha ñu ndaha ñoo. ¹⁰ Ta tandihĩ ñu chihin cha ñihĩ ndusu ñu, ta canachaa ñu ta catyĩ ñu:

—Sutu yo Nyoo, ra nyaá nu tyayu gloria, ta ra cuvĩ Mbee Luhlu, ican ra sacacũ chi yo —catatyĩ ñu canachaa ñu.

¹¹ Ta tandihĩ ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cachicuiñi chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chi ra. Vatyĩ Nyoo cuvĩ ra. ¹² Ta cacatyĩ ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyĩ chihĩ tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyĩ iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuvĩ chuun. Ta tyicuan ri na cuvĩ chi tandihĩ tyembu, catyĩ ra.

¹³ Tyicuan ta noo ra cuvĩ ra cha vaha chahnu cuan ndaca tuhun ra chii ta catyĩ ra:

—¿Yóo ñu cañihnó sahma cuichin ihya? ¿Ta nya ityi quichĩ coyo ñu? —catyĩ ra.

¹⁴ Ta yuhu catyĩ chi ra:

—Tata, yoho chitón.

Ta catyí ra chii:

—Ican ñu ihya cuví ñu cayahá nu tindoho cahnu. Ta canacatyá ñu cuatyí ñu, ta nducuichin sahma ñu chihin ñiñi ra cuví Mbee Luhlu. ¹⁵Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyí cua cunyaa ra chihin ñu. ¹⁶Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu. ¹⁷Vatyí ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihi tyembu. Ta Nyoo cunacuhva ra tandihi ndutya nuu ñu —catyí ra chii.

8

Nu chahnya ra Jesucristo sellu cu ucha ta quitá noo ángel chihin noo cuu xuhun cuan

¹Cuhva cha chahnya ra cuví Mbee Luhlu sellu cu ucha nu libru cuan, ndutaxín ri nya andivi tari noo cha sava hora.

²Yahá cuan ta nyehí chi ndi ucha ángel catayucú ra nuu Nyoo. Ta caquehen cuenda ra cha tahan trompeta. ³Yahá cuan ta quichí inga ángel chihin noo cuu xuhun cuan cha tuhvá yihí cutu. Ta chicuinyaa ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra iin ri chihin cha chicán tahvi ñáyivi chi Nyoo. Nu arta xuhun cuan cha nyaá ityi nuu tyayu Nyoo, yucuan chahá cuenda ra. ⁴Ta quitá ñuhma cutu cuan, nandaá chi nu nyaá Nyoo iin ri chihin cha chicán tahvi ñu cuenda ra. ⁵Tyicuan ta ángel cuan quehen ra cuu cuan. Tyicuan ta sacutú ra chihin titi ñuhu cha quitá arta cuan. Ta tuchí ra siqui ñuhu ñáyivi. Ta quichahá cahan savi, ta iyo cuví. Ta quihví tacha, ta quichahá taan.

Nu tiví ángel trompeta

⁶Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷Ángel cha xihna ri cuan quichahá tiví ra trompeta ra. Ta quichahá coon savi yuu ta saca ñiñi chihin chi, ta saca ñuhu cha cayú chihin. Ta cayú cha yatyin cha sava ñuhu

ñáyivi. Ta cha yatyin cha sava yutun cayú chihin tandihi cuhu cuii.

⁸Ta ángel cu uvi cuan tiví tucu ra trompeta ra. Ta canacavá tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduví chi ñiñi. ⁹Ta cha yatyin sava quitá cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰Ta ángel cu uñi tiví ra trompeta ra. Ta canacavá noo tiñoó cahnu andivi, suri cayú ñuhu chi ti tari ñuhu ñiti. Canacavá ti siqui cha yatyin ri sava yuvi nahnu ta siqui cha yatyin ri sava ndohyo. ¹¹Ta tiñoó cahnu cuan nañi ti Ajenjo. Ta cha yatyin ri sava ndutya cha iyó, nanduví chi Ajenjo cha cuví noo veneno cha uva xaan. Ta cuaha xaan ñáyivi chihí cha cuenda ndutya cuan, vatyí ndu uva chi. ¹²Ta ángel cu cumi cuan nativí ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiñoó andivi cuanañ ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiñoó, yucuan chaha ña cacuví sandichin chi cumi tahan hora cha noo noo ñuu.

¹³Yahá cuan ta nanyehí ta chihí vatyí noo ángel ndavá ra mahñu andivi. Ta chihin cha ñiñi ndusu ra ta catyí ra tyehe caa:

—¡Ndahvi cuví ñu iyó siqui ñuhu ñáyivi vatyí nyaá tiví uñi ca tahan ángel trompeta ra! —catyí ángel cuan.

9

¹Ta ángel cu ohon cuan nativí ra trompeta ra. Ta nyehí chi noo ra cuan, tari tiñoó andivi caá ra. Ta canacavá ra siqui ñuhu ñáyivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi. ²Tyicuan ta nuña ra yavi cuan. Ta cuaha ñuhma nandaá tari maa ñuhma cha quitá chichi noo horno cahnu. Ta ñuhma cuan chasí chi nuu ñanyii ta nasacá noo chihin tatyí. Ta nduñaa ñáyivi. ³Ta mahñu ñuhma cuan caquita coyo pinchi. Ta candava coyo ti siqui ñuhu ñáyivi. Ta chicoq ityi chi ti vatyí tyaa ti chi ñáyivi tari tisuhma cha iyó siqui ñuhu ñáyivi. ⁴Quehen ti tuhun vatyí ma satasi iñi ti, ni chi cuhu cha iyó nu ñuhu ñáyivi, ta ni noo cuhu cuii, ta ni noo yutun, soco chi ñáyivi cha ñahri sellu Nyoo nyaá tyaan

ñu. Chi ñu cuan cutyaa ti. ⁵ Soco ñahri ityi iyó chi ti cha cahñi ti chi ñáyivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñáyivi tyicuan caá. ⁶ Ta quívi cuan ñáyivi cunanducu ñu tuhun chihí. Soco ma ñañhi ca ñu. Ta vasi cuñí ñu cúvi ñu, soco tuhun chihí cucono ri chi chi ñu vatyi ma cúvi ñu.

⁷ Tari caá caballu nahnú cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuan. Ta tari caá nuu rayí, caá nuu ti. ⁸ Ta xixi xiñi ti tari caá xixi xiñi ñusihi caá. Ta tari caá noho ndicaha caá noho ti. ⁹ Ta soo ti tari caa, tyicuan caa. Ta ñhihi xaan cachan ndichin ti. Tari cachan cha cuaha xaan carreta caballu cuhva cha cachinó ti nu iyó cuatyí. ¹⁰ Ta tari caá suhma tisuhma caá suhma ti, vatyi yihí iñu. Ta chihin cuan cuví tyaa ti chi ñáyivi chichi cha ohon yoo. ¹¹ Ta pinchi cuan iyó noo ra cuví nuu chi ti. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo ñañí ra Abadón. Ta chihin sahan griego ñañí ra Apolión, ta cuñí chi catyi: Ra Sanaa.

¹² Yahá noo tindoho cuan, soco cumañi uvi ca.

¹³ Ta ángel cu iñu cuan nativí ra trompeta ra. Ta chiñi noo ndusu cha quitá chichi ndi cumi ndiqui tutun arta xuhun cuan cha nyaá nuu Nyoo. ¹⁴ Ta ndusu cuan catyi chi ángel cu iñu cha nyisó trompeta cuan, tyehé caa:

—Ndachi chi ndi cumi ángel cha canuhñi yatyin yuhu yuvi cahnu Eufrates —catyi ndusu cuan.

¹⁵ Tyicuan ta ndachi ndi cumi ángel cuan, vatyi cha nyatú tuhva xaan ra maa maa cuhva cuan maa maa quívi cuan, maa maa yoo cuan, maa maa cuiya cuan, vatyi cahñi ra chi cha yatyin cha sava ñáyivi iyó siqui ñuhu ñáyivi. ¹⁶ Ta chiñi yoso tahan sindaro chihin caballu ra, ta quitá uvi cientu millón tahan ra.

¹⁷ Ta tyicuan caa nyehí caballu cuan chihin visión, cha sanyehé Nyoo chii. Ta pechu ra cayosó chi ti cuan, yihí noo caa tyacu cuaha, tyacu azu ta tyacu cuan. Ta tari caá xiñi ndicaha caá xiñi caballu ra. Ta chichi yuhu ti quitá ñuhu ta ñuhma ta azufre. ¹⁸ Ta cha yatyin sava ñáyivi iyó siqui ñuhu ñáyivi cachihí chihin uñi tahan cha caquitá yuhu

caballu cuan; ñuhu ta ñuhma ta azufre. ¹⁹ Vatyi tunyee iñi cha iyó chi ti, chichi yuhu ti ta suhma ti nyaá. Vatyi tari caá coo, caá suhma ti. Tari noo xiñi coo tyicuan caa nuu suhma ti. Ta chihin cuan sañicuehé ti chi ñáyivi.

²⁰ Soco tandihí ca ñu cha cando, cha ña cachihí chihin cuehe cuan, ña sacucuita ñu cha sacuví ñu cha ña vaha. Ta ni ña sacucuita ñu cha sacahnú ñu chi tatyí ña vaha ta chi xitohyo. Vatyi cuví cuan noo xuhun cuan, xuhun cuichin, bronce, yuu, yutun. Cha ña cuví nyehe, ni ña chiñí ta ni ña cuví caca cuví cuan. ²¹ Ni ña casandihí ñu cha chahñí ñu, ta cha sataí ñu. Ta ña sandihí ñu cha iyó ñu chihin rayí ta chihin ñusihi ta ñima yí ñu cuví, ta ñima ñasihi ra cuví. Ta ña sandihí ñu cha suhú ñu.

10

Ángel cha nyisó libru luhlu

¹ Tyicuan ta nyehí inga ángel cha iyó xaan tunyee iñi chii, cha vachi noó ityi andiví mahñu noo vico. Ta noo coo yahnyí nyaá xiñi ra. Ta xiño xaan nuu ra tari ñanyí. Ta tari cha cayú ñuhu chaha ra, tyicuan caá.

² Ta yihí ndaha ra noo libru luhlu cha tanuñi nuu. Ta chinanyaá ra chaha chiyo vaha ra nu tyañuhu. Ta chaha chiyo satyin ra chinanyaá ra siqui ñuhu ñáyivi. ³ Tyicuan ta ñhihi xaan cana chaa ra, tari ndusu ndicaha cha nduxaan ti. Ta cuhva cha canachaa ra, chiñi ucha tahan ndusu cha siñ siñ caa tari cha cahán savi, tyicuan caa ndusu ra. ⁴ Ta cha yahá cha chiñi cha cahán ndi ucha ndusu cuan, tyicuan ta cuatyai nuu tutu. Soco chiñi noo ndusu ityi andiví, ta catyi chi chii tyehé caa:

—Cocumi xehun tuhun cha chihñun cahán ndi ucha ndusu cuan. Ta ma tyaun nuu tutu —catyi ndusu cuan chii.

⁵ Tyicuan ta ángel cha nyehí cha chañí nu tyañuhu ta siqui ñuhu ñáyivi, nacoñehé ra ndaha chiyo vaha ra ityi andiví. ⁶ Ta ángel cuan tyanahá ra vatyi cahan ra noo cha ndicha cuenda Nyoo, ra nyitó tyicuan ri maa, ra cha savahá andiví ta ñuhu ñáyivi ta tyañuhu ta tandihí cha iyó nuu chi. Ta catyi ra:

—Ñahri ca cha cucuee. ⁷ Vatyi cuhva cha cuquichaha tiví ángel cu ucha cuan trompeta ra, yucuan cuhva cuchino cava tuhun xehé cha yihí iñi Nyoo tyi sacuvi ra,

tari cuhva sacoto ra chi ra casacuví tyiño nuu ra, ra cacuví profeta cuenda ra —catyí ángel cuan.

⁸Ta ndusu cha chiñi yuhu, cha quita ityi andivi, cahan tucu chi chihin inga chaha, ta catyí chi chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañí nu tyañuhu ta nu ñuhu ñayivi —catyí chi.

⁹Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta cahun, vixi xaan tari tyañuñu. Soco chichun cundu uva chi —catyí ra chii.

¹⁰Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yahá cha chachi, uva xaan nduvi chi chichi. ¹¹Tyicuan ta catyí ra chii:

—Cuñí chi cha cunacatyun inga chaha tuhun cha cahan Nyoo siqui ñayivi cuaha xaan ñuu nyihi ta ñuu nahnu, ta siqui ñayivi siin siin sahan cahan, ta siqui ra cacuví rey —catyí ra chii.

11

Uvi tahan ra cacuví cha ndaa

¹Tyicuan ta cachahá ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Ndücüita ta tyicuhvon vehe ñuhu Nyoo ta arta ra, ta nacahvun yoso tahan ñu tuhva sacahnú chi Nyoo yucuan. ²Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava.

³Ta yuhu cutachi uvi testigu cucahan ra cha cuende cha ni ri ca cha chichi noo mil uvi cientu uñi xico quivi. Ta cacuihno ra sahma tucuihya iñi.

⁴Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi. ⁵Tatu yóo ñu cuñí satasi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihí ñu xaan iñi chi ra. Ta tyicuan caa cucuvi ñu cuñí satasi iñi chi ra. ⁶Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahan

Nyoo chi ñayivi. Ta iyó tucu ityi chi ra cha casananduvi ra ñiñi chi ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihí ri nuu cuehe, yoso tahan chaha cha cacuiñ maa ra.

⁷Soco cuhva cha cua ndihí cuhva cuenda ra tuhun Nyoo chi ñayivi, cuquita noo quiti xaan yavi cono cuan, ta cucañi tahan ti chihin ninduvi testigu cuan. Ta cucuvi chasaha ti chi ra. Ta cucahñi ti chi ra. ⁸Ta coño ñuhu ra cundoo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuvi ñayivi ñuu cuan).

⁹Ta chichi cha uñi quivi sisava, cunehe tandihí ñayivi coño ñuhu ra, ñayivi tandihí ñuu nyihi, ñayivi tandihí ri tata, ta ñayivi siin siin sahan cahan, ta ñayivi ndihí ri ñuu nahnu, cunehe ñu coño ñuhu ra. Ta ma cuhva ñu cha quihí coño ñuhu ra chichi ñuhú. ¹⁰Ta ñu cha iyó siqui ñuhu ñayivi cu cusii xaan cuñí ñu cha cuenda cha cachihi ra cuan. Ta nyacua cutachi ñu regalo chí tahan ñu cha si cuñí ñu, vatyí cachihi ninduvi rayi cha cachahá cuenda tuhun cahan Nyoo chi ñu. Vatyí chahá xaan ra tindoho chi ñu cha cuhva cha cuñí maa ñu.

¹¹Soco cha yahá cha uñi quivi sisava, Nyoo sanandoto ra chi ra, ta candicuita tucu ra inga chaha. Ta tandihí ñu nyehe canandoto ra, canayuhvi xaan ñu. ¹²Tyicuan ta ninduvi testigu cuan cachiñi ra noo ndusu ñiñi xaan ityi andivi. Ta catyí chi chi ra tyehe caa:

—Ndaa ndo ityi siqui ihya —catyí ndusu cuan chi ra.

Ta candaá ra ityi andivi chichi noo vico. Ta canyehe ñu xaan iñi chi ra nu canandaá ra. ¹³Ta cuhva cuan quichi noo cha taan cahnu. Ta chichi ñuu cuan canacoyo cuaha xaan vehe. Ta chichi cha uchi tahan vehe, canacoyo noo noo. Ta cha tandihí chichi ñuu cuan chihí ucha mil ñayivi cha cuenda cha taan cuan. Ta ñayivi ña chihí, casacahnú ñu chi Nyoo, ra nyaá andivi, cha cuenda cha yuhvi ñu.

¹⁴Yahá tindoho cu uvi cuan, soco numi ri cuquichi tindoho cu uñi.

Nu tiví ángel trompeta cu ucha

¹⁵Ta ángel cu ucha nativi ra trompeta ra. Ta canatyacu ndusu ñiñi xaan ityi andivi, ta catyí chi tyehe caa:

Tandihi nu nyacá ñaha rey siqui ñuhu ñayivi ihya, cha yahá nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñi chiti ra chihin nuu ra nya nu ñuhu. Ta casacahnú ra chi Nyoo. ¹⁷ Ta cacatyí ra:

Nacuhvá ndi tyahvi nyoo chuun, Sutu Mañi nyuhu.

Nyoo ra iyó tandihi tunyee iñi chii cuvún. Yoho iyón vityin, ta iyón nu quichaha tandihi ta nyaa cha cuquichun.

Vatyí cha naquehen cuendon tunyee iñun.

Ta cha quichahun nyaca ñahun vityin.

¹⁸ Ta ñáyivi tandihi ñuu nahnu cuxaan ñu. Soco cha chaá quívi cha tachi tuñun chi ñu. Ta cha chaá quívi cha cucutuñi chi ñu ndiyi. Ta cucuhvon cha vaha cha tahán chi chi ñu sacuvi tyiño nuun, ñu chahá cuenda tuhun cahún,

ñu cha nacuhva cuenda añima chi maun, ta sacahnú ñu sivun.

Vasí cahnu ñu cuví ñu ta vasí ndahvi ñu.

Ta chaá cuhva cha sanaun chí ñu satívi chí ñáyivi siqui ñuhu ñayivi, cacatyí ra.

¹⁹ Tyicuan ta nuña yuvehe ñuhu Nyoo cha nyaá andívi, ta chichi vehe ñuhu natuvi caja cuenda cha natyihí tahan ra tuhun chihin yo. Ta quihví tacha. Ta vaa ri maa cuví, ta cahán savi. Ta chiyo noo cha taan. Ta ñihi xaan coon savi yuu.

12

Nu chicán nyicon noo coo cahnu chi noo ñaha sihi

¹ Tyicuan ta tuví noo seña cahnu andívi.

Vatyí quita noo ñaha sihi ta siquí noo ña ñanyii tari cha ñihnó ña vestido. Ta chañí ña siquí yoo. Ta yihí noo corona cha uchi uvi tiño andívi xiñi ña. ² Ta ñaha sihi ihya ñohó sehe ña. Ta chacú chaa vavaha ña chihin cha uhvi cha cacú sehe ña, vatyí nyehé xaan ña tindoho cha cua cacú sehe ña. ³ Tyicuan ta quita nonga seña ityi andívi. Ta nyehí noo coo cuaa cahnu. Ta nyaá ucha xiñi ti, ta uchi ndiqui ti. Ta tahan tahan xiñi ti yihí noo corona. ⁴ Ta chihin suhma ti sanacoyo ti cha yatyin cha sava tiño andívi siqui ñuhu ñayivi. Ican coo ihya chicuiñi ti nuu ñaha cha cua cacú sehe

cuan, vatyí ta cha cacú ri cue ta cachi ti chi cue. ⁵ Ta ñaha cuan sacacú ña noo rayii. Ta ican ra cuacunyaca ñaha tandihi ñáyivi iyó siqui ñuhu ñayivi. Ñihi xaan cua cunyaca ñaha ra tari cha chihin noo yutun caa vee. Ta cha yahá cacú ra, naxita Nyoo chi ra nu nyaá ra nu tyayu ra. ⁶ Ta ñaha cuan chingo ña cuahan ña noo ñuhú ityi, nu sanduvahá Nyoo noo nu coo ña, vatyí yucuan cucuhva ra cha cachi ña cha ni ri ca cha noo mil uvi cientu uñi xico quívi.

⁷ Yahá cuan ta chiyo noo cuatyí nya andívi, nu cañi tahan ángel cahnu Miguel ta tandihi ángel cuenda ra chihin coo cahnu cuan. Ta coo cuan ta tandihi tatyí ña vaha cuenda ti, cacañi tahan chihin ra Miguel. ⁸ Soco ña saha ganaa ti cha cañi tahan ti. Ta ña ñihí ca ti nu ndoo ti nya andívi chihin tatyí ña vaha cha candíhi chihin ti. ⁹ Tyicuan ta tava ñehe Nyoo chi ti, cuví ti Coó Chahnu, cha nañí cuihna ra cuví nuu, ra cha sandaví ñaha chí tandihi ñáyivi iyó siqui ñuhu ñayivi. Maa ra ta tatyí ña vaha cuenda ra cacanacoyo ra nya nu ñuhu ñayivi.

¹⁰ Tyicuan ta chihí noo ndusu ñihi nya andívi. Catyí chí tyehé caa:

—Cha chaá nu cacú añima yo vityin. Cha saha ganaa tunyee iñi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tava ñehe ra chi ra cha tyaa xaan cuatyí siqui ra yañi yo ndiyaca ta ñiyaca nuu Nyoo. ¹¹ Ta ra yañi yo cacuvi chasaha ra chí ra chihin ñihi ra cuví Mbee Luhlu, ta chihin tuhun Nyoo cha cacahan ra tuhun chihin ñáyivi. Vatyí ña yuhvi ca ra cha cucúvi ra. ¹² Yucuan chaha cusii cuñi nyoho cha iyó ndo andívi. Soco ñdahvi nyoho ñu iyó siqui ñuhu ñayivi ta nu tyañuhul! Vatyí cuihna canacava ra nya andívi ta nyacua nya siqui ñuhu ñayivi nu nyicú ndo. Ta xaan xaan ra vatyí chitó ra vatyí suhva ri ca quívi ra nyaá.

¹³ Ta cha nyehé coo cahnu cuan vatyí nacava ti nu ñuhu ñayivi, chica nyicon ti chí ñaha cha sacacú sehe cuan. ¹⁴ Soco ñaha cuan ñihí ña uvi tahan ndichin nahnu tasu, tacuhva cuví ndava ña ta cono ña chí coo cuan nyacua nya ñuhu ityi cuan. Ta yucuan cuví nu cuñihi ña cha cachi ña chichi cha uñi cuiya sisava. ¹⁵ Ta coo cuan tuchi ti ndutya chihin yuhu ti, vatyí cono noo yuvi cahnu, vatyí satyañi chí ñaha cuan. ¹⁶ Soco

ñuhu ñayiví tyinyee chi ña, vatyi ndata chi ta quihví yuvi cahnu cha tuchí coo cahnu cuan chihin yuhu ti. ¹⁷ Ta cha cuenda cha ña cuví chasaha ti chi ña, cuahan ti cua cañi tahan ti chihin ñáyivi vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha nii iñi ñu.

13

Nu nyehe ra Juan uvi quiti quiñi caa

¹ Chicuinanyai nu ñiti yuhu tyañuhu cuan. Ta nyehi quitá noo quiti quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yihí noo corona. Ta xiñi ti nyaá noo tuhun cha cahán ña vaha siqui Nyoo. ² Quiti quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chahá ti ityi chi quiti quiñi caa cha cunyaa ti nu tyayu ti. Ta chahá ti ityi chi ti cha cunyaca ñaha ti chi ñáyivi. ³ Ta noo xiñi quiti quiñi caa cuan tari maa cha nyaá noo nu cahví cahnu. Soco nu cahví cuan nduvahá. Ta iyo xaan cuiñi tandihí ñáyivi iyó siqui ñuhu ñayiví. Ta nanyicón ñu chi quiti quiñi caa cuan. ⁴ Ta sacahnú tucu ñu chi coo cahnu cuan, vatyi chahá ti ityi chi quiti quiñi caa cuan. Ta sacahnú tucu ñu chi quiti quiñi caa cuan, ta catyí ñu:

—¿Yóo cha cuví chi tari cuví chi quiti quiñi caa ihya? ¿Ta yóo cha cuví cañi tahan chihin ti? —catyí ñu.

⁵ Ta ñihí tucu quiti quiñi caa cuan ityi vatyi cahan ña vaha ti ta cahan quiñi caa ti siqui Nyoo. Ta cua cunyaca ñaha ti chichi cha uvi xico uvi yoo. ⁶ Ta tyicuan caa sacuví ti. Cahan ti siqui Nyoo. Ta cahan ña vaha ti siqui nu nyaá Nyoo. Ta cahan ti chi ñu nyicú andivi. ⁷ Ta chicoo tucu ityi chi ti cha sacco ti cuatyí siqui ñu cuenda Nyoo nyacua nya cuví chasaha ti chi ñu. Ta chicoo ityi chi ti siqui ñáyivi ndihí ri tata, ñáyivi siñ siñ sahan cahan, ñáyivi tandihí ri ñuu nyihí, tandihí ri ñuu nahnu, ⁸ tandihí ñu cha ma ñihí ñayiví chaa coo chihin ra cuví Mbee Luhlu, ra cha chihí. Ma ñihí ñu vatyi nyata ni cumañi chingo ñuhu ñayiví ta ñahri sivi ñu nyaá nu libru ra. Tandihí ñu cuan cusacahnu ñu chi quiti quiñi caa cuan. ⁹ Ta ñu cutuñí iñi, na quichaha ñu

tuhun ihya: ¹⁰ Ñu cunyaca vehe caa chi inga ñu, suri cuhun tucu maa ñu. Ta ñu cha cachahñí chihin cha xaan, suri chihin cuan cucúvi tucu maa ñu. Yucuan chaha cuiñi xaan chi cha cunyeer xaan iñi ñu cuenda Nyoo. Ta cuiñi chi cha chino iñi ñu chi ra.

¹¹ Yahá cuan ta nyehi inga quiti quiñi caa. Quitá ti chichi ñuhú. Quiti ihya nyaá uvi ndiqui ti cha tari caá ndiqui mbee luhlu. Soco tari cahán noo coo xaan vavaha cahán ti. ¹² Ta nyacá ñaha ti tari nyacá ñaha quiti quiñi caa cha xihna ri cuan. Suri chihin nuu quiti cha xihna ri cuan nyacá ñaha ti. Ta tyiyuhu ti chi ñuhu ñayiví ta ñu iyó siqui na sacahnu ñu chi quiti quiñi caa cha xihna ri cuan, quiti cha nduvahá nu cahví cahnu cha chinyaa chi ti. ¹³ Ta cuaha xaan milagru sacuví ti. Nyacua cuví sanacoyo ti ñuhu cayú ityi andivi chihin nuu ñáyivi. ¹⁴ Ta sandaví ñaha ti chi ñáyivi iyó siqui ñuhu ñayiví chihin seña cha cuví sacuví ti chihin nuu quiti quiñi caa cha xihna ri cuan. Ta tachí ti nachino noo xiñahñu quiti quiñi caa cha tahnya cahví chihin mityi, soco ña chihí ti. ¹⁵ Ta quiti quiñi caa cu uvi cuan chicoo ityi chi ti cha cuhva ti cha conyito xiñahñu quiti quiñi caa cha xihna ri cuan, vatyi xiñahñu cuan cuví cahan. Ta tachí xiñahñu cuan nacúvi tandihí ñáyivi ña cuiñi sacahnu chi chi. ¹⁶ Ta siñ ri catyí ti vatyi na cunyaa noo tuñi chi tandihí ñáyivi, tandihí ñu nyihí, ñu chahnu, ñu tyayí, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu. ¹⁷ Ta yori maa cuví sata ta xico tatu ñahri tuñi cuan nyaá chi ñu. O tatu ñahri sivi ti, o número sivi ti nyaá chi ñu. ¹⁸ Tuhun ihya cuiñi xaan chi cha chiñi tuñi. Ñu cutuñi iñi, na saha ñu cuenda número quiti quiñi caa cuan. Vatyi número noo rayíi cuví. Ta número ra cuan ican cuví iñu cientu uñi xico iñu.

14

Nu sacahnú cientu uvi xico cumi mil ñáyivi chi Nyoo chihin cha chitá ñu

¹ Yahá cuan ta nyehi chi ra cuví Mbee Luhlu, nanyaá ra nu yucu Siñ. Ta chihin ra tayucú cientu uvi xico cumi mil ñáyivi cha nyaá sivi ra tyaan ta sivi Sutu ra. ² Tyicuan ta chiñi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihí xaan, o tari noo ndusu cha cuaha xaan ra casacuacú arpa. ³ Ta carchitá

ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandihí ra cha vaha chahnu cuan. Ta yori cuví cutuhva yaa cuan, iin ri maa cientu uvi xico cumi mil ñu cha cacú ańima siqui ñuhu ñayivi. ⁴Ican ñu ihya cuví ñu cha ña chicoo cuatyí ñu chihin inga rayii ta nı ri rayii chihin inga ñusihi, vatyí ii ndoo ñu, ta nyicón ñu chi ra cuvı Mbee Luhlu tandihı ri ityi nu cuahan ra. Cacú ańima ñu ta cuvı ñu ñu xihna ca chaha cuenda ñu chi ñu chi Nyoo ta chi ra cuvı Mbee Luhlu. ⁵Yori cuvı catyi vatyı cuendu ñu, vatyı ni noo cuendu ña tuhvá ñu cahan. Yucuan chaha ñahri cuatyı ñu nuu Nyoo.

Tuhun cha sacoto ńni tahan ńgel

⁶Tyicuan ta nyehi inga ńgel cuahan ndava ra andivi. Ta nyisó ra tuhun Nyoo cha ma ndihı ca maa, ta ıcan tuhun ihya cuvı cha sacacú ra Cristo ańima yo, Vatyı cusacoto ra tuhun ihya chi ñayivi iyó siqui ñuhu ñayivi, ñayivi ndihı ri ñuu nahnu, ta ndihı ri ñuu nyihı, ta ñayivi ndihı ri tata, ta ñayivi siin siin sahan cahan. ⁷Ta ñihı xaan cahan ra ta catyi ra:

—Na yuhvi ndo chi Nyoo, ta sacahnu ndo chi ra. Vatyı cha chaá cuhva cha cua cutuńi chi ñayivi. Sacahnu ndo chi ra savahá andivi ta ñuhu ñayivi, ta tyańuhu ta ndohyo ndutya.

⁸Tyicuan ta cuahan inga ńgel cuan chata ra, ta catyi ra:

—Cha canacava ñuu Babilonia cahnu vityin, cha tanı chi. Vatyı ñu iyó ñuu cuan sańahá ñu chi inga ñayivi iyó siqui ñuhu ñayivi cha quińi caa tari sacuvı maa ñu. Tari quivi cha sacuińi ñu chi ñu chihin vinu ña vaha cuvı cuan.

⁹Ta nacahan ńgel cu ńni chihin cha ñihı ndusu ra ta catyi ra:

—Tatu nya noo ñu sacahnú ñu chi quiti quińi caa cuan ta chi xińahńu ti, o chahá ñu chi ñu cha cunyaa tuńi ti tyaan ñu, o ndaha ñu, ¹⁰cunyehe xaan ñu tindoho vatyı cutyihı Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ńgel ta chihin nuu ra cuvı Mbee Luhlu cucuvi cuan. ¹¹Ta ñuhma cha quitá nu nyehé ñu tindoho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyı sacahnú ñu chi quiti quińi caa cuan ta chi xińahńu ti, o chahá ñu cha cunyaa

tuńi sivi ti chi ñu. ¹²Yucuan chaha ñu yihi cuenda Nyoo, ñu quichahá tuhun cahan ra, ñi ińi ñu chinó ińi ñu chi ra Jesús ta cuńi chi cha cunyehe xaan ińi ñu cha nyehe ñu tindoho sacuvi inga ñayivi.

¹³Tyicuan ta chińi noo ndusu cha quichi ityi andivi, ta catyi chi chii tyehe caa:

—Tyaa tuhun ihya: “Vityin ta ityi nuu ca, siı xaan cucuvi chi ñu chihı ta chinó ińi ñu chi Sutu Mańi yo.” Ndicha, catyi Tatyı li Nyoo vatyı cunyitatu ñu chihin tyińo sahá ñu. Ta iin ri cahun cha vaha cha sacuvı ñu chihin ñu.

Nu cutachi tuńi Nyoo chi ñayivi

¹⁴Tyicuan ta nanyehı ta nyehı noo vico cuichin. Ta siqui vico cuan nyaá noo rayii cha ndicha cuiı maa cha quichiı nya gloria. Ta yihi noo corona xuhun cuaan xińi ra. Ta yihi ndaha ra noo mityi cutya ta xaan. ¹⁵Ta quitá nonga ńgel chichi vehe ñuhu ta chaa canachaa ra chi ra nyaá siqui vico cuan. Ta catyi ra:

—Vityin saha tyińon chihin mityun, ta na satacon cosecha cha iyó siqui ñuhu ñayivi. Vatyı cha chaá cuhva, ta cha iyó siqui ñuhu ñayivi cha chityı chi —catyi ra.

¹⁶Tyicuan ta ra cha nyaá siqui vico cuan sayahá ra mityi ra siqui ñuhu ñayivi, ta nasatacá ra cha iyó nuu chi.

¹⁷Tyicuan ta inga tucu ńgel quitá chichi vehe ñuhu cha nyaá andivi. Ta nyisó tucu maa ra noo mityi cutya cha xaan vavaha.

¹⁸Ta nu nyaá arta quitá tucu nonga ńgel cha iyó ityi chi cha cunyaca ñaha chi ñuhu cha cayı. Ta canachaa ra ta caná ra chi ra cha nyisó mityi cutya cha xaan cuan. Ta catyi ra chi ra:

—Saha tyińon chihin mityi xaan cha nyisón chińa, ta na satacon vatu tichaha ndivi cha iyó siqui ñuhu ñayivi, vatyı cha chityı —catyi ra.

¹⁹Ta ńgel cuan sayahá ra mityi ra siqui ñuhu ñayivi ta chahnya ra tichaha ndivi cha iyó siqui ñuhu ñayivi. Ta tyihı ra noo nu tyihı ra vatyı cucuhńi ra ta quita ndutya chi. Ta cha tyehe caa cuńi chi catyi cha cutachi tuńi Nyoo chi ñayivi. ²⁰Ityi chata ñuu cachahńi ra tichaha ndivi cuan, ta cuńi chi catyi vatyı cachihi cuaha xaan ñayivi, ta nu cuvı cuan, cama xaan cama xaan nińi ñu chati. Ta chaa chi nya nu sucun nu nyaá

frenu yuhu caballu ta tari cuhva noo uñi cientu kilómetro chinó niñi cuan.

15

Nu quitá ángel chihin ucha ca tahan tindoho cha cunyehe ñáyivi nu ndihi tuhun

¹ Nyehe nonga seña cahnu andivi, ta yuhvi xain cuví, vatyí nyehe ucha tahan ángel chihin ndi ucha tindoho. Chihin ihya cuví nu ndihi tindoho vatyí cundihi cha cuxaan Nyoo chihin ñáyivi cha ña quichahá ñu tuhun cahán ra.

² Ta nyehe tiqui noo cha tari caa tyañuhu, xiño tari caá ino, nasacá chi chihin ñuhu cha catyí. Ta ñu cha yahá cuví chasaha chi quití quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihi ñu tayucú ñu yuhu tyañuhu cha xiño cuan. Ta ndahá ñu arpa, cha chahá Nyoo chi ñu. ³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu: Cahnu ta iyo xaan caá tandihi maa cha sacuvún.

Nyoo, Sutu ndi, iyó tandihi tunyee iñi chuun.

Ndoo xaan ta ndicha xaan ityun.

Yoho Rey cuvún cuenda tandihi ñáyivi iyó siqui ñuhu ñáyivi.

⁴ ¿Yóo cha ma yuhvi chuun, yoho Sutu Mañi nyuhu?

¿Yóo cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñáyivi tandihi ñuu, ta cusacahnu ñu chuun.

Vatyí cha nyehe ñu cha vaha cha sacuvún, catyí ñu chitá cuan.

⁵ Cha yahá tuhun ihya ta nanyehi nuña yuvehe ñuhu nya andivi nu cumi vaha ñu tabla cha nyaá ley. ⁶ Ta chichi vehe ñuhu cuan quitá coyo ndi ucha ángel cha canyisó ndi ucha tindoho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan. ⁷ Tyicuan ta noo cha nyitó cuan, chahá cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyivi. Ta ican ra iyó ra tyicuan ri maa. ⁸ Ta chichi vehe ñuhu cuan chitu maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chi ra. Ta yori maa cuví quihvi chichi vehe

ñuhu cuan cha niri ca cha cumañi ndihi ndi ucha tindoho cha nyisó ndi ucha tahan ángel cuan.

16

Copa cha yihí tindoho cha cua saquichi ndi ucha tahan ángel cuan

¹ Tyicuan ta chiñi noo ndusu ñihi cha quitá vehe ñuhu nu nyaá Nyoo. Ta catyí chi chi ndi ucha ángel cuan:

—Cuahan ndo cua coyo ndo cha ñohó chichi copa chiña siqui ñáyivi iyó siqui ñuhu ñáyivi, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahan ra ta coyo ra cha ñohó chichi copa cuan siqui ñáyivi cha nyaá tuñi quití quiñi caa cuan chi, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví ñihi tari ñihi noo ndiyi, ta tandihi cha nyitó chichi tyañuhu cuan cachihi.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduví chi ñihi.

⁵ Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyí tachí tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihi. ⁶ Vatyí maa ñu cachati ñu ñihi ñáyivi cuendon ta ñihi ra cacuví profeta cuendon. Ta vityin yoho tari cha cunasacohun ñihi chi ñu vatyí tyicuan caa tahán chi chi ñu —catyí ángel cuan.

⁷ Ta chiñi tiqui vatyí cahán noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihi tunyee iñi chuun. Vityin cha yahá tachi tuñun chi ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoq ityi chi ñanyii cuan vatyí cahmi chi chi ñáyivi chihin ñuhu chi. ⁹ Ta tandihi ñu, quiñi xaan chahmí ñanyii chi ñu. Soco ña canasama ñu cuhva iyó ñu, ni ña casacahny ñu chi Nyoo. Ta cahán ña vaha ñu siqui Nyoo ra cuví sanyehe tindoho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quiti quini caa cuan. Ta nduñaa ri nu nyacá ñaha ti. Ta ñáyivi cuenda ti, nyacua nacachi yihí ñu yaa ñu cha cuenda cha nyehé xaan ñu cha uhvi. ¹¹ Soco ni tyicuan caa ta ña sandihí ñu cha sacuví ñu cha ña vaha. Ta cahán ña vaha ñu siqui Nyoo ra nyaá andiví cha cuenda cha uhvi chi ñu ta cha cuenda nu cahvi chi ñu.

¹² Ta ángel cu iñu cuan coyo ra cha yihí chichi copa ra siqui yuvi cahnu Eufates. Ta yuvi cuan na ityi chi tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii. ¹³ Tyicuan ta nyehí cha quita yuhu quiti quini caa cuan ta yuhu coo cahnu cuan ta yuhu ra cuví profeta cuendu. Vatyí caquita coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan. ¹⁴ Ican ihya cuví tatyí cuinha cha casacuví milagru nahnu. Ta quita coyo chi vatyí sandu iin ri chi tandihí rey cha iyó siqui ñuhu ñáyivi, vatyí cacañi tahan ra quivi cusañaha Nyoo tyi iyó tandihí tunyee iñi chi ra. ¹⁵ Ta catyí Nyoo:

—Nyehe ndo vatyí yuhu cha vachi tari noo ra suhu. Vatyí sana ri iñi ndo ta quihví ra suhu vehe ndo. Sií xaan cucuví chi ñáyivi nyatú tuhva ri quivi quichi. Ta vii cumí ñu sahva ñu (o cuñí chi catyí añima ñu) tacuhva cha ma cuvityiaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu iin ri ra cacuví rey nu nañí chi chihin sahan hebreo Armagedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andiví nu nyaá Nyoo nu tyayu ra, quita noo ndusu chaa xaan ta catyí chi:

—Cha cuví vityin —catyí ra.

¹⁸ Tyicuan ta vaa ri maa cuví ta cahán savi ta quihví tacha. Ta ñihi xaan taan siqui ñuhu ñáyivi. Ta ndaha chicoo ñáyivi siqui ñuhu ñáyivi, ta ña tuhva taan cha ñihi xaan tyicuan caa. ¹⁹ Ta nu taan cuan ndata ñuu cahnu cuan, uñi nu ndata. Ta tandihí ca ñuu siqui ñuhu ñáyivi canacooyo. Ta Nyoo nicohon iñi ra chi ñuu cahnu Babilonia cuan vatyí quini xaan sacuví ñu. Ta sanyehé xaan ra tindoho chí ñu vatyí cuxaan xaan ra chi ñu. ²⁰ Tandihí ñuhú cha iyó chichi tyañuhu ta tandihí yucu, ndihí

cuaanaa. ²¹ Ta nahnu xaan tucu savi yuu coon ityi andiví siqui ñáyivi. Ta vee xaan. Tari noo cha uvi xico kilu vee noo noo savi yuu cuan. Ta ñáyivi cahán ña vaha ñu siqui Nyoo cha cuenda tindoho savi yuu cuan, vatyí cuví chí noo tindoho cahnu xaan cha cuenda ñu.

17

Nu cua tachi tuñi Nyoo chi noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichi noo ra nu nyaí, ta catyí ra chii:

—Ñaha tyi cusañahi chuun yoso caa cucutuñi chi ñaha cata iñi cahnu cha nyaá siqui tyañuhu. ² Vatyí ra cacuví rey siqui ñuhu ñáyivi casacuví ra cha quini caa chihin ña, ta ñáyivi cha iyó siqui ñuhu ñáyivi, tiví xaan ñu chihin cha quini caa cha sacuví ña —catyí ra chii.

³ Tyicuan ta nyehí noo cha sañaha Tatyí li Nyoo chii, ta chinyacá ángel cuan chii chiqui ndii nu yori maa ñáyivi iyó, ta yucuan nyehí chi noo ñaha, yosó ña siqui noo quiti cuaaha quini caa. Ta nyicú sivi cha cahán ña vaha siqui Nyoo chí ti. Ta ucha tahan xiñi ti nyaá ta uchi ndiquí ti. ⁴ Ta ñaha cuan ñihno ña noo sahva tyacu nyaá ta tyacu cuaaha. Ta cuaaha xaan xuhun cuan iñi chi ña, yuu tyaquí ta perla ñandihí. Ta yihí ndaha ña noo copa xuhun cuan tyitú yihí chihin cha ña vaha ta cha quini caa cha sacuví ña. ⁵ Ta tyaan ña nyaá noo sivi cha cuví noo tuhun xehe cha ña cutuñi iñi ñáyivi. Vatyí catyí chi: “Ican ñaha sihi ihya cuví ñuu Babilonia cahnu, sihi tandihí ñu cha cata iñi ta tandihí cha ña vaha cha iyó siqui ñuhu ñáyivi.” ⁶ Tyicuan ta tuví iñi vatyí ñaha cuan chiní ña chihin cha chihí ña niñi ñu cuenda Nyoo, ta ñu cha cachihí cha cuenda cha cahán ñu tuhun ra Jesús. Ta cha nyehí cuan, iyo xaan cuñí. ⁷ Tyicuan ta catyí ángel cuan chii:

—¿Ñáá tuhun cha iyo xaan cuñún? Cua sacote chuun ñáá cha cuñí chi catyí tuhun xehe ñaha sihi ihya ta quiti quini caa cha yosó ña, quiti cha nyicú ucha xiñi ta uchi ndiquí. ⁸ Quiti quini caa cha nyehun cuan, cuví ti noo quiti cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha

ni cumañi ca ndihi tuhun ti. Ta ñáyivi iyó síqui ñuhu ñáyivi iyo xaan cucuñi ñu na nanyehe ñu chi quití quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehé chi ti cuan, cuví ñu ñu cha ñahri sívi nyaá nu libru Nyoo nyata quívi chingo ñuhu ñáyivi. Ican libru cuan cucatyí yóó ñáyivi cucony-ito tyicuan ri maa. ⁹Ihya cuví noo cha cuñí chi nacoto ndo: Ndi ucha xiñi ti cuan cuñí chi catyí ucha tahan yucu cha nyaá ñaha cuan síqui. ¹⁰Ta xiñi ti cuñí tucu chi catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quívi quichi ra nu ndihi, ña naha cucunyaca ñaha ra. ¹¹Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuví quití quiñi caa cha chiyo quívi cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuvi nu cua ndihi tuhun ti.

¹²Ta ndi uchi tahan ndiqui cha nyehun cuan, cuñí chi catyí ndi uchi tahan rey cha cumañi ca cacunyaca ñaha. Soco cucoo ityi chi ra cha cunyaca ñaha ra noo ora, iñ ri chihin quití quiñi caa cuan. ¹³Ndi uchi tahan rey cuan iñ xaan ri cuhva cucaca xiñi ra. Ta cunacuhva ra tunyee iñi ra chi quití quiñi caa cuan. Ta tandihi ityi cha iyó chi ra cunacuhva ra chi ti. ¹⁴Ta cucacañi tahan ra chihin ra cuví Mbee Luhlu. Soco ra cuví Mbee Luhlu cuan, cucuvi chasaha ra chi ra. Vatyí ican ra cuví nuu chi tandihi ra nyacá ñaha. Ta cuví tucu ra nuu chi tandihi ra cacuví rey. Ta ñu nyicú chihin ra, Nyoo nacana chi ñu ta nacachi ra chi ñu. Ta nii xaan iñi ñu nyicón ñu chi ra.

¹⁵Ta catyí tucu ángel cuan chii ñandihi:

—Tandihi tyañuhu cha nyehun cuan, cha nyaá ñaha cata iñi cuan síqui, ican cuví ñáyivi tandihi ñuu nyihi ta tandihi ñuu nahnu, ñu siñ siñ sahan cahan. ¹⁶Ta ndi uchi ndiqui cha nyehun xiñi quití quiñi caa cuan cha cuví uchi tahan rey cuan, ican ra cuan cuasatási iñi chi ñaha cata iñi cuan. Ta cusandao ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyihi ra chi ña nu cayú ñuhu. ¹⁷Vatyí Nyoo sana ndaha ra añima rey cuan vatyí casacuvi ra cuhva cuñí maa

ra. Vatyí iñ ri cuhva cucaca xiñi ra, ta cucuhva ra ityi chi quití quiñi caa cuan cha cunyaca ñaha ti tari rey nyacua nya chino cava tuhun cahán maa Nyoo. ¹⁸Ñaha sihi cha nyehun cuan, ican cuví ñuu cahnu cha nyacá ñaha chi tandihi ra cuví rey síqui ñuhu ñáyivi.

18

Nu cua tiví ñuu Babilonia

¹Cha yaha tuhun ihya ta nyehi inga ángel cha vachi noó ityi andiví ta iyó xaan ityi chi ra. Ta ñuhu ñáyivi ndichin xaan nduvi chihin cha ndichin ra. ²Ta ñihi xaan ndusu ra ta canachaá ra, ta catyí ra:

—Cha yaha tuhun ñuu Babilonia cahnu cuan. Ta cha nanduví chi nu iyó ra ña vaha. Vehe tandihi nuu tatyí ña vaha cha nanduví. Ta taca saa ña vaha nanduví ñandihi. ³Vatyí tandihi ñáyivi tiví ñu cha cuenda cuatyí sacuvi ñuu Babilonia cuan. Ta ra cacuví rey, ra nyacá ñaha síqui ñuhu ñáyivi tari cha cachiyo ra chihin ñaha cuan cha cuví ñuu Babilonia. Casacuví ra cuatyí chihin ña. Ta ra cha cuahan cuanaxico ñuu Babilonia cuan candutyayí ra chihin cha xico ra chi ñu ñuu cuan vatyí tandihi cuhva ta sanaa ñu xuhun ñu chihin cha cata iñi ñu.

⁴Tyicuan ta chiñi nonga ndusu ityi andiví. Ta catyí chi:

—Quitá ndo ñuu chiña, nyoho cha cuví ndo ñáyivi chii, tacuhva cha ma cutahan ndo sacuvi ndo cuatyí chihin ñu chiña, tacuhva ma cutahan ndo ndoho ndo tari maa ñu. ⁵Vatyí cha caá ticuití cuatyí ñu ñuu cuan, nyacua cha chaá chi nu nyaá Nyoo. Ta Nyoo cha nichon iñi ra cha ña vaha sacuví ñu. ⁶Cuhva ndo chi ñu suri maa cha chaha ñu chi inga ñáyivi. Ta uvi ca chaha sananyehe ndo tindoho síqui cha sacuvi ñu. Cuhva ndo noo tindoho cunyehe ñu cha ñihi uvi ca chaha ican saha cha chaha maa ñu chi inga ñáyivi. ⁷Yucuan chaha cuhva ndo cha iyo xaan tahan ñu chihin ta sananyehe xaan ndo tindoho chi ñu tari cuhva cha sacahnu xaan ñu chi ñu ta cusí xaan iñi ñu. Vatyí catyí ñuu cuan chichi añima chi: “Ihya nyái tari noo reina. Ñima ñaha chihí yí cuví, ta ni ma cunyehe tindoho”, chicá iñi chi. ⁸Yucuan chaha chichi cha noo ri quívi cuquichi tindoho síqui ñuu cuan, cuquichi tuhun chihi, cuquichi tucuihya iñi ta coo tama ñuu cuan, ta cucayu chi chihin

ñuhũ. Vatyí iyó xaan tunyee iñi chi Nyoo Sutu yo ta cutachi tuñi ra chi ñu ñuu cuan.

⁹Ra cacuví rey siquí ñuhu ñayiví ihya tari cha cachiyó ra chihin ñaha cha cuví ñuu cuan, cuacu chaa ra, cunducuihya xaan iñi ra na cananyehe ra ñuhma cha cayú ñuu cuan. ¹⁰Ta nya sava ri cucuitayucu ra cha cuenda cha cayuhvi ra tindoho cuan. Ta cucatýí ra:

—¡Ndahvi yoho, ñuu cahnu Babilonia, ñuu cha chiyó xaan tunyee iñi chii! Vatyí noo tuhun cuhva ta chaá tindoho nyehún —cucacatýí ra.

¹¹Ta ra cha canaxicó ñáá ndihi cha canaxicó, suri cucuacu chaa ra ta cucanducuihya iñi ra cha cuenda ñuu cuan. Vatyí yorí ca sata cha canaxicó ra. ¹²Vatyí xicó ra xuhun cuaan, xuhun cuichin, yuu tyaquí, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihi cha chingó chihin noho landa, vitu tyaquí, ta caa cha cuví bronce, ta caa cha cuví hierro, ta yuu cha cuví mármol. ¹³Ta nyisó tucu ra canela, ñáá ndihi ca cha vixi chahán, tari cutu, mirra, perfume, vinu, acetye, yutyí paan finu, ta trigu. Ta suri nyisó tucu ra quití cuenda carga, ta mbee, caballu, carru. Ta nyacua nya añima ndahvi cha cuví musu ra ta caxico ra. ¹⁴Ta catýí ra chi ñáyiví ñuu cuan tyehé caa:

—Ñahri ca cha tyaquí cha chiyó chuun, cha tahán xaan iñun. Ta cha cuachiyo tandihí cha tyayíun. Ta ma cunañihí ca maun tandihí cuan —catýí ra.

¹⁵Ra cha caxicó tandihí ihya, candutyayíi ra cha cuenda cha satá ñu ñuu cuan cha xicó ra. Cañi cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya iñi ra. ¹⁶Ta cucatýí ra:

—¡Ndahvi ñuu cahnu cuan! Cuví chi tari noo ñaha sihi cha ñihno sahma lino finu, sahma tyacu nyaa ta tyacu cuaha. Ta iyo yihí ña xuhun cuaan, ta yuu tyaquí ta perla. ¹⁷¡Vatyí noo tuhun ri cuhva ta ndihí cha tyayíi xaan cuan! —cucatyí ra caxico cuan.

Ta tandihí ra cuví capitán cuenda barcu, chihin ñu cañocho chichi, tandihí ñu casahá tyiño nu tyañuhu, nya sava candoó ñu. ¹⁸Ta cha cananyehé ñu ñuhma cha cayú ñuu cuan, canachag ñu, ta catýí ñu:

—¿Ñáá nonga ñuu chiyó tari ñuu cahnu ihya? Ñahri ca —cucatýí ñu.

¹⁹Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catýí ñu:

—¡Ndahvi nduvi yo cha cuanaa ñuu cuan! Vatyí chihin cha tyayíi ñuu cahnu cuan ndutyayíi tandihí yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chil! —catýí ñu.

²⁰Soco cusiñi cuñi nyoho cha cuenda ñuu cuan, nyoho cha iyó andiví, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusiñi cuñi ndo vatyí cha cuenda ndo ta tachí tuñi Nyoo chi ñu cuan, ta cha cuenda cha ña vaha cha sacuví ñu chihin ndo.

²¹Tyicuan ta noo ángel cha iyó xaan tunyee iñi chi, nacoñehé ra noo yuu molino cahnu xaan ta tuchi ra cuahan nu tyañuhu, ta catýí ra:

—Suri tyehé caa cundihí tuhun ñuu Babilonia cahnu, Ta ni inga ca chaha ta ma nyehe ca ndo chi ñu. ²²Ta ma cuiñi con yaa ityi chichi ñuu cuan, vatyí yorí ca cusacuacu arpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihi tyiño. Ta ni ma tyacu ca cha cayu molino. ²³Ta ni nonga ñuhũ tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasi ra canaxicó cha chiyó ñuu cuan, ican ra cuví ra cahnu ca cuví nuu ñáyiví iyó siquí ñuhu ñayiví. Nyoho ñu Babilonia, sandaví ñaha xaan ndo chi tandihí ñáyiví iyó siquí ñuhu ñayiví chihin cha satasi ndo.

²⁴Vatyí cuaha xaan niñi ra cacuví profeta Nyoo iñi chichi ñuu cuan vatyí chahñi ñu chi ra. Ta iñi tucu niñi ñu cuenda Nyoo, ta niñi tandihí ñu cha cachahñi ñáyiví nicahnu ñuhu ñayiví.

19

¹Cha yahá cuan, ta chihñi noo ndusu cha cuaha vavaha ñáyiví nya andiví. Ta catýí ñu:

¡Cahnu xaan cuví Nyoo! Sutu Mañi yo, Nyoo cuví ra ra sacacu chi yo. Ta chi maa ra tahán chi cha sacahnu yo, tyi iyó xaan tunyee iñi chi ra.

²Vatyí vaha sacutuñí ra chihin cha ndaa ta chihin cha ndicha.

Tachí tuñi ra chi ñaha cata iñi cuan.

Vatyí sativí xaan ña chi ñáyiví iyó siquí ñuhu ñayiví chihin cha quíñi caa cha sacuví ña chihin ñu.

Ta yucuan chaha tachí tuñi ra chi ña, ta cha cuenda cha chahñi ña chi ñu sacuví tyiño nuu ra.

³ Ta quichaha catyí ñu inga chaha:

—¡Cahnu xaan cuví Nyoo! Ñuhma cha cayú ña, ma cucuita ca maa cha ndaa chi ityi siquí —catyí ñu.

⁴ Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chi Nyoo nu nyaá ra nu tyayu ra. Ta catyí ra:

—¡Na cuvi chi tyicuan caa! ¡Cahnu xaan cuví Nyoo! —cacatyí ra.

⁵ Ta nu nyaá tyayu Nyoo, tyacu noo ndusu, ta catyí chi:

Sacahnu ndo chi Sutu yo Nyoo

Tandihí nyoho cha sacuví ndo tyiño nuu ra, ta quichahá ndo chi ra, vasi nyihi ndo, o chahnu ndo.

Nu cua tandaha ra cuví Mbee Luhlu chihin ñáyiví chinó iñi chi ra

⁶ Ta chihñi tiquí noo ndusu tari cha cuaaha vavaha ñáyiví cahán, tari ndusu nu cuaaha xaan yuvi ndutya, ta tari cha ñihi xaan cahán savi. Ta catyí chi:

¡Cahnu xaan cuví Sutu yo Nyoo! Vatyí cha quichahá nyaca ñaha ra ta iyó tandihí tunyee iñi chi ra.

⁷ Na cusii cuñi yo ta na cutu yo chihin tusii iñi. Na sacahnu yo chi ra.

Vatyí cha chaá cuhva cha cua coo yo vico tandaha ra cuví Mbee Luhlu.

Ta yoó cuacuví yo tari noo ñasihi ra, cha nyatú tuhva ri yo quiví tandaha yo chihin ra.

⁸ Ta maa yo cucuihno yo sahma linu finu, ndii ta cuichin.

Vatyí sahma linu finu cuan cuñí chi catyí cha vaha cha sacuví ñáyiví cuenda ra.

⁹ Tyicuan ta quichaha catyí ángel cuan chi:

—Tyaa tuhun ihya nu tutu: “¡Sii xaan cuví chi ñu cha nyaá cuhun vico tandaha ra cuví Mbee Luhul!”

Ta catyí tucu ra chii tyehe caa:

—Ican ihya cuví tuhun ndicha Nyoo —catyí ra chii.

¹⁰ Tyicuan ta chicuiñi chiti chaha ángel Nyoo cuan vatyí sacahni chi ra, soco catyí ra chii:

—Ma sacahnun chii, vatyí musu Nyoo cuví tucu yuhu tari yoho, ta tari tandihí ra yañi yo cha nyicón tuhun ndicha ra Jesucristo. Chi Nyoo tahán chi sacahnu yo —catyí ra chii.

Vatyí tuhun ndicha ra Jesús, ican cuví cha chahá cuhva chi ra cacuví profeta, ra cha cachahá cuenda tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehi tanuñi andivi. Tyicuan ta tuví noo caballu cuichin. Ta ra yosó chi ti nañí ra Ra Ndicha Cha Nii Iñi Sacuvi Tyiño Nu Nyoo. Vatyí chihin cha ndaa sacutuñi ra chi ñáyiví, ta cañi tahan ra chihin cha ña vaha chihin cha ndaa. ¹² Xiño xaan chiti nuu ra tari cha cayú ñuhu. Ta cuaaha xaan corona yihí xiñi ra. Ta nyaá noo sivi chi ra cha noo tuhun ri maa ra chitó ra ñáá sivi nyaá chi ra. ¹³ Ta ñihno ra noo sahma iñi niñi. Ta maa ra nañí ra Tuhun Cahán Nyoo. ¹⁴ Ta canyicón sindaro andivi chi ra, cañihno ra sahma linu finu, sahma cuichin ta ndii. Ta cayosó ra caballu cuichin. ¹⁵ Ta chichi yuhu ra nañí Tuhun Cahán Nyoo cuan, quitá noo mityi cha xaan ni nduvi chiyo yuhu, vatyí chihin tuhun cahán ra cusañicuehe ra ñáyiví iyó siquí ñuhu ñayiví. Ta ñihi cunyaca ñaha ra chi ñu tari chihin noo yutun caa. Maa ra cutachi tuñi ra chi ñu tari noo ra cha sacunyihi tichaha ndivi chihin chaha ra. Ta cusacoho ra vinu uva chi ñu, ta ihya cuñí chi catyí tyi cuxaan Nyoo chihin ñu ta cutachi tuñi ra chi ñu vatyí chaha xaan ñu tisihi chi Nyoo ra iyó tandihí tunyee iñi chii. ¹⁶ Ta nu sahma ra ta nu sihin ra cuan nyaá letra cha catyí tyehe caa: “Ihya cuví Ra cuví nuu chi tandihí rey. Ta ican ra cuví nuu chi tandihí ra nyacá ñaha.”

¹⁷ Tyicuan ta nyehi chi nonga ángel nanyaá ra nu ñanyii. Ta chihin tandihí fuerza ra canachaa ra chi tandihí saa cha candavá ityi andivi, ta catyí ra chi ti:

—Ñaha ndo ta candu iin ri ndo vatyí cux-iñi ndo cha chahá Nyoo cachi ndo. ¹⁸ Vatyí cachi ndo coño ra cacuví rey ta ra cuví nuu chi sindaro ta chi ra ndachan xaan saha chii. Ta cachi ndo coño caballu ta coño

ñuhu ra cha cayosó chi ti. Cachi ndo coño tandihi ra, vasi ra yori chitoho o ra iyó chitoho, vasi ra nyihi o ra chahnu —catyi ra chi saa.

¹⁹ Tyicuan ta nyehi chi quiti quiñi caa cuan ta chi ra cacuví rey cha iyó siqui ñuhu ñayivi chihin sindaro cuenda ra, vaty candu iin ri ra vaty cacañi tahan ra chihin ra yosó caballu cuichin cuan ta chihin sindaro cuenda ra. ²⁰ Ta tiin ra chi quiti quiñi caa cuan iin ri chihin ra cuví profeta cuendu cuan, vaty chihin nuu quiti quiñi caa cuan ta sacuví ra cuendu cuan milagru, ta sandavi ñaha ra chi ñáyivi cha chaha chi cunyaa tuñi quiti quiñi caa cuan, ta chi ñu sacahnú chi xiñahñu ti. Ta nyitó nyitó ra ta tuchi ra yosó caballu cuichin chi ninduvi ra nu ñuhu cha cayú chihin azufre. ²¹ Ta tandihi ca ñu cachihi ñu chihin mityi xaan cha quitá yuhu ra cha yosó caballu cuichin cuan. Ta tandihi maa saa, cachachi xaan ti coño ñu.

20

Nu sañahá chi cuenda noo mil cuiya

¹ Cha yaha tuhun cuan ta nyehi chi noo ángel vachi noó ityi andivi ta yihí ndaha ra ndaha ticu yuvehe yavi cono cuan. Ta yihí tucu ndaha ra noo cadena cahnu. ² Ángel ihya tiin ra chi coo cahnu cuan, quiti cha cuví Coo Chahnu cuan, cha cuví cuihna. Ta chahñi ra chi ti chihin cadena noo mil cuiya. ³ Ta tuchi ra chi ti yavi cono cuan. Ta yucuan nacasi ra chi ti. Ta tyaa ra noo sellu yuvehe cuan tacuhva cha ma sandavi ñaha ca ti chi ñáyivi iyó siqui ñuhu ñayivi, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quivi.

⁴ Yaha cuan ta nanyehi cuaha xaan tyayu tayucú. Ta nuu chi nyicú ñu cha chicoo ityi chi vaty tachi tuñi ñu chi ñáyivi. Ta nyehe tiqui aña ñu chahnya ñáyivi xiñi cha cuenda cha cahan ñu tuhun Nyoo cha chaha cuenda ra Jesús chi ñu. Ta maa ñu, ña sacahnú ñu chi quiti quiñi caa cuan, ni chi xiñahñu ti, ni ña chaha ñu chi ñu cha cunyaa tuñi ti tyaan ñu, ni ndaha ñu. Nyehi vaty ican ñu ihya, canandoto ñu ta chicunyacá ñaha ñu chihin ra Cristo noo mil cuiya. ⁵ Ican ñu ihya cuví cha nandoto cha xihna ca. Soco inga ityi ndiyi ña nandoto ñu nyacua nya cha yaha mil cuiya

cuan. ⁶ ¡Si! xaan cuñi ñu ii cuenda Nyoo, ñu cha tahán chi nandoto cha xihna ri! Ta ma cahun ñu tuhun chihi cu uvi nu cuví anyaya nu tachi tuñi Nyoo chi aña ña vaha. Vaty cucuvi ñu sutu cha cuenda Nyoo ta cuenda ra Cristo. Ta cucunyacá ñaha ñu mil cuiya chihin ra. ⁷ Ta cha yaha mil cuiya cuan, tyicuan ta cundachi cuihna nu ñohó ra vehe caa. ⁸ Ta cuquita ra, ta cusandavi ñaha ra chi ñáyivi nicahnu siqui ñuhu ñayivi. Cuquita ra vaty cusandavi ñaha ra chi ñáyivi Gog ta Magog, ñu xaan iñi chi Nyoo. Ta cusandu iin ri ra chi sindaro nuu cuan vaty cahun ra cuaty. Cuaha xaan ra, tari maa ñiti yuhu tyañuhu. ⁹ Tyicuan ta cuahan coyo ra nicacahnu siqui ñuhu ñayivi. Ta cachasi cutya ra nu iyó ñu cuenda Nyoo nuu Jerusalén nu cuñi xaan Nyoo. Soco Nyoo cusaquichi ra ñuhu ityi andivi ta cucahmi chi chi tandihi sindaro cuan. ¹⁰ Ta cuihna cha sandavi ñaha chi ñu, cutuchi Nyoo chi ra chichi anyaya cahnu nu cayú ñuhu chihin azufre, nu tuchi tucu ra chi quiti quiñi caa cuan ta chi ra cha cuví profeta cuendu. Ta yucuan cunyehe ra tindoho tyicuan ri maa ndiyaca ta ñiyaca.

Nu cua cutuñi chi ñáyivi nu tyayu cuichin nu nyaá Nyoo

¹¹ Tyicuan ta nyehi noo tyayu cuichin cahnu. Ta nyehi chi ra nyaá nuu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cucunyacá chi. ¹² Ta nyehi chi tandihi ñu ndiyi, ñu chahnu ta ñu nyihi, tayucú ñu nuu Nyoo. Tyicuan ta canuña libru cha nyaá tandihi cha sacuví ñu quivi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu náá ndihi cha chinyacuví ñu cha nyaá nu tandihi libru cuan. ¹³ Ta tyañuhu nacuhva cuenda chi chi ndiyi cha cumí chi. Ta tandihi nu nyicú ñu chihí nu nyacá ñaha Tuhun Chihi, nacuhva cuenda chi ndiyi cha cumí chi. Ta tandihi ñu cuatahan chi chi ñu yoso cuhva cha casacuví ñu. ¹⁴ Tyicuan ta cundihi Tuhun Chihi cuan ta ñahri ca nu cuacunyicu ñu chihí, vaty cutuchi Nyoo chi ninduvi tahan cuan chichi anyaya cahnu nu cayú ñuhu. Ta ican ihya cuví Tuhun Chihi Cu Uvi. ¹⁵ Ta yucuan tuchi ra chi ñu cha ñahri sivi nyaá

nu libru cha cuenda ñáyivi cha cua conyito chihin Nyoo tyicuan ri maa.

21

Nu nyehę ra Juan andivi chaa ta ñuhu ñayivi chaa

¹Yahā cuan ta nyehi noo andivi chaa ta noo ñuhu ñayivi chaa, vaty andivi ta ñuhu ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan. ²Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvii chi tari noo ñaha cha cua tandaha chihin noo ra, tyicuan caa nduvii chi. ³Ta chiñi noo ndusu ñihi cha quita ityi andivi, ta catyi chi:

—Nyehę ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuvi ñu nuu ra. Ta cua cunyya ra chihin ñu. Ta cua cuvi ra Nyoo cuenda ñu. ⁴Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca iñi ñu. Ma cuacu ca ñu vaty ma nyehę ca ñu tindoho. Ta ma nyehę ca ñu cha uhvi. Vaty tandihi cha chiyo, cha yahā tuhun —catyi chi.

⁵Tyicuan ta Nyoo, ra cha nyaá nu tyayu cahnu, catyi ra:

—Nyehę. Sanduchai tandihi maa cha iyó.

Ta catyi tucu ra:

—Tyaa tuhun ihya, vaty tuhun cahín ihya, ndicha. Ta cuvi cunii iñun vaty tuhun cahín cuchino cava —catyi Nyoo chii.

⁶Yahā cuan ta catyi tucu ra chii:

—Cha tandihi ching cava vityin. Yuhu cuvi ra xihna cui, ta yuhu cundoi nu ndihi tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutiyiahvi ñu. ⁷Ñu cha cuvi chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi.

⁸Soco ñáyivi cha yuhvi xaan, ñu cha ña chinó iñi, ñu cha quiñi iyó, ñu cha chahñi ñáyivi, ñu iyó chihin rayi, ta ñima yii ñu cuvi, o ra iyó chihin ñusihi ta ñima ñasihi ra cuvi, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi tuhun ñu chichi anyaya cahnu nu cayú ñuhų chihin azufre, nu cuvi Tuhun Chihi Cu Uvi, nu tachi tuñi Nyoo chi añima ña vaha.

Nu nyehę ra Juan yoso caa cucuvi ñuu Jerusalén chaa

⁹Tyicuan ta quichi noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyi ra:

—Ñaha, ta cusañahi chuun yóó ñu cuvi ñu yihi cuenda ra Cristo, ñu cha cuvi tari ñasihi ra, tyi ra cuvi Mbee Luhlu cuvi ra —catyi ra chii.

¹⁰Ta Tatyí li Nyoo chinyaca chii noo yucu cahnu ta sucun. Ta sañahā ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañahā ra chii. ¹¹Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino. ¹²Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan. ¹³Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii. ¹⁴Uchi uvi tahan yuu yihi nu sama ra nu cacų chaha chi. Ta nuu yuu cuan nyaá sivi ndi uchi uvi apóstol cuenda ra cuvi Mbee Luhlu.

¹⁵Ta ángel cha cahán chihin cuan, yihi ndaha ra noo yutun xuhun cuan, vaty chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan. ¹⁶Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuan cuan. Ta tyicuhva ra, ta quita uvi mil uvi cientu kilómetro. Ta inuu ri cha cañi ta cha sucun ta cha quehen. ¹⁷Tyicuan ta tyicuhva ra nu sama nicachico ñuu cuan. Ta quita uñi xico cumi metru cha cocon, tari tyicuhva ñáyivi, tyicuan caa tyicuhva ángel cuan.

¹⁸Chihin yuu jaspe samā yuhu ñuu cuan. Ta maa maa ri xuhun cuan cuvi ñuu cuan. Tari caá noo ino cha ndi vavaha, tyicuan caa. ¹⁹Ta yuu cha cuvi cimientu cuan tandihi ri maa nuu yuu tyaqui cuvi: yuu cha xihna ri cuvi jaspe; yuu cha cu uvi cuvi yuu zafiro; yuu cha cu uñi cuvi yuu ágata; yuu cha cu cumi cuvi yuu esmeralda; ²⁰ta yuu cu ohon cuvi yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu iñ topacio; ta cha cu

uchi crisoprasa; ta cha cu uchi iin jacinto; ta yuu cu uchi uvi cuví amatista. ²¹Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta chingo chi chihin noo ri perla. Ta nu cuví ityi cahnu ñuu cuan, maa ri maa xuhun cuan cuví, tari ino cha xiño.

²²Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihí tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu. ²³Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan. ²⁴Tandihí ñu cha cacú aña, cucaca noo ñu nu ndichin ñuu cuan. Ta ra cacuví rey siquí ñuhu ñayiví cunyaca ra cha tyayii ra ta cuhva cuenda ra tandihí cha cahnu cacuví ra chi ñuu cuan. ²⁵Ta ma nacunyasi yuvehe cha ñicahñu, ta yucuan ma coo cha cha cuaa. ²⁶Ta tandihí cha tyayii, ta cha cahnu, cha iyó siquí ñuhu ñayiví cuchaa chi nya ñuu cuan. ²⁷Soco ma cuví quihvi cha quiñi caa. Ni noo ñu sacuví cha quiñi caa, ni ñu cuendu ma cuví quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyí cuconyito ñu chihin ra tyicuan ri maa.

22

¹Tyicuan ta sañahá ángel cuan noo yuvi cuii vavaha chii. Nduya cha chahá cha conyito yo cuví. Cuii vavaha tari noo yutyí finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu. ²Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siquí ñuhu ñayiví. ³Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra. ⁴Ta cunyehe ñu chi ra chihin nuu ñu. Ta cua cunyaa sivi ra tyaan ñu. ⁵Ta ma coo ca cha cha cuaa yucuan. Ta ñu coo yucuan ma cuchihuhu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

⁶Tyicuan ta catyí ángel cuan chii:

—Ihya tuhun ndicha cuví, ta cuví cunii iñun vatyí cuchino cava tuhun ihya. Ta suri maa Sutu yo Nyoo ra cahñ chihin yuhu ra cacuví profeta cuenda ra ta cha naha, ican ra tachí ra chí ángel ra, vatyí sañaha ra chí ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷—¡Cha cuñi quichi! —catyí ra.

¡Sii xaan cuñi ñu cha sacuví cuhva cahán tuhun Nyoo cha nyaá nu libru ihya!

⁸Yuhu ra Juan, chiñi tuhun ihya. Ta nyehi tandihí ihya. Ta cha yaha nyehi ta chiñi, chicuiñi chiti chaha ángel cha sañahá cuan chii, vatyí sacahni chi ra. ⁹Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quivi cha cuchino cava chi. ¹¹Soco saña chi ñu quiñi iyó, na sacuví ca maa ñu cuhva cuñi maa ñu. Ta ñu sacuví cuatyí na sacuvi ca maa ñu. Soco ñu sacuví cha vaha, na sacuvi ca ñu cha vaha. Ta ñu ii, ñu nacuhva cuenda aña chi Nyoo, na cu ñi ca iñi ñu chihin ra —catyí ra chii.

¹²Ta Sutu Mañi yo catyí ra:

—Nyehe ndo. Cha cuyatyin quivi quichi. Ta cutiyahvi chi tahan tahan ñáyivi yoso cuhva cha sacuví ñu, tatu cha vaha o cha ña vaha. ¹³Yuhu cuví ra xihna cuiri ta yuhu cundoi nu ndihi tuhun, yuhu iyé nu quichaha tandihí ta cucoo que nu cundihi tuhun —catyí Sutu Mañi yo.

¹⁴Sii xaan cucuvi chí ñu sanduvii sahma o aña cuví cuan, vatyí coo ityi chí ñu cachi ñu chiti yutun cha chahá cha conyito aña yo tyicuan ri maa. Ta cuví quihvi ñu yuvehe ñuu cuan. ¹⁵Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihí ra o yii ñu cuví, ñu chahñi ñáyivi, ñu sacahnú xitohyo, ta tandihí ñu ñii cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyí sacoto ra tandihí tuhun ihya chí ñu nyicú vehe ñuhu. Yuhu cuví ñáyivi chahnu chi rey David. Ta vachi tiqui tata ra ñandihí. Ta cuví tiqui tiño cañu cha xiño, cha caña cha ñaa ca —catyí ra.

¹⁷ Tatyí li Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñí tuhun ihya, ta catyí ñu chí ra:

—Ñaha —catyí ñu.

Ta ñu ityi ndutya cha conyito yo chihin, ta tandihí ñu cuñí quichi, na quichi ñu ta coho ñu ndutya cha chahá cha conyito aña yo, ta ñahri cutiyahvi ñu.

¹⁸ Ta yuhu catyí chí tandihí ndo cha chiñí ndo tuhun Nyoo cha nyaá nu libru ihya, yuhu sacoté chí ndo noo tuhun ihya: Tatu

nya noo ñáyivi sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siquí ñu. ¹⁹ Ta tatu nya noo ñáyivi tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chí chí ñu cha nyaá nu libru cha cahán chí tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chí chí ñu cha vaha cha cahán nu libru ihya. ²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñí quichi —catyí ra.

Ta yuhu catyí:

—Na cuvi chí tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chí yo. Ta na cuvi chí tyicuan caa.